

經部詩類二九册

係一談

北京大學《儒藏》編纂與研究中心

《儒藏》精華編第二九册

首席總編纂 季羨林

項目首席專家 湯一介

湯一介

總

編

纂

龐

樸

孫欽善

安平秋 (按年齡排序)

王承略

本

册

主

編

董治安

鄭傑文

儒 藏 精華編凡例

爲儒 家 經典和 、中國傳 反映儒家思想、體現儒家經世 統文化以儒家思想爲中心。 《儒 做 人原 藏

一、《儒藏 》精華編 爲《儒 藏 》的 部分,選收《儒 則的

典籍的

議編。

收書時

限自先秦至清代結束

藏 中的精要書籍

互見。 漢文寫作的儒學著作,編爲海外文獻部類 寫者一律收其釋文文本。 已收入入選的個人叢書或全集者,僅存目録,並 分類法分類,大類、小類基本參照《中國叢書綜 土文獻。 中國古籍善本書目》,於個別處略作調整。 三、《儒藏》精華編所收書籍,包括傳世文獻 出土文獻單列爲一個部類,原件以古文字書 傳世文獻按《四庫全書總目》經史子集四 韓國、日本、越南儒學者用 凡單 録》和 注 和 書 明 部 出

> 不改編,保持原書的完整性和獨 四、所 收 書 籍的 篇目 卷次,一 仍底本原 立 性 貌 不 選

編

爲主,酌校異同。 勘價值的版本爲校本。 確定内容完足、精確率高的 五、對人選書籍 校記 進 力求規 行簡 出校堅持少而精 要校勘。 版本爲底本, 範、精煉 以對 以 精 校 校 選 爲主 有校 E 誤

例,進行 六、根據現行標點符號用 規範 化標點。 專名號除 法,結合古籍標 書名號用 角 號 點 通

落。正文原已分段者,不作改動。 外,其他一律 七、對較長的篇章,根據文字内容, 省 略

千字以

内的

短文

適

當

劃

分段

般不分段。

及其 出 及整理時所確定的底本、校本(舉全稱後括注簡 介紹作者生平、該書成書背景、主要内容及影 現 順序前詳後略 他有關情況。 八、各書卷端由 重複出現的作者,其生平事蹟按 整理者撰寫《校點說明》,簡 響,以 稱 要

九、本書用繁體漢字豎排,小注 一律排爲單行。

《儒藏》精華編第二九册

詩 廣 傳

王 震 校點

目 録	唐風 五〇	魏風四六	齊風 四三	卷二	鄭風三七	王風 三三	衛風三〇	鄘風 二五	邶風 一五	召南 八	周南 一	卷一		校點説明 一			目 録		
						高 頌 ー / 子				大雅一〇八		小雅 七〇	卷三	豳風 六四	曹風 六二		陳風 五九	秦風 五五	

校點説明

《詩廣傳》是王夫之引申和發揮《詩經》的雜感 《南》和十三《國風》,第三卷論《小雅》,第四卷論 《在》,第五卷論《周頌》、《魯頌》和《商頌》。據王 《大雅》,第五卷論《周頌》、《魯頌》和《商頌》。據王 《大雅》,第五卷論《周頌》、《魯頌》和《商頌》。據王 《大雅》,第五卷論《周頌》、《魯頌》和《商頌》。據王 《大雅》,第五卷論《周頌》、《魯頌》和《商頌》。據王

其他著作合刻行於世。今可見者有:《詩廣傳》在王夫之生前并未刊行,後與王氏

二),王夫之七世從孫王世全在長沙刊行的守遺經二),王夫之七世從孫王世全在長沙刊行的守遺經

南船山書院補刻六種,與同治金陵刻本統稱「曾刻種,是爲金陵刻本,光緒十三年(一八八七)又在湖種,是爲金陵刻本,光緒十三年(一八八七)又在湖種,是爲金陵刻本,光緒十三年(一八八七)又在湖本」,

的王夫之手稿六種,鉛字排印「船山遺書」本,通稱三),上海太平洋書店依曾刻本體例,補入新發現民國十九年至二十二年(一九三〇—一九三

「太平洋本」

館,述數十萬字,其中包括《詩廣傳》,現藏湖南省圖書述數十萬字,其中包括《詩廣傳》,現藏湖南省圖書此外,乾嘉年間,衡陽劉介之曾手鈔王夫之著

是爲王嘉愷鈔本,現藏湖南省博物館。王嘉愷,或鈔録王夫之著述十一種,内含嘉愷所鈔《詩廣傳》,又乾隆年間,王夫之五世從孫王嘉怡、王嘉愷

EIT 譔 行,每行二十六字,凡五卷,各卷首頁題「明王夫之 鈔本高二十四點七釐米,寬十四點四 嘉愷當爲王夫之四世、五世從孫,而非曾孫、玄孫。 父諱,但王氏曾孫十九人中亦無「永綿」,蓋永綿 諱皆作「永某」,且「某」字皆從糸,疑 王氏玄孫三十九人之中。 謂王夫之玄孫,但不見於《船山公年譜 「綿」字作「綿」,查《年譜》所列王氏曾孫十九人名 識 《嘉愷録」八字,卷末題「詩廣傳卷×終」六字,無 無目録,無序跋。 鈔 本不避 「綿」字是嘉 釐米,每頁九 清 帝韓 後編》所 而 惜 列

勘 版的 出 調 詩 記 陽先生據嘉愷鈔本、劉 「船山 廣傳》收入其中。 重 王孝魚先生點校本人以曾刻本爲 詩廣傳》整理本,有一九六四年中華書局 新 一遺書」基礎上,重 校 八點; 一九八二年,湖 一新精校編印《船 氏鈔本校曾刻本所 南 岳 底本,參照 麓 山 書 全書》 社 出校 在 舊 周 出

篡改原著而爲人詬病"太平洋本校勘不精,錯字諸本中,王世全守遺經書屋刻本因任意删節

館 較多; 校本,對上述兩種整理本多有參照。 量較高,更接近稿本。 山 本,更在王刻本之上。 鈔 病,比較忠實於原著,因 遺 藏王嘉愷鈔本爲底本,以曾刻本(簡 遺稿,與劉氏所鈔當屬同一系統,但嘉愷鈔本 福爲底本,并參校諸本,力求矯 惟曾刻本以當時衡陽劉審吾家藏劉介之所 此次整理,即 E 而此本非但優於劉 嘉 愷據王氏 正 以 家藏 王刻 湖 稱 南 曾本)爲 本的 省博 鈔 氏 録 物 質 船 鈔 弊

次校點工作提供了王嘉愷鈔本複印件,特致謝忱。「繇」、「由」互見,今皆從鈔本。湖南省博物館爲本原避明諱、「由」字作「繇」,曾本皆仍其舊,鈔本則原避明諱、「由」字作「繇」,曾本皆仍其舊,鈔本則

校點者 莊大鈞

嘉愷

明王夫之譔

周

南

也。 也。 忠有 是故文者白也,聖人之以自白 文,猶夫無文而以將忠,聖人之所不用也。 用;情、才者,性之撰 琴瑟友之」,「鐘鼓樂之」,不匿其樂也。 周尚文,文以 實,情有止,文有函 匿天下之情,則將勸天下以匿情矣。 夏尚忠,忠以用性, 悠哉悠哉,輾轉反 用 情。 也。 側」,不匿其哀也。 ,然而非其匿之謂 殷尚質,質以 質、文者, 忠之 夫無 忠而 而白天下 以 起 用

> 文無 情,而 之謂 澹以 不能 隱而 之賓客,詔之鄉人,無吝無慙,而節文固已 淵藪,而佛老進矣。 自有之美子,而 相匿以不白之情,而人莫自白也。 遷心移性而 而不報,取其自有之美子,而視爲愁苦之 自有兮美子,蓀何以兮愁苦」,愁苦者,傷 非其情之不止而文之不函也。 不章。 結 也。 終乎怨; ●怨之必恤, ❷以旁流於樂, 久, 而 其詩曰「豈不爾思,畏子不奔」,上 匿其樂,樂幽 淫者,傷之報 必於旁流。 白情以其文,而質之鬼神,告 不自知。 謂 他人父,謂他人昆。 性無 周衰道弛,人無白 也。 旁流 不通 傷 之哀,瀏慄慘 耽樂結哀,勢 情 而報,舍其 匿其哀,哀 無不順, 「夫人 傷 下

- 瀏」,曾本作「懰」。
- 必」,曾本作「不」。

廣傳卷

周 南

之爲天下基,未有不以忠基者也。 具矣。故曰:《關雎》者,王化之基。聖人

不爲 天道 之獨 未有 以 其安子,督弟 眩 身,身未有待於言言者也。 養人也。 則莫之或言而若 順,不如其綏婦。 成於心 善聰明者,養其耳目,魂充魄定,居然而 未有可以言言者也。 而 徐 樂之,●君 誇 命 至 不以名高者矣。 得不明。 聖人有 子傲 ,有養 也 也。 若夫 道,道且 以弟煽 聖人之於天下,視 獨至,不言而化成 既 而 以 子猶不 督耳以 弗如 無 養 友,不如 或言之,君子所爲 妻之尤, 魄定魂 督矣。 而 天 猶 ·謂命也。 人而不令與,未有不 聰,聽熒 化成家者,家如其 何 弗若也,聖人之於 通,而神順 其裕弟;督 督子 也。 而 督 抑可 如 以 目 天下,聖 雖然,則 加 孝,不 得 以 其家,家 而令與 抑 以 於性 明,視 不 婦婦 其 天道 聰 鋭 必 以 如 受 X

> 容慢。 矣。 者也。 相 目 家,訟言以督,不 望之,琴瑟鐘 自愛者也。 魄,而後夫人自愛之心起。 以實望者矣。 匪太姒能 少長,得主 而親於君子,而奚求而不成, 及也久矣。 構,而天下之至賾、交挌 榮之以名以暢其 《關雎》之道,俾不自弛 故《易》 勿檠乎 丽 親之而人不容疏,尊之而 鼓 如 故曰:《關雎》者,風化 若夫言者,相窮於名 日 而榮之? 一身,文王復 順則委之若命,是 悁人。不然,異乎身 咸 魂,惠之以實以 其 輔 環 頰 而未已,③其 德教 舌, 奚 宫 輾 其 中之 轉 以 后 3者,行 感 心 反 妃 言 而 也。 與 以 哉? 尊 側 之尊 厚 之 亡 人 不 耳 鬼 不 平 其 末 實 視 而

道

生於餘心,心生於餘力,力生於餘

格」,曾本作「格」。

[「]藥」,曾本作「警」,下「藥」字同「諄」,曾本作「很」。

能安。 情。 外, 矣。 古之 情。 絺 覃 所事之中, 營之,弗恤 夫傲侈。 自 下 而 必聖也,天下未有 夫愁苦; 事之中,敝 ×, 前 絡 不遺 理者也 則益安於所 勞事 惉滯 無餘 不 知 故於道 之勞,亦 俯俯 人不必 賈 道 愁苦之情,生夫攰倦; 也。 「生夫蕩佚; ●乍蕩佚 者, 力趨 以 一於道, 者 則餘 敝 仰 道 無 涵 而 天物 矣。 惉滯 以樂天物, 以 黄鳥之飛鳴 以 餘者,莫之能 求有餘 有聖人之才, 於 事 昕 奚 天 供傲侈之爲,心注之,力 故安 之中。 所 不安而 之情 也 夕 事 下 事之外。 , 哉 ___ 而 不 無 也。 而 ? 東其 餘 無惉 殊乎黄鳥 能行者也。 如其 見其 行焉 於 集 畫 惉 得 心 己 滯 止 而 焉 餘於所 (有餘 之謂 有餘 滯之情, 力, 焉 而 劫倦者,不 焉, , 初 有聖 則 乃 耳。 甘之,生 之寓 無 以 終 畫 則 聖,非 情 人 事之 安於 餘 於 樂 知 **[IX** 寓 ^ 也 之 其 葛 生 情 所 目 濩 目 天

> 以 也 面 餘心,「 盪 0 圃 滌 以 立」者,其 絺 惉 歸 以給 滯 寧 而 父 無餘之謂 安天 而 母 有餘力,「害澣 愐 下 有 於 乎 餘 有 餘 道 者 故詩 害 也 否 者 IE. 耐 牆 所 有

廣也。 其度 也。 焉 真而必得 忘其所忘,慎之密 傾筐」矣,然且「寘之周 示「不永懷」 采采卷耳」,則 非 方寘 有 不 「采采卷耳」,『嗟我懷人」,則「不盈 所 忘其所 恒 之頃, 慎 , 其 一焉,故 面 所,慎 其 忘 無 經 嗟 則 不 丽 也。 緯 既 也,非 日 我懷 忘其 慎,故曰 之也 忘之 廣 忘 也。 行」焉, 所 人」矣,登 慎之乎方真之頃 有 其 而 不 密也 素,是 所不 不 且 忘, 大忘 故 容自持 至矣。 ·忘,心 Щ 日 以 密 而 酌 慎 則 可 矣。 寘, 也 慎 之 口 不

[「]有巨」,曾本作「长真」。

有恒」,曾本作「本慎」。

之謂也 殆 景 煩 意 際 也 傷, 也。 損 M 一不舍 乎無 ,視方升之旭 矣。 民 役 其 龃 知其 《菀,情 於 度, 示以 於 放故 中夏之氣 事, \sim 醻 《葛 此 故 永 不 酢 沈 目 屨》 日 傷 廣 而 永 Z 1 熒足 性 廣 之云 矣。 通 懷,知 》編 繁 1浮,其 也 日 彼 而 矣。 心 縮 了者 情 之謂 世 駤戾之情,移乎 於 廣 三旦盈 其永懷 一變隨之矣。 視 有 忘 非 野 魺 也 此 萬 其 裳 中 可 也 當 所 圃 矣。 以 方 枵 衣 前 不 姑 猶 裕 澽 而 顛 忘 而 0 戢 示 於 旁 西 面 倒 不 之 崦 夗 能 大 以 非 於 風 恤 之遽 生之 之 以 以 不 果 廷, , 政 暇 謂 不 永 忘

情 積 而 **冰察者** 也 ,而憺忘之於報 縈 福 者 一個大 履不爲之祝矣。 與 高 固 ? 而 無 不 適 報 遽 易,崟 情 欲 L 與? 施 胥 之 洋散 岑 天 情 者 下於 然則 夫 也。 與 高 者 ? 大 樛 明 與 葛 者 同 者 ? 明 藟 以 而 不 不 易簡之 盗岑者 收 不 情 得 責 簡 其 而

> 察也。 之,日 岑而 恒之理 來 也 我 不 休 不 嫡 故 而 絶 ? 休 縈之,今之勸 獲 女 可 諡 聖 無 郭? 嶄 之色, 知 姪 用 人無 以 或 察 察察者日 得,上下 娣 不 絶 已 其 同 報 察 乎 於 之親,❷后妃之尊, 絶 是故 相 適 而 下 我 者 1 恩 報 報 好, 亦 E 也 自 之私,斯 施 怨之外,莫 莫之或異, 之情 甚 始 我 :「借我 我 而 絶 之 之 危 受者 以 福 奚 情 以 泮 夫崟岑, 交,高 者 爲 此 維 散 安, 愔 報 不 貿 無 惡 者 也, 愔 亦 天 庶 貿 如 以 報 在 明 之心 欲 易 胡 下 爲 有 老 樛之,彼 其 而 者 上不 者 ? 同 **瘥**與 而 求 於 死 不 其 亦 不 弗 弗 可 而 不 勿 幸 惡 何 倦 嫌 永之以 親 得 得 弛 相 寧 我 終 夫 奄 求 也 異 洵 往 崟 禍 有 mi 簡 而

ĮĽ

而 世 變 隨 之」,曾本 五字。

嫡女姪娣」,曾本作 「姊姑」。

矣。 黙 則 報 不 亦 施 미 殆 乎汀 者 與 同 人 羣。」 禽 道 原 免於禽獸之羣爲 獸之相 之 常 也, 遇 矣。 奚 爲 子 其 已足 日 不

可哉?

閉 民, 之所 不勤 時, 廢 若忘其所有 以 昃,不遑暇 餘憂矣。故王者制 力 文王 亂 勤 也 窳 則爲之有序矣,授之以資,則爲之而 以 丽 則 ? 上有勤心,下 車服 民 陌 民 漸 力以 興 乃有無序之程。 開 授之以式 無 勤 也。 民 即 食」,田 暇 事 以 息 日 乃有 心。 康 《芣苢》之詩, 而 ൬ 功 無 弗 長 家婦子 ,則爲之有度矣 無勤· 無度之獲。 田 旌天下之心 民産而天下之力不勤 愛其 與 力長 功」,「自旦至於日 爲 力。 之息 日。 兼并 ,乃行歌拾草,一 而 下 不匱,乃相 故 奚以 興,耕者 焉 力之息 月令 而 窳 耳 ; 勤之,行 或 授 能 廢, 井 無 之以 無勤 也。 啟 田 中 勸 暇 無

> 之無 但 愈於死也 日,●美草佳蔭之下。不給於斯 於上之愛 者,未有可 偷 歲勤苦而 + 其飢 ,心移於憂 而 度 斂 寒之謂 五,民乃心移於憂而 則 無幾。 事 其 用者 貪者 愈棘,民 心。 而 也 也。 所 故曰 競 是 事 , 夫民 不 不 程 以 救 ·善,則 之 可用矣。 時 死而恐不膽」, 無 之愛其力也,甚 未 不善 序 至 憔 須之歡 悴 於 終歲勤 則惰者 其 相 脜 事 仍 風 0 其 非 苦 益 和 終 獲

動,不 物 美 面 也。 也。」是故成 天 下之物以成。 静 喪其動 采之,細 而 專,坤之德也,陰 則 天 事 物 下 ≢也。 故曰:「《芣苢》,后妃 之 莫之有 物者 采 而 遺矣。 1,莫如 禮 察其 也。 專静 (有, 掇 芣苢, 陰 禮 以 其 之 微 處 成

● 「是以」,原作「事已」,據曾本改。「晅」,原作「咺」

言

六

物

柔,如 與! 矣。 弗專 苔 ≫ 緒,亂 荷浮 之。 事 所 旋 有 物之幹 辨。 據 非 於己矣,奚貴焉 袻 則 目 也。 專以 情 嬰兒 又 知 袺 取 其 且 雖「无咎」,不 也。 於 無旁營,心 以 況 襭 專 德 物 實, 舍衆 往 廢 於 已勤 乎?」●芣 焉 其大焉 之容,道旁小草且 斯 幾 事 事 然 無 事 所以崇德 而 專 後袺之。 事 倖 而 而 車 坤》 者, 者 以 無 服 專 之, 미 老 乎? 求,盈目皆是, · 吉 當 遽 之四 静之能 別躬不 得 氏 事,則 歷 獲,專之至 mi 以 面 袺之餘, 前 事 審 故 廣 所 之日 譽 事 業 君子 门,則 耐 也。 以 馬 覿 事 莫之采, 而 也 : 爲「括囊 面 違 之 專 静 觀 「專氣 專於 然 廢 掇 而 也 m 之, 於《芣 之能 雖 後 者 非 觸 捋 然, 道 致 名 無 7 夫 吾 緢

以

志

亢

翹 錯 南 言 有 喬 XI] 其 木,不可 (楚),知擇也 休 息 志 一之子 亢 也 于 歸

> 之譽哉 其祥 其尸 焉,不然吾不知 擇於物, 族 訟 命 弗自媒焉 而 ,擇於物 秣 澤平 「視履考祥,其旋元吉。」考於旋而 禄矣。 也,弗 也。 趨 而與之爲伉儷,死 其馬」, 天之所 人於家 日 錯薪 物 王逢之不 ıті 自 亂之 而 陶 羸 不 致 獵 後 飾 弘 漢 而 不不 豕之孚,泥淖焉 可 堅貞之譽者,未之有 飾 亢 其 也。 景 矣。 之 厞 知 也 如 无 之 游 楚 所刈矣。 仕也,不 幸 其 有 誕 弗 女,豈 弗 人 不 飾 圃 弗亢 悔 擇 與 脯 [IX 於己 如 未 也 僊 於 知之,妄也 其 然 矣。 有 知 余 也 物 偷 日 且 而 錯 弗 耳 義 闕之死,不 以亢 生,隱 种 盛 秉 後 而 矣。 薪 飾 也。 也 能 之芃 放 獵 其 於 喬 其 己以 弗 之 堅 車 擇 木 後 不 信 苏 貞 馬 之 如 擇 富 於 天

面

其

E

知

如」,曾本作「能」,與今《老子》通行本同

者,以 爲 所 振 教,侯有度,王有章,天下有 麟 可知 事 不知 之所 宜有者,●歸 有射肩之鄭、請隧之晉,不可知者 之子,可知者也。 而 王者之道,足 人知宜 心公子。 丁,順 以 者異 而 不咎,立命 者 爲 「麟之趾,振 所宜,天之無 可知,人與知之,非妄也。 天之所授 宜 俟之命,而亦非妄矣。 而吉,應天也。 有 麟也。 乎 也。 一之,天之可 公姓 振振之公姓,可 夫 「麟之定,振振公姓。」姓,孫也。 人 德於 也。 以 而 公子之有鮮、度, 之子姓,人之 立 有 麟 公子之有管鮮 振公子。」麟 可 事者 命。 王者之民,足以知天。 射 事者也。 而非妄矣。 事天於其無可事,凶 肩之鄭、 也。 ^ 解趾 知者 所 以 身有儀, 天之所授,人 也。 而 事天於其 》之詩 對,而 與 請隧之晉 圃 宜 虚 知 蔡度,不 公姓 有 可 也 不 弗 後 備之 麟 振 家 可 之 振 舉 有 知 而 振 口

> 矣,非 教,侯 嗚呼 度、晉、鄭,而可 其弗然矣。奚以 吉之禍,廷 知 昭昭也, 鮮、度於弗子,而 心所有,力 元吉之禍, 而 其 不敢不自安於公姓。 爲 有 夫 麟、「于嗟麟兮」。 人 而 度,王有 麟之所 之美、徳 一之所 延美、 藏已密矣。 所 미 知者 能 以 爲, 知 晉、鄭 昭之慘,天下 德 章、天 爲 與 也? 麟 昭之慘,鮮、 而 知 麟 下有 害 天下 者, 也。 不 也。 吴濞之變,建成 所不可知者 濞之變,建成、元 得 不 蓋有道以 · 弗能 身有 代 極, 以 亦早有以知 奠,麟之德 興 天下得 度、晉、鄭 與知, 於一 儀,家有 、善此 姓。 絶 m

「舉」,曾本作「譽」。

八

召南

至? 法爲 也。 者也,非 之情,成 即 御 琴瑟之友,鐘鼓之樂,情之至也。 懟,不肖者 而 雎》者,唯《鵲巢》乎 以 其 卑天下。 御、迎也。 故情爲至,文次之,法爲下。 下 文,而不憂情之漓。 (情,肇天下之禮 則且憂情之詘矣。 聖人達情以生文,君子修文以 至者,非夫人之所易至 ? 君子之故齧合之也。 天下之章 文以自 靡 將,亦迎也。 卑天下而欲 矣,故 前 盡 1 下也。 不紊。 而 而尊天下,法 文之備也。 學以其文 不蕩,天下因 天下之尊己,賢 情以親天下者也 使君 情 何言 故君子 也。 子踵 與文, 而 善學《 乎 聖 聖人 何言 以 白 不 函 情 兩之 人以 嗣 聖 自 以 無 聖 能 者 閣 畛 人 爲 平 情 高

> 乎 焉 節。 不足者 以 不 而 盡 乎貌豐中嗇之不足以 之吝無幾也。 文以尊天下者也。 家 止矣。 況其盡乎?● 中 必人之不 心,而君子盡性 人喝 和 自非聖人,不求盡 文以節情,而終不倚於法也 者 文 隔,悔 也。 也 文不足而 自賤也。 非 唯 故善學《關 厲吉。」 情 雖 勉 0 也。 於 尊之而 然,君子之以 聯天 悔 文 後 何也 心統性情, 於情 情,非 厲 加 有 雎》者,唯 情 ? 而 下 人 法。 且 得所 (自貴, 吉 · 乎? 天下 聖人 或 [《]易 憂其 賢 節 而 正 弗 故 之憂 於 情 親 性 問 **>** 、蕩,❸ 之 嘻 者 聖 能 日 奚 爲 嘻 其 文 人 患 而 調

[「]姓」,曾本作「嗣」。

[「]情」,曾本作「性」。

盡」下,曾本有「情」字。

^{□「}止矣」,曾本作「而已」。

致武, 惻惻 知知 過墟 矣。 留 天 餘 僮 怙 矣,既莫之聞 見其歆喜之情,異於狎不善也。 而 孰使之然耶? 加 不不 於聞 以以 一,以 心 豫之,事 之祁祁,薄言 起, 墓 乃可 待 心 所 其 方宴 有 而與之化 被 而 繋 天 惻 自 見 心 非 之 以奉祭祀,交鬼神 生哀,入宗廟 道 惻 也,未 (享而 已而 僮 來 至 人之職 而 者猶 也。 矣,餘於見,肅 而 動 僮 而 也。 者 道 天 起 留之, 不 有 還 在也。 夙 還 也。 起。 也。 也。 和 宅 聞 歸 化 夜 歸 然後 虚 也, 於善,莫之有適,未 在 之祁 前 天者 雖 物 歘 而 以 敬之留 是則人之有 之必 公」,敬 至 見之肅 其 然 生敬,臨 俟天之動。 當 肅 , 君子之所 祁 善者,亦 而 情 而 其 豫,後之必 者猶在 事 動 人職 既莫之見 夙夜之僮 事 也。 之 起,事 肅, 而 介胄 丽 豫 不失 意 功於 物 先事 聞 不 也 隨 也 之 故 至 弗 愐

> 耳,非 之 之聖,禽之聖者也 之鷹,非異端之聖人、孰 心於太虚 希,此而已矣。 動之於介然,前際 日 ൬ : 「誠之者,人之道 亦 人之所以 足以 前 給, 志氣 或曰:「聖人心 斯 爲 不期,後 不 蠭 道 爲 螘 也。」若一 也。 功, 之義,雞 能 際不 如 人 俟 夫 此 禽 感 如太 哉? ·繫,俄 天 之 雛 通 之聰 别 之 虚 ൬ 也 異 聊 頃 明 還 幾 焉 用 與

矣。 以斯 嚮 目 録 持 於 也 ? 彼 權 合離 心 草 者 · 而 而 《草蟲》其 ·蟲》無當於 有 貿 加 心 餘 於一旦, 諸 無 而 道 緼 心 也, 即 也 道 無 0 道 ൬ 與, 餘 憂樂 草 與,君子之大戒者 以 蟲》 何 斯 心 疾 居 無 心 之憂樂 遷 乎《召 餘 而 ~, ●是 以 加 宅道 諸 南》之 則 也 道 疾 耳

- 「疾」,曾本作「即」。
- 「縕」,曾本作「恒」。

情者。 不與天 子之心 之應如 同情 以 則 惡 取 之以憂,故曰「天地不與聖 宅天下之正。 辨用之尤 百 與之不留者以爲勇,而 女子小人同情者, 死,是以 天下之莫不貴者 ,所惡 此 以 斯 情 好, 者 心 見 者,化行於不自已,用其不自已而 唯 地同 畢 而 目擊耳受之無須 貞其 乍 好 有與 有 當 心裁成之,是以取天下之精, 君子悉知之,悉知 而 · 釋 與 不 道 遷 不憂也。 (死,而 斯 即 女子 天 ,寧已 故君子之用,密矣。 也 樂。 地 得 , 生也, 亦自 小 同 斯 均是人矣。 重用 遲 .情 同 憂。 與 此 裁之以 而 異 同 者 貴其 禽魚草木同 萬 史 留 不 而 了,有與 接 情異 情者,有 物物 人 欲 流。 之則 於 (同憂」,聖人 生尤不賤其 智。 之死也。 其 也 情 耳 imi 禽 竭 故 辨 同 目 攻 「魚草 與天 用 與 也。 君 用 用之, 情者 而 憂 攻 道 子 其 耳 取 與 Ħ 須 樂 斯 裁 地 而 同 木 君 戒

之旋 道者 皆有 泄也,天下以自止於禮矣。 口 焉,天下之情 智以 故 禽 之不遽,君子以自敦其仁矣。 悦夷,不忘憂焉 不與戚戚也,接其既 交君子,弗 (草蟲)||交天下, 魚 之情也 即 情者,此之謂 菜草木 勇, **草** 以 相 兩 裁用、 應者以 蟲》以爲道 不 君子之情 之幾, 爲 拒 何 之,大以 也? 以 可 也。 不拒 方其 矣。 也。 了,攝之不漏,用之不 岸 而 0 雖 泥《 以節。 ,與夫廢《草 天 、忡忡,不改樂焉 故天下 疾故 君子 感其未見之忡 體天 見之悦夷, 然,《草 **F**, 草 也 蟲 匪 不 地 前 君子 ·以《草 一》之憂 無 蟲》 之化,微 裁之以 拒 悉知其 蟲》 情 而 固 有 而 蟲 抑 樂 女子小 時 不 丽 丽 流 不 忡 类 乎? 情 方其 與 與 無 後 以 而 訢 情 爲 備 遷 以 泄 丽 道 訢 而

^{■「}何也」,曾本作「向背」。

嗚呼 毛,中 位,以 敍,斯 不能 敬」焉,敬此 不掉,而固未有主,吾不知其何心。 采以其所,盛以其 時 敬者,涵 -静 齊涖之,静以 致 饋之事,亡疑於鬼神, 乃以信鬼神之享而亡疑。 地 斯 敍。 未 美 涵 有 也 也已。 不 而 媺惡. 盡 涵 · 静 不求微,微而憚於慮,不沈 斯 而 忌惡. 審, 微、微 物, 其女,●徐徐于于,蔑 《采蘋》之敬,静德也。 能敬者也 斯忌惡 湘以其器,奠以 嚴 斯 致 慮 況 美 也 , 君子 慮 盡 嚴 乃 澗 斯 有 , 静 乎? 潦之 無 時 媺 其 惡 丽 地

也; 死 貞也,而侘傺煩冤,以憚於屈 貞之志,而小貞之恤,大貞之不毀者鮮矣。 女子而訟獄,貞者之所忌也。 抑不得所謂,●則弗獲已而從之。 吉,非義也。 易》 曰:「小貞吉, 小貞者,大貞之賊也。 大貞 無已而死之, 忌訟獄之傷 凶。」凶 大 義

> 保物 以 獄 吾知免夫! 機,而遇凶 俗革,且弗能保物之不犯,況丁 ൬ 雖速我訟,亦不汝從」,保己 衰,何足爲有亡哉? 全其貞,是必天之無 而 者也。 得從,●直尺而枉尋,介然之氣, 人之健訟者乎? 明王興,方伯之教行,淫 露 大貞者,保己 而 而 後 必 不 亂 可 無訟 世,履 無 忌於物 濡 加 亂 而 一用 也 後 之 危 不

有梅 乎? 飛 非 精 廉、惡來之廷,雖欲 》,女之所以 誠内 女有不 殷俗之未革也,凶年之殺 專 擇禮,士有 加 揀 求 美亡 於 爲 士 一疑者 不 也。 殷之遺臣 · 擇 孰 仕 伯 夷 禮 能 與 圃 不 也、《摽 鳴 立 不 於 呼 於 口 斯

⁰ 所謂」,曾本無此 静以其女」,曾本 無此四 字。

則」,曾本無此字。

曾本無此二 字。

則 成 也 擇 與 得 以 知 女 陶 天 知 喪。」「 什 有 爲 月 千 去 推 龍 秋之憾,是 舍 不 采 損 殆 司 mi 巷 龃 道 有 擇 之矣。 薇 空 夫 有 不 色, 道 而 降 圖 知 揀 悔 之 無 則 而 沃美已 退 斯 之 怨 焉 主 仕 志 其 無 早 天 知 、於夫婦 隆 損 擇 遯 舍 疏 其 不 無 存 禮 之, 管 增增 可 彼 道 尚 而 吾 ÷ 得 而 則 之 有 不 未 士 之義、 疑 無 無 隱 而 知 所 能 求 有 而 爲 天, 无 上 信 得 不 心 未 而 合 悔 君 之以 擇 含 於 而 車 知 更 臣 則 外 天 未 者 斯 得 薄 從, 之 誠 者 日 慊 其 斯 與 而 之。 也 m 所 順 離 者 無 不

矣。 者。 待 X 以 人 知 知 命 行 者 受 受 必 介於 於 有 天 故 人者 所 人 之緒 人之爲,天之化 受, 者 之均 之 有 也 莫 受 於 非 於 天 Z 天 天 天 緒 也 也 者 也 顯 可 口 有 垂 天 龃 與 受 於 命 杰 觀 於 倫 化 人 IMI

> 矣。 嫁 受之於所 後信 以 後 母 焉 致 命 親 其 不 前 有 女 制 口 親 而 也 制 可 於 之以 後 靳 母 以 故 焉 亢 命 il 至 有 命 諸 爲 於 乘 即 日 也 耳 mi 心 非 唯 爲天。 乾 恩 制 言 侯 權 吾 制 之天 是 乃 其 0 尊親 均 命 坤 命 制 姪 稱父」,父 孰 者 尊 是人 也。 者 尊 丽 娣 之 使 也。 焉 古 有 人 者 不 唯 從 不 制制 非 耳。 不 乘 心 故 敢 矣, 君 令 理 敢 天 所 命 權 而 君 日 之所 而 之 尊 天 制 以 親 非 即 者 或 mi 子 : 即 親 命 命 乾 唯 媵 而 其 均 制 之 吾 而 爲 自 不 父 者 之。 是 也 而 自 言 乾 牛 命 坤 怨 出 受, 人也, 日 制 私 斯 無 不 命 也 之 唯 也 也 之心 卑 姪 口 亦 心 心 乃 道 而 尊 娣 靳 違 坤 或 制 以 授 後 親 者 莫 故 從 矣。 之 爲 之 然 稱 受 之 君 之 口 丽 尊 唯

人

以 爲」。曾本作「亦」。

之,响 之倫 於知 吾天 於 赫 躋 均 非 之依於豢也, 安之於命, 不 心,其必 姪 靳 事 君父於天, 是 勝 赫 君父之私 娣 也。 者 命 也 臨之,怨尤 人 非 盡 晌 者矣。 也, 一,尊 必 而 甡 命之媵 君 媵 無 可 非 甡 而 無 唯 父 妄 者 矣。 以 所 乾、 親 圃 能 其 焉 於 知 也 奔 尊 事 以 君 抑 也, 自 意 坤 耳。 命 命 不不 事 尊 天 釋, 而 父 非 其 以 立 於 丽 不 矣, 君 吾 以德 不 私 毁矣 抑 而 乘 後 丽 君 可 君 讓 之, 也。 故 委之 可 揚 父之 權 尊 日 以 觀 其言 「寔命」 以 親之倫 親吾父。 之 非 而 不 相 於是不敢 於 事 匪 胡 以 吾 天於君父, 命 求 命 一類,不 命 天 弗我 容, 父 之 以 不同」,始 也, 盡 母 則 媵 是 何 然 尊 恩 雞 丽 不 日 心 也 得 無 尊 而 親 也 得 而 鶩 丽 親 妄 親 有 使

也 女屏 野 有 翳 死 於 庸 閨 白 帷 茅 未 包之」, 知 其 懷 億 春 其 之 或 與 有 之 否

> 之 飍 吾保吾 娲 厲 其 使 脱 者 以 晚 純 也 有女 可信 温 大 帨 蠓 者 吠 以 束」, 0 誘 非 之矣。 也。 耳 恭 雖 進 弗授 如 貞 貞 將 貞, 未知 哉 前 加 0 惡 其 女 玉 者 吠 ? 焉 固 吉 -, 蒼 以 足 無 也 其 不 之, 「林 焉。 以 天 故 早 士 始 而 可 恃 尨 億其 貞 之 驚 正 知 誘 知 無 有 馳 詞 未 可 者 之。 知, 帨 矣。 懷 樸 也 止 平 色 厲 見 懷之, 大椒」, 水 0 之不 春 安之鄭, 之 妣 何知 其 詞 之波 蠭 脱 之 而 厲 道 以 有 蠆 迹 脱 猶 叮 加 如 也。 也 之 責 交 感, 懷 以 未 濁 密 其 而 晚 非 進前 春之 於 矣, 信 焉。 懷之, 折 尨之 晉 渝 也 世之悠 貞 眉 也, 謝 貞 吾 而 睫 臣 迹 不 如 鯤 猶 將 姑 白 知 斯 也。 也。 而 猶 之 弗 感 之 悠 玉 脱 口 口

[「]以」,曾本作「其」。

❷ 「尨」,原作「厖」,據曾本改。下「尨」字同

洋矣。 所 燼 得 龃 矣。 (絜言 自 也。 喻 夫豈 心 始 始 論 而 E 藏 之 之 風 與 采 於 以 以 唐 「去白 於艱危之始,未見貞 肺 涓 炎 林、 炎 腑 涓 謝 論 中 中 日 朏 之 定 之 之 争 以 昭 於 以 熒熒, 昭 蓋 虢 罅之光哉 棺 虢 襲 長 終 人 存 終 :乎其 之以 八之多 夜之 之洋

是 德之 是 侈 挾 幽 婦 下 又 Щ 子騙 道道 禮 而 弗 不 故 其 貴 族, 者, 嫉 如 妣 德 自 何 陰 V. % 氣乘之,越於 其 者 之 以 修 禮 於 相 知 衆安之也。 顯 者, 也。 乎其衆安之矣。 獨 潛 羡 未 ^ 者, 知之,不 何 有 而 用 鐫 是以 彼 此道 以 衆 無 心 貴 穠 著 嫉 刻 貴 幅 予之者 矣》之爲 之, 耳。 如其衆推 心 美其 行,亢 於衆著 而 不 非 居 婦 車 君 之不 於室 如 挾 也 十,侈其 德, 不 也。 子之以考天 者 其 之,衆推 挾 之得 疑。 陰 獨 美 而 貴 位 へ族,羨 德 其 矜, 喻 也? 處 矣。 之。 也 車 於 7 於

> 天下 德 獨 囊、无咎无譽」, 之安否,亦何 者 也 而不自知矣,譽惡從而 之不 丽 一,得 不 失隱 知 媿 於 以 危 而 獨 閉 知 平. 無 其 情 無 鮮 速 自 順 以 報 矣。 自 怙,矜其 逆 之吉 至乎 哉 考。 故 N N 幽 ? 非考之衆 无咎, 之 易》 不 爲 見 德 日 是 括 情 於 危 有

弗 夙 未 以 保 雖 無 天 亢 弗 能 敢 其 下之貴者也 婦 而 之挾, 禮,君 責 太學廢 後 操 Щ 不 以 貴 不 臣 挾 親。 禮 之,迨 之時 耶 臣 加 而 ? 而 人 夫婦 ,操天下之貴,以 世 禮 操 疑 其 操 耐 貴 子 廢 其 貴 之道 臣 俾 以 C 無 挾,抑已操 以 丽 親 與 故 臨 苦矣。 已 臨 他 夫 夫 臣 親 日 ,封 古 士 家 矣, 之臣 之王 而 侕 建 之, 天 土 夫 與天下交, 此大 廢 友, 者, 家 子 疑 而奚以 而 者, 疑, 學 友之 及 土 帝 平 操 疑 報 女

^{● 「}越於幅」,曾本無此三字

者,然 操,而 建 百 洋 也 之節 以貴 爲 胄之效 治也,非 廷,夫婦讓 其詩曰「平王之孫,齊侯之子」, 女 元 無違乎其以 於勢,婦 一裂,元 1慮,有 非 貴 . 洋 而 侯之胤,國其 乎! 宣行, 序 不 斬 後 抑 弗 加 也。 也。 之所 子 蘄 以 坦 不 相 如 詘 先 以 親 뻾 於室,天地交,品物咸亨, 然 能 早 此 爲 帝女貴 ,有待 夫婦序也。 又曰 繇 王 成 福 其 豔 挾 · 貴, 夫 待, 之 婦禮,而 祉之降 矣。 或 1 臣 順 稱 「齊侯之子,平 於 帝女降於寒門,未嘗 則 道 ,封建素定之效也。 之以 而夫之貴亡待焉, 道之替也, 侯其侯 而 帝女 雖 同 無 親 亦大矣。 有 挾 歸 爲 婦 嗚呼 臣效之。 而 不 者 榮。 而 禮效之。 也。 不 率 殊 亦無 加 之婦, 太學 圮,封 塗,一致 洽 亡待 崇, 王之 無嫌 太學 君 於情, 疑 封 臣 大哉 不乎其 建 以 先 孫 其 於 親 無 交 固 操 而 挾 相 以 教 王 於 故 恬 所 帝 爲

> 貴,不知有臣 謙 賢者刻志降 正其本,萬 者矣。 矧 事 夫 心 ",❷既 理」,言循末之不足以救 倨 以 然以「鳴豫」者乎? 「鳴謙」,❸其鳴 已爲夫, 乃操其貴, 也即 其 也。 故 雖 不 Н 有

邶風

乎? 也。 獨 臣尋干戈於君 者,亦伯夷之心 北 海 銜 之濱, 父以其國 其 哀有遣, 未也 恤 西 樂 Ш 謂 思 融 之下, 而 而天下戴之, 衆不知非, 伯 也。 有 融 命 夷 度, 諸弟, 也 之無 君 惡 可 不 得樂之陶 傳 以 惠 己去而大負釋, 怨者,伯 伯 涉 而 夷 變 喪 而 而 其天 夷 爲之怨 陶 不 之心 自 也 下 喪 ? 而

[「]記一,曾本作「是」。 「記有待於帝女而不加」,此九字原脱,據曾本

[「]臣」,曾本作「友」。

[「]心」,曾本作「之」。

度,唯 懷」, 終非 出 遣 而 之下乎? 欲傷,思之不 泰然寄意 有 伯 邀以遊」,擬諸伯夷兄弟之閒,而 遺 以 焉 辱任彼而生死 游 一,唯 不 酒 夷 爲 、思惡 `,婦之於夫委身焉,一 **●**吾其 我 ,以寫我憂」,吾其僅爲《泉水》之思 自 而可 有 商 命 末 不 安 怫 周 道 從而 知 知 也。 以 於彼,而業 也。 然 之際,會其 非 者, 《能爲《卷耳》之后妃乎? 遣 度,是以 遨 而 無焉, 是是以 欲殆,夫豈 爲 莫 求之樂 遊 與俱,●成乎不可 情 我 之度哉? 矣,地 愛 睽 姑 不忍 患 匪 患 E 而道 有 酌 而 其 身。 其 知 有 同 彼 委 不 用 出 思之殆。 其 餘 哀之傷。 一苦焉 金 情 也。 得 而 臣 於委命 、情,未 其 中央,示 微我 乎 勿容自己,榮 之 則終求之哀 適。 非不知焉 解 哀 於 不 嘗自 無 惡 以 安心者 哀之不 亦既念 哀之不 君 思之不 可 「駕 丽 酒 不 擬 委 從 即 錮 永 諸 以 是 身 mi

> 得 古人有不可同 之愁,登山 舜其 爲 非 乎 哀思之未忘者,胡 衆鳥欣有 而 陶 祭 ? 佛悲! 仇 潛 公帶索之日 讎 司 終 風 而聊爲之巢、許也。 託 有不極之目,臨水有 空圖 》風 ,吾亦愛吾 之調,皇天 之曀 而哀思之盡 也。 取 陰, 乎 故 廬」,荷 其 爲 陰 有 之 林 爲 忘 不 逋 絺 逋 對酒· 者 自 可 不愉之歸 魏 綌 與 間 之 愛矣,惡 則 野 有 野 是堯 之疑 淒 不消 也 mi 其 ? 有

非子也 非婦 子也 非 婦 也 也 不 以 以 臣 以 不 臣 臣 子之 事 以子之事父者 一之事 之事 君 事 而 君、 君、 不 父 婦 婦 得 者 之從 之 於 事 從 君 君 事 大者 夫 從 君 日 夫,亦 從 者 大,非 事 事 驕 父, 父, 非 好 臣 臣 猶 非

[「]任」,曾本作「自」。

[「]際」下,曾本有「莊姜與伯夷」五字。

[「]示」,曾本作「維」,與今《詩經》通行本同。

之志也 情,則以 天 在固 葹之憾 歡 忠 而 君,婦之於夫,惟其 逸 主,身不安 將怨叔齊之爲 好,勞人草草。」 緑兮衣兮,绿 ハ親 可 ,趙后之進妖 讓 而 矣。 怨己勞也。 也, 好 所 與! 以宜 當 致 班 則 何也? 得 而 姬 其 既 家, 於 紈 忠 怨,雖怨利 有 衣 衣 妹 嬖 閒 以 扇 順 好不固 黄 婦 而 倖 爲 臣之於君,婦之於夫, 之事 之悲 者 從大 (裳。]以之事父,則 志 又從 己 順 不 則 裳 矣。 而 愈薄 父, 뻾 而 夫亦 張 而 禄之失可 莫 也。 懟 不 引嫌 禹 違 則 道 乎? 得於夫, 猶 之下 ,嫌於賴 若夫臣 雖 舜 在安身以 行 懷 將 以 ·權姦 忌 屈子 牀第 矣。 不 緑 輸 之於 象之 伯 日 衣 寵 菉 非 其 之 道 衛 爲 夷

以 行 也 貞 性 匪 而 刻 猶 德 意 懼 不 以 其 可 貞 弗 孤 性 能 必 貞 知 有 也 其 輔 弗 焉 孤 能 臣 貞 輔 嫠 也 者 婦 非 刻 孤 意

> 未亡 逆流 意以 哉? 嫠 所 焉 抑 異 輔 而 而 如 故 道 爲 也 耳 緣 泰, 焉 之, 勿 詭 日 人其 Ė 終 爲 以 於同, 非 : 孤 披 如其 窮 皆 心 而 奏義 無 嫠 其 無 益,德 口 如 之 後 以 推 指青 而 異 餘 有 風,將 素而已矣。 通 可 所 亦弗 輔 之高 移 改 也 也。 推 險 以 之裕 函 其 者 其 霜 9 移 嫠矣。 異 有 可 貞 也。 居之也 如 生 之 焉 皦皦之白, 誓寒 但 餘 以 , 平。 夷 也。」夫能 心 用 而 以 德 當其爲 爲 乎? 惠? 弗 亦 水 乃 焉, 當 孤 贵 孤 矜,尚之也 可 贵 以 其 臣 將 其 臣 行之所立有 以 因 光 未爲 鳴 嫠 嫠 裕 焉 能 愐 終 嫠 爲 履 明 婦 呼 厲 其 用 過 婦 温 如 孤 變 於 之 而 ? 德 温 其 H 而 臣 而 人,是 絞, 孤 不 ? 者 温 惠」, 未 斯 不 矜 嫠 加 行 爲 其 及 刻 爲 婦 約 餘 且 溯 厲

「嫠」,原作「婺」,據曾本改。下同

邪? 所 以 惠 行 平 室 以 則 一,范 設 其 其 智 在 淑 往 加 無 慎 道 計 躬、 輔 恒 而 滂之以 志之函 也 則 於 於 愈 非 如 臣 後 天 斂 未 其 故 德 安之 下 # 忧 虞 也 未 也 爲 閲 丁,其 仲 爲 斯 固 善戒其 不 待 奚爲 物 之 然, 嫠 見 必 於 治 名 者 殘 有 無 貞 也 其 變 氣之守 子, 矜 其 以 轉 彻 固 未 嫠, 形, 己 則 石 然 耶 刻 乃 卷 厲 自 ? 意 也 任 而 以 席 物 愛 習 危 固 永 何 之 德 長 益 之 矣, 險 然 之 弗 地。 裕 不 心 深。 威 已 亂 裕 以 耐 終 頫 其 無 守 廣 儀 之 不 IIII

冀 情 於 與 肖 此 而 同 mi 不不 情 人之 無 其 而 所 有 非 或 肖 歷 復 所 情 怨 之 今昔 望, 定 淫 者 焉 矣。 奚 而 而 也 或 今 情之致 , 誹 賢 非 昔 有 焉, 者 其 異 之 驚 或 情 也 異 情 之 慕 乎? 殊 也 而 以 焉 賢 乍 爲 者 或 動 其 通 異 於 以 有 或 賢 矣 之 彼 里 所 不

> 之異 今不 之日 處 思 傷 譏 舜 主 天 君 也 其 也 稱 ; 私 0 情 非 也 籲 有 惻 ^ 誰 繇 以 失 恩 鬼 燕 乎? 契闊 而 惻 而 而 而 而 德 私 賢 思 也。 以 燕》 固 煢 不 不 知 奚 平 將 之 者 、 肖 不 明 暱 情 知 圃 之 ? 漸, 昔 故 之 之者。 矣。 者 口 之不 其 懷之若 卒 如 誹 之日, 《緑 異 驚 得 非 忠 他 喪 章 IIII 2矣,弗 嗚 即 之 哉 臣 可 衣 mi 考 不 呼 夫 以 私 覿 慕 諍 \leq 無 妣 以 知 日 1 顛 爲 忍故 面 士 加 貞 怨 其 貞 欲 爲 異 倒 廟 争 昔 思 而 國 也 矜 於 更 矣。 吾 緑 社 也 之 遠 非 也 無 有 9 氣 情 與 君 黄 ^ 貞者, 傾 之 若 悪 將 者 H 求 者 思 繇 ,若染, 其染, 逝 讎 亡 先 月 怨 Ш 前 即 mi 不 之 君 不 不 日 吾 陵 有 不 而 肖 機 之 之 占 誹 者 堯 無 呼 以 恒 而 不

義 滅 無 悲 餘 夫 矣。 世 臣 蜀[弑 道 其 L, 君 忲 子 亂 無 以 懟 爲 恩 怨 子 弑 而

嗚呼 不戢 其生 信 以 州 其父,臣 不我活, 寇讎之廷,亦 宅,抱爾婦子,執手以 屠君父之肆,就求膏 叔之才無以 餘也。❷ 然後《春秋》作。」人乎《春秋》之詩,●亡之 而 動 吁 ,終以自毒 誣上行私,不 我 1 而 國 弑 後《擊鼓》之詩 君兄 人。 州吁不勤 一無尤焉。 洵 弗 夫子之弗删者,❸著《詩》之亡也。 得 不我信。● 納公子。 無 以立,臣 將 何 ௱ 知 可止也。 誰 知 後 不 民於陳、宋,石碏之忠無 戴賊 有 怨 怨及之, 行虐於 潤 平生之君父哉 民 作。 而 偕 過 覬活於凶人而 可乎? 焉。 以爲 無 屠 老 故曰:「《詩》亡, 詞 肆 衛先公之教泯, 雍 則 而 君, 田 以 者惡其忍,而 廩,管仲、 晨 爾 相誹 人道亡矣。 引領以 斯 田 夕斯 气完 毒,衆 望其 鮑 闊 於 覬 爾

傷之者至矣,故曰「自 雄 雉 矜 羽 毛 丽 不 自 治也。 戢 其 音,飛 必欲 避 鳴 自 勞 而

> 興矣。 才而 其求 矜而 矣。 容戢。 呼 有 不能忘忌於此,抑 者之所堪,尤非不才者之所堪也。 兒,而奚以 之咎乎,莫如勿爲 不 技, 忮 也 不 雖然,非 逐。 其將 自 彼方爲 淫。 不 才而忮,其忮也忍。 戢,物必忌之。受物 未 處 而 免哉? 幸 有 於才 終 徒嬰兒彼 嬰兒, 而 不 有不忍。●才而 濟 自 與 雄 不能不屈 處 者 治 吾 雉 不才之閒 有 亂世,仕闇 也,吾己 亦 也。 以 矣,而 與之爲嬰兒, 勞 於彼,而 無 傷 之忌, 求,求 乎 天 可 不才而 者 無殊 下 君,非才 矜, 誠 也 賤 技技求 於 有美 而 而 有 抑 之。 求, 紁 題 免 鳴 己 所 無

[「]亡之餘也」,曾本作「之亡也」。「之」,曾本作「而」,屬下。

[「]夫子」,曾本作「嗚呼擊鼓」。

[「]信」,原作「伸」,據曾本改

[「]忍」,曾本作「忘」。

以爲 故《雄 處。 不 之於危亂 亦 自 而 恤 無 貽 不 一、怨不 殊於 之阻 君子也? 矜 雉》之臧,女子之懷, 彼 日 且 弛 能 之世 公嬰兒 避, 爲 其 而 鳴 嬰兒, 用 者流 美 而 死 以 才與不才之閒可 其 矣。 戢 且 相勞,是憂患之府 臧 不 矣。 吾 可 平 能 · 惜, 亦 弗 1 鳴 天 與之爲 忮 而 命我 m 姑息之忠, 雖 奚 戢 口 然 一暇 不不 以才, 弗 澤 嬰 處 有 求 兒 臧 也 而 鳴 美 也 祈免 焉 不 前 偂 而 譏 試 奚 則 口 免 不

奚 恤 曰:「是道 射 **以其矢**, 疑 行 雉 哉 乎 憂 而 矢亡,終 也 患 不 期 損, 何 於譽 足 以 以 譽 而 揭 臧 命。 已 日 月 矣, 一君子 君 而 不 子之臧 沛若 以九 恃 損 流 卦之 也 勿

君子

於禍

者

也,於道

則

未

也。

是故

夫

深 沙沙 非舍深而 苦葉 非非 無 口 匏 涉 之 也; 無 H 葉 深則厲」,厲 也; 「濟 有

吟; 遲 狐 求。 焉。 産,陰 監 焉 求 之物,與吾情 矣; 之産應於外。 餘,不患其 不 者,天地 也 則 非非 者乎? 俟之須臾,快騁之千里,亦 必 深 女之勿 細 飲食之勿朵 嬪御之侍,不必縞綦之樂 内有其情 無 大布之疏 知 亦 必 陽 人 他 擇 不 窮 之産 得 不 而 濡 矣。 鳴 均是物 失 擇 苦 不 已 也 相當 足,知 雉 其 馬, '', 外 也。 與 故 矣。 3 得 非 (情, 不 頭,非 琴 必 外 生不 者 也,均是 君 淺 陰 擇 情 有 必 其 子 斯 岩 瑟 有 則 陽之 者, 而 獨 不 其物矣。 得 乏矣。 之御, 於 必 其 揭 不勞,不 已矣。 矣。 亦至 蹴 餒 物,内 涉 幾 陰 情 爾, 矣。 陽 馬 淺 動 也 不 何嘗 遇 足 天 也 之 古 於 非 袗 故 必 可 患 男之 細 主 君 而 地 幾 可 心, 必 衣 有 抱蔓 抱 其 知 人 絜天 不 子 無 不 以 也 死矣。 之被 膝 得 得 其 天 於 勿 不 其 俟 賈 不 而 綏 狗 濡 Ħ 下 之 情 可 有 他 其 地 厲 物

理 歸 無 一上 ,望洋 情之理也 者,不 前 歎也哉? 失其 發 故曰 也 有無 : 「發乎情,止乎 理 之情, 無

我 不能 吾情 能 爲其怨之乎? 之,而後求我於心, 怨者 有道矣。 相怨,相怨者必不肖者也,而彼已固 力,從之而賈,未有能售者矣。 弗之親,彼且 矣,弗之信,不 而 不庸,吾庸吾才焉。 不得, 自 焉。 鮮 信 厚 逸; 而見疑,勞而見擿,●親 也 以 信無 我性自天,不 而 躬 我 雖 況 情自 求 焉 能 敢 然, 得而 故夫君子之欲 耳。 親 疑 不盡 性 未 也,弗之勞,不 以力翼之, 而 不售。 一,不能 若夫君子之處 可 ,吾盡吾性焉。 能自 唯恐疏 親 怨 無 也。 虧 自 無售之心 能 也。 溥。 而 不 居 我才自命 夫兩 人 而見疎,不 後 敦,吾 厚 能擿也 以 加 雖 擿 然,奚 也,則 不肖 賢 而 欲 勞 我 心 不 售 敦 於 歸 無 不 委

> 怨之。 也,抑 自 賈而已矣。 人爲 也。 知焉 夫人心」,非 父子之道焉。 直君臣也,有兄弟之道焉, 而 而 絶 不 谷風》之婦,惡足以 歎 幸 君子之怨天下也鮮矣。 而 別朋友, 其 無比 乃與其人爲君臣 而 有别矣。 無望報焉,其所不 是可 「有洸有潰」,詒不肖者之侮 不售,固君子之所 與 匪之戒 其 絶之可矣。 怨 豫懷必售以賈之,不售 人爲夫婦, 以賈也,殆夫舜之泣旻天矣。 也, 「怨靈修之浩蕩」,「終不察 不幸而 ,則悁 賈日 及此哉? ,去之可矣。 悁 去而 相 盡 與其 可 然怨昔者之徒勞 不 其 怨於 盡 匪 屈原之君臣 屑 人 有懷禄之情 者 所 直兄弟也,有 電 爲昆 也。 以以 可 肆 盡 矣。 勉」者 則從 而 如 義 唯然, 弟 不 與 斷之 無 一,匪 故 知 耐 其 望 或

擿」,曾本作「諺」,下二「擿」字同。

朋 民 -哉? 皆 : 賈 政 矣, 散 民 豈 離 復 , 有 行 君 私 臣、夫 而 不 미 婦、 止 昆 ____ 弟、友 衛 之

也。 忮 爲尤,聲色次之。 限於小,厭然不敢自暴,猶有 則 也。」繇此言之,恤妻子之飢寒,悲居食之 而 柰之何長言嗟歎 公意準乎情。 之妄,忮懟爲尤,幾倖次之。 者欲也。● 意有公,欲有大,大欲 也、發乎其不自己者情也、動焉 亦 後 而懟,長言嗟歎,緣飾之爲文章 窮乏之得我,惡之甚於死者,失其本心 而 人理亡也。 心之所期爲者志也,念之所覬 詩言 己。 志 人即無 非言 但言意,則 故 以 貨利以爲心,不得 意 曰:「宫室之美,妻妾之 緣 以 也。 飾 自 而文章之乎 貞,意封 私 詩達 而已; 欲之迷,貨利 ,媿作 一情 加 於私 存焉 通乎 而 但言欲 不 得 非 而 無 自 者 達 欲 忮 志 意 則 持 意 欲

> 游 甫 之恤 於醉飽之情, 靦 歎之,緣飾之爲文章,自繪其 貞 之問之邪,猶有忌焉。 安、陸機之險,沈約、江總之猥,沈佺期、宋 爲此哉! 妻妾之奉不諧,游乞之求未厭,長言之,嗟 亦效矣。若夫貨財之不給,居 多見也。 風、不數有也,漢、魏、六代、唐之初,猶 儉 耳。 加 陋 乞之津也,則 過其 ,昌言而 憤 嗚 交游之 夫以李陵之逆,息夫躬之室, 呼 二雅之變,亡有也,十二國 頑鄙,施及小人 無忌,非 八其詩 炎 甫之誕 然而 涼 日 不知 殫 呼 於言 詩之教,導人於清 失其本心者, 天 自 有 而 責 比稷 志 譏 廉 温 鬼 也 非 食之不腆, 於 隅未刓 與契。」追 如 者,唯 金帛、 將 銜 以 孰 父 其 爲 杜 没 潘 之 忍 未 母

[「]行」上,曾本有「誣上」二字。「政散民離」,曾本作「其政散其民流

[「]持」,曾本作「待」。

乎! 矣。 也。 謝 貨利而鑠 忠臣,莊定山躋杜甫於康 屑也,6而 百於香奩。 民離,❸誣上行私而 宗祧者其《北門》乎! 變雅,亡有也,求之十二國之風,不 於天下。 愈承之,孟郊師之,曹鄴傳之,而詩遂 辱之乞人也。 羹炙之稷、契,曾不如 冷炙,0到 其欲之迫 榛 是《北門》之淫倍於《桑中》,杜甫之 「終窶且貧,室人交謫」,甫之所奉 鍾 不得於金帛 惺之區區者乎? 是何甫之遽爲 其本 而哀 處潛 禽理亦亡矣。● 毛氏獎《北門》爲 不得於色 甫失其心,亦 以 心、儒者不免、又況何景明 悲辛。」是唐、虞之廷有 鳴也,則其 前 不 悲吟者,●禽之所 미 **嘑蹴之下有甘** 故曰:「其政散,其 面 止。」《 禽魁哉?❷ 節 詩曰: 悲 無 ,沈溺天下於 鳴 足 北 道 者,其 門》當之 耳 殘 求之 數 永 死 悲 羹 爲 不 禽 濫 有 辛 與 韓 不

> 也 也。 言。 情受於性,性其藏 其終可合也, 合黎、桓、洮 得,喻諸心而已矣。 合與終不合也,奚以 流,❸殊 之君父, 亡憂其 漾、沔相近以 非惡其崇情以亢性,惡其遷性以 情之貞淫,同 獎情者曰 流 而異 一、「以 、歸,其終不可 不忠孝 出 也, 行 思 貞亦情也,淫亦情也。 而異 面 辨哉? 乃迨其 士思妻之情,舉 殊流 矣。」君子 一發 相 殊 久矣。 合也 爲情,而情 近以 以迹求之不 流 而 甚 情之終 殆 出 同 惡 丽 就 猶 而 亦 殊 水 情 其 致

[「]羹」,曾本作「杯」,下「羹」字同。

[「]禽」。曾本作「其」。

[「]離」,曾本作「荡」。

吟」下,曾本有「蕩」字。

[「]禽」,曾本無。

[「]禽」,曾本作「人」。

[「]合黎」,曾本作「湘灘」。

四

之則 爲 其 貞 生 叛。 以 惻 諸 上下 情 貞之相 口 自 貽 美 「, 則 忘 物 4 伙 用 心 E 爲 我 章曰「俟 者,可 背行 一受性 而 章 口 死, 隱 均之爲愛, mi 之君父昆 ,將之肅然,斂之愈久 藏 彤 心 異 Ē 死 ,逐之則 俟, 淫 矣 管 亦 面 意 面 而 一,下授欲。 用 洵 二,其 傳 終 未 灼 各親 之,顧 藏 不 美 我 於 不 有 然 者 友, 數矣。 以 且 貽 於 迹 盛 而 能 於 不 其 心 城 異」, 爲 加 動 則 可 名 可 生 自 叛 城 性 受 之歆 美 隅」,其 皆 知 生 不 名 忘 一,東 生 以 隅 有 而 其 己。 不 均 慊 其 可 , 用 者 然, 故 美 미 生 西 所 之 故。 死 面 之 而 也。 而 不 彤 俟 忘 依 揜 流 口 爲 僅 思 思之泆 愈不容已,則 情 管 矣。 而 之勢 異 口 知 死 愛, 詫 夫 1 授 乃 其 不 也 知 己 而 其 其 貞 思 有 生 可 己。 莫 血 也 妻,忘 然,斂 終 煒 物 静 所 欲 章 志 能 動 非 意 也 也 也 女》 故 放 兩 所 E 以 自 以 之 喻

> 各 弗 周 物 子 也 則 歷 潛 用 聽 以 俟 而 丽 之 木 如 公不 斯斯 也 後 在 亂 哉 往 見 面 其 異 實 異 以 故 見 側 離 俟 一敬 情 〈焉,心 分 求 遽 彻 故 日 以 非 而 孝子之於親 失 也 休惕, 迫之 日:「 無 郊 所 是故 加 其 也 「人臣 讓 情 褅 不察,情之 非 得 殺之則 歸 喪 , 愐 迫 以 爲 叔 m 非 命 主 後 用 心 而 非 齊 奉 不 所 有 也 登。」言 有 以 之 喪 不 常 之 丽 不 忠 貽 所 牀 不 以 非 而 安,致 父。」 之 性 口 而 不 澽 迫 臣 第 得 所 熺 福 得 也 貽 徇 則 道 之 其 綢 然 或 得 言 。」言其 然, 虚 召 命 於 興 繆 爲 而 俟 故 又 其 有 有 君 之 也 加 審 非 奉之君, 之 日 日 常 貽 心 愛, 所 己 則 常之慈 有 之 其 見 得 m 無 有餘 「召之 不 否 有 擇 異 執贄 更 施 m 口 往 受 擇 奚 mi 地 退 虚 異

^{● 「}性」,原脱,據曾本補。

背,如 獎其 者,介之以求性,性 受禄 之情當之, 理易,擇情難 口 不遽 生 〈淫,貞 可 而 冰與 死 ,動物不虚, 不 而 誣 未見 者 蠅 不 隆禮 之不 乃 可 其 顯 審 貮。 相 同 篤 一尚可得而親乎 乎 心 濟而 如 席 情 愛 若 有定 猶 丽 也 此 而 成 未 不驚,然乃終以 ,辨之早矣。 者 美而 知 用 顯 ,借以《静女》 貞 者 耶 不 與淫之相 也 嗖 抑 其 故 取 主 不 擇 夫

鄘 風

化,化 有 起,則勿言 則言天也。 疑於天之不然,推求之不得 人化,化凝 奚 m 而必言 後 命 天也。 固 於人而 行馬 天耶? 然 爲 君子之言,有天 天 人道起矣。君子以人 君子之言化,有天化, 奚 而 È 而 勿庸、 疑, 而終推之天, 而 言 體,有天 人道以 天耶?

> 與之而 天化 化也。 理 行乎通 子之道也。 天者,體之廣大者 之詩,其言天也,我不能 可 而外之,而人始有權,必言天 勿庸言天而亟言之, 小人之道也。 詩,其言天也,我作我 不能知,❸然後推諸人之外而 在 事 以 順, 我 而 之事 學其 ,而廣大之體變 言 在 在 廣大者也。 任乎我之事 天,有在 逆 子, 天在 廣大矣。 窮 而 理逆,亦其廣大也。 mi 行乎窮。 我 天下之事,有 也。 與之者人事 故夫爲《柏舟》之女者 前 不 知,而 我猶 可 在天下之事 知,我 測 其 不 也 廣 且 前 曰天,謂一唯 能 也,在 在我 大 不 推 也 決言之,君 \sim 知,●我猶 一,在 也, 能 北門》之 ^ 而 然人弗 (柏舟》 外之, , 天在 、之事。 作 通 順 口 mi m

[「]取」,曾本作「即」。

[「]任」,曾本作「在」。

[「]我猶不能知」,曾本無此五字。

六

舟》之女順爲命也。 君子不爲其亢。❶ 天之廣大,而 於人之外而繁有天,惡能以其 於天之外而有人,既於天之中而有 自授《柏舟》之母以 亦天矣, 爲《柏舟》之母者, 無擇於逆順哉? 坤疑 不順之化,而 天授我以爲 而 戰,君子不爲其 亦 天矣。 固 乾亢有悔, |有爲必肖 固 人,則既 使《 乃 柏 天 則

則 幹其國,奚天之必困之哉 之大夫,能安其心,行其素,輯 詞 (柏舟》)之言天至矣,可 失己而怨天。 2 不 可 失,是 天不可肖,是以有外天之 以 置 與事天矣。 ? 天 mi 天授 怨 睦 亦不傷。 其家,勤 以 《北門》 窮, 侕

> 己也。 也; 也。 徵於有而疑非君子之必無,君子且不幸而 實 治 下之情所固 情文。凡此者,君子之心所固 有其初終。惡之蕃變,於是乎爛然而 惡因之而 於好善而 之。長言其惡以譏之,惡惡之心始亦無異 權,不能愛人,自愛而 陰長之世,佞偪 而 而已矣。 譏,則其言言惡也。言之不足,而長 遂 言者,褒譏具者也。 有之。 全己於行,易知也,全己於言,難知 長矣。 呕 故曰「有孚顒若」,勿自褻以 稱 有 也。 天下不幸而 也。 忠,淫 惡之條理,於是乎粲然 君子幸 然而長言其惡者,言之 已矣。 蠱 貞, 褒,則其言 前 有之,以言之既 君子 不能 無之、欲 無 孤 也, 治 行 言 極 而 有 而 其 全 天 其 丽 美 自 無

疑。

知

,其理數之或然,則諒之而已矣。

所

貴乎人者,爲其能諒天也,未聞其恃天之

諒

也。

諒天,則不敢固求肖天,恃天之諒,

● 「爲」,曾本作「違」。

非授以逆,己弗能盡人焉,於天何有哉

觀》之彖曰:「盥而不薦,有孚顒若。」

子乎! 之。● 保其不欲長言之心,衛其尚有君 也。 以 父母之名,耳可得聞,口不可得而道。」❸不 乃可以「觀民」。 不忍吾心之有此言,乃可 屑問之矣。馬援之戒曰:「聞人過,●如 矣,醜與辱亦自此長矣。極火之勢於燎 可道者,●弗忍道也。不忍天下之有此事, 曰「盥而不薦」,自潔焉矣,「有孚顒若」,弗 而後撲之,吾懼夫灼及於撲者之帚也。 心有之,●天下重不幸而益著之,則言之長 「觀我」。 《牆有茨》,國人疾公子完而不欲 不言而靡争,君子之神道 長言 設 教 聞 原 故

舌,耳不可喻,目不欲觀,將與之謀貞而訂予,未嘗失也。舍是而椎魯朱離,魌頭鴃嘗失也,「以言取人,吾失之宰予」,非宰羽,未安时,以貌取人,吾失之子羽」,非子羽,未

直,亦 榮,奚可廢哉! 胡不使之爲縱 必哀駘它、叔山 人,既寵之以性,抑寵之以情才以 美而天不任咎, ●人任之矣。 責之文士,責貞者,尤責之姣人。 天授之 徵也。「邦之媛兮」,洵哉,其 備者,以其有可責者在也。 也,「鬒髮如雲,揚且之皙」,亦載福宜人之 難矣哉! 目 無 愚哉,莊生之言天全也 乎? 趾而 「象物之宜」, 6 德之助 後爲天全也 胡 不使之爲岐舌 故責直者,尤 媛 然則天之寵 也 1 爲天下 則 所 天

0

[「]而道」,曾本作「言也」。「過」下,曾本作「必」。

道」,曾本作「言」。下「道」字

[「]完」,曾本作「頑」。

[「]物」,曾本作「服」,與今《詩經》通行本同。

[「]美」,曾本無此字。

[「]駘它」,原誤乙,據曾本乙正。

氣矣。 美,以求早嗇樗櫟之木,●君子悲其無生之 則 必 平 不善者,才也,天性者,形色也。 之美,皆禽與狄之所不得 如 善者,性也; 木 彼 不 ? , 都之 可 抑 以 而天地之生毁矣。 胡 士 淫 不 女 而 使之爲 固 可以爲善者,情也 後 不 貞,必不 如狄, 頑 石 而 之與 狄 可 姿容之盛,文詞 與者也。 不 以 瘣 如 佞 3 木 禽 mi 不 棄天之 乎? 後 禽不 任 故 直 爲 唯

畜牧 不 在 有之,秉心已切,必有傷焉者矣。 年之利 塞淵」也。 其 流 嬉 之中 握 懲禍 淵 而 中, 下媒也,是以亡。 而 而 亂者必改其政。 纖悉圖之,則改之也有力,所謂 今日 目 不浮,是以富。 改之一旦,遽 不 之桐漆 瞬,手不 前 告倦 取百年之功 衛燬之興,塞而 改之一 他 率其民 日 慮 之琴瑟,早 重情 衛之政 旦, 於耕 績 取 迫 桑 百 mi

> 是 其 淫於 得 流 也 未見其淵,祇以 慙,●君臣交訟 加 訐,先公温厚之教亦 情 淫 E 故 塞 前 反 有二,閉 下相切而 如 不恥,滅同 而 一,未 淫 也 財 君父之讎 挾 溼 者,其 於財 必 富 見其塞,祇以多吝, 東之也 淫 以 尋於貨財 者,恒 於財。 相 而 姓 趨 ,兄弟操戈而 傲。 多險,奚愈哉 啟 加 也 急。 而 不 必 一,所啟者 怒 盈 趨 逮其 自此 -戚,背 淫 氣 ?、《蝃蝀》、《相 氣 雖 者 於 奔 以 然, 相資,反者 傲 而 色。 之, 菲 不 盟主即 無 其 改浮 不 1 薄天 尤重矣。 遺 奪 恤 音 淫於 可 人之大淫 矣。 其 亢 復 丽 下之浮 夷 蕩 鼠 改 廖矣 色 相 得 其 ×, 流 丽 盟 泆 淵 故 詞 之 不 狄 疾 mi

夷」,曾本作「楚」。

[「]早嗇」,曾本作「陋濇」。 「木」下,曾本有「石」字,下一木字同此「瘣」,原誤作「廆」,據曾本改。

紀者 周於利而 散。《定之方中》以後,其詞絞,其政 而 淫 於 彼 也。 寡 財之視淫於色,利病貞 也。 《定之方中》以前,其詞 健於訟,雖 何也? 胥之爲 免於亡,其能 禽狄 邪,未見 而 蔓 或 滅 其政 人之 此 乎 蹙。 多

故《春秋》生名

衛燬,賤之也

矣哉 淫賞 詛 之子視諸君父之讎 詛其 而無度,溢爲淫賞。 之, 解不擇其 止者,亦何至於死 惡之,是終 其 死, 酷 死者,怒也。 惡、怒,不 趙 壹之褊,息夫躬之忿 空言之褒刺, 無 刑,禮之大禁。 無 禮 釋 之尤者也。 -相爲 所 也。 可 哉? 惡怒之情交發,則 而 用者也。 勝矣。 刺 苟惡之,以怒之 有不反戈之氣,亦 實 而 刺 然 事 無 無 而 人之無 則 之賞罰 餘 禮 怒之,又從 又 孟郊、 視 濫 者,惡 何 人 爲 足 如 也。 威 酷 張 以 佻 心 鼠 也 儀 刑。 狂 容 加 刺 褒 達 , 而 而

> 擇而取《相鼠》者乎! 之傲率,王廷陳、豐坊之狂詩,●學《詩》不

争,而 乎,歸 有以 也。 若? 「白爾 於中, 之繁,苟有所怙以 言義,此 將欲深言之乎,言外也,義 不如矣。 争我於義矣。 不相 下峥 信焉 天地 虚 不能自宣 所思,不 者 亦一 `「我所之」者何若? 及則言窮,不我 嶸 恒 耳,固不如勿 無 圃 勝。 義也,彼亦一 足 如 無 也 地, 我 爲 何也? , 爲 加 義與言 所之。」「我所之」者 有 辭, L 無 百爾」之「不如」,洵 寥 以揜抑至性 歸 嘉 廓 不相 而 義 内 唁之爲禮 成之例, 而 加 況 也。 將欲顯言之 也,不 及,而 我 無 於人乎? 尤者, 天, 虚 相 加 義 衆 實 以 也。 伸 及 議 相 愈 何 結

- 「以怒之心」,曾本作「又以怒」。
- 「詩」,曾本作「計」。

哉? 古杳 也 閒 喻之 悲 其 往,生於性,結於情, 白 故 乃乃 者 吟反覆,而 所之者, 爾 所 外 離》之遺臣 加 貸之義 今, 求影 所 可 嗚呼 以質 無 言 已。 思 幾 1者,歸 諸 矣。 果 可 者 鬼 似 無能 襲 其異 何 一,沈湘之宗老,囚 部十七史,從 神而 唁 力 是以有 而 若 ~ 義 足 焉 於 不得,奚況 以一語宣之,同 耶 以 無疑,奚妄哉 耳 以 煮 争 ? 不 ·, 控 驕 死之心, 蒿 有 我 ^ 語 悽愴,孤 于 載 我 者 而 何 大 馳 所之者乎? 穉 也 無 説 燕之故 邦 》之怨婦 無生之氣 狂 作 起? 焉 之百 縈 過 其情者 也 耳, 此 於 相 以 皆 兩 爾 臁 是

衛風

璧」,方圓契也。明乎剛柔方圓之分合者,「如金如錫」,剛柔際也。「如圭如

之術 也。 志定 以 也。 以 行欲 久,久而不渝,雖以之處衰世,保令名,亦 不 乃 無 也 夫 思 通 半 爲 滯 期 君 君 所 貌 前 道 方。」 則 剛 知方 也。 子之柔,所以 故剛· 隨 柔之而 子之膽,以 爲 孫 各 行 因 面 貞勝 其 , 思 不 不 知 時 時消 荷 故 一心膽不 無 邈曰 成。 加 志 倚 道 在 用 真勝 所屈 已矣,不知圓 君 益剛,圓之而益方,變化 於 者, 膽 息 員 必 . 子 不 術 從心也, 君子之知 「膽欲大,心 不 以 殆乎 者,知 極, ,柔無所忤,方 ·知其· m 相謀,而 者 則 剛 保 狂 員 也 貞觀 也,君子之圓 無 其 ,心不葸,智不 崇 合, 0 以 用 剛 貞 不 爲 桁 い真觀 也。 知行 兩 半 而 知 方 以 無 欲 端 而 已矣,不 其 志 分用 妨 時在柔 不 小 分 止 無 分 則大,大則 道 相揜。 智欲 用 一之術 定 以以 所枉 所 而 者 恒 而 久矣。 流 屈 與 知 屢 以 審 M 不 用 員 也 圓 柔 柔 遷 方 行 伸 行 相 其

道 而 而 已矣,奚術之尚哉 不失其 正 世 此衛武之所以

者激 乎? 況持 不用 亮密 行 以 以 自 以之蒙數世之安。故 臣矣、《考槃》之「碩人」所 人之寬」,規之遠也。「永矢勿告」,懷道 激 任 寵 而 得 榮 其 三代 天 而 天下也。 以 唯 不爲之名也。 而天下不激 矣,其未 夫裕以密,則 行其 下 相 裕 (智勇,聽天 人 附以 也 而 福 加 (志而 降, 是以 起 人之 裕 , 孩,徐 賢者激 行 其 乎? 其私。 其 久不移,可 미 柄 唯 下 禍。 用 久,唯密 以 不 穉、 李沆 而 碩人 而 用當 侕 裴 肖者 不 范 藏身林壑之下,且 相助 天下之所 天下世 度 以 喪其 者,正己而 平 滂以之而貞 1消,賢 世者哉? 爲 以爲天子之大 裕 也是 1 爲 碩 矣, 樞 已 一受其 涵 也。 甚,不 激,未 以 機,宋乃 者 其 天 自 安之 福 有光 下 未 諸 「碩 得。 XI, 肖 密 必 足 mi

闈

輝 者也

衛之相 棄之所 誣上行 挾。 以挾 友挾 風, 勢,魚菼之資,有無之求, 悍婦之情競,豔妻之情狎,婦 莫斁乎其 不有挾 下 而 嗚呼 力, 脯 齊 迄圭 君 私 相 求 棄, 自 人 臣 ! 也 (相棄 生。 而 固 競 朋 寶, 衛 理 不 者也。 容色之飾,族姓之榮,婣亞 友夫婦 鄭 盡 於君臣朋 忮人之情, 也,故曰:「其政散,其民 賢者、 可 雖 相 矣,未有 然,尤莫 止。」競 狎 之倫 妬 丽 , 衛 衛 者 友夫婦之 相 君 之婦 大斁。❷ 夫 相 棄 御冬之蓄, 奔者無 陵,狎 挾勢,臣 棄, 婦 乎 道 人,上自 其 而 亡矣,未 挾 際,無之 有 相 雖 者 之 侮,胥 者 挾 挾 然,尤 成 而 也 能 也 之 官 不 平

而

- 原 脱 據曾本
- 原作「戰」,據曾本改。 下「斁」字同

功,元 已矣。 督 其 所 義? 婦 有丈夫之情, 之遷,食貧之久,興寐之勞,孰不可得之於 夫《終風》之主,洸潰之夫,二三之士,而 謂 名者 相 人,而 爾,其挾同,其見棄同,未見其愈 賢 容以 目 恒以 貨賄 故石 也 然 ~, 相 訟 相 而 而 福 碩 保也,容可得 龃 其 而 君 己 以 人》之挾 一龉,歷 矣。 不 下又可 見直,子鱄 紿 爲 子立義,禮 之刺 何 言申 富 知 知 豔, 骨者,鮮矣。 已。 綢繆? ·説以 哉? 以 與《氓》之詩 至以 黨姦守信。 夫 相詰,荷 莊 也 脅持 何 殺 美者, 友銘 知 欲 而 況 其

矣。 襲矣 損 舟」、《竹竿》之女不襲《柏舟》,稱其情 情 微哉 亦 八,時 不 性 夫非《終風》,子非《擊鼓 相襲矣。「巧笑」「佩 非 不襲 果有情 學 得 矣,所接之人、所 故故 者,未有襲 道 不 相謀。 焉 玉二 者 持 道 之己 坦 也。 不 然 檜 相 於 不 地 楫 而 謀 不 壟 不 翠 松

> 吟不 之乎 度? 也。 或 心。」⑥裕者 兀 鮑 以 而 見禮者之側, 公理 ,憂之以眉,吾不知其果憂否也 夫 焦 有 ? 0 其 中 之 以其病,凡此 果 觸 不 爲之辭,可 悻 徒狄、屈 無大故 有 可 而有其 悻 ,憂樂之 情 遣 而緩 者 而 焉 而 悪 平之風 已 可遣,孰奪吾之色笑 亦 激, 需 以 者惡 矣。 度 稱 其 能 有 不 寤 也 其 貸 待 相 足以 ^ 9 所 色 而 書 而 及 是 攘 笑 觸 亦 早 而 **>** 言性 故杜 袂 處 曰: 而 而 憂,私 自 遽 違 木 已 木 起, 甫 情 矣。 者之道 心 裕 之 哉 耳 憤 加 以 憂 74 呻 食 而 禁 爲 觸

「處困者」,曾本作「烏」。「容」,曾本作「烏」。

「襄央慶記」,曾本無比四京「貸」。曾本作「貨」。

「裕乃心」,曾本作「若德裕乃身」,與今《尚書》「攘袂遽起」,曾本無此四字。

通行本

同。

Ξ

衛

之所

以

祕

上

行

私

而

不可

ΙĖ

矣。

争莒 哉? 其左 也 此 好而 瓊琚 逾 塞夫人之口, 也。 天下 見厚 餘懷 瓊琚絜木 厚 也,夫安得 量 而 「,南 契,險 矣, 之工 於此,早 焉 不 報之量 而又從 故當从 圃 木 稱 繒 道 恩 瓊 瓜 瓜 薄施 其 於 親 毛傳。 矣。 之薄 不 **>** 琚 盡 求, 而 則 得 用 楚 以 之厚 更 而 則 矜之, 而 圃 薄 而 已 以 挾 僧惡 非 與 木 瓊 呕 爲 厚 齊 決背 者 爲 逾 匪報之心而 足以 衛 瓜之薄見矣。 矣。 琚之用, 我 償之,有餘 我 桓 未 E 矣。 厚 燬之 仍 而 之 死, 中夏,曰: 乎? 於矣。 之 厚 永 匪 有 所 陰 好 亟 好 施 而 報 不 爲 持 者, 伐 慝 無 平 而 也 姑 以 矣。 天 責其 矜焉。 其 ? 嫌 見薄於 永 薄 ^ 孰 下 兩 用 吾之報 以 國, 木 償 能 嗚 相 其 後。 而 聊 授 以 木 之, 瓜 之 滅 好 厚 呼 爲 反 以 爲 瓜 故 彼, Ë 者 故 以 邢 此 操 以 者 絜 閒 好 爲 有

王 風

矣乎, 鷩 歌 幽 宅,有 求,謂 摇 者 顯 可 求者,可遂 知 求,吾不容已於 之也 故 以 我 績 求, E 遂 怨, 滅, 愐 人皆有求,吾 老 可 謂 未 奔 服 我 固 走 我 以 平 天 嘗 無 爲號、檜之新 在 Ŧ 求之、憂焉 下 廷, 也,吾之所求,必不可遂也。 何 有 不 西 E 天 迹 之知 求 求 可 山 遷 下之心 熄, 留矣乎 面 而 之 求 所 不 桓 抑 人道 求。 誠 唱 我 丽 得 自 王 不 貨僅 者 耳矣。 得 腎 ·, 可 君, 己, 射,宗 得 记,《 信 鮮 也。 肺 此 己。 矣,不 以 富貴 之有求 爲 吾之所 腸 春 無 靡 秦 田 親 大 而 且夫人之所 求; 秋 之 爾 靡 福 釋 夫 無 亦 澤, 媚 田 以 求, 惡 雒 宜乎 其 而 吾 行, 子 榮 容 汭 夙 衆 宅 所 不 之 不 且 摇 憂 不 1 名 去 阚 知

三四四

作耶!

如則 五. 以 不能什之一二也。 必 量 頒,而假之有司,有司又不能徧 者民不啻於役二也。 率,抑浮其數以會之, 三浮而上之, 役一 殣,孱弱之不勤,逃亡之中逸,固期十而 所役者以爲則,則道,里之往還,老羸之道 役之病民, 力,雖多輸焉,可以復殖。 司又浮 地貢之,力得之也。 有 矣。 E |求其財焉,並其量求者亡自得已。 以 則矣。 賦 於是上下不能不浮其數以召之,有 與役孰病? 應, 其數以集之,史胥之猾、閶 多求之役,役不可爲 上如則 視賦 上爲 而 河則以 而 劇。 上如則而 故多求民之財而舒其 民之有財,非天界之, 獲。 微,下如則以 稍餼之給,上不 且夫多求之賦, 雖 已急民之力, 有中 獲, 則 頒,而 則上亦 也。 飽 酇之督 應。 者, 是 假之 能 如 下 其 猶 亦 以 僅 雖 徧 可

> 矣。 於稍 上曰: 困。 胥 毒 民 廢 爲之懲止。 欲期之而 民之『侯彊 ·君子于役,不知其期」,非不爲之期 織。 悶,胥此也夫! 力,絶民性,僭民 長,上之頒者十,役之受頒者不 秦、隋、蒙古之瓦 餼, 上無經,下 「吾固有以頒之矣,即多役之,而 雖有 未有 不得 侯以 溥 大役則 能 賦 也。 無 薄 也。」於是而役之之心 藝,農避 古 其 心,迄 東周 有大 無 賦 解, 能 者 之失 飽,大飽 供, 賦 乎役繁 也 而 未嘗 廢耕,女怨 而上 民,宜 鳴 增, 而 呼 二三也 且不 則 盡 也 -天 其 有 下 1 雖 給 大 猶 竭 而

怒其下。怒以報怨,怨以益怒,始於不相上不知下,下怨其上。下不知上,上

0

促以期之,無老弱遠近,箕斂以會之」。「賦與役孰病」至「以會之」,曾本作「非時以令之,迫

當其 其情哉 惡死 知,而 三川 閒 偪 王 肌髓,而 怨,怒不知 月子還歸 申、許之戍、未可以日月計 之戍申、許, 而 名,顯於相 危耳,上惡亡耳,而 天下之情於怨怒之中,而 耳 「漢上割,●宣王 不見危,偷一日之自遂,沈酣寤 ,微申、許之戍, 矣。 耳, (情實。 加 上下之交絶 遷 不 下怨勞耳, 周 哉。」然則 九 - 自持 所怒,無 且 謫,則民 不振 鼎 如 何戍 唯 其 其相 也 但 諸 不 乎? 征 一, 故 矣。 得 則 日死 撤 而上名之 下名之日 已而被之 相 偷 侯 楚 知 而 成卒, 曰流 知 也 夫 安一 臂 不 不服,平王遷 而不 憂 也 一,是以 詩 加 勤 流 危 而其 而 日之歸 啟 息、 於王 以言 不 見死,國 亡 則 私。 日 以 不 荆尸 可 (詩日 怨不 耳。 姦。 惡名 雖 反 鄧不 城, 情 反矣,奚 寐,浸淫 怨怒 姦 也。 也, 也, . 私之 熊 上 知 觀 屈 而 日 易 固 悪 益 危 下 所 而 胥 周 兵 伸 通 周

> 情。 之民 耶? 於申 下叛 靖,大夫不相勤 君之亡,非君自亡,民亡之也。諸侯不 名也? 爲名,而 道苦,父母無恒,交謗以 怨,有《揚之水》之怨,則 以盤庚致怒浮言,而君子聽之以平上下之 露、民已 之不可恃久矣。 無所輯,有如是。 耳, 有《君子于役》之勞,則有《揚之水》之 而無心,上刑而無紀,流散 所 乃 弗 故民之死,非民自死,上死 民之偷也, 苟欲 誹之日念母。 漠 如 恤 然不 其不然, 矣。 相知 ,庶人師師爲名以交謗,是 是以 故周 敵 顧 加 丽 君子莫慎乎治情 於 以情王,以情亡, 夫平王亦 抑 以 成乎衰周,情蕩 爲之名,何 枕 有《兔爰》之怒。 又 、懷歸 席, 何 之情, 不止,夫婦 以爲之 王 不幸 危 之也 患 其 而 遷 如 名 相 情 無 甥 怨 晨 而

「割」下,曾本有「濮地」二字,「漢上」二字屬上。

0

平王 剛。 者也。 年,平 敢逆, 初 於 蒙 彊者興,弱 也。 後《春秋》作。」謂 而 而 孟子曰:「王者之迹熄而《詩》亡、《詩》亡然 桓 尚 詐 羣 己 而 Ŧ 蒙蒙而 無 弱 詐 固 平王立 有 坎 Ė 民 我 加 一, 而 爲 不 功 圃 天地之道 m 一崩,桓 生之 雖勞怨,猶 後 敵 有 情 伸 行乎險。 圃 忠 矣,兔之所以「爰爰」也。 ...尚,「 周之遺 見,桓 初筮吉」者 或 於 自靖 初 厚 於東,晉 王 顓 之澤 立, 桓 維 蒙,雉 剛 者 不 王 民 王 有 詐 主柔,天地之化柔 心亨」者,剛 存。 弱 思 間 也。 斬 春 繾 與詐感,天下 , 柔信剛 平 而 之所 而 矣。 鄭 秋》於是乎託始 綣之情 其亡 Ė 情 嗚 知 輔之,齊、 隱。 而 以 呼 故 非 也, 「罹 歌之,而 1 隱 焉。 幽 也。 濟 E 公之三 我 羅 弱 弱 -胥詐 險 生之 世也 詐屈 迄乎 宋 之 已弱 丽 而 也 不 相 屈 詐 自 世

E

含鄭 可哀 也。 則 之, 民,久矣。 王之世,自天子 小人無恒於下,情至 欲相 唱 親 謂 謂 無事 國 而 他 他 他 而 淫必窮,窮必變, 無 顧 事 親 君子弗哀,惡 人,他人不情 人而昆之,罷民之窮 人而父之,迫 謂 人和 謂 以 虢,虢公攜之。 他 相 他 舍翼 人而 聞,罷 人 - 迄庶 而 昆之,罷民之淫 父之,無 而 民之不足以蔭藉 人,無 則謂 則淫,情 其 而 變 親 思兄弟,罷 淫 而 曲 君子 他人 有一 不 也 沃 也。 事 出 盡 謂 無 而 曲 鳴 於淫、罷 而母之,迫 一則變。 兄弟 他 恒 沃 呼 非 民 也。 人 於 罷 傲 1 之 乎罷 不 而 上, 民。 桓 戀 桓 民 力 迫 母

則

而

思 ,朱傳云。 采葛》之情,淫 以之懼 而 情也。 淫 於 懼 以 毛 之 傳 思 云 加 天不 淫於

雖

Ŧ

其

矣

[「]吉」,今《周易》通行本作「告」。

主而 能自 能 塞 丽 頹 其 於情 之世,臣主上下之閒, 其旨多所隱 應,有畏 亟 而 能 平 音 耶 収 亟 而 爲 不 理,是 焉 無 遽者平 ? 不 项 者 聰 之 足以 一,終不 未 餘 E 於 何 丽 目 其 人 有 以 故 此 瞀 雖 而不能詳 長言, 時, 之情 知 其 丽 如 而 能 欲 韓、 情 不 是 不 詞 得 人 辭 明,心 之亟 知 益迫矣。 彼之 國 之淫也? 遽 不 柳、 爲 所裁,中 能 奚 胥如 ,情見乎 千古之淫人, 曾、王之文,噍 其 亟 而 呕 爲 眩 音促 也。 不 哑, 之 而 有望 此 ·敝、俗 晶 副 不戢,自 其 一解矣。 其 也。 彼 此 熱迮 其 諸 一於人 不 無 文 望 身 詞 奚 與 所 一,而 不 其 削 心 不 丽 桓 而 此 不 非 耳 將 無 偕 豐 王 弗 迫 不 庸 淫 熒

始 氣 愈 言 温 愈 而 爲 昌 始 深 而 有 文微 始 力 有 中 則, 不 而 爲擢 人益 文 愈 筋 以 腴 警。 洗 丽 骨 始 罕 m 有 生 神 理

> 之末,刻露卞躁之言興, 古 喻 知道者之於文類 唱 知言者辨之、是以甚惡夫《采葛》。 歎 淫 洪,若 緩 然 若 也。 忘 而 東 而 周、唐之衰 周 乃 信 之季,大曆 其 有情

鄭風

惡矣; 紓 能 之,惡之而 之有好惡,獨 伯 固好之,其好之也 卷伯 巷伯》之惡有憂焉。 吾 爲 》。」以君子 好。 益 記》曰 歆 焉 》非誠 則 天禄 患有 流 惡 而 用 之道 於物, 好好 與共 之情 也。 好之則 所不避。 賢如《緇衣》,惡惡 觀 也,天 亦無 \sim 也。 而 憂則有忌 之,《 緇衣》之好 不 已摯矣。 ·專其 藉 無 不憂 職 緇 以 所 與 衣》 致 望 其 好 共 若夫 益 矣。 益 害 圃 也, 有 非 於 於 不 而 歆 誠 如 我 故 殫 解 彼 彼 古 焉 好 惡 其 衣 無 而 而 巷

及孫 以 何 之雄者也。 虢 走 衣之,推 衣》之詩,王子友之 一面 義報,上下 死 情流 子 臣 ', 習 撓 民 食 周 而 而 食之, 歆 惡 室 夫好賢 戴之易 不革,以 相呴,以沫 得 一,持 復 者舉 權 於相 T. 有 # 晉、 成 其 獨 一,上非 乎貳 游泳 即 如是也,夫君子 術 楚, 用 以 丽 之 爲 國,殆 以 m 歆 相益,交歆 情 天 交爲 天 哉 下 屬,下非 下 夫游 先 餌,傾 者 也 緇 則 俠 弗 施

所 爲 重 處 雖 人之詞也。 而 在 也。 伙 畏 畏 紁 ",其 畏, 屈 有 以 不 哉 其 釋 先 必 爲 而求 言懷 ? (懷。 於懷,抑 行 詞 所重在懷, 其 也有 故忍之良久,而決之崇朝 以 畏之情自懷生,懷之力奚其 後 懷,更無能 釋懷,懷終伏 辨。 無容已於畏,不能不 言 畏, 先言畏,後 圃 深 畏 以 終 人 畏 伏伏 之 而 威 鄭 詞 m 言懷 之者 重 未 也 以 有 矣。 置 畏 持 渗 以 所

> 變矣。 之也 田 》之前 《序 《序 故《將仲子》兮,深 》謂 》説爲是。 鄭莊 公、祭仲 謀 叔段 人 之詩。 之慮 也 據 在 9 志 將

後,情 情 静 ? 崇 不 性 性 動 静 不 於性,而 情之效喜留,才之效 矣,天下亦有 矣。 朝 ? 勤胡成? 能動者,未 放於才,情才之效,皆效 之 静 體 無 與 分才散 不勤失時,弗能 不 救 既 端 其 静 性 勤 其 事言 者 無性、又奚所静 而 亦 而 後 也,故 效 智者 姑待 不 量 多 有 者 静 動,荷 矣,人 獲其志,欲 能 所 經 也, 姑姑 静 缺 專言静, 不 旬 者 陷 《易倦 事 不 逮 豫 待 無 彌 也。 以 足 愚者之半, 而 而 日 甯 月 自 耶? 以 未 事 必 忘 生 言 往 以 且夫人亦 疑。 而 效 遽 有 又 而 而 動 往 動 不 動 生 性 圖 不 能 不 故 也。 不 逮, 則 之, 能 效 , 補 可 静 煩 天 能 何 禦矣 於情 者 惡 惡 然 蚤 有 下 全 静 冤 也 前 也 乎 者 平 志 之 效 無 ? 以 綴 而

《雞鳴》之詩,其殆於知道者乎 也。 静以 不自 可 而 永 澹也,殊異乎王衍、房**琯之静** 曰:「寧静可 夜」,動以勤 艮相連 後 日,惡乎静? 善,可 治蜀 魄 動 得者 恝然),咸、恒相錯,不動 依 以勤,事繁身瘁 乎 與幾 晏處,物 魂,● 也。 以致遠,澹泊 也。「莫不静好」,静以善也。 矣。 心 是 依則安,安 警而 故 諸葛孔明善爲 非 天下之能 所 後 謀, 미 而 不 魂 澹 以明志。」其静 不 可止,不感不 則 而 依 也 輟,乃其言 豫。 静者 亂 乎 心 「子興視 者多矣。 此 故震、 未 魄 詩 者 有

寧狂 則異 夫! 狂 子都之非狂且,而狂 Ħ. 且 ·●善用其不足也。 也,有如是夫! 不見則子都矣,見則狂 人之不能 不見而疑乎子都,勿子都見而 自 定 其情,見 且之不可子都 是以審乎情者當之, 裕乎守者當之,謂 且矣。 異 則 遷,而 也。 無 狎以 能 遷 悲 必

> 我子都 離合,亦孰與正之哉 下 且。天下欲狂且我 欲子都我 惡,不驚其 不必夫淫者而皆然。/悠悠之毁譽,泛泛之 其子都,施之以 ,難矣。 加 不 而 在 無 自見美, 不 山 恒 可 也。 愐 大 得, 思荷華,在 E 而 也。 謂 不可得 而 足 終 乎 我 非 道 無 狂 然 前 隰 者 且 能 而 當之, 求 以 而 抑 思扶蘇 免 我 不 不自 於 天 自 爲 天 失 狂 見

邪而 行 叛而著其合,其猶有人之心焉。 其名言,揜惡而 以正,無辭於枉,況夫 即暴之,身苟行之,言即暴之,言者不慙 名言其邪,無 無邪之謂直,邪斯枉矣。 著其善,揜薄 忌 憚 邪 者也。 耐 名言其邪者乎? 而 邪而 弗 著其 心苟欲之, 獲 已而 名言之 (厚,揜 惜

0

上「魄」字,曾本作「魂」。

[「]見」,原脱,據曾本補。

[「]驚」,曾本作「警」,下「驚」字同。

其 矣。 覿 廷,於是而以事主,則忽、突、儀、斖,唯 呼 行 聞 亦惡從而治之? 士無忌於庭,●小人無忌於國,君子無 者,吾億其 此言哉! 不能終畏 其風,惡之無庸,懲之無 名,是相獎 「子不我思,豈 《將仲子》之詩 鹿 1 III 者 也。」其女子之言曰:「人盡夫也。」面 其 於是而 如 不 相 執 驚,於是 其 揭 理 政之言曰: 而 `,仰不見天,俯不見人,雖有 且 禽鳴 行, 以 絍 以交鄰 猶 不 禽名而 矣。 |無他人。」有人之心者,其能 存 且 曰:「人之多言,亦可 一忍出 而 之 乎畏 將 抑 人理 無 ,齊、晉、秦、楚,●唯 日 不知 諸 爲 「德則 能 也。 吾 一之虚 喙 之絶, 譯 也。 底 術 以 《褰裳》之詩 也, 其 聲 止。 率 而 人也,不 如有 以 女無忌 而 吾 君子 陳 相 欲 直 其 能 畏也。 冒 也 懼 君子, 八詩,觀 於閨 德 譯 忌 日 直 所 所 未 矣。 相 則 戴 君 於 之 之 爲 嗚 能

> 故 衰, 乎 胥 喈 淒 有 猶 曰: + 人之賢而 丽 其卒章 改 淒 是 風 風 厲 固 已矣。賢人者 8 亂 無賢於己,視諸 度 未 而 度 雨 風 抱賢 ह्य 而 也。 有 見 焉 而 mi 雨 竭 Ė 亦何 喈 不 賢 世 人之心者,豈 耳 而 也。 則 能 且 喈之爲賢 鳴, 增 誰 賢 夫 鳴矣。 思 風 昔 其 風 流俗 鳴 君 也? 厲 雨 之心, 鳴 「, 賢 雨 子,不改其度。」君 而 風 人之不賢 如 淒 於人 以 淫 激 R 也 晦 故傳《 淒 者 能 無 風 而 亦 雞 激 有 相 者 能 增 RE 藉 孰 雞 鳴 而 雞 去 鳴 其 加乎 ITTI 不 而 也 與 鳴 不 已甚, 之材,偶 鳴 鳴 無 損 淒 見 問 喈 已。」有 》之詩 則 淒, 幾 其 賢 ? 之 階。」 但 鳴 何 哉 再 賢 是 子 視 广 而 也 其 值 未 中 喈 於 亦 者 於 諸 損 m

0

[「]庭」。原作「廷」。據曾本改。

[「]齊」上,曾本有「則」字。

❸ 「傳」,曾本作「序」。「雞鳴」,當爲「風雨」之誤

俟 固 伸 不 · ', 其 ė 無 涸 度 而自不容已,故可乍試之屈,乍試之 可 ,亦奚待夫再三乎? 而欲賢,春潦之水壯於洪 久 以 處 約,長 以 處 樂, 度 濤 存 立而 :焉耳。

己。 之樂,取之室家,餘 子析骸已爾。 不貧者,免於道殣 寤生樂兵亟 尚 貧,危未 之未著而危僅未亡也。貧未著,不可 日: 有 欲止淫,抑勿使民富而試之危乎? 此弗待 淫。 有其生 識 國富以 鄭新造於號、檜之虚, 將欲止 或 者 貧 Ė, 而 而 以 知 安 戰,●忽、突内訌 不可 亂, 無 危,其民 其 使果其富 加 以 則 民淫,非果 不 謂 勿使民 自遂,故 已 於欲 可。 不危。 爾,所 亂。 則 面 而 貧 或 淫 未 地 中 奚 修 能 富 齊、楚 ൬ 富 其 危 四 生 安 虚 而 以 厝 一焉,則 以 禮 也 者,免於易 達 愐 能安也, 不 以安。 安,其 三, 奚 外 外偏 而 則 可 賦 不 鄭是 謂不 以 静 耶 戢, 所 淫 好 貧 ? 將 民

> 之次。 哉? 而樂以 愉。 盪其 天之有氣也。 交戢矣。人之有情也,變則 故爲國者,勿俾其民有相恤之心, 屯戍郊場之閒,淫人相 保,中乎憂其 贈之以勺藥」,相蕩也。 之詩曰「終鮮兄弟,維予與女」, 也,始於相暱,民之相暱也,始於相 以淫焉,奚待之安富之餘也 逅相遇,與子偕臧 思, 君子相恤 室家不足,莫能自樂,愛日 魚之响,鳥之集,蟲之蝡 今夕,孰 死 且 不 無 喜與樂通, 而 義 恤 以 暱 」,相暱 與 貧 自固, 於廷 一禮之足生其 與 恤 一,細 危 始乎 終乎 也 怒與哀放。 愐 無 ? 暱 通,通則 人 與 憂 憂 於蔓草 相恤 相 ,聚以崇朝 且 爲 伊 其 丽 其 媿 恤 而 民之相 其 玩之, 也; 無 無 亂與 心 恤 而 放, 相 秋 乎? 水 以 以 暱 而 邂 猶 浮 自 自 萠 於 鄭 蕩 流

「寤生」上,曾本有「莊公」二字。

民。 而 焉,惡在乎戢淫者之靳予以安富邪? 之,欲嗇其情,必豐其生,樂足不淫而 之相恤當之。是以先王審情之變,以 寒承秋而行水。水者,相比而流 怒則見不得,見不得則激,激則悲,悲則 則寧,寧則戢,戢必以禮,故樂配 之乎始於喜者成乎樂也。 奏曼音於其耳目之前,視之若已饜之餘肉 治心者,廣居以自息,,善治民者,廣生以息 温者也。 而求燠,歆於翕比以自温,非固温 而冬慄,金肅而水淒。 又奚淫? 民有所息,勿相恤 私相温,是以成乎淫也, 始於怒者成乎哀,猶 而 志凝焉。 喜則見得,見得 夏 者也。 而 進冶容、 也、私 而 貧 神禮。 禮 故 夙 與 寒, 行 防 危 相

詩廣傳卷一終

詩廣傳卷二

王 夫之譔 嘉愷録

明

恋

風

言,因 其情 子與 不 所 將欲與之言,匡其情 君子言,不能自匿 匡也。 相 小人言 君子 知而 詩 其 彼將 達情。」達人之情 信情 置之也。言之而爲可 與 言之而 而 謂 「非情」 君 盡之,不 子言, 我之有别情 欲其 M 其 情無 而 無以感之也。 得 情者也。 聽,不以其情, 正 其 之,苟 嫌 必 情, 而 於 先自 相 相 將 非 不 聽,不自以 媢 示 達其 可 其 欲與 小人 也。 也。 (情,非 盡 嫌 也。 之 與 故 於 君

> 達其 循情 甘,人亦不得而苦之矣。 甘 之樂,徒賊也,而奚救乎? 恩,狺狺以果報怖天下,天 情者,無 君子也有餘,不自匿 與之爲 觀其所感,而天地萬物之情可見矣。」 ,苦有與 情, 而 相 可 曰 匿 以 知 情者 苦。 定 「甘與子同夢。」故以 而 性 也。 我 無 也。 别 不 是故情者,性之端 而 甘 情 釋氏 已矣。 之可 人之苦 《雞鳴》之哲婦 下 窒 疑 情 怖 故《易》 m 圃 而 則 婦 天下 苦 不 甘 人 知 有 面 曰 也 見 之 賊 自 感 與

也。 使 固 能 人 不 使 能使人作,是故 作 倦 人思,是故其淫 鄭之詩能 也 雖 0 以 思 正 使 而 而 人思,齊之詩 或 不 其 也,猶 能 罔 夸也,一往 使 與 人思, 圖 相 功。 保 能 作 而 使 故《還 有 弗 丽 人 不 餘 相 作。 能 棄 而

固」,曾本作「意」。

四三

之「儇 鄭 也久矣, 無 歲不受兵而不亡,抑有 衰 好 桓公乘之,不勞 Ŧ 異 無 異 氣 安安 於《 清 危 異 人》之 而 效 摟 以 翺 諸 夫 齊 翔, 侯 之 如 足 而 拾 以 哀 也 樂

奪,遽 耳 故 矣。 義 無 擇 其 成 m 以諸 不 佛 行 而 柳 m 也 陳仲子之哇其母 柳未 兒之 患天下之無 無 不患天下之無 後 能 遽 於 亦 遽 所 口 見 擇 而 未 食 於仁 ~禽 嘗 恶 罔 成,君子 不 也,至於弗擇,而人道之不 · 嘗 而 行 <u>,</u> 不 於遽者、惡 不 不 遽 而 一可爲 焉 遽 不 患天下 爲 於 可 馬 弗 患天下之無 奔。 樊, 利 可 樊 遽 耳 1食,遽 爲, '惡,遽於名而 而 於 也,不擇 而 其 ·之無 推 嬴政 不 (樊而 矧 但 (弗能 至 患 夫 焉 無 其 可 之并 遽 天 耳, 不 擇 饕, 待也 極 可 圃 下 之未 患 於 見可 一,諸兒之 愛,遽於 吞 墨 之 天 遽 不 柳 翟之 患 廢 於 遽焉 無 下 尤 足 馬 也 色 天 > 鮮 悪 有 口

> 孟 耳 仁 重 子 澽 趼 曰:「率獸食人,人將相食。」憂狂 義 天下 止 攻,遽焉 mi 有 君 遽 子 食 禽 耳 遽 遽 ; 色 釋氏 道 而 野 愈 之投崖斷 人禽, Į, 天下 道 臂 愈 夫之 有 遽 焉 澽

無

擇

也

乏,

而

是非 也。 仇 此 先察,忘遠 桓 加 是之謂 心 焉 道 mi 不 期 姓 齊 中 俟 焉 成之,目數 何 以 星 而 道 謂 再 而 :崇尚 1,將欲 己, 星 相 星 瞿 而 猜 瞿!? . 瞿 亟攻 圃 異 也。 奔 晉 覲 ,故君子當晉文之世 晉 爲 (其近, ī之霸· 之,居素 王 之所 嗚 狂 目 而 呼 方注 驚畏 也 U 方爲 1 九下: 以一 霸 而若 齊、 之, 以 ,齊之 而 瞿 卻 晉 鷩 心 輒 瞿 取 一之霸 未 遽營 用 所 與秦 必 爲 其 思齊 觀 不

良,

屑

同

計 數驚 震 物 而 於 不 所 告勞,可 忽, 示 下 謂 以 能 不 人之所不能 測 先 事 而 早

戰

疑

儉

者

娘

於

其

度之

外

也

周

之遷也,山

東

不

廣

大、人

臣

患

不

節

儉。

節者

節

以

其

度,

無

田

甫

田

一,言

侯

度

也。

故

日

君

患

下,爲天子者,無弗功 縣之天下, 可除 何遠 不 非 之勢未 而 미 田 思 恤 寧 其 非 也。 焉。 勞 之有?! 也 其 \blacksquare 動 田 乎 勿嫌 故 若夫 自 ? 也 莠生焉 思 以 非 心亦未可不 遠 非 齊 功爲 封 侯度之憚王 (田其 始 矣。 其 建之天 謀 人 守。 田 子 悪 霸,得諸 思 也。 也, 日 下, 非 夫 得 勞也,莠 勿嫌 其 爲天 章者,惡容 荷 而 以 未 人,故 弗 侯 以 法 甫 之思也 八子者 刺 而 功 爲 矣,思 求之 哉 而 亦 忉 守 無 守 慮 非 怛 呕 弗 其 天 郡 莠 不 夫 而 田

功,則爲天子之心 齊股 肱者,亦 無 弗功 也

尺,而天下 畏其難,避其害,釋其愁思, 面 孫 綽、 王 羲之、桑 敝矣。 故不善讀《甫 維 翰、 秦 嬉恬憺忘於咫 檜 之邪 田》之詩 説 興,

之不

能,於是有

頓

悟之宗。

知此者,

知

魯

兩生之可爲

大臣,而

陸

子静之未免

於

自

也

乎?

王道之不能,於是有

切之治

聖

學

身逸。

當其勞,早有

逸

心,

而猶

謂

其

能

勤

月逸。

作一

歲之氣,

以

斬

用之終

身,

而

奴

恒

也。

作

一旦之氣,

以

蘄

用

之

終

月,

൬

終

下,恒

而

已矣。

故天

下之至

一勤者

莫

勤

於

撓天下

者莫尚

乎

風

風

行

於上,雷

動

於

以

知

其

不

能

夙

夜也。

震天下者莫

尚

乎

雷

乃試

乎

勞。「不

夙則莫」,試勞之謂

也,即

尚

乎察

不

能乎儉,乃矜乎吝;

不能

乎勤

能

也。

不

能

乎仁,乃侈乎愛;

不能

乎智,乃

能

人之所

不

能者,自君子觀之,多見其

不

其 陵 、户牖,不亦悲夫? 墓 且 爲 甫 田, 君親 且 爲 遠 人,莠乃 逼 生

齊 多刺 晉 1多勸。 刺 及 於其 君 牀 第之

乎? 隱、 傾。 管、晏興 厝 相 譎 TE. 移 之民也。下直,上以 直,上正之,下未之詭,上譎之,五 大,而獎之以樂, 于髠之滑稽 馬 人道之紀也。 民 不足以 愿 遁 而 者 於天 猶 以 不譎, 故 多 一霸以 乃夫齊之刺 娣 君移 私 勸 猶一王之民 能 之 下, 害 而 匡 前之民 臐 臧 晉文公譎 國者 正者 霸。」晏嬰 後 而 亦 天下,是非 而 而 譎 晉 不深天 動,否 無 齊 名 也 相 勸 之 猶 也。 小刺,隱 釋 喪 與 作。 動 而 國 安始 其 取 陰 刺 丽 殆 亦 移 下之怨惡。 移 諸 齊 Ē, 其 爲 唯 管 秘 不正, 諸侯。 未 勸 夫 亦 君 侯 矣。 譎 以 君 恐 仲 一,示 亂 者 刺 下詭,上 未 許 諫 圖 以 其 \Box 也 齊、 或 美 擅 或 以 顯 其 先 故 不 於於 移之也 政 爲 亦 私, 王之法 口 能 故 齊 晉交獎 霸 聲 流 下 不不 直 人, 用 喇 相 桓 自 色 齊 以 不 其 爲 也 者 狗 能 而 公 與 降 能 張 淳 相 無 志

> 孟 子 譎 羞 中 稱管、晏,惡其移天下 分 天 下 而 代 之遺直 也 乃

> > 故

ĮЦ

天

以

魏 風

矣。 乎? 如 而 下 摻女手,可 已之,耳 餒 堪 公,蹈白 牛之不 以 而 誠 廢 不 後已之乎? 糾 責人以所難 弗獎天下 禮 可 糾 自 刃, 미 而 者 葛 以 可 乘, 有 弗 圃 屨, 用, 縫裳」, 餘。 義 與 馬 以 能,奚問其能 口 肌 不 焉。 之不 荷 所 故 以 體 辭 誠 所 荷 莫 履 可 也 何 可 可 難 難 霜」, 患 任 服 也 矣。 奚 能 乎 ? 苟 而 雖 誠 而 誠 間 堪 禮 所 於是乎導天 可矣。 必 有 誠 山 其 已爲 不 而 爲, 暴人,莫 不 其 必 必 後 可 不 爲 之 爲 忍 不 者, 摻 可 之 節 能 mi 凍

⁰ 民」下,曾本有「而民移諸侯」五字。

之所 下, 或亦 聰 道 騎 爲之矣, 也 以義以作之,調 靖之,定其常 夫,不以一夫均天下; 須臾貞終 子謀野人,不 天下之典 有易之者,天道 用獨 道 射 明 以 以 齊 唯 齊 勿 誠 堪矣。 須 野 其 不不 天 視 可 則 而 臾之可 人 身。 禮, 可 下 耳 將 待 不 之 其 堪 ٠, 目, 資 以 也。 用 秦之 而 口 齊 偂 始 事 而 其 野人謀 人道 衆,用乍 顯 其 口 可 也, 不 辯 疑 有 堪 所 師 而 情 終身,於 君子 變 唯 慧 之, 可 之, 人爲 廢 堪 天之所 吏焚 也。 有 天 勿 而 以終身貞須臾,不 己 君子; 矣。 其 ៣ 不 之 視 不 耐 以 隱矣。 繼 堪 嗇 經 齊。 勤 可 心 可,綏之以 不 是 是 矣。 試 弗齊,不 堪 已 思 力 用恒 而 夫之 以 用 以 之, 勞 必 勿視手足, 何 天下 矣。 情 唯 趙之胡 先王乃 先 可, ,遂 m 也 其 可 而 不 Ŧ 堪 ? 可 禮 終 匡之 均 南 以 以 不 미 可 矣, 齊 以 以 習 郭 服 天 以 君 破 用 天 而

> 業之剥 之形 不 樓 中一食 而 ·可哉? (,●寶 遂 爲之,「率獸食人,人將相食」,奚 如 樹 人錐 槁 爲 木, 溺 下 器 心 宿,堪矣。 堪 堪 如 矣。 死 矣。 灰,堪 以 楊 堪 廣 乃至 矣。 而 劉 一孫皓、 可 鋹 西 之, 14 之 一之日 迷 爲 以 蕭 爲 其 子 口

習之矣,習之 所 迨 以 可 坊 而 日 惡者 其 也。 美 長 爲 因 其 门則 行 可 人心之大坊,可不 面 、所惡。 之,因 千古之所不 其餘 情 無 未 以 見 敢 凡 移。 加 見 可 信 夫 幾哉 弗 可 者 諸 誠 情 焉, 安之情日消,安之之情 可者 焉 惡 行 之 其 情未 也 既 可 葛 所 習 然 移 旦 而 美,而 腰之履 安也。 m ',遂 知 已,其 而 擯之以 之, 嘗 惡 能 試 霜 其 乃 而 後 弗 之矣。 行 所 彷 爲 莫 美 其 美 彿 能 而 不

「劉銀」。曾本作「孟昶」。

之實 去之。 之,旋 之縫 弑 冰 千 疾 先 其 威 者 焉,矜其容矣。 此之交而 者,人習之,若 日 無 其 里 以 Ŧ 可 儀 無 加 ∴度」焉 敗,故 君,子弑 之 勞之千 不 裳 殊 而 度 陰 日 美之, 嗚呼 文章 溢 미 事 於 미 始 固 之坊 之 亦可與,未 矣, 賤 凝 咀 無 E 不 載 之 抑 也 E 其父,亦莫不 猶將 坊 其 能 可者 叮 無 mi 盛,皆且 然 人背其本,情 夫以 美 ൬ 利 者 民 禁 馴 僅 不 平 之, 矜之以 矣。 莫之能 也 猶 猶 致 以 可 而 敢 爲 坊 僅 其 成 者 若 無 以 如如 ^ 見 迨 利之可 (道,至 水 可 後 易》 所 無 爲 人 也。 爲 於 與, 救 不 英 · 有 人淫 美 弗 不 不 美 以 容 遷 FI 其 有 猶 堅 也 知 可 焉, 於於 焉 用 利 咀,猶其 . 其 説 之 較 冰 如 焉 如如 蟻之穴 其 毁 性 是 焉 履 也。」 斯 mi 乃甫 量 固 耳 度, 美 旦 乎 霜 情 於 夫 不 之。 玉 臣 m 潰 情 臤 樂 等 貴 有 可 彼 可

> 矣。 澌 説 而 滅 忘 則 心之未 惡 可 汾 知 沮 據 盡 矣, 洳》之詩,猶 惡 也,然而 以 可 爲 知 美 則 危矣! 可 馴 見異 行 致 矣, 之 焉, 而 可 君 無 行 子 則 所 以 見 不 爲 至 美

四

八

人之 申 雖 口 拙 以 以 也 彼 謂 名 椒 然 替 矣 忮 ? 媢 之不 得 ,其苟有 鳴 是 也 如 胡爲乎 利 細 者也 細 呼 沃水 驕」,而 人之 可 哉,子 1 芳」, 人 以 也 其 忮之心, 於沸膏之鑊, 名終 忮 以 故 八之相 相 日 非 得 + 利 日 無 申 者 何 忮 不 . 所 也。 忮 其 椒 也? 無 可 則 作 也, 之 辭 怪 增 不 矣。 僞 細 乎 猶 不 君 患 何 寧 而 心 人 其 兩 可 其 益 也? 有 八之帽 子之名終不 夷 勞 相 存 使 之燄 已 無 齊 日 忮 之 不 辭 哉 無 拙 名 君 也 芳 焉 不 子 所 耳 也 也 荷 謂 驕 可 世 何 細

0

[「]堅冰」,原闕,據曾本補。

者,細 控,而 以 鮮 皎 其 扣 驕 驕 則 《然與 爲 矣。 洪 驕 則 則 不 名 鐘 也 不 不 餓 人也。 憤 矣。 1哉? 授之 日 誅 沈 盈 夫 鮑 月 以 贵 劉 焦 謝 争 驕之時 發也 細 士 以 向 無 翶 光, 人 何 意 無 所 鄭 丽 之忮 樂 者, 而 驕 所 天 憤 於 思 驕 驕 則 天 下 盈 驕, 肖 久 哉? 則 不 之不 也。 以 矣, 無 枯 不 mi 發 所 斥 其 憂 亦 爲其 申 激之 驕 無 之無 猶 奚 徒 岳 則 讓 騙 輕 必 凌 形 狄 不 於 之 轢 莛 辭 所 無 無 悲 之 勢 者 驕 於 所 所

勞、恤 之, 之使 以 悽 而 義 念人之勞, 惻,又不 即 下, 責 甘苦之 致之 其 也 死 用 者 如 死 其 數, 口 相 之 力 而 且 以 與 情 或 口 力 死 義 爲 忘之。 以 爲 也 而 責, 情 義 輕 念 者之難 所 責 人 雖 情 尤 所 也 之 致 爲 難 難 恤 之 用 重 志 忘 志 其 勞 其 也 者, 者 死 ൬ 情 獨 之 方 恤 或 不 故 心 情 勞 其 忘 可 上 之

> 借, 力,不 父,瞻 未 哉 而 也 而 後 劇 ? Ħ 重此 故 悲 也 者 望 行 已 力以獨 不 益 焉耳 母,瞻望兄, 役 憊 念父 可 甘 乎? 無 矣。 以 己, 母 苦 用 絶 兄 者 嗚 可 而 弟 益 悲 加 以 或 呼 之 苦 甘 不 生 1 悲 恤 其 其苦, 可 矣, 如 君 其 悽 絶 子 之 未 勞 惻 情 之 何 而 也 悲 恤 以 使 其 尚 矣,猶 其 互 民 責 可 膽 死 用 其 忘 如 望

乎 弗 役 婉 母 之世 死 夫 兄 事 婦 死 也 而 乎? 之情 弟 已 而 陟 鳴 父 加 矣。 有 呼 婦 母 岵 憂 以 也。 先王之役 × 不 焉。 或 免其死。 父母 厭 忍 然則 削 夫 其 貧 婦 民 日 兄 之思 勞 子之勞,兄不 月 魏 困 民 以 弟 卉木之感, 民之勞以 役 也 夫婦之道 忍 之 人之情 一,勞 私 心於相 情 也 事 也 棄, 死 而 保 先 苦。 閨 貞 ^ 也 恤 王 所 其 中 於 杕 寡 其 先 弟 於其 之 猶 繇 杜 父父 漁 之 異 王 重

用之, 君 窮 反 不 聞 本 而 帥 而 代 思以 言 不知,孑然悽愴於岵屺之上,人 其 貞 (戚。 (,民 其 父 無 母 生之氣矣。 兄弟之思, 貞 也。

守 之土 留 則 民 國 無 執 削 圮,樵蘇其 不 之義 当,追 所 法 其 利 無 食 政 **\$** 土 一之適 往 者 有 露 浮 民者、民 恒 誦 秉 攝 而 矣, 絶 處 其 治, 也 處 銓 碩 民 不 我 則 者 民 其 (民,亦 鼠 質子鬻 固 無 加 以 日 所 乾 F 無 不 踰 恒 mi 負 一出疆, 賕 也。 丽 没 以 死 未 不治。 而 疆 爲羔 授 或 知 於於 叛爲 焉。 居其 攜 H 民 而 棘 封 廷, 吏符夕至, 之 帑以 至 非 矣。 建之仁天下無已也 買 鴈 罪。 嗚 三代之季,教 一者,保之 産 以 士 其 國 呼 吏 之 法 不失 三歲貫 郊 民 則 1 故 無 於 爲 年 其 暴君 /,猶 他 不 課 君淫 秦并 稍 民 而 唯 (之,而 財者 國 最 有 偶 恐 汙 是 君 天 逸 於 衰 : 吏脧 其 其 猶 矣。 逸, 有 政 不 或 君

> 洋、宇 往 亦莫 漢 彀 噬 而 之小 天 中, 己。 哉 與 ? 文贇、 地之生,幾亡餘 聽 一授 過 康,二帝 其 此 田 日 張 楊廣、 以 未 驰, 而 往 死, 且 而 二千 而 爲 릲 朱 又申 豪右之彊食 也,不亦痛 温 日寄命 年之閒 宋之小康 以胡亥、石虎、 女直、 於碩 蒙古之 夫 游 鼠 六 也。 羿 + 將 高 之 年 奚

唐風

已矣。 然 而 者,吾不知 無 而 浮情,不虞 方 天 故 憂 下 以《蟋蟀》之詩 已相 丽 也。 思 樂, 安於憂樂。 其 古之善用 憂之已蹙,樂之已 方 樂 丽 爲 其 思 鼓之,舞之,使 有 憂, 民 陶 者, 無 唐 定其 定 氏 一慆也 之 情 志 風 面

^{■「}於」下,原行「俄」字,據曾本删

矣; 苟 欲。 之不 之自 欲 我 大 時 憂,而後不迫民於利,寓憂於樂, 何 前乎此者皆非 民於欲。 遽若驚乎? 而 加 不悖,思其有餘, 已矣。 故 利 其 爲樂,以 望 而 而 其言良士,非良士也,利人 樂 我假 得,服 以 乎 有 聖人憚納其 知 奚望 甘泉, 奪 憂,且 焉, 是其民無一日之「瞿瞿」焉,適 蟋 今日「今者不樂,●日月其 其情 而 其 耜 利 뻾 蟀》之言樂, 思 有固 必 牽 爲 吾不知其 即 其樂也。 何也? 自 ",抑將 舍樂 車, 良,民之不疾人於亂者幾 乎荒也。 民 以 佚 情 於 待 平 酒 哉? 圃 何 利 事 ? 醴 憂事 後 所 又曰「好樂無荒 起,庸 與欲 通焉, 挾 非 得 自 張之,弛 於憂而 故憂樂相 以 樂 免於憂。 戢 近利 也 制 庸詎 矣。 而 詎 也 其 已矣。 而後 故 稍自 見樂,渴 之, 欲 欲 樂 於樂之 除 以 以 涵 哉 事 而 自 不 樂 釋 並 日 利 以 ? 非 則 然 蕩 近 月 已 文 行 而

> 足云?3 爲 欲 也,不知所 之制 相 競。 則 相 止,國之不亡幸也,奚 涵 瞿 則 瞿 , 相 而 善 競 「驚, 2 則 疑 崇 陶 利 疑 唐氏 以 而 求 無 之 欲 以

不能奢 暮 苟 爲 奢 故君子之儉,惡奢而不欲也,小人之儉,欲 心, 衰,戒之在得。」言暮心之「瞿 瞿瞿」爲狂,晉以「瞿瞿」 可以 利吝而 心,音有暮 圃 而姑從 所貴 不 死易利 果 而悲之以死也。 已矣。 也。 乎儉者, 而 響,而國 嗇之,非人之甚 「今我不樂,日月其除」,悼 圃 蔑 爲利吝而 無 不 爲暮 侈 爲。 然而 心 爲良。 國。 子 悲之以 也。 瞿」也。 姑從而 日 故 細者不能。 業 暮氣流於 日 一 血 死 己 : 嗇之, 則 有 齊以 氣 將 有 既 侈

0

[「]者」,當爲「我」之誤。

[「]善」,曾本作「警」。

[「]足」,曾本作「風」。

國而國不可旦,三晉之士爲天下鄙,允矣

齧 弱 吞,先、 於 不 鐘 而 以 以 固 一,習爲恒 非 慙 鼓 終 爲 人 以 窪 適 則 思 年, 崇 決 恒 mi 爲良 狐、胥、 巾 有 爲 利 馳 人 公侯非 而 則 其 他 m 驅之,有衣裳 思考伐之,時 肘 而 互. 也 廬 故 不 人之所奄據,昌 不怪 足 疑 ,孰 舍 翼、沃 卻、 恤 適有國,大夫非 之下 妻子, 面 死 謂 樂、趙、荀、 ,胥「瞿瞿」 不 則 陶 相 有 釋 唐 , 始猶 剥 寇 相 而 氏之有 移 獻 讎 奪 夫 即 一言以 勢 思曳婁之,有 然 也 以 也。 范、韓、 公 且 去,身死 0 故「瞿 爲 適 此 一之九 蟾帶之 相 恒,相奪 有 哉 然 有 勸 家,庶 而 魏 子 車 免 子 相 聚 晉 而 馬 相

而 重 考伐之,天下之忌奪亦消矣。 馬 深 故 mi 憂之亟者,窺之者衆,護之甚者,媢 馳 鰂 驅之, 以 墨 自 有 「賊, 范 衣 裳 而 以蜜 电 少 自割 之, 未 有 死 俾 鐘 而 惠 鼓 有 之

> 之者罪 故 人 隴 不 死 (,則 日 首、宋 爲他人有者,未之有也。 未 : 未 有 元 也 審 防 他 夫 彊 其 人 無罪 臣 而 爲 丽 誰 如 失之塞外。 懷 氏 他 寶其 之子 人之在 霏 , 而 ___ 秦 其 一寶 業 奚 防 蕭 無 從 E 胡 牆 謂 罪 防 mi 之? 之他 失之 死 而 懷 而

智之 者勿 己,而 知 馬 不 其 懿 可 論 弗 一,唐 揜 不 不 恒 己。 知 逮 可 而 太宗 與詐己者親,雄 其 揜 哉? 揜 0 之者, 詐 不 而 厚 曹 可 猶 爲子 好 孟 謂 揜 密 德 之, 計 謀 也。 ൬ 疑 揜 前 誠 者 殺 猜 之者, 人莫不惡人 歆 愚 異 失之 者弗能免,庸 也。 己,而 與 密 李 愚 者言 世 也 於是而 失 動 之 之 知 司 其 庸

死

於弱」。

原作「愚誠」,

據曾

[「]身死子弱」,曾本作「卑」。

[「]勿論」,曾本作「弗能」。

五

嗚呼! 揜哉? 石揜 詐 者 也 售 矣。 曲沃之君 此晉之所以多權姦也 我 聞 揚 之 有 臣 水 命, 相暱 不 白 敢 石 以 以告人」,又奚 粼 密 粼 加 • 私 水 相喜。 不 爲

也 仲 知慎 輕焉; 臣、朋 如 立 何, 驚喜而悦以 天」,見之偶 受之也不驚。其摯可任也,其驚不可 闪 晏 | 乎文王之廷,不憂其無如文 越 「綢繆 嬰 圃 見重而 驚以 合之易,則 友、夫婦之交,其 其合也艱難,則恒見重焉。 石父纍 何 立乎桓公之廷,不憂其無 也。 墊 束薪」,東之勞也。 也。 摯也。「子兮子兮,如此良 加 能 而登乎晏嬰之堂,不 故 不 自 感之也不摯。 「今夕何夕,見此良人」, 日 守者 知 . 所 履 鮮 合也順 裁 道 也。 矣。 坦 王 易, 合之易, 坦 嗚 太 如 「三星 何 呼! 則 公耄 見輕 幽 憂 桓 也 其 公何 恒 在 貞 無 人 長 見 則 而 君 而

> 古。」 固 後 合,乃以悔幽貞之不夙,●其亦晚 口 以 誠 受物 坦 坦 耐 焉 不驚。 0 雖 履 綢繆以束之,而 虎 尾 猶 其 素 矣。 也 薪 無 而

收之而E 憊矣。 其 財力 周之東遷,晉、鄭焉 排 望 其亡,亡人之國 怨,6 其 牆 而 更 而死, 況爲天子 殫人之力而不爲之所,人力 敦 周已移,6而 奪其父母之食,●外迫内亟,沃 取僅存之國,使之重役之久,竭其 不可 臣 任 節 哉 也。 而移意以 ? 依 **嚮沃、翼之臣呼天以** 沃之君臣 鳴 而 ,翼、沃之争,❸晉 呼 宰 趨新, 制天下 乘 此 利 桓 王 殫 而驕, 者 王 衍 而 所 以 人 平 不 44 之 以 何 死 亦 ? 恤

[「]齒」,曾本作「憂」。

[「]食」,曾本作「賽」。

[「]人」,曾本無此字。

[「]死」,曾本作「告」。

Ŧī.

子之衣 征 E 召 人 傷 無 早 衣 肩 以 知 之 七兮」, 爲 先 唇 叛 衣也,奚其 , 而《 , 可 以 以 春 沃之心 無 秋》於焉託 存! 天子 爲 矣。 心, 始 \wedge 鴇 也 而 羽》之 不 必 豈

并芮、 道 之,不待教 繆》、《杕杜 得之於《葛生》。 下也 霸 而 不薄矣。 前 列則 有 後 工,即 」,失之於《中谷》, 以 其 使 虢, 況 家, 情 人 於 樂有 服 繒 一》之孤 以 此 而後吾之家固; 而 我 蒲、 而 道 口 其 也 用之則霸。 用 屈,大 而 相愛以生,相信 身,而後吾之身安,使人 亦將不淺,❸ L) 也。 王 改 者乎? 晉之爲政於天下也 禮 而 武、獻之 興 雖 使人樂用 矣。 雖 穨 進 故 無 得 而 周 兼 以 道 而導之以 於 卻 之失天 虞 猶 死,《綢 其情 、魏, 足以 民 穀 忧 因

也。 H 日 月 月 相 相 代 代 於前 於 前 前 而 莫 不 能 易 自 其 喻 素 貞 奔 妄 時 者

> 之天。 感,壹 爲消 天。 面 口 也 感 非 淫於情者浮用其 日月 長, 淫 而 志 中士 也 感 弗 者 相 不 也。 因天矣。● 爽, 易, 静 息 君子是以 上士 寒 以 暑 尚 自 疾 情, 「夏之日 其 徐 敦 知其 뻾 事 之變, 其 以 天 而 用 血 ,冬之夜」, 不 情者專 而 有 氣之遷 爽 不 感 天 因 而 之 流 天 必

否 然,有道矣。言之至於吾 之,而寡不給於治衆, 目之至 首 陽 得 之果 失言 過於信 也 有 有 也 . 苓焉 則靡,過於不信 涯,櫛櫛 雖 其 否 ,弗然, 也 司 然 ? 聽 取 前 勿 者 人 則愎。 須 其 可 言 而 乎 遽 窮乎 而 爲 目 弗 吾 奚以 再 然 之 之 臧 思 知 雖 而

[「]以」上,曾本作「出此

^{● 「}因」,曾本作「顧」。

況乎其固不 之也,聽之求焉,雖或得苓而不能 我於首陽也,之首 不張 下以 治己 也; 將索苓於人,而 失苓也,而況 而 共驩之靖言 言之至於 ,其過焉者鮮矣。 以天下, 一,雖非弗 己,不聽 得 乎 不 然,勿可 人也,而 吾 也 無 或證首陽之有 其 聽 前, 能震 陽 得 己 則 而 苓也 焉 也, 讒 師 故吾將采苓 遽 亡乎靡 爲 雖 張 ൬ 然 人 或用 矣。 不 則 之臧 亡乎 之也 得苓, 以俾 諫 此道與! 大 諫 愎。 否 行 舜 繼 故 矣。 未嘗 而 得 我之求 舍己, 也, 或 而 治 君 失 子 而 吾 有 漬 讓 天

秦風

也。 而 夫 婦 秦 之 猶 無 IE 君 燕 臣 婉 雖 父 褻 無 子 情 道 昆 之詩, 猶 弟 足 朋 以 友 霸 之夫 ,其 王。 薄 而 甚 猶 關 東 īE

> 之國, 乎? 容閉 戎 河 以 之於殺伐,於是其民 世,民已積柔,而 而 因 能 能 血 一《南》之所以爲天下仁也。 盡 Ш 啟之於情 乎其時。 盡 氣 夫 而 矣。 閉也 閉 之裏,天府之國,民 之所樂 駤 善治民 禽嬉 戾 哉?❷ 情欲 秦人乘之,遂 未 猶 豸聚,舉天 故昔者公劉之民 欲 革 趨 者,司 陰也,殺伐 其 啟之此,則 也, ,然後其 (弗能 也,君子弗 慆 周之先 其 淫 盡 駤 啟 下 繼之,殺伐之習, 啟 閉 戾 民 亦 腴 而 閉 也。 之於 閉 復 也 王 能 陰 而 爲 而 作 閉 嘗强矣,因平 之 絶 逮 相 也。 血 消 汧、渭之交, 乎 情 彼 親 之於殺 氣 隅 息之,●弗 圃 而忘其慆 矣, 欲 幽 而 陰之域 充, 尤惡 困 況細人 、厲之 不競 而 而 亦有 伐 啟 弗 抑

- 「司」,曾本作「思」。
- 「尤」,曾本作「又」。

五六

競 所 爲

盡 也。 閉 至」,言啟 故 婦 而 人 君子重 Ħ. 情 將 欲 也 声 嗱 3 之。 焉 六四 也 殺 《坤 秦 日 伐 風 学之 括 亦 囊」,言 陰 以 初 也 日 履 天 陰 閉 弗 下 霜 也 能 雄

漓,大 之閒 无咎无 可 彊弱之司,王霸之辨,人心風 譽」,其 見 矣。 漢、唐 猶 瘥 平 都 -周、 雖 秦之故 然, 一會之 啟 壤 閉 醇 其

作 之 亦 異焉。 駤, 也。 息 漢 夫 西 教 躬 京 近 之 之 周 戾, 製, 唐 猶 夷 教 然 猫 沂 其 婉 秦 無 娩 加 促 雖 聲 絞 詩 U 也。 李 >

淫媟 於漢 且 有 不 殺 ·得 伐 於 之 漢 氣 無 焉 蛮 魏 故 不 晉 「,秦 得 於 與 周 唐 無 勿

三唐

之作,

迫

矯

而

無

餘

思

雖

北

里

南

部

之

陵

民

中,●而 足 寧 之掣摋,●亦以 尚 ,●增之以 也 爲 韓 之譽者 退 浮 之 起 促 何 F 知 起 一《南》之衰與 倡 以 八 天 其《 下 代之衰」, 於傲辟 車 鄰 然 褊 鐵 則 刻 駟

風

之而 之不 游 其 尤 無 順 君 下 履 智 不 從 口 子 不 則 世之功, 歸 從知之,不智也。 乎 故 之,宛 智也。 ·爽,非 所履 履 之, 蔑 唯 不 順,「自天祐之,吉无不 必 也 得者, 禮 不 義 疑 智 =智者 在 非 小人 夫 而 故 溯 何 故 水 順 常之業, 未 天下服 曰:「周道 也? 洄 不 中 所 求 孰 當 仁 從之,道 央」也。 視。」 之不 能 求 仁、義 未 唯 知 之, 之 無 嘗 軰 得 不 此 取 順 成之, 如 禮 阻 平 八禮 智 矣。 哉? 使 必 也 砥, 視 而 利 早 且 故 之 皆 長」矣 之, 其 勢, 天 知 未 棄 愐 未 疑 直 下 嘗 此 義 先 順 嘗 夫 而 而 敬之。 如矢 求 疑 道 胡 求之 而天 唯 不 順 坐 也 爲 知 求 獲 不

⁰ 中 鐵 駟 原作「掣」 曾本作「守 」,《詩 驖 經》通 據曾 行 本多 古 本改 作 駟 曾本作

得。 禮 乎? 民, 其溯 刺之早矣。 天下怨秦之不仁,惡秦之不義,賤秦之無 府、獻老之在田閒、交臂失之、而孰 恦 沿文、武之所紀,御其民如輕車,而率其道 游 六國之熠, 如故轍,周之以王者,即秦之以 也,反周之舊,循周之迹,去幽、厲之所傷, 先乎齊桓 前 不知求,逆求 面 尤不審,而 洄 孰知其一 嗣 無已,則逆 鮮 以臨 矣。 而霸,霸宛在矣。 而 折捶 東國,屏周 然而天下不謂 嗚呼 於不智也? 而 逆以守之,二世而遂亡。 以 帝也。❷ 不知所 1 取之,四 秦 而擁之以令天下, 人 在,典 王宛在矣,宛 如其周不可 溯洄之賢於 收 《蒹葭》之詩 百餘 周 章之在 王,①不 士, 年 與與爲 用 加 理 故 待 戴 溯 後 在 周

爲 此 説 回環勞止而 者衆 不得,澹然放 移之於學, 妙 悟 意 爲 丽 得 之,

> 孰欺 《蒹葭》之詩, 之宛在,是其於道 之有轍迹而易 自以爲 夫從事於阻 非其人,悼溯洄之阻 網之設,鴻 「未之思也」,此未嘗勞 徒勞否也。 知放意者之果 旦之頻光, 哉 得 圃 則 長之塗者 「豈不爾思,室是遠 而後可舍洄 固 矜 麗 得 求故 非 之, 有遇於霏微 否 :得 將終身而 也, 也。 長,0而 也。 不期 吾抑 舉 而 非 可 뻬 嗚 鴻 告勞者 其 游乎 放意以幸 廢 呼! 無 縹 不 而 時, 也。 知 得,乃以 渺之閒 得 而一,子曰 勞 鴻, 也。「 非其 6 必 吾無 止 周 如 此 者 地 魚 激 道 將 日 爲 之 夫 以

秦即以之王」。 周之以王者,即秦之以王」,曾本作「周之所以王

0

折捶」,曾本作「始」。 舍」,曾本作「溯」。

0

悼」,曾本作「憚」。

五八

乎? 矣。 移 欽 東周 其 霸 親 胡 賤 自 無 知 哉? 已 U 不 不 於 憂 不 焚與? iffi 一,爲 我庸 用 其 恥 齊、 以 我 如 知 秦 繼《晨 不 羈 降之諸 不 醉 庸 木 屈 晉 楚, 我 爲 而 耶 也 皆 病 門 辰 之不 恝 風 庸 天 ? 可 之 而 天 тті 一面 然捐之, 侯, 而 晨 下 下 織 齊、 以 不 無 能 固 雄 能 離 釋 約 作者,唯 風 而 己, 懷之,有 然, 晉 也 《》之詩 得 其 繋 不 與 ? 爲 不 · 病 憂 ? 何 人 而 其國之人心 心 知, 近 此 其 而 蓋 況 屈 無 開 厚 (國者 都 懷 不釋,貧不 者,秦、 楚、秦者 己, 氏 抑 狂 之 之必 矣。 不 之《 奚 以 也 姑 爲 釋 以 失 綿 懷 騒 楚 鳴 出 而 如 人心 永 民 不 上之 **>** 而 呼 尤 與 而 閔 此 也 其 棄 者 欽 責 ? 己 -

也。 君子 故 之言, 語 置 有 夏屋 之 游 「得 士之 之怨 + 於 以 者昌 不 脅 恤 孱 ,失士者亡。」 主 Mi 而 秦 激 13 其 以 豢 雄 此 者 非

> 己 仁 無 臣 之 丽 已 也 其 也 馬 權 於 m 之必終以 得尚父,得一人爾已。 矜 、 夸捷, 節 名 輿 天 已 秦 者弗爲 得繇 亦無 稍 相 武丁之 (哉? 則 下 而 好士之名,則 亦 虧 去 有 日 未 以 或 幾 何 人之心 余 處 「得 飽 也。 歆 嘗俾之以 人 矣。 娱 若 虚 爾 得傅 四 士 也 困 士者昌 己。 人主於 其 簋 而 虚 而 者 故 或 説 秦穆之得 而 矜 其 卿 修 弗 天爵 奚 湯 哀 好 其 疲 大 或 不 得 爲 與 之 榱 不 一,疲 士之 夫 其 飽終 冠 未 也。 則得「明 淫 余 得 題之下 飽 民 而 劍,多 聞 人 3 其 伊 固 者 人, 名, 矜 也。 諸 其 游 爾 # 民 不 而 好 侯 得 荷 士之 亦 已 , 其 則 爲 以 夷不食」之 士 得 以 是 食 其 惡 丽 百 談 眷 士 一之名 無 故 於 視 視 養 矜 文 里 足 謔 其 行 餘 王 我 其 天 狗 其 與 好 奚 穢。 則 嗟 親 子 之 者 矜 狗 承 + 爾 爾 馬 親

人戒, 之國 來,不 也。 不飽 耶 ? 難,坐老旅食,垂 君子惡 土 也 爲嗟者,雖諼之可 夫秦之不恤其 飽以 曰:此則秦人之諼也。 則 圃 夏屋 非 秦人 其 抑 得「舍我 困 一怨而 民 不 之諼,而於此 之,而不得去,游 能持吾之陰事 趨 不 實去 宛 恤,秦之爲天下雄 靈 關 怨,而 一龜,觀 華, 中,而游士之風 也。 圃 有 何爲以 爾朵頤」之 丁,走諸 益 取 夏屋 土 焉, 勤 示 於 夏 侯 能 以 E 耕 長,宜 誘之 爲秦 此 以 亂 屋 戰。 1 以 相 始 吾

陳風

獎其 君子 君子,是以 也 薄也 有 澹 爲 而 君子尤弗尚之。 聊 君子易,是以君子獎之。 易足 且 一者,薄之心也。 者焉,爲君 獎其澹也,非 子易, 吾懼夫薄 丽 非 非 即 即

> 敬天地 之也。 姜爲 亦惡 而協 子 而 之産皆有 知之矣,猶之乎王仲淹之爲隋出 武,吾弗知之矣;邵康節之不仕盛宋,吾弗 薄於以身任天下 於欲者之亦薄於理,薄於以身受天下者之 者無難 不 失其澹 E 得 以 其 之産 將無 一,亦惡 而 無 所 安。 弗 **、易**,慎 前 用,飲食男女皆有 其 ,澹用天下而不歆 河 得 有 秩以其分,重飲食男女之辨 苟其食 魴 而弗 聊且之心 哉? 也。 爲之而已矣。 齊 (魚,則 故嚴 荷 姜哉? 其娶 與 子 以 1 7所貞。 陵之重 其薄, 妻, 河 厚用 是故 筋爲 吾 則 爲 弗 天 以 君子 天 辭 君 齊 地 下 知 光

妄賤,無妄生,亦無妄死。富貴而生,君子君子無妄富,亦無妄貧,無妄貴,亦無

子 俗 藉 非 賤 以 之所 子之用 遂樂爲之,幸 其 其 陃 偷 成 用 之心 但可 信情 之, 矣, 天 天 以 之苟 貧 道 下之大仁 用 唯 而 ,猶是心夫! 以 賤 也 天 知 其 勝 與 渞 可 其 其 身心之可 富貴 死 以 也 以 可 國之必 其 ,尤慎之矣。 一,以 勝 以勝 一而 貧 貧 而 其 遂樂富貴乎? 成 賤 遂樂爲之也。故君 貧 亡。 勝 死 天 而 機 而 成天下之大勇 下 死 而 ^ 不擇,是 之大義, ,亦君子 衡 樂 荷 門 貧 可 賤 以 雖 ,之所 以 以 陳 勝 巾 賢 君 之 其 mi

矣。 吾亦 貞 其 池 之洋洋 志 1 可 愛吾 之 以從康,降其 雖然,若陶靖節者,非 其貞士曰:「衡門之下, 以 '', 可 夫 漚 廬 淫 以樂飢 麻。 人 殆 也 彼 哉 心則 無 情 美 幾 以 淑 其淫 矣。 從欲 其不 姬 齊姜、宋子而 衆 ",均之乎降 미 人 以鳥之欣 可 日 與 以 鳥 晤 棲 欣 歌。」 東 遲。 有 爲 門 一, 而 託 欣 降 之 泌

荷

可

矣。 而 無 娶 非 苟 然則 者 可,而 也 廬 東 吾 遽可之也乎? 門 廬 之 也 池, 愛,吾 不 屑 愛 染 也 其 菅 有 麻 以 久

六〇

懲矣。 焉。 奔 者, 矣。 竭 出 或 禽狄驅焉。 『》之泪 《懲矣。 也 心 别之以 了,箕 奔其心,弗奔 飲食男女之欲,人之大 奚 況洩 以 奔 子 瀄 其 奔 知人之終爲 治乎? 文 而 度乎? 容,弗 其 君子寧焉,小人營 其 促 (音, 莫 側 即 其容,容所 比 奔其音, 也、《株林》之迫 君 有 干死其旁,無能 子舒焉 禽狄 或懲 音 共 之者 也? 所 不迷,而 也。 馬 小 不 矣。 迫 迮 禽 共 遽 劬 狄 己 心 而 而 ^ 丽 而 焉 其 子 月 或 容 奔 已 别

檜 風

君之得也大,其失也亦大。 忠臣誼 士

裘》爲 裘》爲 也。 之所謂忠臣誼士也,非盡檜君之罪也 之小失,以謝其扶傾之無力。亡檜者,檜 思者,未聞 無罪也,不已難乎? 之才、唐昭宗之志、●未有能救其危亡 偪,王子友攘臂 之争於君 而釋其思,檜人之志變矣。 日矣,而豈其猶未也? 故聞以 有土之君,而衣服之絜以 失, 失, 也大,而後 而 m 以 其 檜 憂而 得 君之失微矣。 加 譯其 亦微矣。 睥 爲之臣者,其致 睨之,雖以 其 思者 國 可爲也。 志變而 也 西 周 即不 爲罪 憂而 高 中心 毁 翹 貴 ·', 必 以 以《 其 悼之 益 死 鄉 東 之 其 羔 君 其 者 公 羔 國

之喪先亡,此 道 因 之喪 人情 子曰:「我 情 也 而禮行,奪人之情而不得伸,而 在 無 Щ 餘。 禮亡,情未亡也。 幽、厲之所 觀周道,幽、厲傷之。」周 檜亡於東周之前 爲 傷 周 禮亡而 道 也 加 \equiv 後 道 年 悲

> 下哉? 結」,雖 國也。 夫! 恥。 死,而不可忘,慎守此 在 之久,求中心之「蕴結」者,殆無其人與! 不得已而因之,因之既久而順以忘也。 淪喪無餘,而後 迷而不復、《素冠》之刺不作, 禽之非人,而人之不 蕴結」者,天地之孤氣 一,禮猶可存也。禮亡既久而 故拂情蔑禮,人始見而 吾懼日月之逾邁,而 宰予,學於聖人者也,恝然釋其 有可與「同 河北之割據也, 燕、雲十六州 歸」者, 可 也 禽乎? 也。君子可 百年之衣冠禮 天下 圃 驚之矣, 不樂與之同, 戴 更何望於天 順之,漸 魯,秉禮之 情且亡, 契丹 生,可 繼 而 漬 悲 樂 而 何 不

之也。無所恃而迫於危亡,然後生其忠愛忠臣之戴君,非爲己之無恃以存而戴

▶ 「宗」,原誤作「忠」,據曾本改。

事 檜 不 子,言踐 網 於 檜 悲 賴 之心 釜 周周 周 奪 孝 釜 之 夫 以 利 而 哉 也 於 心。 自 前 能 而 心之不 纏 何 鄭 烹 如 我 存 於急 西 mi 急 魚 於 不 亡 周 檜 思 心 於 能 難 溪 也 遊難。 晉、 之 之 嘗 之 是 唯 利 mi 而 幾 臣 且 已 mi 法 患 秦、楚 踐 周 求 何 未 子 Ļ, 晚 水之 生 之下 其 魚 哉 度圮 ·有 無 其 巾 言 懷之者檜 與,吾 能 妻 唯 1 不 忠 或 子 殉 不 故 患 聲援 愛, 清 蔑 疆 保 而 水之不 焉 矣。 不 點 不 孝,不 勢 其 絶 能 亦 以 者 孝 安平 而 驅 亂 奚 周 保 衰 乘 無 ~ 之 E 足 保 流 於 爲 其 所 亂) 矣。 也。 矣。 爾 與 其 溉 事 利 而 恃 以

風

奚以 爲 蔚 也 ? 歘 然 而 興 欻 然

叛,貞 所 之所 之 不 孱 憤 主 壹 主之 行 其 撳 非 束 切 而 主 能 恒親 其 通 愛 庸 而 相 相 然 丽 止 困 之主 論 溺 堪 求 依 所 蔽 而 不 奪 而 不 之不 人流 初 尤尤 也 其 踰 宜 離 愛 憎 面 暴 也 而 而 終 一, 非 (薈蔚, 唯 分 忌 困 之, 以 也 附 情 伸 庸主之所 不 涕 張 言 恐 矣。 我 以 有 保 之 窮 相 矯 以 而 徒 之視聽 禹 相 不 臣 姦 如 於 践 情 其 謀, 不 而 色 傅 奚 相 奪 如 漆, 達 激,奪之而 而 忌 違 回 之 任 以 也 而 獲 此 而 宜親 面 日 誖 其 所 情 合 遹 元 也。 而 爲 也 , 猶 相 而 之 明 甚 憎 婉 弗 而 帝 不 矣。 三則喜, 婉 欺 棘 不 變, 臣 主 能 矣 失 不 圃 有 能 也 變」也 平 能 一之所 愛 理 飾 舍 能 不 臣 欺之 3 自 然 其 古 故 之, 也, 好 妬 也 伸 如 離 歘 決。 而 遽 也 其 日 察 以 此 則 然 矯 約 怦 露 彼 孱 相 媚上, 憂, 尊, 而 情 怦 然 情 庸 明 身 尤 翳 孱 m 偪 詞 庸 其 之 則 不 平 專 自 有 庸 已 丰 而

安其 情 其 似 逮。 違 士 欽、谷永 良 沂 而 良 道 者 競 玄宗 之 而 其 思 亦 亦 不能 重而 寝,秦 依 惡能與薈蔚之子争一 弗 情 其 柔 有薈蔚 下 ż, 之所 不 論 矣。 焉 人 庸 能 度宗之膝 其 其 過 檜 舉 而 匪 之主, 谏 情 然 不 也。 一明君 僭讓之,其 太宗 相 成 其 也 安, 而 帝 而 0 偪 終 然則 則 才有 誼 不 高宗之刃 察魏 而 屢 如 仇 能 必親 辟 屈 不 彼 土 之 庸 諱 大 於廷。 能 給 徵 者, 良 朝 過 薈 主之保姦 以 其 聽 之 依乎 重 之飢 敬 不 蔚之臣, 之,斂 渦 人者 娬 何 而 其誠 釋於鞾 元臣 媚, 也 才之 文宗 安禄 飽 一、微 ? 躬 念 哉 甘之, 才 與 褚 所 其 信 Ш 人 屏 不 相 能 矯 貞 賈 能 寵 遂 不 氣 遂

也。 之。」是以 君 老 天道 聃 均 知 如 術 其 其 張 而 心 以 弓 已 以 桁 然, 矣, 均 與 天下 高 天下 奚 者 知 ٠, 抑 而 相 道 不憂天 之, 持 哉 下 而 者 下之 非 其 言 道 亢

> 焉,有 故裒 易其道,是天下 棘 銖 百物 天無 我 知 者 不 持 德 取百官之敏 者之亢 然取 不 朝 焉 矣。 均 之 天 之高 下 柄 多 憂,聖人無爲,君 知 從上下,而暮從下上,是以 有儉者焉, 稚 況 ·, 謙 雖 抑 百姓之有 而豐之也 强 益 者 天 者 下 以 猶 寡 雖吉, 焉 道 多 而 日 鈍 德 者 有 乎? 求者之抑 與 下 軒 而 謙 且 君子以爲憂 其 亢 寬嚴 一,是以其 輊 有 餘不足而予奪之,而君 壯 也,「謙者,德之柄 之,而 競者馬 均 者 鳲 去 者 之,而 子 焉 鳩 紨 而 日 而 無 儀 不 開 天 之七子,有 高 有 ,有柔者焉 嗇之,弱 争。 遠 困 之以 王者憊矣。 患之卦 **前** 羸 也。 矣。 矣。 者 其儀一 又不 屑 不均 屑 操 營營 故 以 也 能 然 長 也。 柄 有 日 也。 也。 求 我 子 然 取 者

故 念 周 背 者 霸 非 有 奬 背 霸 周 之情焉。 忧 甚 乎 其 宋之霸 以 背 周 也

郇之霸 焉 安,曹何爲其 晉之霸 也 曹 感晉、宋 思 霸 人 耶 焉 ? 而 然 思 日 則 : 郇 晉、宋之霸,非 天 ,曹殆 下 無 爲 霸 霸 mi 咸 曹

乎? 狄, 難 求 伯 暱 曹 爲 北。 上 也。 而 已。 勞 干 日 者 免 楚 曹之「 南卻楚, 1,必以 於霸 之。」 ·晉 m 楚寇鄭、許,逼 而 力小 故 背 抑 比 晉 陰 日 也。 因 中 不 之 其 而 乃翦之。 乎 雨 夏 m 然, 无首,凶。」无 犯 曹之卒章 身爲僇先,曹之君子, 霸以 犯 乎? 曹安於中。 乎? 大,忘本 昔 霸 曹 者 飢 通 故曰: 雖 夷,爲天下僇。 於王 曹 之 狄 丁,傷 郇 亢 南。 滅 而 伯,其 一,未 首 舍郇 天 宋 四四 邢 敗 下之 而 齊 季。 聞 宋 衛 或 比 伯 桓 能 即 乃 無 有 ¨, 其 起, 《比》之 聽 逼 比 能 平 凌 Ŧ, 霸 曹之 北 犯大 不能 曹 匪 勿 夷 之。 恩 非 郇 > títi 卻

地

道

豳 風

災。 之五 月》, 厚。 之取 不滯 也。 爲 有 ,聖人之所以 高 災 家,六 志憂 一, 曰 故 《旅》之初, 其家之謂 高 陳王業也。」何言乎 明; 聖人之於其 E : 也 明 : 了窮 於天下 者,天 王 四 聖人 困 何 [之富, 假 言 「,❶瑣 也。 (之體 爲天下 配 有 乎 日 也 家 家, 天 以 瑣 非 故 也,以 以 地, 也 家治天下? 以 勿恤 得 其 旅 王也。 家 3 營之, 以 無 其 所 瑣 敦 治之,故 天 ,古。」 私 道 天 恤 瑣 厚者, 下 配 下治 則 矣。 而 故 治之, 天 斯 爲《家人》 不 王 日 其 地 其 失 不 至 其 廣 知 之 其 所 略 即 其 德 故 家 $\overline{ }$ 生 平 此 取 道 道 ? 七 用 其 配 敦

憂」。曾 本作「幽」。 則

以

無

霸

也

,曹人之欲無之也

六四

曰 使 溝洫 泰 躬卑服,忘身求 之去衛,非有千里之遥也,裏 上,日 孔子不得於衛,去而適 不憂,因 人,非其人焉,上下不 不近人情,凡民之家,非 人,三歲不覿,凶。」高 天下之謂也。 甘節,吉, 冷爲 也 無 爲 家 ,咫尺之土,升勺 昔者大 使爲天下圖者 爲 往 人君者 計 「豐其 時 而 人臣者患 者 往 而 非 禹 而 有尚。」 患不 行,死 得 伙 受 屋 功 利 也 也。 其 命治 部 不 廣大,言其容也,非言其 一,則 以 而然也,則爲寄生之君 道 其家 生不惑其 節儉,言其不僭也 制 明 失 勤天下,斯 則 水,胼 之水,利 相覿 南 陳,絶糧 數 其 而 爲 闚 畝之鄙夫矣。 其 立 簡 道 《節》之五 而 手 家 度,阜財 其 糧 略 則 凶 志 無 胝 焉 户, 不 爲《豐》之 於道 矣。 翔 以 足,經 ,凡民 宿, 不 斯 天 闃 聖矣。 盡,降 昔者 以 餒 際 其 以 故 之 誉 聖 陳 安 無 而 而

> 卑,賢 《易》曰:「聖人洗心,●退藏於密。」吉凶 民同 忠; 言其 而 愐 天下,而 緻,密 爲天下王,故曰:「《七月》, 爲人君 患,去其矜高之志,洗 細 而 也。 也。 謀 爲天下之父母者 不 而泰以 爲 肖,藏 知密之用者,乃 人 臣 一廢事 也。 而 細 纖 則忘 其 以 心 而 親 陳 唯 口 不 也。 乎仁。 利 王業 密 與 遺 乎? 尊 民 則 也 同 委 忘 而 患 曲 謀 與 故 乎

其 籍之兵 人爲哉? 兵,亂天下之道 而農其兵。兵其農 才也,殊之以 古者兵農合一,謂 也 天秩 昧者弗察,疑 之矣。 其 也。 情 夫兵 則 也 秩 無 即 農,農其兵 才不 農之不可合,豈 古 之云者,殊之以 農 簡 人之兵其 堪則敗,情 兵,而 則 無 農 無 世

[「]人」下,曾本有「以此」二字。

^{→ 「}而」。曾本作「細」。

之,必 欲共 也。 農,是洪農而 其 也。 之矣,有悍兵焉,必不受 之不合兵於農,觀其 兵農之不可合,觀其情 得 其 其 、情,不容不殊也。假令以《東 也 耑 J,然而 《七月》,以 治,雖 假令以《七月》而勞其兵,是窘兵 之於男女。 焉者也, 悦而作之,達 則 才之堪, 異其情,惟其情 勞兵以 潰。 農與其偷 則已異矣。 才之堪 才不 色。 而 而 狂之矣,有勤 勞 兵乎 樸者多得之於飲食,佻者 弗 堪 農 非勞 其 農 能 弗 而 樸 情 也。 ? 求天下之情 爲 情治之,猶 能 之異 飲食、男女,人之大 而 而 而 者之殊 也。 用。 故 爲 己 兵 《東 通 Ē 矣。 用 而不 (佻,故 農 之以 如其受與,則 是 : Ш 也 焉, 之也,欲 情之不洽 山》而勞其 故聖人勞 》,以勞 欲 可 所 口 、勞 者 必 知 故 强 必感 勉 農 不 而 古 m 欲 也 也 兴 得 以 兵 罷 己 知

> 豊 故《七月》、《東山》有異情 而 情 情 鹿鳴》、《四牡》有異 미 精 異 以 强 用 而 無 哉 才, 才遷,才異 事 ? 富 因 豈可强 强 才 而 以 天下 而 起 哉 功不 功。 道, 自 前 競,道 相謀。 圃 農 知 專 知 文武之分。 之不 兵農之分。 而 古之人因 勤 易也 車

矣。 矣。 仰之閒,幾必通 苦,烝在 仰之際,幾 於吾身以内者心也。 之幾,欣厭之色,形於吾身以 相 值 憂樂 天地之際,新故之迹,榮 而 不 有 生其 毗 識 栗 之不 之心而推諸物者焉,有不謀 於 薪 與爲通,而 心 憂 者焉。 毗, 樂 也,天化人心之所爲紹 自 者, 非 我 其 不見,於今三年。」 口 相值 浡 知 志 與 斯二者,可 然 憂 通 興 而 樂 外 矣。 相 落之觀 天 也, 取 者 下 一俯 化 之 然 與言 有 也,生 流 憂 之物 而 敦 也 俯 瓜 通 11-情

天下之志

而

無

蔽

以是知憂樂之固

無蔽

不聞雷 故曰: 憂; 見憂, 樂。 情貞 樂,而矧 樂,於以見公裕於憂樂, 憂之切、樂之大,而 夫何足以 也大矣。 之徂東山 無蔽焉、《東山》之所以 於憂, 通天下之所憂。 可 則必毗於樂; 毗 、情摯而不滯,己與物交存而 爲 夫荷憂之專、樂之湛,所憂之外,舉 而 於其所樂, 霆。」言毗 性 則不 憂之切 其 矧 也,其憂也切 用。 葉蔽目,不見 當公之憂樂, 見憂? 其 通天下 見 故 樂? 也。 則專以憂,樂之大則 日 毗於樂,亦將不通天下之 抑將不 : -之樂; 不 獨 毗 情者, 聖人者,耳 矣; 廢 宿之悲,結縭之喜 於憂, 通人之情 所樂之外,舉 泰岱; 圃 天 通天 而 毗 自東而歸 爲 性 下 旁通 脯 於其所憂 不 爾不忘 之情 下 屑爾 一豆塞耳, 所憂者 目啟 也。 之所樂。 無 不忘 也 敝 周 不見 耶? 湛 其 ௱ 也 於 乍 則 樂 性 唯

毗

血

不

焉? 釋而 當憂 故曰: 也, 樂以 情 之情私。 裕 且 斯以爲周公矣乎 緩,固非天下之所緩者焉。 吾之所急,固 山》之詩,若未嘗有流 行旅之勞細; ,而尚 於理也。 聖人者, 無 理 功 而 吾之所緩,惡知天下之不見急 凝 不裕於理,未有能通天下之志者也 丁斯不 生死 名 滯 不足厭也,則 不 然則率天下以 之情,斯 非 不 豔 吾之所急,惡知天下 廢天下之理。 非天下之所急者焉。 謂君臣兄弟之故大,而夫婦 獨 易其 其 ŧ 能 志 裕 不 ,然後能 心,然後 言之懼、風雷之迎也 於情 亦理之所 廢天下之情。 生死 也,其 其釋憂以 能 推 謂宗 於君子之一 博 以 固 -之不 以憂。 裕 樂。 社 不可矣。 於 吾之所 大, 誦《 情 焉 見緩 即樂 其 東 憂 而 者

者乎。 居高 疑者,召疑者 m 不 傾,涉 也。 險 而 以 不 其 危, 獨 其 疑 唯 圃 無 犯 天 疑

甚。 得 歸之 堅。 道之謂也。 退 恩 避 故 夷 自 勝,力不 之 危 、準之無 不 光 則 結 人 心 故 郭 ~憤,● 爲斤斤之智, 於三 心 也 天 爲 子 1/2 將 疑 也。 寇準之所能 辭之已 下 爲 嫌 儀 必終辭之與,人 不 勝 軍,而 疑 亦 說。 東 白 之 mi 疑,冥冥 則 之 悍妻驕子之不懲,服御游宴之 安 衮 征之士,周 情 我 於 得 情 甚 數 有 衣之歸, 承 衆 天 無 歸 全 一,則 不定, 不 足 流言之餘, 下, 以 其 我 戴之以父母,舉 與 而 己 敵 避 歸 自 而 進不 功 忧 是 矣。 爾 が 之者 者 情 白 疑 東人 0 公哀之,而 名,幸 將 乎? 其 不 將 之 爲 君子 冥冥者,不審 示 數 定 心之坦 無 不 懷 批 冥 居 天 不 也。 得 則 故 之 之, 下 冥之度 嫌 雖 必 敵 其 先 mi 不 疑 然 無 以 而 不 辭 夷。 故 則 何 生 白 疑者, 之位 疑 險 以 抑 不 也 其 之 丽 傾 力 也 焉 也 於 以 拾 非 坦 失 ? 益 不 mi

> 塗 道 有 不 爲 能 節 而 免 智 免於咎 雖 者 飲 則 也 焉 知 而 無 ൬ 以 他 不 不 道 爲 , 道 猜 爲 天下 度 而 聖 已 則 之所 人行 矣。 坦 而 疑 於 不 者, 憂樂 冥。 亦 以 之 未

六八

恃, 而 必其 也。 名 退 聖人矣乎 姑安之,俟 雖 尾」,不能遂 周 mi ៣ 後 無 公亦末 不能退,不能 世 不 狼 可 可 懼 不 跋 與 不 以 命之至,而 可 其 也 遂 能如之何 退 雖 爲 知, 胡 定,不 而 也 然,俟命之至, 後 不 雖 遂,智 遂 可 能 不 非 慮以 之 不 遂, 不 也 周 能 無 遂 口 电 公 不 退 爲 與 末 有 也 其 亦 能 也。 静 擇, 小必 度 能 功 而 末 退 (), 斯 抑 如之何, 姑安焉者 退 其 能 99 其 無 載 之固 足以 無 如 與 之何 可 疐 不 爲 制 有 與 其 而 可

[「]已甚」,曾本無此二字

[「]憤」,曾本作「情」。

[「]不能遂,不能退」,曾本作「不能退,不能遂」。

之陸沈天下而不恤,又惡足與謀身世哉!其容色,以爲不測闇當之術,●東晉諸人以

詩廣傳卷二終

「闔當」,曾本作「鎮静」。

0

六九

詩 廣傳卷二

明

王 夫之課 嘉愷 録

小

雅

者,其 章 肯 以 故 而 適 告之」,是操 日 後 而 我」,是奔名之邀 知《干 口 先之 後 「相 與言 知 視 旌 也 君 君 而笑,莫逆於心。」彼爲子桑氏 × 子之 不 券之求 子 ^ 以 之情 杕 名,其 情 杜 学之 陶 也。 也 也 以 後之也 異 逮《鹿 天 「彼 一彼 於 矣。 、姝者 君 鹿 子兮, 不 鳴》之三 陶 鳴 以 子, 以天 **>** 實。 者 暰 何

> 《關 情。 遥 此 自 以友」、「以樂」、「以 君子 企以 哉 不容已。 雎》之鐘 是 故曰:「吾 則 當 是 也。 以 鼓 傚 此 琴 • 鳴 未 好德,非性其 瑟 固 呼 見 , 敖」,莫 然 1 庬 好 其 鳴》 德 必 則 如 斯 知 之 傚 好 其 以 情者,孰 之, 笙瑟簧琴, 色者 (所以) 爲 君 而 子之 然 也。 不 能 但 而

小人 之事 以 事,而不 其 養者,子事 事 親 其 親 八事養。 了, 則 以 君,孰 \Box 之身致 需 資君之禄以養 敢 將 養 中也,非 爲 謂 以 爲 故 之以 此言? 親 養 心 爲 之 爲 而 事 人子者,苟 報 我 親 以 親之事 養 需。 其 事之也 所 殆 乎 待 親 非 ? 於我 唯 故故 知 也。 然, 道 致 以 致 者與! 之 君子 其 養 則 以 親 事 養 爲 身 之 亦 事道 身以 己之 爲 以 是謂 惡 報 親 夫 敢

0 必斯」 曾本作 斯斯

我

周

行」,感其

已示,

而

不

希

其

所

未

示

也

之交者且

然, 況君子

乎?

「人之

好

我,示

親 心 王 艱哉 也,即此 其事 而 也。 故曰 ൬ 貿 於天地之閒,無 親之身者,事 養,抑將 爾尚 爾尚式時周公之訓」。① 月斯 ,亦異乎先王之所求矣。 勞人之子,人子而 我 (其子以資養乎? 事 事 而不足,於我 「事君不 靡 蓋 親事其 征, 畢耶? 以爲 詎曰 盬,不遑將母」、《 前 貿其身以求養。爲人 夙 人之愆 勸孝也。 以其鼎食、易其菽水、親 親之事 興 忠非孝也」、「戰陳不勇 事 三王 夜寐 而 所逃於君臣 _ 補之。 有 事 無 而已矣。 餘,於我成之。 身者,親 以需養之心上承其 嗚呼 先王不忍以需 靡盬,不遑將父」, 忝 成其 四四 補其不足,故曰 爾 牡 一之義, 「我日斯邁, 所生」,亦 親與我胥生 之身也。 一》之以 有餘,故 親者,抑 一也。 養之 親 勸 心 非孝 忠 慰 唯 E 事 將 守

元化無悄急之施,君子無迮切之求。

也。 懷 雨之盈,可乍而 勸於醻酢而不疑。故君子觀於春,而知 情,則天下之情躁以薄。 則天下之才疑 濟天下之險也。 也。 建侯 者弗 吝。❷儀之潤、度之温、相感之微,羣心 日之和、雨之浥,百昌乃以 益於天下,益天下以險而已矣。 然 靡及。」雖靡及焉, 加 不寧而 「六轡如濡」,潤也,其「如絲」,微也; 而不 能 萬 與也。 .物之才盡、天下之情輸焉,非 寧。」建侯 建侯以 《易》曰:「雷雨 以 不可頻也。 故以悄急而盡天下之才, 沮 寧之,不動 而 無終於连切以求天下 猶 以 悄急 不寧者, 亟動之 非 「駪駪征夫,每 殫 知道 之動 其 而 以己,而 、榮華 者而 盡天下之 風之晅 滿盈 乃 以求 而 知 雷 以 不 後 宜 道

^{□ 「}之」下,曾本有「猷」字,與今《尚書》通行本同。

❷ 「殫」,曾本作「煇」。

答,而 其 汀沃 盡 天下之才情 暢 也 ; 其「均」, 悄 急之情 和 也。 平矣 「周 爰 以

毁爲 奚況 姬 申生 其豐殺,不 之成,妻子 人擎 不 不肖之途, (棠棣》之詩, 頡 相 心 一點之變,袁譚、袁尚、 古言 一憂,而 土 唯 下 斥 有 能 其 霏 固 爲 之勢哉 其 宣嘗涕 爲 兄弟之閒 私 一君 以 歸 惑之,僕 而 然 君 昵 非 咎於 妒妻、逆子、 授 子 且 ? 之 演 姬 頏於兄弟友生之閒 以 諨 僅 道之 桑 ,居不安,食不 故曰、「詩 友 忧 可任之咎, 爲 者,非 妾 生, 移 其 挑 圃 蕭 世 過 何 之者 不 繹、 黠 僕 以 友 子 也? 口 蕭 可 生 自 而 「,不 挽 君子 也。 以 旌 飽。 紀之構,貞 不 煽妾之 矣。 弗 羣, 前 可 足 豫 我 詞 前 以 勝 實 可 激 擬 孝 也。 道 沈 隙 以 其 於 讓 酌

恒 古之爲 有 道 恒 尊, 也 斯 有 有 恒 貴。 恒 親 矣。 有 恒 貴, 有 恒 斯 親

足,以 學焉 圮於國, 譎 雖 疆之好, 姻黨之友也。 鳴 不 或 賢,尊以尚 以 斯 父」,族姓之友也, 曰:「一以貫之」也。 校者,封 舍其 紀備 有 呼 爲 有 忮 無異教,士無 以 莊 尊 恒 盛 學惇之。 亦 矣。 一學矣。 爲 也,尊之以 族 矣 惠、綦、游 恶 教衰於學,教衰於上,友散於下。 俶 建之緒 友也,故 姓 秋,親 足 詭 尊 姻 以 佻蕩之士 君子 所 故 有 黨 曠心, 憙求師 學 文 不足, 封 以尚 恒 也。 之清 而 友 爲 「既 朋 所 無道 學 建 得 而 親 黨 者, 既 不 有 道 之學, 愛,講習 狂,儀、 以 斯 三善備 也,合之以 不 而 肥 廣 足,以 参三 學 有 井 有 啟 登 牡 之交,野 王 恒 肥 田 於 不 異 而 之。 m 焉 友 之 以 尊 麗 羜 居 勞 同 榮 矣。 速 致 推 親 游之中 睢 澤, 友 哉 m 爲 學 諸 以 親 勸之。 也 善 學也 教 澤 無 舅」, 速 以 類之 則 故 學 不 尚 政 越

£

鄒、魯之羣居,聖賢之弗獲已也。

聖人之道,因民 化以 節於欲 也。 以用。 成 天 質者非可 文者,聖人之所 爲文者,安於用而不足 材,疑足以爲質矣,而未足以爲質者,資於 人道 文,是故皇極建焉。 食」,苟異 是故人紀立焉 其 ൬ 保和 文,所以聖者 用, 不能自用也。 而建極者,不在是也。 聖人之於物 野人之有質, 流之謂和,審微 而不 之謂 於物 以爲文也。「民之質矣,日 化, 因 之 加 有 也 其 於 人紀立矣。 爲 質 即 也。 故天均之以 人也。 幾。 ,登其材,●不獎其質, 也 疑 而 事 材者 與 亦 益 而 禁於 以 生, (幾也。 天 焉 有 精 定 非 用 草木禽獸之有 無 者,莫大乎 其文而 義之謂聖。 未 天 命之謂 其 미 爲物 君子之 以 也 發之謂 生,而 質,必益以 故 爲 未 聖人善 質, 質也 無 神 户 殊之 以 用 文。 變 以 飲 審

> 乎! 無爲 野人安於爲 是以君子慎言質,而 用之幾,禽其人,聖其草木,而 之所善成,不因 後人紀修於下,物莫能干 於草木,而 天,卑之不欲取法於野 馬,則將 ❷ 故曰: 後 而 皇 以 日用飲食,民之質 不能爲。 焉者也。 運水搬柴之質 極 建 重言文也 焉。 人,下之不忍 高之不敢 · 焉。 因 皇 其自然之幾 極 至哉其 建 人紀滅矣。 ,爲神 (也,君 於 妄 E 通 唯 並 躋 妙 子 文 而 而 生 於

誠 知策 是周 豈敢定居,一月三捷 不可挑之以戰, 、漢各有一成之策也,我 也。「我戍未 論禦夷者曰 :「周得中策,漢 定, 而恵於戰以 」,戰 靡 使 也 歸 有以 聘」,守也。 言守, 夫禦夷者 得 知 下 則守 其未 策。」

[「]材」,原作「財」,據曾本改。

❷ 「唯」,曾本作「爲」。

七四

之而 則 時 守爲 以言 之心 童 漢高之不 爲禦夷之上策矣。 而不爲不智,力若可用,不 采薇》之詩,迭言 程 欺 而 戦 1 先 Ż 也 不爲不 己 前 與 矣。 脆 加 則 矣 戦 不 戰之力先枵矣, 抑 義。 時 爲 無 誠 殆夫! 不 戰 固 不 時守,則幾 · 信 則戰,時 戦 情也。 責 口 1,殄之 守 漢 恵焉 救焚拯 武 而 故 之 無 而 守 以 用 抑 若 則 善 成 守, 亚 不 m 以 溺, [禦夷 守。 戦 命 爲 不 可乘,不 戰 而 猶 斯斯 不 爲不勇。 爲 而 略 者, 守, 時 爲 夫 可 於 戰 之 青 以 乘 奪 知 守

渗 以 者,不斂天物之榮凋 柳 矣。天物 心悲者 人以其褊衷 之依依,來 往 成,悲 焉。 其 當 何定哉? 不而歎 也。 而捷於相取 吾之愉,有 雨雪之霏霏。 來 八歸,愉 以益己之悲 當吾之悲,有 迎 也。 也。 吾以 當吾之悲 往 善 愉 愉 用 丽 者焉。 迎 其 咏 而 吾 情 楊 己

> 發,是以其思不困,其言不窮,而天下之人 也。 不 故 慆,元稹、白 愉 可 有 夫杜牧之欲施之以刑也。 心和平矣。 失物之可 無 悲 也 未 導天下以廣 一,不失物 者 以 嘗 知不 焉 不 可 愉 愉 言 居易之以率天下 窮 目 之可悲 者焉 者 於情者之言耶。● 悲 誉 焉。 心, 於 則 悴 雖 圃 者焉,雖 當吾之愉 方者之所 以 然, 不 激, 奔注於一情 不失悲也。 於褊 言 然,不失 愉 有 其 不 促, 則 未 見 悲 華 嘗 也, 也 其 之 愉 以 不 宜

世之怨,舍此 廷,何取 音 無 怨 征 婦婦 乎? 而 閨 録 中 征 丽 日 之怨,怨之私 婦之怨,被管絃 : 斯以爲盛 無 怨焉 耳。 者 世之音也。 故《南》之有 也。 以 奏之廟 盛 世之 盛

^{● 「}以」,曾本作「干」。「耶」,曾本作「矣」。

杜》也 《卷耳》、《殷靁》也、《雅》之有《出車》、《杕 閒 之舒氣 子、朋友之閒,乃以保舒氣之和平。 以 陽爲陰用, 性,移欲之幾於理,移婦 成,與女相宜 情相當,不與性相得,與 者,其國必傾。 讒,愿民之憂死,均理之貞者也,而 之和平保, 發,發乎 婦房闥之情。 是故忠臣之憂亂,孝子之憂離,信友之憂 論者之失道,而君子亦相 幽 開 其 「昵之情未有屬,而早已 一、《鴻雁 盡矣。 罅 此 於男女之際,而 則剛氣之莊栗亦遂矣。 而 而 竭 或 ,不與男 下直 怨者, 而下 乎彼 悪 非議論之傾之也, 得 一者,其上必枉。 , 或爲此 矣。 不傾 陰 相 事 欲 人之懷於君子 稱。 乎? 也。 先 爲悄急,則國 重塞之君 相 Ŧ 一充矣,觸 詩 移情之動 用,不與 知 陰之事 而 故 其 不 致其 先王 天 議 不 臣、 然 得 鏬 地 理 舒 敵 論 父 家 議 思 氣 之 則 於 相 多 順 與 而

有

燮之功,微矣哉 悲 愉、治亂之理者 1 加 故知陰陽、性情、男女、 後 可 與之言《詩》也

乎財 無不爲 本,非 亡有矣。亡有之姑且置之,❷可 作,管、商之託辭也。/夫末者,以 者也,而非待末而 樂作,是執末 曰:衣食足而 廉 解 巨艦之維於三峽,資一 利 恥,待其阜 曰衣食足而 繇 即忘本也,而 盪 也,於是廉 得已。 其 心,慆 後 以 且夫廉 而 廉恥 求其 後 淫驕 恥 後 後 廉 遺 刓 有本也。 有禮樂, 興,財 恥 本 本 辟, ൬ 恥 興,財物阜 也。 趨 禮樂之實 刓而 乃欲反之於道 楫以持之而使 物 末 執末 則 阜 者 待 欲知足,禮 以 先 託 資本之 其 而 以 得利 乎 喪。 後 前 足 焉 此 求其 禮樂 後 而 者 用 禮 者 後 迨 故

而下」,曾本作「作」。

上

猶

姑」,曾本作「始」。

仁也。 矣。 也; 會。 末 財 民 四 府 操足之心 賈、積粟之農,愈見不足而後足 則不足矣,及其 餘 未 樂之實 之衣 説 用 海 也 Ili 成之準 有 而物 養 奚 ,亦辨矣。 必必 消 能 以爲計,一公私以爲 海, ,然而 仁不至,義不立,和不浹 衣食之源 食 喪 以 息之者,道 厭 以 無 而 鞠 而 知 而 禮樂 必 以 以 用之而 而 欲 人 其 不足,操 以 Ę 天 其 之欲 知阜,天地之大, 然 故舜之歌之曰:「南 之情調之,其異 廉 用之而 也。 者,義也, 下爲家者, 數 也? 恥 也; 果有餘 亦因之。 路者矣。 之心 繇此 不 勸 果不足 足之 競 浴之; 藏, 言之,先 天 矣。 故 天 司 固 下 見 下 有 財物之生者, 1 徹彼 異於: 矣。 以 、於管、 見 爲 Щ 餘 以 者 而 以 ,道不備 豐 其不足, 餘、未有 不 海之富 漁 官天 調 Ŧ 愈 持 此以爲 風之時 也 者, 商之 以 獵 不 贏 或 足 裕 > 足 和 地 之 無 通

> 心 兮, 本 此 以 其旨也,偕焉 之所以 人其候 哉? 也。 先王之以 山 以 阜 奚 阜 也。 待 相 吾民之財兮。」暄 廉 物 耳,其 天 恥 故《 之盛 以 禮樂 魚麗 動 有 多,而 心之情, 圃 也,時 》之多 不 自 爲 豫 焉 後 知 也, 生物 春 耳。 有 斯 容 嘉 備 理 嗚 而 焉 南 禮 財 呼 節 耳 風 之 之 之

偕 與! 後罩 根 不 情 維 而 君子之酒 萬 揣 其 相 乞人,然後 情 氣也; 汕 無 攝 而 萬物之交, 人道 物 集,維其 也, 殊 廣之, 日 與 不妄 必以 我 均 得 有良蔭 其 共 萬 情 施 其 物也; 命,上 慈 也 均 物 必 嘉 心圓,其 物 之良, 以 生 而後翩 而 賓之 相 其 也 物 可 有樛木 求 氣 無 而 以 悲弘,其喜廣 唯 燕 也 鵻 相 擇 氣 交天 斯 不 來,維其 無 致 而 天 妄受 故 而 異,均 也 帝 後 地 有 下 甘 與 矣。 也 嘉 必 情 瓠 我 氣 以 口 魚 也 其 以 或 猗 其 也 同 而

集 其 捨 博,行 於惡木之 施 罟於鼃 於 異 叢 黽 類 也 之 而 窪 無 引 礙 蔓 也。 於 、童山 悲 夫 一之麓 1 吾 翔 知

耶 ? 其 侯 於 蕭 所 尊 媚 相 而 所 曰:「吾幼之所學者,待君以行也。」是依 而 之於 露 與 有 洮 顯 即 也 已矣。❶ ,機未忘 見之矣。 湾 之。 罪 也 行者而 丽 於 露之降 代 ,天子不得而奪之; 其 天 已 然 無 加 或 浹 地之閒 是附 所 然則三代之臣, 也。 相 已矣。 汲黯之誠 自 矣。 下,有愛天子者乎? 也,無 得 遇 於露, 其 天子曰: 君 而 故古之君 者也。」是 君子 其 所 不 所 人,自 釋, 自 擇於蕭 無 情未 · 曰 : □ 顯 所失於露也, 前 「從吾游 者 非大有功,天子 胡 有 臣 已 循 浹也。 臣之於君 面 其 猶 厚 爲 其 無 已矣。 矣。 所 其 不可 是 土 者, 愛天子 矣。 魏徵 也 擇 吾 逃 感 0 吾 不 蕭 於 諸 於 之 非 者 無 之 非 其 能 得 士

> 之無 則 無 焉 思寫, 子,我 畏,道 鋸 孤 足 得 不 之以崇,行 友, 亶以 如如 臣 相 又 求 與言仁也。 得 而 悪 也 親 七 畛亦固然矣。 進 而 不待 思 而 心寫兮。」 之,則 進之。 ,彌年殫 尺之身, 論 適 何 婦之於 先王之於其臣,僅用 其 . 所望 其 其 之 미 相 所 以 忘 不 古之君 逃 夫 接 其 無 行 世 樂 而 乎 得 與 故以 孰 事,而 功 之情。 與 不 君 求。 而 而 否 不 ·慰,何 草 子 不 臣 不 奪之,則忘 哉 有笑 釋 焉, 進 木 分義言君 如 笑 待 ? 君 同 故 無 父子焉 語 之 所 無 語 於 腐 鳴 所 以 此 相 日 挾 求 燕 、懷者, 呼 馬, 求 存 立 樂 焉 丽 圃 乎畏; 臣者, Ī 如朋 欲 則 既 相 耳。 之 燕 位 退 其 與 羈 情 見 樂 無 疑 和 不 即 刀 士 ? 未 樂 君 待 所 不 誠 友 而 相

- 「循」,曾本作「猶」。
- 「接」。曾本作「交」。

此《夢 也 /蕭 **>** 之 情 乎 1 非 有 所 求 而 非 有 所

之生 之底 樵 見遠 其 未 也, 見 而 朋 渞 知《蓼蕭 m 亦 毁 後 杰 夫 情 禽 嘗 m 然 有《黍 豫 誠誠 死 鮮 豫,人道 聞 簪。」盍 誠 非大臣矣,鄭 1/2 非 後 矣 戚 + 其 而 熄 >, <</td> 成成亡 有 而 之 不忘。 矣。 矣。 有 況 離 微 誠 而 其 湛 屢 誠 君臣 已矣。 矣。 而 戚。 之大者 》之哀; 簪 露》之樂也。 嗚 降 豫 疏 臣 m 三代 有《 呼 丽 也。 者 道 思肖、 屈 之際乎? 天下不 \sim 瀕 平 滅。 戚 夢 也。 有《 豫 L F 而 蕭 父子之能 謝 劉 》之四 而 棄 巾 下,誠 人固 黍 **>**′< 舜 向 相 酁 戚 禮 離 故 之事 猶宗 豫 叛,人親 非 者 湛露》之樂 誠 不 而 唯 》之哀,而 曰:「勿疑 則 戚者有矣 臣 之 豫 下 親 其 親,瞽 豫 一矣,東 摰 臣 猶 疏 有 其 1 子,擊則 者, 也,顔 未 其 類 mi 可 誠 後 類 睁 mi 君 知 湖 喪 豫 吾

> 禽 氣 通,吾惡 足 以 知 其 終 哉

期

之有 賢 此 得之而 子 以 頃 意 則 緩,故賢得以 而 ,,我 前 於賢 求 者 亦 不 終 聰 以 日, 之也 朏矣。 ❶ 古之求 往 覺者也。 身 目 歆 心 不 也 相 明, 然矣。 計 德 則 愐 而 樂 迫 弗 其餘功。 手 者 休, 意 無 能 以 賢 夫賢 期之迫,故 以 抒 得 捷 故 有 也 歆 德,道 其 於相 此之 旦 古之求賢 日 儀 迫 猶 然之情, 之 道 便 待 粟 然 則 9 腴 而 謂 見 也。 者 也 而 其 而 澤,是 之一 後 期 也 以 心 莫 榮 之 者, 不 於 遹 食 即 道 匪 E 自 日。 求 賢 求 之 得 得 一,功 在 情 滋 元 其 此 腎 賢 食 以 也 而 於 氣 功。 ,衛已實 注 暢 者 緩, 則 徼 也 而 充 充 既 之 於 矣。 以 得 功 緩 然 餒 然 徐 期 見 相 相 之 君 之 调 見 盈 則 餒 而 而

耳

0

詘 本作「隱」。

國。 進矣。 之國。 不得? 禮 也。 者 是 以職,責之以 言者以言, 化者,守沆之道,猶無失 蔡澤、婁敬、馬周之流,輒以其小辨 「,得 竊 ,責之以 一謂 李 天之榮寵, 其可貿之人而已矣。 其 沆 試之而 故與其 則公孫 徼功之迫 曰:「吾不 皆其 德,施之以 功,施之以禄,責之以言, 得, 期之也迫,不 彊、主父偃 所 mj 未 功名已 以貿人之才也。 也。 嘗 用 秩,責 計 梅 也 未至 也。 詢、 陋 鄭 於是而 之以 ·如其 於《菁莪》之 曾 若其 況 注 致 乎 亂 道 無求 堯 L 其 而 施 范 貿 一之徒 施 之以 以 試 試 睢 之 人 則 人 之 報 而

集天下之大功者,恒 公疑之。疑之者,思以保周公之功也。 大功,斂天下之譽望,匪 名與 地 中 實,非易兼 有水, 師, 辭天下之譽望。 而 君子以容民畜 有者 周公弗勝,然且 也。 集天下之 《易》 故 召

> 於篤 甘,蜜 清濁 己。 名, 其 而崇 師 也 浮名隕 疆 聞 舉名實 矣。是故 場之功者, 清 ,沈攸之之以長吟覆也 類而定,互 知其必薄 源,而 議,獨 前 吉甫 謙 者, 與 而 穫 也。 八蔥違。 不必 將 王者以功使功,以名使名,養 也 兩 振 帥 植 行之士不列 香 自 獲之以 旅, 譽望之歸 相 之道 於功矣,抑 名 丽 不同 閫 此 而借 於 必 爲 始 外之臣,獨 也。 清 欲 用 熏,花 爲榮,後世功名之士以 矣。 譽望 而 致 畸 也。 帷幕,非徒 容 雜 • 獨 知 ●岳飛之交游 祭遵之以 與麝 於獨行 畜 矣。 行 亦各從其 其 故 者 行之士,各從 之譽 未 闢 件 鳴 有 外 無 之張 呼! 得 望 雅 味 之 以 所 歌 類 於 以 消 臣 不 擇 仲 功 名 爲 同 盈 題 殪 也 收 不 於

- 「畸」,曾本作「素」。
- 「之之」,原不重,據曾本補

惡 永 弗 攬 持 适 詠 之, 戒 大名而 足 以 概 /參之; 以 益 口 而 元 終 姦 知 歌 老 收 臣 其 已 咏 載 之: 大 之 事 以 震 臣 忌 哉 皆 肋 主 捍 也 1 非 其 之 汁 國之福 聲 威 君 稷 移 子立 光 於 僩 丽 外 适 宣 借 力 公論 之志 Ŧ 清 而 中 爲 流 於 於 興 人 介 之 廷 素 之不 重 之 臣 流 者 以 + 而

之,量 俟,弗 試 1 後 其 也 不 戢 之死 准 1 口 無 地 事 必 據 戾, 而 心,不 傳》 方 其 無 亡 疑 後 以 進 戢 然 不 之中 存。」 返 而 勢 後 必 故 . 口 退 「兵 -, 其 非 也 É 勝 勝 豫 亦 戢 文 其 得 然 不 置 無 量 集 巾 退 後 戢, 死亡者什八九矣。 如 其 爰 可 之 心 懾 姑 飛 不 將 止 生 死 鷩 以 隼 已 口 自 口 地 沮, 焉 之, 戾 勝 挾 焚。」 存 而 天, 之 不 退 後 何 戢 無 地 必 戢 生 心 ıŀ. 而 如 也 心勝,然 一,置 者, 以 天 之 姑 面 進 故 姑 之 晚 紁 弗 有 俟

> 隼 之 也。 E 君 如 Ш 其 也 師 川 子 楚 之 也。 蘇之者 而 動 且 於 天 也 爲 歘 兵, F 如 罻 仁 然 蘇。 川 羅 也 其 m 以 當 惡 飛, 成 畏 待 其 其 之 仁 其 無 爲 如 於 者 窮 所 Ш 隼 義 義 獲 而 忧 何 也。 也 而 天 怪 止 下 藏 平 其 故 畏 義 静 熊 周 目 爲 於 當 通 也 之 飛 義 仁 其 如

未 旋 輔 寇 憚 夷之兵,先 有 之,知 ,序也 賊, 虚 兵 餘 者 恩 而 而 不 且 天 乎 孫 其 先 見 下 恩 劉 北 力 夷 逮 者 即 裕 後 非 故 狄 也。 先 潰 終 南 不 近, 雖 廣 討 足 者 0 威 有 知 固 而 親 而 天 寇之師 叛 之役 序 姑 内 遠 下 臣 故 矜 者 者 · 者 爾 我 待 1先遠 也 建 一先四 不 也。 之, 先 業 内 況 寇 雖 親 其 方 故 知 丽 賊 虚 中 後 而 其 雖 近 外 之 甫 畿 征 者 力 有

八〇

^{■ 「}孫恩」,曾本作「盧循」。

寧也。 蠻荆, 内 弭 心, 也。 耳。 外震 也 而 童竪,童竪已長 而 反 原,衆亂皆其 消其末,兵刑 起 望恩,外 也。 ,則自 毁其家。 寇,殆夫 ,惜乎昔之撻之未力也。 不施之夷狄。 人紀順,王道立 恒因乎夷狄。 因之者, 丽 且夫叛臣 覆蠻荆, 玁狁 弭 君子之自反 故 内 親 者 伐 知 1 而 愚者且 也。 玁 畏 亂也。因之者,惡有自陷 膚肉之暴 内先怨矣。 加 孱子之制 狁 , 之叛,恒 而 於 施自反於夷狄,而 不先以威,君子之所 而蠻荆威。 内 爲 愈 異 矣。 ,施之叛臣,施之寇賊 震 曰: 毁 所因 視之,猶 不 類 ൬ 미 瘍 因 於悍 爲所因 而 外 制,乃 也。 者 乎 義者震外者也, 我家者 猶億 垂危亡 同 寇 僕 藉 肺腑 劍首之一 類 [者,情 奪其本,坐 賊,寇賊 伐蠻荆, 公者弭 以 其 而 果童 成 之積 加 H 深求之 中之未 迷 乎 撻 以 無 其 其 竪 悍 自 吷 蹙 其 亂 逆 炅 之 可

> 殊施。 與! 首以 民之死, 地,文武殊用,夷 序,不已哀乎 下不得議其私也 丽 唐昭修晉陽之憤, 曰:「薄伐玁狁、蠻 知之,愈 可矣。 騙 齊 有天下者,斂民之粟,疲民之力, 匈 桓 亦致之塞北,以 知 猶夫仁人之恩致厚於九族,而 奴, 收 漢 ! 孤 匈 之所 竹 奴 漢武 夏殊倫,張 而貽 之 荆 何 威 知 帝之憊 績 來 者, 汴 有 威。」庶 爲 梁之篡。 而 南 止 民争人禽之界 弛 取 也,挾 粤 此 坚 殊權,仁 哉? 幾知序者 而 亭 南 己。 南 之成 北 浸 粤 天 義 貿 殊 **\$** Ŧ 故

忘其 新 者其情固 心, (滅,野 善憂者以 而 弗 、《定之方中》是已。 糾 處 繆侘 不 心,不善憂者 寧 ,而若· 際以 損 忘其徙,油 其 以 神 熸 聲。 則 於 然 情 狄 憂 自 生 以 而 其 此 若 心

■ 「畏」,曾本作「威」。

矣。 泉,而 起矣。 允其 和哉 永懷 爲驕 勸 是知殷人之不足 謂 名 勞者思大逸。 保其驕之不宣矣。 悲者失當前之慮,周之民其欲究安 傲,忘怨以 不可「宣驕」, 之「哀鳴」,而今猶爲之「哀鳴」 矣。 哲 面 「臧」也。● 而 相競,則父子、昆弟、姻亞、友朋,交自 也 而 故《多方》之誥 争 爲痛 憂以 嗚 謂 翠 爾室不睦 其 呼 X 辭 趨 瓶 定之痛,●若長夏 聲者其志蕩、《鴻雁》 哉 愚, 競 而猶見乎「宣驕」也,吾不 新 綆, 志乎大逸 喪亂 其 和 於 興 1、爾惟 瓶 平之道 已驕 懲大貧者生大吝,怨大 室者忘於户 聲 也。 日 未終,將來不保,舍其 不 示 * 羸 而 而 自 弇, 衛 睦哉 和 喪, 不 將之以 而 以 自 作 泉 修塗,渴 □●周 也。 而忮害之事 ,戚 之所 勸,其聲 知,辭 不 不 是 和 大吝,其 泥 戚 已。 是 此 、驕之 於故 公以 爾 者 以 以 不 鮮 能 昔 掛 惟 蚦

也,不亦難乎? 易世而割,再世而遷,有

已蘇, 後,百 爲美, 之蘇 雖然 亡也可矣。 世,不知平世之樂也。 其鸞,觀其旂,出乎亂餘 朝之盛也。 也。 ,其知之也 習於粒食,不知 爾君 慮已釋,小功小名小利之情 而 胡 厲王 子勿忘此 弗 得之也不易,甘之也 有所不足, 兢 流 亦僅矣美哉 兢 彘 以 以 粒 保之? 一旦也,周 前 食之甘也。 習 而 百百 而影 於治 後 6 爾 知 爲之静,心爲 君子 宣 朝,不知治 其 依其 至 王 不 不易焉 驀 千 知 今 迷。 習於平 燎 然復 此 畝 丽 聞 不

美」,曾本無此字。

[「]終允其臧」,曾本作「終焉允臧」。「魅」,曾本作「和」,與今《尚書》通「羸」,曾本作「贏」。

易之一旦也,悲夫!生,而不憶其始,則此一旦者,遂爲千古不

蔡之羅 敬而 閔之機 之敬也, 笑焉,敬筆舌焉,敬衣履豆觴之節 崔、魏之虔 則 有 則不於世 世 忍迪子以 興」乎,勿問可矣。 敬行焉; 乎讒言興而 甫覽之螫不張。 不可 而憂讒 讒言不足以 不 能 不 自 織 以立也,非 小人張,斯君子之敬立 保 發。 ,則必於己而謀敬,於己而 恕 而憂讒。 善,胡爲其自恕也? 無 劉 我 我友敬之「讒言不興」也, 者 資。 無 友勿忘敬也,則 文及甫之狂書不逞, 存乎?●甘陵 據。 興矣。公道明,斯君 汪 范滂懲心於三木, 且夫讒之所自興,無亦 文饒 文言之招攬 但 故 以 君子之敬也,敬 無大戎之餌,則吉 行也。 無 庶 争權 故君子於 焉。 幾 讒 不 焉 乎 宣, 之實, 則章、 謀敬 言 子之 我 敬 圃 君 庶 姻 則 其 子 幾 不 友

此焉。可勿慎哉! 可勿慎哉! 患之機,生死之樞,宗社生民之禍福,咸繇出入焉,乃以無憂於讒也。吉凶之故,通亞交游之問焉,●敬書傭弈客、騶人童子之

乎? 能也。 爪牙之士呼祈父而怨之,周之不足張而爲 士 推焉而已矣。 居,无咎。」張之,弛之,恩之,威之,先行自 也。故《涣》者,無私之卦也,而曰:「涣 張天下者也。 近,涣乎王居,而固非私也。 ,恩之威之,咸 王者以天下爲家。 不能也。 苟其不能,則雖至仁神武 是故天子爪牙之士,張之以 有道之天子,必親其爪牙之 能 使 昵 無 天 怨,而天下之怨消。 下 能舉天下而 而恩之乎? 若夫天下, 而 固不能 張之 王 不 則

「亦」,曾本作「一」。

四 「問」,曾本作「間」。

軍,而 忠 萬 王之踵 也。 頻。 天下 也 爲 還之一人, 讟 彘 散 狄 商、周之以 迪惟 -於揖 礦 猶 臣 如 方 叛 焉 寇 派騎,而 中 怨,奚 無 泉之竭 耳。 忘 其中不 盜 宗 有夏,乃有 億天子之有自 獨夫焉, 其 發也? 所 讓,必競其 其 之侵也,非 以天下之主,舍其故都 覆, 比 解 有 無 唐 孤 武 竭 矣,不云自 附, 事 禁 哉 乃 興 治 而 頻 無亦唯 故 ? 也 軍 無 者 萬 以 不 ,無有能 室、大競。」夏以文德受天 如 礦 曰 大 方者 乎? 室 改 有 昔者 恩不 : 驚 騎。 累 而 其 其 强 是肘腋之不 中。」周,泉也, 乎? 後大 而 轍 池之竭 侯 厲 羽翼, 又奚況夫 即 能 宋 涸之者矣。 相 耶? 僭 王 悉天下 接,威不能覃 有 競 親 之亡, 逼 唐 嘏 於五 之患 矣, 《書》 0 悉 m 卿 而 其 以 郡 不 不 天 相 疏 流 非 立服,況 也, 胡 須 下 縣 分之 無 爲 非 云 使 日 死 有 己 以 事 禁 自 以 官 池 於 而 民 戏

> 下, 家之謂也。 王者家 也 而 率 天下, - 悠悠 孰 知 名 其 有 姓 子 家 不通之 然 也, 以 而 居 後 傭 者, 天 保 下 乎 星 家 ? 施 馬, 故 豹 非 曰 尾 之 無

八四

游 變以 有 之變,不可 時 變,時而 在 情 之義大矣哉 甚 于 萬,與 於 渚,或潛 以測之乎? 魚 游 潛 已矣。 者也。 知 變俱 在 也。 在 淵 ! 淵 萬 0 君子之貞一,時 老子日 一大無 君子 丽 欲 或 亦時 要之以 知 在 所 其 不 于 「反 也。 惡 括 不 渚 時,故 者 於 미 斯 夫天下之萬 知, 測 ,道之動 時 道者, 而已矣。 日 也; 意者 也。 其 無 隋 魚 時

本作「方意天子之自有

0 0

億天子之有自」,曾 以上, 曾本 無此

³

施」,曾本作

⁴ 魚潛在淵」至「聃周雄通之不寤也」,曾本在上文「可 慎哉」之下。

淵,伊 能及道 也。 於渚 矣。 以 則時 也。 游 又已在於渚,則得 迷也,其次專壹 是故君子之與 之, 仁以行之」, 括天下之變而 子之一也。「學以聚之,問以辨之,寬以 不失之淵也。 而 亦窮年而未窺道之際矣。 敬 測 也 乎淵 惡乎游 0 爲 期之於渚, 不迎之淵,則不失之渚,不隨之渚,則 而不恤 其 尹以 淵 者哉 於其 在 而我得之淵,時乎渚而 淵 骨 任 在淵 也,然 也 而 得 爲渚,曾子以恕爲渚 道 嗚呼! 不 逐道 也。 雖 而 莊 相 歸, 或 已矣。 而測其 而 之也。 及 周 俱動 在淵 又已 善學孔子者,學四 也,一 惡乎動 日 與道 「緣督以爲 (于渚; 前 故君 期之於淵, 而 潛於淵,則 故 者全而 俱 不 恒 伯 而 慮 子之時,君 躡 動,則豈 於其于渚 不静 夷 我得之渚 之以 也, 其 0 以 萬 經」,游 末 仲 哉? 清 得 然 雖 者 時 塵 之 居 爲 或 而 不

> 偶在 何 于淵,夕于渚,方于渚,旋于淵,惑於其 世 而 居 圃 己。 乎 不 而與之相逐,有不爲天下笑者 得 楊 1 也,宜 雄 聃、周、雄、通之不寤 王 矣夫 通游聖人於淵渚之閒,學没 -嘗見, 求魚之子,旦 也 所

過 之,下愈念之。和平之事,而 音見矣。● 竭,舉好賢 於須臾,危疑於離合,情爲之盡,而忠爲之 悁,好善而溢 不能如《白駒》也。 感者、非但以淫泆敖辟爲邪也、惡惡 聖人感人心而天下和平,無過 者 上愈遠 一,胥過 未 有 能 之,下愈邇 執之固,依之迫,◎繾綣 己。 過者 故《鹿鳴》之好 也, 然而 加之以哀 之 上 衰 感 一愈忘 世之 也。 賢 思 m

[「]聖人」,曾本無此二字。「恕」,曾本作「忠」。

[「]依」。曾本作「求」。

[「]音」。曾本作「意」。

六

之情 抃舞 賢豪 已無 於司 爲 上有 張 餘 馬 儉 以 於人心矣。 死 之 激 輿 兒童走 之 前,有激 巾 卒 嗚 之者 之 呼 無 ! 矣, 知, 胥 天 面 mi 下 讙 和 Ż 平. 呼

穀焉 能 周 之離 無與 也。 矣。 者,生死去留之不相繫焉耳。 自 天下之親己,而 门,何 求 未 池之萍,密茂 庸之,抑 八協守。 昏 失士 也。 其 何也 士相 合天 也 (所宗, ? 姻之黨,不我畜焉 一 幸 離 ? 下 無能 + 失 夫 則 而有君,天下離, 悲 聚散之勢然 如枝 民 猶 1 夫! 廷 留之。 如 急使天 也。 相 ^ 無與協謀, 葉條莖之共 一,然 白 親 《黄 《白駒》之賢者,上 駒》之猶 也。 士失矣,而猶 下之 鳥》、《我 面 也。 此邦之人, 無 則不待 相 民相 所 則 合也 故 聚 親 八爲 奉 可 Ŧ 故 行 離 以宗 叛 君 者 以 合 本 其 未 弗 離 不 是 則 道 同 無 野 也 於 我 失 無 以 野 存 急 焉 君 而

> 衣刑冠 迫,恩 爲 親 趺 莊、惠、田、慎之流 而 而 而 相 上 衍、茂、睢、澤之徒,含蠱 亡者,士留之也。 行》之詩作,周之潰也不可 也, 前 親 不可瘳。 也 不 不 士 親、民不自 親 猶 則彈 怨 雖 民 而 有 失士者亡 有 已萍矣。 相 患 君 親,無 冠 難 尋 膠 王澤之斬,以失士爲 也。 躡 *, 漆之術,繫而合之,而 相 履 有其親,而 之而不 共 一、失民 民 有能 世臣椓,處士横,楊、墨 ,❶鑿智以争道,❷儀、秦 圃 已爲萍 而 唯 親 不 不 合之者矣。 者 ,挂冠 親。 以争 親 相 潰 而 止 親 分 固 望其 上不 利,而 矣,而 織 《 黄 誼 不知上之 則 約 極矣。 吉 利 如 - 得有 鳥》、《我 圃 後其亡 X 故 葵 靳之乎 害 死 親 相 相 士 生 之蔭 口 屬 唯 相 奪

曾本作「爲」。

[「]田」,曾本作「申」。

兒,非 惡,相一 則孰爲 用矣。 也,皆 失其 爲道 其 若 嗄之情也, 嬰兒之喜怒也,是 無 而 而 若其未啼, 至 夫既 無 爲大人也。 也 可教, (赤子之心者也。) 非謂 ,小人恒用之。 故之啼, 一。」夫誠 恒 老子曰:「赤子終 爾矛 老氏之徒 可化也。 不可 者乎 有 Ė ·固惡· 啼 觸 而 矣。 而 其不嗄 使 也 物 惡 而 特 者革 而 故君子之於小人,皆 必感 有僻 姑 乎使之? 既 無 不 彼 則 不 记其 爲 夷 能。 無 何 如 可 也, 其 無 孟子 才者任 既 嬰兒 嬰兒,吾亦 心 如 化者乎? 恶 日 嗄 則 懌, 之 故君子無 其 心以 , 啼 無 而善 Ė 何 感 何 不 使之以善,亦 恃 如 丽 :「大人者,不 如 其 也。 也 嗄 任 足 相 其赤子之 不 其 亦 八才, 以 喜怒,斯 也 . 嗄, ❶ 是 與 醻 則 固 無 「方茂 不可 嗄 ? 之爲嬰 啼 矣。」是 唯 矣。 而 啼 才足 미 而 無 而 不 和 也 任 目 阚 然 使 心 其 禁 ? 之 不 心 啼

> 惡、辭 故曰: 且無 也。 之充,有喜、怒、哀、樂之發,而 微之體,心乘於食色之動,命未 其所惑,將欲化之,必爲 也 日受」,非赤子之任也。 心,亦酷矣哉! 故曰「性日定,心日生,命 日 使,退不可化,小人之惡,於斯 方 善矣,其善 ,奚其和 相 「和之至也」,老氏之以愚天下而俾失其 不 雖以堯爲父,舜 爾 讓、是非之定體,蓋不保其爲矛爲醻 爲,而 矛,化之以 荷 無 不 恒心,放僻 況於惡乎? 能 自 相 保 爲兄,末 也, 醻 邪 赤子者,性含於希 其所欺。進不 而 則 侈無 將 彼 又 欲使之,必爲 能如之何 固 惡 極 不爲已。」善 無 凝 矣。 無 乎 惻 化 於 難 隱、 物 之? 乃且 相 矣。 羞 則 可

雪甚於微温,雨淫於午霽。病不起於

「啼」,曾本作「號」,下六「啼」字同。

ハハ

者,用 矣。 其不力,則 夙 而 而 人之不力 得」,弗亟去之,而尚爲之謀,道窮 其君之情, 者,有遽違 既定天下,乃北 小 弗 :作,不俟終日」,尚奚待哉 也 執君子之「仇仇」而亦不力也,則執 屑其「仇仇」,小人利其「仇仇」,而不 賢 也 有 不 而 者也。賢君 浮 重 瘳 小人親而君子疏,必矣。「見 無 亦「仇 一, 聽 於聞言而悦。 喜者,有浮 遽 面以 焉 賢 仇也。 耳。 也 受丹書於太公, 重, 甚 「彼 愛其 怒 親 君子憤其不力, 求 者 賢 故古之大 情,賢士 我 也。 也 而志挫,宜 則 重。 如 有 何 甚 不 有 遽 其 武 幾 恥 小 我 一愛 從 爲 不 Ŧ

弗

貞 姻 而 云 土 香 合 惠 1姻乎? 旨 離之以居,而未嘗不適,淑 以飲 得 酒 醻 而 食宴樂之不 之, 不 然而 獨 嘉殽將之,遂 也 鄰洽矣,昏姻 1 夫以飲食宴樂 給 而 離 口 云矣,淑 人貞 此 以 瑣 洽 1 瑣 之給 鄰 胡 之 而

> 餱,而 利 子不忍爲矣。 爲其憂耶? 戚 物 連 解 物物 物, 之勢,猶 則於陵仲子之餒、 虧替其情,如之何 睽 物 其 依 君子之自 情 其 是 利 미 則 連 君 則 而 7 君 重 陳師 其 合 戚 子 加 (弗 戚 也。 矣。 懼 量物宏 道之凍 矣。 也 失之 彼 非 無 也 也, 於 此 利 必 以 有 以

連

瓦

言 斥其 也。 極 暴 相 道 其 而 勸 不恥, 之宫闡 幽王 豔 姓字,而 ,不以言 有道之廷不諱過,過則相懲,●相懲 煽 之詩,不諱 舉 而 懸 爲 而 無 指宗 委 恥 父不能施 所 之於 也。 避 甚矣。 周之滅,號六卿,❸ 忌 П 無道之廷 ,亦絞矣哉 耳,不以 之於子者,而 天子之嬖御, 不諱 恥爲 以 百 恥 臣

過 原脱,據曾本補。

0

其燄 者 者,非相 而 不 生人不昧之心其 退 之弗懲焉, 恥之弗 了,其爲 過,矧 忍以鄭 不 以 而 己。 其言爲 對治者也 原之所不 忠也,不亦 袖、子 然 罪 則 蘭出諸口, 餘 爲《繁 忍者哉 恥 ,烈膏火而 貞 無 過 人 焉,進不 幾 乎? 愈激 矣。 霜 × 君子 屈 淫 以 投之以水,益 嗚 \sim + 原 其言爲 呼 人 猶 之 月》之詩 愈 日 獧, 怙 原 貞 改, 忠 哌 淫 而

似也。

降罰 如 非 然 以 而 曰 國之臣 正 不 : 鋪 聖人之擇 而 免,雖 也。 於亡國之君 唯天運 天 莫 而 不 處 非 是以聖 亂 以 不 然,亦 命 ,聖人不能效天之斷。 健大 恤 世 貶 也 一、罹 其 其 人處 莫 加 化 情 善 仁愛,行其 危 非 不恤 而 而 理。 約 禍 命 不 不佑 者之所 天 其 也。 「若 與 民 聖 處 忠 莫 此 社 令馬 人 泰。 一,降罰 非 欲 而 無 同 問問 罪 命 不 憂, 耳。 天 效天之 成 天 不 則 淪 於 也。 莫 故 必 慎 胥 Ļ 故

> 希天, 法賢 法 天 而 也以 也 無擇,自 賢 以 希聖,自 擇。 擇, 以爲聖 賢 擇 之法 而居其 好者希賢, 而 聖 疾入於狂 約 也 以 不慕 擇, 勿 求 自 其 似 故 好 泰 聖 丽 者 之 後 聖

斷

其身以 也。 疾抑 人上而 言 下 恤 也 而 天下, ൬ 有 能謂 圃 有 親 其 上 抱 不 立功, 違其 將 孤 情 有 其 其 ጢ 可 心 親 而 妻子,將 周 天下 以 與言 者 親 末 旋 中 孝也,中 而 無 以 之恤 不聽 顧 而有 績 也 以 事 恤之非 無 以 達 君, 乎? ,能使之觸 身,下 奚 可 其 成 而 效,下忘其妻子以 加 以 孤 乎保家 道 有 忠不 日 明 鳴 而 乎? 身,將 有其 其 故 不 見 藩以 然 室之令名 能 티 : 庸 以 妻子 耶 ? 可 也。 慎 困 不 中 與 也, 能 捐 上 夫 忘 而

0 曾本 此

言者, 出? 也。 之 夫 不 呼 與 煙 毁 可 不 志 、勢 孤 볢 · 得 1 言 滅 焉 謂 廢 心,雖 翺 之於姬、吕 者不 以 豈緊 言也。 然 而 無 抱狐 則必不待言也,故曰「不可與言 "、鄭 而 無 雖 返 有 孤 與 餘, 無 出 能 平 其 心 思 心 無 其舌,塊 天 ? 全, 道? 道生心也。 也 喻 與 雖然 肖之穫落者乎? m m 哉? 下 忘言者 「陶潛 有其 得忘言之和者鮮 亡 相 贵 争 : 焉 與 肉 不 與 可 而 贵 以 不得之於翟、周 忘言者喻之也。 可 日 M 能 否 緊 有 其 也 已矣。 月争光 巾 其 無 孤 豈 存 情 ? 鳴之不 遺 繋 E 履 雖 若夫 矣。 與 此 者 匪 情 = 腐 無 焉 伸 0 舌 自 不 荷 伯 草 成 mi 可 荒 其 矧 夷 嗚 ? 與 是 能 相 喻 口 而

捐 其 亦 廉 不 其果 善 恥 有 也。 自 無 派所容 積 難 也, 亦 也。 嘗 非 有 必 私 所 疾 亦嘗有 不 棄 澼 其 君 所 孔 親 不 棘 ımi 恤 樂 Ħ.

> 之可 平 揶 不 也 思 亦 畋 恤 贵 誉 日 已矣。 容 泣 非 ? 揄 難 爾 私 也 予 敬 以 託 不畏也。 血 挽 田 姗 寸絲粒米之保以 則 未 6 ,宅爾宅,安寢 爲 身之道哉? 而 其棄君親 笑 以 有室家」, 口 安其身而 彼將 遽託 實。 以 往 謂 揜 知 之也。 E. 揶 避 嗚 其 畏 揄姗 難 呼 前 吾 捐 後 者 口 恤 然 動 此 乎? 以敬吾身也 深笑以 廉 託於道以爲名,避 私 爲 行遊,不逢 天 「鼠 定定 者 而 恥 實。 以 之鑒 君子甚疾夫有 之心。 0 歸 爲 其 思泣 蔑 固 逮 名 交 論敬 觀 亦 不 乎 而 血」者, 末 而 以 ,敬吾身 2.惡怒 然則 此 後 其 矣。 如 室 醉 川則 求 口 之何 保 家 揜 鼠 難 雖 柔 道 抑 爲 可 而

0

九〇

[「]翟」,曾本作「所爲」。

[「]保」。曾本作「飽」。 「以室家爲」。曾本作「爲室家」。

爲釋小人,而獨疾夫自詡敬身之君子也。●而後不善之行以成。《雨無正》之詩人所非其君,親非其親,廉刓恥蕩,天不爲揜,

擿之。 歆利以 之爲謀 孔之邛」,謂 量以責之。 終始以守之。 所聽,人門 而 遽試之。 中夜之所思,及明 八者十無一成,而 居 不出 心,名義以將之。 而欲徵之。 是也 匪 興 於此者鮮矣。 匪己之所能,任委諸人而不 心之必非,不自我 會之所激, 9 佔畢 而欲就之。 百 觸 俄 我視謀 有 之所得,釋卷 物 千價,天 頃之所安, 而 而 求 道路之 極 猶, 成 情 之。 亦 下 以

者,悼 乎 集其善,則唯恐日月之不 衰亂 1 欲 岸獄 家其 而 我 日 留 之不 過, 之與? 斯 邁 則 免, 而 唯 竹柏不怨凜冬而 月 恐日月之不遷也; 庶 斯 幾 延 征 寡 也。 」,胡 過 而 爲 爲《小宛》 乎若 以 令終 欲其 將 欲

> 用。 日。 耳。 子作聖之功,❸不僅以寡過 其可愛,況其 無不可爲。 天自有其 天之俾我以 徂,君子不戚貧賤 人之迫我以險 故曰:「君子愛日。」岸獄之日 道 無 所 寶 所愛非死, 不 命,吾自有其 日 他 盈 月也,不 乎? 耳耳 而冀以 阻 目 如《小宛》者, 也 而不以死 以 心 恒 叮 死 加 險 思 化,無 免於禍 以 阻 謝之,道存焉 無 貞 而 乎 爲 (勝者 賤 其 而 息 而 可爲 世 者 後 不 肩 不 也 也 之 君 喪 口 而

也。 也; 也。 惠 迪 流言,周公之義也; 君子不謂命矣。「惠迪吉,從逆 故夏臺,湯之義 而 無可奈何而安之若命」,不知其 宜 吉, 從逆而 宜 也; 凶,繒威 陳、蔡,孔 牖 里,文王之 大明之天 子之義 N_o 爲 義 義

[「]獨」。曾本無此字

[「]謂」,曾本作「爲」。

[「]功」下,曾本有「得矣」二字。

於天 臨谷 填寡 作 知 拒 苟 乎 人以 宜,吾必 下 義 茅 其 ,義 聖之功也 一以岸 濁 下 以全名而安身,爲非 而宜 爲宜,未 ,樂天不 哀我 從 義 前 也 在 平 有],猶 獄 一獄,智力相取之天下,義出 恃 集 填 ,此,天之所宜,人莫能 宜 爲宜,則 如 川 有 寡, 木 焉 嘗非天之宜矣。 盡 之於水 以 者。 臨 ,宜岸 性。 澄 谷 之也。 將 義在死乎 以 官 故曰 也 以 全名 獄 所宜矣。 死之亡之,集木 。」填 無乎不受也,不 : 是故安命不如 爲《小宛》者 而 當 寡 安 而 ൬ 身 世 君子之 義 不宜之 平此 宜岸, 一之所 平 在

日 氣 m 惠 其 能 者 幾矣。 治 惠 成 也。 不道之情, 者 動 鮮 「君子 馳 動 也。 而之不善, 而 後善 奚 不 莫 以 惠,不舒 必 惡 明 其疾遷 馳 日逆者也。 其 焉 然 究矣。」不 心於道, 也 馳 ? iffi 之善 故待 情 能 舒 附 舒

六府、 遷 中。 道之情者,莫若 於 不 也 觸 微之用隱 行而 氣 能 力 濁 理 其 其 以 能 於 平,其怒也理,雖 剛 而 無 唯 動 而 受其 之惠 物 質 剽。 發,未有 舒 未 也,迫而已矣。 濁,故不能久居 之氣,剽疾之質,速化而 故 氣 丽 加 而 7神無體 得清微者以乘化, 日 乎 不 迫 攻 躁化,則天 是故陰柔 君 ,則不能以舒。 可 清 取之 也, 挽。 剛 能 氣 子 之不 固 之動 則其喜也盈,其怒也 以 有三戒」,戒從 惠 也 動 舒 者 也,而 迫。 或 不 不 勝久 血者,六府之躁化也 加 地清微之用隱矣。 也 也 也。 不 能與之争勝,夾持 口 疾,未能 其 從 惠,末之狠矣。 挽 矣。 其用常狠。 舒者 而疾行於官竅之 末 能 重濁之發鷙,則 血 之能 成血 舒 調 則 是 「, 所 也 血 之於早者 清微,故 狂 故 惠 一,挾其 之氣也 ,從神 以 欲 則其 賃 沮 而 治 狠 (), 狠 其 其 喜 欲 清 以 非 有 至 則

末矣。 亦端本清 此也,逮乎其 聖狂之效,早 氣,迓其 用,六府之調, 耳 逅 血 者 不 之 也 極 躁 聲, 化 神, 古之君 源之治與! 居 而 勿 決於 方狠 俾 不極 益 不 氣 子 登其剽疾,弱 其 此 뻾 暢 *,食 安, 陰,所 矣。 姑 其 不 舒之,猶有 大陰之産,不 亟而 清 不道者之固 極 微, 以 味 以道争之, 豫 以 其 養 目 與神 其 (形,微 蹇焉, 不極 舒 盡 未 相 也。 色, 其 其 抑 及 其 邂

矣。 子而 能歆, 於 威 炉 欲 也。 也。 福 哉? 也 持 能 君 則 威福之柄而淫用之,抑豈其心之所 至於天子崇高 自 君子 子 亦 無故 無道之君爲天下毒, 操 無 如 其 所 而 如 怒 威 利 爵 亂 祉 以 福 人, 亂 庶 淫 富 賄 庶遄 雖 遄 用 貴, 也。 幽 沮 其 己, _, 不 威 無 厲, 無 以其 福 可 故 不 不 憂 妒 面 憂 其 當 威 故 丽 刑 其 者 福 淫 使 賄 從 於 天 淫 鮮 不

> 殉 人 爲牢愁而不釋也, 不得,僅寄命於微 世,欲以 位之謀,●非 剖賢士之心,椓貞 之禮,償貪人 匪 而 已矣。 人之欲 生 死 媚之以 貴 其 衣 撫 (賤,聽 怒 履 心 而 也。 人之體,爲 尰之鄙 而 豆 小,竊之以 周之亡速矣。 未 幽 觴 鳴 有 之資, 、厲乍然之喜 夫, 呼 據 1 斯 舉 譖人專 非 大,捐 生不 有 祖 其 宗 心 祉 道之 者 禄 怒 薰 己 也 所 而 竊 沐 丽

蹙矣。 周 將安將樂,女轉棄予。」而 爲天下 谷風》之刺 室不 王 君。 可爲矣。 周 以之衰,霸以之興,後世 室 興焉。 世 亂,王化不行, 愈降 晉文以之, 「將恐將懼,維 ,道愈偷, 上下離 忠 南 生其 厚之 渡 臣 以 予 河 閒 之 澤 友散, 與 者 崛 女。 斬, 愈 起

] 「專禄竊位」,曾本作「專威竊柄」。

九四

以 舅 王 犯 也 測 之, 漢 臨 高 河 以 耐 之, 辭, 醢 然 越 而 葅 霸 信 矣 繫 而 猶

於請 未 恩 足 ·君 傳 室 張 祀 DЦ 良 百 測之,絶 嗚 呼 穀 ! 而 自是 逃, 然 以 圃 降, 終 晨 爲 加 天 何

静 則 膝 親 亟 一誅 讎 推 淵 無 宋未 不 無 甪 不 已。 九 已。 州 唐 而 未 利 石 定 在 守 四 則 信早 海 讎 親 廢 而 劉 利 待 文 夫

爲

不先 以 狡兔之 事 J 贵 者 死 緊 而 游 烹 谷 羿之 走 風 和 ? 瞉 其 抑 中 爲 成 前 飄 虚 不 風 語 保 平 圖 其 -之 日 惟 盡 晚 13 恐

悲

夫

於迷, 先 不 病 爲 之 者 於食, mi 不 雖 世 先之矣。 然, 無 忿 其 足 損 損 抑 與 傲, 捽之 而 之矣。 何 言 不 傷 拯 情 爲 洞 君 不 而 先 者 子 大 惠, 忌 而 於 之 德 其 不 淵, 捽之矣。 厚 君 而 (凌,損之而 爲 哉 子 不 不悌, 之通 爲 導 怨 德 長 捽 者 也 對 調 者 而 鮮

> 乎? 德自 懲矣。 命 章 過 其 風 各 》之怨,可以勿恤 事 加 盡, 引 己 君 其 小 君 弗 怨之 人 子之於小人,樂吾 彊 以 子 ル早計 之 傲 愚 奚不 相 貪 澽 料 饕 尋,名義 情 人,「 也 之 早 矣。 也 以 . 計 無 無 君 所 而 弗 不 미 子 抑 天馬 獲 能 酌 柰 爲 已 芽 裁 於 何 愚 鬼鬼 茁 而 耳 施 而 口 聽 矣。 而 安 以 神 也 生 之若 減 不 谷 以 怨 能 枝 時

生, 道 其 極」, 也 而 義 他 而 繼 生之 後 而 凡爲德 瓶 言之,生 成 罍 不 後 焉 謂 貴 可 爾。 盡 也 者 酒 知 而 ,莫匹其 也 事 非 善 是 已矣。 親 事 言 挹 故 之 親 父母之 知 注 之謂 義 大。 其 焉 而 天 道 爾 後 也 故 德 地 而 不 曰「昊 者, 後 之 父 愚,「 知 可 大 子 不 事 行 節 天 德 敢 親 文 之 罔 侈 生 曰 知

南 渡 河 棄秦恩」,曾本作 而渡河

絶,故 子而後嫁者也」,而況於父母乎? 而 也 節文而 瓶之所挹,非罍之所注哉? 矧 母之與 其 斯」之謂 身」, 人勉也。 非 此之一者,不假學 ,無道也,無所 道 日 己。 ,性安焉 我 非知孝者之言也。 「欲報之德,昊天 也。 乃或曰「學而 爲 若夫子之必事其 一身,終漠然 學 而 知之事 以 非 然也 義。 而 後知父母 固 不 罔 無 傳曰「未 其 知 給 誠學 極 義 (親。● 之? 故學者,學其 不 而 也。 相 困 而 之 言 爲 有 孰 後 與 勉 理 無 無 能 學 行 當 之 知 我 所 也。 父 養 焉 然 爲 爲 路 容

爲 性 也,而厚以愛之,則成乎其 之,顧之,復之,出人腹之,「地道无成而 有終」,亦尤勤矣。 之造勤以 而已矣。 父生之,母鞠之,拊之,畜之,長之, 天施之,地生之,地竭 承天 m 夫人尺寸之膚,皆吾 以 奉天之性, 細人矣,壹 其 地 力 致 無 以 代 於 身 成 育

> 有終」, 專生以 於性也。 道 此而已矣。 功於父,而 懷惠之謂 罔極也,母之德 之知禮者,父在 成不可以 莫大於生,生莫尊於 極也,父之德尤罔 天, 不以勤於生物 搆 者 精, 也 萬 勤勤 統 知 物 故曰 也。 成,主一以 伉生,❸用勤不 人道者知天者也。 德 化 知禮 乎 亦與之配矣。 生 天 承 父施之,母承之,「 而 亦罔 者 陽之施 母 地 極 言致 知 爲 之服 絪 御衆之義也。 極也。 性。 也。 生者也 德 緼 而不怠, 也。 朞,崇性以卑養, 可以伉致 養 道莫貴於一 萬物 也。 罔 故 不 故 知 故母之 知禮 可 極云者,非 化 E : 致 生者 是 無 以 醇 父之德 成 固 0 者, 伉 者 知 大 德 而 男 思 性, 人 有 德 知 代 古 女 呂 謂

[「]必」,曾本作「心」。

[「]崩」,曾本作「誠」。

陽 不絶 其子 裁,故 不知此 也。 而 不知有父者 夷之爲道,甘食悦 親 而 欲報 父兮生我」以 唯 政 知 嗚 ,養亢性 於郊壇 毁,浮 養之懷,故專乳 可 之德, 香 呼 ,人之不 厚慈 者,懷呴 i 姻之 1 不 圖 不不 其子者,寶己之委形 ,父母之差,弗 知 昊 窮,人道之憂,其 君子之道,易知簡 流 不 加 人, 天 禽也 ·知誰 响之恩以 東 īE 乎其 罔 思知人 土而 色 極」, 無 而 何 哺 上, 圃 ※幾矣。 而 知 教 之恩,而 咋 其 不 爲之父也 爲 詳 有 亂 别 孝,夷 母不 殆 可 言 於 奚 悦色而 羯胡 以 知 母: 地天之通 喪祭,陰亢 有 推 耐 不知 天 知 恩 而已矣。 瘥 Ì 以 者 歆 而 有 乎! 甘 不 中 其 厚 天 圃 天。 與 或 下 春 兹 食 知 重

必 促 以 爲《北 節 亂 亂 其 者 Ш 詞 誣 》之詩者,其音複以 誺 E 其 一行 情 私 私 而 矣。 不 口 故音 ıŀ. (哀,其 哀 是 者 以 節 君 節

情,知 爲《北 以 於國 無當 不受, 濱, 莫 不 寢 賢之,而又孰受也? 言 子甚 王土 人春之,必且爲 「大夫 反 有行 均 處 而 詰 其 乎? 於國 各 敷 惡 也 之 詞 人之安而妒之,而 Ш 假 不 非 者, 之 夫 而 則 誣 》之詩 以 均 E 也,不 夫惡 里之能 在 音之遽哀 彼 不 而 故 誰 溥天率土之臣 臣」, 我 廷 窮 情 猶 曰:「不 扞 者 知 與 從 者 私 是 塵 可 疆 了, 知 「燕 則 ? 至 事 鮮 耶 謂 践 圉 而 也。 獨 彼 矣。 ? 而 但端 王 己之 行 ?」然則 燕 有 得 可謂 賢 猶 不爲 之土 百 居 詞 不顧 居者,孰 有 抑 是爲王之臣 里 居 勞,而 息 庶, 溥 荷 全粟乎? 將 端 之節 以 風 者, 也 天 誣 事之可 使 將 者 居 庚 爾 議 之下 而 斗 不 分 者之 未 守 之 取 爲 m 也。 「率土之 情 恤 粟 盟 爾 賢 社 必 即 或私 故 鞅 風 莫非 誣 使 而 稷 有 無 人 而 也 之 夫 ? 掌 寧 當 議 而 爾 以 百 百

之,日 者窮 以 其 行 下於和平,此物此志焉耳。 未之前聞 詩 哀 私 鳴者, 者 Ŧ 其 而 [以起· 者 不 連 戒 以之化民,君子以之自淑,保天 可止,西周之亡不可挽矣。 其 罍 衰 不 (複,飭 之 也 知 詞 其 以 其亂者懲其促,治 爲 革其 哀音亂 變 雅 私者禁其 之淫 唐、宋之末 節 而 詞 起衰,吾 迫 而 祖 切 其 故 流 述 之 誣 節

之可 無恒 者,義也。 之可將,求 已亡之國 將,未 |哉? 廢其 廢其憂於必亡之日,抑不已其 天下亂 天下治,使 憂,則其君 塵之雍而 有 安 廢 圃 ,使人憂;天下大亂,使 不畏其塵者 其 其 無 人樂; 命,不 憂 與 者, 救 不 如已亡之君, 矣。 天下大治,使人忘 渝 命 得 其義, 也。 也 也。 嗚 ŝ 呼! 求 夫豈 逮乎 道 憂 (悲於已 其 而 而 人 無 有 人 八情之 國 不 大 大 廢 E 得 車 其 車 如 其

> 廖,無 哉 廢 亡之後。 其 憂於將亡之日者也。 不藥之理。」弗恤 雖然,文信公有云:「父母 不已其憂於已亡之後者, 塵 之雍 命 也, 圃 病 必將之, ,知不可 如 之何 固 嘗

其情有進焉者乎! ❷

役 饗 能 謂 音不生其 之者憂悲以 者哀其樂,樂者樂 僭」,平也。 歌 而 ,不能謂鈇莝之不足辱也。 謂 者之亦戚 歎 衮冕之不足榮 欽欽」,肅 ,非謂歎者之亦歡也 心,奚 妯。 肅 也。 雝 貴 故嵇康 也。 以 音哉?」然 其 施衮冕於輿臺之身,不 平, 也; 哀 同 和 也。 日 王公而 音」, : 樂之都 9 「聲無 哀 臨喪 ൬ 事 樂 雝 與物 執 非 中 也 也。 而歌 哀樂,哀 鈇 也。 出 不相 加 非 不 而 聞

- 「憂」,曾本作「悲」。
- 「進」,曾本作「盡」。

彼嵇 明 和哉 功。 樂 稱 足 也,非貴 彼 不僭 以 也, 固 聽 物 鼠 ? 康 不爲之 樂奚害 非至 其 血 一者自 於斯 故「欽欽」者自肅,「同音」者自 信情 坦 其 聲 任 中 一愚者 不 平。 於 者 損 其 相 出 其 自 情 準者多矣,末 然則「 示 雲移 也 悲 心之憂,憂奚害於其樂 一,貴 然。 加 兩 H 其 淮 無 蔽 故 外 水」之樂 相 君 而 動 與 能 子之貴 疑 圃 如之何, 而 日 生 个,其音 之 樂 中 勝 夫 不 無 悪 也 離 樂 之 見 白 固 mi

其 于 愛,是祝 經之緯之之謂文。「主一無適」云者,非 人之情 克 舉 喪 事 0 以哀,不 而 也。 也 史之虔 知 廢 愛 其 而 祭 一敬 餘 於旅 以 廢 也。 之 也 敬 敬 協 也 也。 故曰 故質之文之之謂禮 者 語 不 廢 可 . 哀 愛 禮 與 「善無常主 而 也 語 儀 忘 卒度」,敬 道 敬, 敬 矣。 是 而 一,協 故 謂 野 忘

> 秩馬。 故 將 之謂 則 以禮 其 心 愛, 也。 無 彼 爲前識之華,亦不足怪 不 以 至其 有 以其愛 笑 焉 語 無 抓 延 卒獲」,愛之謂 心,而 其 不 實 、敬,而 焉 不 協 無 後 其 不 追 己。 也 富 容 遠 有 焉 之道備 以 之實 禮斯 其 敬

後 然 事 祭 則 所 延之於其 可 後 非 以 其 可 以 可 代先也。 深。 以 미 久, 爲 廢徹 弗欲 大 以 可久也。 미 久; 餘, 著 延 不遲」,無 久而賢人之業 知 故 其 其 將 弗 知 夫 往 敬慕 惰 浚之 弗 知 故 飭 以 擴 弗 日 餘 也, 其 歸 之 mi 延 懷乎? 歸 之而 而 乃 懼 簡 則 9 以 乃 夫敬慕之衰 成 是 則 研 深 以 乃 矣。 以 易從。」易 曰 其 大 焉 以 惰歸之氣 幾 焉 者 久焉者 君子 此 利 者 禮 然 從 其 後 之 而 之

[「]欽欽」至「不足怪已」二篇,曾本無

惡得 日:二 唯不待其祁祁之衰也 用 有太過之情。 止 止 有 被之祁 其 太過 所 而 之情 祁,薄 不 太過之情 過, 耶? 言還歸。」祁 君 子 必 故 之 廢 成 無 於禮 徹 乎 太過之道 不 不 祁 遲」,無 至 及 以還 矣。 則 一,而 故 亦

及之謂也

泯無餘 之也。 農有 兵其 農,猶農之不可 視 士 請學爲稼,請學爲圃,退 而 不求士以農,君子之道也。 一,猶 I IE 餘則士之,導 兵之或 矣。 風 賈之可 可進者止之,既進者退之,民性 則 進 美俗 無 者非 「攸介攸止,烝 農, 可 1,定民 爲 爲 爲 定 疆進之也, 士 兵也。 其 農 一, 其 其 志,導 性 也。 性 數多 也 也。 也。 農 兵 我 民 可 也 故農之或可 農 其士則 無節則農之, 性 求士於農,而 髦 士之不 進 之可 士」,進 者 明 朴 弗 於 無士 爲 可 進 與 也 士 爲 之 1 退

> 嗚呼 秀,點 也。 夫 丽 其辨尤嚴也。 點 爲賈之邪説,烈於許行,可弗辨 其 1 之不可 失也 變 民兵之敝、酷於軍屯、許 而 狂。 後 爲賈, 秀遷而 朴。 退之遠近,俗之貞 視諸 進 朴,其失也固。 之 士之不 難 易, 風 衡勸 與? 可 之 爲農 淫 順 再遷 士大 也。 逆

於南 適 亦 至 諸侯世子之妃也。 年之閒見之《詩》、《書》者,一人 利,抑無以養之也。 養之也。 秦 孔 ,族無與收之,官 悼矣。 畝 丽 古 者 定,先王 非 無 老 耄 少 而 以 則苟 寡之婦, 無 羸, 亦 夫 有 有 故 亦 無 《柏舟》之靡他,數 E 無 與 可 所 日 寡 夫 適 辨 獎之,僕僕然拾 俟 ",遗 夗 君臣 矣。 者, 也。 而 秉 無有不移志 一夫婦 浸 而 田 滯 夫 耄 己, 歸 死 穗 之 以 而 以 偂 無 倫 穟 爲 無 千 以 固

「明」。曾本作「期」。

四, 得 之責 懷清之臺 知 與共 也 也 而 叙 世 知 彝 心 一築,夫婦 一子之妃絜其榮光、秦之斁彝倫者 其 故 倫 之 憂矣, 子 損 者一,以 益 曰:「其或 也 心之倫 有不怒然者 之子 此 登 定, 損 貧 総 無 廉 益 寒志義之士女 周者 、裳」, 恥 周 行 禮其可矣。 亦 雖 於閨 不 百 ·足爲 世 可

讀《大田》之詩,未

也

畢 揜 尚 其 静 其 福禄之盛者矣。 下之静 (動,不如 項籍之惰 羅 那 者 於 因 而 造 如鎮之於未 「, 悪 天下之動 戢 而 無 攻 翼 安之, 事焉,亦 自 其 乘於其 歸 之時, 牧 違 而蹙之於固陵,漢 官 天 則 爲 而 静 未動之利也。 而 功 而 民 功 成之,則事不 之爲 桀 與 利 不 不 利之説者 弗 福 之 激 勞。 飛 有 相 都 鴛 湯 功 失 矣,而 為 事 也 也 於 弗 集 日 安其 以 里 已 廢,因天 ımi 君子 然則 是德 故曰 「成於 飛 羅 民 所 矣 弗 : 及 固 施

> 勞其民,仁以 時,工矣,惡其有伺之心也。 者 也。 於商 天之祐者也 貪,可與應世 子之道。 天下先,似矣,惡其 權也 躁 周 勝 寒、 知 丽 盜 君子之道 天 福 涵物,而智以 静 丽 地 不 亦 勝 替矣。 詭。 熱 盗 持 者 萬 天 者, 苟非其人,未 物 下也。 機 者,賊 見 可 也 動 不 功 與 然後 廢其 尊 藏 也。 静 生一 生 器 者 而 爲 以 不 宜 君 不 待 爲 殺 道 不

淫,哀 不 日之將昃 情,唯不及情之爲 淑女之德,重言 不 人與! 謀 如《 也 《伐木》不如《頍 車 丽 傷 · 舝 》之傾 而 高 非 其 不 太 山」「景 給其 亦 姒 德 徵 其 孰 憂也。 也。 歡, 於 行 八賞 弁》之 能 此 二之歎 心也。 當之, 其 ^ 矣。 伐 雪 將 相 木》之不 霰之悲,若 何 慕 ^ 愐 其 弱 雖 以 也 諸 關 然, 雎》 繼 雎》不 此 關 古之 極 樂 不 乎 雎 睨 其 而

仁,閔 也。 之防,敬賢 者,庶乎其德之可 能 凶終之懼。 德,始夏之苞穎不 菜不可 以 故《類、 信 老 以 太 不 觀 姒 弁》、《車 慎 勤 俪 士 也 恒 日 於言情 容 一懷比 暮 5, 踐 故 成 可 之歎 牽》非盛世之詩 廟 也。 以 阼 匪之憂,納交 者,庶乎其情之不 見 之詔 觀 親 不 恤 年 可 親 幼 豐。 令不 以 不 而 觀 慎 恒 矜 可 也 婦 摩 於言 而 有 以 順 恒 愈 頂 觀 之 渝 有 疏 德 君 釋

之簋之,神歆 誥 之不 利不 色湛 日 而障之,不已勞哉? 以 而 君子之道,求之己而已矣。求之己者, 得 迷 人 弗革之, 曰爲賓祀也。 臧之券, 貨 十,義 無無 以 導人以黷, 亂 亦 可 而 不 雖 而人宜之,亦奚乎不可 以 一然,不 始 得 廢 做 雖然,不 者也。 酒 童羖之誓,是決濁 禹 可 乎 以 ? 而 廢色也。 可 籩之豆之, 弗與禁之, 姑存之,武 酒者,害百 以廢 貨 酒 也。 ? 簠 投 阃 王 mi 河

有好,酒 餘,因 有 不亂,以 情 命 性 將 無,則 感者, 情者, 性之情 而 俱 而貨應之,人有思色之道而色應之。 生」、「何以聚 盡 也,流 不令矣。 而 也 無 人 興,則與 性 貞, 一,性 無感 者 化機之必然者乎? 性所 有 固 性所 也 也 於情 性 以 非 酒 好惡之所未有也。 無 以不 性 因 無 順 有 天 而 盡 君子之道,齊之以 有 酒 始 也。 人日 地 命 Œ 而 而 而 性 也。 之使 動,則是增 也。 情 莫 猶 己 有 則 俱 財」,仁義之府 無之而 非 有 好 始矣。 也 性 至 故 人 於天 命則 也 矣。 命 於 好,情之感也。 曰「天地之大 盡 命矣。 也 不損 有 其 外 下 内 雖然,人因感以 上古之未有酒 益之於已生之 人有需貨之 ·, 孰 不 性 生而内受者, 生而 盡 一安其 其 禮,而 齊矣,命 其 貨色之好 爲 生。 也。 性, 外 之乎? 成者, 德 行 性之 命 與 情 不 生所 平 則 齊 而 生 理 之

之,行乎不令之塗而令之矣。 之於物,非反 期物之令,而 之以天,令之於己,而不令之於物。 而約之以禮,齊天物之不齊矣。 己盡性之道也。 絶 其 所不令,則 正其 納之於賓 是舍己 誓 性 以 而 mi m 祭 做 無 求 爲

榛棘 而 義,色且疑 而 知 檠之於正,君子之以事天至矣。 憂於命,繼天有功 況 此 厚 故天無擇施,君子無擇受, 於酒 前 其 也,瑟瑟 (疑,觸 心 乎? 其 亦 於目,值於躬,莫非斧斤之與 伐仁,將 焉 煩,力亦憊矣。 故歌《賓之初筵》於酒 取 天物 而 險非其險,阻 不遺餘 而擇之,擇之未 貨且 力以 芟除之, 異端之不 莫 非 疑其伐 非 座 其 命 精 mi 阳 m

不 故 相 促 :舍者 席 將 衰 而 而 ,與其將離 如 後 温 知 者 盛 也。 也,已衰 其 寒也 王者 丽 以天下爲家 登 III 知 臨 樂 水 巾 m

不

·失其歡者,可

與受命矣。

之與! 依也 嫕於 奚必 夕爲《黍離》之哀,人心之柔以含愴者先傳 國門 固 ,❸周之存亦僅矣。 有之居 之内 知 而 後爲 其舍是而 魚之藻也? 旦爲《魚藻》之樂 疾首 赬 尾 瀏 之無 漣 婉

爲情。 時, 交雖 危怵 子 舒」,無憺忘之謂 衰,●上下之交雖未孚,而無 ,,無 丽 以 密 君子之事君也,鴻 實以 戒 爲 以 鴻 君矣。 情,故 豫 邇 將之也。 以 而 爲 世 有憂 無 也。 志, 雖 憺 盛 將之以實者若之何? 一時 志 無 故 主 之心 豫 憺 戒君之心 世 以 忘 德 雖 爲 者,非 也。 枉道之從也 雖 降, 志, 賢,上下之 主 而 僅 彼 危 雖 其憂 交 君 怵 不 厞 德 以

[「]不相舍」,曾本作「相依不舍」。「如」,曾本作「知」。

[「]疾」,曾本作「頒」。

[「]雖德」,曾本作「德雖」。

者,時 事君 心 乎? 始 也。 之死 賓賓 敬 此 給 其 未與之傾。 之弗獲已,伊尹之心,柴市之心也。 不忍不敬也。故曰:「資於事父以 之主,則無患楚之不 者, 心進前 睨 同。」夫事 氣惕然,其 惜往日之舒也 者矣。 了事圖 《鴟鴞》之怨,其 虞淵之日,悲 故 殆 乃 未棘,情亦未 忠 猶 以 而 臣 信 不 夫 存之主, 父之敬, 嗚呼 大命已圮 舍,退 事 介 志 其 無 怊然,合 親 士 1 憺 號 無 食 與之棘,勢未 則 則 忘之實 思挽 商 以 周公之騷乎 敬者非直 疚 而若不得復見,有 西異 無患宋 成乎終天之憾, 問 屈 於 而若 原之騷,事 而 天 也。 於鬼神賓長 也。 不得,不 下 離 之不 敬 以文宋 mi 親 故君子之 傾 也, 事君 自 丽 康、 下此 愛 疚 亦 心 有 桐 若 一, 而 其 晚 乃 亦 官 瑞 爲 之 如 官 不 而

兩目不相競明,兩耳不相競聰,兩手

賢於我 不狂 趨 争其尺寸,趨利者所弗爲也。 臣心競, **瘉之**,不已賤乎! 高於我 譽禄位,文章 復奚瘉乎? 已,其猶相 不 可與争, 相競 利者之不若,不已必亡,不亡不已矣。 不已, 者猶 便,兩 者猶有人也,貴於我者猶有 而 氣茶精枵,朵頤不 効也。 君 加 有 事 天 足不 子 況 人也。 功,能者取之已 地之廣 以 乎 「此令兄弟,綽 知 其 相 故受賢者之名而不讓 受 競捷,互 晉之衰。 力不 也,萬物之富也,名 爵 也? 足以 厭 就就 君子之行而 相 棄其丈引 爾。 妬 晉平公之 密 忘 綽有裕」, 邇者而 而 也。 人也, 無已, 遠 無 無

可以 爲 所受命矣。 古之諸侯,臣乎天子而 君長者,五帝以來之所敢宇也。 或 菀柳》之詩,奚以 讓 是 五 或 一帝以 重 於 天 天下。 下 辭夫不忠之尤耶? 不 讓 賢 純乎臣, 夫各 者 五 帝 而諸侯 以 君薨子 來,世 有 不

0

四

柳》無 暱 稷 嗣 君之所授也。● 、毁宗 焉 天子 可 可 祐, 矣。 息, 改命, 墮世守, 而 其 侯國 「居 天子 在 以 於周,所必暱者,其魯 無改 不容已 者,諸侯之 IXI 一 矜 」, (封,宗 於惴惴 危 國 廟 E 家 所 爾。 無 託 《菀 白 汁

晉

鄭

平

故三

國之不

王

而

後

Ŧ

洂

熄

1

悲閔 其 事 凋 也 也。 而 合一王,九州 春 一,極 去 君 於 施 秋》作。 公傅亮、 之心 者之 林 三代之季世,皆此道 及 吾福 其 而 (親 無 就 張文蔚之苟容者 蕭然 也 《菀 所 蔭 一,邁吾安也,凶 生之者 不 於 自適 主,當吾世 柳》之怨,固 至矣。 棘 於栗 非 此 彼 君 俾 八里、 王 心 也。 也,成之者此 而 無 矜吾 能 之無 潛 遇 大害於人紀 幾 嗚 官之下, 司 主 何 義 呼! 不 一,以 空圖 哉 臻, 也 榮 ",柳 君 身 則 無 而

其 心 貞 心 其其 恒 持 自 者 「, 以 也 其 耳 耳 目 目 上生其 取 心 新 者 生 也 心 以 而

> 也。 必 昏 居,奚必 暗 忽 必 斯 在 忽之矣。 害之數, 故,而人道絶矣。 恒 心 不 此 臺 姻 也 利 志 清 美 者 亦 矣乎? 色, 之所 以 ? 有 不必有 ,於是而 而 則 新 名 耦 已 尹 有 緇 而 衣 不 得 治 同 广、吉也 而 矣。 奚 必 耳 恒 服 者 己 之 觸 高 以 不失其恒。 害, 聽, 目 必 族 矣。 無 世 何 而 實 綱 之不容自 ? 撮 姓 宜 絶俗之志者 所 天下有若無繫 生 取 無 治 維 也? 裘奚必其 增, 其 是 平 V. 恒 夫誰 者 於 己。 悲 其 族 和 失之 心,莫之易 愉 爲 聲。 姓 知 色足 得 昧 義 也 何 ? 無 人道之所 則 大黄黄 無 者 是已, 圃 取 恒 取 愉 慰 充 所 能 有 乎 之民 無 新 於 位 損 恒 之,凡有 失 富 衣 而 非 恒 得 而 有 視 則 貴 笠 服 之所 之 絶 人 故 忘 便 失 紀 利 續 足 奚 ? 不 民 利 其 無

^{● 「}君」,曾本作「祖」。

貴。 哉 沼 額 其 定, 容 豔 非 禽 尾 悲 灣 稱 미 取 徇 無 夫 態 耳 曳 新 擇 豔 1 可 於尻, 之 目 稱 於 以 欲 久, 取 於 林 爲 歌 新 典 淫 習 ^ 但 圃 耳 都 章, 人 新 無 今 之 人士》之詩 賤 以 擇 昨 謂 行 族 爲 焉 不 也 且 口 保。 故 0 去 非 以 天 角 禽 爲 以 是 魚 其 而 君 延 미 魚 無 利 莫 親 人 加 继 擇 之 紀 於 何 於 徇

於

潁

光

不可

得

已。

摰 流 戢 也 傷 可 誹 未之有矣。 一,情 有 意以自 也 而 云 而 者 不 不 談 極 |藝者| 傷。」 非 滯 怨誹 於 開 養 其 氣 欲 好 日 而 淫 有 往 菀 舒 其 色 : 不 者, 所 氾 結 厓 而 傷 ൬ 國 思 非 而 偨 非 不 蕩 風 而 平 有 戍 謂 則 淫 好 而 不自溺 之 削 所 未 其 以 色 不 忘 也 以 之好色 志 丽 能 能 矜 不 於 ,●託事之所 蕭 自 諒 能 其 淫, 燕 然行 怨 戢 然, 清 而淫者, 蝶之 誹 也 小 孤 於 則 雅怨 之不 也, 私 情 自

> 哉? 鄴 思 閟 傷之乃以不淫者, 意 哀 之爲 也, 旁 至, 之 塗 心 無 行 誦《 淫 而 所 有繫 而 人,諒 采 自 傷 不迷,方哀而 緑》之詩, 得 而 故 矣。 不 無 毁其容, 自 可 所 得 以 浮 其 而 言 也。 不 得之矣。 不 情 口 喪 失, 矣。 其 嗚 與 呼 和 怨 奚 孟 也 1 淫 詞 幽 郊、 之 知 可 輕 而 曹 不 與 有 而 不

其 産 資 阡 一,爲 虚 陌 而 丽 古之營國 民 未 損 已也 之利 及 其 於於 盈 民 城 者, 流 圃 也。 郭、 其 未 非 惡 及 溝 封 但 爲 池 取 畛 城 功 以 其 郭 阡 於 爲 新 陌 天 固 溝 裁 6 池、 因 地 成天 守國 天 也 封 地 畛、 壤 之 鎮 之

君

一。曾

典 而」,曾本作「之」。 曾本作「風 本 作「姻

本作「私」。

原脱,據曾本

之道 其悁 登高 平 以 耕 民 焉,臭味 天之和 而 之 故 避 不 相 宜 泉流 躁 臨 也。 離 古之王 志 民 其 而 遠之士啟 去 得和 人 調 迓 既 而 周衰 鄙 故 朝 無 其 天 清 後 者 吝 其 市 以 以 焉 爲 m 道 祛 公受江 民 而 非 召 集 氣 人 其 弛 岩落 疾 肢 遽 以 怨惡 民 伯 君 遐 告 得 體 Ш 致 風 善其 之 之 者 心 矣。 雲 民 得 煩 祉 誉 之), 揫 志, 遠 物之 安馬 也 韻 心 謝 道 焉。 憂 促,督 前 思,故 其 暢 盡 夫 拘 和 人安其土。 餘 民 耳 治 亦 近之夫 者 之鬱, 目 天 民 地 猫 抱 原 下 歸 以 得 遐 猶 行 隰 静 平 於 之 使 受 古 110 既 鬸

飲 則 伐 道 食與 君 亂 ,以士授大家 矣。 子 生也,教誨 許 子 之乎? 大家 ,失道 有 以 士 與成 日 大國 諸侯授 而 雖 也,舍徒 政 有 欲 教 諸 大 勿 風 侯 許 國。 俗 而 面 而 亂 載之車 不 諸 盟 矣。 得 侯 會 也 然 失 征

> 之詩。 之,惡 俠 無 荷 不 授之? 有 盡 之死 能 與 君 其 其 恤 依 之 成 才 得不授之? 交成,亦末 矣。 原人之情 道 之, 也,授之可矣。 也 《春秋 焉。 則 五 苟 有 》所 霸 君子 其 師 衰 而 生之, 如之何也矣 以登 之道 尒小 而 弗獲已,雖 弗能使之終於陷 七 雅 五 天子授之, 焉 則 雄 霸之功。 **>** 有 併 所 荷 父 以 大 111 盡 母 采《 卿 亂 其 之 惡 降 諸 承 綿 才 道 之 得 侯 溺 而 焉 授 不 而 則 游 而

薄 名 而 可 愛 幡 幡 實 歌, 而 天下之物 於 幡」矣。 幡 兩 用 不 用 己 嫌,其 物 不 采 一何 之以 之薄,身安之而 미 之而 恥 得, 其名菲,其實涼, 無 實。 唯 不 於 非 則 廣 可 人 一旁求 心 實 幡 用 何 以 不 幡 也 嫌 其 用 口 矣, 哉 美而 不恥,奉之 物 茹 以 者 烹 猶無 斯 用 用 平 故 之 而 之以 之, 瓠 而 或 葉 於 益 名 所 用 而 是 不 敬 旁 之 其 非

者乎 幡 咎,君親 既 焦心 非所 授之天下而不厭其心,生人之樂無幾矣。 而後 茹之也 知也,是重傷人也。 短 愛於人,君子之所以安土而 求之未采之前,若「幡幡」者之迎吾目而 瓠葉」 和和 無 顇 能自廣。 欲 以 氣 矣,而 一,亦善 厚 容,而天 皆憎府 者, 中 致之,而又懷嫌 隔,愛繇以 可 用此 又從 自 以 也, 地之大者將偪 廣 處 瓠 耐 無論 而 約 畏重傷者必遠人以 葉矣。 安,自 恥之,是 衰,敬 可 朋 以全恩,殆於仁 以 友 能愛也。 廣而 故用 繇 矣。 將之,精 側,則 重 以 能不失敬 故歌 傷 弛,不 物 己 者 既已 枵 將夕 「幡 也 廣 自 神 逃 欲

其 自 無 有 天下 棄 以 訖 百 日 相 之務成 年 矣 逮 之日, 平 而 有 餘用, 就 圃 是 羣 百年之日有餘 亦 處之人,天 足以 其 無 成天下之務 棄 人 矣 下之事 也 乎 享

> 至,而 此 年,而貧寡其天下,不亡何待哉 **纆棘紛紜,以迄於危亡,而禍恒發於不意** 其疑懼,於是 棼矣,又從而棼之。 不給矣。「何人不將」,人不給矣。 而置之。緩急不審,成毁不豫圖,手足未 亦惡乎多 處之人吾徒 天下之至不可瘳者也。 先之以 阻 也, 而 114 日不給於天,力不 號,害不 亦惡 裕於用 棼之不勝其 乎 天下 多 知所 「不遑他 怨 ·而天 哉 從 來,而 、勞,乃 (下裕, 給於人, 促其一 天下已 矣」,日 旁遷 從 白 事

詩廣傳卷三終

詩廣傳卷四

嘉愷録

明王夫之譔

大

雅

以立 疑。 然後 焉。 降 果有以見之,果有以聞之也,我是以知見 慙,達言之而 在上,於昭于天」,孰見之乎?「文王 在帝左右」,孰聞之乎? 也。 《易》曰:「修辭立其誠。」唯其有誠,是 聞之如耳 顈 耳所不聞有聞者焉,目所不見有見者 其 卓然立乎前,若將執之也。「文 藏 不疑,我是以知 修 一聞之矣,見之如 其 辭,直而 不慙,達而不 直言之而 爲 日見之矣。 此 記詩者 之 不 陟

> 者, 之也 而 以 殆與惝怳其詞,荒誕 而 無 後可以爲君子,故君子鮮矣。 誠,知其不慙而 固 聲 相違不遠矣。 聞 不 而 以 之,不瞭 有 目,聞之也 其 可 聞 而 非 君子之所必察也,察之 固 無 無 不 色 而 見之也。 、慙,不 ·以耳 無慙,冥行而 而 有 也, 疑 其 而 於戲! 可 我 見, 非 是 -無疑, 無 不 以 疑 亦 聆 知

矣。 宜之,右之右之,無不有之。」●目之所見, 槐柘無火 知其在帝之右也。 逢之左,知其在帝之左,取之右而逢之右 以信文王之「於昭于天」乎? 求之己而 日 雖然,猶 「無遏爾躬」,求己之道也。取之左而 畫不見星而知有星,夕不見 ൬ 有數 信其火,雖然,猶有 也。 故曰:「左之左之,無不 方諸 無水而 類 日而知有 信其 也。 水 奚

二「無不」,今《詩經》通行本作「君子」。

鮮矣。」 之者 未有類 數; 而若或 成 故曰 人 謂也,是以 理, 則亦可 必有神,知神之固 繇形之必 偂 耳之所聞,身之所觸,心之所覺,非己 可數,類之不相應者乎? 王之「於昭于天」者也。 文王在上,於昭于天。] 觀其形、感其 於思 皆 理無數, 「喜怒哀樂之未發」,有中焉 得之爾 有成焉。 天 謂 慮 持之,若或循 ; 非 神無 知 有理,知 而 辭 天之必 此者鮮也。 相 以數數之、類應之也 矣,是 則 誠 類, 與 抑 形 而 爲 非 有氣 不得而 則 理之既 有事 無妄 光暉。 殆 以 之, 氣 不 數 不 也。 也。 充 而 雖 有數。 數、 可 有 得 皆人之天, 平 形 然,亦奚數之不 子 以言 形 形 而 以 雖然,於己求 有 四 日 氣 也 有 類 體 3 數,理未 0 氣有類 言者 賅 類 應者 「綏我 丽 知 存 故 繇 悦 德 氣之 能 於神 氣之 與 是 日 一文 也 ~,神 密 者 思 故 之 :

之者, 天下 其不 其不 乎? 顯 不遺 氣 也 無色矣,有内目 之羣色隱、況其 無聲矣,有内耳故也。 也,遏之而 ら、形其 内 化 聲,而天下之羣聲悶, 一前知而 可 可以 莫大於人之躬,任 不肖者之縱 縦 縱其心於一求, 耳 無 以求求者矣,洗 其所堪 内 所 形 求求者乎? 已矣。 目 不 丽 不疑,疾合於天 徹 達 無 而晝夜之通,鬼神之撰,善 未有 故 而 形者 矣。 其 也 縦 血 血 其 氣 色 宣 而天下之羣求 故 乃若 氣 靈, 心而藏之密 乃 乃 目 色 大 者 曰 : 以用 若 若 況 而 於 平 密 其 心, 耳, ? 不 目 而 其 心 色 形色, 物, ·惴,舉 色, 不慙,無 未 浚 則 則 縱 則 而 有 可 口 其 非 可 無 也 而 塞, 天 以 聲 而 小 以 以 耳 天 能 色 者 性 於 求 況 血 遏 而 故 聽 視 者 下 縱

「賅」,曾本無此字。

0

之也。 意之 惡之 無 谒 往 焉 幾 而 吉 馳 已矣。 N 而 之 不 故 反 朝 不 莫 之 慮 知 忿 而 其 知 鄉 念之 不 皆 勞 唯 欲 mi 其 格 遏

聞 心 也; 者 無 已 有 不 H 聲矣。 聲 杰 見 보 無 無 無 之色 無 平 雖 而 聲 可 心 聲 臭 其 畫 益 一之盡 以 則 者 月 無 臭者,不 微矣。 無 所 齅 無 臭者, 也 色 盪 齅 早 爲, 辭],猶 一,是 也 哉 平 也 雖然,其 聞 惡 夜,雷 其 無 有 ; 己聲 雖 聲 無 可 聲 無 其 色者 焉 以 色 聲 雨 無 所 見 微 之 者 之 有 聲, 吹 也 見, 盡 者 .)動 色 無 也。 辭。 非 猶 矣。 滿 惡 色 無 有 有 盈 之 可 故無 私 微 臭 聲 以 辭 盡 則 是 也 者 聞 無 其 之 辭 臭

下氣 石 巾 也。 在 在 E L 雲 故 氣 也 在 也,在 在 E 明 下 明, 下 雨 形 也 而 也 ; 在下 在 ; 在 上 已 H 星 赫 理 也, 赫 也 在 一,在 矣。 下

> 之説 之辭 功 以 者 赫之 以 舍荆 設 降之百祥,不 爽 知 也 雨 ௱ 者 其 至 忧 婦 不 爲 理 非 (吉也; 也, 非 爽, 猶 石 能 也 改 順 棘 於 必 可 不 有 而 E 層 於 非 以 武 赫 與 其 道 故 效 就 建 此乎, 功之以 緣隕 赫 寸之雲爲 Ŧ 語 恶, 顯 以 明 涂 於 撃 善降之百 者 天 巾 道 繒 明 明 吾 風 石 不 以 人 知 於 也 於彼乎,求之以一 在 明 報 測 故 知 mi 之 其 武 道 上, 也 婦 其 冀 而 杯 違 際者 功 有 , 昔違之, 今遵之, 一殃。」「 順 能 X 星 水 風 之 赫 至 非 然 也 也。 之 知 爲 之 者 赫 而 與 則 婦 旋 之 不 雨 在 己, N 1 百二云 故 爲 順 猶 測 變 平 也 耳 下矣, 塗不 曰 之 周 雲 日 之 也 之 即 定 者 宜 星 理 集 猶 善 報 興 退 非 丽 爲 得 星 無 無 以 明 而 之 不 定 善 武 也 明 必 吾 舍 赫 如 心 不 隕

^{1 「}聲」,原無,據曾本補。

銖而 得,意者其百乎? 不測之謂天,一而已矣。 擬 之, 劉子政父子之不足與 吉凶不爽之謂 類 五 行 之應,銖 理 知天, 繒 威

道而 野」,而「勿貳爾心」,上帝之命疑於武王之 能疑者無臨 從之,參伍 者之不與道 心矣。 再之命去之矣。武王之觀兵 猶俟之,其時 勿容再 不疑,爲道日固。 而堅持之也,審之微,履之安,至於臨 可矣」,諸侯 繇不疑 不遽信,乃 疑也。 奚以 ൬ 事之疑也。 相當也。 至於疑,爲學日長; 미 錯綜之,幾未至,德未及,而 知上帝之臨女哉? 日「可矣」。 故知道者,勿固信之,勿 矣,而 以一信勿疑, 疑者,非疑 不疑者,非聞 後以 臨 미 事 爲 者 疑,而上帝 道也,疑 미 也, 而 也。 繇 道 矢于 國人 知之以 也 道 疑 故 在 至 事 牧 日 是 聞 不 唯 固 道 於 而

> 險阻 是殆非人矣乎? 室 而 一幾相 已矣。❷ 而終於易簡也。 逮 故 而 志 參伍之而不雜,錯綜之而 天也。 氣興,德相符 君子之所以 圃 精 神 歷乎 固

不

此

百堵皆 之陾 情。 以爲功而率人成之,雖有他日之效 謂 從之心立乎事始,而當事 之奚以當然乎? 不以道,不以功,而勸以即物之景,即 未然之心目,而先事不歆 也。 () 《易》曰「悦以使民,民忘其勞」,此之 詔 《綿》之詩善狀古公之使民 興,鼛鼓弗勝。」當斯時 以道之所當然而 度之薨薨,築之登登,削屢馮馮, 弗知 也。 率人爲之,雖 也。 則忘也。 知其他日之有 故善 也, 也:「捄 知其道 勘 計 不 事之 顯 其 有 民 者 於 所 欲

疑」,原誤作「凝」,據曾 本改

此」,曾本作「能疑」。

之勸 之動 生焉 夫善 直 伉 瘖者若欲 ·畚築,而況夫色力從心之丁壯哉? 一,躄者若欲 mi 者 廉, 用 將 ,周之王自斯始矣。 民 也 將 丽 為為之 者 氣者乎 士安其 可 以 爲 ~歌 以 之 之巡 動 相 爲 1 溝壑,築室之下 功 杵,盲者若 忠, 善 基 乎? 並 而 用 其 臣 ,孿者若 弗 氣 樂 欲 知 其 善善 爲 也。 刀 圃 欲 用 之 (鋸,以 其 0 民 爲 視 然 此 情 Z 繩 氣 ITTI

奏,予 奚以 如風 焉。 勇榮矣。● 盛 文王也迫矣,傳其情,寫其 日 「,甫 也 之吹 如 如羣 一千日 甲 E 是之盛 坼 蹶 有禦侮」,迫詞 萬 Jil 也。 有 之,已芚 目不給視,心不給思,左右不相 之游 而 疏 也? 各以 取 附 流 迷 子日 **瀬鳴** 糜矣; 也, 生也。 復之人心 也。 如 有 也 春華之暄發也 、勢,故爲之迫詞 先後,予 ●甫芚蘖 故夫天下之應 生奚以 嗚 而 呼, 新之以 如 盛 之, 是之 矣 有 奔

> 之生而不必有本,孰能當之哉 如是其 待,後先不相 文王何可當 蹶 也 ? 也 讓 能 1 ,夫是以 」若淩越而 用 天下之生 謂 之 無 蹶 也 序,若 也。 故 芝菌 奚 以

之以 純 乎 純 終之以 子爲類,選 章以同 士,命之大夫,建之公卿,純乎 者,紀人治者也。 乎一學也。 乎一情也。 威儀,獎之以 治也。 别,文以别 色純著之謂 不閒, 於羣 天子之胄子,逮凡 九官 納之庠序 故 類 曰:「倬彼雲漢,爲章于 語言,穆之以 人與 而 百 同 章,衆色成 得其 道盡 尹 八人爲 三百 類,始之以 升之國學,試之 矣。 類,君 六十之屬 心以 民之俊秀, 采之謂 禮 同 子 也。 以 相浹, 不 與 昭 純純 接 君 别

0

[「]芭」,曾本作「曳」。下「色力」,曾本作「力能

[「]夷」,曾本作「曳」。下「芚」字同

精而 異,時 之於作人,則失之於紀事,得之於紀事 其章,則失其文,或從其文, 而 之人,以衆色之同治天下,文章之用各 别以大同 言文也,以 其章,金玉 其美,無所 損 美,備美而 之或惡也。 精者之或觕 兼 任 天。 物治 不 益, 賢之弗 物登 靳,保其 周 異而道不 者 王 其 也。 也。 貮 壽考,遐 其 固 人得其情。 爲 張 用。 因其物,治其物,取物之精,積 也 相 執以滯其經緯。 用物之宏,盡 一端,明矣。 無 故君子以一色之章待天下 ,勉勉我王,綱紀四方。」廣 弛, 可執。 别 ●已美之,而唯恐執 物 因其人,治其人,盡人之 不作人。」言章也,以爲 不 兼 司 治 順 因其事,治其事, 已精之, 也。 而 一逆,簡其精, 道之降 事 四方之綱紀,該 則失其章,得 别以 起 故曰: 面 事 成同 也,或從 唯 起 「追 美者 恐 而 致 則 擇 執 琢 時

> 章,削 志而 於苟 朝暮 不惜餘力焉可矣。 故知蘇洵之《權 矜其 失之於作人,無 へ權 售其説,禍且 簡 其 其文,欲天下之弗亂,其可得 立 術,參差其 偂 矜 其斷,別 切之法,崇豆 書》,亂之首,亡之囮 有能 甚於王安石,君子拒之, (教,以 理者也。 其 同, 顛倒天下之士 區之效,以 同其别,駁 況其下者, 俾得 哉! 從 其 侕 事

者, 下 地其 躍 亘其 察也。」自淵而上,無不在焉,自天而 于 中而 興乎 淵」,觀化於淵之上也。 氣之純 鳶 飛戾天」, 不 0 可爲之畛域。 乎 《大有》之載, 1 觀 故《中庸》曰: 化於天之下也。 故天其函乎! 「積 上下定位 中 「言其上 ·不敗」 化 下 魚

- 「惧」,曾卜乍「輿」。
- 「輿」,曾本作「輿」。

四

者,純 也。 無 H 不 蒸 成,萬方齊矣。 王者以之興賢 (才輔則天下治。] 此之謂 移 媢 mi 不 不 俯 在 「鳶飛 也 有 知。 垂 焉 萬 戾天,魚躍 不 寒 倬 高 昭著者,一章 _齊 暑 而 彼 動 周子曰:「心 而 相 化俗,上下之氣純 雲漢,爲 而 弗 遷 鬼 相 而 興 于淵」,上下 爲 不 章于 也 害,古 清 呕 前 純 涵 天」, 已矣。 生 則賢 而 [今差 殺 濁 而 四 相 才 純 一章 維 異 資 也。 德 紬 仰 而 而

乎其 是 水 則 其 廉 禄 m 沃 口 廉 者 者 (豈弟也 燄 使 知 而 禄者,不俱 與禄 欲得諸 豊 之 得 止 弟 術, 閑 而 相 之德 焉 不 爲 己 未 以 馳 得者也,無有涯 口 對 m 而 廉 矣。 爲 游 治 不 勿 臨 至 0 於 使 者 自 禄 善 天 也。 雖 馳 易 涯 也。 者 下 也。 0 然,君子 以 也,是 而 以 安其 禄 夫既 道 慈臨 者也。 者,競之 干 以 故 八土,於 ·禄,介 閑 禄 其 爲 難 干 難 酃

> 矣。 裘,三 府; 武 無 鮑 鳴 且利用之矣。 豈弟矣。 未 中一食,樹下 下見其仁,不見其義,而 而 焦、 見 呼 王之觀 嫌 行 干者, 有 之以 平其 ! 一旬九食, 申 必勿干 其用 徒 三代而 「干禄豈弟」,而 一一禄 樂易,「干禄 兵,周公之殄殷,一 競 狄、 也 之用 · 禄 · 宿, 無乎其不豈弟, 周 以 而 下爲 而 臨 黨、 利 古 後 禄 廉 辭 用之,則文王之養晦 嚴 君 加 不 思 者 禄 豈 光 子 後 失 競,而 子 弟」, 者 之所不得與也。 後 競 口 其 而 臧 無 之實 無 樂 猶 即 而已矣。 季札之節 則 而 借盛氣危 嫌 損 易, 是 有 難六 後 乎 豈 於 其 則 干 無 = 弟也 物 體 月 是 乎 禄 競 也 天 不 節 日 而 消 而

0

[「]廉臨」,原互乙,據曾本正。

[「]得而」,曾本無此二字

[「]而」下,曾本有「曹」字。「季」上,曾本有「吴」字。「鮑」上,曾本有「狐不偕」三字。

可使干 仁斯能 而 以 坊之, 競 同 愛,可 禄 首與富競德,賤與貴競道, 焉 身爲 心,唯其 富 處 可貴,可 士 競 禄 也 不 貧可賤,而不可 安土 及 焉, 斯敦仁, 而 知 道 其 德 使 敦 不 畢

失其樂易。

君子之道無他

無

競

而

已矣。

之也。 不諫 吾 顯 也 禦而自 盈天地之閒,清乎,虚 之,猶挹 諫之切也。不知德者之所驚,而 其式也。 射 也。 射 何 以 而 不顯之中有臨 無 者有章也,大者有 生者乎! 知 固 無射之餘有保焉,是 射 水於泉 不聞之密皆式焉,是故 不諫 諫 德 聞 之儀 奚其 先有 而 m 聞 形 有 清者有紀也,虚者 受風 不 入焉,是故 焉,是故 與 閒 乎,一 聞 其 以 充也。 而奚其 功 而 襟也。❷ 乎,大乎, 故 無 可 效 聞 人 不 不 哉? 有待 則夫 者 式 保 知 顯 諫 者 皇 德 無 而 而 而 哉? 莫之 一哉! 者安 顯 有 異 實 知 必 皆 諫 之 不 通 平 有 有 臨

> 以 此

然耶? 陰陽 道。 化而 微,天神化而 對於天而有力矣。

● 夫莫大匪天,而奚 之,吾於是而 或不應,後天而天或不終,吾於是 之有求於人而不能必得者也。 四方,求民之莫,唯此 孰知天之有不能必得於人者哉? 而人得以其憂相天之不及。 天欲 有待。 而 衆 人欲 發其 人者 静, 人之不能必得 冏 而 兩閒 人之識專壹, 知 必人安之,天欲 明。 不 人道。 給 之精 故天廣 賢 二國,其 氣 大哉 人 也 爲 於 天不 大而 取取 人 天者 而 政 動, 道 精 有 故曰: 先天 與聖人同 人之力精 不 多矣, 於天, 乎 窮, 必 而 ·獲。」 監 知 聖 愐 翕 以 興 天 誠 作 天 觀 夫 人 天

憂

不保而必 有射」,曾本 作「非無射 而

^{」,}曾本作「浥」,下 字

力」,曾本作「功」。

則 口 而 之者,人之 與 弗 口 安 水,水 與 至 立 土,安土 命, 悪 道 維人 立 得 也。」天 命 則 而 有 則 盡 必 道 人而 得 授 獲 天 人自 精 哉 不妄。 而 於 作 至 人 知 配。 焉 天 知 加 之道 嗚 人 天 亦 八之道 惡 呼 唯 川 得

知

X

一之道

,其參天

矣

夫

宅。」 擇之 之,自己之,吾 天,則人 於 夫《詩》奚以 而 跖 亦 人而 無 聽 ~謂 天 墨 其 莊 四 亦 人亦 也 生 爲 亦 益 聽 方, 有 墨。 惡 可無 其 舜 知天心之必 可 : 求民 信斯言 八爲治 能 「吹萬 舜 無 丽 ·無求於天乎? 求 亦 無 之莫, 以 於 ", 聽 調 聽 跖 也 不 人矣。 其 其 天之有 亦 同 有治 儒 有求 乃 爲 自 聽 而 眷 亦 舜 E. 其 天不能 聽其 侕 聽 也? 西 固 爲 而 人固 跖 無 其 顧 獲 亂,天 弗 亦 自己。」 之心 亂 爲 聽 求 此 令有 聽 無 自 其 平 維 求 無 其 也 自 ? 作 儒 於 龃 求 爲 黑 無

> 求之也 地之心 嘗不 求之者,爲天效 舜、跖之雜,治、 求,則亦奚 已之,而 以 已 吹 面 知, 耶 既 與 乎!」是 ? 自 抑必謀其 知之未嘗 已矣, 從 不遠 加 以 者 亂之界,有貞 見 則 復 (復也。 知天之有求矣。 也。 其 復行。」當 胡 无 心哉? 弗 其求之也, 祇 終 故曰:「復其 已之, 悔 其 明 儒、墨之紛 知之, 有 存 丽 焉。 天 不 即天之 又 地 見 弗 善 繼 能 無 天 能

物,亦 聖 情 下 而 其 也 也。 矣。 ? 有 人而亡實, 用 物, 我 或日 我者,德之主,性情之所持 猶 荷 苟無德,不必 之區, 則 飄 聖人無我,吾不 無 是 風 功 則 超 有 凍 效 道 然上 H क्र 巡 以 之 而 聖人 一之而 聖 物 無 相 人 以 德 加 IIII 為天 爲 用 也 知 有 道 功 天 其 固 功 地之應 效 嗚 奚以 夷 不 效 也 呼 喪 然 而 而 云 其 於 無 忘 必 之 於 天 狹 無 性

備 參天地 信 夫 志 舉無 故曰 合 有 爲之畔 志之性 而 無然畔援。」 兀 ~ 於 而 鬼 人道 9 而 我 婦 大 神 可 . 不 有 不 矣。」 援矣。 之誠 有》 爲 一廢矣。 而 渝 後 而 無然歆羨。」不 待 成位 と聖而 神 之歆羨矣。 0 不 天物之助。 뻾 此 相 用 求 化 不 積 之謂 乎其 不 非 自 爲 獨 往 中以 以 無 必 無 終始者也。 而 我言之, 來, 道爲 畛 也 中。 其 功 不 不敗。 耐 相 有 有 效 憂 以 逢 畔 道 知 天 其 孟 前 功 而 援,而 聖 其 無 子 · 地 效 不 孤 王 一人者, 原, 故聖人者,匹 明夷》而 倚 日 而 爲 欲 者 宅仁 丽 多得 也 歆 也 不敢效 不 耳 後舉 羨 求 萬 目 而 故 壹 唯 之也 安, 與之 物 心 IE. 無 其 志 圃 法, 皆 思 其 後 可 壹 孤

兒 鼠 其 而 臂,柳生 食 帝 之則 豕 如 不 其 미 (肘, 鵲 然 以 後 識 巢其 可 知 以 順 顛,與 順 與 帝 ? 之 天 蟲 則 下 其 平 爲 肝 題

> 若也。 也。 使夫人 之 之視庶民 禽則 則帝則奚麗 物 此 予之乎? 知之能 識 故 不 綱 識 善説 知之外,是故左其 知 則者,物之則,其 紀; 有 帝 知 抑天立則於識知之外, 識 則 之有 則之 ,抑不知天奚從於帝則之外, 《詩》而 圃 則 者 察者,道之 矣,唯 授之有 天予之以 哉? 已順 順,舍 識 恒 率 知哉? 也; 矣, 生者也? 之 麗 天 識 昭 塗 知 唯 識 不 乎 識 下 知 者, 著 君 識 相違 知 以導人之弗 以 面 知之能, 我 也 知 子之識 不 蔑 禍 能 察 禽 而 忤也久矣。 而命人者 以 也。 夫 之 綱 若 已 物者 順 道 與 紀斯 知不 之 矣。 加 也 也 恒者, ? 也 立 能 有 而 庶 君 則 詭 以 順 則 抑 且 餘。 道 民 子 視 不 然 之 得 於 識 之 天 孰

[「]志」,曾本作「至」,下「志」字同

[「]求」,曾本作「必」。

[「]仁」,原脱,據曾本補

吉 也。 此 道 欲 爲伐崇言 君 迷 ", 時 m X 子 而 昭 已矣, 計 圃 大 亦 至 著 則《 其 喪 功 將 事 斯 言 也。 功」,聖人之所 集, 非以 詩 安 起 而 也。「正 順 》之言 不 天 先其 # 語 哉 昧 命至矣。 貢 於天德之達 ? 事 爾 「不識」 舍 其 雖 而無覬 心 此 証 聖 不 _, 不 不不 而 屑 者 人 帝 謀 ",當其 不 用 何 異 也 未 識 其 以 其 則 也 有 不 勝 利,明其 識 ? 哉 能 知」,爲 事 知 敗 ? 違 而 日 疑 者 無 則

宇,氣 之固 躍 躍 其 而 Ē 有相 信 給 在 Ŧ 天 有 熊 終 化 取 靈 適 不靳以 也 而 用 相 凮 之都,大 然 爲 得 而 伙 應 mi 永, 後 其 未 鹿 游 賞, 風 泰 人 有 攸 樂 鹿 違 伏。 而 H 口 之 無 適 世, 而 不憂其 流 取 能 然 王 爲人和,物 大大 mi 取 而 是 在 得 者 伏, 無 哀之警, 以 靈 也 樂 不 節 沼 魚 知 者 兩 滴 幾 於 不 有 應 暫 閒 牣 靳 兩 然 爾 以 用 > 而 閒 而 魚

> 以 奚 王 不 者 心 養 爽 德,一而已矣。 以之感人心於 墮 於 其 耳 絀 所 逢, 目 以 中 絶 和 和 物 平,貞 之 所 而 致 成 士 其 以 於 之觀 悁 斯 情 見 天 哉 矣 化

毖,持 爲 乎 是 山 公天下之心。 命 則 天 不 席 下 授 尋 欲 此 後 Ш 邱 固 説者,不謂之 尺之私 天下於子, 之乃以先之, 尊位 後其 之固, 則以利天下 天下者先固其家,視其子孫之承 陵 也, 身 ,奠磐 逆,逆 防 而 王公設險以 故 之密 非 身 用 日 石 先 以 小 外 也 其 前 以 全 「天險 j 之乃 衝 爲 外 其 加 乃 家天下 以 天下 其 子 守 以 以 不 利 不 身 也。 其 能 存 不 賴 可 效。 而 爽 以 之, 國,險之 其 升 三代 身 所欲 利天下 乎 堯、舜之 也 故 存 計 唐、 之家 謀 地 不 爲 時 虞 景 之 越 則 險

都於 哉? 浹於四 世之君子, 靈 義 亦 之興亡、生民之生死 亡,周之所以 水火者數百年。 燕翼子」, 奚爲 以以 愚甚矣! 大矣哉!.」●大云者,時 無 周 爲天下治安之效,❷則「貽 海 險之地, 四 之謂 遷 謀 而 公天下也。」之説 也。 不昭 定位,五 姓之鞏固 使 不 有 知 苟視其 昭 德 如弈者不定之碁 者 乎揭 易 誉 猶 通 以 爲之説 而 子孫 而 於千祀, 興,無德 定 日 天 也,視天下 鼎 厥 月 下之免於 長 孫 以 曰:「建 合數 保 謀, 行 易 其 而 也, 之 以 + 以 威 義

非、逆 乎? 不據 時 則 天 下亦安足紀哉? 以爲貞、將天下終無吉凶、得失、是 莫 則天之所歆,亦 順、合離之十紀, 夫至於時 變 匪 時, 而 莫 可 貞 以 時 匪 E 貞矣。 ∭ 時。 偂 變亦不足以 已 帝 矣, 非 居 鷩 時 歆, m 時 以 之變 況 胡 爲 臭亶 於 立。 貞, 而

> 足紀 以爲 桂,鼻 矣。 巴菽 《濩》之音響爰居於魯門 有, 此 見之而 又從而爲之辭 所誅,漢、晉之所崇,懷、葛之所 也, 心無 適聲矣。毛之嫱、西之施,魚見之而 説 圃 者, 鼃 者也,而 慈, 高烏 而 無 미 肥,蟫 畏 飛, 不 適 知 牡繭之熏、芻 適賢矣。 臭矣。 時 目 設 鳶不 之變, 亦惡 不飲 無 於 曰:「之十紀者非天下之固 適 心 桀 用紀之爲?」 色矣。 盡 者 而蟬 圃 唐、虞之所賞, 食 非 也。 不知變之貞,以召 其 堯 豢 以 圃 之所 即 父 飲 趨 悲鳴去之, 雲 且 母 飽 不 門 怪 是, 甘 嗚 之 潔 口 × 帶 時 呼 爲 嬴 食 而 無 潛, 秦之 者 不 首 如 鼠 耳 韶 滴 孝 鳥 子 椒 食 無 爲 味

[「]義」。曾本作「用」。

[「]之」,原脱,據曾本補。

[「]烏鳶」。曾本作「梟以」。「食首子」。曾本作「烏反哺」。

_

恒 天下 有 天 m 及 知 時 死 十 行時 之 飢 矣。 己 四 日 時 於 7者,安 之理得 有六,皆以貞紀者也。 歆 者 何 人 時 時之變三百 恐炊者之不 知 當其 成之,而 也 以 者也; 則 H 有 知 一時 胡 夗 新 矣。」貞者,天之幹, 未 餘 E 弗 矣。 況 者 而 飢 後 , 死 帝 也 於 而 不 時 疾矣。 視 耶 八 當 人 之 況 失 者 炊者 ? + 斯 平 其 歆 H 其 有 則 因 ? 既 帝 胡 素 哉? 之何 必欲 以 時 爲 四,變之時 哉 弗 故曰: ^ 者 者 易 爲 人 ? 勿 也 去其 疾 ②之時 也 時之貞也 知 時 炊 不 當 矣。 ; 「易簡 之 耶 然後 故 貞 其 知 一天之 以 先 六 四 當 而 不 未 此 + T 其 肼 其 mi 因 思 爲

其 之敦 愛行 m 也 慮 密 之於牛羊 葦 4 者 羊 護 孰 之 得 ·, 故 於 ൬ 4 日 踐 羊 君 履 子 君 之哉 解也。 子 辭 也 夫 不 人 盧 葦

> 荷 行 也 君 其 之能 之親 君 在 激 而 破 生 中之,非 子 子 己 者 仁 其 無 葦 君 庸 而 一之權, 也。 4 以 者 也, 增 子 (技, 隙生 而 先 人 親,尊賢,信 牛 羊, 既 弗 不 也 其 其下 於 中 羊 舍其 其 敦 昧 然。 郤 求人於仁 也。 所 ൬ 作 而 不 而 之恩,而 也,吾不 者 者, 聽 已矣。 一於内 憂 意 苞體枝葉之 庸 讒 鮮 病 非 如 其 溺 於 人 蠱 矣。 在 是 友, 私 内 興 而 拔 忍 愛之誠 本 前 夫 憂其 君 忮 矣。 則 祇 嬖 故《 原 本 也 而 後 果 子 而 動 坊 不 而 塞 而 慝 孰 莖 益 覻 令行 相 其 賢 其 旧 毁 **\$** 原 人 而 舒 爲 相 鴞 恥 爲 懲 心 者 賢 其 其 弗 求 之 乘 葦 之 牴 於 親 其 終 之枝 之, 者 迫 養之,其 道 於 恩 伸 4 而 薄 舒, 比 外 平 其 者 矣。 羊 葉 庸 善 而 非 則 葉, ? 所 惡 哉 而 相 控 讒 疑 讓 吾 獨 得 弗 牾 戒 以 庸 養 驫 日 m 知

怨,❶然 而 不失其羣,於是其羣也深植 有疑忮之生於其心耶? 可 以羣、羣而 而 其 怨也旁寓 口 以怨,唯三代之詩人爲 ൬ 方在 不觸 前 羣而不忘大 則 不 昧。 方 怨 夫 面 怨 古

能

,無他,君子辭焉

耳。

端「如影 端 以其靈授之有生之初 耳,性者性此焉 之用皆其體、富 物 之有生之後,閱 之不清,增之不富,人之於天,終無與焉 用其故,容光 矣,是豈善言性者哉? 之有生而不再矣,充之不廣,引之不長,澄 明之,天用也。 迥 昭明,天體也,昭物 脱 赴鐙,奪舍而栖」之説也。 根 底塵,靈· 而 耳。 歷 不 有 光獨 窮於所受,命者 萬變之知能,而豈其然 維天之體 而不吝於 不達其説者曰:「天 露」之説也,是抑 而 古之善言性者,取 而 不再者也。」是 物昭之,明 施 即 以 日 用,凡天 夫荷受 命此 新 物 而 唯 異 異 焉 已 不 丽

> 哉? 續相 則有 也。 日生也。 介爾於萬年者也。 萬年之昭明 君子萬年,介爾 故《詩》之言天,善言命也,尤善言性 有萬. 昭 年之昭 此之謂命日受,性 明。」有 萬年之生 明,則必有

作也。 疑耶? 濯志. 《大有》,「君子以 書奚 寒而已矣,火,熱而已矣。 令終,令之以 共貫,惡有不令終之疚惡乎? 則命無不休 振氣,揭日月以行中天,萬行 别哉? 善畏者 順乎不 烏,玄而已矣, 鵠,白 矣。 不 高朗也。 目 休而 - 畏於 過惡 不 順 睹焉 休,夏臺、羑里無憂也。 乎休而休, 袗衣 晝 揚善, 而 夫天下何 耳。 畏 於宵。 民之情,飲食 順天休 火麗 而已矣。 故 畏 宵之 於天 君 命 同 鼓 而 像而 琴 子之 又何 水, 與 無 順 日

■ 「大」,曾本作「夫」。

矍 也。 之而 畏? 何畏 於 男 而 揚 XI 子 女 而 凩 不終。 ',道 險 了,奚以 (之而已矣,惡,吾遏之而已矣。 天下 死 下 嗚 室,受生昭 而 宵皆晝也,不見皆於昭 迫 呼 加 已矣; 阻 加 已矣,福,極於亨利 順。 禮 容吾疑? 已矣,小人 閡 無 民 「令終有俶。」 得於此者,仁閡 而 明 之性, 蕪 之字,無往 天下 雜 (),利 高 知 明 閡 何疑,奚以 而 沈 無 也,天不 己 而 而 不 矣。 潛 纖 已矣。 而 · 得 不 曲 柔 而 休 閡 「,信 弱, 禍 已 之謂 0 能 生吾 矣。 闄 違 極 義 而

則 褿 相 御 韭 湯 神 亦 心 爲 王。 廉 不足以 劉 色遷 神受命,命 子曰 伐 者其信 -是故氣曼者其義 吾不知其何以爲君子也 存 義 「威儀 河、禮 而 其仁仆。 集 違 於形,而 以定 蕩、 形 信 鈍 命也。」形函 違 者 曾子曰「以 表裏主輔 刓,度溢 其 知 知促 促、廉伐 容汰 氣 一者其 友輔 之權 氣

> 友之義 之道 耶? 效其 也。 凶 威儀之餘 失之於旋 武 旋 安,倚以至則 此 二,久矣。❸ 踵 不 而 可 何也? 至,則 已矣。 輔之於 望 而 故曰:「爲仁繇 絶 不 攝 失其 絶 矣。 前 於 踵,無以 固 攝 也。 李 欲 威 進 心非 危。 迷 故 以 陵, 儀 攝之初心, 朋 而 二唐 朋 心,是「浚 也 攝之所 友 動於譽問 心異 相 未 友 而 得。 己 報 待攝 者 雖 攝 而 而 而 然, 能 恒 心, 迷 益 繇 恒 情 於 圃 依依 及也。 道 以 兩 無 人 而 友之所 吾莫 又奚 也 也 未得 襲,心 相 猜 乎哉?」蘇 於形模,以 忮, 故 「浚恒 之 以 深 獨 輔 能 相 則 求 而 似 朋 至 則 朋 m 友 攝 不 保 止

用

者

無

棄

人,

善

用

物

者

無

棄

物,

不得」

曾本作

「權」下,曾本有「选」字。

久」。曾本作「必」。

128

之,非 資毁 老氏 於泂 禋祀 以 弟之德流焉,父母之道也。 勞以求澂澈之流泉,於得之也 之化爲清泉,而君子之勞已久矣。 而泂酌之也。 於善之塗,而 用心之厚薄遠矣。 老氏之言,何其似《泂》之詩 人物者,權虜之術 人,不忍棄物,故 仇 術 敵之哉? 不 以 曰:「不善人,善人之資。」資失以得, 言之,謂之不善用 餴饎之必待此 則天下之不 而 以民爲子女而 譽,資敗以 何 有 不役天下以收 爲餴 於 吴王不庭,賜以几杖,漢所 潦 善 也。 興,其用天 勸者鮮矣,非 館故 乎 君子不忍棄人,故善用 用 而 ? 以爲仇敵、民惡 物。 行潦之水 人物 勤 而酌之,則 泂 勤 以 然後知彼 也 酌之, 其 也奚辭? 焉,及乎行 功 下也 不更多 功 效 爲 而 效,故豈 雖然,其 使移: 猶 又 既 勸 餴 納 心之用 乎? 挹 無 得 仇 饎 之於 天 其 敵 故 潦 注 憚 故 下 而

爲工於逃禍,而適深其禍,君子視之,祇愚以深吴怨而禍發必尅也。● 老氏之術自以

而已

矣

歌《卷 身。 呪」; 子,戒 驕,不 壽」。 情, 公之陳《無 中哉? 之二説者,各有 效也,賢遷遠矣。 則 班固 怵之以 申之以 可以 何其 逸 阿》 日 夫不觀於周公、召公之道乎? 一否 諺 [有言: 也,遊 其 爲 而 逸》也, 八禍患 生 相 則 忠,不如遷 無 死 挾 詛 司 厥 亦 望 則 議者非之,以 謗 以互競,君子奚以 馬 則 抑 泮 心 L 曰 相 而 曰「怨有 智 天子 涣焉,休亦優游焉。 違 自 不忌 如 之情 怨, 史之爲 頌功述德,忠 ൬ 時 也 否 厥 均 同 1 後 則 爲導 是 警 諸 遺 厥 之 南 叢 召公之 亦罔 直 折 諛 以 口 畝 于 也 克 厥 詛 民 之 周 其 啟 臣

「深」,曾本作「忍」。

子,以 於其 謡 思漢之餘 其 怨毒 之責 任附 導諛 濯 苛言之,藥石之愛也。 乎《大人》、《中州》之所虚祝矣。 車 佞之分,不 而二公不必協 舖 〈詩》、《書》而交不 一之多, 憂喜以 ,昌榮之 濯之所夸耀矣。 張 之情也。 、後事而 託 而 側,二叔 早服 不 之隆,先 馬之馳 ,席大定之勢,四 梧 爲 戒 可 氣 疑 動 也 桐 貮 之餘 摘毫毛之過,微文 不察 成 已盪其心 静, 於 之生, 鳳 銷 事 王 始乎《子虚》、《 廢。 乃固 黨 以 也。 召公從容樂豫 撫 以 性之彌,土宇之厚,殆 萌之大猷 摇 申 未 相 馬遷以 君子小人,厚薄忠 蕩 憂危之警 周公居尊親之位 以 皇之鳴,始乎 寧之宇,殷民 目, 友,●夫子雜列之 於其 是 裔 機遷之非 班 無 刑餘 也。 警 閒 而深中之, 上林》之所 古 何其嫌於 無已 揄 無 隴 漢 張 四 栩 大 脾睨 般 章 或 諫 一而 渦 無 承 孺 覘 諍 般

> 亂? 聰 心。 其 之訟 情 情 邪 ,貴此 詞 同 術 君子之跡孰得而借諸 不相 厚不 也。 而 狹 審 相 小小三、 其 而已矣。羣 嫌 下也。 故 非,宜夫二公之協 致, 佞 厚 五 一、忠不 與 論 或直或 而 忠 其 益 , 道 世 · 嫌 以忘 一言訟 異 薄, 無 以曲,或 愐 其 於 貴 待 以成,而 相 憂 廷 鉤 平 得 實 恤 考 而 聽 (或浮, 薄 辨 言 而 勸 遷、 與 者 者 見 淫 不 之 其 觀 固 之

候之。 觀 必 暄 善言《詩》者,言其際也。 闪 化 風 矣。 幾,報之也 相 (易))有 治亂之際,詩以占之。 迎,盛暑且 《柏 變,《 舟》者,二《南》之報 必 春 清 以 ·秋》有 而 反。 肅 風 知 寒暑之際 時 相 幾 , 極寒且 報。 知 詩 也。 反, **>** 迎 風 有 可 之 燠 際。 與 也 丽 以

「不必」,曾本無此二字。

爲 足 無紀 與成,惡 也。 下自 亂 雖 殺。 厚薄。 之報 上 勸 爲咏歎者也。 反,天下 月》者,《菁莪》之報 鵲巢》之遺民 者 萌 功 而 下者也。 益 求功 矣。 下需 也 爲 相 而 也 而 愐 衰矣。 功 《柏舟》,薄之反厚者也, 爲 - 亦惡 待 無 不可輯矣。 於武 下陳於上 於 嗚 上之諫 陳 風 益 與 呼 生,不 勸之也,必以功之。 起 從 於上 弼。 而 《六月》以 也。 不可理矣。 民用莫若情,情之得失莫若 於 而 覆 微 \wedge 亂 ^ 《民 期 也 陳 而 也。 而 卷 六月》之無 《大雅》者,下之陳 哉? 而 無 上 ൬ 諫之,道之恒 阿》之道 勞》之無 意 報 《柏舟》之無 望 武 盛 《民勞》者,《卷 必 其 矣。 ^ 以 事勸 小雅 風》者, 大 諫 諫 反, 其 臣 君 喪, L 下, 爲 而《 ×, 盛衰若 也, 下 功於殺, 也 圃 則 道之反 非 也。 舅 民 上之以 民也 - , 授之 其 文不 E 美 之相 無能 雎 311 無 於 牛 大 兩

> 乎! 之幾,無漸迤之勢,無疑似之嫌 覆 則 薄 而 乎《民勞》, 故 其 其爲亂可知已。 民 、所厚, 無 《六月》未 日 不 散 「道二,仁與 面 則 之情。 或 雖 有 無 欲弗淫 亂 不亡之勢; 兆 治一 而 不仁 蕩 其 E 亂 而 亂之際,如掌反 與《菁莪》相 而已矣。」 者,其《六月》 不得也。 觀 也 乎《柏· 生 舟 故 反, 殺 觀

綣矣。 茹 其 有二,1 而 之熒,堂廉之下爲之暗 二者迭用 之心,成乎 有甚焉者。 語 不知息,然後以亡人之國、敗人之家,疾 匪人之相接, 沸 曰:惛怓也 矣。 以 於 其 加 ,醜厲, 庭, 載不 繾 數 不 測 綣 笑 叩 其 祥之氣而 行 喧 數 ,繾綣也。 而早已爲咎之府矣。 望 、所徑。 其 隨 於 圃 惛怓 室, 知 如 數 其 耳 怒 長 矣, 俄 挾無良之心, 爲 不 爲 數喜,數 惛 夜,日没 以 必其 不祥之 之聵, 怓 其 矣,俄缱 惛 挾 氣者 月 目 吐 怓 無 牛 數 爲 致 則 良 抑

後 豚 谏 有 m 情 庸 mi 可 而 也 也 人 不 不 · 憎 舉 口 新 惛怓之, 救 肺 晴 霜 藥 附 清月 而 IMI 不 斯 繾 委 喜 澹 之, 其 綣之, 而 霪 情 不 不 晴 僞 適 亦 以 而 繾 哀 亦 不 必 綣 憂 平 無 其 難 1 惛 非 波 恢之, 知 沸 者 之 m 喧

死,而 端 授 以 人之氣哉? 一乃且 以 惛 身 怓 身死次之。」魂 心 纑 樂 而 綣之,日 與 不 然 (之流 厭 而 取 連 霾 鳴 棲 亡之主,召辱之士,甘 浪 而 呼! 於陰, 不 汩 反, 百 「人莫 魄 此 變 蕩 贵 而 其 悲 猶 不 八守,高 於 有 出 1 兩 牛

此 浮 天不 於 者 幙 而 能爲之居,杲日 也。 ,引身而 大命去之,古今敗亡之相 高 朗之士 避之,寧俟終 一旁燭 不能 其 旧哉 爲之照 表 積 如 聚 未 呼 晶 有 籲 之 不 吟 沈

爾 光 孟 舍房 厭 祖 名利 U 帷之缱 洮 之惛 IXI 而 綣 恢 人 而 而 於 移 移 唇 之於 之於 其 免 泉 洒 於 博 石 IXI E 劉 也幸

> 之而 嬰者 朗 所 出 容 鄭 如之何 而 容 此 令終。」 不 库 可 「鮮矣。 克 其 得 人 人 壯 ? 清 彼 平 幸 弗 夫 ? 勿抑 之 免 求 如 滌 鴈鳬 哉 勝 氣 蛛 故之二 以 務 醉 ? 已消 焉 絲之縈蟬 離之而 一》之詩 之喧, 此 夫 則 而 情 求 君 心 可 者 日 鸎 子 其 Ŧ. 不 死 : 翼 能 之 燕 1 而 遇 血 0 欲 之 昭 身 賊 氣 而 勇 媚 懲 明 亟 而 天下 邁 有 此 隨 相 不 物 以 之, 滓 融 也 爲 之不 勝之 古 也 將 有 高 何

其 撰 修 漸 IL 自 也 則 辭 mi 致 厭 無 而 《易》曰 萬 後 而 畛 物 無 誠 不 之 端 神 爲 可 情 而 修 氣 立 投 此 也。 充 也 解 之 天 於 立 則 地 官 日 誠 其 之 驚 月 骸 者 誠 撰 環 而 前 何 0 也 不 而 有 也 立 無 著 ? 誠 所 曼 端, 詰 以 天 生 而 修 殺 寒 地 後 不 辭 暑 有 知 因 之

^{● 「}蛛」,原誤作「珠」,據曾本改。

乎? 矣。 聞, 輯而 合,輯 判 也 不可 騰口 厭 所 位, 事 立、拂天地之位、刓萬物之幾、行其 之懌矣,民之莫矣。」 立誠之謂 而況 無 萬物之幾 (之而不相及,於是而天地之位拂也 可 而 申 觸 而 戢 於民 刓萬 説於天下,而天下之人乃 化浹,懌而 怒 則 後 地 如 뻬 無 歆 疑 而 無 戾氣之以 位乎下,孰 已矣。 戻矣。 미 乎? 數數 物之幾, 辭 後 位 無 喻 喜 也者,非必 也,位 見 所 不 鷩 志寧,天 此 圃 萬 天位 辭之輯 (厲民) 萬 鮮 而 非 民 物 者 其 物之情 後 而 無 已 爲 乎 所 之榮生,懌而 適, 屢溷之則怒。 幾 有損 Ŀ 下之界乎? 病 視 矣,民之治矣。 地萬物之不能 位 也, 無可 孰 無 矣。 而 也 於天 所 天 幾 者爲 驚 也。 見,聽 疑 拂 其 地 疑 天地之妙 而 天 所 之 下之實 厭 上 小智以 誠之弗 已矣。 後 位 地 截 之 幾 無 怒 無 違 信 辭 疆 之 逆 口 而 可 丽

> 以 呼 剖胸 之也 刮摩 置 不能 位 喻其 以 以 倒 君 體 乎? 效官 也,吾能 則 賊 贖 1 以 載 然且 、噀沫 以净 幾 ,吾能縈紆 亂 從 氣 亂, 民 僞 Ľ, 人 於是而萬物之幾刓矣。 靈 氣 乃以牿 鄙 引 刓 也, 八逞其 加 萬物 一標門 媟 爲 氣、 爲 爲形幾,氣 心 使老嫗稚子之無不 之風 吾 開 官幾,官其 爲 摇靈、 僞 之幾 ,盜夷乃以 能 闔 庭 體 往 辯 中 文 也,吾能爲 幾 來 於辭之中日, 於民 之才, 則 要領於 ()體其 煩 而不窮 其 賊。 心, 炫 離 前 興,❷國乃以亡, 而 靈 形 各 而 一字 賊 於虚 民 煩 筋 而 而 唯 載 與 促 脈 不 運 示 喻 吾 恐 拂 ൬ 亂 也,吾 也, 乎? 乎? 捭 知,士乃 能 人 心 羣言: 天 非 也 闔 之不 吾 地之 爲 而 僞 能 拱 顛 能 位 人 爲 嗚 百

- 「地」,曾本作「下」。
- 「夷」,曾本作「賊」。

道 乃 以 洵 禍 喪 、曾鞏 亦 於 酷 永 矣。 一之辭 世。 韓 興 孰 愈、 爲 而 李 此 天下 翶 者 ٠, 蔑 元 而 不不 不 稹 僞 白 實 知 居 干

言者可

弗

距

哉

宗子 其 故 其 夫之 其 謂 以 躝 謂 也 É 紁 紋 細 天 繒 mi 天 八之方 ~悄乎 耶 人之 之方蹶 虐 異 同 者,可與 知 民 日 ? 八焉。 民 消 威 焉 : 之多辟 .)情 蹶 審 此 之 1 不善立言者乍 大邦 矣。 之息 .)相 平 方 方 善立言者乍 「天之牖民,牖 《板》之詩用 立命矣。 虐 虐 需 耶 0 也 非天之過,必 不 不 彼 ? 理 乍 者, 口 口 也 大師 价 拂 也 也 可 0 知 X 而 而 而 與 之而 消 消 耶 觖 知 耶 疑 順,庸 民 逆, 樂 息 此 ? ? 其 望 威 孔 也 天, 之以 之 庸 不 盡 之 而 易」,非 求其 其 大宗 以以 嫌 相 人之情 人 己 不 知 民 八之情, 也, 息 嚮 乘, 知 威之 必 耶 平 之, 彼, 裁 爲 其 元 何 數

> 抑 往 以 可 然 以 辟 民,亦又 矣,而又奚救藥? 者 非 言。」學《詩》 思 丽 君子之屑以 有 而 而 譎 弗 後 又 審 諫 不 聽者,則 爲之信, 馬,謬 可 得, 而 乍 秀其 刺 立言之術 雖 用 不 獨 而 子曰: 蒙 其 口者也 미 斯 順 畏 救 且 情 詞 焉 藥 愎 而 止矣。 「不學《詩 勸 者 爲 然 能 白 與 之 則 勿 1 疑 而 辟 過 聽 諷 此 既 者 平 輾 以 ? 無 不 轉 非

天之 之也 然之 者 天者,今尚 之天者,今之爲人之天也。 出 明 乎 虚,淪然之 游游 天,天謂 雖 、所有者,人之天也。 然,果 爲 衍 天 而 之往 H 之天也。 一,穹然之大, 及 之,昊 有異 者,人謂之來。 乎 天之旦。 哉? 出 他日之爲人之 晶 王 人不 而 然之清 昔之爲 及之, 人乎 得 而 則 天 用 皛

^{■「}情」,曾本作「悖」。

遠。 矣。 而欲 惡在 理,迎其幾, 之言事天也 昊天果相捍 世,●其始 曰:「氣 報之,氣不足以 全而生之,全而歸之,日 者乎 吾身之固 不敢 廖父之 而 其弗有事於 又欲 以成形, 日 無不足,其 吾事 有 於其域, 觀 足 有天也, ,寧小其 瘍 其 事焉,是握拳以 爲 固有之天 通,敬其 也, 理寓 昊天 之捍,形 兩 後 知其 心,勿張其 不 弗 其 乎? 無 亦 日 相 可 介, 妄乎 中 日益,不懼 而 不 而 得 增。」 已足也, 而 新之,念念而 足以爲之域 不 則 而 擊 1 爲主 見天 念。 達乎此 一然後 固 空, 故 不 以 地 其 知 不 君 灸 其 相 之 其 敢 手 者 日 子 逮 與 終

乎? 斯。」天也,非徒 也」,猶言 天 曰:天固不 生 「誠者,天之道也」。 烝 民, 人也。 可 其 諶 命 也。 匪 「誠之者,人之 諶 故 پ 日 道則 人 一天 弗 然 諶 難 IIII 道 謀 之

> 粗良楛 畏其 也。 可必 mi 可 而 天命,而 無 奚悖耶? 室,支其 君子修之吉,修非 天不恃克終以 終之,則天無 修矣。 考之, 爲 諶 不 也。 變 義 而 東西南北,縱横上下, 可 諶 也 爲 乎 諶 則 剛 傾,飭其腐,更其 ,畏 ? 小人悖之凶,非 然則言天之無 也 然則 其 柔 見其 乎? 明 不 命 匪 其 人 爲德,則是 小人亦游於天命之中 谌,遂以陷而不復,從其 晦 可 以 通 悖 無 谌 無 辨 命 也。 焉 其 不 以 爾。 圃 所用 因 可 而 爲 斷 命 一之謂 固 諶 不谌者,猶 材木, 禮 以 而 故 無 天固不可 之,而 有 盡 而 爲 愛 曰「畏天命 非天 適 其 棄 辨 也。 義 圃 不 而 其 可 而 既 爲仁, 小小 非天, 可 斷 故之謂 諶 後 百 言 有 終矣。 諶 年之 미 謂 人之 而 以 不能 也。 終 爲 諶 愛 用 又 之

「爲」,曾本無此字。

乎天, 之實 乎? 停也 命,人 强 舉 禮 天 愛 成 死 相 之於命無乎 一止,一言一 一受如 則 介命 缥 斷 富 平 德 平 **浴**掊克, 悖 者 也 有人之道矣。 辨 信 有 則 從 祇受之牖 命之日 也 百 覺 偂 呼吸之相 然 其 有 命 之 怙之以 純 初則 寇攘 後 日 則 以 其 不 禽 乎 所 動,昨 君 新 新之命矣。 並 大 覺 谌 獸終其 流 沿皆善 號 子 不盈 不諶 其 同 心之有 mi 致 終 哉 應 呼 無 而 不爲今, 禽獸 爲 則 也。 ? 而 乎 也,命之以 也。 而 協 争以 蜩 實矣,舉 智, 不 其 不 而 故 亦 於 螗 終其 ·善矣,舉 · 息。 初。 党克 覺 不 有人之道, 諶 悖 用 鼎 一義 而後 食 諶 天 也。 天 沸 可 (身以 禮 俄頃之化 息 乎 命者 而 諶 仁 智 然 之 人與 胡 統 命 飲,一作 此 其 自 義 而 後 參 也 用 百 一而 也,始 極 悖 無 不 天之 爲 互 其 其 不 禮 君 而 彼 功 也 子 以 不 諆 畏 非 智 智 唯 初 百

> 終者 皆 不可 不 誠 與 廢 之, 也。 而 終之以 嗚 後知天之無 呼 1 人 而 知 不 不 不 ·諶之 怙 誠 天之初 忧 以 諶 者 無 知

得乎 先饋 嶽嶽 所至 德容 愚 然後君子之臨 子之言「抑 老氏之言此,欲芟夷 mi 非 已 ? 一,德必 然。 貌 其 成 廣德若 成 乎 哲 若愚」, 何 「良賈 乎 傷 斯其 下 亦 充 抑 乎? 愚 比之傷 愚 也也 焉, 不足」,若 深 小 所 而 人之哲 愚 藏若 人 爲 隅 賈 「爲妻食豕 則 而 矣。 井井然,小人之視君子 抑 之 天 日 廉 已 虚」,賈而 抑 所 焉 下 隅 矣。 不足 維 者 耳。 不 食於逆旅 以 而 德之隅 至,德 ,修不流 司 哲。 欲 如 也 故 於 哲 以 食 已矣。 Ш 愚也 之, 必 廣 人」, 0 哲 伏 而 之度 絶 其 人 古 隅 地 五 之 之 君 盛 漿 愚 何 下

曾本有

隱矣。 德之卦 日 謙, 陵夷 與 積 磊 以芟其隅之象 硐 以 險 語 窞 乎 於 吉,多得之矣, 厚 貌之中 也,而 謙 Ш 一之爲 其 貞 非 則 Ш

未

也

也乎? 矣。 之, 進 以 思 進,身有餘 其 如 則 野之聞 慟 不 而 雖 自 進 理 哭也,王孝伯之 履迷亂 夫無可 欲 見 用 遂 天 魏 而 有爲 下 無 天下,如用其身焉耳,退而 謂之不愚 清歌唤柰何也, 難 智窮 雖 忌之飲 焉 也 欲 淪 如 則智不窮於退。 矣,恢 於天下矣,履 自 於窮塗,而 胥之世 何 天下不 謂 也, 酒 而姑遣之,則 其 痛 恢 近 而 智之給 一,抑 飲 平 内 見 抑 其 讀《 也 旁出 無 將 難,則 不 阮 迷 有 可 離 以 得 也 亂 餘 夫數子者,皆 於歌 如 豊 是 騒 矣。 嗣 丽 淪胥之世, 也 智 业也 宗之 非 何 而 不 理其身, 不 哭醉 智 便 而 免 夫智者 得 窮 姑 便 之 於 桓 驅 於 平 吟 然 窮 咎 遣 子 車

> 以 惟衛武公之獨爲 維 不 塗 福 然,衛武公之得爲 者,哲人之量 照,是豈 骸,氣體 艦、弗翽 可得而麕之麚之也。 然用之,「哲人之愚」,洵 亂之也 ൬ 疾」,其疾 知 窮 已矣。 反 而 也, 不 劌 非 語 逞,一往之意 也。 默之 天 是 彼數子 也 也。 地 以 誰 天下 無窮者, 日月之藏乎? 窮 與 君子, 故 君 者,全軀保妻子之心 也。 瘳之哉? 悲其 子, 處 鳳可衰,不可 迷 折 哉其 雷 而 夫 唯 窮 亂 而 雨 反 令終報 不 丽 (愚矣。 淪胥之天 木 滿 而 期 麟 於反, 麟 盈,容光 뻬 有 乎 鳳 可 焉。 使弗 耳 令終之 裕。 以 亦 目 唯 雕 其 不 必 雖 職 懵 官

雖僻 志於 名 法 者也。 ,操行 時 得志 而 謀 於 雖 其 時 管、商之察,莊 矯,未有通 身,則 而 謀 天 好 下, 莊 而尚 則 列 列 清 好 之放 管、 狂 志 窮 雖 商。 詖 自 而 智 哲 尚 失

以 曠 猶 謀 能 然念四國之訓 世,上不獲君,下不獲民,志勿爲之茶,皇 身而前後互移,故管、商、莊、列,道歧 泉之下,我知其必 我知 也。 智不 也 m 而 小人喻於利」,此之謂 動 唯 也。 ,習於光大,而 此 唯 而 如 天 其 其 恐 恐 然則推 奚 聵 逾 下 然後 (必管 於 心,而成其大業,退 其 能 者之雷霆,瞽者之泰、華,謂 其 Ħ. 者何 莊 哲之矣。 不 不 1 八商 、列、管、商之兩 遠, 訏 ൬ 故 日 也? 乎? 移嵇 矣 舉 曰「哲人之愚」,愚人之哲 而 而 銖 一莊、列 六 兩 不 不 時以 推 康、阮籍於兵農之地 隆 趨 寓 憂 憂 之計、穴罅之智 然 而 也。 所 以 其 其 移張湯、劉晏於林 推之, 矣。 謀 便 任之, 深 大 不見有 孰 也 端, 四 王 而 而 國 有當迷亂 便 過 勢以移之, 逢 不 一之順 介甫之一 斯 此 生之樂 目 忌 容 之 利 ൬ 不足 昭 乎? 乎? T 而 不 也 往 心 之 1 趨 馬

> 取其盎 也 不及,無 之智,放達之識 近進 不見天下之利 ,奚有定哉? 適於守, 舍其 如 盎 也。 盎 缶 故 取 而 已矣。 其 君 缶 子之視 舍其缶 知之所 察 察

焉。 車,修 節,是樂 猶之長,命之豫,告之以時,所 遇, 牴牾之説不足以 而 膺 倉卒之辭不足以 知不及,量不遠,條理 也 生其欣賞哉? 豆區之計不足以舒 生死成敗之大,皆其適也。 君子之知樂此,無 塗平易,而 訂 謨 定 賦《 而 《詩》可 已矣。 命,遠猶 愜聽 以 小 王 見 良、造父持 利 人不知樂 ,尋丈之圖 不熟嘗,亦惡能 辰 志 幾,久矣。 不 告」,謝安之所服 安 安 理 也足以當之。 馬。 此 其 芥 謂 不足以 謨之大 屐 穗 良 無 疾 馬 履 徐 而 不 相 神 之 踙 之 車型 通 觸

寓」 曾本作「宇」。 細

之表 其 作」「蠻方」,不遐遺 淝 閒 於遠, 唯 水之 也。 矣。 安 功,孰 平 天下以 四 1 海 萬 相賞 云 是 年,興亡得 幸 而 介而不 勝 也。 望安, 哉? 相 得 違,得之於心迹 安以是而 喪, 衛武公之心者, 衿佩之下,「戎 而 如 指掌之 任 玄

震,張 以 寸心 乎 可 者 見,營其 各 而一心; 一心; 以堂 之繼 1 伸 無 他, 藏 其 得而一心,失 千里之可 以 難而 皇治也, 説 而 也,白刃 小 壯 斂 生 罔 則 則 以 而 人,人以之繼 念 泰 致 沫 一心。 心,易而一心,言而一心,行 無形之可 公岱 以 之 厥 盡 其 而一心; 跬步 可 紹 丽 不 圖 舒 以 覿 度, 辭 而 뻾 臻 ,畏以 清 不 規其 以 已矣。 窮 而 晏 也,千祀之可 心。 否 有形接 小小 承 成性,故曰 丽 持 大 也, 推 一心,泰 則眉 人 則 大 移十反, 牀第 之爲 聞 也 哉, 聲 睫 之 天 以 不 紹 爾 丽 而

> 於迷 於屋 於戎 之口 哉? 幽 亦悲 耄之知,小子之戒,險 謨無大也,於 則惡亦損矣。 惡,藉其 承之羞,其 垂老 繼之者善也。」 也 作 亂 ,於手攜 漏 未 乎 丽 鳴 乾,貂 無 蠻 無逆也。 奬 呼! 有 方無 静 天書,蘇 固 、羞者即昔之所羞爲羞也,●而 故曰 也,於不 夙 悪 面 夫君子於洒 狗 揚 危也,於 命 夜 也,惡之所 之續 : 匪 雄 無 無 君子有 軾 繼 投 日之始, 明 短 ·虞無 相 弗善、曷紹 窮 閣 而易, 也,於 也 庶 比 遷 於於 固 謝 動 民 埽 行 而 恒 善, 阻 百 朏 先 也,於神 小子無 遠 依 無 脯 德 年之終, 扁 丽 E 猶 14 小 不失其固 小 之可 不 教 舟, 簡 無 也,於訂 無 人 守 順 安 長 格無 獨 無 而 王 弗 雌 也, 也 也 既 固 不 或 黄 日 念 m

[「]通」,曾本作「適」。

^{■ 「}爲羞」,曾本作「爲者」。

不覺 也。 暗 剛 明 畏 者 有 以 以 而 mi 遠 力,故曰 質 相 不 力乍聚則 屋 不 爲 而 畏 勝 畏 者 漏 己 涵)篤 明。 畏 暗 之 | 未可 0 豈 者矣, 警 也 明 是故 時 有 之二者得失各成, 也。 而 而 其 過 他 以 有 作 屋漏之警,警夫不 不 哉 m 驚夫畏暗者 畏 且 聖 畏 ? 衰, 一之極 暗。 夫 暗 念 意有注則當 人之情質,有 而 厥 柔 不 功 紹 以 畏 平 而 抑抑 文 明 己 而 个者, 、者矣。 矣。 矣。 畏 俾之 非 未 前 台 暗 定 畏 而 口

此,而 也。 繒 射 俎 不 有 不 貊 者 知 繡 矣。 之 淺 有 爾 有 顯 味 有 也 側 身馳 爾室乎? 者,莫此 隱 爾 室 遂謂 近 心者視之,爾室隱矣。 故 色焉。 大音 有 室 乎? 前 於 日 乎? 戎 無 繒 有 焉 四 相 室 他 谏 甚 海,言滿 希 也? 今猶 在 也。 豈 日 之 聲 威 則 爾 猶 以 所 焉 加 室」, 日趨於著 是身也。 若夫微 是 爾 殺 不 四 於天 身 大烹有 之方 人之中 海 口 非 也。 以 ൬ 退 下 而 在 睹 肝 乃 視 後 而 當 繒 淡 有 彼 前 膽 平 行 見 獨 聞 此 味 禮 鉅 之 而 有 此 乎 加 居 聽 時 焉 焉 不 其 者 此 且 藏 於 之 聞 也 尊 在 謂 盛 勇 不 者 钀 食 絲 而

一畏

暗而不

畏

明

七字。

哉

? 者

故

日

不不

可

度

也。

是

以

知

學者,

學

0 0

미

射者

而

已

矣。

盡

終身之時

而

無

口

幾

人之見

之

者

然

爾

神

岢

於

此

而

继

不幾

,是故隨警焉

加

見其

幾

也。

警

而

見

其

不

可

射

而

已矣。

神

唯

恒

故

幾

也

恒

無

往

丽

之格

矣,不可度矣」,以

爲

偏

警

於屋漏

順

茶

馬

於

奥 突,

而

蕩

然

無

忌

於堂皇矣。

神

度之

於

屋

漏

而

遇之乎?

故

知

學者

知

其

⁰ 畏明 是 各 而 非定 」成」, 故」至 而 有以相勝 曾本作 警夫」,曾本作 」,曾本無此

⁰ 而 以驚夫畏暗者」,曾本作 「而徒警夫不畏 暗

天下 於喧 不如 重 仁,藏諸用。」互 乎 尋 密 聽 是 容 其 樂刑政,奚而 裹,喪之於 不 怯, 恩施 固 跡 矣。 <u>1</u> 1 神 不 不 於 而 可度矣。 之境 治 不 闐 也 知 焉 可 而 不 故學道者, 射者而 顯 聞 藏 苾 求 索 暴,是不 萬 非 哉 芬之中, È 無 者 而 雖 既 邦而心氣有其和戾。 體 表,皆神至 一羊之 然, 得之於表,喪 無 聲 也。 有形 非其屋漏哉? 物 可 無臭之精 已矣。 藏 猶易 知暴 故君子之言《詩》, 而 射 學其 暴者之有藏, 術 其宅, 而神遂亡矣。 不 斯 故 也 者也。 遺 也 暴 扣 也 不 而 而 璞 我 與 可 體 於聲臭之未有, 神 治 之於裏,得之於 隱 而 射 無 藏一 不至者 易》 己 暴 故 藏之且 顯 取 聲 丽 伸, 視 不 知道者,知 無 也。 日 和 無 至 神之格 已 閒 而 如 璧之 也。 矣。 此 由 臭 而 治藏, 暴,不 不 不 貴 之 治 顯 而 伸 見, 藏 媿 道 載 後 者 禮 偏 諸 盡 既

> 易簡 于屋漏, 而 久大矣 又加進 焉, 迨於不 可 射 而後至矣,

位矣。 争, 臣 也 乎 於荒筌, 之人於我 則有宗 而 與用晦, 而 珍其 非 民,神於我 於不可治之世,議處己之道,姑用 任其自 一不 忍聽之也。 、獨。 抑 情之無端, 古之諸 廟,有宗廟 勝 世胄 無 而 》之詩日 然,此《齊物》之術 而 忍於不 生 雖 血塗 而 之子孫 死。 侯 然, 賱 非 一一民 於野。 是其 廢,家 治人之心 無 則 既 抱 後 术 存 夷 有 其 世 是, 各有 乎其 求明之心 於阜隸、祇 族 之 屋 於 孤 姓,有 清 我 卿 非 加 心。 一, 而 時 以以 也。 於 士 而全毁, 其非,不 社 也 族 抑 後 與 非 弗 姓 存 以 祖 狂 有 可 加 不 獲已, 斤斤 離 此 愚 舉 則 社 乎 後 求 言 禰 者 其 阚 而 餒 國 有 稷 人 可 明

0 「未有」,曾本作「末乃」。

三六

争 生之膏 以 曰「民各有心」, 吹萬不同 患求者 其 道易屈 日之明 蘭, 非 而 7,弗忍 重 原 悪其 夫 之清 晦 人 唯 丽 之所 於所 (自已」,天地之妙不 衝 醒 安 武 楚 敢 於 疏 而 學 忍, 老 後 丽 也 欲 忍於所 可 又 以 也 奚 其 口 情 漁 親 父欲 미 哉 借 以 壟 故

聚以 滿 所 聚 吸 而 而 者,呼吸者也。 故 摇 而 俟 損 於 前 낈 山下有風」 荒 之於 其復生,則未 者 大聚,奚 大於隧。 入,則外之盈 兩 是以 八人滿 空 閒 矣。 之氣 众彼,則 但 而 「有 夫揭竿而 一爲 聚 呼以 常 餒 不均哉? 此 者 「蠱」,腐空之所 均, 一,枵 空大谷 生方生之頃,有腐空焉, 者 不足。 有餘; 出,則内之盈 損 虚 均 矣。 天下響應,貪 而 故 」,此之謂 怨,得 所聚者盈 不足,不均 無 有 風 1餘,不 不 聚 盈 強 方 而 者損 牛 也。 也。 也 大,尤 溢 均 人敗 之 也 也。 空 而 風

凡

其所以赫者,皆即

君子之所

陰

也。

爲君

者張之,施及於小人,逆用之而

猶

足

以

赫

爲之功,不乞之貸,死者生之,悴者榮之,弛

君子有不言之訓,不

陳

之陰女,反予來

赫」,听然受之而

己。

子者,奚弗以

自

信,

而

抑

又

何

責

(焉?

既

甫之威,姚崇、宋璟之所飭 粟 門之繡,紅女之絲 下 雖 類 搏、魏野之所感也。 也 而 欲 聚 弭之,其 斂 無 君 公孫弘之安,汲 以 子,則 均物之理 敗 國, 將 能 小 而 乎? 也。 人亦奚以 一,所以 或 爲之腐, 黯 怒馬之秣,力農之 故平天下者,均 敘天之氣 之所 也 濟 鎮也。 蠱 种放之名 其 悪? 乃 也 生 李 林 天

作 酬 非 ,述先王之旨用以 酢 弗能爲之也, 神 穆 E 以 無不 降 無《 足 因 也。 周、 雅 諷 × 召之作被之於 厲 刺 昭王 王之 ,反正者之變,弗 以 世 降 而 無 變《 絃管 頌》, 雅

人之聽 知慙 世乎 臠 理 曰: 末王而尸 文、武之豐 足與 恩已微,其威 齊而爲之城,徐儼然稱 之澤永矣。 制 焉。」夷、 上 敢 王之《雅》乎 也 m 與正者伉也。 雖 1 述,弗 不 龎 而 雖 有 敢 擇 , 煩 言之無 有其 暴 王風之淩遲 厲 以 其精 制作之功,何其不 立功相 而不 君 周之凌 以 敢 被 侈相,天 己 上, 位 諸 一沓如 以 慙,是故 飾 崇舅之封 伉, 層, 絃 其 卿 苟 君 中 大夫 遲而 管 鉅 功 然且 無 扣 子 宣 一而《黍 也。 面 德 下 土鼓 王之 遵 其 心 其 王 不 東,其肇於宣王之 稱言於私 與 猶 飾 、德,不 疑 震 其 稱 ௱ 過 經 先 離》,其肇於 以 以 者 禮 爲 丽 引 豐 知 征之不下,其 則 甥之嫁,娶於 王 東茅 寡 其 王 矜之,以 規 也 慙 敢 小 擬 過,文、 如 一亦末 辭 曼, 之, 也 人遵 作 其流 圃 饛 也 枝。」禮 其 不 簋 善 宜 不 與 孟 大 宣 其 樂 故 聞 不

> 《板》、《 月》也; 鬼神, 之帥 無德 者,誦《吉日》、《車攻》之篇,如《南 出人於《大明》、《皇矣》之閒,❷誇賓 而榮,以天子戰 知其世,彼善於此 之功,吉甫之德,韓侯之受命 師 而 而後文、武之澤斬矣。 〈蕩》 以 誦《崧高》、《烝民》之篇,如《民勞》、 以 僭作,未有不蕪以游 / 姻亞 也 諸侯 而貴,以尊高 即 其 而 蔑 詞,審其 而紀其 以大愈, 績,不揆 而賢,以 故 風,核其政 ,召虎、 者也。 善誦《 山 Ш 以 客 □ × 《 正 意得 以 皇 申伯 私 圃 詩 父 動 此 寵

翰 \pm 寵 其 非 庸 舅, 人之喜,不足以亡。 何 傳 所 而 裨於宗 戕 周 之社 周 一稷者, 前 日 申 申也; 「戎有 伯之 南 良 再

「疑」,原作「慚」,據曾本改。

0

「不」,曾本作「而」。

傳

新 撫 申 X mi 之以 · 楚不有 喜之矣。 造之邦 折 人 、於楚 爲屏翼, 圃 申。 足者,申 厚 周 憑 不建 舉 而 之,盈 也 託 先 申 0 肺 王 斯 廷之士 一衆 楚 附 其 不 於 建之諸 以 窺 私 所 爲 謝 親 怙 良 弱 侯, 周 翰 植 T.

不

m

其

能

戍

唐

南

國

者

心

力

盡

於

此

乎

如

其

心

力

而

杰

以

翰

1

之則 焉,皇 舍此 之心 伸目 耶 ? 後 國 傾 浬 喜, 家 無 悲 皇 于王、 隨之,有 復 心 盡 夫 焉 寄 津 求 心 其 之而 口 庾,括汴宋 力以 (憂喜。 庸 識者所 「哆者, 人之寢焉 恐弗遂,遂 孤 ,咸若 注 情 爲 於 之 長 已 是耶 太息 月 斯 枯 興 屬 其 耐 焉, 智已 也 惡 於种、姚 所 食 得 舉 爲 槁 焉 東 不 III 晉 眉 息 L 面

其 以 私 暱 所 爲 矣。 當 厚 尊 尊 其 也 尊, 而 贵 親 鳴 緊 親 之,以 呼 其 私 親 願 天性 是 之得 必 不 之戚 將 察 2愜,而 愜 之 ``; • 其 論 以 願 則 也 歆 咸 而 者 歆 非 誠 爲 其 爲 之

> 利 憗 有。 惡 瘠 爾。 厚乎 地 授之樂 處 擇 下不以爲慙。 於利之外,以 於太公,而封於燕矣。 遺 也。 有 也。 ,人民獷 者之果聖 m 封 ? 一老,俾守我王」,習以 召公之賢、召公之功、 與之,因五 我 先王 土 或 君 周公之封於魯,太公之封 圖 哉 以 建 (悍,而 爾 一侯 也 不 ? 利 居,莫 此爲 故「皇父孔聖,作都 以 ,③又奚怪乎? ,使之牧民, 導臣, 爲 + 利 密 地 國 厚 報 濔 如 擇 之墟 而 , 親 出出 南 圃 人,未 沙磺苦 賢 臣 狄 土 親 即即 而 不 召公之 殆將: 而 賢 爲 趨 必 聞 艷 體親賢之情 其 君以 亦 寒, 然, 圖 於 稱 爲 疆 非 安之矣。 於 于 度 利 是厚 之 人 親 幽 而 人 而 向 肥 齊 之 謂 丽 者 而 逖 不 或 其 蔑 所 擇 不 H 擇 磽 下 之 非

以上, 則 咸 曾 」,曾本無此二字 本 作 必」。

利

滅。 以 接 房游 臣 氏之好不終。 僖之於季 禽 山 呼), 沈 ,所以植之不 孫 ,父以是厚其子,故蹶父爲女「相][[魚响 叔 燕之資 魚 故賢者 湎 敖 鳥、文皮堅革之淵 於貨 者 之 姬 無 智 不 也 慶令居焉。 賄 處 幾矣。 西周亡, ,不以孟光之賢期之,而 小 以 食色之中,而 之, 也 利 爲 而曲 漢高之於陳平也,不 厚, 蹶父死,而 父子 逆之祀不 藪, 君子 厚 夫 人道之異 不 婦婦 植 申、 以 紹。 以 以 攸 利 快 韓 利 於 厚 繼 鄫 魯 閨 擇 相

不 固 者必其未嘗 求於物,皆盈者之召 者 而 衰 能 「盈之徵 挾 矣。 自 爲 ^ 傳》 抑 己 未 能 曰:「衰至 也。 之能 盈 天下之大,萬有之富,直置之 坦 者 血 然靡 也。 盈 溢 而 氣 驕 ൬ 所 未盈 粗 鋭 驕。」 也。 疑 有 險 慙 所 而 何 雖 至 驕 阳 而 然, 矣, 則 言之? 不 後 知, 盈 驕 牢 其 成 執 驕 丽 面 之 多 而 也 驕 驕

> 之《書 慙者, 之,洵 賢,即· 焉。 然 乎 焉 申 慙 爲彼者未嘗自 之稱之者固不然 觚 廣 而 碩 伯、 ! 焉。 猶 不 而 而 能 矣 不能 古今遥 殫 古今遥矣, 《關 仲山 貌取 唯 獨 人之稱之者蔑 取益 屯, 心,各有 乎 崧高》、《 吉 至 雎 游 1 舉 甫 而 甫 而 》、《葛覃》,「 故故 而 則 ^ 文 矣乎 無 無 於 居也, 不 鹿 所 尋丈爲 其 日 王 實 攝 伊、吕、周、召之上, 烝 能 也。 鳴 遇 學 之明 也 1 美 届 民》,荑稗之《雅》也 衰 × 焉。 矣乎 而天下不可 於六藝者衆矣, 以 《文王》、《大明 至 我 ^ 闊 則寸晷 《文侯之命》,荑 德 穆 加 四 知吉甫之靡 而 何居 與? 而 如 牡 驕」,盈 陸 加 清 \vee 雲且 爲 攝 乎吉甫 之 風 其 吾 長。 美 揜 義 一矣乎 「好」矣 者 以 口 而 也。 和 (>),其 知 荷 不 賤 所 均 之自 四 無 稗 操 與 至 海 慙 躋 無 疑 雖 1

四

興,不 耶 ? 焉? 稷、 亦 以 非 翠 奉 契焉? 周 靳 馬 - 憂其 驕己 文章之變,古今亦 公焉? 穎, 而 不 以 韓 涸 能 潘 驕天下, 愈自以 岳 哉 吾惡 杜 且. ? 甫 可發篋以 自 乎 曹 而 爲 以 無 植 孟 坦 略可見 爲 自 然承之,暴 疑 子,孰曰 稷、契,孰 以 遺賈 而 爲 不代 矣。 周 謐 非 一,吉甫 源之 之 周 孟 日 慙 非 至 子 孰

以 往 而 弛 毁 體 矣 m 既 關 不 故弓而 戾, 施之筋漆也。 漢 來 元 體因之 、唐 張之、未遽絶 懿、 以 宋 皴 有 理 周之弓,天下之 之所以 然 也 後), 不 而 待 弛 繼 再 張 張

> 陋,此 於束 敢於 元、 弛 則 其姦,而天下之綱 者 者 下 者 至 畏死,此 於宣王之世而勸以柔也。奚以 之際, 也。 官 無 調 偂 唐懿、宋理之覆敗,差緩於胡亥, 明 民 溼 承 逃法, 吏緣於上之已 幾 者 相 此 上暴斂則民 益 厲 也, 乎 宣 相 化 有 而 姦 後,繼之以 相 王 厲 激 者也,以其有餘 已 危亡 起 矣。 化者焉,有相 荷 Ŧ 者 蹶 ,以柔道 明於上下 也。 維紊散 之勢,其 上 而張之,筋蹙漆 不奉公,上淫 民困 淫 張 則 而 承之,庶 而不復收 ·張弛 甚 於 民 下 激 數 力 而 靡, 力 益 者 正 而 之 之幾, 怨 焉,明 然耶? 均。 E 刑 與 乘 幾釋 無 解 繼之 則 上 固 矣。 閒 餘 於 而 故 以 民 相 固 則 天 不 以 然 數 其 漢 售 而 不 不 下 絶 師 下

Ļ

衰

而

驕

驕

而

衰

不

可

振。

衰

中

·於身,

中

-葉,前

有

杜,後

有

韓

而

和

平

温

厚

之旨

其身不令,衰中於國,其國

不

延。

枵然之

挾生人之氣者

,弗屑久矣。

竅

心風起

籟

鳴、怒號

而

遽止, 苟

其

八有作

心

而

吉甫

而《雅》亡,漢迄

曹

1植

而《詩》亡。

唐之

「貸」,曾本作「貨」。

而

笑。」 聵於心者,人也, 以 額,三 從而 之徒 動 也。 也。 倫。 惠 阚 嘯之朝 必亡均也。 而 再 」,惠以柔 所與治外者,申 天 之二子者,既以其 嗚呼 世 獎之,則當 虔厲之習, 不幸 疾 揖百拜,延 應之,而 一哉? 廷 呼 前 不 也。 而 以 故懲 聞 宣 故 天 此 其笑 以要 王 日 其 F 抵 犬 誦 蹶 爲 之所 尚 戎 時 Ш 擲 伯 已 張 也均。 一時 未 拱 甫 焉 解 不 丽 溺 而 溺 姝 與 怒,以 手 日「柔 爾 之 改 進之,微 於險者,天也 者 有能 媛 治 之譽, 哆頭,♂彼 轍者,必 紐 必 娬媚,❷矯 覘國 内者 誦 益 笑, 嘉 延之 成 申 幽 尹 叛 乎 者, 伯 聵 吉 嘉以 散 王 Ш 再 從 濫 \Box 者 其 笑 覘 甫 榮 甫 世 容 而 於 必 能 柔 其 此 夷 柔 媛 又 焉 者 無 坐

如多笑之子,● 下 也 何 以 故 謂之陵 陵之 而亡 與 夷? 口 原 計日 無 陵 之夷 畛者也。 待 矣。 丽 原 亂 漸 極 迤 Imi

> 颸之颺 耳。 治,非 亂 暄 風 也。 之 方治之盛,亂 一旦之治也。 於暑 方 試 亂之終,治 於 畫 、霜午, 情 治 之幾 憂 而 之 治 亂 驕 幾 動 極 已 者,莫之覺焉耳。 動 而 而 叹 者 亂 響隨之,爲 而 ,莫之覿 響隨 非一 之, 旦 爲 之 凉 焉

《雅》之畛 焉者 《詩》之情,幾也,《詩》之才,響也。 周道之不 以 夫 幾 知 與 覿 1,故曰 升降, 響 其 平 所 與? 復 不 《雅》降 則 可 振。 其 而 見, 閲 知 幾 然 覺 而《風 亂 與響, 黍 則《 其 治也早矣, 離 所 黍 》,《黍 亦 圃 不 離 非 後 及 乍 知《 喻 離 者 而 變者 者, 降 黍 因《詩 更 ^ 其 風 離 有 而 也。 哀 早 唯

是

何

知

之晚

也

風

>

與

雅

其

相

爲

畛

姝媛斌 媛」,曾本作 媚」,曾本作

如多」。曾本作「多嬉

29

大 矣 險 而 Щ 響 ^ 孤 黍 離 ^ 膽 非 其 畛 而 也 降 幾 菀 危 柳 mi 響 而 促 下

心 印》之詩日 取 幾 成乎《風》以 動 而 置之《黍 於 氣, 離 淒 「心之憂矣,寧自今矣。」生於 離》之閒 乎《 清 拘 雅》,迤 急,先 八未有 此 以 辨 漸 耐 夷 若告之,早 也 而 故 無 膽

哉? 望之,不可 旦之區分。 而 不褊 節 南 速矣。 ·立乎《菀柳》、《瞻印》之世,泝 Ш 《黍離》之爲《黍 雖 雖然,更 激 丽 不隘 有早於《菀柳》、 **爺**≫, 板 寧 蕩》 自 而 雖 今

響愈幽 膽 卬》者,密 非非 夔、曠之識 而 察 之, 誰 漸 從 迤之勢,幾 Щi 審之哉 愈微

訟者 摇 以 事 了,小人之以陷君 治 君子 訟 亂 世之諫 行 世之諫,切 木 風 諱 切切 俗 壞,陰 丽 加 天 而 以 子者也。 以 下之死 道 私 訟 3 貨 衰世之諫,切 賄 公議 亡 小人以 券 積 繁,民 契 矣。 此 証 吹 佐 1/2 而

> 快其 之禍 惡者 之存 其訐 道 是 矣。 凋 也 彼宜有罪,女覆説之。」斯言 有 子弗 求 之至於斯 可,胡 兼 於 也 故 民 (君子, 毋 孤 直 其 訟 不息 ^ 人,女覆奪之,此 獲 爲 恥 瞻 亦 一暢,大 幾 者 己 微,非 行其 其 郭 印 姑 哉 報 。 引 而 君 出 ? 》之君子, ? 小 勿 不 (志, 嫌 子 雅之士 於 人, 堪 自 一晨一夕之故 其上無禮,其下 人 引 而 君 光明 於不 失, 君 嫌 子 則君子之體裂 有 子 而 悼 之口 耐 耐 宜 土 勝,無 之 未 不 其 遠 不 無 田 體 勝。 足 遷 疚 也 罪 腦 猶 女反 ? 也,訐訟 流 所 語 則 "女反 俗 矣。 不 未 引 無學,忠 於自 孰 於 婞 成 勝 裂 有 嫌 仪收之; ***** 関 婞 己 敗 뻾 也 則 之 求 之言 君 平 聽 之 人 而 亂 君 之 民 道 之 厚 以 疾 子

詩 廣 傳 卷 四 绞

以

承

加

後

仁義

禮智

無

不

承 焉

斯

則

如

者曰:「照之以天。」則抑

不知天也。

不言

明王夫之譔 嘉愷録

曰 : 「如天之無 延 陵 季 子 之何 不覆也,如 所 覿 地之無 耶? 而 不載 謂 ^ 也。」 韶

若以

顯

而

逐

微也,以理

函

事,不若以

事

而

函理

也。

用俄頃之性

情,而·

古今宙合,

四

敬無

靈承,而函德之量備矣。故以微函顯,不

所申警,壹人之志,平人之氣,納之於

音函

也。

《清廟》之詩,盛德無所揚挧

至

越,一唱三歎,有遺音焉。」非其澹也,爲八

天之覆、如地之載也。「清

廟之瑟,朱

絃

疏

周

頌

者 故子曰: 義未足以發人之廉也,言禮未足以發人之 利貞也,人之德,仁義禮智也,可知而可言 也 雖然,言仁未足以發人之愛也,言 「知德者鮮矣。」今夫天之德,元亨

哉!

張子之言天,曰清也,虚也,一也,大

時百物,賅而存焉

,非擬諸

天,其何以俟之

也,知此乃可與知《清廟

》矣。

雖

聖人爲有所以爲聖,則聖人之德私矣。 然,以天爲有所以爲天,則天之體孤矣,以 天有所以爲天,文王有所以爲文。

挧」,曾本作「詡」。 下「挧」字同。

詩廣傳卷五 周

不言之言者,可以言言」,謂其函之也。

妄

足以

發也,發之而

無

以函之也。

故曰「知

敬也、言智未足以發人之辨也。

非言之不

四三

學不 聖者 不 主。 操矣。 紀矣。 F 也 子 不 彙之 而 而 無 mi 頓 自 Ė 得 凯 天 孰 唱 之聖; 世 以 皆 奚 勝 厭 凡 時 爲 mi 非 生 無 四四 天者 簡 其 有 不 無 又進 **\$** 和 之 而 丽 而 派所不 何 得 所 所 共 唱 時 荒 有滅裂之聖; 後 圃 或 教 無 1,皆其 以 主 而先 意 而二實乎,二實之化不 以 於 和 異 行焉,百 不 Ŧi. 和 E 輔 爲 一之謂 故故 爲聖也。 乎? 端端 顯 倦 殊 要也 非 後 天,聖奚 焉 所 中 而 乎, 唱, 也。 日 焉 ? 以 息 之。 ,故曰「不 物生焉。」 而 一,有二則非 純地。 無 五 肩 爲 īfii 學、教 百 不 或曰密也,而 孰 殊之 天 臣 有 有 於 靈 或 爲之 知 也。 妾 挾 微 所 之 F 變 德 皆 而 術 以 動 機 一己」也 純 者惰 子 時 臣 荒 聖 不 不 爲 之聖;或 也 亦 日 物皆 一里哉 妾 惰 得 可 11 口 何 不 一也 : 有 愐 之 於 爲 乎 以 以 樞 ė 覆 勤 我 有 天 ? 凡 君 象 數 椳

> 不可 有 匿 所 之 聖。 得 以 而 爲 學,天乃絶於人之心 聖, 必 爲 而後 之言 미 日 文其 天 荒 有 惰 所 矣。 之 以 實 爲 天 聖 乃 聖

奚況 揚之 耳。 則一 鯀 周 弗 親 之性也。 忍, 況孝子之享其親乎? 著者,有 祭之義 乎? 矣 事 忍 公之事文王 崇 祈報之私 「天地 之矣,故曰 崇德、 而 之而 而 懼 也 也 儉 孝子之享其 事 古蠲之精意,神之著也。 已。 其 於於 之大 報 則 於己之性。 湯 舉是三心,致之社 言,弗忍 功、祈福,三者祭之秩 舍 哉? 壹 乎心 故《 德 弗忍也已。 此 以 周 日 而 然 人子之於 生, 親, 頌》 舜之事瞽瞍、 以 有 後 以 德 不 知 至矣,文、武之德 崇, 誠 舍此 故 陰 德, 其 況 至 陽之良 而 親 孝子 稷 親 以 弗 而 崇 而 而 祈 山 忍替 無 無 其 有 禹 享之焉 之享其 用神之 Ш 能, 先 擇 餘 他 以 也 之事 而 也 也 報 挧 弗 非

傳性者也。 以與於周公之享其先也。 命之委緒,吉凶 命者也。 廟 有 無 反其所自 、國宮》之祈昌熾、《 文王之典」,庶幾其 傳心 傳性焉 感也,無 者也。 傳之以命而心性絀矣。 生、《維清》之所以 有 求 《清 傳 也,傅之而已矣。 命焉。 《文王》、《大明》之播於廷, 者命之棲 廟》、《維清》之承於祀,傳 長 《閔予小子》之警於 八發》之 成 而 道,迎 已矣。 稱 益 聖敬,不 有傳心焉, 精 簡 道義 故以 合漠 也。 足 者 知 知 以

食飲 及者 憤盈 之謂也。 也 祈乎足,勿辭其 放日 於斯 焉 加 言之不足,故長言之。君子之於言, 終 有孤 而 不 雖然,有發不及赴者焉,有含 修 不 得 至而 解 假特舉者焉。 抒者 V. 長 其 不知其餘 也, 馬,0 誠。」誠 幾乎足,非 有廣 者,足 者焉,有 凡此者,皆終 大 而 樂 而 無 其 寢 可 無 殫 興 之 長 虚

> 古而 逆 心 乎 矣, 也? 文考之情,而 辭者,不可於《維清》而學之 之,而資大樂之聲,昭宣其 而 櫽括歆動之情,約 窮,以詠 長言爲足 與 有所 酬 ! 無以 1 無足之心也,奚況 酢 其仁人之享帝,孝子之享親乎! 維清》者,待樂 失也, 乎 將其 歌爲足 而長言窮,以 待 愛敬矣。 則《維 言 靳於一足,則是孝子事 而 而 略目 詠 喻 清 歌 之 而 無 前 窮。 是 終古 嗟 成 庶 已,終不以言宣 E 灶 之事,惟恐其濫 歎 章者 也。 事 無 滯,猶愈於言 爲 加 矣, 苟足矣, 已而言之, 有足之言 足 非周 也 而 不 親之 公見 故 嗟 亦 修 歎 窮 以

於旅也語,故《烈文》而可以語矣。無

- ●「憤」,曾本作「已」。
- ❷ 「酬酢」。曾本作「鑿鑿」。「庶事矣」,曾本無此三字。

四六

禮。」 言者 謂 以 鬼 明 人,不 家 是 事 邦,人神之通 也 可 πi 神 以 神者也。 事 绀 於乎 遠神 以大質 明 道古也 神 明合 則 者 於 -也 有 矣。 、體之。 幽 於是 前 禮 有言 也 以奉神而 樂, 王不 故 加 質事 l者治· **E** 合人 以 言前王之德可 忘, 大 人者 文 於 治人者也,非 盡 會 昭 昭 神 而 诵 明 也 '', 之, 文事 以 德 觀 以 幽 靳 合 興 格 其 神 人 則 所 僅 於 典. 於 於 至 有

聲,摶 莫親 王不敢 虚 際者也 〈序》爲允。 而實,天之命也,人之神也。 於祭,祭莫效於樂, 以 康一、不敢者 而 「昊天有成命」,可 興樂,樂 不可 於戲 視 mi 得 不 Ī 非頌德之詞 之象,霏微 以 可 微矣! 徹 見之色,聽 幽。 以 放知非 樂莫著於《詩 ^ 禮 蜿 詩》者, 事上帝,据云「 一莫大於天,天 蜒 而 祀成王之詩,從 命以 不 漠 幽 口 心 而 聞 明 通 Z 成

> 神, 鼓焉 驗之, 乎 樂 以 敢 斯 神 神 能 不棲鬼,此《詩》 mi 可見之色,如絺 ? ·; 物 知 盈 事 康」者圖之,用 以 不 而 个之! 上帝 叛, 非 心 物皆情 加 知化 效之於 非 執不 :進 凄, ^ 物。 幽 詩》 也。 滅。 故《 以 其 可執 禮 幽 教 妙 明 禮節 詩 來者不 繡馬 迹也。 明 皆 嗚 顯 與 而 密 × 之象, 之際, 呼 者象 者, 樂之無 理,敬皆 明 文 而 ; 1 不 斯 可度 播 召 鮮 往 其 倚 入幽 而 能 顯 如 不 矣, 者 心 器, 盡 非 也。 知 誠 瓚 可 不 以 而 藏 僅 幽 而 況 故 聞之聲, 明 斝 既「有 可期,以「 己 者 理,敬 明之際,大 不 其 夫然,績 焉。 其 矣。 日 也 慙 能 幽 圃 成 效 神 介 出 如 而 後 神 而 者 不 者 皆 不 孰 鐘 紹 非 凼 明 可

物 神 曾 本作 作一神皆

0

善,亦 道 嘏 禮樂,我雖 大 親 通 眩 微文王之典,靖四 式刑文王之典,日 信天之右也。當從鄭箋爲允,下文循此通之。「儀 維羊維牛」,充牣肥 之於親,奚其有所奉哉? 孝子之情猶 弗得迷而 之以 **過**隱矣。 也。 仍其善, 酌於其中而斟之, 升斗所興, ❷ 親 此 義者 而 天子有善,讓於天, 0 既 然則 源 欲 徴之以 操 或曰: 哉? ,或曰:敬忌而不敢自私,●尊尊 歧之於泉原 奉之也。 欲 拓 奚 響 ൬ 落也。 讓 亡欺 凡人皆天也,凡子皆親也 事 丽 數 乎 [方,而 靖 之不亂 ? 不能,然 其説伸,而 監之以 脂,無 而已矣。 四方, 夫仁 也。 弗 子 得 攘 鄕 瘯蠡之患, 一人之於天,孝子 其説伸,而 不 以 伊 又奚待推本而 後信文王之 有善,讓 焉 然, 清 嘏文王 耳 日 「我將我享, 仁人孝子之 晏, 矣。 圃 天親 視 於 <u>_</u>, 故仁 之 修 而 親 人 不 之 自 其 後 則

> 迅雷之爲震也哉 皆可執, 也,如沃霖雨,戴午 人孝子之心,如受重器,捧盈 我其夙夜,畏天之威」, 信之以 固 有, H 而 而 豈嚴霜之爲 不 不 俟 能 水 避 而 再 也 不 思也。 一,循之 凜 能 辭 而

如 榮以其仁,安以其義 作,侯氏之寧,兵戈之偃,康 之」,子孫之保也。 於祭,故「迄用有成」,周 于祀事之成,而弗敢福之也。 性,性不如命。 子曰:「祭則受福。」奚福 天之命我者,親 天物之豐,疾眚 可可 '以爲 之禎也, 萬 乎? 民,綏 福 故曰 矣。 也 既 福 ; 四海 樂不 之不 親之 未底 右享 莫大

所興 敢」,曾本作「能 而得以清晏」,曾本作「不得以靖晏」。 曾本無此二字。

曾本作「言」。

曾本作「能」。

事 可復, 子之至於命至此也。 命 我者, , 莫之致而致之, 適然得之心 於藏之不 而 心也。 復之一 顯。 日 焄 **灬蒿悽** 矣。 至於 樂莫樂於所自生,性 愴 有 命, 昭 事 明者, 於 丽 而 其 所 不 所 自 往 違, 生 不 īfii 者 君 能 不

愚 爝火,時雨 福,更皇皇其奚求 福莫福於祭之成也。 而 已矣。 方灌 而 不釋其 小哉? 舍祭之爲 日月方明 抱 甕, 或 福 日 m 以 誕 吹其 求 也 多

復其始也,◎藏之不

顯

者

不託

之

無

也

], 3 故

可與 勃 出 者 ",然以憤 乎震。」 也。 萬物 恩之不 明 天之威,非 弱弱 雷霆發, 奚 不 不可 志者 諒 有 懷而反 甫 天之蘇 平? 而 其 與 出 植 怒 百 以 見 昌 一天亦 也。 與 天 己,爲之震 成,天 將 物相 見。 以蘇之,物 雷霆者, 將 見,昭 將 無 故 無 如 疊,冥 日 蘇 怒 此 蘇 . 自 耶 物 萬 而 震 ? 何 蓬 帝 物

> 之則 諸用 矣。 憑藉 有顛 顛倒 於望 后。」昭然出 平 抑 無忌憚之言 因 ? 姑 者 不 外, 也。 循 思之即 倒天下之權 天下之權,而奚況 任 抑 也。 動 之染,不振之則不 其 亦 圃 嗚 不 乍 益 呼! 威 身以與天下相蘇,未有 故 一而不 百昌之氣,不動之 與之 能 生其 唯 測 顯 者 知 慙。「昊天其子,允 至矣! 驚 6 諸 感乎? 恩 仁也。 必若蘇洵 而終 圃 威之合者 天哉? 因 大賚之,6 新 以 萬有之情,不 乃聖人 威之即 爲 則不 者 人情隱, 可可 不 以 丽 測 · 振。 聖 固 與 以 後 則 恩, 紹 權 王 人 之 成 不 恩 積 藏 維 爲 順 天 爲 而 爲 平 溢 機

[「]託之無」,曾本作「罄之福「而」下,曾本有「樂」字。

[「]將」,曾本作「相」。

[「]驚」,曾本作「警」。

次之。 諸天下,則大仁也。 用也 以測其方春之榮矣。 形,凡耳不足以審其趨壑之響,凡心不足 胥致於在位焉,●凡目 爲 畛,而俾發其榮,則震疊之威,抑以 不在王廷,搜伏 焉,播棄之士,名不出間閈,悲歌之客,志 君, ●以侯易王, 舉無疑, ●而一旦戢戈櫜矢 聲溢乎耳而盪乎心矣。 足以載焉。 竭才,以用物之弘,愚不肖之心情才識,不 而莫之或侮。 王者之志氣,盈滿 大哉乾元,萬物資 達之。 即此以蘇天下,破其 一舉一錯,天之大衡也。 天道 譬耳之不任乎雷霆,則雷霆之 故 堙,而爲疏之。 發陋,●移心易志,一旦 日 乎天下 '始',乃統天。」仁配天, 恩威合也。 威莫威於大仁,而 故一文一武,天之大 不足以察其赴景之 繇今念之,以臣 ,馳驅 心 《易》 淡蕩,開 情才識 其舉 洋洋 仁天下 日 血 乎 之 伐 義 加 而 1/2

> 天 則 下王 不怒而 哉 ? 威 矣,奚而不足以父天母地,爲

於几 於物 者,6 諸其 揚其 其道是瞽宗之奠也。〈孝子之事其 信乎得事乎其先矣。● 聲,愾然必有聞乎其歎息之聲,然後 筵 而見之,於器而見之,於牆 功 神 神所流 **僾然必有見乎其位,肅** 乎 是 而見之,於繡繪之色而見之,於歌 方社之祀也,道 也; 神 則 實 無 有 所不浹矣。 即 故 者,神 非其 功 然必有 非 所 其 屋 所 擬 所 而見之, 先,唯求 虚 充 聞 也,擬 揚 也。 無 可 乎 也 即 其

致」,曾本作「志」。

伏」,曾本作「微」。 無疑」,曾本作「不寧之世」。 伐」,曾本作「代」。

信乎得事」。曾本作「得

即」,曾本作「節」,下「即」字同

充」,曾本作「竟」。

其 之所 方求 之,溯當日之氣 吹 其學 繇 甚於髣髴之心、詠歎之旨也。 合於漠, 妙 成, 肼 王之聲 執 考 忧 是 廟 萬 競 如其 之,胡 擊之聲 物 武 官 祀武 故 也 以 以文王之神 踐 無 建,斯 Ť 王之神, 容察矣。 mi m 誦 其 廣 志 武 王之詩, 爲 非是也。 弗 位 後 以 也, 〈清廟 言 Ŧ 前 门, 行 與 遠 即 先 見之。 立 也。」鐘 象 其 此 一於前 昌 王 其禮, 惠 言之所撰,歌 × 如 而儀之,功繇是以 以武 寫 神 以 之 以 《我 U 其量 文王之神,肅 之,而文王之聲容 求之也? 浹 矣。 鼓 開 所 盛 於彼乎,於此 奏其 將 王之神 也 載之 以 也, 如 如 故 **>** 爲 加 其尤者 (樂,無 其 其 舒 曰 噑 先 從空微 文王立 之所 猷 時 寫之,而 以 喤 王 故 也,果 也 密 以 焉 神 祀 者 一之不 興, 平,人 永, 也者 清 文 則 故 於 如 平 而 莫 Ŧ 道 溯 以 前 聲 盂 察 其 如 誦

> 載 斯 歎息之聲,即其 載 不 之無 之將 没者也。 ,聞之於斯矣,此 將 不 焉, 足 故曰:「唯孝子可 焉。 威 事 儀 見 載之簡 成其 其 所 謂 在 詩 傳 位 簡 歌 先 聞 以 反 王於萬 亦既見 其 反 享 聲 親 焉 之於 年 聞 醉 其 飽 而

五.〇

以資 從前 知 於禽獸者幾希。」無不 九 香 不 而 墊 必 也 性 州 生而 一以前, 從後 古 爲 之 相 曰 君 之 野 丽 信 無 世 不 言 化 有 黄帝、 我 而 適 光者 平。 之, 而 不 親,意 主,婦 不 言之,衣 粒 · 敢知 匪但 堯、舜 乎? 軒 不 轅 者 無 火者· 也 此 適匹 幾希矣,況食 之治,其 其 燧、 垂衣裳 鮮 食足 也 僅 矣, 農以 食 ,父子兄 熲 「人之所 毛 而 艱 光 而 猶 後 前, 血 食 之 天下治。 未 禮 之 相 察 也 弟 我 宣 義 雜矣, 氣 者 以 平 乎? 朋 不 興 異 所 ? 友 敢

「志」,曾本作「衷」。

天。」天 滯無 呼 溼 蠲潔之所凝也。 食也者,氣之充也; 性情貽矣,天下可 焉,后稷 治,后稷立之也。 之日生 理生人之神而 薌之發,是清明之所引也,柔懿之所醖 也者,性之函 食之氣静,衣之用 **〈發馬** 不淖,礦 故 所 而人之異於禽獸者, 粲然 天育之,聖粒之,凡民樂利之,不粒 日「莫 一苑,狂 成 ,后稷之所以 mi 一之也。 不紊。 性 無 也, 也。 無 匪 所 正之,然後函生人之性而中 所助,充生人之氣 文昭 故曰:「思文后稷,克配 阚 生,淫無所蕩,慘 甘不迷,苦不煩,燥 無 垂裳 故 榮秀之成,膏液之美,芬 極 乃可以文。 氣也者,神之緒也; 帝 爲文而文相天 質 __ 此 而 貽 (也,來 疆 極者,性之中 治,性情 來 牟,豐 爾 牟 界」,皆 有紀於形色 烝 率 足 無 ൬ 飽 育而 民 矣。 用 和 不 所 貽 之 陳 之, ·悍, 也。 也, 也。 矣, 激, 神 聽 彼 常 鳴 大

射生飲血之習且有開之先者,吾不忍知其不火之禽心其免矣夫! 天運替,人紀亂,

終

也

損者, 凡前 乎? 美而 之。世儒察識不逮顓 謂 成 餘 通 益者,非緣 者聖人知之,但 ,通周之變,必 知 變以心知其美,不取 ,頌聲作,天下 子曰: 王 美之,心無 其損益 非緣 聖人亦非 順天之德 前 「其或繼周者,雖百 前王之闕失,有 也。 王之溢 閟之也, 云一可 適美,又惡足以 極 有 然 利賴之無 損 則 人之情 量,已 知 孫,習《詩》、《書》之 周 立 其益, 1年言之而 而終悶 -, 之道 一仲尼 不 窮矣。 郤 蕪 者矣。 即 行之而 世 於嬴、 而 而 之,何耶 測其 與子 可 待 待 乃聖人 知 芟 補 張 項之 王業 椹 所 也。 也。 也。 如 ? 酌 損

^{● 「}不取其益」,曾本作「又知其損益」。

五

之哉 稼,而 能 俊傑,進隴首以謀其升斗,詠歌長言以歆 抑 諺,道有疑於瓠 周 仲尼、孟子小樊遲、斥許行之旨而通之,損 粒 農」,聖人之言也。 違 施、甚賤其 之言也。君子之道,窮之所守者,達之所 言之矣。 曰「堯、舜之治天下,不用於耕」,學聖人者 周頌》存者三十一篇,而農家之言四。 食具 !急喻之人,而千歲以後,訾先王之大美, 也。 禮者其 人情之大願 生人之願,大猷未 ? 孟子以 雖 而 雖 在 樊 然,聖人 口 然 流者,不獎其 斯 憂者不在此,君子之志見矣。 遲 耕爲小人之事。 三代以下, 勤 斷斷 乎! 深落,事 請 萬 學稼,子曰「吾不 嘗言之矣,學聖 然 許行爲並耕之言,孟 乘之駕, 、飾以 而 嗚呼! 有 無 疑於荒亡,聖人不 源。 **然作**,其 以前,不 言有 故孔子不學 集 亦 三有 口 孰 疑於逸 人 呕 如 事 能 者 以 之 言 得 老 7

> 從鄭箋。 亂 子曰:「 此,上下交獎以謀 之盡力,汲 重之,「嗟嗟」「噫嘻」以淫泆之? 先,民之於農 待 廉 之姑置 秦,唯不損 而 不立。」食可 羨之,將無元 極 速 不速,威之而不威,嚮之而 恥與其行誼也。 矣,而 而 也? 趨 則是臣工「噫嘻」之道,幽、厲未之 我 時,不待 觀 其 汲然以 周 去矣。 周 詩 故曰 后之爲生民主,望有大於此 事 而 道 日 也,則固 且 幽 爲 好好 食,而民之害氣以昌矣。 : 益 且 威 若夫不 「自古皆 君國子民之術無以 之也。 一、厲 夫興之 而 是稼穑,力民代食」, 恐 一然矣。 傷之。」《桑柔》之 後,不待 待 鞅之耕 興 而 有 不嚮者、民之 不 死 圃 抑 民 興,速之 生心,不 六國 從 繒 戰 而 而 無 谕 悝 强 鄭 争 者

「主」,曾本作「計」。

傷 仲之言也, 在 疑 在 食 哉哉 也, 育 也 ? 然 也。 無已,其《楚茨》乎? 丽 無 而仲尼固曰「管仲之器小」也。 道 已,其《思文》乎? 雖然,衣食足而 己已傷 矣。 後聖之所 後禮 意 道 義 在 必 在 ,興,管 祀,不 損, 陳 常常 奚

榮,無 虞、 之觀 祖,客 禮也 周 以 然且 以 也。 聲容, 如 道 綏 厝 祖 也 故曰: 唯客之歆, 昭 晉客而爲之主,適敬在客,勸 適 振鷺 則 非適敬 《有瞽》,始作樂而合乎祖,適敬在 明悽 際 綏 而不榮之也。 非 夔曰 》,爲 祖 虚 倫倉 無 致 如 人 矣,「有客 . 適 (漢,流 也。 賓, 何 客 祖 而 陟 也? 勸 繇 考來格 降,匪他 不榮也。 也。 虞賓, 虞 盪 斂四海之和, 戾 迄 充 古之王者以 《有客》,爲客歆 止,永 E,虞賓· 盈 讓之裔 周 是 斯道也,匪直 一樂,而 大 致矣。 觀 在 鳴 而歆之, 也 位 厥 其 榮客 客 一。」崇 動之 成 豫, 唐 夫 爲

> 於靈, 已矣。 賓,勝 章、詹,相大有爲之君, 其 辨 嘉 神之 揖讓 距 而 相 疑 曰:「本乎天者親 禾不 速, 類 己 同 其異,慎 而 矣。 捐,而 所歆 猶親 而 征誅之變,而 國之孽也。 氣 如 俱爲冠帶之倫,同 與燕麥同 不 手 應於幾,距 彼 可 ,❷大禮之 也 ,授焉, 其 胥 時時 亂, 夫必疑 同 於 久矣。 相 大統 隴 功 上,本乎地 其讓 視猶 ,帝王之通 閒 必閒, 之而 所 相 ,仁禽不 而 以正, 治 及 不忘,其勝不 革 繇 猶 致。 訢, 閒 如如 ,大樂之所經,一 命 斯 吅 受皇天之胙, 親 者親 創 言 恩 與 武 大 也,從其類 人之所榮, 理 制 之, 之而 妖 禮 接 義 也。 下。」形 焉,精 以 鳥 不 無能 劉、宋、 明,從 ·及者, 密, 慙 同 《易 巢, 通 合 德 相 嫌 而

- 「榮」,曾本作「從」。
- 「散」,曾本作「欽」。

喇之侯 通 行 君者,兹焉永鑒哉! 典 封 求 不 趙 亦 Æ 諄 之 與 後 而 0 賓 之, 嗣 是 品 有 晶 興 於 以 買 道 的

事

乎? 嫌,而 敬,億 和,不 和 也。 静 矣。 是以 徐盈 盈。 之情 來雝 也 居之敬, 浮以爲 迫之而 執 離,而 ,藏於愛之宅。 和者,所以待之也,待之而 也,緩之而隱,迫之而浮,待 . 謀 有 義 中之固 事 肅 莫敬於 其 來 外之説 之敬 肅」者,能 雝 以 敬 浮。 後 敬,是中無敬也。 雝 和 無 ",以 至 氣, 知 敬 其 立矣。 夫天下之不 敬 止 敬 則 而天下 也,於是有 心, 勿 其 之 肅 愛縈其 氣 至 肅 固 生 非 二 即即 止 乎? 以 有 之須敬者次之, 也 肅 謀 而 一浮其 外 U 雕 敬 以 肅 敬 不 謀 面 後生,生而 故敬者, 君子謀 自外 其中之無 者, 待 矣。 敬,唯謀 、敬者,鮮 不 其生 以 謀 易 。「有 生之 謀 何 也 出 其 和 期 而

> 盈矣。 其居之也 以 使行 斂 生而 而 ,然後有 不 善敬者,反之於情,致之於氣,油 束, 不息。 舒 其 而 故曰:「 不 鼈 志, 雕。 微 君子大居敬。」言 之而 而 肅 使 肅 昌 者 居 徐 之 然 以 亚 而

五

四

哀哉 大焉。 眉 鰼 是凡 吾 生而實樂死 死之夜也。 心也。 甘濁 壽 叉, 奚 榮 榮吾生,榮其 心 水以 而 且 之不引 所自生者不榮, 綏 皆 以 引其既 也。 相响,夫誰 耶 辱 之自 ? 也。 其 所自生 「介以繁祉」,奚介耶? 願 而年引 生不榮,●而但生之榮, 死之生而永之,是名樂 以 而 死 爲 或 爲 詔 焉, 也。 而 生, 爲 之乎? 榮其 凡生之 人願之。 引吾 以辱 生, 爲榮, 年, 一級 日 辱 我 鰌 皆 莫 引

0

[「]其」,曾本作「所自」。 詩 曾本作

榮矣。 吾猶 引其 衣服 之日長 所 未即於死,如之何其勿悲 生,而儲爲 榮 人也。 不章, ●浮游以 不 孝 也。 故 昧 思 日 也 、鬼以待死,無已而致之於祭乎, 則 悲夫 : 事 然 父母 爲 親之日徂,耳 後 人子 非 憑 食於萬物,舉 犧牲 之以 者樂 死 而 不 存,右 實 爲 成 生, 人 目 築 兄, П 非 無 我 盛 體 以 辱 考 可 不備 安而 之尚 事 妣 ൬ 親 會 而

其馬 旅 白 不 無 而 憂,憂患忘 故國之餘。● 奚 其 可 德 釋 0 怪 馬 以 惰子忌兄弟之孝,賄 在 耶 焉可 視騂 也。 存, 彼 ? 者猶 而疑忌 忌鄰邦之盛;●無 矣。 故 猶白、白 非能 有 日 在 萋 怪 消矣。 此 心存 忌也,猶夫瞽者之相搏, 有 者 也 [猶騂· 且 以 ,萋 者 其 其 臣忌朋 也。 有 不 弗 旅 且 客 患 盛 可 猶 道 貌。 視 有 ,道大者不 吾 也 而興,●忌 友之忠; 白 客,亦白 旅 見其 追 如 也 琢 一,其 其 可

> 者也。 矣。 獨矣。 远獸 威 攝之,信吾旅矣。 萋其 臥赤子於天下之上而 」,能弗 治 道 迹 且則吾萋且 而 Ē 文王 陟 忌 而 帝 而 天 馬 孫 文質 既 臨 位 爾。 子 女, 勤 也。 功 天下未有自 無望之矣。 止, 耰鉏棘矜 勿 3 臣 福足以 不驚 貮 我應受之」, 統一 與 爾 勝 心」,信之天 , 假三恪 或 懷之,威 而 丽 有旅 之 攘 王國 胤 大 信 而 寶, 以 之 侯 自 足 「淫 也 邦 下 幽 疑 以

至,則 也 至之以 人之至燕 户 北, 其 燕 未 也 也 至 弗待其已至 燕 知 者 有 也。 其 未 弗 mi 至 知 後 則 信 有 代 其 其 之 未 至

曾

曾本作「虞

無道 服」, 而」,原脱,據曾本 原 脱,據曾本 本作「食」。

追」,今《詩經》通行本作「敦」。

五.

藏 泮涣 性 括之於兵,王通之於經,二荀、楊、韓之於 之中有理 不知 東、 m ()無未至之境焉 一、怙之以 昨 有 ,0他日之至 齊之 信未見之中有 者 我乃 其所未信,既 至 ,是知也。」知 旣 西 也。 皎 以 ,則其學精。 死,而徒爲天下蠹 然於心目矣。 知 衛 其 信 者至此 之北、 將 未 耳。 知 有 色, 而 聞 信 其 朔 就者之果 爾。 之 「將予就之,繼猶泮 所 則其明後; 矣,所謂「今日 之 中 未知, 南, 宋 故 · 有 襄之於義,趙 一心腎肺肝之 日 燕 聲, 於就 既知有矣, : 固 示不 信 則 存 也 未 其 適 ·知爲 於 合 而 聰 越 心

篋之積 爲 以 子 土 采 以 八邑禄 子曰:「小人懷土。」天下莫非 天下爲土 然則 也,岌岌乎憂其不固,不亦 人爲 天子之有天下,一 土,士庶 一,諸侯 以 人以 四 . 境 田 爲 田 宅 ±, 宅 倉 土也,天 細 倉 卿 庾 乎 庾 笥 大 ? 笥 夫 筬

> 矣。 兵之謀進 菹越之禍 奚以知其 難 天下而授之舜 我乃爲 常 恤 堯、舜之有 君也。」信天下 而 所當者,誼 天 湛 義奚 徙 何 維 卿大夫曰:「以我天下故 以其誼、言乃以 也? 顯 而 君 思 諶 病哉?❷ 一,而 一發於伊 然 也。」則 也 是 其 耶 曰:此 命 賜 心 匪 重 ? ,舜釋天下 不 誼所宜者,人也。 也, 履 一諶,以 一於君 、吕矣,即 易 天下 湯、武 天 專征之命不行矣。 非天子之自 哉 抑湯、 子 也, 脗合於道, 重 釋 Ē 而 而授 而 武 位 於 匪 : 不 無 義 道 之有 圃 君 ·然,而 是 以 之禹。 圃 墮 之 也, 言 遷之,非 心 建彼 天 而 移 矣。 憂 也 是 而 下 變不 盃 則 以 而 心 酒 醢 天 堯 以 仁 故 其 故 土 也 信 徒 釋 命 釋 爲 失 建 而

[「]養」,曾本作「叉」。

之,逆 易, 康之亦 也 可不 之顯 臾 而 屈 終身,而 於從者矣。● 君 但 人 理 必 武 不不 心之有 者, 平 不 喜 ,貞士之倔 臣 得 弗忍其 舍所 前 道 見 者之鞠 爲 奔 風 此 幸其嘗 是 也 晁 於顔,有 相 有 故 戴 貞 他 一人 mi (君 之 心,則 告也。 錯之謀 是 日 豈 而 士 若 |X| 嗣 心, 恤 匍 猶 仇 强 畏 而 酌 天下 革命易服,人臣之鞠 謂 也。其爲人臣者之鞠 哉? 伏 於義 一、然且 成、 讎 爲之殺,恥 人之心者,尚能 其 故 已 以制之早 也。 何也? 稽 者也,不 莫大諸 腥 矣。 者盡 康之不 顙, 而 者 均 雖 有帶 是人 北 不得弗戴,戴之 然, 若 道 也 也 革 , 9 侯 可 面 夫 圃 幸 索 日 爲之臣 姓易 也, 戰 建 無 無 其 命之不易 吾之 其 沿拾 慄,啜 憂,事天之 於 是 嘗 旦 藜 忍 嘗 而 服者, 心。 東 等 所 死 力 遠 一者則 而 戴 X 或 X 之 於 夷 之爲 屈 其 爲 不 非 也。 天 成、 須 瀋 勢 者 擯 以 忍 m 義 爲 不

> 驚? 凡命 不 也。 俾之移 戒 以 鞠 道之君盡 痛,弗能 安。 於君 信 X 皆 臣 懸 其 雖然,君之弗驚, 故不忌臣之戒 所戴 弗 日 天, 必 於 不 獲 眉 其 免 以其誠告於君父者也。 「命不易哉 而 以 己, 道 睫, 過 挫天 得 面 而 爲 而 失 無 以 人之 不保 下 之 、憂,則 義 而綏之,君之仁也 之廉恥 [] 爲 故 而未嘗 戴己, 慮 其 輕 聞 旦 而 於 人臣者剥 其言 晚, 不 己 固 不爲 鴻 知 逆揣 不 人君之所 毛 裁 而 若夫 能 其 弗 保 臣 奚 膚 乃 而 其 愉 有 之 進 無 而

焉。 故 則 曰:「實函 活之體 函之中,仁也 實,充也 一覧販而 斯活。」 ; 函 存焉,仁則活之用賅而存 量 君子 也。 則活之理賅 有 充其量斯活矣。 取 於 从此,以 而 存 似仁

「藜」。曾本作「棃」。

② 「逆風而若畏其腥」,曾本無此七字。

五.

僡

心,而 蘇之, 水相 今兹 百穀 有也 之以 敘; 可 與 智以達之,禮以榮之,集義以昌其氣,居敬 子之於仁, 者,逮乎此而 之,渾之乃以發揮之,堅而 偂 mi 興。 以 透 函 松乎? 先此之體,待此而 得, 效仁之功乎 實 猶 馬, 相 甘 胡 而 實之者,不怙 是 緼 得 而 以 龃 必 泉漬之, 然 之乃 處 未 亦 實 於 氣 總者藏 無 後 於函 可 實矣。 也 猶 靈 相 不 活 以 ? 以 浹 迎, 是 善 矣。 暗 中, 絪 實 於 學 以 焉 丽 風 而 也。 緼 其 承 已 函 函 津 而 以 先 後實於其 鼓 固 之, 之所 固 矣。 之 涵 聚 胡 淫 之, 加 此之理,待 有 口 之 之,思 矣。 以 今兹 樸,神塞 流 先此之用,待此 胡 至, 也 昔者 實 所 和 實 之乃 以 透,不 也, 大哉 日 耶 無 猶 以 函。 不 而 蒸 函 不 以 達 是 數之 實 不 mi 於心, 之, 至 之, 夫 條 此 容 函 觀 春 形 也 馬 於 君 审 與 於 固 P. 氣 ? 悶 理 而

> 乎我, 猶空 歉者 者 天性 也。」 於崇 化 不 何 天 以 心 也。 哉 無 也 能 皆 保 承 也。」 之仁。 則 ? 擇而守,學焉 日 天 其 我。」不 使 而 誠 有我以 也。 下 無 神 函 曰:此貞之起元 故 亦 之 形 矣。 以 丽 知 備 無以成乎仁矣。 者 爲 亦疑 色者,我之函 我之仁,猶空之仁,蕩 不能 實者,誠 物 也。 我體。 夫 函, 以 然 使實 於 而 加 通 有 然 後 鬼 後可 也,「 其 不 我體 則 函 實 而 也 理 ·曠,盡 於 者 天 也。不貞則 齊於 實。 也,而 乃 其 誠之者, 也 不 天下 其 故曰:「形色, 其 文 函 可 其 木 欲其 聖 一,則 一, 而 必函之者 皆仁 或 賃 怙 石 然不 E 理 禽 T. 有 穀之仁 活 : 不幹 乎 有 而不 之道 蟲之 哉 弗 而 成 我 待 吾

曾

活而 小 禮 體 天下 其 大 體 之活 乎 歸 人 焉。 心其 知 此 (道 者, 心 乎 乃 Î 可 與 活 其

若。 下, 天 用以 奚以 其生爲尊,則舍嗇 相 之,是以 我,憚善而 矣。故曰:「治人事天莫如 於天下。 曰:「吾有大患,爲吾有身。」保之益 八,酌 笑 ,辨之而已矣。 則 而 猶千金之子,或以侈敗,或以吝敗,交 嗇,天與我以豐,而濫 此草木禽蟲之生爲 加於天下者,皆我之志氣也。 之而 内物而失己; 攻天下 歸於敗也 身 是故尊生之説匪 相 已矣,則亦序之而 不爲,與 盭 戾 同。 酌者何? 也。 奚 椿 以? 故君子之治人以 同 天 年 與 保哉? 用 ,則外己 一,歸於嗇 嗇。」誠斤 雖 我 與 已矣,尤有 天下所堪,己 其豐,兩者 然, 以 龜 豐, 同 彼 絶 而 息, 之言 以 人 取天 斤 丽 而 喪 喪 患 道 事 相 逆 亦 以 己

> 文章。 盈矣, 成聲 不敢 以己 天下 矣。 盛其 宜用天下,宜爲天下 以成其條理。 安於度而 意,勿奔氣以追語,勿趨 語 所弗堪,浮取 用天下,不善者也。 固 一者也; 所 容 用 酌 容之汰,一指 不 氣欲 疾言倨色,不知其亡也。 弗 盡 也。 天 何 惰歸 意 下 堪 有 張 矣,氣 志、氣、 浮 序者何? 以邀天下,勿爲 嫌 而 其氣。 而 即 焉? 以 用 欲尚 度 天下 以 亦不 欲 度, 盱,汰矣。 言之莠,一 用,善者也。 折 志,勿 不宜爲天下用,不宜 即 弛 速語 相 意、語、氣,相 酌己,疾言 天下,勿 欲 氣而 矣。 函 盡 寧飭 丽 矣, 也。 意 枵其志, 勿 故言之善, 罄 成象者也。 辨者 極 志 度 爲 勿 己所 一欬,莠 盡其言, 寧 語 倨 約 以 也 色,0 勿 得 何? 以 舒 均 而 堪, 而 弗 其 取 盡 氣

「倨」,曾本作「遽」,下「倨」字同。

惡乎 恭其 也。 辨 奚 服 理 也 盛 流 危 不善者也。 其 度 也 以 ? 威 者 音 也 損 盡 容, 也 魂,正其 敖者其容, 减 必 亢 泛焉 容修 太陽之珠, 致其 矣。 心? 奚以 故曰 一、閥之而或吴,懿其言,未有或吴者 熊 其 詞 清 未 不 容,不 曲 虚 有 而 馬 是故 : 故 善 ? 不不 魄,緒其 盡 緣 「不吴不敖。」吴者其言 氣 或 即 者 以 温 廣 督」? 不 -吴不 以言 欲尊 敖 悪乎 如 也 耗 引 馬, 辨者 乘 者 以 生者 之蕩也,其 神 其生者, 止言,不如 敖,胡考 也。 道 而 氣惡乎 去 容之善, 弗 奚以 神 修 1人? 擇其 也,損之而 嗇, 不 容 紀 隨 蹶? 「閉 也 焉, 亦無 之休」, 而 精,奚以「早 之 高 重傷之悔 嗇 以 蕩 流 緒 其兑」? 直其 拱 神 者 者 理 如 也 焉 或 垂 ,尊生 以 不 止言 君 惡 必 敖 ; 旒 氣 子 平 蕩 其 類 能 其

國。 蠛 也, 慮 以 嗚 也。 豐、佑有道也。 興 治 固 可 不肖矣,以 而 蠓 以以 曆 人 呼 爲 饑 不及聖,下不 面 、之慮,代 之有 Ť 道 饉 湯 周 君子之知 七 介然 億 則 興而 者 交 克 年 維天至矣。 損 天之必 斬 殷 翼 早 有 天 愚不 理 於 七 , 而 其 加 以 也; 天 天,知 四 周 年 年 謂 知 秦有 就 安於 ·肖求 而 宗 早, 然, 國 豐 龍 慮 無 數,用此以言性 慮 將 之不 以以 以 所 窮 警 此 ,於聖求之,不該 天 是 秦 愚不肖,介 之,不逮 滅 者 人之知,求天之 聖 不 IXI 下 量 有 疑 而 口 可 德 修 也 而 天 螘 天 饑 飛 爲 也 也 之不 年 下 首 饉 乎 也。 理 周 豐, 而 mi 然 聖 交 故 者,天也 周 克 然, 年 求 矣。 用 宗 存 斬 有 則 殷 無 冠 其 誣 是 平 餘 此 所 將 於 而 知 天 以 緣 則 知 L 愚 不 滅 民 年 湯 四

0

[「]螘」。曾本作「蟬」。

邀也。 哉 以 邦,屢豐年」,亦一理而已矣,非天之必可 矣,不可以 舉天下之密無 巧無以致其精,舉天下之大無以測其弘, 不矩之方,不量之度,不籌之數,舉天下之 鮪之介,竹篠之虚 体習。 ? 項之短,鶴 夫亦惡知天之廣大,無往 情情,不 以 察其 ,松檜之實,不規之圓 可以 項之長,鮎 幾。 識 識 故 者也。 日 鰌之涎, 維 丽 「綏萬 天 非 至 鱣 理

也。 斯二 以報 奚以 者,誰忍語 母畫績 者 功 頌之而無慙耶? 以 有坐而言曰:「父春耜而秋銍,我應 田 舜 者 與 也。 千秋之言報以 之孝 天 此 而宵維 同 而 報 是故大德不報,大位非報。 體 抑 以 天 誰 ,我應衣之。」非至愚騃 天 聽之哉? 抑 子 曰:天下者,非天之 宰相, 不 則曾、 得 以 《賚》之詩, 則賈、董宜 之而 関 應 報 有 人 國 食

> 俘? 其肝? 許 乎? 爾。 文王勤而 畫 衛 則覆 報 爲天子矣。 而休與億奚以不死於餒? 宋徽宗之嗜書 大投艱於武王之躬,受之云者,無容辭焉 者,任之也。 也。 ,均於米芾、文同,而 繇 懿公之好鶴,均於 所爲避其 「天下不可爲」,●辛毗知之,●況君子 以九族。 武 撫 「文王既 王雖 梁武帝之佞佛,均 則 不敢不受以勤,文王 后 是故大德不待報,大位者非 聖,何 厚息則 勤 匹夫之纖惡,天子之重負, 難, 勤 其勤,敷其敷,定其定,遺 成湯所爲不釋其慄 止,我應受之」,受之云 必 讎 林 后 履 一带與 逋, 岌岌 則 於裴休、楊億, 愐 同 親 以 逋 敷繹而不敢 奚 以 奚 爲 以 九州,讎 以 榮 不斃於 不裂 哉? 也。 以

- 「爲」,原作「樂」,據曾本改。
- 「辛毗」。曾本作「李耳」。

其 武 不 無 受 Ŧ 以 之 敷 於 繹, 此 文王 惴 惴 一求定 爾。 丽 惴 不 惴 敢 爾 不 受以定 而 又 翠

魯頌

告戒 意必 故 熒 而 貿,各失其度,匪 儉於意,用之於《詩》,其定 意 (永歌之。永歌之不足,故不 連 恩 不 》者,於《書 心威之 「言之不足,故 盡 溢 而 有 也 有餘 求 而 立言者 窮 用 儉於辭,用之於《書 盡於意 於 抑 意 黷。 是 辭, \leq 高 必 而 但其辭之 貽 壘 而 嗟歎之。 爲之詠 有 解 人以 興 不溢, mi 其 起 不 度, 疑 相 之意 歌 不 體也。 有求 也,特炫 而 人者 嗟歎之不足, 而 令也。 [》,辭 各 多其意 微 知手之舞 盡 也。 從 矣。 兩 必 於 其 其 爲 盡 者 辭 類 故 故 是 之 相 ൬ m

> 於一 輕微 故孔子曰:「周公其衰矣。」先公之教未亡, 之於《詩》,敖 民 他 喻 坌涕笑讙 更爲之括初終,攝彼此,喤耳 之,抑欲使人永歌之,終欲 善於章。 之,足之蹈之。」 言不足,則 書》莫盛於文。 風 於行 端 流 《》、《雅 之俗 幽 躡 幅 進 削削 綴 浚之中,終不 章者, 》之遺猶 ,其不以 乎? 呶 四 嗟 風 而 歎 者有一焉,非 旨 辟 罔 一知然 永 以 故 一色者也。 文者,兼色者 煩 所 是爲《詩 歌 備 有存者,其 極 促,政 理, 手 衆 其 ·於言 則言 又奚以 繁 事 舞 散 稱, 於 使人 》必 敖 足 固 而 方欲使之嗟 民流之音 辟 煩 有 蹈 祈足 唯《 淫泆 施諸 矣。 也。《詩》 篇, 煩 心 舞蹈之, 所 《駉》乎 促,政 不 未 述 也。 引人 手 口 足 魯 終 足 促 百 也 頌 矣 歎 英 於 散 年 氣 m m 而 故

^{1 「}於書爲壘」,曾本作「與書異壘」。

也。 數 長慶之所不 不 厭 馬 以張 建 ,猶其 安之所 或 韻 能 君之富,①猶 也 攘,朱 不 能 終 竊 篇 絃 疏 正 而 其 越之 始 不 類 之 及 也。 風 所 他 整 不 猶 長言 能 留 其 剽 此 章 而

焉

,雖列之《頌》可

矣。

乎? 緩,清 也。 乎 謀 奰,以之革 之安,以之管則 忘,舒以 魯僖之於 加 灣擊,非 月 1 風 ^ 心各有 有 各有 明 甚矣,魯僖公之淫於齊 成, 往 駜 愐 齊 而 心醉之,北 雜 則 》之聲胡 和 沿 柔 鄉 桓 極 霸 豗,以之盤 以 而 而 微 一, 儇 也, 之雄 急,以之絃則繁,以 則 不 不 至 相 而 者,周公之道 相 豔 圃 爲 心, 面 蕩 越 其 雜 斂者, 乎奏 乘 其 卑 其 旋 道 廷 亂 耳。 於 誰 各 凌 一,敝 也 於 之者 周公之《詩 舞 與 有宗 而 ! 周公之庭 召 爲 蹈 也 不 師 其 陵 之 澹 以 之 則 必 而 層之 之 乎. 金 昌 以 淫 望 輕 不 其 震 ? 爛 則 不 相 而

> 逮上 惑 塵 不 周公之教復於上,垂 限,汶水不能爲之塹也。 而 於魯」,謂襄、昭 於社 淫,故仲尼之澤永於周公。 ,率夫人於陽 氣犇之久矣。 也 非 ,僖靡之,宣怙之,泰 謂 莊 僖 以後狂簡之君子,移 穀以從其宴樂,色授 匪直: 之閒 及劉、項 僖 也。 子曰 也, 之際, 君子 桓 Щ 齊 迷於嬴 不 興於下 變, 能 而 風 爲 魂 絃 誦 m 至 之 莊 與

之乎? 聖人, 子奚 之於天, 焉?」雄不知道,不信其不可 揚雄 斯 而 嘗 可 迷 聖人之深,可 E 睎 以 以 E 氣 終 正 考父矣。 相 世。 考父嘗 迎隨 聖人之大, 浚 乎? 而 睎 如 至 尹吉甫 欲 睎 之 聖人之於人, 睎 乎? 故 미 之, 矣, 張 以 孰 影 面 冒 取 禦 公

[「]張」,曾本作「彰」。

[「]睎」,原作「晞」,據曾本改。下五「睎」字同

六四

葑 知 見 是 深 ൬ 咀 也 口 菲 1 近 Mi 以 一之,質而已矣。 則 以 之下 綜之,其 親 情 色 約言之而廣,忌言之而 嚴光曰:「賣菜 則 絶 授乎文王之學也,如手 相 肅 然,聞 體 比 雏 合乎? mi 也, 緒 以 縈然。 其 大則 故曰:文者,昭質者也。 擬 所 蘋 不 周 乎? 躬 藻 公之頌,天 鳴 聞 與 乎? 呼 平武 mi 求 聲 ! 昌,見其所不 益 攜之,如 喤然,遠引 王 溯 奚 也。」多采 一之功 其 斯 則 世 清 爾 也 加 明 何

不 縱 迹,而奚其髣髴哉 聚,莫之敘 長,莫之放 氣 水 亦 頌 無 長 歡 可揜 遠 己 言 者 而 有 不 口 叶。 睎 以登 矣。 其 嗟 樂之非 牖 馬矣。 地 歎, 唐 聲 文者,道之顯 登也。 嗚 而均,莫之敷 而 加 Ш 而 有 呼 樂也 流 況聖人之洗心 之《房中》 割 弘,莫之鑽 緒 ! 浹 拾 ,莫之澄 日不 , 聖人 於 以 歌之無感者,弗足 地。 睎 屬 事 加 平 天, 詞 뻾 也 心 而 而 口 榮,莫之抑 也 前 有警,物 而 清 人,莫之 以 而 賢於奚斯之 光充於天; 似 周 載 藏 莫之導 似 公 藏 密 也,天 有應 以 圃 者 凝 與 揚 出 無 斂 於 而 而

● 「無」,曾本作「爲」。

哉?

故

哭之無涕者,哀之非

哀

也

笑之無

,

與昭

,何怪

乎

如

扣

木

築土之喧

耳

而

無

與

賱

妻淫

於祀,

荒

於

會

而

不

懲

也。

質

之

不

足

鹹》之左次,因人無

功

而

不

慙也。●

嬖母

欁

孔悝之鼎,

而不

足以

介揜其

(悪

也。

淮

以圖

也。

陳其物如籍,而不足以

籍

也

祝

其

福

如

巫,

而不足以

巫

也。

侈

其

功

如

禮

至

史,

而不足以

史也

寫其

容如

圖

而

不

足

雖有 知哉? 食 於聲,弗求之色。 尚文,求之於臭,弗求之味。 氣,以神求之也,弗忍求之而弗得也。 人享之也,弗忍致之死也。 有人道焉,有神道焉。采五色,和 如弗求也,殆於不仁矣。 也。●」死而 然,有異道矣。 Ŧī 弟 氣, 者弗爲也, ●之死而致生之, 知者弗爲 絢采, 知 采備五色,和備 孝子之以 其味。 求之者 弗 [求之生,亡而求之存,奚但其不 視 《記》曰:「之生而致死之, 待食待視而 弗 非 享其先者無不 聲、臭者,神之所主 知其 其類,意不至,神不 五味,樂備五音,臭備 色。 故祭之備 樂五 親者,人之用 雖 殷尚質,求之 有 · 備 潔 音, 五 也 薦,弗 一味,以 物也, 臭五 也。 徠, 周 雖

> 也。 也,又不如殷之尚聲也。 自通也。 鬼神 也。 無有見其畛也。 後求之也親,而 唯夫聲之不待聽矣,鬼神雖 鉶, 彤漆黼黻, 如 宿 而臭自徹也。 人子之心耳,求其實,固 見功,非人用之能效也,神之用也。 而 而 覺 聲人空,空亦人聲,兩相 留,不見其至,莫之能拒,斯非人用 ,聲響之達,隔 幽細之音,不聽 而既不能視矣,既不能食矣,籩豆 臭之不待齅矣,鬼 合於漠 神不遐 臭雖入空者也,而 其生之所歆者而致之, ● 垣 而 而漠爲 不 聞,繚繞之氣,不齅 與! 聲與 蔽, 苾芬之人, 經 判 神雖 然未有與 含 弗 之介紹,夫然 抑 臭者 能 M 周之尚 不相舍, 弗 聽 既有質 入空者 能 加 且 也。 齅 臭 聲 俎 夫 之

0

詩

廣傳卷五

商

仁者弗 爲」,曾本作「不仁而不可爲」,是。 知而不可爲」,是。

者弗爲」,曾本作 不

所」,曾本作「可」。

乎其 鞉 也。 先之不徠而 我思成」,誠 道至矣。 空者也。 畛 有 下,播之於四旁,摇蕩虚 人,亦弗知之,所以求者至乎神,而 二,不徧 域者猶自 來 鼓 昭明 所 去 磬筦之 伙 以 也 與 察 故曰「衎我烈祖 水,故 煮 空之所 矣。 空 虚 蒿 以 來 綏之也。 昭 有 題以歆假哉? 其 悽愴之氣 去 徹也。 蕭 則 畛 (材質立於空之中,而 者 人,固將假之,空之所 艾脂膋之氤 惟 域 不 臭 也 孝子慈孫 數 際之於上,涵 固 明而生其歆浹,殷 入空而 、數矣, 二,誠 吹 與空爲宅 之 衎之也;「綏 氲 無 面 空不 豈忍於其 定 徙 誠 神不 即 之於 與空 人 而 是 不 矣 至 如 弗 晳 臭 抑

然也 天地 也、言者音之所成也。 ? 之閒者、言 爲 交於天地之閒者,事而 神之所 丽 依,人之所成。 已矣。 未有其事,先有其 事 者容之 已矣; 何以 所 動 明 其 出 平

容,相 其響,則天下之至 事 下 然 明者矣。 矣, 之幾形矣,發而因 容,容 之至廣至大者矣。 繁有其音容,而言 也,音容天也。 度, 數之鳴有音, 況人乎? 者,容而 無非音之成也。天之與人 未之能言,先有其音,音有不必 密者矣。 不 而不襲古今擬 而抑 則天下之至簡 足以 切 有 以 已矣,音而 不域之以 不 乘乎氣 盡 傳其 必 有音, 況鳥 乎 爲 神, 一身官 不可以事别,不可以言紀 議 事 加 與 動 通 至易者 方 其天,鬱暢舒徐之節 靈至神者 之名,則天下之至親 不 已矣。 而 所, 乎羣言,言不足以 事 而 竅之用, 逐 潤 事 不 應其 萬物之變,生乎自 則天下之至 乎? 無 矣。 能 八與? 卉木 是以 非 相 心,喜怒作 矣。故音 而未 該 逮 爲言 容 其與 蟲之 相 知言事人 平 之 靡 則 加 萬 出 乎天 清 天 蝡 以 萬 而 也 下 追 至 至 見 11-有 有 物 言

也。 中,而 歎,而 也。 道 夫事 胡之與粤有不 者,人物之元也,鬼神之紹也,幽 神,明而 接,言之所不可酬,髣髴之遇, 易俗莫善於樂。」今夫鬼神、事之所 乃以感天下於政令之所不及,故曰:「移風 其威儀。 未言之先,平其喜怒,調和於無事之始,治 容,而德乃大成。故曰:「成於樂。」變動於 祖考。」大哉,聖人之道 希微之通,通之以音,霏微蜿蜒,嗟 不備,充而備之,至於無言之音,無事之 故道盡於有言,德不充,功盡於有事, ,,聖之與愚有不信者矣,容則 容成 與神通理,故曰: 得之於形聲之外, 感於性情,莫此爲合也。 音順 而 事 知者矣,音則無 成 而言順,言順者音順之緒餘 事 成者容成之功效也。 1 殷薦之上帝,以 以 此 治之於視聽之 不 而已矣。 遇之以 知 而合於鬼 今夫言 無不信 也。 吁 不可 今 唱 雖

> 然,更有進焉。 於人爲,石者無所假也,尤其用天 音備,大聲震,盪滌 容,容不能 此 於蟲鳥,●竹匏木假於草木,金鍊 至於磬而聲愈希矣。 天治者,神之依也。 無方也。 曰:「依我磬聲」音之尤自然者也 可以知聖人事天治人之道矣。 容所 節 音。 不逮,音能逮之,故音以 容者,猶有迹也,音者,尤 天治 於兩閒,而磬特詘 雖然,尤有進焉。 音之假於物 人,非人治天 而 革 也。 嗚呼 土 陶 絲假 也。 假 節 故 1

繇異 義何 也。 乘大輅,載 於非 居 殫敬於神, 約載錯衡,八鸞瑲瑲」,助祭之飾 君子者與! 嗚呼 弧韣族 勿自貶約,而 ,十有二旒,主祭之飾 斯君子之交於神 是故大裘衮冕,玉 盛 致其 .明,所 飾,於 也。

■「鳥」,曾本作「獸」。

魄,非 者,享 焉 美於 天地 也? 身以 養其 以 類 之色,休嘉之氣,兩 敬矣,故 不 以 冰,神 矣。 ,發之者以 養 眷 六 答神 取 之美藏 也。 神。 人 其 馬 其 工其 天之所致美者 盛於躬 人之生 百 匪 而 以以 體 不敢 盛 思成之親 物之精,以 眷 享帝者, 爲 ,蔑敢不 凡君子之交於 不 養 焉。 喪 弗 神, 足以 其 不 其 不弔 盛 而 也, 物。 容 養 天致 神 也 享其 凝之矣,故不 也 敬 ٦, 莫 也。 明 閒之美也 而 匪 日 充其氣,發其盛,而 疾 也。 是故精 也。 美 貴 通 已矣。 盛 體 享 不 料 天 於百 焉 於 怳 問 太 弗 身 神 越 百 地之生,莫貴 神 惚 牢 神 之 交 以 明 生 物之精, 刑 物 求之 矣。 也 幽微於其 明 () 帝 一神 敢 綏 者 共 mi 函 獄 诵 也 美以 身 神 爲 其 . 者 不敬也 不 神 君 而 mi 焉 精 省 玉 文 以 者 享 蔑 子 神 鬼 耳。 食 不 致 音 何 於 魂 所 盛 其 親 敢 神

物

光,兵 矣乎 禮 鬼 神之哀,神莫之哀 激 慙 此志 以 神 也 交於神 於 死之厲,夜嘷之狐,或 哀 也 彼 1 嗚 餒 非 而 呼! 氣 約 君 失 熟飲 子 諸 其 釋氏之以交於神 者 身, 身 丽 之哉? 以 疏 見 人哀之矣。 羸 神 食 寒嚮 於 壞 與 無 衣 虚 爲 死 已, 而 之氣 同 類 明 失 賤 則 而 居 者,此 諸 歆 形 燐 喪 而 己 之 之 離 冀 之

者 焉; 事 不顯 敬 及於天者矣。 矣,敬其 面 也 事 而 兼 人之所不 受命 至 太上 有 故敬天 敬天, 者 人有 相 者 一敬天, 也。 顯 也 至矣。 之天 對,有 不及於身 而 事 是故敬其事有 徹 其 冒 之所 次 身與 焉。 天下之道,亡之有遺 相 至者 敬身,其 對之身焉 人事之未 不 天 者矣,敬 涉,有 忧 非 者,括 獨 次 不 至 敬 相 其 及 有 ;身之所 也 人 涉 於 身 身 而 之人 人者 歷 與 有 其 凝 X 命 不 至 次

隱 觀 夫 有 君 以 高 層 者 兼 升 天民 不 乙 子 者 事 舍 者 君 據 以 雲升之; 天。 不 者皆其敬焉者矣。 之事 遺 爲 子 以 下 也 事 也 於 歷也 歷 格 登 所 麗 爲基,鴻 跬之步之,泰、華 事 Mi 小 遲 者胥其 身 尤 而 天,如是其 潁 親 也, 於 而 ; 遲 銖之纍之,萬 以 光 不 惡 君子之言天, 人,不 敬 遲遲者 身 上 至 者,言 隕 爲 之 以 而 於 既 敬 察,道 帝 患 織爲 斯 敬 忘 敬 虚 天 是祇 ,歷之無 上 有 者矣。 物 天 人 故高 不 職 敬 積 帝 以 隱 偂 漸 遺 耐 陟 也 天 有周之。 可 爲 矣。 道 如 珍 也 君 實 者不 之 性 此 得 遺 少身,不 恕 兼 隱 是 以 也 於 也 之 也。 而 狗 言 絪 憑 漸 其 民 0 遺 之 人 謂 祇 陵之登, 以 有 爲 之 温之, 卑 耐 故曰 而 事 矣。 歷 躋 外 故君 聖 也 不 據 依 也 順 敬 以 身 敬 之 而 遺 也 若 學 : 而 理 子 躋 H 大 所 敬 mi

> 風 於 前 焉 而 反 識 而 近於鬼之事矣。 之 行 景 幾乎道 之 華 冷 冷然, 鄉 欲 也 睨 以 不遠 失 其 天 風 下 孤 矣。 鶩 故言 而 而 之 墜 無 情 茶 躋 足 者 茶 以 溯 然 當 空 勿 其 喪 憚 明 意 其 身 而 遲 絶 御 至

遲

人

曷」, 禮。」 殆以 與 台 猶 也 傳之則 足 故 桓 公當 爲 一,傳 微 桀 無 撥 頌 力 連 口 餘 也 時 而 詩》 之則 争 後 類 實」,傳及於《長發》,而 稱 矣。 子 以 頌 》有《頌 王曰 得 而 何 日 之, 爲 相 以 湯 天 舉 也 蝠 土 爲 曰 矣。 下 ? 放 我 勿予 也。 》,樂 日]::「諸 蛭 加 桀 欲 察鳥 也。 烈烈, 守 率 于 觀 察 有《 禍 之 其 侯 殷 南 於 魚 適 精 以 凌 桑 道 宋、 巢, 遠 於 意 頌 威 蔑 林 9 , 鳬 是故之宋 淵 魯, 頌 失 ×, 湯 耶 不 韋 武 E ? 恤 加 以 祀 於是 後 鮪 顧、昆 Ţ 之旨, 「莫 餘 爲 有 以 世 頌 日 燕 其 郊 爲 我 恐 乎 契 圃 禘 迹 也 敢 以 觀 吾 不 日

嗚

呼

而

彼

殷 武

癸亥閏月重定

詩 廣傳卷五終

戰,宋於是乎以不度而争楚於盂、泓,宋於 乎以世殺其宗臣,宋於是 斯宋之以徵殷 殷獨多有之,則殷之以寬大優柔固結天下 變,而殷先王之澤無有餘矣。夏之亡也, 之生鸇梟,張束溼之習,上下交獎,天物交 是乎以射天笞地、剥滕吞薛、戰齊、楚、魏 承殷,愈於杞之淪夷者能幾哉? 無待遷之頑民,周之亡也,無采薇之義士, 殷武》,宋之《頌》也。 氣應之。石爲之隕,鐫爲之退飛,雀 志隨之,志之所競 不慙,音促 此不問 始將暴六百祀之天下 名之所傳 精 而 加 意 不舒,蕩人以雄而 而 喪殷之徵者 不傳,而 知其非商之舊也。 m 而 《那》、《玄鳥》、《烈 事隨之,志成乎事 言隨之,言之所 子以 相 傳以 也。 十年而 -於桀 競,宋之 無以養, 宋於是 八日矣。 發》、 + 詞夸 . 爲 流

血

面

而

速其亡。

者,可知已。

毛詩稽古編

[清]

馬小方 胜啟源

校 撰點

.

目 録	兔罝 一一	桃枖 一	桃	螽斯 九	樛木 九	卷耳 七	葛覃 六	關鴡	周南	國風	毛詩稽古編卷一 一	敘例	朱敘(朱鶴龄)]	校點説明 一			目録	
	野有死麕 二九	江有汜 二八	小星 二七	摽有梅 二六	殷其靁二五	羔羊	行露 二四	甘棠 二二	采蘋	草蟲 一九	采蘩一七	鵲巢 一七	召南 一七	毛詩稽古編卷二 一七	麟趾	汝墳 一五	漢廣 二	芣苢 一二

淇澳 七〇	, 五三	簡兮
衞 七〇	五二	旄邱
載馳	 	式微
竿旄		谷風
相鼠	匏有苦葉 四六	匏有
螮蝀 六七	四五	雄雉
定之方中	【 ···········	凱風
鶉之奔奔 六四	3 四四	擊鼓
桑中 六三	/ ····································	終風
君子偕老 六〇	7	日月
牆有薺 五九	三九	燕燕
柏舟 五九	三九	緑衣
鄘 五九	7三七	柏舟
毛詩稽古編卷四 五九		邶
静女 五七		邶鄘衞
北風 五七	編卷三 三三	毛詩稽古編卷三
北門 五六		騶虞
泉水 五四	何彼襛矣	何彼

Ξ	目 録
狡童 一〇一	葛藟 八六
蘀兮 一〇一	兔爰
山有扶蘇 九九	中谷有蓷
有女同車 九九	揚之水 八四
狡童 褰裳 揚之水 九八	君子陽陽 八二
有女同車 山有扶蘇 蘀兮	君子于役 八二
女曰鷄鳴	黍離
遵大路 九六	王 八一
羔裘	毛詩稽古編卷五 八一
清人	木瓜 七九
大叔于田 九三	有狐 七八
叔于田 九三	伯兮 七七
將仲子 九二	河廣 七七
緇衣	芄蘭 七 六
鄭	竹竿 七五
邱中有麻 八九	氓 七四
大車	碩人 七三
采葛 八七	考槃 七二

南山 一二二	東方未明 一一二	東方之日 一一二	寸	宁 東方之日 東方未明 一一一	還 一一〇	鷄鳴	齊 〇九	毛詩稽古編卷六 一〇九	溱洧 一〇六	野有蔓艸 一〇六	出其東門 一〇五	揚之水 一〇五	子衿 一〇五	風雨 一〇四	東門之墠 一〇四	丰	褰裳 一〇二
杕杜 一二七	綢繆 一二五	椒聊	揚之水 一二四	山有樞 一二三	蟋蟀]]	唐 一二〇	伐檀 一一九	十畝之間 一一九	陟岵 一一八	園有桃 一一八	汾沮洳 一一七	葛屨 一一七	魏 一一五	猗嗟 一一五	載驅 一一四	敝 笱 一一三	盧令 一一二

目 録	權輿 一三九	渭陽	無衣 一三七	晨風 一三六	黄鳥 一三六	終南 一三五	蒹葭 一三四	小戎	駟駿	車鄰 : 一三一	秦 一三一	毛詩稽古編卷七 三	采苓 二九	葛生 一二九	有杕之杜 一二九	無衣 一二八	鴇羽 一二八	羔裘 一二七
五		八 曹一四七	1	ハ	へ 素冠 一四五	五	四	三 澤陂 ······· 一四四	株林 一四四	一 月出 一四三	防有鵲巢 一四三	墓門	九 東門之楊 ············ 一四二	九 東門之池 一四二	九 衡門 一四一	東門之枌 一四一	へ 宛邱 一四○	七 陳

常棣 伐木 一七三	皇皇者華 一七二	四牡 七	鹿鳴 一六九	鹿鳴之什 一六九	小雅 一六九	毛詩稽古編卷九//	狼跋 一六七	伐柯 九罭 一六七	破斧 一六六	東山 一六三	鴟鴞 一六二	七月 一五一	豳	毛詩稽古編卷八 一五一	下泉 一四九	鸤鳩 一四九	候人 一四八	
南有嘉魚之什下 二〇五	毛詩稽古編卷十一 二〇五	青青者莪 ······ 二〇二		港露 一九九	蓼蕭 一九六	南山有臺 一九三	南有嘉魚 一九一	南有嘉魚之什上 一九〇	毛詩稽古編卷十 ··········· 一九〇	六笙 一八八	魚麗 一八六	杕杜 一八五	出車 一八三	采薇	天保 一七九		常棣 一七五	

七	目録
無將大車 二七七	節南山之什 二四二
北山	毛詩稽古編卷十三 二四二
四月 二七三	無羊 二三九
大東 二七〇	斯干 二三四
	我行其野 二三二
	黄鳥 二三二
	黄鳥 我行其野 二三一
<u>pr</u>	白駒 二三〇
	祈父 二二八
	鶴鳴 二二六
	沔水 二二六
	庭燎 二二四
	鴻雁
小宛 二五九	鴻雁之什 二二二
小旻 二五八	
雨無正 二五四	
十月之交 二四九	車攻 二一三
正月 : 二四五	采芑 二一〇
節南山 二四二	六月 二〇五

文王 三二七	魚藻之什 三〇六
文王之什上 三二七	毛詩稽古編卷十六 三〇六
大雅 三二七	賓之初筵 三〇三
毛詩稽古編卷十七 三二七	青蠅
何艸不黄 三二六	車牽
苕之華 三二五	頻弁 二九九
漸漸之石 三二二	鴛鴦 二九八
瓠葉	桑鳸 二九七
緜蠻	裳裳者華 二九六
白華 ::::::::::::::::::::::::::::::::::::	瞻彼洛矣 二九五
隰桑 三一八	大田 二九二
黍苗 三一六	甫田 二八八
采緑	甫田之什 二八八
都人士 三一〇	毛詩稽古編卷十五 二八八
菀柳 '- ○	信南山 二八七
角弓 三〇八	楚薺 二八三
采菽	鼓鐘 二八〇
魚藻	小明 二七八

九	目録
烝民 四一八	假樂 三七九
崧高 四一五	鳧鷖 三七七
蕩之什下 四 一五	既醉 三七六
毛詩稽古編卷二十二 四一五	行葦 三七一
雲漢 四一一	生民 三六四
桑柔 四〇八	生民之什上 三六四
抑 四〇四	毛 詩稽 古編卷十九 ············· 三六四
蕩	文王有聲 三六二
蕩之什上 四○○	下武 三六〇
毛詩稽古編卷二十一 四〇〇	靈臺 三五八
板 三九六	皇矣 三四七
民勞, 三九四	思齊 三四五
生民之什下 三九四	文王之什下 三四五
卷阿 三九〇	毛詩稽古編卷十八 三四五
泂酌 三八九	早麓 三四三
公劉 三八二	棫樸 三四二
生民之什中 三八二	縣 三三六
毛詩稽古編卷二十 ··········· 三八二	大明 三三一

思文 四四〇	執競 四四〇	時邁 四三九	我將 四三八	昊天有成命 四三七	天作 四三六	烈文 四三五	維清 四三四	維天之命 四三三	清廟 四三二	清廟之什 四三二			毛詩稽古編卷二十三 四三一	召旻 四二九	瞻卬 四二八	常武 四二六	江漢 四二三	韓奕 四一九
良耜 四五八	載芟 四五六	小毖 四五五		四五	小子		9 (四五	有客 四五〇	載見 四四九	雝	潛 四四七	有瞽 四四六	豐年 四四五	振鷺 四四五	噫嘻 四四三	臣工	臣工之什 四四一

	目 録
字義 ::::::: 五二九	總計 四八九
正字 五二九	毛詩稽古編卷二十五 四八九
毛詩稽古編卷二十七 五二九	殷武 四八五
集傳用顏注韓詩異同 五二六	長發 四八二
釋文正義異同 五一三	玄鳥 四八一
詩異同	烈祖 四八〇
破字異同:	那 四七九
	商頌那之什 四七九
	閟宫四七〇
	泮水 四六七
3.5.1 上 、	有駜 四六七
逸詩 四九九	駉 四六五
集傳詩證 四九七	魯頌駉之什 四六五
詩人 四九六	毛詩稽古編卷二十四 四六五
詩樂 四九五	般 四六三
六義 四九二	齊 四六三
四始 四九二	桓 : 四六三
小敘 四八九	勺 四六二
舉要 四八九	絲衣 四六〇

佩玉 六〇二	旗幟	器用 五九九	門室 五九八	梁名 五九八	土田 五九七	禮制 五九六	樂舞 五九六	祀典 五九四	數典 五九四	毛詩稽古編卷二十九 五九四	禽蟲辨 五八七	草木辨 五七三	總辨 五六九	辨物 五六九	毛詩稽古編卷二十八 五六九	字音 五五五	字形 五三六
齊		王 六四三	衛 六四三	鄘	邶	召南 六三七	周南 六三六	國風 六三六	附録 六三六	毛詩稽古編卷三十 六三六	集傳疑誤 六三二	釋文疑誤 六一四	監本經注疑誤 六〇八	正義引爾雅疑誤 六〇七	他注引傳疑誤 六〇六	稽疑 六〇六	衣裘 六〇三

目 録	魯頌 六七三	周頌 六七一	頌	蕩之什 六六九	生民之什 六六七	文王之什 六六四	大雅 六六四	魚藻之什 六六一	甫田之什 六五九	谷風之什 六五八	節南山之什 六五五	鴻雁之什 六五四	南有嘉魚之什 六五一	鹿鳴之什 六四九	小雅 六四九	豳 六四七	秦 六四六	魏
													毛詩稽古編跋(龐佑清) 六八三	序 (阮元) 六八二	序 (文寧) 六八一	趙敘(趙嘉稷)	後敘(陳啟源) 六七七	商頌 六七四

《毛詩正

義》,才知

道《詩經》學史上

還

有

所

謂

子

夏

他

爲父親

曬

時

第

次見到《十三經注

疏》

中

的

校 明

界交往。 古編》三十卷,又有《尚書辨略》二卷、《讀書偶筆 (?——一六八九),字長發,號見桃居士,江 卷、《存耕堂稿》四卷傳於世。 諸生。 毛詩稽古編》三十卷,清 晚年研精經學、尤深於《詩》、著《毛詩 性情嚴峻,平生只酷愛讀書,不樂與外 陳啟 源撰。 蘇 陳 吴 啟 稽 江 源

年就 訴 者 子束書不觀,遊談無根,所見所讀之書,唯宋、元 (詩)獨 所注 ·鍾,並且善於思考,認爲「五 他 魏舊注。 淫 萌生了 陳 詩之説 連 啟 四 源生當清 篇累幅 書 對 五 陳氏家傳《周易》,而他對《詩經》情有 乃朱 朱子 經, 俱 唐人義 初,其時學風 解 子之誤、《詩》義本不 淫媒之談,豈可爲 (詩》的懷疑和不 疏尚 經皆聖人所 且 仍襲晚 上不 能 訓」,早在 滿。 寓 明陋習、士 如 目, 以 此。 有人 訓 遑 世 告 童 論 儒 當

校

點

説

明

朝 在 熙 與陳氏不謀 又 雖 書 經 朝夕切劘 研習漢、 序、毛公傳、鄭氏箋,從此他捨棄朱子《詩》學,轉 朝 有元 稽古右文,儒者崇尚實學,二君實啟之。」 爲本書作的序中盛贊陳、惠二氏之功,云: 廣搜博採,卻不及陳書謹嚴精 通義》二十卷,陳啟源撰《毛詩稽古編》三十卷,二 互相徵引,彼此發明,可以姊妹篇視之。 精研《詩 和 唐注疏。 惠周 ,遂攜手恢復 而 經》古說,遂開一代風氣之先。 惕著有《詩説 合。 同里 陳、 一朱鶴 《詩經》古學。 惠二人,加上朱鶴齡,在 龄 亦以 與他志 核。 發明 與 趣相 朱鶴齡 陳氏 古義 近,二人 然朱書 同時, 撰《詩 爲 阮 務 元 康 我 而

本 易 現《詩》學研究向漢、 四)、最終寫定於康熙二十六年,閱十四載、稿經三 而成。 旨 ,把《詩 毛 詩 其撰述目的,就是要尋 稽 經 古 》學 編》屬 從朱子釋 唐的復 稿 於 古。 經體 康 熙十三年(一 其 系 流溯源,推求古經 中 訓 詁 解 脱 淮 而 出 諸《 六 七 實

掊 於 微 唐 疏 雅 劉 以 筝 瑾 佐 篇 前 以 揚 明 之,名物 雄《 義 專 詩 中 門 所 集 隨 方 之 淮 傳 文攻 言 學。 諸 通 則 -小 釋 題 駁 及 以 既 序 × 日 者 諸 尊 爾 輔 家 幹 稽 以 崇 雅 廣《詩 ^ 釋 古 漢、 朱子《 本 爲 編」, 經 草 唐 據, 童 旨 詩 子 以 注 則 兼 集 問》等, 淮 明書 釋。 於 取 傳》爲 諸 宋、 陸 中 毛 題 璣 元 亦 所 傳 多, 日 草 肼 不 論 而 丰 加 至 無 爲 木 以

説 第三十 類 内 V 摘 分之 容 句、 》研 新 全書 爲 解。 究的 平 爲 有 書 卷 議 舉 關 共三十 卷二十 體 雖 許 體 系 義 爲 多 辨 問 完 附 考 統 卷。 五 證 録 題 整 異、 全 至二十 舊 經 H 引 旧 īE 前二十 説 卓 據 内 字、 詞 有 别 容 連數什」方 賅 九,凡 辨物、 見 白 博, 豐 四 地 是 富, 卷 疏 五 非 數 具 以 典、 進 證 卷, 有 本 獨 面 詳 重 稽 的 爲 抒 經 步 明, 要 疑 論 總 爲 13 證 的 在 説,又 六門。 次 計 得 成 文 己 獻 詩 其 創 用

陳 啟 源 《毛 詩 稽 古 編 》的 手 定 底 稿 本 有 兩 種 價

值

和

學

術

參

考

價

值

異,故《毛 兩 嘉 後定本 録 啟 自 純 不久的最後定本, 不 底 親 藏 得 清 母 抄 館 源 康 稷 用 純 種 本 此抄本 心、「王 藏 慶幸 戚 康熙抄 據 的 本 的 熙 小 用 寫 爲 曾 家 清 篆,爲 古字, 的 至 最 在文字上 定 兩 江 裏, 的是, 祖 張 詩 於 轉 個 後定本,又用 嘉 籛 爲 西 本(父 稽 稿本、 慶, 敦 抄 康 最 按 陳 校 曹 乃 仁校 古 本 熙 有 就 後 察 啟 陳 本」 溶 陳 編 流 做 百 寫 是 源 啟 趙 使 落 畿 所 啟 + 傳。 清抄本、 諸 3 陳 源 四 親 定 在 實 嘉 得。 王昶家藏 南文獻 源 三年 較 於 藏 + 一時下 啟 的 自 靡 稷 有 的 因 大 年 源。 的 最 書 書 康 佑 另 兩 學 兩 秋, 間 改 後手 寫。 印 熈 兩 文 清 個 生 習 個 嘉 ? 動 二十 個 此 手 本)、 淵 書 種 趙 版 皆 底 胡 慶 寫定 毛 抄 與 本 中。 閣 嘉 本 稿 爲 + 出 珽校 本 詩 康 六 過 初 字 山 系 稷 本文字 陳 自 四 七 本, 年 稽 録 熙 稿 體 龐 東 及 請 統 啟 年(一 庫 勘 初 古 四 本 斟 佑 省 兩 此 源 善 定 全 編 本 + 相 酌 圖 清 直 或 有 稿 本 去 書 稿 年, 以 比 雅 Λ 的 保 書 字 in 家 所 本 賴 世 人 少本 本。 傳。 俗 曾 存 共 館 圖 與 陳 趙 抄 最 體 前

於 袓 值 珍

(康 識在嘉慶二十年正 本, 告竣、《毛詩稽古編》至此有了第 後定本之罅隙,乃將 撮録《説文》,各詳形 孟 二)春, 康 毛詩稽古編》卷二十七《正字》門 春 剞劂。 撰爲《毛詩稽古編附考》,臚列各本異同。 (熙四十年抄本)、王本、朱本、校張本、校甲子抄 熙二十三年抄本)、張尚瑗抄本、 ,費雲倬 龐 佑清 嘉慶十八年 以刻本的行款爲標 請 善 月,則雕 書 義。 《附考》一 秋,鐫 人依樣 龐佑 刻當於嘉 刻 繕 道 清 蕆 一個刻本。 寫,首次將 刊刻,觀 目,校以 以 事。 所辨正的字 爲《附 趙 慶二十年 嘉慶十 嘉稷 龐佑 甲 考》 子 此 又就 抄 清 可 抄 九 書 體, 本 付 而 題 補 本 年

份等,其中周 姓氏」,列楊復吉等十五人的名字、籍貫、 後題「見桃居士陳啟源述」; 次「序」(文寧),次「序」(阮元), 年歲次癸酉孟秋月 目提要」,次「朱敘」(朱鶴齡),次「趙敘」(趙 Ш 東省圖書館藏嘉慶刻本,扉頁題「嘉慶十八 兆鵬, 雕 字翼雲 -0 開 蘇蘇 篇是 州府學 次「毛詩 欽 次「敘例」,「敘例」 定四 廩生,獨任此 稽古編參校 庫 科第、身 (嘉稷), 全 一書總

> 述,同 次刻 的楷化字體,在刻書史上十分罕見,彌足珍貴。 後是陳啟源「後敘」。 有「龐佑清識」。 卷三十正文終後,首「毛詩稽古編附考」,「附考」後 録 歲次乙亥春 i o 書的 次「毛 邑 龐佑 繕 詩 王正 寫」之功。 清 稽古編 黼廷氏校」,以 次「毛詩稽古 月重 全書刊刻精美,用了大量篆文 卷 一校」; 十五 __, 一人後, 題「東吴 編 次「毛詩 後各卷所題 跋」(龐佑清),最 題「嘉 陳 稽 啟 慶 古 二十 源 皆 編 長 同。 目

楷 選嘉慶本,然 文獻信息的 書改爲楷體字,保留了「敘例」和 李秉綬刊」。 八十九卷,八十九卷末,題「工部都水司郎 海堂刊、 皇清經解》通計卷數、《毛詩稽古編》在第六十至 化字 概删 嘉慶本之後,有道光九年(一八二九)廣東 體 棄,此乃大型叢書的 咸豐十年(一八六○)補刊《皇清經解 將給排版 缺失。 《皇清經解》本 而考 慮到 要 造成 整 嘉 理《毛 較 慶 大 以 本中 體例 困 嘉慶本爲底 詩 難 正文,其 使 稽 大量存 不 然 古編》, 便 卻 作爲工作 在 導 他序 本 的 致 中 當 然首 篆 較 跋 但 臨 》本 文 多 則 11

校本。 بأرا 印 仁校清抄本(簡 嘉慶本、 的 東省圖 文 底 淵 本, 閣《四 故 一九九一年《孔子文化 書館藏清 不 得 庫 E 稱「大全本」)、臺 全書》本(簡 而 康熙抄本(簡 用 皇 清 稱 經 ~ 解 大全》影 稱 灣 四 本 庫 商 康熙抄本」)爲 爲 全 務 底 印 書》本」)、 印 本, 清 書 館 張 而 影 敦 以

序、龐 的 於費雲倬《毛 存有用的 篇首, 源 (兹予捨 行款, 的 跋(所 是 此佑清 後敘」置於卷末, 書的 儘管 刻 棄,僅 跋 謂 兩 書 詩 放在陳氏 有 信息, 後敘」),故今將 個底稿本,原只有朱鶴齡 稽 1.參考其内容作校勘之用。 古 定 特 編 的 將 附考》, 「後敘」之後,以供 校 以 趙 、再現 勘 嘉 價 嘉 因 稷 陳 值 慶 標 敘、 書的 本 但 注 的朱敘 文寧序、 無 的 原 的 排 是 多考。 貌。 敘和 印 嘉 阮 的 廖 爲 置 陳 本 保 於 啟 iX: 至 元

祭祀志》、《通

志》、《一

統

志》、《郡

縣志》,

諸

志

字

寫

作

記

跃

然

陳

氏

原

書

如

此

整

理

時

未

作

回

記」,或

作「意」。

如《

漢

書

地理志》、《後

漢

書

啟

放源的

父親名「志中」,故書中「志」字

作

皇 字, 乾 諱 生理解上的歧義。 改 名後不標該書的 卷 隆韓 題和總 整理 清 康熙抄 好 一」至「卷三十」,以醒眉 在 皇 經 「弘」、「曆」字、嘉慶 解 時 這 清 卷 些 以 本 經 標 數, 康 解》 不 題, 記 熙抄 而在「毛詩 避,而《皇 卷數。 一字 所 標 康熙諱「玄」字,雍正諱「 收 題 本爲據,悉予逕改,不出 下 各 望 今 書,通 爲 便 清經 目。 稽古 韓 本卷 知 律 當 「願」字,道 删 編 解》本皆避 編」名下依次補 是「 所 棄「皇 卷數。每 收 一志」 書 字, 清 的 光諱 書名, 經 卷皆 上 胤 不 校 解 寧 述 二字 會 記 上 諸 産 的 書 以

校 點 者 王 承 略 馬 11. 方

燕説 符,天人相接,此 駁,自有聖門闕疑之法,在今人概點 經最古,鄭 夏之徒,大、小 亂其間,此所以爲善述也。 僥之類,尤爲矞宇嵬瑣,夫子亦時時述而 子顧信之不疑。 可深求者矣。 人之所有,無不攷求詳慎,而 此 蓋其學綜典墳 昔夫子删 夫三皇五帝之事,若存若亡,蓋 不 可 康 解 成 毛公亦秦、漢間 定六經,而 如「河圖」、「洛書」, 也 取 與後 下至商羊、罔象、汪芒、 其 ,徵文獻,禀 爾 、義 世之天書何異,而 雅 而 其 爲箋, 自 《詩》敘出於子 不敢以 言曰 書,古人專 師 即 傳 「信 出 不 私 爲 訓 荷 苞 郢 免 見汨 視 有 而 僬 踳 古 書 他 夫 叶 不 好 識

發商 説。 求 荒也,荒於執一先生之言,而不求其是。 亦當爽然心開,欣然頤解。 宗古義,宣幽 推旁通。 固 屏 則考亭之意,亦豈欲學者之株守一家,而 者不敢異 可解 今人動以 文》,名物必稽陸《疏》,皆先 稽古編》若干卷,悉本小敘、注疏,爲 廣青衿之疑問,樂菁莪之長育」,仍不用 其 陋荒忽者哉! 除漢、唐以來諸儒之箋傳,如今人之安於 (是,必自信古始。 搉 門人問之,曰: 也 》,亦子夏之徒爲之。 而 余書猶參停今古之間 新義 同,然考亭嘗爲《白 説 成,深服 者謂 決 掩古義,今音證 冷滯 考亭《集傳》頒 劈肌 余爲《通義》,多與陳子 其 「敘説 援 夫《詩》之有敘也 據 中 精 理,即 鳴 儒 至六 博。 自不可廢。」 鹿洞賦》, 呼 古音,此又不 説 諸功令,學 ,長發則 書必 考亭見之, 《詩 近 》律 乃 經學之 祖《説 自 之 中云 專 交 然 成 Ę 盡 己

敘

朱

義乎? 道,汩汩然莫知其極。今與之導源岷 湔 江 非《記》所云「先王祭川,必先河而 知緣厓數百、激湍萬里之皆濫觴於此 湖而下時也,後儒之説,則 漢之發源羊膊嶺也、毛、 世有溯源三百者,必能尊奉此書爲 鄭 歷三 則 出 後海」之 峽,分九 玉 也,豈 山,使 壘、 過

微言未墜,長發其竢之而已。

康熙十八年季秋朔日同學弟朱鶴齡

撰

198

弊。 巧,與 更新 從 伍 雅 名曰《毛 余,共商搉其 氏 於經也。 衆 訓 > < < 事 **、説**,尋 輒札 ·焉 先 而 圃 經 解 孫 儒 諸 登 漢《 故》。 詩 益 氏 適長 後儒厭故 記之, 經 釋 俗 稽 流泝 離。 故 詩》 注 經 詮 (疑,因 古 \times 儒 疏 故者,古也。 有 惟 積 編 源 ^ 朱子 源,推求古經 援 ,惟《毛詩 毛 久得 也惑之,竊 ^ 求合古, 一鋭意 叔 喜新,作 云 魯故》、《韓 故 以 世 爾 訓 如 搜 所著《毛 以 傳 干 討 》敘 證 原古 後儒 聰明以亂之,棄 合於古 *, 條 先 不 加 傳 本旨 故 書》 人釋經,多 彙 自揆,欲 古 釋 以 詩 最 ×, 辨證 經 輯 通 所 古 以 爲 有 成 義 挽 説 齊 擬 以 大 多 得 影示 首 其 冬 合 小 后 彌 取

敘

例

於今。 訓 乎? 之目 宗《爾 經文 古 非 古聖賢 刓 不可易也。 差 可 傳 師 竹 由 既 方, 者 殊 正 義 帛 通 授 師 論 一也。 若 授,不 譌,篇旨或因以舛,非小失也。 也。 尚 豊 ,亦互異,故字 所 通古 匪 夫積字 雅》,於今似爲驚俗,在古實屬 然據 也 行事,因乎時耳,宜於古 存,尋釋傳義,以考經文,其 書 能 胡、越之不 此當稽古者一 確 日 辨 專 經 今人習俗 又三代迄今,垂二千餘 惟 用古義以入今文,固 有 一之積。 而 據 其 以就 立身於古世 畫 有 孰 經 0 與 句, 本, 是哉? 今義,亦豈合古 同聲 義有 時 1,併謂 諸 況《詩 積字句 世屢 儒 也。 矣。 不必 傳 今 以 古 更, 》得 寫 而 師 論 人 毛、鄭字 又古、今文 相 者,未必 風 有篇章 授 斷古人, 無 符 師 於 難 俗 雖 其 載 者 諷 讀 此當稽 人之心 説 八異 迥異, 絶, 恆 誦 時 訓 同 雕 ·, 字 詮 宜 義 人 斯 率 猶 得 而

199

弁冕 信 致 類 即 訟 規 Ш 詩 ?,禘祫郊邱之議 縱 古 陵 以 而 閒 美 闕 以言古,不可 車 谷 還,是非莫定 有 或 其 屢易其形,草 旂 性 相 偶 之制 疑 情 同 符 得 於古 勿以今之似 非 鼐 矣。 俚 移古以 此 焚 鼎 党 俗 此 木 俎 皆難 書 之 當 必 禽 豆 而 稽 流 就 亂 可 魚 之儀,朝 臆 後,典禮 古者 傳, 證 今。 古之真 不 決 於 恒 即 者。 =經 其 厥 文 會 也 氣竊 ? 地 性 無 人 燕 至 一、祇 名、 憑 之 於 、響之 謂 存 又 有 其 附 物 聚 岩 口 Ш

其 魏、晉、六朝 亦 解。 擇 平 華1 宋、元諸 立 備 矣。 於國 而 古今爲《詩》學者 集傳 從 今日論《詩》,不 學, \approx 家之説 諸家之説 故 大全》,今日 故 斯 所 編 辨 IF. 則 證 ,則《正 參 ^ 無 集 酌 心 郊 慮 此 傳 舊 師 生 數 義 V 詁 一尚 + 1 所 書 沙所 不 家,其 之, 以 未 爲 引用 逞, 取 多。 創 mi , 注 立 惟 説 也 大 其 新 當 疏 燦

百

有

著, 全》 亦 所 互 編 有 輯 得 巾 失, 故 但 辨 世 證 鮮 亦 尊 及 信 焉 無 若 庸 置 近 喙 儒 焉 所

爾

不敢 著於 去古 朝 諸 見 決 觸 取 信 聞 儒 所 及 發者,亦 1,然其 從,不 唐 文 妄 編 益 折 語 論。 遠, 衷 又次之,以去古 俾 於 衆説 次之,以漢 미 心 敢 援 又多 引據之書 知 展 憑 據 " 疑 卷 臆 鑿 詳 取 爲 引 明,議 空之論, 譌 面 焉 驗, 斷 據 世 未 以經 古 稍 近 定者 示傳 論 其 書 遠 古 『,擇其 典 傳 也。 引 也。 謹 信 確 託 爲 據之書 也。 之書 宋、元 主 闕 鄙 魏、晉、六 義 所 其 見 優 而 不 限 賴 非 迄 兩 必 者 知 今 以 所 漢 於 明 以

及。 駮 如 此,不 難 其 前 指 人 敢攘 摘 謬 有 誤, 人之美也。 未 已 盡 經 則 他 曲 書 若指摘未當 暢之,必 指 摘 者 先云 槩 則 某 不 説 贅 加

持説 也。 同 采 者 録 不 間 但 鄙 長 讀 復 有 説 孺《通義》駮 與《通 覼 ,余之述是編,以 書論古不必立異,亦不可苟同, 縷 若 義》殊者,各從所信也。 所 正羣言, 見 雖 同 補《 最 而 通 説 爲允 有 義 當 更進 》之未 頗 亦亦 其 備 故 亦

書,偶因文便,非義例所存。 引述諸儒,或以名,或以字,或以氏,或以略述之,希見者詳述之,其所援據亦然。至 不憚

詞

費,正

欲

兩

書

相

輔

而

行

耳。

字比也,故止題 語 面 頻及,或連 此編之例,有誤 證 篇什 章 而 一不載 闕 則 辯,無 如, 爲 經文 非 同 則 訓 置 爲 釋 之。 家 句 或 櫛

卷。 要》,爲《攷異》,爲《正字》,爲《辨物》,爲《 卷,寘諸後,名曰《總詁 其 辯 有 諸 義 條 統 各隨 全 經 本詩 詞 連 數 復類分之,爲《舉 次,釐 什 則 别 + 爲 四 數 五

典》,爲《稽疑》,凡六門焉。

竪義 義因 箋、《 經注 以 説 盡者 經 可 心爲次。 釋文》字義故實須加攷證者,辯 爲 稍越常聞,恐人河漢其言者 譌 ,後儒之説未甚著 而 總 旁及他典 脱已 博聞之助者 詁 》之後,又斷 列《稽 者 疑》 論 ,皆彙入焉。 圃 聞 以 斷 辯 已 而 附 一明尚 析 其 録 未 ,三家《詩 誤 其前 詳 有 須 餘 證 卷。 辨 後仍 (詩 傳、 凡

省, 佮、 膚等。 薛、戟等。 俟 鰲 豑 有分一字爲二字而 秩 專、 澄 、载皆作秩等。 移、沽、 授、拯、 字體譌 詥、

匌皆作合,复、復、

复皆作復,囚、 有合數字 有妄 . 篤等。 飲 陋, 增之譌, 囈、 爲 於今極矣,有俗 覓 有 有 因 譌 匝 妄 字 等。 形 者 減 而 如 近 、菽、燼、 之譌 有借 譌 如 而 瀾 者 譌 與 如如 如如 用之 寂、 漣 者 幸、 助皆作忽 韓 體 渻 熟、 肅 雪 之 譌 如 省 與 栖 憂憂、 鎡 調 雷 省 如 皆 臚 衞 吅 段 作 與 如

字》門。 見者不復注。 識。其稍晦者注於本字下,每卷止注首一 斟酌雅俗,略正其一二,務令時目一覽便 覽者芒然,必至廢書而歎。今止於點畫閒 悉加釐定,一遵《説文》,●又恐太驚俗目,俾 書,準諸古義,大半皆譌。繕寫斯編,本欲 等,與借用似同而實異。此類不勝屈指。取彼俗 段、孝孝等。 有因音近而譌者, 至經文字體,則别詳《總詁 如鋌錠、 、飯匓、 · Œ 字,再 但 袒

作「古體」。作「古體」。

四

嘗思之, 唐即

晉也。

春秋

諸國,齊、晉、秦、

毛 一詩稽古編卷

江 陳 處 士 啟

吴

國

風

達、 程正 + 五 叔 或 差長,要於删《詩》本意 次 第 先 儒 多 有 論 説, 未 惟 必 孔 合 仲

也。 》、《秦》二風 以今《國 風》 是聖 較之,吴季札 心更定, 餘皆國 所聞,止 史之

舊。 源謂國史次第,原 無取義,夫子述而 不

爾。 抑《秦》於《魏》、《唐》之後,其 作,各仍其舊文,獨更置《豳》、《秦》以示 殿《豳 》以 近《雅》,先 儒之説允矣。 義 猶 缺。 意

然竊 關

集傳 釋 關 鴡 舍毛、 鄭 而 取 王

王也。 疆 《唐》於《秦》,殆以 以 二霸矣。 五國、皆服於晉、雖先晉、無 先亡外,餘爲國者七耳,其衞、鄭、齊、陳、 國除周、召、王、豳 春秋之不 霸,有功王室。 楚爲大。 後,世 西 垂, 爲 與晉世 楚雄 故抑秦 遽 盟 爲 主。 南裔,秦 齊霸 爲 戰 所以 讎敵, 存 或 天子畿 晉失霸,天下無復宗周。 僅 周 ,晉之力也。 尊 桓公一身,晉自文公 起 室與? 晉也,尊晉 如 内, 西 復先之, 嫌也。 戎,惟齊、 邶 又案,十五 鄘、 夫子先 所 則 獨 魏、 以 秦 疑 晉 尊 於 鄶 倔 曹 更

周 南正

風

鴡

菜, 贵 女爲 逑 其 側 僅 子 臣 配 Ш 從 相 后 友」「 閣 诵 言 説 妃 應 官 嬪 可 公 王 爲 鴡 義 寤 是 平 侯 難 指 御 配 配 m 於 「樂」仍 亦 后 ? 文王 寐 通 輩 君 也。 配 敘 辨 Ŧ 首 (兔罝))篇 從 妃, 矣。 程 不 子 求之」不 君 云 之 也 又《大全》載朱子之説,言此 章 程 一則 ^ 口 口 以 指 子 當 而 也 耳 假 嚴《 妨 稱 配 淑 嬪 釋 矣 樂》 民 書 ^ 女 於義,不 西己 次 配 御 云「公侯 得 然 緝 關 荇 即 也 篇 耶 惟 章 案 論 爲 鴡 菜 則 ? 后 云「率 宋 召 后 古 伊 求 学之 一左 孔 嚴 寤 妃 誥 仍 妃 · 指 淑 又以 Ш 傳之解 **松梨著** 人文義 好 寐 義 右 爲 **>** 口 女, 文 血 著 仇 由 云 思 樂 流 賦 《 詩 稱 Ŧ 淑 衡 新 如 羣 何語 之 服 體 緝 E, 解 V 女 此 意 讎 是 兀 得 何 今 爲 無 同 輾 爲 民 武 别 淑 釋 意 不 以 解 卷。 后 口 輔 | 妾媵 之不 求荇 百 是 夫 女 朱 求 如 非 求 好好 指 妃 是。 墓 爲 反 君 口 伊 淑 解

> 於 全》。 況 出 謂 爲 曰 之, 理 文 》、《澤陂 文 矣。 夫文 王 王 故 此 未 思 能 E 乃 昏 淑 形 **>** 寤 不不 相 大 容 女 寐 去 王、 應 閒 寤 無 至 先 王 事 寐 幾 回 有 季 尚 舊 不 妾 舊 宮人 安 反 媵 得 宫 側 席 謂 人作 何 也 性 因 之 由 又 之 事 殆 知 爲 正 亦 與 見《大 之説 尤 平 是 礙 ? 月 直

驚。」 也 鳥 處 别 獨 三説 皆 云 取 載 也 有 若夫鷲亦 郭 揚 郭 所 王 慎固 許 謂 如 氏、 鴡 徐 義 郭 鶚 鉉 鴟, 云 妣 謂 璞。 云 文 深 陸 鶚 白 深 名 陸 傳 義 解 佃 目 鳥 警 雕 雕 語 氏 者 取 皆 不 目 類 似 與 諸 不 云 再匹, 之象, 璣 今 E 鷹 鶚 鶚 此 骨 同 性 揚 江東 尾 露 立 最 類 據 好 雄。 F 詩 則 合 而 此 峙 白 謂 幽 許 異 别 興 州 之 則 每 處, 慎 義 鳥 。鳴。」 嚴 鶚 人 立 雅 是 謂 白 當 之 不 緝 是 爲 移 有 之 陸 氏 疏

之鳥

0

^

×

^

爾

>

間 未 詢 是 正 尾 矣。 諸 因 白,鶚之别 口 有之。」然白 白 以 淮 鄭 證 人,遂釋之日 為 樵《 ^ 尾 周 白 通記》以 種,三説 南 鷹似鷹,不 而 》,近 傅 會 爲鳧類, 世《名物 相去 也 、狀類 似 不遠,郭 朱 鳧,江淮之鳥, 子 尾 鳧鷖,今江淮 疏》馮復京著 祖 有 其 一點白 獨 義 得 又 其

清 隹 韻》子余切之誤。 七余切,音近趨。 母 聲,許規切,仰目也, 也。 雎、《爾雅》、《説 今人多 又雎 讀 陟 如 文》皆作鴡,從鳥 砠 字 菹 叔 與睢 又息 醢 苴 之 漆 追 字異 菹 切,水名。 沮 八雅從 蓋 音 承 且 同 ^ Œ 皆 Ħ

駮之,良是

傳 淫 摯之言至,疏 而 其 義 能 色。 有 毛 傳 别 〕」傳爲摯字 以 鴡 蓋 至 興后妃説樂君子情 鳩 又 摯 申之云: 與 圃 實取 有 别 别 至義,箋、疏 義 」,箋申 Œ 雌 相反,合之方 雄 深, 其 情 意 皆 意 猶 以以 善 能 至 沭 厚 爲 不

> 案鵙 但詩 錢 陽 傳》云: 見后妃之德。 修。 氏《詩詁》 人取義在至,不在鷙 乃雕類,定是鷙鳥 本義》云: 「情意深 亦譏 若作 箞 至。」亦箋、疏 鷙 義 不 解,文義 ,古字摯、鷙 爲 取 耳。 非 其 摮 ·, 皆 偏 (4) 之意 未 枯矣。 取 喻 亦 也。 其 傳意。 通 别。 集 歐

深宫? 宫也。 貞專 矣。 貞 專之善女」,明是指德 貌。」 且 窈窕」,毛云「幽閒 箋、 毛傳 韓 見《文選》李善注。 疏釋爲深宫, 詩 淑 女皆就未 薛 君漢。 正與 也, 得 章 而 而言 句 時 謂 毛同 · ; 非 又云 毛意 言,安得先在 謂 意 亦然, 是 所 處 幽 之 閒

案: 選》注引此詩皆 方」,毛皆訓 逑,本亦 逑 本 周 、作仇。」又《禮記》及《漢書》注、《文 訓 南 几 斂 兩 聚,《 鄭 作 言 皆 仇, 關 訓 好 鴡 怨耦 則 仇 》好好 仇字爲 逑 大雅》言 小 Œ 釋 雅》之「手 矣。 文云: 仇 又

然非 仇 好逑,是和好衆妾之怨者,不亦迂乎? 亦引《虞書》云: 爲《詩》設也。 「仇,合也。」又云: 毛 所以釋《詩》, 亦 訓 兀 怨耦之解見《左傳》,《説文》 丰 鄭泥 義 怨 「仇,匹也。」此 長 怨耦之訓 兀 矣。 日] 逑。」 爾 蓋 謂《關 雅 亦古 兩 **>** 云 訓 鴡 義 IE.

良 神 象其美大,正形容「友」、「樂」之情耳。 爲 初,而「友之」、「樂之」,正言助祭 毛意,則琴瑟、鐘鼓爲 ·求」是未得而求,「友」、「樂」則預計 神 設,與「友」、「樂」何預哉? 加 關 設、毛義勝矣。 鄭皆以 鵙》二、三章,毛皆以未 已得時言,故「求」是 琴瑟 淑女而設, 喻其和 孫毓 得時言, 如 時 平 鄭 追 也 初得 -, 鐘 若爲 意 游 鼓 則 故 如 其 時

鋭而長,字本作莕,荇乃重文。《爾雅》「莕,荇、蓴相類,實二草也。蓴葉園,荇稍

誤。 《草木疏》吴陸璣著。言此 修。及《埤雅》宋陸佃著。 亦同,茆乃蓴也,豈荇乎? 用,意古今物性不同乎? 接余,其 夏有華,或黄 市, 圖 [經》宋仁宗時《本草》。 《周禮 鳧葵。」《説文》及《廣 葉 苻 • (或白 醢 是 人》注、《 也,《 ,實大如棠梨,中 謂 説 皆以爲荇即鳧葵,恐 菜可 文》作 雅 魯 今人不 又《唐本草》蘇恭等 頌 > 魏 按 毛 張揖著。 酒 食,醫方鮮 莕 傳 有 ௱ 並 菨 之説 蘇 餘 頌

《檀弓》「左 本作「ナ又」,今用左右爲ナ又手字,而别作 佑,俗字也。 方」,無方、有方皆可言左右矣。 薦之,於禮當有常 助后妃求之也。 義難通矣。 左右流之」,左右音佐 右就養 朱子以芼爲 助義本作「左右」,其左右手字 《集傳》 無 所,安得云 方」,又云「左右就養 熟 訓 而 爲 佑, 薦 無 無 之也, 方乎? 方 助 又案,佐 也, 則 熟 於 嬪 有 苇 御 而

佐 有改之未 佑 義 字 見《六 、助 字以當 義 盡者 俱 月》、《下 助義,非 溷 放故 用 雅 左右字,蓋衞 武 占 俗互 **>**′< 也。 一見也。 韓 ^ 行詩 奕 || || || || || 包 後儒 改 佑 詩 〈經字, 字, 徒守 餘 則 m

訓

,遂多誤

解

故訓 此。 不詞 베 芼 矣。 朱《傳》釋 流 加 訓 爲 擇之」。 況 求、《 流 熟 既 爾 爲 脯 采既 爲 「順 雅 薦之」。 取 × 流 爲擇 毛 則 而 傳 侵「采」義 取之」, = 同,古字 則又侵 字 訓 則 17,故 「芼」義 殆 義 經 相 文 訓 本 因 采 爲 如

轉亦 義 韓 定 伏 反 枕 相 爲 傳 側 古 一帝],伏枕 同 注 ,俱 字訓 箋云 猶 又《何 爲 反 是身伏 必 卧 側 有 晨 而 人斯》箋 本,不 凤興」, 旭 不 加 周 而 不周 見 敢 不 以 又《澤 反 用 周 輾 輾轉 側 臆 轉 既 説 輾 陂 釋 與 爲 》詩 反 連 如 疏 个,文 側 輾 引 輾

> 報 本。 過。 展」,是知 無二義。 展 車、展。」則 異,不甚分别也。 愈 反 鵙》兼言之,《澤 説 〈詩》 輾 字,無 何側 文長箋》。 知 者,轉之半。 四 四 側 證《詩 又《釋文》云: 也。 也,尼 字 者, 字義 輾 義 車旁皆後 一 《澤陂 字。 輾 轉 》,析 言 本 展 取 同。 字殆始於《字 輾 之留。」 切 同 **宝** 陂 輾 轉者,輾之周。 四字爲二義, 何 字 矣。 與 張揖《廣 》、《何 蓋 字、《釋文》亦 人 是 篇》展、輾二字皆訓 輾 此 輾 語 斯》 加 朱 報 字 四 本 甚 人斯》各言之, 也 ^ 音 字 字 箋 傳》 雅》云: 新 義 林 亦 所改,恐 兩 而 近世 美,然 **%** 俱 作 始 見《詩 見 倒 不 展,吕 云 ^ 反者,輾 析 其 其 趙 同 説 「本又作 之 大同 不 文。 凡 不 文》 **>**, 展 知 忱從 日 疏 夫著 之 有 何 要 駶 小 以

云 傳 目 芼 芼 搴 爲 也。」 擇 與 孫 炎 爾 注 雅 云: 異 義 ^ 阚

右現 其文, 也。」 義 非 云 現 詩 拔 異 擇 確 ?》傳。 取菜 ,擇也。」《玉篇》亦云「擇也」,引《詩 , 但 之一。 案,《 、毛 者, 解 某 又申之曰 也 近拔 氏 就 也。」某、 本 然 詩 古字 與擇 云 行詩 源 訓 以 芼字 謂《詩 擇 現, 多 **>** 「拔菜 》釋《 原各一事,合之終 郭 釋 借用 塞 不 塞 車 亦 《詩 》、《雅》兩 丽 訓 釋《 猶 作 》,不 ,芼乃現之借 於 擇 芼。 拔 . 現,《 雅》文,孫 義 之」,蓋欲 也 必 離 孫 援《雅 矣。 芼字文同 説 據 郭 文》 屬 毛 孔 璞 則 耳。 通 武 以 云: 影左 爲 旁 疏 兩 云 斷 毛 據 顧 釋 義 引 而

夫 菜之菹 人 八助 竹惟 而 羹 薦 傳 菹 用 亦 芼,所謂 不 訓苇 設 羹, 爲 擇。 故箋 鉶羹之芼也。 宋董氏 云「后妃 名 供荇 道 后、

字《説

文》

讀

如

苗

徐莫袍

切,

皆平

聲。

^

玉

篇

『》莫到

切,

則

去聲。

《詩》釋文同《玉篇

《雅》,孔據《雅》以

合毛,皆過

也。

又案,現

爲 人采 爲 矣。 廣 賦 興][而 が故 菹 蘩,大夫妻采 詩 故 ,生釀之,不 從 周 董 云 南 説 二熟 》爲 亦亦 蘋 興、恐非 而 用 無 藻,皆 薦 熟 害。 之 也 日 實 但 芼 《集 事 E 也 后 傳 則 》以 采 直 召 荇 是 南 夫 菜 羹

葛覃

子哉 長 功,不足稱 辯 に富貴 説 ? ^ 淡機 葛 尚 餘辯 覃 之, 述」。 不 **>** 敘 見《通 知絲枲爲何事,況 因 此 又 述后 義》。 恐 謂 非 妃 「未 在 確 嫁 論 父母 時 大姒 自 豪 家 當 家 事 大 女 服 邦 子 勤 朱 之 生 子 女

説 是 治 見 既 絲 后 成 綌,是未成 服 妃之儉,義俱 衣 之無 時 也。 斁 布時 ()、箋 由 箋説 也。 通 云 今 見 但 后 .后 解 服 妃 妃之儉,於下 爲 整 之 服 也 勤 之於身, 由 謂

章澣濯見之,則此章專言勤,優矣。

澣對言 也。 澣 必 詩人設爲商度之詞,以 事 結, 殆非文勢, 故不從傳。 則 偏 ,不敢自專,必詢 ,公服宜否」,自 有荅詞,方見其爲問哉? 詞複矣。 否,皆當澣之。 疏語未當。 害澣害否」,毛以 ,此以澣否對言,意各有 孔疏右鄭,以爲有問 竊謂 論澣否之常,非代詩人荅 師氏,正 爲問 形容后妃之心耳 毛説 殊不 見其 詞,鄭以爲 勝 毛云「私服宜 也。 當, 尊 詞 知 敬 如 澣 上以 而 鄭 師 濯 無 無 何 傅。 説 汗 總 所 細

卷耳

緑》 諸 婦人思夫之詩,如《伯兮》、《葛生》、《采 今以《卷耳》詩 作, 見於變風 爲后妃 變 雅 思念君子,恐 所 以 閔 王 一道之 不

> 其靁 衰,征 以 位之後,后妃年應相若。 於中身」,●孔傳云: 詩,不得爲《周 是託諸空言,終有 不已媒乎? 傷離惜别之情,發 君,母儀一 思者也。 念其夫,形諸怨歎 義,故列於正 家兩 役 詩 若如 不息,室家 國,且年已五 閔 至於登 其 今説 南》正風矣。 風,曾后妃而 君 「即位時年四十七。」案征役當在 不足 子,猶 傷 爲 怨 乃作兒女子 於雅 高 咏 則《卷耳》當 曠 歌 極 六十、《無逸》「文王受命 異 能 刺 道。 目,縱 傳 也。 勉之以 況民 時 反不若哉 播 \wedge 也 后 汝 態,自 酒 臣 家 爲 義 妃身爲小 墳》、《殷 娱 正,勸之 民之口 婦 商 不 懷,雖 道 女思 紂 繫 其 於 刺 即

多 菜 耳,見《廣雅 卷耳,即今藥草中之蒼耳子也,異名最 曰苓耳,見《爾雅》及毛傳。 * 曰 胡莫,見《神農本 日 葹 見《離騒 草 經 炎 《草

●「於」、《四庫全書》本、《尚書・無逸》作「惟」。

亦 叢 蒼耳相 性 記》亦同。 殷敬 之,謂之常思菜。」常思者,其常枲之譌 枲。 耳 「萛思上聲。 木 從郭。 1味,頗見於陸疏、郭注,惟陸云蔓生、郭云 生 疏 ,皆見《草木 爲 見《爾雅》郭注。 顺唐人。《列子》釋文引《蒼頡篇》云: 異。 類 E ~,其 卷耳之即爲蒼耳,信矣。 耳 耳,一名蒼耳。」《埤雅》 宋《 、疏》。 璫 郭言叢生尤得之。 草 圖 曰羊負菜,見《博物記》。 「經》謂 陶 日 隱 白 居 陸、郭所言皆與今 胡 云 荽,息 今《集傳》 遺 僧人皆 引《 切 其 利 華 乎? 日 葉 楚 食 常 爵

惟崔 本此乎? 之用 此説 . 寔《月令》有「伏後爲麴」之説,張、吕豈 見《讀詩記》。 張子厚、吕 也。 今造神麴亦用蒼耳汁,然神麴 案《本草》蒼耳並 和 此見 叔皆謂采卷耳 下章金罍、兕 無 釀 以備 酒 觥 之用, 語 酒 一,故 惟 醴

> 章分爲兩意,既諷君子當爲官擇人,又勸其 於賢勞者致恩禮焉。 此二句言,知臣下之勤勞,指下三章言。 章皆咏使臣,故謂此二句,亦言賢人君子不 當令之遠行從役耳。 周之道路,吕東萊《讀詩記》取之,徒見下三 皆同,其説古矣,非 云: 詩 人藥,不以釀 卷耳》之周行,則《左傳》、《荀子》、毛傳 取 憂爲 (詩))有三「周行」,鄭皆釋爲周之列位 憂者之興也。」酒醴之説 興義, 也、《月令》之麴 在不盈,不在 妄也。 文義相承,自應如 然小敘求賢審官,指 宋吕大鈞 殆 卷耳。 ,未必詩旨 斯 類 改 0 故傳 此 訓 況 74 爲 義 此

案、《説文》、《釋名》、《玉篇》、《廣韻》之釋岨,石爲砠。」而毛傳反之,疏以爲傳寫之誤。今作岨。《爾雅》皆作砠,《釋文》作確,《説文》引《詩》。個、確、岨三字實同一字,今本《詩》及

學未 其 字 誤當在《爾雅》。 説 並 與 盛 毛 焉 載 而二 同,而崔嵬無 岨 劉 解 、名熙,著《釋名》。 書之釋岨皆合於傳,則傳寫之 同 毛 若屺、岵,則定是傳誤。 砠 訓 解 同《 惟《玉篇》祖、 許 爾 皆漢 雅 》,則 人,時 岨 兩 毛 存

樛 木

當 别。 朻。」《爾雅》云: 喬木上竦,正相反, 文》云:「下句曰樛,从木,翏力救切。 村,高木也,从木, 山居由切。 爾 美 詩興逮下,當以樛爲正。 逮下之仁,一喻立身之潔,義 釋文》云: 「木下句 而《周南》詩俱託興焉, 融、《韓詩》本 日 聲。」則二字義 又樛木下垂, 朻。」案,《 各有 聲。」 並 説 作

樂只君子」,鄭訓只爲是,云「樂其君

子。 切,●《韻會》云: 止 引。]則以哉字代之,亦可通 案《説文》: 皆云「樂哉君子」,語氣雖 施於君子,使得享其樂 ,俗讀如質者非是。《玉篇》之移、之爾二 孔氏申之,以爲樂是君子,言以 「只,語已詞, 「惟有此二切。」 也。 别 吕《記》、嚴《緝》 也。 从 而 П, 大 又只讀如 義 象 則同。 氣 一禮義 下

螽斯

箋、疏讀爲一句,故朱子譏之,謂「以不 於「言若螽 歸之螽斯,乃敘者之誤」。《通義》謂 ^ 螽斯》敘云: 斯施 句,連上文讀,而 「言若螽斯 不 以「不妬 妬 此 忌。」 敘 妬忌 當

●「甭」,嘉慶本同,康熙抄本、大全本、《四庫全書》本作

集, 忌 自 通 便是螽 下 文, 文義 斯不妬忌之驗,即 最穩,得之矣。 如舊 然 羣 讀 處 和

矣。 引此 又此 言。」此 荅張 孫 爾 者 之賢,毛分釋三 逸云: 亦云: 爾爾 今以爲 詩 《螽斯》 善 每 后 上二 會 妃 篇毛不言興, 螽斯之多子,殊少義趣。 「此實 也。 毛 「賢 一句言 意 母 一義 也。 振振、繩 興 使子賢 螽 其 也。 今以 斯,下二句言 優。 加 繩、蟄蟄,正謂 文義 鄭以 爲 也。 而 比 韓 可 興 意 恐 解,故 詩 釋之,其 與 后 外 不 毛 妃。 傳》 同 不 子

桃枖 兔罝 芣苢

或 自 ,則云「文王之化」,義各有攸當 見。 周 南》首八篇 至《 江 漢 \leq , 敘皆言后妃, 《汝 墳》二詩,化 也。 而 文王 晦 行 之 南 翁

> 言政 吁 世 者義 所 憂在進賢,理 樂有子,皆婦 置》、《芣苢》三、敘,則 者,以勸君子耳,非自爲之也,《 止 擁 致 至於化行國 譏之,以爲 门則 兀 致,一云化,一云美,孔 言后妃一身,不及 1 虚 也。 婦 通 器, 敘之言安有是哉? 是 ,總是美 庶女孝義 禮 爲 化者,德 樂征 寄生之君 中,三分天下,皆以 以 人事 亦 化所 相 伐,皆出婦 后 感 修 也。 通 妃爲主,不 也。 致 於身,而 及國 梱 人,尚能 賢 耳。」 也。 俗作閩。 才衆多, 中 且此三詩敘 疏 歬俗作前。 是 矣。 人之手,文 以 釋之云: 聞 厚 復 上 敘止言化,不 外求 者 人倫,美 皆 桃妖》、《 知 然 爲 興起。 與《關 有文 宜 辯 賢 后 五 室 説 審 篇 王 妃 _ 云 王 鴡 語。 兔 風 官 徒 所 後 敘

本補

❶ 「處」,原缺,據康熙抄本、大全本、《四庫全書》本、嘉慶

篇篇 正 至后妃之賢,是文王「刑于」所致。 晦 俗,況以 所以美文王。 翁 所 並舉而言之,古人文字安得蕪冗如此 云 國母之尊, 禮樂征伐者,政 舉此以見彼,足矣。 可 謂 必 也 無 敘 其 無 理 美后 哉? 是 言 如必 妃, 也。 若

桃妖

女子笑貌,當出三家《诗》。 天,本於兆切,屈也,今詩借用耳。媄訓爲爲桃之少壯,義本合,故《釋文》獨引焉。正。枖,《説文》以爲木少盛貌,毛亦以夭夭正。枖,《説文》K、媄二字並引此詩,是詩夭字《説文》枖、媄二字並引此詩,是詩夭字

二章宜字義亦應爾。首章傳乃云:「宜,傳於末章云:「一家之人盡以爲宜。」則上《桃枖》三章,三言「宜」,本一義也。毛

成反據前解以易後傳,殊失去取之當。以有室家無踰時者。」不如末章義優矣。

康

兔 買

此理。 祥引《 謂 歐陽《本義》 子、無小人爲 文王舉賢,不遺微 以詞害意。 敘文則周南舉國皆賢,無君子小人之别 極形王化之盛耳。 何云近誣? 人,皆有才德可用,此又近 害意? 兔罝》是賦 墨子》「文王舉閎夭、大 度外之事,後世大 且好德,人之常性,歐 説詩 專以 敘云「莫不好德,賢人衆多」, 妄,是何言乎? 者泥敘語,遂謂《兔罝》野 體、毛、鄭皆不以 興言之,又譏 賤,得士於兔罝 言衆多,不言皆賢也,何 、略之主猶能行之, 誣。」吁,過矣! 顛 案 紋曰 於置 元 反 中, 爲 儒 以 興 有 自 金 也 如如 履 君 有

煜 之人才有可用」,則亦 故判爲興,然仍謂 見毛、鄭以前 非兔罝之流乎? 時,芻蕘采薪之人皆得盡其力。」芻蕘采薪, 當時説此詩者 矣,可悉指爲誣乎? 載,而幸存於諸子百家之言,以傳後世 也。 經 中, 王 白 敬 家之私説 乎? 夭、大顛實之也。 典 季之取冀缺,林宗之取 此閎夭、大顛所以爲賢,而文王舉之也 前 善會詩義矣! 未 授之政, 此言敬德之可貴,故取士者恒 口 據信。 也。 釋《兔罝》詩者,皆作是解 ,原有得賢於兔罝之解,故以 西 《集傳》以詩 是 山之言亦本是詩矣。 土服」, 夫古人軼 興 或疑《墨子》之言 又漢 不以歐説 縱使出於傅 中之賦,而 八賈 因言 茅容,皆然,況 山 事,經· 語 爲 兔罝 <u>云</u>: 上下 然 云「兔買 會 史 體 . 相 「文王 所 不見 要 者 以 貌 應, 口 心 名 不 之 文 肅

也。」車

前

澤寫,豈

一草乎?

又以爲

惡

臭

今此二草,未見其惡臭也。

芣

芣苢。」生子兩旁謂 藥,而 其實矣。 實主令人有子,見陶氏《别 而 一焉。 葉 爾 苢 又可 雅》别芣苢之名馬舄、 《本草》又名當道 《韓詩》 茹。 》既云: 瞿。 見陸 又云: 機疏 録》。 「直 及王旻《山 ,根、葉及子皆 周

車

-前,併

芣

漢 廣

廣」字偶同 化及國中 漢 廣》敘 耳,非謂 此 詩 云: 方及 漢 南 德 廣」爲 國 廣 所 故 及 德 云 也。 廣 廣 也 前三 與 辯 漢 詩

「芣苢,澤

寫

車

前

瞿

日

南

婦

當

采

居

録》。

其

説》譏之,無乃苛乎?

或曰: 喬,並 槐、棘 云如 枝爲檄 凡 図 上繚爲喬」,此又明言有枝矣。《爾雅》五言 日 云 曰 莽 五 喬」,句者,言樹枝之卷曲 槐 言 木楸 「上竦 無 三者,皆 》用《鄭 南 棘 , 至 喬 ^ 有 無 醜 此 爾 兩文連, 枝之説,蘇 曰喬」,注: 喬 喬 耶 雅》「小枝 無 風》蘇 木」, ? 非 枝日 云「句 注 無 遂誤以 毛 注 枝之木也。 喬 蘇轍著 上繚 굸: 如 氏云云 枝葉 「楸 案,《 羽 彼釋 爲 喬」, 非非 《詩解集傳》。 樹 皆 喬 喬」,下 爾 此耳。 性上竦。」一 無 不 翹 雅 一云「小 上 枝也。 云上 知 竦。」楸、 . 竦 釋木》 云 何 噫 釋之 也。」 據。 無 枝 句

改耳。

説 以 為然。 良是。 休息 但陸 據傳先釋 ,作休思,《 思 釋文》非 古本皆作休息。 詞 ,後言漢上爲 之, 而 證 正 本 其 義 或

作思者? 豈據《外傳》之文乎? 者 作 及《章句》俱在,陸、孔所見本較 故 思, 不 以 敢 意 今《外傳》之作思,當亦後 改。」獨《 改 耳。 集 孔 《傳》以 云 唐 初《韓 爲《韓 未 見 多 詩 有 詩 内 人以 何 本 》作 外 反 作 傳 思 意 無 思

之習, 俗,其 變,自周迄宋,千五 有此 冶容誨淫耳,非美俗也。 曲 事。」此解甚平正。《集傳》則云: 庶人之女執筐 内,深宫固 大隄》所咏, 当可 乎? 孔 見。」噫,誤矣。 女好游。 豈 疏釋游女之義云: 成 《大 門,闡 周 乃 盛 爬 行饁,不得在室,故 狹邪倡女, 漢、 曲》作 時 寺守之。 六百年,安得 所宜 魏 女子無故 於 以 見? 被文王之化者,尚 劉 後 此 引 宋 猶 「《内則》女子居 彼 貴家 時 然, 風 證 出 相 俗 六朝 有出 高游,不 如《大 此,尤 「江漢之 之女也 同 隨 時 綺 游之 爲 隄 況 靡 過 m

不類。

引此 漢 自 雅 詩》乎? 可方思。」薛 深」,李善注引《韓 作漾矣。 時 詩。 羕,長也」,郭注 江 家《 一之永矣」,永、《説文》作羕。 文 《詩》具 君云: 《説文》羕字、永字皆引 選 • (存,意 登 詩》云: 『漾,長也。』」則《韓詩》 云 樓 賦 羕字在《齊》、《魯 「羕,所未 》川 「江之漾矣,不 既漾 此 聞 案,《 詩,東 而 不 爾 濟

離舟義, 又云「庶 文》云: 當併船 頭 (谷風》「方之舟之」,毛、 一雖多,而此其本義。 形。」案《爾雅》「大夫方舟」是也 方、《説 之方,俗 **派人乘** 乃假借之有 「小筏曰泭。」《爾 文》云: 泭 也。 是也。 因 ^ (漢 一者。 後世 併 此 鄭 船 廣 訓 ^ 雖 雅》云「舫、滑」, (学)不 「復出汸字、● 也 領會》 非 方爲 了,象兩 併 미 船 泭。 釋方字, 方 方字 舟省 思 IIII 《釋 不 以 訓 總

歷舉諸解,獨不及泭義,疏矣。

四

藍矣。 此云: 《周南》正 是也。」 以致 吏,餘 也。 之者,豈 餘其 謂 而意稍媟焉。 馬 禮 永叔解之日 「於是子出嫁之時,我 之子于歸,言餘 煖在香韉。」此即 朱《傳》説之,深意 ,猶古人言『雖爲執鞭,所 餼,示欲 此 미 風 以 女 乃 非 唐人香奩詩 出 豔 其 禮犯。」意 : 嫁,人將 情 適己。」文 「之子出 之濫 其馬」,箋、疏 歐、朱 觴 亦 有 目 本箋, 哉 願 同 餘 似 游 飰 意 馬 迁, 而 歐 欣慕焉」者 其 然 以 嚴 也。 自憐 歸 文 馬 青 意 禮 解 田 較 出 親 叔 孰 輸 我 則 乘 此 順 於 仰 釋 謂 廐 願 IF. 本

●「汸」、康熙抄本、嘉慶本同、大全本作「舫」、《四庫全

216

墳

《詩》本猶爲濆 大防,則漢世已作 宋董 爾雅 道據此,謂《詩》墳字當作濆,晉 》「汝爲墳」, 也。 此謬矣。 ·墳,从土旁矣,與今本正 郭 注 觀毛傳訓 引 詩 汝 墳 墳 爲 世 證

同,不應晉世偏從水。

所出。 《韓詩》薛君章 **煋**,音義亦 燬字,《爾 同。 雅》、毛傳、《説文》皆訓火, 句 獨朱《傳》訓 訓烈 火。 爲焚,未詳字訓 《説文》燬又作

以父母斥文王,義亦可 及《列女傳》俱作此 無貽父母憂,敘所謂 父母孔邇」者,勸其君子當勤勞 解。 「勉之以 通 ^ ,但不如古注主勸 集傳》從張 正 也。 氏説 箋、疏 王 事,

勉君子義尤長,且

一合敘。

姓,古有之矣。

見《左傳》昭

四年。

稱孫

爲姓,未

毛

詩稽古編卷

耳。 《集傳》以 麟 趾 取 麟興文王后妃,以趾興公子, 興,不過 謂公子之信 厚 如

不太分析乎? 至易信 厚爲仁厚,於義

無

礙。 然毛傳之信而 麟趾》傳云:「公姓,公同姓。 應禮,較有本矣。 公族

族於禰 祖異。 氏安石。 服之内,以證毛義 茅、胙、祭,皆於五 二年《左傳》「同姓於宗廟,同宗於祖廟,同 同 祖是五服之内,與《杕杜》傳以 彼對 廟」,同姓是諸姬,同宗是 之説曰: 同父,此對同族也 服之外分親 ,明且確矣。 「公姓、公孫也。」稱子爲 疏 《集 凡、蔣、邢、 ,同族是五 又引襄 同 《傳》取 ,姓爲 + 同

麟

趾

 $\overline{\mathbf{H}}$

公同祖。」孔疏申之,以爲同姓是五服之外,

公孫也, 又傳氏,非傳姓也。 然此公子之孫,非孫,輒氏其祖之字與? 然此公子之孫,非之前聞。王又自申之曰: 「孫,傳姓者

毛詩稽古編卷一

明據。

若拙

鳥者,不咏於《詩》,不著於《

爾

不可居

乎?

布穀之爲鳩,載在

一經傳,

歷

有

吴江 陳 處 士啟 源

著

拙也。

鳥,亦名鳩乎?

且未聞言婦德者,徒

取

其

拙

俚俗之妄稱耳。《召南》詩人安知宋世有

雅》,又不在《左傳》五鳩之列,其昌鳩

名,特

雅》 同 鵲巢》之鳩,鳴 注云今之布 穀。 鳩 也。 鄭 言 毛云 其 有 石秸 均 鞠,《 壹 之 爾

鵲

巢

通也。

夫專静純一

,止當鄭箋之「壹」耳,尚

「專静:

純一」四字,亦知以拙爲美德,於義

難

宋人説《詩》,多從歐,《集傳》又衍

爲

漏其

「均」義

因

均

義

尤遠於拙,難於牽合

動反覆者

召

南正風

母道、壹是妻道」、義尤允矣。永叔獨 ,故詩以 喻夫人。《埤雅》申之,言「均是 爲 異

説,謂 至所謂 輒 布穀 飛去其巢,任他鳥居之,豈布穀 别 與鳩: 有 拙 絶異。」案,此説非是。 鳥 處 鵲 空巢,今謂 之鳩。 獨 鵲

> 也。 豈必皆專静純一哉? 不知天下性拙之人,儘有躁

采

蒿也。 矣, 郭氏 采蘩》之蘩,皤 《鹿鳴》之苹,藾音 爾 雅 》注、陸 蒿 氏《草木 也 賴。 ^ 蒿 漢 疏 也。 廣》之 蔞,)所言: 凡三蒿 皆

然。 胡」者 之。 蕭 水、陸 也 潷 白 采 應 取 之醜,秋爲蒿」者 有 但 陸 生艾非冰臺之艾。 《爾雅 據。 食 佃《 漕 :蒿言 水 食 日 生者。 九 近 事 宋 :>通 坤 萩,皆 即即 本 世李 種 今録 蘇 孟 蒿 種 草 左傳 雅 調 今水 蔞蒿 解毒之草,此 頌《 詵 · 白 則 其説 時 之蘩。 而 老 圖 詩 食 已 亦 髙 生 生蔞蒿 以 珍 高 經 蒿 療 疑 並 1,通指 云 一陂澤中 苹 即即 之 鹿 本草 》,謂 也, ×, 繁 爲 釋 **要之即** 曰『蘩,皤 通 皤 鳴 白蒿 蕰 間蒿。 此 也 辛薰不 陸 名。 》之苹 古以 其 水 綱目》,始言 藻 白 子香 ,二月發苗 生,蔞爲 陸 一也。 之外 人 之菜 高。 蒿 蘩, ^ 白 本 本 蒿」者 美。 有 種 蒿 即 而 經 然 未 立,並 草 水、 别 美。 水 陸 爲 F. 未 嘗 詩 日 著 菹 陸二 「葉似 所 生 品, 牛 日 敢 -合 白 指 》]于 「蘩 即 一,今人 () () () 藾 皤 用 曰 今陸 蒿 決 爲 水 似 又 種 蒿 名 言 以 屬 有 嫩 牛 蓋 檠 由 E

草,不 中。 費 繁是 艾 食, 指 不 薄 白 必 采。」生於 嘉 口 幽 《草木 濃 草 作 蔬 爲 回 補 脆 而 風 而 謂吴 護。 水 陶 陸 不 岐 也 應夫 苹 漢 疏 澗 未 旁 薄 草, 采 隱 細 《廣》詩 采蘩祁 始 谿 知 況 人][而 其 景 居 人 曲 牛 沼 解 果 面 王后 善 甘 澤, 色白 差 根 云 獨 丽 内 青 沚 沼 否 疏 美 調 莖 ^ 異。 祁 可 解 之 背 E 沚 耳。 薦 之未 大 也。」案,李詮 酸 一, 生、 而 食 矣 與 毛」,不 白白 爲 荇 醎 招 苹 《左傳》「蘋 其 其陸生之蘩 、詩 水旁, 色性 及。 瀹 ,大夫妻薦 -色青 至 **>** 孰、菹、 其 云 蒿 沼 説 以 莖 蔞 沚 生 應 又《采 不 良 陸 白白 英蒿 澗 或 吴 同 澗 雜 於 是 生 曝 中 釋 赤 以 酸 繁 蘩 Ш 者 中 爲 一蘩》詩 與? 皆 或 定 蘋 蔞 爲 蒿 至 陸 蕰 但 澤 爲 相 别 藻 曲 蒿 韲 미 蔞 秋 草 藻 謂 合, 並 草 皆 内 性 其 不 繁以 始 其 與 於 疏 也。 狀 月 案 蔞 不 其 水 頗 以 味 蓋 根 可

生蠶 一、蠶性惡濕,未 必 用水 草 耳

見也。《集傳》載其説 《采蘩》、《采蘋》二詩言。 祁祁」語,遂謂夫人親 祭」之説,不可易矣。 《左傳》云: 以 書有大事,皆言祭也。 申公詩説》者,又從而傅會之,可嗤矣。 爲祭祀,而以下章之宫爲廟,意 祀與戎 蘋繁蕰 爲大事。 ,既屬蛇足,近世僞 蠶,故采之,直兒童之 或見《七月》詩「采 藻,可薦鬼神。」正 《詩》「公侯之事」,傳 則毛公「執蘩 《春秋》書有事 亦 同。 爲 蘩 助 指

鄭分爲兩義,亦非

無

見

説也。 歸燕 服次以祭,斯特縣想之談耳。 濯摡,夙謂祭日之晨視饎爨,還歸則祭畢 傳》皆從之。 寢,皆非正 夙夜在公」,箋、疏以夜爲祭前之夕視 宋曹氏謂詩作於商時 祭 時,故服被 與與 不 然吕《記》、朱 服 周 副,此 禮異 (),故 定 而

> 草 蟲

其鑿。然古詩簡貴,不應一 之夕,因引《易》「覯 箋以見止爲 同 精 牢之時 語 證之。 以以 事而一 覯 重複言之。 後 止 儒 爲 多笑 初

昏

彼特以迷、薇二字聲音相近,又此詩蕨、薇 迷蕨。 連章、《四月》詩 條之腴者,大如 叢生修條,四時發穎,春夏之交,華亦蕃麗 陽。」今案,胡氏寅。 謂之迷蕨。 曰: 類,而迷蕨之名偶相符合,遂傅會爲此 「薇似蕨而差大,有芒而味苦,山 集 疑《莊子》所謂迷陽,即 傳》 胡 釋《召南》「采薇」不依古注 氏 亦 巨擘,食之甘美,野人呼爲 日 蕨、薇同 之言曰 : 疑即《莊子》所 . 句,誤 此 「荆楚閒 蕨 謂二草是 也 」。」噫 謂 一閒人 有草 説 迷

吾行 迷 之 耳 有 尤 條 用 不 陽 解 苡 不 榦 薇 Ē 與與 一,豈 既爲薇草 迷 確 爲 夫古今方俗 蕨 陽 卻 也。 是 今 可 爲 曲 名 爲 後 Ш 草 卻 \sim 儒鑿 莊 據? 中 胡 ·, 卻 名 曲 子》 蘇 語 者 語 曲 無 空 草 謬 不 況 Ĕ: 又何草 傷吾足。」解 大不 甚。 妄説,不 惟 薇 相 羅 通 與 又 相類,以 勉 迷 蕨 郭 野 胡 道 口 陽 各 X 氏 循 以 迷 者多矣, 語 所記 本 草, 爲 陽 爲 音 有 信 似 洣 無 不 華 尤 也。 蕨 未 蕨 傷 葉 得 名

於桓 修菜。」 柳 邢 Œ 云 葉 景 與 切。 許 謂 者 説 一嚴《緝 一薇草, 巢元修,東坡故人,嗜此菜,故以 豆 陸 文》 葉, 同 一薇 \sim 《本草 影引 矣。 蜀 莖 也。 葉 人謂之巢菜, 、項氏 薇 》有二 案《 似 生 小豆 菜 Z 爾 水 一薇, 雅 也 旁 * 蔓 似 生 似 薇 東 生, 萍 平 坡 即 名之。 薇 原 者 _ 味 今之 改 陸 亦 Ш 名 垂 薇 谷似 項 野 似 水 日 也 疏 0 説 元 嫲 小

陰乾。 説 水。 又 遠 乃 薇生 水生 六、七 直以《詩》之薇爲 雅》之垂水也。 此 白 色,類牛 又名白 本草 詩 草矣。 説 案,巢菜 微 見《本草拾遺 其 . 其旁,無害爲山 水旁,不生水 大巢名 本 人本經中品 拾 必 月 采 義, 蘇 幕,云生平 有 開 膝 薇 遺 頌 至 红 **>** 據 陸 而 有 》,云「生水旁, 翹 是 云: 巢 孔 短 華, 大、小 璣 摇 Ш 孔氏《正 菜 小。 疏《 ~ 名 氏 八九九 菜 垂水, 之 -原、川 中, 「莖、葉 爾 從 詩 菜。 春草。 二種,小 薇 邢 非 雅》「柱夫摇 之當 谿 × 垂 景 月 意 義》全引陸《 谷,三月三日 亦 陳 況 澗 水 以《 結 俱 與 似 同 矣。 藏 潢 叔 青, 邢 實。 巢 别録》名薇 萍 詩 潦 器 重 今考《本 異 名 ۰, 邢 皆 頗 釋 唐 子 其 車 采 則 人。 語 薇 類 Ш 去 源 疏 根 是也 薇》 正 采 非 閒 柳 似 古 載 黄 謂 ×, 草 ~ 藿 草 水 葉。 根 垂 未 是 爲 白 爾 在 垂

謂 之文同,二也; 王肅釋此詩是大夫妻助祭於夫氏之事,故 合於經文者有三 傳》從之。 藻 》同,一也; 采蘋》篇毛、鄭 爲 菹 端牖 下 焉。 不稱 宗室牖下與「教之宗室」 - 爲奥。 皆訓 蘋、藻 婦 以爲教成之祭,其 而 孔疏駮之,而朱 稱 二菜與《禮記 季女,三也。

郭注 注 誤以小萍爲大蘋,則非郭之誤,而孔疏引郭 其有大小之分,當矣,但其譏《爾雅》郭注 其大者蘋。」注: 也。 「水中浮萍」二語,乃釋「萍,蓱」,非 蘋、萍二草,朱《傳》誤合爲 「水中浮萍,江東人謂之薸。」繼 今案,《爾 「《詩》『于以采蘋』。」是 雅》) 先 云: 0 萍 華谷論 云 蓱。」 云

> 殊甚。 閒開小華,白色,又稱 似尊 蘋三草相似,李氏《綱目》辨之甚詳。 色,四葉合成一葉如田字形者,蘋 蘋,中曰荇,小曰萍,亦非通論。 譏 亦似荇,何不併列之爲四蘋 列於萍,乃蘇恭之説,前此 同類而分大小,因有《爾雅》之文耳。 引《詩》之語,竟似 雅》,合兩文爲一,而繫郭注於下 蘋也,於蘋字直引《詩》證之耳。 一二寸,有一 孔而 而 嚴又據《唐本草》,謂水萍 譏郭,豈未覩《爾雅》原文耶? 稍鋭長者, 荇 缺 而形圜 以 萍釋蘋矣。 白 也。 如 蘋 馬 華並· 未之聞 蹄者 乎? 有黄、白 1, 尊也 有三,大日 嚴《緝》不 孔 蘋萍之爲 又删 也。 荇、 也,夏秋 氏 引《爾 葉 荇之 蓴 疎謬 去其 且 葉 徑 蕙 與

蒿、莖大如釵股」者也,又名薀。 見《左傳》。 毛以藻爲聚藻,正 李氏《本草注》云: 陸 璣 所 謂 蕰 葉 藻之菜, 葉 如 如 蓬

詩稽古編卷二

絲 葉如 似藻 種名 雞 魚 葉大。 馬 蘇,莖大 鰓 藻, 狀 節 即《 江 如箸」者 東 爾 節 呼 雅 相 爲 小之君 生 馬 即 藻。」 即 此 水 4 非 蕰 陸 薻 《采 是 疏 郭 也 、蘋》詩 0 云 所 又 謂

外, 乃 肅 「實 深隱之名, 云 宗 相違矣。 雖 不 室 經典 同 漏 皆 下, 牖 未 下 不 右 毛 乃 以 以 通 爲 以 奥 明 奥 爲 爲 也。 之處,肅 室 牖 中 下者。」案, 故孔 , 鄭 合爲 疏 以 駮 爲 奥 王 户

甘 棠

苑》所 百 姓 先 言 聽 「此乃《墨子》之道 儒 斷 皆 釋《甘棠》 於棠下 與 鄭 箋 》爲 同 ^ 韓 召 當當 詩》及《 公述職,不 宋 是 劉 召 元 史記》、 伯 城 在 安 欲 世。 時 重 説 偶 譏 煩

> 暇 非 爲 焉 常 ,故就 憩息 處 也 於 樹下而 思德者何 若偶 此 耳。 焉 決 心憩息, 偏愛一 訟 源 謂 理 則 巡 棠哉 容 巡 行 有之,原 行 時 多矣, 適 值 所 農 不 憩 以 桑 息 此 無

矣。 榮。」今棠黎實 疏, 雅 貌。」此又祖 夏 合此二字爲文, 云: 云 云 杕 唐 傳 風》 盛 杜 言 **※**云: 又芾字本作 毛傳 謂 「芾,小也。」然則 也, 賦 蔽蔽 兩 之 $\stackrel{>}{\succeq}$ 陰涼寡 云「蔽芾,小貌」,吕《記》引宋 杕 杜 毛説。 兩 一带, 杜,皆 棃,郭 小草 義 非大 其當 薄 市,《 相 小也 華 也。」《易》豐卦 反。 咏 注。 又案,甘棠即 樹 俱 葉 玉 其 訓 」,與 與 敝 亦 疏 篇 特 案,《 小 小人義 悴 名 <u>\tilde{\</u> 賦 生,一言 爾 無 芾 棠 説 雅 語 疑 皆 靡 近 梨。 毛 文》 正 爲 釋言》 釋文引《子 休 杜 蔽市,小 小 也, 蔭 義 晉 枝 蔽 陸 之 孫 不 何 葉 字 《疏 見《 范 茂 得 易 亦 楚 稀 注 氏

言盛。

疑矣。 赤棠。 氏《詩》疏專引舍人注,得之矣。 疏及陸氏《埤雅》皆全引之而不置 爲白棠,前後語 曰『濇如杜』是也。] 既以甘棠爲赤棠,又以 白而滑美,甘棠是也。 也,與白棠同耳,但子有赤白美惡。 棠,杜也。」然則甘棠乃赤棠,又名杜,無 赤者爲杜,爲甘棠。」《召南》甘棠、《唐 (小雅》杕杜,皆赤棠也。 爾雅》云: 《草木疏》云: 白者棠。」舍人注云。 相反 「杜,甘棠。」又云: ,必有誤也。 「甘棠,今棠棃,赤棠 赤棠子濇而酢,俗語 毛傳亦云: 「白者 ^ 辯,惟孔 爾 白棠子 雅》邢 「風》及 名 一杜 古甘 棠, 可

核每顆十餘粒,種之惟一二子生犂,餘皆生會》云:「牡日棠,牝日杜。」《齊民要術》云:「棃甘棠即杜也,樹似棃而小,子霜後可食。《韻化》之甘棠,《秦》之樹檖,皆野棃也。

之哉? 海棠 後世海棠乃别種,鄭樵 甘棠名棠棃,又名杜棃,實兼三種木名矣。 可食。」案,棠、杜、棃三者同 棃,又名楊檖,名鹿棃,名鼠棃,實 杜 然 來 接 自 、棃者 海 外,古世未有,風人安得見 必用之。 以 檖 爲 名 即甘棠、誤甚。 類 赤 羅, m 大如 小異耳。 又名 Ш

乎? 舍也。 废字爲正。 之。 废云舍, 菱云草舍, 義稍别 又《左傳》「反首拔舍」,傳十五年。 「拔草舍止。」殆因茇拔文異,故不直云草止 ·詩》「召伯所废」。今《詩》皆作麦,毛云 茇、《説文》訓 三書各一 孔疏引《周禮》「麦舍」注「草止」釋 字,義實相通,此詩則當 草 根, 而废字訓 而 杜 同 注 舍, 歸 云: 草 引

特「勿伐」,「勿拜」則非特「勿敗」,此用唐人《集傳》釋《甘棠》篇,以爲「勿敗」則非

《説 傳 也。 之則又甚於毁,三章文義,殆由 字而妄爲傅會,陋矣。夫毀之則甚於擊,拔 字,乃扒字之借,非跪 詘 施 文》訓毁。 考之, 》正與相反 其 文》訓 见 杖 丏 《廣韻 彌兖切。 則 如人之拜」,此 亦同。 末章之拜,本作扒。 異是。 鄭 之説 箋拜 次章之敗,毛 案,首章 也。 亦 拜義 特 訓 施 臆 拔。 也。 解 之伐, 説 勿拜 無 耳。 輕 施 可 扒 見 取借 傳,而《説 圃 い音拜 謂「小 毛 八今詩 嘗 重、《集 訓 用 以 大拔 之 拜 低

行露

日 賦, 不 願 是言畏露之霑濕 淫 行 自 奔,誰 露 以 述己意,作此詩 喻 能 犯 彊 礼禮,本 之,須 故 興 不 以 、體。 以 敢 露 絶 淫 爲 其 奔 集 詞 人。」一似 也。 傳 邪 ? 判 又

> 乎? 耳。 始與 (之私 若怨其不 下章雀鼠之訟, 繼則 奔,而 悔 而絶之者,此 遽與之訟,恐無 殆彊委禽 可 焉 謂 此 之貞 而 理 未 遂 女

之禮初未嘗備。」夫不行媒聘, 傳》云: 不備 必召公之賢,方能決斯獄哉? 而終悔之,被文王之化者,當如是 至明當矣。 妁之言不和,而 而不行,是争 室家不足」,非幣不足也,箋所 「家,謂 (韓 彊 詩 媒聘。 ,聘財 委六禮者也」。 外 傳 也 以以 不 足, 爲 聘 既 突然興 財 謂 許 不足,始 疏申 求 乎? 嫁 爲 公訟 謂 室家 其 \wedge 因 集 意 媒 何

羔羊

《羔羊》敘云 虞》敘云: 麟 趾 **>** 「仁如騶虞。」三敘皆言如 敘云: 節 儉 正 信 直 厚 德 如 如 麟 羔 趾 羊 之 時。 騶 同

非其人矣。 服羔裘之人也,德 矣。 跪 羔羊之人。 儉 騶虞,取義於兩物乎? 殆不然。 相見禮》注、《公羊》何休注,以證羔羊之德, 意,以爲 化、皆如 虞》言如 服羔裘之人也。 丽 Œ 而受乳,死義 義 直 案羔裘,大夫居 異 語 人德如羔羊,又引《宗伯》職注、《士 此羔羊之人。」正 此詩之羔羊,以爲裘耳,豈若麟 非 如 一样 甚 騶 召南》大夫德 趾 合也。 虞之獸 生禮」,經文無此 **※**言 鄭箋云: 不可 如 朝之 爲大 疏失敘意 也。 如 況所云「羣不失類 服 致 斯 「卿大夫競 ^ 稱其 八夫,雖 八孔疏 麟之時 義 羔羊》言 矣。 併 服 意也,與 有 服羔 辯 也 故 失 疏 如 箋 日 裘 所 申 相 與 謂 如 而 意 節 窜 騶 切 如

數 薛 名 : 君章句云 也 後漢 詩 . 人賢仕 循 吏傳》注 素 爲 喻潔白 大夫 引《韓 者 絲 其 . 詩 喻 德 詘 羔羊 能 柔。 稱 純, 有

「素絲」最有義味,可以補毛、鄭之未及。潔白之性,詘柔之行,進退有度數也。」此解

之優。 所謂 故舉 於事」,文義尤迂。 公正貌」,兩意正 動 正直也。 毛以「委蛇」爲「行 光 至以 明,始終 「退食」爲 鄭訓 相 如 爲 成 減膳」,「自公」爲 , 可 矣。 委曲 可從 蹤 惟 自得」,不 迹」、《韓詩》云 迹 其公正 倣 效 無 及 即 私, 傳 敘 順

殷其靁

則 吾 號令之象,遠行從 雨 靁》傳云: 以以 未 詩人託興, 敢信 傳文簡 潤天 下。」 貴,亦 靁 豈 出 漫然哉? 有詳 政 興 地 以此 奮, 耳 人所略者, 震 詞 驚 故須詳之耳。 乃謂全不取 煩 百 不 里。 殺 者, 如《 Ш 靁 出 殷 爲 雲 其

雨靁殷殷然,震雷虺虺然,旱靁隆降

使之和 以《豫》、《震》兩卦義釋之。 豫之義,震動之象。 類 種 靁 此 聲皆見《詩》,惟 矣。 故詩以興 王者政教,號令動 遠 殷殷之 行從 政 靁 物 有 而 傳 和 而

斯,此, 是解 之「適居」、「復去」合釋「違」義,而兩「此」 中之「斯」,毛之「斯,此」總釋 之「斯」、「適居此」乃「何斯」之此、「復去此」 適居此,復去此也。」疏申之云: 止 乃「違斯」之此 君子』解「何」字,非經 遠,去」之前,鄭又多「適居此」一語 斯」爲「此」。 |當經「違斯」之一「斯」字。 也。 何 斯違斯」,毛云: 違,去也。」鄭云: 愚則以 箋『何乎此君子』,亦非 也。」孔 爲毛、鄭「何此 特以毛之「斯,此」在 中之『斯』,故復 一何 「何乎 兩 如此 此 君子」皆經 斯」字,鄭 「傳『何此 君子 此 則經 T, 故 君 經 也 子, 字 作 訓 文 中

明順,且合傳、箋矣。《集傳》得之。

摽 有 梅

正風」。 《大全》,或問「此 情。」吁,此言豈 如 子所自言, 出文人墨士筆,正 謂詩人代述其情,良是也。 母詩,唐人怨兄嫂詩,雖鄙 此已不失正矣。]又言: (摽梅》詩,女之求男汲汲 朱子曰:「自作亦 閨 中處 可爲訓 詩爲女子自作,恐不得爲 女何 與 此 其 相 顔 類。 俚 無害里巷之詩 厚 後世閨情 晉、魏 口 乃 朱子 矣,箋、 惡,自 爾耶? 以爲 閒 豔 疏 怨父 是 體 女 皆

也。 桃 之 盛 今一以爲興,一以爲賦 《桃夭》、《摽梅》二詩, 喻及 時, 以 梅 之落 體 ,吾所不解 正 喻 相 渦 同。 時 皆 以 興

謬矣。 柳非一 《元命苞》,以爲 謂三五參昴,即是小星,總爲衆妾之喻。 章之參,古以 不必一時並見也。 牽牛與天畢 心見於三月, 参三星俱大,昴七星,其 人,此毛、鄭説 有師授,古今多不 可乎? 一而已,不得 小星》詩,以 三五 時所見,柳 且詩 經經 相去百餘度、《大東》詩同咏之, 以 爲 是託興,非據一時所見而 柳 也。 五 三星、《考工記 三五爲喻。 見 不言 屋矣。 相 又星 於正月,何 有 《補 小 同 何星,謂之小星猶 八星,不得言五 星喻妾媵, 傳》非之,謂三心 一最大,謂之小星, 體離合,天官家各 柳 不僅 雖 嚴氏信其説,遂 影數伐 妨 柳 八 、星,然 並 也 三五 即即 取 而 夫 爲 喻 如 疏 言。 喻 可。 此 人 五 下 夫

數,甚 損。 牛、河 大爲 如閣 同。 昴今爲七星、《元命苞》以爲六星,亦不 星 以 豈可執一 則臼三而杵一,皆損 兩 則共十八星,孫炎僅總爲十二星。 也。 字、兩「與」字 七、皆增於其舊。 而爲四星。 星,皆是也。 一,丹元子不數伐,而數左右肩股,爲七星 五 喻 喻耳,多寡非 有辯,見《總詁 道本六星,今則八,文昌 以隋丹元子《步天歌》較之今日天象, 又如營、室二星、《考工記 |有古有而今無,如 鼓、《爾雅》合爲 五. 而 ,不已固 論 河鼓左右旗,班書以爲 相 哉? 呼應爲 又天上經星,古今時 :所計 乎? 日本 況詩託 於其舊。 一星,《天官書》 興,此全不 也。 至《集 四星,杵本三星,今 折 威農、丈人之類 興於星,但以小 必欲以三喻三, 像》取 本六星,今則 》拼 此等未易悉 東 取義之説 各九星, 又如 壁 兩「在」 有增 别 一於室 能 爲 牽 相

七

毛詩稽古編卷二

實,富也。」今寔音殖,人十三職韻,實讀如 來」訓「寔」爲「實」,後儒相沿,溷爲一字,朱 石,人四質韻,二字音義各别。 同」,恐 「寔」。 傳》始仍其誤 (書》「是能 是來」,可見毛義允當。 寔 《春秋》桓六年「寔來」、《公羊傳》云 非詩旨。 命 [容之」、《戴記》引《書》「是」作 不 同 案《説文》: 毛 云 朱《傳》以爲「與實 寔, 自杜 「寔,止也。 是 也 注「寔 觀

江 有 汜

名,見《禹貢》及《爾雅》,江之别也。 洲 (傳)改爲汜水之旁,汜豈水名乎? ,皆泛稱也,非水名 云「江、沱之閒」,謂二水閒之國耳。朱 江. [有汜》三章,汜爲水決復人,渚爲小 也。 惟末章之沱是水 文義乖 故小敘

> 五年。 相顧。 夫人矣。但言「媵待年 矣。 不應以國別也。春秋時齊高固昏於魯,見宣 后妃夫人之化」,亦此意。 申之,以爲大夫、士之妻。朱《傳》云「嫡被 則汜字古已有之,非後之譌也。 氾。 義亦同。徐鉉等謂「洍」乃「汜」之或體,然 「汜」皆作「洍」,以爲古作「洍」,後譌 《江有汜》敘,不言夫人而言嫡,故孔 水亦 此衰周之失禮,文王之世,安得有之。 「江有汜」,董氏 案、《説文》汜、洍二字皆引此詩,音 大夫不越境逆女,其媵當待年於家 有名汜者 然在成皋, 引《石經》及《説文》云 於國」,則前 被夫人化,必非 不 董語非是。 近 江 後 語 也 爲 不 疏

0 「尤」。 允」,嘉慶 本同、康熙抄本、大全本、《四庫全書》本作

至待年之誤、《通義》駁之允當。

野有死麕

禮》有 者?」斯言當 此 詩方惡 也。 吉士誘之」,毛、 誘射之文,謂以 歐 無 陽 禮,豈 誤 解 爲 有爲此汙行 嚴《緝》反 挑誘,東萊駮之云: 禮道之,古字 鄭 皆 以 誘 從 而名吉士 爲 歐, 道,《 義 何其 本 如 儀

稱述 又烏得爲正風哉? 誘字無訓, 堅而潔白。」不可犯也,詞遜 女如 ,其以屬鹿爲誘者 豔 又謂 玉」,比女德之貞潔,鄭云: 「吉士誘之」,言士之宜以禮來也。 情,夸美冶容之語,安在 如 以下所述或說推之,當同歐 玉 是 美其 ,謂以不備之禮爲侵陵 至所引或説,出於潘叔 色,則 而意嚴矣。 此二章詩 如如 其 惡 玉者 朱《傳 無禮 直是 取 「有 解 其

> 特争聘財而已矣。 之具。夫不論理之當否,而論物之厚薄

小。 草綱目》云: 其大者與? 葉櫟。 與櫟 也。 名槲嫩也。 作樸嫩,後人誤倒其文,不得疑爲兩木也 又郭氏、某氏注皆言樸嫩 小 呼樸嫩,非木名也」。 以 孔 與「樸嫩」不同,某氏注以爲可作柱 爲即 木可知。 疏引《爾 有二種,小者叢生,大者高丈餘,名大 相 疏引《爾雅》作 林 然則 此 類,華葉似栗,亦有 有樸嫩」,毛傳云: 木。 雅》「樸嫩,心」及孫炎、某氏注 《韻會》載其説,此 樸嫩者,婆娑之貌。 毛傳言其 錢以爲小木之稱 錢氏《詩詁》譏之,謂 州葉 「樸嫩,心」,定是古本原 摇 又《爾雅》是「嫩樸」, 小者,而某氏 動,有觳 即 斗如 槲 「樸嫩,小木。」 嫩。 謬 似之 觫之態,故 其樹偃 橡子 矣。 一,則非 案,槲嫩 「小木通 注 圃 ~本 則 加 實 短 非 必

二九

此 其 枝 理 芃 或 芃 故 巾 俗 呼 衣 服 不 整 者 爲 樸 嫩 以

意 訓 是 皆爲 也。 也 絊 「白茅 故沈重音徒 包束之義。 有 六音, 純 東」之「純 緇、 尊 本 淳、 反 徒 屯 本 反 音 兼 豚。 讀 屯 如 电 屯 屯 準、 則 音 振

尨 作 上龙,與 毛 者。 無 《説文》合。 使尨也吠」、《 从犬乡音衫。 厖訓 大石,見《説文》,與 説 吕《記》、 聲。」今惟 文》云 朱《傳 監 「尨 、尨異字。 本 皆作 注 犬之 疏

何彼襛矣

疏 及 ~ (説 左從 文》 衣,不 皆 同 從禾 今 ^ 集 ^ 石 傳 **>** 經 俗 × 本 監 本 誤 注

雝,從住,邕聲。**雝**,渠鳥也,亦同脊令。

從

有取 則 俗字 邕 離謂 雝、 雍本 乡,邑之作乡,猶 終於借。 詩 訓 者 辟 和,亦 也。 水水 於和,亦當借雝 肅 廱 雝 一字,今分 邕 惟 又 俗也。 西 成 肅 雕 作 雝 池 雝 隸 塵 爲 與 鄉 作 其 離皆 爲 雝 之左 塞 塵 雍 鳴 和 兩 雝 義 非 雁 破 義 是雕塞 近 一旁也, 鳥 本 和 矣 無 義 名獨 鷥 爲 本 一,義 乃 隹 今 字 鳳皇之聲 用 借 則 作 當 雝 可 破 也 如故 歸 壅 邑爲 圃 邕。 雍 當 乃 西

詩,陋 則 稱 後,可 周 察,欲以《春秋》王 齊襄 稱 也 一年 寧 以 謂 矣。 之五五 《春秋》書王 也。 王 文 蛇 王爲 ,稱汾王,不 足。 朱《 Ŧ 年 平王 姬 〈傳》本 也 夫 下 經 姬 嫁時 姬 猶 云齊侯之子,此 歸 歸 依 必 在 齊事 商 於齊,一 以 ,二公久已爲君 古 莊 稱 謚 注,又 + 實《 玄 舉 王 也 何彼襛 年 在 附 稱 莊 則 或 昧 父 武 元 在 説 者 齊 王 豊 之 於 不 相

疑齊侯爲 也。」是竟以桓公小白爲襄公子矣,不顧 得云襄公耶? 皆僖公子,就如或説,齊侯亦當指僖公,何 有身爲齊侯,而 齊侯即襄公諸兒。」其誤尤甚。襄公、桓公 太闇 襄公,則齊侯之子指桓公小白 於文 元劉 顧 目 義矣。 爲齊侯之子者耶? 瑾申之曰: 《集傳》又云: 「《集傳》 爲 後

衰,尚 也。 崩已二十八年,太子之死又在其前,則計 歸齊襄者於莊之元年,爲戊子歲,去平王 十一年,爲戊戌歲,王姬當四十左右 姬之年,當三十左右。 其歸 王姬果爲 鄭樵以王姬爲桓王女,竟忘桓之以孫繼祖矣。其 太子泄父早死,立其子林,是爲桓 又案,平王之崩,在隱公三年,爲辛酉 爲 共 平王之孫,必泄父之女、林之妹 主 何 至 女嫁不 售, 齊桓者於莊 愆期乃 爾 周 王。 雖 之

> 謬説。 況三四十歲老女,比之桃李之華,安得 詞也,文義顯然,且正風安得有刺詩乎 盛,而無肅雝之德。 泥其説,遂以此篇爲刺詩,言王姬有容色之 情之譽 「曷不」與「何彼」相 耶? 宋章 俊卿名如愚,著《山堂考索》。 且譏敘黑白 應,皆正詞,非 倒 置 一,斯尤 此 反 過

騶 虞

待公之發。」孔疏申之,以爲五豝而止壹發,「壹發五豝」,傳云:「虞人翼五豝,以

美談 也。 下 語 賦 不 篇 #1 忍 中必 地 也 班 (通 耳,曾是 孟 義》較其説,允矣。 意在 堅。西 雙」語釋之,是誇善 心之 頌 都 東 美 至。 賦 漢 東 》,作賦 都 人所譏 朱《 故 傳 先 況「中必 者之意 者 抑 射 易 而 西 其 也 反 都 説 非 疊 勸 爲《召 雙一, 以 多 以 用 爲 爲 殺 漢

南

人所美邪?

者。」 義云: 莠蓬蒿 惟 飯 本 陸 食 堪 草 有 草 い、故謂 鄭 郭云 ١, 作薦, 綱 水、陸二 詩 非水 樵 並 目 》「彼茁者 彫 二别 興 之齧。 通 故 草 蓬 引 记 蓬 及 门謂 種 也。 即 V 爾 詩 種 一,彫 茭米,古人以 之薦。」楊 云: 其 蓬, 類」。 語 雅 ^ 黍 爾 蓬乃水 證 V 孫 蓬即 又「首 之, 雅 邢 彫 炎 **>** 蓬 此 則 疏 慎《 茭之不 蓬 如 非 齧 即 斷 以《月令》「藜 爲 晉 飛 巵言》云: 彫 彫 米 非 五 孫 蓬, 蓬, 苽 茭,可 水草 結實者, 叔 飲之一 然。 是也 薦 蓬 Œ 乃

> 以 謂: 矣。 者也 傅會,楊又因彫字、黍字 近 人食之。 黍 俗俗 見 蓬 飛蓬,並 儒 庶類之蕃殖 案蓬之名見古書 乃 葭 耳。 早 此 今松 孫 是 蓬 炎,正 澤 無言 二子乃 青 草 州有焉。」 科 。」斯語得之。 其 是 蓬 邢 水 昺 也 是 惑 産 史甚多, 陸 所 於 而 鄭 者。 青 草,《 謂 其 傅 因 科 説 會皆 俗 盤 結 陸 詩 亦 云 字、薦 閒 實 氏 轉 兼 孫 \wedge 如 未 祖 舉 埤 蓬 炎, 之 乎 字 雅 孤 思 孫 逶 而 羌

- -

1 詩 稽古編卷三

陳處 士啟 源 著

吴江

邶

鄘

衞

故以 謂 三監。三監叛,周公誅之,盡以其地 或 千里,衞盡有之,是反過於周公,國大非 <u></u> 勢寖弱, 》之説,而 康 鄭《譜》爲長 叔 地理記》之説 謂 周既滅殷,分其畿内爲三國 止 康 有 叔 大抵 孔氏正義述之者也。 衞,子孫 初 封 如 ()似 即 東周 而服 矣。 兼 并彼 有 之世耳, 虔從之者也。 然殷自帝甲 邶 二國,此鄭 ,邶、鄘、衞是也,謂之 封 鄘、 康叔,號曰孟 畿 衞, 孔謂 封之廣, 此《 氏 《漢書 以 殷畿 《詩 後, 制 侯。」 漢

戡之。 民盡 也。 必 留 過 也,武王克殷,初下車即 師 周 時,所謂 三亳皆商之故都,而 荒民散 建國,原計 有之,安得方千里 不應槩從誅滅 三監域内。 津,又大會諸 近 菲 已非商有。 通畿之制。 處故土者殆無幾。 徙 郊、遠郊及邦甸 武丁宅殷之舊。 西亳偃師 下 至紂滅時,豈猶 境壤 邦畿千里者,定 都, 户 況殷之畿内,諸 益削,即 封 口 侯於此 南亳穀 ,改建他君。 在孟津之南,武 武王立三盥 伯禽, 爲 定,成 乎 ? 以 去朝歌稍遠,商末 又以 孰 然 又 如 書》敘云: 是邦畿千里乎? 内 應併數之,如東、 王 後 重 且 以 及 黎 地耳。 作洛 。 固 殷 非 北 以 封微子,亦不 北 爲 則三 侯 民 行 直 帝辛之暴, 亳蒙,即 畿 非 王觀兵於 未嘗以畀之 之後 六族賜之, 監 伐 此也,古人 大無道者 内 康 紂, 或 「成王 所統,不 叔 ,殷頑 兼 宋 周 則 既 在 孟 西 亡 土 而 地 偃 又 得

伐管 叔 遷 以 邶 殷 鄘 餘 之民 另 排 於洛 康 叔 邑 於 故 衞 邶 ^ 鄘 地 理

既歸,户 曠 或 大侯不 叔 叔 云: 時 相 耳 + 與 過 Ή 縱 另 《漢 同 萬家,小 「亦息。 欲 得 書 風。」合敘、記之言觀之, 厥 建 留 功 列侯大者至三四 ,侯 他 者 臣表》言: 生 五 侯, 多 六百户。 在 勢 漸 衞 亦 蕃 逮 初定,封户 其 不 1萬户 稍 文、景四 能 邶 ,, 小 因 鄘 移 國 一十 五. 併 可 兩 自 居 世 倍。」 以 或 見 開 彼 オニ三 畀 封 已 衞 事 流 地 志 康 成 康 īE. 民

大, 邶 終 爲 然受 鄘 衞 舊 有 自 壤 官 先 漸 忧 王 致 0 一,不 殷 采 庶, 風 容 之 無 雖 時 故 其 仍 裁 地 各 削 比 存 於 則 舊 他 名, 或 或 以 之 爲 胆

此

相

類

後

厸

稍

鄭

有

鄭

在

衞

西

南

圃

田

之

北

當

與

鄘

接

鄭

地

非此

武父。

圃

H

則

豫

州

之

澤

藪

也

後爲

而

康

叔

初

封

以

此

爲

境

列則

以

鮀

之言

合之

鄭

也。 記 監 風 孔 之 + 子 之 地 謂 異 命 齊 爲 理 景 或 衞 公 侯。」 當 Ħ 然 見 未 《孔 普 必 叢 康 以 子 叔 此 封 夫 寓 衞 統 褒 貶 \equiv 統

證

平

譜

×

^

鄘

風

×

不

又

康

叔

兼

有

或

之

明

云

以

監

之民,

或

康

叔

爲

衞

侯。」

意

監

則

邶、

鄘

衞

兼

有

之

矣。

孔

氏

書

傳

亦

與 與 鄘 定 泂 譜 衞 远 . 南 漕 年。 》謂 衞 地 者 自 理 而 C, 故 地 武父不 紂 則 記 知 武 皆 城 其 **>** 鄘 康 父以 見《 北 冒 德 地 叔 也 可 爲 鄘 化 也 考, 南 0 邶, 武 風 何 及圃 又 \leq 公之 桓 祝 南 由 季 十二年 在 鮀 爲 徧 田 札 河 德 論 鄘 之北 聞 及 南 與 武 歌 若 東 鄭伯 王 境。 足 或 康 爲 邶 之 徵 盟 衞 平 叔 × 見 封 于 衞 ^ ? 無 ,武父」, 左 楚 康 鄘 地 邶 鄭 叔 在 邱

伐 庚 約 監 鄘 以 漢 管 康 其 書 叔 成《 介京 尹 . 之,衞 地 詩 師 理 封 譜 記 武 **>** 蔡 不 **>** 庚 云 叔 用 八爲殷 尹 其 之, 説 後,三分其 邶 以 謂 以 監 封 殷 紂 武 謂 子 地 王 武

29

又與 知其 耳。 其 記 監 叔 監 言管、蔡監 税 管、蔡所監 疏 置 $\overline{\Delta}$ 言良是。 監之中。 監 也 申 \equiv 雖 武 其 監 衞 必叛,故立三 宋章氏《山堂 殷既三分,三叔當 邶 如舜 與《漢 未 霍 庚同 故 信 《史記 蔡叔 使 及 然源 叔 矣。 之封 亦亦 衞 管 也。 國 《漢記》三監 相 記 監 爲三監 叔 》異 一、故 不 謂 禄父。」言 鄘 正義引《帝王世紀》,以 蓋 象。 鄘 足據信 蔡 周 略 漢 監 考索》論武 則 而 霍 叔 此 叔 是管、蔡、霍 書 而 使 霍 記》非誤, 言 叔 監 弗 雖 霍 分治之。 叔 1,故鄭 有 相 • 霍 監 治 之於 著,非 臆説 監 叔 之監 武 作 邶 其 則必立 邶 庚, 尹 雒 ,此言管、蔡 或 王之封武 不指言之,斯 外 但述之未詳 謂 而 邶 解 圃 不 《漢 一,武 無霍叔 以 足 而 武 事 教 言 於 孔 **子勢或有** 戢 納 之。 庚 庚 記 補 口 其 其 其 晁 爲 亦 庚, **>** 知 朝 漢 管 羽 注 所 既 貢 則 在 孔

> 管、 蔡、商、 爲 附 輕者 略 翼 有 殷,但武 在 遂反爲所 可 同 邶 人必 ,觀其悲 以 居 蔡、商、奄,皆 想 霍 是矣。 良 進 意 固 應 叔 多 退 奄 雖 以 監 無 如 庚故君之子,又據 智 惟 爲 制 之於 閒 不欲 謀 此 可 四 耳。 數 我 周 叛 疑 國,《 霍 也。 室,俾 勢難 内 厥 之事 者。 故《周 不及霍 後 以 叔 破斧》 原 周 定 ,,武 才 而 骨 立 設 公誅 其 管、 非 書 異,非 肉 監 庚主之, 詩 腹 其 . 則 相 之意 蔡 舊 四 心 多 敵 霍 讎 所 都 監 國 若 士》止 易 叔與 當 臣 本 監 墮 毛 霍 霍叔 H 其 於 叔 民 使 武 亦 叔 制 説 數 桁 反 在 之制 所 與之 庚 以 罪 殷 必必 中 同 爲 溜 方

無 首 今觀邶、 稽 云 之談 宋胡仁仲 鄘 也。 明 衞 大 宏。 向 命 譜 讀 于 謂 妹 封 因 康 邦。 康 復 誥 叔 論之。 已辯 妹 是 武 邦 之 E 案《 約 而 時 都 酒 未 事 也

歌。」 分殷 庚尚 公以 之必 復 安 庚。』《水 此 何 君 於洛邑 Ħ 譜 1 左傳》亦云: 酒 得 得 廁 會 m 衞 語》 紀》則管叔監之,不應又 V 」則武 矛 芸 地 成 録 教 地 其 以 在 以 之。 閒 以 分 也。 口 在 又以殷獻 王之命作《康 村 經 遷之未 則殷之臣 置 是是 武 庚未亡 通 康 康 注》亦 《孔叢 ^ 武 王 三監,何地更容康叔 者。 叔 書 叔, 四 世,據《漢記》則蔡叔 E 而 「分康 監 『》敘謂 盡 源 使 時 伐 臣 煩 云 子》記孔子之言 矣,書史何止言三 者 工巨室,尚 據 之 謂 及 紂 其 叔以 諸 舊都即妹 以 , 劼毖哉? 明 則 成 以 》。」正與《書》敘合、 臣 殷 以 Ŧ 大 武 其 殷民七族。」使武 餘 授 百 既 封 命 王 京 I 以 民 康 黜 康 於 封 邦。 師 囑 ? 武 桂 叔 殷 叔 況武 武 其 村 日 付 遷 (尹之, 使, 此 庚 如 康 若 庚 地 紂 監 小叔者, 爲 故 康 於 王 哉 子 皆 世 康 爲 頑 君 叔, 一周 即 朝 之 説 據 适 民 ? 叔 ?

開

府

侯

觀

後 儒 不 信 孔子 而 信 胡 氏,豈 不悖 哉

三六

古觀 里,存 遷、盤庚至後又五遷。 至謂 書》、 養都, 此 氏 國 州 國 鄠 亦言封 扈國,亦商之舊都, 文王 又案,宋王存《九域記 大名即 縣 鄭《譜 妄也。 杜 艻 與大名猶 已 預 溷 兩 謂 無 爲 滅之,作 武 × 古 或 殷世 即 確 酈《注》皆不合,尤 庚不於朝歌 觀 地 近 頓 據, 其 邱 扈 屢 在 何 又言 灃 地 扈乃 遷, 冀 衞 更 謬 不 邑 縣。 爲 如 契至湯 武 一焉,即 武 可 夏之有扈,商 , O 外謬。 》言 王立 在 庚 悉考,謂 晉頓 雍 封 八 今陝 武 遷 統 此 不 邱郡。今之 觀 湯至 「大名府 帰 庚於 記 口 大 遠 西 乃 則 信 盤 名 與 此 數 夏 祖 爲 西 庚 也 崇 Ŧi. 班 是 其 安 五

殷

説

傅

⁰ 此字。 不一 嘉 慶 本 同 康熙抄 本、 大全本、《 四庫

柏舟

門而 此。 聽。 婦 烝父妾也,繼 宣公者,止莊公子晉耳,宣夫人始則夷姜, 君,使人告女,女終不 聽,人持三年喪。 宣夫人自誓所作,夫人齊女,嫁於衞, 不合,不知朱子何以 人之詩。 夫衛自康叔迄君角,計三十七君,其 衞君使人訴 衞君死,保母 聞别娶於齊。 「邶風 今觀《列 柏 則宣姜,奪子婦 舟 於齊兄弟,齊兄弟皆欲 喪畢,弟立,請與同庖,不 i E 》,朱子 宣公卒後,但聞宣姜鶉 、取之。 女傳》所記, 聽,作 「可以還矣。」女不 ,據《列 彼以此詩 此 也。 詩。 女傳 與 其 二姜之 衞 》指 至 説 乃 事 稱 與 如 城 衞 爲 全

《魯詩 《列女傳》爲證,然不全用其説,而 之語 耳。 也。 有張學龍及朱善者,執此 詩,蓋亦心知其非,特欲借之以 之,以宣公當共伯,以宣公弟當共伯弟武 柏舟》是共姜自誓之詩,故譌 未知果否。 也。」仍與《毛詩》同意,則向之説,不必皆本《魯詩》矣。 成帝,又引「愠於羣小」語而申之曰: 説,皆《魯詩》言。 劉向楚元王之後,元王與申公俱受《詩 公子朔,非 鵲之醜,不聞 反移以 詆敘, 鑿空傅會,莫甚於此。 ,竟據爲 獨怪後 》,胡一 弟也。 要其妄爲此説者,必因《 世耳食之徒,因 桂 《列女傳》既以《柏舟》爲宣姜作,及上 典故,遂實指 更有守義之姜也。 云 何以服 《列女傳》之説,或云 「此《魯詩》説。」王氏《玉海 人乎? 以 朱子則信之, 此 文 朱子 「小人成羣,誠足愠 》於浮邱伯 詩 論 又朱 造此 爲莊 ,言之鑿鑿 ,揣度 助 疑 繼立 子雖 己 事 爲 鄘 姜作 ,故向之 未定 排 出自 一者宣 莊 以 風 シ亦 敘 姜 引 公 配 而 疏 以

毛詩稽古編卷三

然。 口 勝 歎 譌 緝《 以仍 哉 大全》者,又 譌 妄以生妄, 録 其 經學 語 於 之 書 陋, 以 至 示 此 後

從錢氏 誠 也 説 耿 爲 文》 耿,警警不 一凡重語 臆 耿 訓訓 説 耿 耳 爲 不 著 皆貌 小 寐」,毛 · 安 頰」之訓 明, 狀 也 之辭, 蓋 云: Œ 一欲 異 疏 同 多 也。 明 離 耿」於 毛 耿 於 義。 耿, 廣 本 雅 訓 猶 潁 朱《 · | | | | 儆 故 傳 也 儆 與

妾,尤 也,此 謂 爲 婦婦 朱子 無 亦説《詩》之一 八詩 典 正因 以《 八據。 柏 呼 誤 舟 認 妾爲小,古人 \checkmark 》詩 美 蔽 詞 刺 也 氣 諸 卑 篇 至謂 弱 安 皆 柔 羣小 得 其 順 人 有 爲 自 此 斷 道 稱 其

傳 爲 語 日 詞 邶 月 也 風 ())傳 ^ 兩 柏舟》疏引《 云 言 日 日 居 平 月 《檀弓 月 諸」、《 平 》「何居」、《 柏 蓋 舟 以 **>** 居 丰 左 無

> 猶 韻》, 軌 傳 爲 傳 不 也 引《韻釋》爲證。 諸 必 寫 \approx 度, 姬 可 口 案,諸 更易 孫 通,《柏 之 忽 獨仁 訓 而《 諸」, 語 譌 於, 良然。 釋 脱 人 爲於、於 引《孟子》、《左 文》 舟》篇不 證二字爲 詩言日 也 不 》弗及, 遇 但合之下文,則《 一,莊 爲 月皆有 相接矣。 兒 居,亦 姜 非 語 傳 編 陸 不見答,所 助 》 爲 氏 所 見《 宋 則 證 之疏 在 且 孫 此 毛 玉 一,未 於 奕 居 日 著。 篇 義 口 字 以 即 嘗 自 月 訓 自 失 後 宜 謂 \sim 優 居 篇 廣 其 世 讀 傷

不 末 且 無去義 「此仁人,君之同姓,故以兄弟之道 知 與 句「不能 孔 朱子以 次 疏言同 章 則戴嬀、宋 奮飛 亦 前柏 有 姓 舟 之臣 兄 \leq 弟 桓夫人非耶 婦 》爲 江意 不 人 婦 忍去 無 人 又 責君。」 可 詩 相 國 去之 胡 應 義 況 也 胡 義 尤 桂 謂 允 爲 疏 又 婦 當 云: 證 舉 人

緑衣

不得其解。

不得其解。

《緑衣》首章以表裏喻微顯,次章以上

此意。以責莊公,較爲平正,後篇「逝不古處」亦之詞,取義精矣。然論作詩者之意,則思古之詞,取義精矣。然論作詩者之意,則思古

俱不載,乃俗字也,嚴誤矣。 淒,雲雨起也,旁二點從仌,寒也。 案凄字《説文》、《玉篇》「淒其以風」,嚴《緝》以爲淒當作凄,妻

獨有冽字,則冽字較古矣,故《下泉》孔疏辯凄、泮、冽三字皆不見《説文》,《玉篇》

詩字當以從水爲正,今本皆作淒

《緝》之言,然仍以爲《詩》作淒,則是宋 改之也。 文此兩字皆從水,近世諸本亦然,惟 引《詩》「迨冰未泮」。 引《詩》「淒其以風」。 易經字矣。案,《韻會》凄字注云「通 於開元,衞包與孫愐同時,猶未及據其 泮」,經文皆從水,不從仌也。 之、然《緑衣》之「淒其」、《匏有苦葉》之「未 疏泮作泮,定是鏤板時粟監之彊 例字當從仌。至凄字、泮字,《唐韻 可見較讎之任至重,須擇識字人。 。其注凄字,雖 半字注 云 蓋《 一通 解事者妄 唐韻》成 監 作 作 》雖 述嚴 泮 . 淒 , 書以 時 本 注 經 載

燕燕

《傳》義從鄭而音從毛,殊欠撿點。反。鄭訓以恩相親信,《釋文》而鴆反。朱「仲氏任只」,任字毛訓大,《釋文》人林

傳云: 無傳,以《邶 (鄘)//秉 衞 心 塞 詩 塞 》傳例 N. 淵 瘞 言 也。」 |箋云: 之,意未 塞 淵 鄭 無 $\stackrel{\sim}{\sim}$ 必 塞, 邶 箋, 同 $\stackrel{\cdot}{\Rightarrow}$ 充 鄭 意 其 實 也 同 1/2 也 毛 寒)。」毛 孔 矣。 淵 疏

乎? 於二詩皆以 瘞 與 幽 案《釋 也 充 實 塞爲 詰 不同,孔 説 文 誠 ***** 實, 瘞, 氏一之誤矣。 豈 瘞 微 謂 也。」《 幽 瘞 薶 與 充 也 釋言 實 又案, 幽 同 微 義

乃俗本, 《邶》傳 解 瘞字,崔《集注》本作實,孔謂 其 是 故。 明 知 又 實 案,《 非 書》「温恭允 毛義 矣, 耐 申 塞 塞、實 傳 疏 用

文耶 正。 引《詩》毛 ? 兩 疏 又案 傳訓 俱 出 《説文》有 孔 「塞」爲「實」,是又據 氏, mj 彼此 瘱字,云 互異 分,豈 静 崔 也 各 本 因 爲 静

與 と 微 先 義 君之思,以 近 ~, « 雅 動寡 傳 人」,言 瘞」字,當是 戴 《嬀以 思 瘱 先

> 乎? 念先 説。 可 疏 述語 注 謂 君之故,故 笑。 分 也 詩 意如 注 君 勉莊姜當 今《集傳》用 瞻 又 而 其 此 朱子 望 有 下, 足足 臨 弗 U 行 1思先 及」, 竟 矣。 初 勉 時 説 己 莫 楊 猶 君,求 楊 以 嬀已行矣,安得 ,亦非。 識 説 勸 氏 此 ,而輯《大全》者 勉 其 爲 名時,著《詩 深 意 我 求教之詞, 是詩 ௱ 也 之不同, 反 淺 此 皆 辯 孔 不不 復 别 疑 疏 尤 申 引 求 後 言 如 鄭 卷 爲 孔 教 古 追

日月

之,以 位 或 傷己不見荅於先君 本 何 能 所 日月》 爲夫人見薄, 有 以 定 傾 乎? 摇 也 敘 言 此 莊 則 義當矣。 以 姜 冢 至 不見 嗣 莊 困 之位 姜 窮。」 苔, 遭 朱子《辯 望亦 州 東萊 則 吁 桓 輕,此 之 公之 發 説 難 明

敘乎? 公之名譽,即朱子臆創之説, 意之聲語於我,與上二章「古處」、「相好」同 之之意。又言「德音無良」,非所宜 我,並無望之之意。 人,不知古注「寧」本訓 以爲莊公在時所作,蓋「寧不我顧」,猶 語例,總是不見荅之意耳,何妨於身後言 其以「我顧」爲願望之詞,「德音」爲 「德音無良」,言無善恩 一曾一, 言曾 可據 不 施 以 顧 有 於 駮 莊 前 念 望

無定乎?

作詩本意,在此 篇 公之不定其位 傳不謬矣。《集傳》以爲發語詞,不知何 詩》「噬」作「逝」,而 云「逮也」,文異 兩「噬」字,毛傳皆訓逮。 日月》詩四章,每章皆言一 日月》篇兩「逝」字、《唐· ,位之不定,由於莊姜之不見 一語矣。 而 義 訓及 同。 ,義亦同 完之見弑,由於莊 「噬肯 《爾雅》作遾,亦 「胡能 有杕之杜 適 毛,字訓 我」,《 有定」, 本。 相

定。夫莊公之心,惟知嬖州吁母而已,何嘗完,得其旨矣。朱《傳》解爲莊公之心意未荅,禍端所始,故反覆言之。鄭箋以爲定

終風

靁 喻 好亂樂禍,狂暴之惡,誠宜有之。今篇中取 母子之意,愚未見其然也。 ,其看感 非 朱子辯《終 日 終風,曰暴,曰 亂常、狂易失心之態 風》敘,以 霾, 爲 州吁 有 曰曀 夫 弑君虐民, 婦 難 ,日陰,日 之情,無 與 朝

意不如 朱子 母 居 矣 獨 悼 ,所謂 不 其 此 悠悠我 미 無 辯見後 施之於子乎 禮 有 公 雖 夫婦之情者, 思其不 思」及「寤言」、「願言」諸 條 非 令德之君 來,婦 ? 此姑就時 蓋 固 指 或 可 篇 未 解論之,其實詩 施 中一中 至 之於夫, 此 語 心 耳。 是 且

消 姜安 安忍 敦 慢 也 言悼 情 嫡 絶 母 厚 重 间 事 得 然則 之久矣,何 莊 Ĕ 也。 思 悼之,莫往 ,言思,言願 説《終風》詩者,謂 是衞之賊也 (姜,莊姜安 以之爲子? 我,母子之情 定姜所 此言非 何 所 指? 自 謂 來則 鄭 是。 得 致 暴妾使余」者 云 其 以 況 衞 卷 思之,甚 E 「願 州 子道 卷卷 其 人 卷 莊姜不 敘 思 未 吁 謔 不 不 也」。 弑 已,所 畜之? 乎 浪 嘗以之爲君 云 君 至 ? 笑 忘 乎 皆 篡 敖 憂 门,彼 州 非 故 以 國, , 侮 而 吁, 母 指 FL. 不 爲 不 莊 以 州 經 子 慢 阻 温 見 莊 寐 文 之 侮 姜 旰 1 其 兵 柔

> 子不録 所悲者 乎? 侮笑 傷 弑之人,欲與敘 心之痛 미 誅之,則 IE 悼之情,至不能寐,且念不 一章言 幸 之維 己 不敢 · 矣。 也 此首章、次章之意 切,如 其詩 也。 0 ,宗社之多禍 何 甚 ? 傷 怒也,悼之已耳,至 然國家之禍 正 然則 矣 己者,傷 割 \Box 然 聲 母子之情哉? ௱ 莊 非 其弑 傷、毛訓 姜所 婦 耐 己之不 已,安 人 逆之罪 至 也。 憤 所 此 懷 得 者 能 得 伸, 下 能 一莫往 告於 及 亂 爲 贵 章 反結歡 果爾, 傷。 如 已,故受 正 賊 能 又言其 州 莫來,若 之横行 行 解 皆承上 國 吁 而 於 則 於 耳 其 夫 憂 思 而

浪笑敖 敖 中 人 久 情 睨 矣。 態 其 莊 嫡 姜子桓公而 諒 戲 母,笑之謔之, 謔 有 旦行 之也 也。」蓋古人本有 篡弑之事 悪 又案,《 州 吁 以 自 快 釋 吁 話

芸 夙 以 素 此 昔之憤 爲 驕 語,故《 國 不 平. 阚 遂 小 於 謔

雅》釋之。 摭 故 典 以 《邶》詩人采 助 詞 藻 也 用成語 宋儒 執 ,亦如後世文 此 疑《釋詁

非周公作,固

矣。

也。 從肉 吁安得 也 案肯、《説文》云: 心 肎。』《玉篇》云: 人神共憤,而反加),今作肯。」 則 言「州吁 . 尚省,一曰骨 可 則莊姜之惡州吁久矣,豈有躬爲弑逆, 拒之之詞,非望之之詞也。 惠然肯來」,箋云: 有順心時乎? 來,不欲見 有寵 無肉 而 其 ^ 親愛,望其肯來者乎? 「骨閒 詩》「惠然肎來」,肎,可 好兵,公弗禁, 戲 言可 也。 謔。」 肉 「肯,可 苦等切,古文作 來,正欲其不 此 肎。 説 《左傳》隱四 也。 肎,著也。 當 莊姜惡 矣。 有 來 州 順

破字,若有口旁,不應訓跆矣,是毛公傳作「疐」是也。毛傳云:「疐,跆也。」毛不「願言則嚏」、《釋文》「嚏」作「疐」。案,

得之。 音邱 其思 説。 乎? 余謂人多思之極,輒至困倦,崔義亦優矣。 傳「疐,跆也」,跆作软,崔云: 穿鑿之見耳。 也。」蓋言思及此,則 事也。下章「 徒思之不能行之也。 跋》篇「疐尾」之疐,同 徑 有「道我」之解,後儒喜其纖巧近俗,多從其 敢 云欠欠数数是也。 詩》 用 嚏 心,非謂 據 然陸本作疐,是唐 咳之嚏。」若本 莳 「嚏」文,不知始於何時 是鄭氏箋《詩》時 毛訓 反。」《玉篇》云: 本作「疐」也。 州 疐爲跲,疐當爲竹利反,與《 吁 願言則懷」,毛 又崔靈 思 我。 人體倦則欠,意倦則故, 來 傷 誅除 有 鄭箋云: 是礙 恩梁人。 鄭 世經文尚 猶作「疐」 心 以俗 也。 旁, 篡 **救欠**,張 耐 矣。 - 賊,原非婦 不 人道 二語皆自道 ^ 鄭 「疐 集注》載毛 行之義,言 未 **劫**,今俗人 余謂傳義 也。 何 我釋之, 盡 「懷,傷 讀 口 須 改,其 也。 爲不 自 破 狼 鄭 字

ĮЦ

74

擊

鼓

以「闊 闊, 兮」承「偕老」,彊加 歎 章言昔日 不 作奠。」夐亦遠也。 死 「洵」義 能 此 也。 生 一勤 二章悉遵 相 洵呼縣反。 兮」承 擊 苦,相 今以 活 同 鼓 相 疏遠 》篇 而 契 約如此,下章言不遂所約,爲 契 與 與上「契 毛傳 毛云: 層 兮 八共之 圃 契 闊 爲 不得 闊 」,「洵 訓 隔 分配,不 最 「遠也。」《釋文》云: 也。 疏遠, 本 遠,已 得之。 闊 信 訓 讀 I伸同。 一義異。 下 勤 荀, 此 屬 章 成文義。 苦、毛、鄭 訓 臆 其意 陽 闊 信 言 説 依鄭 兮 字 矣。 也。 乖 「《韓 同。 與 東萊 氏 鱪 訓 詩 又 可 上 下 乖 言 m

古本 信」字不 相通。 洵 字 從 ·協,·當音荀,訓信。 《説文》絢字諧旬聲,旬字音眩 毛義,宜音 1呼縣 反。 不 知此二音 或 謂 與 下

> 音。」 斯皆 至

若與

、諧聲,多有甚遠於今者,正可借以考古

不煩

吸字。

近世趙凡夫言:

「《説文》之讀

洵

與

信

古

韻

本

協

耳

陸

德

明謂

古

人

韻

緩

諧

匀

省

聲

旬

或

作

眴

亦

諧

旬

皆

是

也,

凱 風

矣。 其自 世騒 而 而 不嫁,正孝之實也 實 責 美 若謂七子自作,是暴 賦 詩 之詞。 及樂 人美刺 ,似美而 府 多代 夫自責 猶 實 然。 刺 者。 爲 《凱 而不怨親,母 其 美之者 揚 不 人之言, 風》 其 獨 美孝子,止 親之過 「, 道 百篇 其 故 感 實 有 一,何 也 其 而 似 得 意 述 後 咖

0 原缺 據康熙抄本、大全本、《四庫全書》本、嘉慶

本補。

云孝? 況人子自責,惟有涕泣引咎,豈暇

弄文墨、誇詞藻耶?

蠅 應釋之,豈詩本旨乎? 爲比,次章 》亦然。 凱 風》首二章皆 爲 興、太 鑿 興也,《集傳》分首 矣。 《小雅 劉 瑾 . 谷 以 **I風》、《** 有 應、 青 無 章

傳 説《詩 引《論 雪山駮之,良是 睆,好貌。」 是 孝子顔貌之和,以好音喻孝子詞 以以 影如 睍 語》「色難」、《内則》「下氣怡聲」證之。 睍睆黄鳥, **皖爲聲,闕其一義矣。** 此,方可令人興、觀、 興 其 載 色 好 也 其音」, 故箋、 傳云: 羣、怨。 疏 嚴坦叔、王 氣之順 以 睍 睆 《集 前 睍 喻

睆 星 黄 也。」字三見《詩》 毛云「實貌 [鳥],毛云「好 睆 本作院,從 日 貌」。 ^ 而皆從 大 旁。 東》「睆 《杕杜 \wedge 目。 玉 篇 彼 一》「有 牽 凱 云 4 風 睆 \approx 毛 其 睍 明

> 此三詩之睆。 或因此。 東》傳語 也 云 大目也。 明也」, 非 明 聲 星 ,此殆「晥」之本義乎? 意亦 也。 貌 其 从目 -0 同《詩》傳。 禮 各隨文釋之, 早聲,或從完,户版反。」非 記 一華 而 **宝** 故 晥 不 篇》獨取《大 」、《釋文》云 同 字旁從日, 要皆 貌

雄雉

雉。 陸 飛甚疾,決起 過三丈,故 故易其説。 喻 農 宣公媚説 師 曾子固 雄雉》首 謂 雉 築 指 婦婦 然案雉不遠飛,崇 飛若 丽 牆 爲 人之態,後 二章之興,毛、 横 者 行 矢,一往 刺 役之喻 以 數 高 少,即· 儒 丈、長 ,既非其倫, 而 以 竄 鄭 墮 其 不過丈,修不 入林草閒, 釋 取 三丈 是也。 之, 義 圖 爲 皆以 又雉 朱

雉》及《 無 詩 不 分 爲 行 子 詞 偷 喻 没之苦, 訓 車 言 如 雄 君 B 毛 泄 與 匏 雉 爲 泄 鄭 有苦 夫 E 雄 ? 解 亦 人人,語 雄 爲 者 南 也 「葉》同 非 飛 广,尤 雉 Ш 善 之緩 》言 , 足 若 又詩 於 是 證《雄 雄 曰 相 體 而 刺淫之詩 狐 求 應 人 物 以 牡 作 託 者 雉》是 皆 舒 興 明 U 也。 緩 者 鳥 著 刺 之意 自 指斥宣 而 潤 余 浮 其 得 皆 謂 雄 外 惟 未 以 反 雌 雄 公 此 此 必 雉 興

匏有苦葉

錯 凡 以「濟」 不 舉 三,而 可 越,又 以 匏 與 便文耳。 有 「雉」興 語之中一言匏,再言 以 苦 葉》首章 濟之深淺 要之語 、夫人之犯 以 喻 語 匏 禮 爲 禮 各 與 取 刺 雉 有 淫 濟 興 官 託 五言 於 興 興,非 物 次 禮 濟 者 章 之

> 謬 比 於 匏 巧 淫 假 興 亂 象 濟」, 之人。 之 中 又以「濟」 又 古人文 客 主 興 相 義 「雉」, 形 平直 忧 然後以 恐 朱 不 子 作 謂 雉 此 以

頭。」孔 仲 之名 軌; 《説文》及《考工 當 馭祭 羅 庸 可 記 朱《傳》從 大 名軌矣。 達 中 》及《匠 而 軌 不 行 馭 兩 少 謂《 濟盈 人儀》「 · 知 軹 之朝 是 疏 軹 語 少儀 人》注 祭 鄭 車九,龜 申之,謂注 不濡 謂 其《 亦 軓 意 朝 祭左右 軾 名 災軌 一記》注 匏 一,以 軓 是 前 面 軌 有苦葉》、《 美反,取 ., 字 孔 轂 乃 證 軌 轂 以 古 乃 不 軌 末 末二處 范 謂《少儀》字 軌 以 從 軹 注 爲車 軌 軓 當 證 也 字之誤。 軓 與 協 是 大馭 注 軹 詩 軹 從 轍之名。 韻 皆 引 亦名 軾 車, 於 也 名 水 疏 前 之 周 車 物 」轉,不 朝, 可 則 凡 然 案,《 似 禮 百 疏 濡 音 引《 以 則 又 軹 謂 犯 引 引 名 中 茄 朱 孔 軹 亦 大 轊

也 俱通 謂孔 子不 自明 軌非帆,且是轂末之軌,非車 亦可名軌,恐鄭之臆説耳。 行之見於地者,豈可濡 知之, ,似矣。 義優 知 軾前之解,本於毛傳,不必紛更。 軌 而韻遠,朱韻協而 爲 而特駮其誤,羅以爲 軹 但孔氏詩疏辯據精博, 遂 以 車 乎? 轍 釋 況軹之名軌,孔 義 之。 轍之軌 羅 乖 蓋 不知,尤 轍 羅 以 ,則軹 詩字 也。 迹 則 特 義 非 之 是 韻 源 車

失詩意。

、大詩意。

、大詩意。

、大學,大倫大惡,故《詩》用爲喻,其託興與夷姜,人倫大惡,故《詩》用爲喻,其託興與夷姜,人倫大惡,故《詩》用爲喻,其託興與夷姜,人倫大惡,故《詩》用爲喻,其託興

谷 風

「德音無良」、「德音莫違」,此二「德

攸當,嚴《緝》辯之甚詳。 不出於閩,焉用 善,是又以爲婦 則解爲美譽,曰 月》既以「德音」爲莊公之聲譽矣,於《谷風》 音」,謂 詩》,或指名譽,或指號令, 夫 婦 閒 晤語之言 不可以色衰而 聲譽乎? 人之聲譽矣。 也。 案,「德音」 或指語言,各 集 夫女子之名 棄其德音之 傳》於《日 屢 見

之云: 菁也, 注。 薨也,取《 葑蓯也,取 也 坊記》注及《方言》、《草木疏》之言, 取取 物 此 也。 葑、菲二菜,孔仲達合《 非 陸 取陸《疏 藈 疏 《方言 葑也,須 (姑之土 》,郭 菲 孫炎《爾 也 注 及《方言》。 瓜。 芥 芴 爾 也, 雅 也 宿菜 雅 》注。 也 取毛傳及孫炎《爾雅 以 取 取 也 陸《疏 爲 郭璞則 蔓 毛 别 一 傳 草。 取 》及《方 及《 陸 去葑 也, 詩 疏 爾 土 取 蓯 瓜 雅 言 《坊 丽 也 》注 爾 五 加 取 記 蒠 者 總 雅 七 蕵 取 蕪。 注 菜 者 斷 郭 蕪

物 閉 削 俱 别 亦 粗 根葉及子是 隱居已辯之矣。 菜,人《别録》上品, 類」, 葑、《本草》名蕪菁, 確指爲何菜,豈非 物 本 蕪菁,芥屬 矣。 八月種 甕 良 净 「葉大而 似芥子而紫 忧 草》考之,葑 菜。」 擬 爲 孔 其 自 菹 者葉美 語 類 曹 狀 北 案如李言, 菘類,與 其 亦 者 也 厚 似 也。 土來者 佳。 明 糾 阔 葍 赤 圃 劃 蕪 種 王伯厚 蘆 根長 色。 猶 矣。 而 根 青六月 施全 九 古今物産有不 夏 根甚 非 燕京 又 小,惟七 與 則俗 英。 口 開 工别。」李 而 補 蘆 蘆 名 但 葍 識 黄 白 注《急就 菔 九 大 人 合之今世,終不 也 菔 呼 九 種 華 1,味辛 ൬ 南 英 大 以 英 根、葉、 百 者 月初 , 氏 菲 故 瓶 根大 四 菘 根 章 條 根 方植之根 。》亦 菜 醃 出 苦 綱 則 鄭 大 同 而 種者 又名諸 華、 者 藏 Z 難 與? 箋 加 如 m 目 非 愐 芥 葉 短,莖 稽 味 蘆 云 謂 子 乃是 根 子, 無善 菔 矣。 短 蠧 都 之 葉 葛 以 能 蒿

> 之與? 色。」 釋意菜 今爲 小 蓋 則 何 地 菜。 與 云 氣 一葑 不 陸《疏 殆 同 生下 司 如 》言其 此 類 濕 耐 菲 地 小 莖 不 别, 似 粗 載 蕪 葉 故 本 菁, 厚 風 艸 人 華 而 並 紫 景 不 赤 舉 純 知

之者,尤不一而 雅》、《月令》及《周 包、《儀禮》用爲羊羹之芼,則養 不思苦菜與 茶蓼」、《爾雅》之「蒤,委葉」也。 爾 蓼屬。 谷風》 爾雅》之「蔈、音標。 茶、苦菜」也。 雅》 「采茶 爾 有 朱《傳》釋茶 **张雅**》有 詳 明 見《良耜》。」是合兩 新 委 文 樗 五茶,其三見《詩 葉皆名爲 也。 「有 足,而《内 書 **芩**,音吁。 女如荼」,「 夫 堇 爲苦菜,又繼 苦 茶 時 菜 茶, 如 訓 則 之名, 飴 解 茶」也。 **>** 名同 茶爲 予 用 親 》,《詩》之咏 凡三草矣 爲 薦 所 見 爾 而 「誰謂 一物,竟 之日: 将茶 濡 賓 於《爾 物 「以薅 雅 豚之 亦資 異 茶

三異也 華成 傳記 驗玄圖》、《顏氏家訓 Ž: 也 亦云「冬不枯」。 歷 其 而 茶,爲可 二異也。 委葉之荼也。 味, 分水陸,其形色性 辛,五 似 穗 所言,乃大不然。 苦菜以 ,得夏乃成,此《易通卦驗玄圖》語。 莖中空而脆,折之有白汁。 蓼葉狹小無白 春華夏實,至秋復生,華而不實。」夢 因《良 豊 丽 菊 證 苦菜 可充以穢草 苦菜葉似苣,斷之有白汁,見《易通 也,四 長,色紅白,亦 異 耳。 四 耜 蓼則春生而秋殘,今借萎。 也。 若苦菜即此茶,則與蓼一 華黄 月秀,見《月令》及《時 》及《唐本草》皆引之。《本草綱目》亦 夫茶爲陸穢, 蓼爲 異 詩 苦菜 也。 茶、蓼並 似 味 野 乎? 苦菜生於寒秋,經冬 一華結子一叢,形如 亦 苦菜味苦,見《本草》。 有黄 菊 必 ,見《本草衍義》。 言,又閩 朱子之爲 相 白 似。 者,名木 訓》。 則 《桐君藥 水 華 韓保昇 今考之 人 於秋, 穢 此 偁 汁, 蓼 録 物 異 此 説 辣 卦 亦

而取證於百千載後蠻方土語,不亦迂乎?矣,何得溷爲一物。況有《爾雅》正典不信,皆見《本草綱目》。六異也。然則二草之相去遠同蒿子,蓼子大如胡麻,赤黑而懺俗作失。區,

《廣雅 苣、《説文》作夢、云: 勝於家植者。 名苦蕒,云: 也。」又案《本草》本經名茶、《别録》名游冬、 苦苣,野生者謂之苦蕒。 苦者爲苦苣。」苦菜即苦苣也,家栽者謂之 云: 切。』《玉篇》云: 云: 有數種,色白者爲白苣,色紫者爲紫苣,味 》同。 苦菜,苣 「蕒,莫蟹 「苦蕒俗名苦苣。」然則 《嘉祐本草》名苦苣,李氏《 屬 野苣,頻折 也。 切。 「苣、苦蕒菜 《合璧事 吴人 「菜也,似蘇者,彊魚 呼苦藘,皆 之則味甘滑,反 宋 洪 類》云: 也。」《 實 邁《續 (綱目》 廣韻 物 是物 也

齊,徂禮切。泚,千禮切。二字同韻而

本蒲 傳》 異 母 屋 北 齊」音 韻 切、《集傳》音蒲 截 從 1 然 泚 网 泚 音, 清 恐 母 誤。 而 彻 朱 1 子一之,亦誤。 匍 切,北人職韻 其 匐 甘 救之」,「 如 薺 匍 今 集

土

語

呼

北

爲

١,

· 豈俗·

人傳寫之誤耶

案此 蓂 有 露》云 注 云: 谷谷 云 音視。 風 即《 薺,毛、 賦 薺 「薺味 詩證之,東萊 》,指 爾雅》之「蒫,才何 大 以 薺子味甘。」 鄭 薺。」又云: 甘,人取其葉作 草二種 冬美」,晉夏 此草也。 沿皆 無 上,皆薺 訓 之 釋。 邢 ^ 解 侯 阚 疏 切。 吕《記》引《本草 草,音典。 湛 雅 菹 mi (詩 亦 薺 味 及羹, 引《本草 义云: **>** 齊卞伯 本 實 不 及。 此 葶 亦佳。」 也 藶 玉 ^ × 菥 葼 0 郭 皆

入菜部 案薺草、陶 葉作 陶 菹 云 貞白《 羹 亦 薺 佳。 名 類 醫 甚 ^ 別 詩 多, 録 》『誰 此是今人所 》列 調茶 於上品 即《

月令》靡

類

薺也。 梗,俗 小萍, 苗,一 大小 亂人 氏 殊 蛾 先 其 薺,誤矣。 苨」,注云「 子名差, 毛者名析賞。 生」指 《别 也。 甘 謂 數 如 一三月起 之護 呼爲 録 而 \sim 種 薺 大薺科 此 神農本經》合桔梗、薺 有 四 即 始 薺 生草。 月 \equiv 小 薺 甜 是 分之。 此 莖,五 (范), 收 薺 釋家取 角。 桔 苨 也 大薺 葉皆大,而 莖 之。 _ 梗。 根 扁 炭 ^ \sim 何氏《古 似 六十 味 陶 爾 本 其 味 師 内 人 不 又云「魏文帝言 雅 草 莖 美 草原 曠 細 蓡,俗 佳 义 ,其 綱 作 開 味 子 云 「義》以 挑 目 細 不及,其 有「苨、莀 並 最 借 歲 如 白 苨 燈 \forall 類, 以 細 云 參。 爲 葶 欲 杖 華 釋 冬至 小 甘,甘 藶子 而 葉 莖葉 物, 此 結 者 미 世、 似 薺 詩 炭 後 名 辟 薺 音 厎 苨 陶 苦 桔 之 蚊 草 其 如 生 有 沙 有

謂 絶 去 詩 所 紀 經 土 見 風 蓋 而 秦人女嫁 邶 谷 風 爲 》言 邶 人 涇 婦 渭 也 鄭

禮 甚明,或謂 贈送之文,則士、庶人得外娶矣。 ,惟大夫不越境逆女,而《士昏 涇 濁渭清,世 共聞知,不 一禮》有 疏 必 申 異 咏 箋 邦 其 意

育訓 既 業,育爲長老,古注本分二義、集傳 訓育爲生,則「既 古世字少,一字而 義反,又共在一章,後儒所以易其説也。 |遂其生,則經文「既育」不已贅乎? 幼稚, 谷風》弟五章三言育,鄭 育鞫」、「既育」 生 兩用,容有之耳。 既 育 義複矣。 訓長老,字同 作兩 《集傳 生 解 ř 謂 然 昔 云 m 財

爲菹。 成就。 藏。」師古注 醃 藏 以 李 急就 蘘 子時珍日 又收蘘荷, 荷, 冬 篇》云: 也。」宗 <u>二</u> 以 有二 備冬儲, 一種,白 一名蓴苴 懔《 秋 「老菁蘘汝羊切。 者人藥。 種蔓菁,至冬則 又以 荆 ,莖葉似 楚 赤者堪陷。 治 歲 蠱。」案詩言 時 薑,根香 記》 荷 並 云 冬日 老 脆 藏 面 可

作蕕、菑、稸、《廣韻》云:「冬菜也。」「旨蓄」,殆斯類矣。蓄,丑六、許六二反,亦

式微 旄邱

所見,義亦通,然不如箋、疏之允當。

其君 也 之詩,所以望衞之深,而責之至也。 齊桓之於邢、衞,方可 賢方伯,資以 雖去,而國已破, 可 則遺民猶有 破黎之後,必是棄 夫子録其 旄邱》責衞伯之不 復興,此《式微》勸歸之意也。 ,繼則 厥後百餘年,晉人數赤狄潞氏 詩皆黎臣作 詩,示後世 望 存也。 車甲 其 鄰,然終莫之從,亦 且日懼狄之再至也,必 ,送之返國,爲之戍守,如 丽 救 歸 也,然《式微》勸 以自 不守,黎侯 ?,旨各不同 而 ·轉危爲安,此《旄邱 生聚之,教誨之,尚 彊之道 若能自 一、恤 者,意狄人 然此時 罪,言其 可愍矣。 其 始則勉 鄰之誼 君 振 狄

奪

也

與 黎 ? 氏 黎 地 則《 君 流 式 遂 寓 滅 微》一詩有 日 狄 而 雖 立 無 黎 以 衞 侯 激之矣。 援 是 而 黎 仍 未 自

嘗

1

歸

其

旄 邱

或

瑣 惡 之。 心 好 余 褎 愉 毛 (尾)爲 趨 漫 然尊盛之服 迎 因 鄰 以 夫子 於 也 思 復 ,苟安旦夕 鶹離之鳥 見已 旄 亂 衞 黎 黎 邱 録 Ļ 衞 不 侯 私 人羈旅之狀 $\stackrel{\cdot}{\leadsto}$ 官 救 其 末 不 既 時 黎 少少 詩 黎 飾 章, つ,始雖 君荒 而 如 臣 好 而 而 示 惟 背 毛 見 狄 德 長 戒 毛 之, 臣 愉樂,終必 微 也 **尤**, 尤 ,醜,喻 患 不 深 傳 惰 知 終 能 似 矣。 無義 之 著 至 百 及 稱 鰮 解 衞 王 度 衞 故 離 鄭 趣。 臣 衰微 氏 萬 廢 非 其 之 謂 以 不 (説 解 弛 不 況 始 鶹 衞 獨 知 其 徒 如 可 美 鶹 臣 離 救 天 此 紁 勢 道 有 離 初 喻 患

> 之,可 之 爲 鳥 平 名 ? 經 傳 歷 有 明 箭 安 石 以 臆 見

義者。 爲 充 嫌 於冕服,故爲 其 服 賢良云「子大夫褎 也。 IE 耳 忽 盛 (淇澳)、《著》、《都 虔注 耳 刺 無 有 同 云多笑者,康成之妄説 而 飾 o 聞 詞 無 耳 今案, 衰字從 盛 言 褎 聾 駆 云 奇 知 淇 如 飾 大 ^ 盛 多笑之説 君 澳 鄭 充 均 夫 飾 釋文》因 盛 耳, 説 子 也 服 以 篇 褎然,盛 飾。 纖 偕老》篇「 飾 見其不稱 而 以 衣 毛 巧 然 人士》皆 雖 稱 充 訓 傳 又詩言 而 爲 訓 言 盛 與 耳 服 訓 舉首 可 諸 褎 而 爲 爲 不 喜 耳。 貌。 褎 玉之瑱 爲 臣 不 盛 與此 有 稱 美 充 爲 笑 顔 能 宜宋 服 分 之, 耳 充 正 盛 此 見 貌 色 稱 詩 焉 不 耳 祖 服 也 詩 並 褎 董 漢 儒 世 義 即 此 二,即 仲 美 無 然 武 毛 以 之 充 亦 而 詩 瑱 舒 惡 充 取 從 説 帝 鄭 耳 如 同 傳 義 此 壟 施 不 耳 策 鄭 平 寒 簺 爲

易

字本 雖假借,實 文》,采即 褏、袖,而褎之爲袂,反屬創聞 飾、《生民》「實種 長,皆余救切。 褎」,從衣 羔裘豹 從爪禾, 裦, 訓,故音亦異焉。 褎」是 似 穗之或體,云「禾成秀也,人之所 取 有因也。 救切,從衣采聲,袂也、《唐 義、《生民》之「褎」、從采取義、 徐醉 也。 《旄邱》「褎如充耳」,毛云 實衰」,毛云長也,均非 借 切。 爲盛飾 今衣袂之褎,俗作 然則《旄邱》之 貌,又借爲 矣。 又案《説 風》 褎 盛 枝

衆工,充萬舞之數,語本明順。若云「不恭恐未當也。「簡兮簡兮,方將萬舞」,言簡擇較優。朱《傳》「簡易不恭」之説,本於横渠,「簡兮」,簡字毛訓大,鄭訓擇,而擇義

矣。 《大全》録 爲四列,此人居前列上頭者,所以教國子弟 孔疏云: 顯之處公然爲此,不以爲辱,亦不恭之意。」 中」句同 也。」語 衆目所覩,安得擇 舞人皆國子也,舞何足爲辱,而畏人見耶? 十三舞《勺》,成童舞《象》,入學必習舞,凡 此尤屬兒童之見。 恭而二之,破壞其師説矣。 自以爲碩人,便見其不恭。」是又分簡易、不 又誇之以爲美,此乃庸妄人耳,何得爲賢? 猶可,若自言其然,則是明知之而故 詩爲碩人自言也,不恭之態出 不恭,方將萬舞」,成何語乎? 輔從而發明其旨,尤令人齒冷也 甚 訓 明當。 輔 之日 諸侯四佾,此《公羊傳》之説。 廣 語云: 「當明 《集 一暗室中而 舞必在賓、祭時,自當爲 傳》 顯 「既自以爲簡易,又 之處」,已屬 易 其説,而 又云: 舞耶? 於 況朱子以 他 人評論 與 「當 爲之, 含糊 舞者 日日 明 此

舞也。 方, 專指爲干舞,東萊駮之允當 舞本兼干羽,傳 「方且」,缺四方一舞,説 四方,山 簡 公庭,宗廟之舞 兮》首 川之舞 不可 章 如 也 易。 毛 也。 小異 日 説 鄭襲《公羊》之誤 中, 鄭 而 則 以「方將」爲 教 俱 爲 通。 或 舞 子弟之 者三。 惟萬

泉水

善曰: 駛,疾 E 涌 引《詩》作泌,得之。《文選· 云 說文》俠訓傳,傳訓使,俱不切水流義。 |本於《説文》之引《詩》。 而自浪」注,吕延 也。 毖彼泉水」,毖乃泌之借也。 俠流也。」李注引之云: 「毖與泌同。」二臣 疏 吏 切。 流 也。」與今本不 ~濟曰: 但《説文》泌字注 通毖、泌爲一字, 魏都賦》「泉毖 毖,泌也。」李 「水駛字亦作 同。 《説文》 俠

> 典》,●此釋經者采用《説文》語 豈若 未見李注。 灰, 解也。 Ē 字當是駛字之譌。 書又易溷人,因 、駛疾之明 近世趙凡夫以爲俠當作灰,或作陝,殆 當 加 乎? 致 吏、 誤耳,李注 夾字形相 解,反也。 又「駛 耳。 流」亦見《内 所引當 近 陝,隘 馬 得 旁 也。 其 草

即姪、姊即娣乎?何前之自相戾也。章「諸姑」、「伯姊」,又云「即諸姬」,然則姑育章「諸姬」,《集傳》既以爲姪娣矣,次

之地、「出宿」、「飲餞」,同是懸擬之詞。 干、言爲所適國 鄭之解,本平正 游、禰、干、言,皆指自**所** 地,特見下文「女子有行」言 也 , 里氏 以 沸、 嫁國 禰 至衞 爲 衞 所 毛、 地 經

- ■「亦」,原作「夾」,嘉慶本同,據康熙抄本、大全本、《四
- 「正」,原作「王」,據康熙抄本、大全本、《四庫全書》本

遠,非 寧,下 淇 臨 水 以 理記 接 相 出 舍於郊,是謂出 來,「遠父母兄弟」日久,故思歸 网 邑沸 耳。 縣 里。 經 證 見,文義未嘗 釋 嫁 事 流 王氏之説,華谷甚信之,此亦非 》「東郡 出 漢 四 不 ,「還車言邁」言歸 宣公時尚 廟方得 豫 但「出宿」、「 宿之地 臨 語 己 、兖二州之境, 邑 又言 鑿 臨 縣, 乎? 名沸哉? 邑 宿。 示 順 歸 今屬 有沸 都 寧之意,正 飲餞」語 朝 也。 況 大國之郊,去 歌 Ш 廟 次 爲 東 所 況禮既 又曹氏 章 寧事,欲令 濟 歷 謂 首 本 今河 南 或 東 因 府 多 郡 引《 衞 例, 飲 「有行 語 南 國 矣, 是衞 餞 衞 都 漢 與 先 彊 相 也。 語 何 姑 言 去 輝 不 即 分 意 地 甚 過 沸 姊 以 爲 府 必 地 歸 相 行

此 應 字 讀 例 還 同音, 旋 歸于衞」、《 釋 更 文》不 不 重 釋 出 文 及
立 盡 一蓋《詩 加音反 学 還 「還」字, 故 音 獨 旋 著

> 之於 還」字亦 此。 無音反, ^ 集 傳 疏矣。 此 詩 並 俗 無 人不 分説, 知 遂 而 以 槩 讀 後

如字。

槩訓 鄭 詞矣。 訓 遠 何 苴,於注《 同 所本,蓋因《表記》引《隰桑》詩「遐 有 (集傳) 故。 注 是 過,言非有 害則遠過,二義 而 康 以 爲何,以爲古音相 有害也。 訓訓 不 何 成 又《詩》中「瑕」字及「遐」字、《集傳 - 瑕有 爲何, 釋 記 之 遐 説 **>** 害」 渦 則 E ,故襲用 也 則當云不何 差 肅 遵 瑕字 於箋《 也 述之,以爲不遠 俱 奉 之如 可 毛訓 近, 張氏 之,併及 通 詩 可 玉 》則 而 釋 遠 有害,經文爲不 以 律 文義 之,以 禮 瑕 厭 言 通 義 誠 棄 字 不 用。 至 亦 稍 不 之 耳。 謂 爲不 衞 迁。 明 矣」, 知 如 考其 亦 順 其 土 大 鄭 非

郭 注 引《 爾 雅 泉 水 釋 × 毛 水 * 傳 釋 之。 歸 異 ^ 出 詩 同 **>** 流 我 思 肥 肥

五六

泉」, 是, 曰: 歸 熙《釋名》推 各枝 毛云 散散 二所 而 水異出 其故,以爲 名 出 了,似 同 所 一,流 肥 者 行合同 歸 同 也 異 出 八,爲 時 惟 E ?肥」是 所浸潤 犍 肥 爲 。」《列子》 舍 也 少 反 所 图

意。 釋文亦云: 如 此 則《 「水所出 爾 雅 . 》「歸」 異 八爲 字 肥 成 0 虚 與 設 劉 二、郭 殆 異 不

뻾

酈

道元《水

經

注

一以

衞之肥泉

實

異

出

出 可 歸 朝 疑 歌 城北。 舍人之言爲是,云「泉水有二源 右水南 流 東 詘, 左水 東 流 皆 南

注 詘 於淇 一,合爲 水爲肥泉, 馬溝。 水 又 ,是異 東 與 出 美 口 溝 歸 水合, 也。」其 又 援 東 據 南

乎? 似 司 不謬矣。 河 酈 濟 經 所據者 流 然 源 尚 一元魏 謂 非 11 惠 時 谷 績 之肥泉耳 之故 流變,古今多 道,況其 -,未必《邶 有 小 者 不

周

南

婦人能閔

君子以

相比

況,

則

此

詩室人,

爲 風》之舊 非。 M 且 也 鄭 天下之水 諸 舍人之説 家之 解 異 當 源者甚多, 既 有 師 不合《爾雅 授 不 濟水、 미 盡 学文 漢 以

> 異。 名也? 水 皆 肥 泉 至自 源 岩 沁 異 分 水、 出 而 潁 同 合, 水 歸 則 皆 亦 凡 適 水 源 得 皆 何 然 水之常 不 不 盡 足 得 爲 肥

北 闁

爾

雅》何

獨

别

而

識之乎

安,亦未偏 母兄弟皆是 人 更迭來責我。」 室人交徧 有所指。 也。 讁我」, 是室 朱《 《大全》録 傳 人者,泛指 鄭 》以 (箋云: 爲 范氏之言 室 家中人,父 人 一在 無 以 · 室 引 自

爲 人 人,古已有之。 專目其 勝。 蕉 鹿 婦 事 矣。 以 室 案,《 但《詩》言「交 人 與 列 夫 子 對 稱 周 穆 (編), 則 王 謂 則 婦 篇 鄭 爲 記 解 室 鄭

「王事敦我」, 毛云「敦, 厚 也, 則 應 如

《釋文》甚明。朱《傳》從鄭解矣,復云「協都字。鄭云「猶投擲本作摘。也」,則應都回反,

北風

口

反」,豈欲正讀如字乎?

當矣。 傳》又以烏狐爲不祥之物,則《通義》駮之, 《北風》雨雪害將及身,當此而去,亦不得爲 也。 之,言衞以 見幾矣。 避 虐 程子謂《北風》詩乃君子見幾而 與避貪,人情皆然,不待賢 邶》有《北風》,猶《魏》之有《碩鼠》也 又敘 淫 亂亡 以 此 國,不聞 詩 爲 刺虐,而《辯 威 虐之事。 者 圃 説 作,夫 後 《集 ジ非 能

静女

之詩。 説、《集傳》獨祖歐陽《本義》,指爲淫奔 極 荑」,有始有終之義也,是謂貞静 詩之意,非詩之詞也。 新臺,終貽羞於中冓,是無始無終矣。故詩 壽,與盗同謀,是陷君於不法矣。 隅」,高峻之節也,「彤管」,法度之器也, 宣姜以伋妻而受公,要是無節矣。 稱女德,而敘反言夫人無德,敘所言者作 詩 夫淫女而以静名之,可乎哉? 人說静女之德,皆與 横渠、東 宣姜相 萊皆 始播醜於 而有 譖殺 反。 從敘 期 德。 仮 「歸 「城

語》亦謂:「筆始於秦,古以刀爲筆,不用器亦有管,古未有筆,不稱管也。」《解頤新所執,而宋儒疑之。李氏謂:「鍼有管,樂所執,而宋儒疑之。李氏謂:「鍼有管,樂

之。」其 以 毫毛 注》皆載 管,用赤心記事 毫 舒 不 著有筆名, 銘》云: 圖,衆史舐筆 굸: 具、《尚 古矣,《 謂 甪 [名也、《論衡》云「二尺 枯木爲管,鹿毛 荅 之尺籍 毫 4 兔毫竹管 安得有管?」 史載 來 書中候》云: - 亨問 毛 爾雅》云: 其 彤者,赤漆 乎? 「毫毛茂茂。」此皆三代文典 尚 短 可謂古 語。 矣。 書。 筆。』《莊子》云 日 和墨。」《太公陰謀 也。」夫有筆 : 也。 筆 張 仲 案, [無筆 不 J爲柱,羊毛爲被,所謂 華《 舒 此 「不律 蒙恬 |又問: 耳。 始 董 四寸」,聖 皆謬 去 博 乎? 心於秦, 仲 龜 古未遠,所 物 史官 舒 負 所 謂之筆。」《曲 . 説 記 一之理 一人文語,漢事 荅 圖 造, 明 可謂古筆 「宋元 × 牛亨 一,周 載 彤 矣。 》載 夫筆 崔豹《 即 丁與書 事 管 公援 秦筆 問 ,,故 武 何 聞 一之由 又董 君 也 王《筆 也 未見於 古 必 筆 俱 以 用 將 漢 ? 耳。 己 有 仲 寫 牛 彤 蒼 刀 書 來 短

> 不足置 生,且 管非 謂 據。 物」,殆惑 **當**俗借篤。 六 管,與《詁 「國,滅前代之美,故蒙恬得 恬造秦筆非今筆 秦筆 又武 封 辯 爲 也。 · 前 帝 訓 於後儒之説。 論 管 傳》相 時《毛 也。 韓 城 子。 愈《毛穎 《集 〕 詩》未 合,不足 ,而《古今注》又言「秦 文 傳》云「彤 人謾 傳》,託 行, 又案,董謂 八爲確 戲 而 稱 仲 言 於時」,此 管,未 非經考 證 舒之 其 乎? 兔 先 毫 詳 論 吐 據 吞 竹 皆 何 彤 mi

毛傳《詩》時,

字亦作直

乎?

不 然,

,則師

授

相當值

也」。

見《釋文》。

兩家字異

而

毛 詩稽古編卷四

吴江陳處士啟源著

那變風

柏

舟

義反矣。案,「我特」,《韓詩》作「我直」,云 新特爲外婚,鄭申之爲特來無媵之女,與匹 實維我特」,毛以特爲匹,朱子謂特爲 然毛傳以 義同、 ,故《小 意 《詩》作「牆有薺」、《玉 《詩》及《爾雅》皆作茂,借也。 者, 地 白蒺藜也,出 字古今通用。」案蒺 薺」,得字形之正。 人者,杜蒺藜也,子大如脂 楚楚者 贅」,亦借也。《漢書》師古注謂: 采薺,薺字《禮經》或作薋,又作茨,則此 》指 蔓 蒺藜也。 生,或 茨者,以茅蓋屋 此 生牆 同 牆茨、楚茨,皆應 州 上 《離騷》王逸注引《詩》作 沙苑牧 藜 也。 有小黄華、《 有二種,子 一藻》注 薋者,草多貌。 馬 麻、狀如羊腎者 處 引《 惟《説文》引 詩 有三 作薺。 杜 詩》作「楚 • 蒺 (藜布 牆有 角刺 \equiv 薺

雅》「新特」,亦用此詩毛義釋之。

孤特之義,而得爲匹者,古人多反

語

牆 有 薺

如

此

也,不得爲《小雅》「新

一例矣。

君 子 偕 老

>

云

案,《 方副 疈 作 俗 七遇 副 則 無 阊 音 》釋文: 之言 、赴讀。 誤 義當以 副 兀 也。 説文》 福 反。」二字皆 ^ 副 本 生 務 一育、匹 矣。 笲 覆 À 民 切 玉篇》 六 》釋 黄公紹《 「鬒」爲正。 聲、《生民》「坼 [≈]正 所 「副,芳富 珈 今徐 前韻》亦 以 文 副, 入宥 引《周禮 覆首。」 八引《字 一切。」《 孔 氏《韻 仍 韻 判 氏 其誤。 韻。 反。」《説文》: 會》 也, 引《 林 《廣韻 蓋 少作量 譜》並 一副 今人 收 芳 学云 黄 副 追 副 迫 **%** 又 元 乃 讀 師 覆 三, 云 謂《説 敷救 切。 不 富二字於 本訓 音 加 亦 注 赴,乃 同 反」。 切」, 籀 「富 文》 也。 也 作 或 又

笄爲 其笄 《記》、朱《傳》皆仍其誤 也 引 曰: 之, 本《周 日 孔疏引之,乃云「惟祭 兩 然 縣 瑱 。 頭 非合衡、笄爲一 上。 衡 [旁]云云,於「衡」下增 惟祭服有衡 鄭 笄 卷髮」之文,是以 謂之衡笄。」是 禮 「 皆 笄 物。 毛以 笄者,婦人之首 彼注云: 注 所 • 笄,卷髮者。」是 天官 追 以 疏 傳 見 師 溷 物 垂 · 追 云 笄 毛 **>** 王 也 於副之兩旁當 既 之爲 鄭 一物,鄭 竟 師》文,傳 以 后之衡、笄,皆 爲 服 衡垂 笄, 飾 釋 以 衡 玉 有 圃 衡 衡 衡 笄 衡 説 嚴《 衡 一於當 注《 與 惟 非 者 爲 笄」字, 爲 笄 笄,垂 笄 引其 合 追 笄名 后 釋 緝》尤失之, 不 也 耳,其 夫人之 本二物也 耳 笄矣。 知 師 物, 成 物 》以 也。 於副 笄横 毛 以 而 衡 語 爲 而 公連 不 下 玉 衡 副 耳 銮 又 引 之 以 爲 於

耳。 也。 於孔矣。又案,《大雅》「追 《詩》副 追師》注,衡下無笄字,安知此 嚴誤認毛意,而 疏之誤,在 笄仍不易傳, 引 謂 釋 亦知毛意 與鄭 衡 文 異説,其 琢 而 其章」 不 疏 與己不 引 非 釋 傳 誤 疏 笄 寫 更 甚 合 者 文 引

之誤乎?

之飾, 有據 鄭謂象服即翟衣,象鳥羽而畫之也。 文,又衣裳隨身卷舒,非可 於卷舒也。 度不見於經傳者多矣,安知象飾之服毛非 王秦復陶、翠被」,杜注謂「秦所 以翠羽飾 而 乎? 飾 象服、翟衣、毛傳謂以象骨及羽 禕 而孔 衣 變翟 袂」,見《左傳》昭十三年。 至以羽飾衣,春 疏 陸農 又案、《説文》釋禕 不从,以 師 謂 衣。」當是緯衣畫雉 爲 象 羽 秋時尚 然古籍散亡,制 骨 飾 禮 爲 飾 蓋 遺羽衣」及 畫 不聞 服 有之,「 衣, 右 經 爲衣服 鄭 傳 其 日 褕 也。 爲 楚 褕 礙 無

良是。翟、闕翟皆用羽飾。」以證《説文》,其語

傳》注訓美髮,《説文》訓稠髮,《玉篇》訓同傳》注訓美髮,《説文》訓稠髮,《玉篇》訓同思,此詩與髮連文,不可重言髮耳。然物之因此詩與髮連文,不可重言髮耳。然物之因此詩與髮連文,不可重言髮耳。然物之

从 子皙,各與名反,是也,俱取白 對,聖門曾點、楚公子黑肱、鄭公孫黑皆字 皙」,毛訓白皙。《左傳》「澤門之皙」 析木旁。聲,音析,人色白 日折手旁。聲,音折,又音制 皙、哲二字,音形及義訓 也。 俱 詩》 皙之義。 明 别 也。 皙 與 揚 从白 字又 且之 黔 晢

■「合」,嘉慶本同、康熙抄本、大全本、《四庫全書》本作

字,而 補》。 實始 此 吾 矣。 遂音 證 色白 音 作 云 大有》之哲,截 明 明 明 之, **| 友楊令若知** 猶 亦 晣 訓 作 辨哲」,孔 作悊」,云: 不然。 I皙,與 於《集傳》。 皙 此 煌 照 哲 溷 並 吴音哲爲 因《 詩 爲 煌,《 7 與 用 不 稱 制,又引《易》「明 引 鄘 征 明 哲 是 《史記 明智之稱 官 庭 風》 此 智 例 疏釋 此 也 姜美色,故言其 燎 悊 征 然 詩 反 ^ 義 失,直 》作 **>** 诵 例反 集 哲」字與 俱 兩 也 爲 何 爲 晣 用 傳 字 取 智,《 晳 涉 明明 知 晣 可 欲 朱子 》協 明 音 哉 焉 丽 也。」近 詩 施 改 作 智 ? が辨哲」 (「 揥」、 書》「明 引《易》「明辨 韻 口 毛 陳 不 於 皙 智 之 《鄘 明 同 遂 性 率 云 爲 辨 眉 二,《漢 義 星 也。 世 襲 皙、晢 一爲 「帝」 明 哲 祖 行 上 作哲 風》之 晰 一陳第《古 不不 以 其 揚 旁 旲 也 故 然 断 書》 誤 / 棫《 就 廣 證 協 1是兩 二,孔 可 其 面 韻 耳 哲 晳 誤 句 韻 施 誤 作 手

> 於 反,與揥、帝自協 有 四 顔 聲 面 之 也 别 源 若 謂 轉 古 何必改字乎 晳 無 作 人 聲 去 聲 今 北 則 + 猶 當 讀 息 亦 例 未

「暑服 勞協 皆借 過 反, 又作 袢字 之借 袢 又 羈 氏 不知《説 信信 案, 紲 延 申 哉 安石 半, 其 褻, 之以 袢 用 蒸熱之氣 博幔反,與 絆 是 而 紲 博 文》 當 亦 字 乃 加 故音 爲 以意推 是 ٠, 非 袢 紲 絆 幔 浴 展 叔 一祥,所 反 羈 煩之借 也」,毛云「當暑袢延 也。 衣 訓 重 絆 紲 絆 之, 必 乃 無 讀 而 而 義 紲袢 以 司 是 色, 徐 協 若 以 紲當 耳。 自 音 纏 鉉音,非 煩 普, 絺 安得 並 音 斂 絡 爲 遂妄 是 不 王 飭 於 裏者 1薛煩 夫 渫 詩 彊 安 與 也。」 暑 煩是本 除 爲 石 古 爲 絆 釋 服 去 之説 見《説 也 傅 同 彼 然 所 之 也 文 之外 一、私 以 服 會 義 則 以 附 朱 平 紲 日 紲 列 文》 子 切 字 何 袁 74 夫 ? 絒 孔

六

朱子 其説 竟可 記 此 並 詩之一篇,言鄭、 上 閒 止, 争 ൬ 》以 一,明 係 言之邪? ,殊不知《樂記》既言鄭、衞,又言桑閒、 論 二音之時 塗哉? 因 矣。 之桑閒、濮 不啻 朱子 而 語 爲證 係 此語遂全引《樂記》文,證 偶 係之鄭、 兩 至 千餘 以 與《樂記 事。 《桑 世,迥 一小敘 而全不 案 《樂記》又言「亂世之音怨 言, 若桑濮 中 衞,言「亡國之音哀以 上,則此二音之倫節,與 衞 樂 所云「 識 · 》 詩 不 前 辨其文義 而桑濮 記 者多是吕 相 》注謂 爲 即 非 同 桑中 政 淫 謂 也。 散 者 在 桑 其 自 ,則桑中 中 民 **豈後儒** 朱子引《 中矣,何 作 通 即 流 此 桑閒 義 桑 詩 丽 與 影 閒 思」, 即 不 即 乃 耳 東 也 作 以 樂 口 濮 目 煩 衞 濮 桑 載 萊

> 歷 聲若鄭、 上。」疏亦 禁其 有 地 明 名,其 淫 證矣。 衞 解桑 音 過 区 濮 乃 聲、 聲, 爲 紂 /紂樂, 凶 所 亡國之聲,若桑閒 聲、 作。」《 慢聲」注云: 則桑濮之非 周 禮 大 衞 司 濮 淫

然 縣 歌,亦不苟也。 與 未嘗 子,不及嬀姓女。 不 見《鄘風》。 滕皆古姓,而春秋時荀、曹、滕國則皆姬 據 即 鄘 西南三十二里 及姬姓 ,古未有以 孟庸之所 衞州, 或 以 通典》謂 名 姓 同 爲 女。 今衛輝 《衞 耳。 自 國 姓名其國 鄘國古 ^ 名 出 風》言庶姜、《鄭風》言孟 陳 有 通典》又云: 況 也。 府 古人男女辨姓,雖託 風》言淑 孟 以 鄘 縣 庸若 或作庸,本 當時 城, 鄘 在 者, 或 即 府 恐非 果 必 姓 姬,言齊姜、宋 西 鄘 鄘 自 庸 南 國。 也。 不 國 有 庸姓之國 五 衞 女,不 庸 + 斯言 州 荀、 知 姓 里。 之詩 新 何 偶 姓 或 雁 所 鄉

毛

詩稽古編卷四

鶉 之 奔 奔

敘矣。 詞。 云 刺宣姜之詞。」此解最優。 爲兄」,兄,女兄 刺 頑。 「我以爲君」,君,女君 埤雅》釋《鶉之奔奔》詩云: 毛以兄 也。 爲君之兄,不 曰 兄 敘云 者娣, 也。 刺宣姜,不 如如 日 刺 君者妾。 陸之合 「我 宣姜之 以

鶴屬 正》及 蛙 是 牟母」者是。 **鷭亦名鷃,亦** 《本艸 田田 化 》引《交州記 《月令》。 鼠所化,春化駕,秋復化爲田鼠,見《夏小 生,見《列子》及《本艸》。 非即鶴也。 爾雅》「鷯,鶉」,郭璞以 故夏有冬無。 此二鳥雖相 名鶴,即駕 故四時常有之。 又晉僮謡「鶉之賁賁」,與 也, 或 似, 鶉 從海 而 自 爾 爲 非 雅 鍋 卵 魚化 郭 生, 屬。 $\stackrel{\sim}{\overline{\Delta}}$ 以 類。 生,見 鶉 或 鴽 案, 爲 從 鴽

> 之形 詩 ,與《鄘》詩之鶉 語 雖 同 然 彼 鶉 異 乃 南 方 七 宿 合 成 朱

定之方中

色無 也。 爲楸。 之有無爲楸、梓之别 以白色有 椅、梓其又楸 雅》「椅、梓」,郭璞 子者爲梓, 之别也。 木, 楸,小葉曰 蓋大類 子 故毛傳以椅爲梓屬,實二木矣。 椅、梓、 小而散榎。」小 者爲 角者 陸璣《疏》: 梓實 榎,大 柳楸,又 而 楸、榎,亦 屬 爲梓、名 小别 乎 桐 加 以 ? 皮 而皮粗皵者爲榎。 名荆 皵 爲 也。 作 ^ E 角 「楸之疏理白色而 音 齊 .檟。 即楸,合之陸 椅。」此 鵲。 楸, 黄 民 今 楸。 案, 楸、老 要術》賈 又名子 説 椅、 文》 ^ 是又以 爾 而皮粗散者 此 梓之 楸。 解 思 然《爾 雅 語 楸 爲 勰 則 * 子 别 黄 榎 生

六四

鳥

者。 苦楸,枝葉木 理 隱 而黑。」與毛同 楰,楸屬。」《玉篇》云: 居 外又有鼠 謂 者 梓 一云鼠 梓 似 爲 :有三 桐 楸 而 梓 理 梓 文 種 [葉小,華紫,百木之王也 是 皆如 美者爲 蓋 ,亦名虎梓、《艸木 也 指 楸,《 郭 椅及楸 椅, 璞《 楰,鼠 小雅》「北 而 爾 併梓 檟 战梓,似 雅 即 疏》名爲 而三 楸 注 之小 山 山 云 焉。 有 楸 陶

通矣。

水者 ,乃漆沮之漆,水名也 漆 元 作 象形 如 水 今通 滴 而 用漆 下。 其 从

宫室 本欲遷 測景以 景,與望字相對,恐未然。 其邱山。」皆以景爲大義。 Ш 一、大山 也 望楚 之初 正其 。」鄭云: 測 景 與堂,景山 方位 升 何 爲 高 ,揆之以 望 ? 望 遠,觀 況 楚 與京」,毛云: 此 邱, 朱《傳》訓 日是也。 句 其 上章作宫室,故 而觀 言 形 勢 Ш 其旁邑及 一與京, 未 景 此 及 章 爲 作 景 追 測

> 上 尺之臬,須即 正 測之於山乎? 前 與上 遥 一升字 測 楚 ,應,則 其 邱 地 抑 之山 而 測之於京乎? 此 樹 兩 之,不 與 句皆 京 應 升 也 虚 身 文 下 在 事 義 漕 句降 也 尤 虚 之 難 字

馬耳。 之美,止以「匪直」二字帶言之,而 淵深也,其畜馬已至三千之衆。」 直 馬,恐失輕重之權 庸庸之人也。 匪直也 朱《傳》曰 人」,言文公愛民 : 故下文又美其德 「非獨人之操心 務 農 則 專侈言多 如 是 誠 而 此 君 實 因 德 及 而 非

傳 四 馬 田 《楚語 干。 賦 》関 **%** 千二百九十六。 所 古者國馬足以 年。 出,散在民閒。 或 衞 馬, 》詩「騋牝 文公「元年,革車三十 君家之馬,牧之閑 行 三千」,此 公馬,大 軍 國馬 一、公馬 邦國 國 足 或 乘,季 以 千 廄 馬 六 稱 也 乘 閑, 賦 公 年乃 爲 0 馬 爲 左 見

六六

此異。 衆。」 之數 成 耳 馬 則 尚 也 得 亦 止 集 白 言 有 馬 在 三十乘,在位 未 傳》 或反過 每 + 豈 故故 古者兵 千二 其 故 半 ,比於天子之十 也,特借以 又案,文公國馬已過侯國之常,而 乘 辯 成 -,
大 誤 中。 見 矣。 Ĕ 四 毛 出 以 此 魯 萬 百 國 之。 傳釋《 車 頌 户 ^ 若 車 騋 公 左傳 乏 仍 「馬 牝 專 馬 出 箋、疏 識 賦 二十五 田 乘 衞 不合三千之數,胡 詩 爲 七 指 於 忧 \mathbf{H} 二千 》言 之 》分 多 尺 牝 公 田 疇 有二 殷 申 白 丽 馬 賦 寡 馬 威 「革 之墾 、騋、牝 七百 年 富 傳 ? 牝 馬 乘 相 平 閑 車 則 意 可 ? 者, 遂 則 司 縣 闢、户口之殷 萬 Ė 馬 牡 信 知 千 + 若 爲 馬 三千 畝 然 已 馬 百 法》百 倍於其 此 萬 而 有 「乘」, \equiv 又 已 文公元 包氏 四 之甚 井 有徵矣。 三千之 弗 百 在 明 百 踰 之説 五 公馬 之 乘 牡 井 非 六 當 者 十六 初 爲 思 僅 千 閑 蕃 馬 年 得 爲 龃

用之? 然。 津 言 八年。 不用 乘 宜 勤 散 游 足 遂 遂 馬、公馬 云 女言 計 躬 克 放 |風 乎 辟 牝 徵 ^ 桀。 約 牝馬,今併 難易 騰 其 書・ 風 馬 草 是 親 心此 城 駒 腎 謂 萊,行 若 軍 爲 勞 武 有 濮 之不 矣。 千二百, 費誓》云: 牝 中 輟 來, 法,可 又革 之 Ŧ 湯 也 牡 有 車)戦,晉 之當 伐 伐 且 況 謬 同 相 牝 牝 則 車 商 夏, 積 以 畜 誘 馬 也 馬 駕 駕牝之明 甚 正合六閑之數。」 有 有 數之, 矣。 也。 谏 牧 左 牛 中 左 矣。 次 「馬 歲 嚴《 致 之 矣。 軍 驂 驂 年 第 不 魯、 蕃 事 牝 風 牝 牛 故 嚴 緝 以 庶 又《 非 晉皆 於 豈 證 騏 驪 其 爲 又 責 **>** 駕 中 謂 易 人 風 謂 三千。」亦 列 在 右 右 至 革 澤。」 0 奏 君 當 女 校 於 驂 駿 車 是合 績 宵 戰 左 人 牝 傳 招 牝 僖 革 旰 時 平 將 傳 耳 **>** 流 趙 國 百 憂 焉 車 而

兒童婦女皆知之也。 雨 於西方,終其朝則雨,氣應自然。」 虹 至今幾二千年,天氣如故也。宋之末造於 雨之候,與今無異 也。 虹 見, 螮蝀 止, 莫虹截雨,朝 則 終朝 無東西之分,驗之久矣。」夫 在東」,暮 而 止。 矣。 虹 虹 鄭箋 也。 張敬夫亦 朱《傳》獨 行 雨,屢 云 朝隮于 驗皆然 蓋 日 日 朝 漢 有 西。 自 世 升 漢 方 晴 氣 雖 螮 朝

相鼠

五百年,乃獨相反,誠爲難信。

言鼠 則 鼠 乃 僅 貪惡之物,故詩 有 皮, 人而 無 儀 以 則 喻 亦 無 如 禮 鼠 儀 ",非以 之人。

> 傳云: 《緝》得之。 觀之,則所謂儀可知矣。 儀」,又云「其儀一兮」、「樂且 皮喻儀也。 威儀」、「敬慎威 宮文子語可見。《詩》亦屢言儀,云「人而 言儀,其義廣矣。 「無禮儀者,謂 今人多以儀爲儀容,不知古之 箋、疏甚明,後儒 儀」,皆非 觀《左傳》襄三十一年。 爲闇 僅 指 昧之行。」反 有儀」、「 多誤解, 儀容 也 惟 抑 衞 嚴 毛 抑 而 無 北

可刺也。豈僅在容止閒哉? 息自有定則,無止則淫僻之行無所不爲,故鄭云:「止,容止也。」毛訓優矣。人所止

竿 旄

旄 》敘言臣 九 旗 竿首皆注 子 好善,則 旄 卿 建 大夫 旌 前 所 建 鄘 也 **>** 之《竿),故毛

毛詩稽古編卷四

爲 司 旃 常 鄭 孤 以 卿 爲 建 旃 旃,大夫建 與 物 皆 物。」孔 目 卿 謂 大 平 大言 居 則 建 周 説

禮

以

所 卿大夫也。」此言 旃 建。 J 出 所 次章 軍 建 則 也。 竿 建 軍出口 旗 三章皆云 與 所 《大司 建。 首 章竿旄、 《司常》州里 馬》「百官載 在浚,是專 末章竿 旗 |建旟」,則 注 論 旌 百 平居 乃 X 官

之事。 以 竿 H 竿 都 旄 城城 旗 兼 爲 言 蓋 加即都 州 旃、 衞 臣 里所 物, 之城,一地 食邑於浚,當國之郊, 建,而云「州 旃 則 卿 而 物 異其 則 長 (文耳。 大 之屬」。 夫 也 而 鄭 下 侯 解 邑 又

與? 非 國之州長,士也,其屬,則士以 人。 然於「在浚」之文,則 豈以 敘言臣子多 有礙 好善 下 矣。 一,故 ·兼之,所 廣 夫 言 專 美 之 指

「良馬」則鄭義長。

人,亦可

毛説

爲

允。

惟

素

絲

此 善 喻 總 糾 力 於 此 但 ||(簡 成 一分》篇 文 於 彼 以 美 以 碩 況 人 御 之 馬 德 治 其 民

> 迂矣。鄭指竿旄,言較平正。 説猶長。《竿旄》篇以當賢者善道之言

名》云: 此 傳 改 》釋此 祝爲 素絲祝之」,鄭 字 屬, 「祝,屬 殆 非 祖 劉 以 也。」 屬 箋云 訓 則 祝 祝 也 亦 祝 可 然 當 訓 劉 作 屬 巸 屬 朱 釋

載馳

焉。 也。 衞 謂 無 之能言者 乃 以 昏 有 其自作, 許 救 體 慰 婣 衞》 曾 患 矣。 己之心,首尾 之 恤 詩 不 國 也。 今誦 災,亦 出 「,戴 蓋 + 父母 中三 其 公之 九 旅 鄰國之誼 詞 篇 章 以 殁 則 9 廬 清 助 不 專 及 惟 漕, 之, 得 責 婉 歸 許 歸 許 而 唁 也 而 宋 夫 寧,婦 深 之意 人 人之《 桓 徒 至,誠 不 宋與 責 公 能 · 文 夫 與 人之禮 載 許, 救 言 人 有 女子 衞 馳 以 カ 口

則

之,末章「控于大邦」是也。 章 楚楚,千載下如親見之矣。 章再言「視 故 婦 以 救 首 道 采 章言大夫告難,見欲歸之故 則 蝱 雖 衞 知 療 爾 必 其 疾 水救 不臧」,正責其 力 爲 喻 不 於他 ,言當救 及,然能 國 苦語真 故 之 不 無 欲 義 救 愴 也。 歸 衞 於 也 情,出之 唁 也 心乎 圃 許 間 不 ? 四

此 歸 之亡,傷許之小,力不能救,欲 追,如《泉水》詩之「飲 不我嘉 驅馬」,皆意 唁, 而言之也。 爲實 得。」詩意只如 非 載 亦夫人意中 真 馳》歸 事 曰「許人尤之」,又意中 有 ,謂歸 中 是 其實夫人未嘗出,大夫未 唁,夫人意 -欲其. 事 唁 也。 事 此,朱《傳》取 是已行 如此 也。 餞」、「出宿」,皆想 敘云: 而言之也。 中事 故曰 而 未至 歸唁其兄, 也。 馳 「夫人 詩 料 前 驅, 中所言 其 義 日 閔 涉 必 不 邱 又 衞 當 嘗 日 如 既 得

爲此 云: 色各 母也 在? 皇就 行 行至半途,始遣大夫往追之乎? 不知,則 之於未出 知之乎? 時告之於許君 説《詩》者,不以 野,則 有數種,今貝 道,舉 不同, 陸云: 娷 「白華,葉似 乃 陸氏《詩疏》、 坐 以小君之尊,適千里之遠焉,有 歸 之先,不應追之於既 抑不知之乎? 視夫人之出,默 途 朝莫覺之理。 雅 自 乎? 詞 述 韭 説文》皆作 母葉隨 其 害意。」觀此詩 郭氏 抑 情。 葉 蘇 不 如 頌 告乎? 苗 吾不 爾 無 且 如知之, 栝 出 圖 雅 莔 此 樓 似 知 經》 出之後 言, 》注 時 而益 而 今 孟子 許之 夫 蕎麥, 論之,以 許 細 藥 直 則 人 信 君 其 艸 待 應 臣 將 物 郭 安 貝 其 倉 如 阳 民 出

月開 注 今罕見之。 似 非 華,碧緑色, 同 則此種 案唐本注言葉 與陸《疏 唐 世 一猶有之矣。 相 似 類 大蒜,正 郭 注 云云,

衝變風

淇澳

孔 也 名 指泉水入淇之處 相 源 之,且辯此 記 並 水名」,而以毛公「隈,隩」爲誤。 泉 氏 即《泉水》詩所 無此文,意今本 议 、水名。J孔 非之當矣 旧 ,必有隈曲之處,奧乃隈曲之稱。 水 爲有 膽 陸 爲 彼 據 澳 水即《詩》泉源之水。 澳 淇 此而 水。 水 澳」, 疏 爲淇 謂 流 反以 亦 張、 脱 謂 入於淇, 釋 「亦流於洪」者 落乎? 毛傳 陸 奥,後人因詩之言,遂 「陸 文 二家之説,有 引《 璣 「奥,隈」爲誤, 而《水 云 祌 案 木 張 余因 今陸《疏 也 淇、澳,二 郷 疏 華 * 7 注 自 博 思 詩 兩 則 來 泉 疑 水 物 人

> 帝斬 之竹 竹定 孔 以爲 竹。 當不誤矣。 竹,注作編竹。 之,然唐以 又《水經注》 詩》、《雅 疏 後儒 是别 駮其 淇園之竹,寇 一艸,言其莖葉似竹,青緑色,高數尺。 爾 「今通望淇川,並 緑 雅 竹 非 艸,得之矣。 前諸 注 不敢有異議, 作 猗 亦 引《小雅 猗」, 不異毛興。」此善長 疏 萹 蓄, 皆 引 儒 贵 同,乃二 《韓 漢 緑 恂 爲 武、 皆 伐 . 詩 無 自《集 王芻,竹 采緑》證之, 未 竹 而前説 寇 此 及 見《漢 艸 淇 《説 物。 恂 也。 川 傳》 故 文》 俱 爲 得 惟 書》者 事 漢 解 廢 惟 皆 萹 於目 王芻、萹 圃 史 爲 謂 陸《 作 兀 辯 誠 哉 夫 緑 緑 萹 善 驗 疏 筑 之 切 武 色 與 有

曼,節 道 葉似 旁 艸 案萹蓄,吴普《本艸》 落帚而不尖,弱莖引蔓,促節 閒有粉,多生道旁,方士 入本 經 下品 李 名扁 氏 呼 辨, 綱 爲 目 ,三月開 粉 又名扁 節 云 艸

紅華,結細子。」

買 反。 篇》亦云。 谷,九十月采, 染艸也。 名綬。」皆謂 **盭**綬」,晉灼云: 文》謂之漢艸,云可以染黄。 小。 《小雅》「采緑」與「采藍」並 煮以染黄,色極鮮好,俗名菉蓐 即《本艸 唐本注云: 陶氏《别録》云: 此。 可以染作金色。」顏師古注《急就 》之蓋 盭本作線,與 「盭艸似艾,可染黄 「葉似竹而 艸,入本 「蓋艸生青衣 《漢書》「諸 經下品。 、
戻
同

, 稱 細薄,莖亦 以 (), 因 <u>_</u> ښ 其 郎 《説 川 計 以 侯

叔,殆臆説也

琢,斯殆彊經文以就己説。 深也。紫陽釋之,以爲磋精於切,磨密於切、磋、琢、磨四者,各爲治器之名,非有淺切、磋、琢、磨四者,各爲治器之名,非有淺。是 《爾雅》:「骨謂之切,象謂之磋,玉謂

大雅》。《集傳》於《旱麓》二「瑟」皆易傳、《詩》言「瑟」者三,一見《衞風》,兩見

義矣。字訓須有徵據,瑟之爲密,出於程正《詩》,復改訓爲嚴密,於是三「瑟」字皆得密兮」,猶遵毛傳「矜莊」之訓。然《戴記》引箋,自以縝密、茂密釋之。獨《淇澳》「瑟

《説文》。 傳》昭十八年。「撊然授兵登陴」,注「忿貌」。 字訓有本矣。 於武、猛,當從寬大義爲長。 武、猛、忿三義相 案,今本《方言》僩 也。」僩與陋反,正是寬大義。 各異。《集傳》曰嚴毅、《章句》曰武毅、皆 一僩,美貌。」《説文》云: 晉、魏 傳云: 閒 謂 案,《荀子》云: 猛 「僩, 唐楊倞其亮切。 爲 近,但詩美武公之德,無取 僩 作 寬大也。」《韓 撊,二字殆相 證之,非荀 「僩、武貌。」三解 毛爲荀弟子, 注引《方言 陋 者 意 詩 通。《左 俄 也。 * 且 又 僩

會弁如星」,鄭云:「弁,縫之中,飾

皆非 得 爲 布置之疏 似 之以 一、樂,本又作礫。」案,樂訓白貌,礫訓 屋,而 飾 如 明義 星 弁者,皆夜光之璧哉? 玉 之明 云皪 落 皪 (*, 則 皪 非 皪 而 稍 取 而 處, 異。 象 處 於星 則 狀 武公雖大國之君,安 似 經言如 光 星 也。 又《釋文》云: 也 こ不 星,特象 朱《傳》 云 小石 皪 以 其 皪

詩 密比 詩 (東京賦》「芳草如 盛 如 如簣, 緑莓如蕢」,蕢,積也。 「箓筑 ,此獨棄而 積 也。」簣、蕢字異 如簣」,毛云: 而朱《傳》从之。 不用, 豈惡其同毛與? .積」,正用 ()訓 「簣, 斯語 晦 薛君云: 積 翁 則 積 伊伊 同 甚 也。」《 ĬI 愛 平子 解 韓 爲 韓

考 槃

《考槃》箋 云「誓不忘君之惡」, 誠 害於

> 之云: 子》。 恥 此,是乃邦有道 理 不棄賢,賢者 考槃》,見遯世之士 馬 , 圃 遯 得 小 世無悶,豈有道 録 「《詩》未有見棄於君之意。」 敘以爲刺 其 詩 何 爲 而貧 莊公,則 ൬ 隱? 且 而 賤者,君子方以 時 無 孔子曰 不 所 悶 誤 爲 於世。」 也。 哉? 不 一吾 朱 見《孔叢 知 子 如 於 君 非

也。 日: 次二章皆作「在干」也、《詩 詩》有内傳、 作干,云墝埆之處。」《文選》注引《 董氏謂 地下 ,有故、· 而黄日干。」二注 一在 阿』《韓詩》作「在 有説、有章 》無 雖 此 句,容有 不 體 澗、《 干」,是首 同 韓 兩 詩

字,殆 豈容臆度哉? 正義皆讀軸爲迪,以合進義。 未 碩人之 必 然 也 軸」,毛云: 上章「邁」字本訓艸, 毛之傳《詩》,本於師 軸, 然毛不破 進 也 m]。」釋 毛以

考槃在澗」、《釋文》云:

韓

詩

盤 미 爲 邁 桓 以 寬 爲 德之義,以 不 進 大, 行, 何字乎 ,毛之訓 於 與毛 義 尤 美碩 進 義 遠 一,或以 正 源 人,較優 相 謂 必 反, 軸 欲 此 以 乃 爲 持 蘇 臆 之 輪 説 氏 説 釋 也 車 又 軸 得 當 況 之 進 爲 始 破

碩 人

是

進

指 蟲 牛。 也 短 雅 蝤 從 》場 誤 注 生 蠐 蝤 夏 也 己 糞 腐 螬 蝎 蠐 一分爲 人 木 土 是 陳 秋 非 蝙 中 中,穿木如 藏 名蟦 也 蠐 化 及「蝎, 器《 以背行 螬 腹 物, √蠐,≪ 也 一名蛣 育 拾遺 陶 錐,至 又化 桑 貞 爾 蝤 》辨之,當矣。 身 蠹 白 蝙 蠐 雅 短 爲 與 春 是 足 一名桑蠹 蟬。 名蝎、《爾 蘇 蟦 雨 也 長 恭 後 蠐 郭 以 如 化 身 螬 氏 爲 足 長 爲 雅 爾 大 是 爾 足 天

> 《正韻》 眄爲盼 盻 《廣 之 恨視 兼收盼、盻二字, **盻**,監本注疏 篇》引《詩》及《石經》皆同。 詩 三字音形義俱 眄 曰 溷 邪 「美目盼兮」,盼字从 證 从目 韻 亂 視也。 盼 盼字,是誤合盼、 》於霽韻既 》盻字收 也。 於斯 匹 丏 从 彌兖切。 莧 目 盻,從 又以《 極 亦誤, 切,訓 分 各别,今人多亂之。 人霽、諫兩 矣 聲 前 收 《詩》「 目兮聲, 聲 盻字 訓 此不可 美目, 兀 莫甸 盼 目从分、《説文》、《 莧 美 盻于一盻 訓 爲 目 切, 韻 胡 顧 切 則 不急正 恨視,於諫 今諸本 計 及《孟 誤之來 爲 目 目 切, 視,是 黑 五. 偏 也。 計 白 也。 恨 合 ^ 子 俱 久 碩 切 視 分 也 × 誤 誤 韻 也。 貌 盻 玉 以 又

阚 雅 濊 \approx 施 魚 罛 毛 罟謂 濊 굸 濊 施之水 , 之眾」,則眾、 説 文》 中 ١, 作 罟 韓 施 本 詩 罟 濊 云 義 **漁** 也 流

指眾言。 引 詩 相 貌 미 句,是言眾非言水也, 凝 謂 反。 馬 「江平不肯流」、「水深難 流 融 辨 也」。 近世 云 矣。 文》 朱《傳》云: 案,《 然今本《説 楊 引 大大 用 ~ 説 魚罔 詩》「濊濊」 修 文》 云「水平 礙流得之。 云 文》云「 目大 思, 凝 急流」二 一本連 豁 入水 則 流 豁 礙 流 忧 《釋文》又 聲。」 一施 流 凝 也 語證之, 」, 不 與 本 則 引 韓 . 傳 云 唐 車 義

氓

語

Mi

增

人聲義

類,皆 飛 歌 或 沭 風 爲 里 非 秋)美刺 詩 巷 其 胡 猥 以 人自 妻》、《 事 諸 示 篇 足 作 後 大率 焦 爲 也 ## 仲 勸 一,特代 此 戒者 卿 如 類。 妻 爲 陌 (» · « ^ 文 其 H 集 人 木蘭 桑 傳 人之言耳, 墨 沙槩指 × 士往 詩》之 雉 爲 朝 往

> 前 言 其 有言者 工文之士不 人 不 ,謂《谷 自 可説夢。」廣之謂 不 作 必 風》與《氓》二 決 能 有 無 及,然 德 是 也。 理 、 其行 也 矣。 噫, 詩 ^ 俚 一賢一否, 其 大 語 文 全 詞敘 **>** 載 輔 信 次, 廣 平 人 雖 之

皆爲 不同。 姚。 也。 非 之樂者, 沈、云「荒 詩之「耽 棣》之「湛」,兄弟之樂 湛, 詩》 樂 爾 義。 刺。 獨 耽,耳大垂 又作 祭而受福之樂也 借 雅》云「樂也」。 鹿 」在男女,《抑》詩之「湛 蓋 然 耽 其 沈 鳴》之「湛」,君 醚,《説文》云「樂 女 獨《氓》詩之「耽」, 訓 湛 於 mi 樂者當 也。 酒 兩 耽 字 士,尤 湛,本宅 爲樂義, 此 作 也。 《漢 雖 四 . 媒,《 失 樂 字 臣 • ^ 減 育 其 無 但 酒 皆 之 五 反。 説 鄭釋 樂 傷 在 正 之 樂 不 行 也 文》 没 也 同 初 見 記 也 飲 異 爲 也 面 Ž 》借 筵 酒 於 詩 又 非 美 氓 常 諸 禮 之 惡 用 作 樂 皆 則

尤音淫。 也。」兄弟之樂,何妨於甚乎? 湛」矣。《常棣 非是。 古讀 》,《韓詩》云: 如沈,今丁南 反。 又耽 湛 字從 俗 樂 之甚 或 耳

勤勞,二 幼 怨之深 及「三歲爲婦」, 老矣,必非三年便 本寠人,賴 與? 也。 (
出
》
詩 又言「老使 也。 一歲之後 此 言 然風 婦 ,漸致豐裕,及老 車 止 總角之宴」,則 俗 遷 棄 我 目 之期 薄 怨」, 初 也。 惡 爲 其 則 夫婦 及「夙興 如 言「三歲 氓 此, 時耳。 棄 婦 豈 丽 遇 婦 夜 棄之,故 獨 氓 時 寐」之 食貧 意氓 時 婦 尚 己

云 一 是,傷 旦旦」《説文》作「悬悬」 悬即 日 憯 旦」之義。 信誓日 也, 也 高。」亦 此 旦」、毛云「信誓 故 即 與 憯 鄭以 鄭 意。 意 懇惻 TE. ^ 詩》「 同 欵 旦 怛 誠 日 旦」,然不 廣 述之。 旦」義當以 之或體,注 韻 **学**云: 解

> 旦正 反謂 因 此 「有如皦日」之義,本與毛 日 || 爾 一,悔 爲正 訓也。 此是毛義,失之矣。 雅 爽忒也」,是推 》而爲之説。 《玉篇》云: 又朱《傳》訓 釋 然《爾雅》云「晏晏、 詩 一息、太 鄭 人言此之意,非 旦旦」爲 不同。 也,爽 明,蓋 \wedge 也。」 韻會 即 日 日 則

竹竿

故以 也。 猶 水,而意不同。 有異焉。《泉水》思歸 大水也。 由於不見荅也。 嫁 若在 《泉水》、《竹竿》皆 者 爲 意 不 「泌彼 左在 見 在 得 苔之喻 禮。 右,兩 泉水,亦流于淇」,嫁者之常 婦人之適 故二詩取 舟 也 不 而已,《竹竿》之思歸 楫 衞 相 得 至 異 女 水 釣 人,豈其常乎? 興皆以淇、泉一 國,猶小水之人 思 者 而 歸之詩 後 意 在 行 得魚, 也 猶 一,而 男

指爲賦體 女得 反 喻 禮 此 mi 一徒以 皆 相 傳 配 義 詞 首 而 非後 已矣。 尾 儒 興 之穿 又 鑿 爲 彻 不 見 今槩 荅 之

嚴《緝 説 真屬謬 文》云: 》取錢氏 佩 玉之儺」,毛云: 説 一難,行 柔 緩 心之訓 有 節 也。 儺 而 行行 解爲要身嫋 因 有 引 節 此 度。」 詩

芄 蘭

沓矣。 近世《 信任大臣, 豈 錐 錐 首章言支,不言莢也。 ,故以爲 宋 《後曲 本 沈沈 但 艸 一詩 括言 興。 如 綱 人託 張弓 專 目 韘 爲 <u>.</u> 興,本 指 祖 亦當 觿 芄 其 殟 巓 韘 0 喻 似 説,言「芄 毛、 莢 人 據 葉 鄭義 物 君 垂 此 但 枝 取 當 則 不 優,沈 閒 象 柔 韘 蘭 復 乎? 順 是 實 如 見 温 決 説 尖 耳。」 解 良, 況 纖 非 如 結

> 延,葉 里,勿食蘿摩、 啗、煮食俱可, 六、七月有 白 巧 絨, 環 其 **、藤、**研 矣。 長 미 作 圃 案 華, 合子,其實 - 褥 鋭,根及莖葉 芄 輕輕 與枸杞 枸杞」, 紫白色, 蘭 煗。 陸 以其 !葉同 名 疏 又 實長二、三寸, 「雀瓢。 》名 陶隱 補 功,諺云「去家 斷之皆有 蘿 精彊 居 摩 陰 言 月生苗 本 其 也 白 艸 葉 中 **>** F 生 有 章 名

也。 **韘之爲決、爲沓,《禮》皆無明** 禮》云「朱 亦名 沓以放弦。 鄭之説,陳 沓。 右巨指著決 名 物物 極,取 抉。 《説文》訓 童 疏 子 **>** 沓用 極 其 氏《禮 非 佩 決用棘及骨及象爲之,亦名玦 以 中 鄭 韘 韘 朱 鉤 ·於指。 是 」,毛 而 與 韋爲 書》非毛、 弦、食指、中指、 是 也。 毛 毛、 意 以 之,亦 沓,取 同 韘 許。 者,中三 ,朱《傳》兩 爲 許 文,而 名極。」《大射 其沓於指也 決 而 案 鄭 是 無名指著 射 鄭、馮氏 指 毛説較 以 禮 存毛 各 韘 爲

古, 巨 指 射 又 有 从韋 決 也 許 所 説 以 相 鉤 輔 或从弓作碟 弦,以象骨韋系著於右 當 得 其 真。 許 云

然則 知。 徒 時 夫 與? 方十五六歲,宜有童子之稱,又何疑 惠公譖 敘云 驕而 爲 敘 此 以 殺二兄,違 ^ 詩 芄 者,殆左公子洩、右公子職之 蘭 無禮」,正 **>** 爲 距 刺 王命,其狠抗不遜 惠 公,而 相合也。 朱子 且. 不信 即 乎 ? 位 可

河廣

子終不 襄公母矣。況襄公未立 是 疑 不 然。 耳 嚴 ·相見 華 衞 谷 然 孔 未 謂 《河 遷 疏 詩 謂 時 猶 廣》 假 宋 口 桓 有 詩 無 一,尚 公尚 渡者之詞, 作 作 於 也 可 在 衞 至衞,安知 嚴特 敘 未遷之 非 不 以 應 言 渡 時 渡 母 稱 河

> 人 河 河 思之」,豈未知襄公時衞已在河南邪 北 繒 宋 宋、義 在 河 儘 南 可 通 矣,後 也。 至 又云「襄公即位,夫 朱《傳》先 云 衞 在

伯 兮

驅 證 也。」其言甚明。 詩 或 而 中「爲王前驅」、「自伯之東」二語 從王伐鄭事,朱子以爲 東 孔 箋謂《伯兮》詩正 行 疏 伐 謂 鄭 鄭 或 在 指 京師 會 兵 桓 無明文可 之東, 京 五 年 師 衞 始 非 考, 陳 從 即 在 不 衞 其 王 東 前 確 知

殳之圍大處至二尺四寸 取其青,合之,取其 賁以先驅。 二徐鉉謂 『殳以積竹,八觚,長丈二尺,建於 説文》: 殳, 介有 以 力,是殳用竹 杸 「積 小 殊 處 竹者 人 亦 也。 不 削 減 兵 也 去白, 五 車 禮 4

外。 雖 工矣。 杸,通作殳,或云杸、殳古今字。 象,用木以赤油韜之。」此據後世之制 不 非古殳,要必 能 故《考工記》廬 純 崔豹《古今注》云: 用 竹青, 意 相 必 仿髴也。 人爲殳,廬 以 木 爲 「棨戟乃殳之遺 心, 又 人實 案, 殳本作 m 傅 攻 積 而言, 木 竹 之 於

甚

温當

得 萱 憂 意,以爲諼非 州」,云: 何必兼釋 注以證之。 考槃》字作諼矣。 《伯兮》、《考槃》詩。」又明是《伯兮》字作萲, 釋訓》: 獨 也 。」則以 爲異乎? 毛傳云: 韓 詩》 · 萲乎? 「令人 「萲諼,忘也。」郭注云: 緩 然據傳文義,明是以諼 亦作 ·艸名,引《爾雅·釋訓》及 爲艸名,先儒之説皆然,孔 至朱《傳》以合歡當之,乃襲 「諼艸令人忘憂。」孔疏申 忘 一 又《説文》引《詩》作「蕙 若非 憂 一艸,薛君 艸 艸名,則釋諼足矣, 也。 를 : 或 作 ·蕿,或 爲艸名。 萱 「義見 艸 孫 志 作 安 其 氏

> 生 鄭 論 樵 之誤。 0 合 歡 本 蠲 艸 忿, 合 歡 萱 在 啪 木 忘 部 憂。」 非 ^ 祌 通 也 義 嵇 叔 駮 夜 之

七八

有 狐

作綏。」 則同。 作久久、《説 鄭箋求匹之訓 山》之綏綏,毛義實 朱《傳》以 玉篇》云: 有 案,朱《傳》此説 M 爲獨 綏綏」,毛傳以 文》云: 「行遲 行 因 求 移 宛 兀 勝鄭矣。 以 貌 特特 ^ 釋 行 詩》 綏 衞 字 遲 見 詩 綏 雄 訓 又案,綏綏元 曳 爲匹 耳。 齊 狐夂夕,今 相 久久也。 反 行貌 然 南 取 山 南 興

有狐》首章朱《 傳 **>** 日 . 在梁則 미 以

0 「嵇」、原作「稽」、據大全本、《四庫全書》本、嘉慶本改。

淺深耳 裳矣。」 水,而 何由 厲 厲爲 既 衣 之,殊不 厲 而 曰 爾雅》云: 涉 爲由 而 可 不遵毛傳, 水日 方 見 以 思之,始知因次章厲、帶二字生情 上章在梁 ·, 非 一帶以上,是方涉 濟乎 次 其 裳,既 涉,則 · 知《 厲 章 既 謂 爾 水 。」則在 日 濟 因 直 涉 在側 由 則 : 乎? 雅 涉 爲 訓 一帶 而 可 未涉 而 爲 當是既 以上 厲 可 在 以 由 束 深 而《 獨 厲 以 帶 服 時 帶 時,不言可 水可涉 不可衣乎? 爲 服,亦 則 阚 矣。」 以 可 也。 涉,故 厲。」故 可 雅》 Ŀ 以 以 況經 初 束帶,故 一特以 遂 處 又云: 帶 不 隨 直 朱《傳 知 矣。」卒 解 云 矣。 記 文 日 既 在 其 水之 彊 濟 未 以 側 也 以 且 平 章 在 訓 西己 涉

旁。 厲 非岸名也。 毛蓋舉 王 有 氏 狐 日 然厲 水 . 次 以 章, 必 見岸 岸 毛 深 近 굸: 也。 水,其旁之岸亦名 危 日 厲本涉水之名, 属。」: 「厲,深 此 可 厲之 得 手 E

意。深水之旁岸,近乎危矣。

木 瓜

於北 桃。 以爲 子, 故 者。」是已。 爲果,今則不然。 小 **棋**莫零切。 爲味,其著華處乃臍 而 三者皆與 貴之。 黄 而 八、蔕閒 良果。 土,蓋 濇。 二者之外又 靁公炮 木瓜之圜 植,陶 又有 木瓜同 無 木桃 禮記》云『樝棃鑽之』,古亦以 榠樝之類, 又有榠樝,大 炙論》謂 重 而 Ш 也。 蔕 隱 小、 有 下 類。 樝 鄭玄不 居云: 《埤雅》謂之鼻,云是脱華 者爲木李。 榅 於木瓜, 者, 味 之和 但 與 烏没切。 酸 味 木 林 識 濇 ൬ 圜子。 似 瓜 檎 以以 Щ 者 黄。 木李又下於木 樝 得 相 桲,蒲没切。 陰多木瓜,人 爲 爲棃之不臧 木 子, 木 又有樝 似 木 木李 桃 之正 桃 而 故 又 處 異 亦 又名 名 其 ,俗呼 氣 子, 名 生 此 大 樝

也。雖有樝名,而類自別。謂之棠毬子,即《爾雅》之朹音求。繫音計。梅樝。《唐本草》謂之赤瓜子,宋《圖經》外類

子,此

乃黍矣。

黍之不

·黏者爲稷。

顔

師

古

義當讀上聲。

^

玉

篇

*

痲,

迷彼反。

嫲

實

細而

長,黄色,性黏,用以

釀

酒

,俗亦

呼

黍

行邁靡靡

」,靡字《釋文》無音反,據文

毛 稽古編卷五

《急就

篇》

注

言「

黍

似

秶

圃

黏

۰,

秶

即

稷

也

黍,稷莖葉

穗

粒

皆

同,

而

性

有

黏

疏之異,俗

通

呼黍子。

源著

吴江陳處士啟

王變風

黍

離

非黍也。 之語 其苗似茅,高可二尺餘,一 實圜 晦 集傳》曰: 菴 重。」案此乃今之蘆 陶 殆祖其説乎? 貞白 已有「黍苗似蘆 黍 苗 似 莖數穗,穗 蘆 今北 一,高丈餘 粟 辨詳 土 粒 自 **《**總 有 散 亦 穗 大 詁》。 垂, 黍, 黑

粟米在 粱,且用 也。 文,音茨。 粟類。」此得之。 此乃郭之誤也。 稷、粟是一物。 云 乃粱類, 靈曜》。 今江東呼粟 又「日中星鳥,可以 稷、秶、穄,子例切。 「飯餅也。」俗以九日食餈餻 中品,又似二物,先儒 歲所 爲齍盛 非 《説文》云: 稷 爲築。」疏云: 最先,故《月令》謂之首種 也 而《本草》稷米在下品,别有 又案, 築本作齋, 俗从米作 陶 0 之齊,謬 爾爾 隱 居 雅》「秶,稷」注云: 日 種稷」、《禮記》疏引《考 穀而 甚。 稻 餅 甚疑焉。」案 「據此,則築 三名, 「凡粱米皆是 築 也。」《 乃 即此。 餈之 音之轉 廣 韻 重 粟

結 稽 古 编

訓 嫲 猶 遲 遲 遲 一,義 遲 也 同 今作 當亦音 靡 同 案 此 詩 毛 傳 靡 靡

君 子 于 役

兒 何必 膜外邪? 不歸 子非之,改爲 亦前篇 念之,其得失俱 《皇華》之詩以勞使臣,今王者 戲 以「無考」爲譏。 ,室家固當繫念,豈寮友之情獨應置 敘 以《君子于役》爲寮友相思之作,朱 婦人作, 至於行役 室家 可 傅會至此, 知矣。 念其 過多,自是王者之失, 周之盛也,有《四牡》、 八君子。 又謂《君子陽 殆以 夫大夫行 不念 經學爲 而 寮 陽》 之 友 役

雅》云: 先 歸 羊牛下來」、《集 而 牛次之。」此祖 「羊畏露早歸,故先於牛是已。」然 傳》 埤 EI: 雅》之説也。 日 夕 則 《埤 羊

> ^ 傳寫之誤。 集傳 》次 章 經 文 作 4 羊 與 注 疏 異 當

君 子 陽 陽

作。 必至於召寇。 則當國者皆小人。 周,敘《詩》者其 陽陽自得,似難與 百罹、百憂,其爲 詩,敘皆云閔周,今觀其詞所 敘云「閔周」,旨哉 見幾之士作詩以紀之,詞雖樂,情實 君子陽陽》、《中 政荒民散,納 知 可関 (被二詩同 本乎? 内之徒足 無 谷有雜》、《兔 疑。 善人隱 .論 侮 云化 至 以 賱 ,而槩以爲閔 相 病 戎 離、 ,皆由 民,外之 居下位 招 爱》三 禄 啜 泣 仕 悲 此

孔 無左右房,小寢 氏申之,以 右招 我 爲 由房」,毛云: 則 天子路寢 有之。 然天子小寢皆係 如 明 堂,有五室, 房 中之樂。」

是

不用鐘 則章 之内 歌 堂下有鐘磬,合奏此詩。」《燕禮》云: 樂,與衆聲俱作。」 於路 合樂《周 工奏之,則不然矣。《鄉飲酒禮》云: 至房中之樂,弦歌《周南》、《召南》之詩 西房,乃鎬京宫室尚 舞既備,不應作於房中。」其意以孔説 也。」又謂: 房,是《顧命》之東房、西房,蓋作之於路 召南》,不合樂。 鄉 、侍御於君子,女史諷誦之耳,若燕饗時 八樂《周 謂 作之。 今案,鄭《荅張逸》,以爲《顧命》之東、 寝,此 | 磬之節,見《燕禮》記注,然但指后 房在路寢 南 南》、《召南》。」 》、《召南》。」注云: 房中之樂、當於路寢之下、 章氏 《儀 疏 而引《 易。 此詩 禮》: 云 仍諸侯之制 謂 云執簧、執翳 顧命》,非 房中弦歌《周 □「房 疏 謂堂 云: 上有 「合樂 非房 故有 確 \langle 鄉 "鼓瑟, 證 万乃 謂 爲 則 中 小 南 之。 「遂 也。 歌 樂 樂 之 夫 非 寢 寢 而

> 執翳,非房中樂哉 凡奏二《南》俱不合樂,亦誤矣,安在執簧 樂,所謂陰聲也。」二者皆教其鐘 **燕樂、縵樂之鐘磬」,注** 人用之,乃不用鐘鼓。]又《周禮· 侯、卿大夫之燕饗亦得用之,故用鐘鼓。 云: 云合樂,此 既 名房 歌 鄉 中 樂, 之 ? 樂,用 亦 云 與 衆 鐘 聲 鼓 燕樂,房中之 俱 奏之者,諸 磬,則章謂 作。」 磬師》「教 疏 婦 又

子陶 也。 馳 反,俗儒遂誤讀 貌 陶」,和樂貌,當音遥。 陶本音桃,再成邱也,《禹貢》「陶 ,當音導。 又窑也、《縣》詩「陶復陶穴」是也。 如字。 此 兩 陶 陶 《集傳》皆無 駟介陶 陶 邱 一君 驅

是。然康熙抄本於下文「章謂」亦作「章」,姑仍其舊。「張」。按,張易、《南唐書》有傳、著《太玄注》,作「張」「章」,嘉慶本同,康熙抄本、大全本、《四庫全書》本作

八四

水

得 貢》揚 里之處者 贵 揚一 文》 背 激 家,殆未 二水激 偕 口 馳 揚 字不 行 據 (詩》以 州之得 宋儒 而怨,恐非 以 揚 案《 N 揚 釋 見 平 鄭箋云。 然 易 , ? 小 經 古 飛 揚之水」名篇 也 名, 以 哉? 書史, 爾 駆 悠揚 悠 雅 亦 也 人情 欲 《集 揚 * _ 因 挈 至 惟 平 之 傳》謂 皆 妻子 水 ? 後 解, 「揚, 彼其之子 性 與 代 此 者 激 激 以 詞 戍 明 三,毛、 翥 急 從 揚 揚 曲 J 驗 舉 義 軍 中 自 二,本 也。 也。」《 緩 今 近 頗 又 目 鄭 江、 有 以 其 又悠 指 義 皆 \wedge 之, 室 不 鄉 淮 禹 説 相 訓

師 當 師 揚之水》、《集傳》譏 至 止 謂 衞 周 E 制 室,不 凡 有 以 討 出 平王 伐 征 之忘 皆 此 用 未 親 知 諸 逆 出 侯 理 何 之

若徒 律,以 征 師、縣 天時, 於社 王 六 伐 踐 愷 紀 卒伍之名、蒐苗 輂 有 典 外傳 代北 載 室 師 魯, 不不 罪。 奄、伐東夷、穆王 辇 也 鄉鄉 有 闊 使安居飽 皆 不 伐,則又 師之事 聽 造 功 與 略,其 及戰, 難 考之《 八則奉 用 Ŧ 軍 於 大 可 師之事 聲」,大師 則 以 祖 師 信 師 用兵 巡 周 徵 也。 主 征 親 (見於《詩》者也。 也 食, 百 立 車 陳 禮 獮 兵 伐 征 也 車」,大史之 軍 (之事 上,此 安 皆言 自 狩 乎 之 周 征 眡 社 用 之事也 ? 之 衞 公之 犬 「大合 明 「合卒伍 事 ",誠 大司 此 法 出 戎, 證 而 果 侯 大 紛 二,其 征 賞罰 東 難 軍 或 如 共 祝 見 紛 馬 時 悉 征 八爲 事 有 「正治 之 簡 王 於《 者 之 以 集 誰 也。 知。 也 故 爲 制 事 滅 職 救 宣 傳 謂 兵 有 書 密 度 也 無辜 也 公器」? 王 又 則 天 至 其 功 所 甚 之 敘 僅 子 宣 成 周 偏 徒 執 則 之 責 南 與 Ŧ 官 # M 族 役 百 抱 獻 伐

哉? 討 以 其 水》怨其上,因 江 王旅 服 自 賊之舉, 漢》、《常 諸 相 小雅 也。 救 侯 、援、畿 之心 民 彼不怨而此怨,何爲也? 武 》之《六 將 八》,率師 出 抑 内 師 荷 不 不以 亦 戈, 月》、《采芑》、《大雅 出 自 者皆王臣 赴敵 義 弱 旅 耳。 其 以 恐 兵 勤 後, 假令爲 也 矣。 之, ,執 誰 非 ^ 兵 敢 復 揚 徒 类 者 怨 讎 之 無

蓷

矣。

中谷有蓷

陸《疏 在溷: 聲,音丸 隹 在 音 追。 蓷 毛 白二 不 。」在、離 傳 聲, 益 郭注 薍 可 굸: 種 不 五 李 皆言 恵 辨。 母 切。 皆 時 艸也。 音 蓷 其方 益 珍 也 追 母 謂 一,俗 鵻 莖 艸 白 也 省作 萑 白 華 又 90 與 者 名 艸 灌 萑 一、光音 即 爾 異 雚 爾爾 然 與 雅 在 音 益 充。 益 貫 雅 **>** 母 母 从 云 美之 蔚 華 之 省 hh

> 葉、性 異 蘈」 在 耳。 音 蓷 頹。 味 又 與 也。 紫華 陳 益 藏 母 ·者即《 蘈 器 同 《拾 蓷 而 爾 音 白 遺》 雅 同 華 〉有鏨 》之「藬 . , 是 亦 即《 音 艸 吐 暫。 爾 口 但 菜, 雅 切。 華 恭 4 色

注、 貌。 脩長者亦暵之,又次則生於溼者亦 爲燥,以 之也。」吕《記》、朱《傳》祖 先乾後溼,喻君子於己有厚薄 云: 之傷於水,始 説 乾 詩》 也 疏 文》 日 陸艸,生谷中, 「水之浸艸,先溼 暵 正 爲 原 其 引《易》「 相 艸 乾矣」, 作 反。 灩 待 灣, 則 其 陰 案, 溼 莫暵于 乾 注 中 潤 毛傳云: 傷於水。」鄭箋 矣。」 注、 云: 而 則 後 生 疏 離」,並 乾。 脩 伊 其 解 暵 ĬII 水 久 暵 似 之説 一、從其 則乾 今《詩》立文 暵, 則 濡 迁 字,注云: 不 乾。」 云 而 然 引此 暵之, 矣,次 菸 皆 甚 乾 、央居 暵 孔 訓 而 也 與 則 本 疏 鵻 切 暎

作灘 文》合 究其 字置 音於,鬱也 暵,而注 世 口 見 已作暵字。 它安反。 故 辯, 漢 1,皆 時 一義 徒 因 訓 郷 , 矮也。 川灘, 别 將 灩 文 爲 暵、菸二字 今用爲水灘義,假借也。 孔 本 非 之解 須剖 仲 訓 作 婑,於爲反,病也 達 灦 暵 耳。 析其 作《 字 也 依 又案,玂 IE 目 異 徐 毛、 同 義 牽 貌 鄭 合,後 音 乃 時 義 俗 漢 竟 經 从 與 儒 無 文 則 ^ 隹 菸 不 則 晉 説

兔爱

葛 \pm 相 子不信敘,其爲 西 一在位 之戦 周 Ŧ 之盛 詩 五十一年。 集 在 其 傳 桓王 ,故云我 》謂 E 王 十三 距宣王之崩七十五 師 此 傷 生之初,天 言,宜也。案,敘 年, 作《兔 敗,指 距 西 爰》 繻 周 下 葛之戰 詩 六 尚 者 + 车。 無 四 以 猶 事 11 幽 年 此 及 Ŧ ·, 平 朱 爲 見 繻 在

> 其 説,而《詩記》録 + 子之言, 位 + 盛 歲,尚從 年。 已 非 則 幽 作 童 征 王 詩 幼 役 雖 其語,殆未之思 者 無 西 無 必 知 周 是理 生 ,計其作 於 不 宣 也。 得 王 云 詩 時 東 與 盛 時 萊 ? 又 時 遵 應 能 用 八 追 如 九 憶 朱

誤 譌 秩 也、《詩》「四國 民之譌言」是也。 詩 南 則 訛 〉一尚 别爲一字。 訛 (正韻) ,俗字 是 寐 》并吪、訛、譌爲一字,謬甚矣。 也 無訛 也, 是訛」、「式訛爾 譌,从言爲聲,譌 」、「或 今《詩》槩作訛 本 是吡、訛 作 吪 寢 从 或 訛 義 П 同 心」、《書》「平 是 化 言 而 聲, 乃傳寫之 也 分 也, 雅 動 又化 詩 俗 也

葛藟

長 興己不受王恩,葛藟之不 葛 藟 一談詩 箋、 疏 本 謂 葛 如 藟 得 宋 河 胡 潤 氏 而 旦。 生 又此詩亦言「縣縣」,縣縣不絕,安見其生不 注谿之名,其近水,更甚於河滸。 至《葛覃》篇言「中谷」,谷者,《爾雅》以爲水 誠 木而生,不言所附之木,必在山,不近水也 性喜燥惡濕之證。 反其説,以爲 萋萋」、「莫莫」,反足爲葛性好水之一證。 屬高阜耳,若《樛木》條枚蒙楚,止言其附 喻己之失所」,又引他詩 「葛 萬宜生邱 然所引諸詩,惟《旄邱》 陵,不宜生水畔 咏 葛 藟 語 《詩》言 「爲葛

所, 疆求親附於人, 謂之父母」, 於文似順, 道微矣,所以 族之親乎? 母」,言王無母恩也。 謂他人父」,言王無父恩也。「謂他人 名雖父母,情 爲 刺 也。 元后作民父母,况九 《集傳 則 他人,親親 謂 流 民失 之

采 葛

鑿之見也,東萊非之太過。 次章爲大事使出,末章爲急事使出 小。」傳文至簡,兹獨詳焉,良以興 給,蕭供祭祀,艾以療疾。」又云: 不容略爾。 義在葛、蕭、艾三艸矣。 也。《采葛》之詩,言采之外,無 事取義也,「不盈頃筐」、「不盈一匊」之類是 止」、「柔止」之類是也。或言采之事,則 時,則以時取義也,蘩之「春日」、薇之「剛 義也、「沬鄉」、「新田」之類是也。 詩》言采多矣,或言采之地,則以 箋申其意,以首章 故傳云: 爲 他 小 或言采之 義攸存 ,亦非穿 事使出 「采葛事 詞焉,則 葛爲絲 地 以 取

得

地哉?

八八

大 車

文, 干》傳 之赬 亦 又以 朱之閒」,則淺朱矣。又案,《爾雅 云: 雅 體 赤苗 璊」,詩以玉色比衣也。 云: 以赬 物之妙 則 郭 禾色比 謂 舉 謂 赤 毳 注云「在 之孽, 「菼, 鵻 璊 注 赤爲一矣。 則 諸 洛 衣 也。 ,賴也。」沈括《筆 以 通。 侯黄朱,是黄朱乃 如 於朱, 赬又淺於 玉 爲 也。」又以 玉色如 菼」, 案, ,皆轉相況 《説文》云: 青 淺 赤。 白 鄭 詩 之 謂 之。」蓋 又諸 以 鳥 閒 鵻 ~ 説文》云: 色 艸 譬以明之,此古人 色青, 談》云「琳 比 赤。 侯 色 **夢、琳** 赤 則 「赬 艸 赤芾 比 淺 也。 Œ ~,赤 然 * 青 衣 義引《爾 同 細 色也。」 矣。 據 再入謂 色在 「禾之 也。 毳 m 音也 分則 此 衣 斯 黄 毛 傳 加

衣,而 然也。 李彭山 雅》據 之訓 《孟子》云「褐夫」,《老子》云「被褐」,皆以 外,即 服。 决訟,當本於師説,或古制 衣之爲 賤服,大夫安得服之? 作 助 服 衣以毛 同 滿。 祭, 毳 繳 冕。 加命爲 大夫出封五命,此毛説。 又曰 云以 非 大車》詩「毳衣」、毛、 則 一,音同菼。 此 馮 毳冕服,不可 毛布者,褐也。 布爲之,名同 鏋 爲説 服 但 五。」或子男人爲大夫,此 即 「如毛布」,有此 嗣宗亦謂毳冕之服以絲爲之,毳 以 毳 毳冕之服,子男以 聽訟。 毛 謂 爲 云「帛雕色」,「璊」作「襔」,音 布 罽 毳 · 矣。 ---衣 易 實 又《説文》引《詩》「菼 ^ 居例反,亦作綱。 别 既 異。 也。 左傳》云「褐之父」, 又據《説文》「秭」字 是 謂 阚 鄭皆 文義乎? 疏云: 毛 毳 此 耳 服 謂 衣 似 朝 釋 非 爲 之而 鄭 聘天 服 康 爲 出 説。 毛布 成 毳 毳 使封畿之 故《埤 毳 實 冕之 冕 則 子 好 皆 以 以 毳 之 爲 不 及 得

以指目其人,縱非服以聽訟,於義自通矣。夫爵命之數,言其車服而可知,作詩者應借《禮》釋《詩》,而不易此傳,必有見也。且大

邱中有麻

較正大矣。

也。 爵 地,是爲劉 東周畿 人。以爲堯長子考監明之後,是不然。 子國、子嗟,以父子 劉 在夏世 不知誰之裔,且受邑在何王之世也。 邑乎? ,當是也。 厥後八十餘年,而留邑復爲王季子采 説文》無劉字,有鎦字,徐鍇以爲鎦 已 内邑,緱 有 康公,豈子嗟之遭放逐,併失其 劉累,其來 通作留,周大夫采地,因 氏 縣有劉聚者,是堯之後, 而世賢,皆著名於東 舊矣,不以周 羅泌宋 留乃 氏 邑氏 焉。 周 即

留子賢而放逐,周人思之,指邱中麻

美之或出於私好,未足見留子之賢。毛義「來」爲獨來見己,則是朋友相思之作。其代述之耳。鄭以「邱中」爲留子隱居之地,故敘云「國人思之」,明是舉國之公心,詩人麥,以見惠政猶存,因望其來,而復立於朝,

《集傳》因《大車》一篇厠 九原矣。 千載後,復横被淫狡之名,反不如《采葛》詩 辰,幸而遺澤在人,風詩顯其姓氏。 詩,果何據 人,姓氏湮没之愈也。 矣,獨惜子國、子嗟賢 采葛》懼 乎? 讒 懼 也,《邱中 讒 者 丽 二留有知,應攢眉於 被放, 不 其 知 閒,遂槩指爲淫 有麻》思 主名, 已爲 不意二 生不逢 則 賢 亦 也 已

鄭變風

此。 也 亦作 韋昭 於此。」虞, 華」,與《詩譜》同。 致 作莘,疇、酥音義俱近,或屬通用。《史記》 世家》注,虞 踩,音柔,和 也。」又曰: 人,所見《國語 鄢、 互. . . 以 又云: 異, 注 蔽 鄭 譜 云 至華、莘音義各别, 兩 華 補、 詩 \mathbf{H} 「司馬 書 或 城 也。 譜 翻 丹、 必 「右洛左濟,前 》皆 華,華國。」 **>** 彪注謂 謂 司 有 引《 兩 依、疇、 作 (史記 馬 「華」字及韋注 《水經注》引「華,君之土 酈元,魏 華陽亭名, 或 華, 誤 禎 語 矣。 * 引《 則《詩譜 歷 今《國 **>** 「秦拔 、華,皆 國 因字形 史 、嵇叔 案,《 人 華後河。」 伯 語》皆作 魏 語語 夜傳 之言 《史記 一 華 相似 華 司 君 陽 誤矣。 廣 馬,唐 或 疇 之土 疏 陵 日 注 散 即 歷 鄭 遂 皆 作 引 引

斷

盡《鄭風》二十一篇,此誤矣。

夫子言「鄭

河」,《 意《國 邑 海 以 國,本指 距,非鄭地也,兩華定是 鄭邑也。 猶屬 三十五里,古莘國」,以證《國語 又案,歷華在 變爲幸,其誤固有漸乎? 經注》皆作華,引《國 又 〕併號、鄶爲十邑。 韋注 案 》引《郡縣記》「故莘城 兩 莘字音所 朱子《辯説》謂 語 宋 可,歷 ,是誤合兩華 統記 影兩華 前 庠 前華 華 或 ·之華。 華之是華非莘,斷 八 字,宋 巾 開封 與 語 中之幸,此皆後人之傅會 邑内,又云「皆君之土」, 河、 反,《玉 補 孔子「鄭聲 府 音 《水 爲 世 濟、洛 .語》「前華 鄭 \approx 尚 在 、經注 兩 海》引《詩 州 , 地。 歷 汴 疏 要之,前 並 有 華 矣。 華 州 列,則 幸 **>** 淫」一語 引 後河」作 韋 陳 》之「前莘 城 無可 幸,後 無 歷 又案 注 留 譜》及《水 云 華、前 音 鄭 華 所 縣 疑 反 **→** 境 即 東 而 則 云 也。 幸。 + 後 所 可 北 玉 繋 華 則 菜 俱 獨

九〇

見,反 盡 淫爲 孔 故 高 欲 聲 歎爲白璧微瑕,故 語 叔 平之致,使聞之者導欲增 皆言過其常 淫,於水言淫,於刑言淫,於游 如《子衿》,亦排衆論,而指爲淫 而 也 。 傳示 非 E 目 也。 子删《詩》以 日 下 淫 于田》、《清人》、《羔裘》、《女曰 皆有 「爲淫奔者所作,幸免者惟《 淫 男女淫欲之淫,遂舉《鄭 出 詩 耳, 其餘 古之言淫多矣,於星言 也。 昭 來 詞 節 曷嘗 明 學乎? 也 雖 朱子以鄭聲爲 馬 度 下哉? 思君子 耳。 垂 言 淫 鄭聲 世 者 鄭 不 樂之 陶 立 詩 過 人《文選》,豈 如《 靖 訓 靡 淫 也,非 節《 曼 五 風 悲,沈溺 平 何 幼 音 鄭 閑 雨 ? 反 風 眇 + 風 觀 》,刺 專指 情 女之 廣 * + 淫 聲 ,以淫 鷄 緇衣》、《大 田 賦 收 無中 一律, 於於 者 鳴》五 而 獵 孔 學校 淫 詞 男 高淫 志 子之 過之 昭 Œ 長 雨 女 樂 詞 篇, 返 之 明 廢 篇 和 短 音 灩 夫

> 誦習也 之詞, 物女子, 愧,竟不知作詩者本來面目矣。 真 之,如出一口,後學沈於 未 解之,其 扶蘇》、《遵大路》、《褰裳》諸篇,以朱子 也,必斷爲女説男之言。 掛枝詞》、《打棗 有此等女子,自道 甚 也, 朱子於鄭 愐 聖人 具如 淫 必 然則《詩》其 一斷爲 哂 反 此 鄙 詩,既 有 顔 媟, 歌》,不是過 淫 甲,如 取 者所 難近 悉 焉, 海淫之書哉 其 判 淫樂之情,毫 、其説, 自 此 輔 著之於經 爲 世 言, 廣、 淫 市 焉。 角 詷 井 以爲 又 劉 今取《 肆 矣, 以 頑 吾 瑾 童 爲 爲 俾 春 之 不 然 之解 後 Ш 無 淫 知 所 秋 徒 未 以 儒 縱 何 唱 有 羞 時 和 其 爲

緇衣

作,非也。周人作之,當人《王風》矣。好賢呂《記》、朱《傳》皆以《緇衣》篇爲周人

足以 在? 又案 自 屬 以堪,此 鄭、衛一 周 記 稱 載 相 Ŧ 與 平, 朝 鱪 鄭 () 洪 禮 武 略 人 無 遇之隆 (奥》充耳、 ,皆賢諸 述 補 蔑 而 於弱,不 由 爲 稽 方龍 此 侯。 考, 重 詩 任 知當 較 之至 論 耳 意 相 世 年 Ē 改 坳 者 相 相 以 衣 不 業 同 見 無 0 無 德 何 救 授

將仲子

憾焉

平 鄭伯,大鄭伯之惡,宋人喜爲苛 亂」,意與左氏合。 敘之言爲 也」,詞 「莊 恕 公不勝 左 氏 簡 如 好 Æ 隱 加 其 悪 義 元 母, 《公》、《穀》二 與 確 年 (聖人 以 矣。 鄭 欲定莊公罪 害 伯 同 其 《將 克 弟, 段 其 仲子》 傳 傳 小 傳 謂《 不 者 春 云 論 詩 忍 當當 秋 春 敘 取二傳 以 譏 ×, 秋 以 亦 失 致 持 》、基 傳、 大 教

> 焉。 制。 之説 意 以 與左氏合,良不謬矣。 嘗忌之,祇 詩,段所長 豈能定當日之情 出 陷之於死。 多言」是也 緝》言《將 此詩 獃豎子耳。 奔,誤以爲殺,彼特 ,殆淺之乎言《詩》 若 詩所云「畏父母」、「畏兄弟」、「 文致 爲淫 以 爲 仲 以 止 鍛 夫公、 詞 有 致 鍊 子》首敘 1 在 莊 段 意 又 所 飲 公機 事 以 穀 弗克令終,莊公不 謂 殺 鍾 酒 哉 爲 也 二子 愛,遠 兩 弟 ? 據 必 險 田 莊 ^ 集 經聖 傳聞 叔 百 獵 公 恐 未嘗 至 今 傳》從鄭樵之説 嫌 倍 有 于 引 未 觀 馳 人之筆,故意 避 於 以 意 田 見 或 必 馬 兩 譏 段 爲 養 説 國 然 無 暴 叔 言 縣 成 史 畏 不 也 得 心 刺 了,段實 虎 斷 于 弟 人 加 古 國 莊 無 耳 田 惡 之 君 公 嚴 罪 抑 未 直

^{● 「}同」,原作「反」,據康熙抄本、大全本、《四庫全書》本

説之詞。夫止因一「巷」字而誤讀其全篇,貴弟,不得出居間巷,疑《叔于田》亦男女相

得毋以文害與?

叔于田

意,將以詞害矣。

「刺莊公」。噫,此《詩》之不可無敘也。《左氏》所謂「譏失教也」,微敘,則詩之段之美,飲酒耳,搏獸耳,射御足力耳,美之段之美,飲酒耳,搏獸耳,射御足力耳,美之。《左氏》所謂「譏失教也」

朔之人謂安、史爲聖」,過矣。鄭師一出,京解,是君子微文之刺,非小人虚譽之詞。嚴爾,是君子微文之刺,非小人虚譽之詞。嚴稱是君子微文之刺,非小人虚譽之詞。嚴

人皆叛段,何嘗有私黨哉?

大叔于田

盛,阜又爲盛,不應詞複如此。 爲狩」、《周禮》亦云「蒐田 火」近之。 説俱可 烈爲熾盛,謂以火田 持火」,蓋宵田 宵田爲獠」是也。 火烈具舉」,毛、鄭訓烈爲列,謂 通。 又末章云「火烈具阜」, 但經 用以 云具舉、具揚 照也。 也。 集 傳 《釋天》又云「火田 用火弊」是也。 》祖陳氏 **《爾** 雅·釋天》 則 之説, 烈爲 列 一列人 人人持 熾 訓

全書》本「毋」作「無」,「害」下有「詞」字。「得毋以文害與」,嘉慶本同,康熙抄本、大全本、《四1

清人

以朱 等級, 酋矛常有四尺, 夷矛三尋。 姑 詞 物 施 飾 説 謂之重高。」傳 而 釋詁》文。 傳》之説 重 通箋 此 爲 采 」,箋申之云 喬, 飾 詩 畫於矛矜巨巾反,又作種桑。 羽爲矛飾 英云 清 絲 也 不 意 絫 纏 五兵 絲 及 荷 而 本 也。 故孔 纏, 詩 彼, 也 已 無 建 一各有 解 矛 心孔 案,重 的 喬云縣 重 疏 於車 氏 重高爲絫荷者 孔不以 據 上句曰 英」、「 亦 絲纏之説,見《閟宫》篇 也。 申之云: 畫飾」,是毛、 不 上,二矛最高,而 英, 羽,孔 質言之, 爲然 至重 「喬 重 毛 八尺日 喬 以以 傳 疏之説 喬之爲縣羽 耳,非謂 也。 -, 云「矛有 縣英者,朱 尋,倍尋 而 荷, 喬 解 鄭意 傳云: 但 者 也。 高 揭 爲疑 百 不 日 復 以 也 也。 常 他 謂 英 英 有

飾, 源謂 之。 傳 矣。 謂二 揭之形耳 之中,二矛最 傳不言矛有毛羽,鄭以時事言之,猶今之鵝 訓 《傳》因之。 以爲言。 蓋缘《爾雅》「木上句 喬」,古無此字 毛矟。」然則 上及室矛之銎孔。 事, 喬 》以朱羽 疏 噫 ! 重英、 朱 矛 也 云 而 羽之説,始於王氏之讓 刃 重 非 以 首章言其 有 《釋 解 高 重喬,均當以 漢 訓 然鄭箋云: 縣 高 俱 英, 英 出 制 訓 羽 木》之文,可 下 也。 其上,人 爲 善述毛意 也。 以 乃 題,識也。 周 漢 縣 重 采畫之飾,次章言 又孔 日喬」之語 制 制 英 絫 近 未 世 解 矣。 舉 毛傳爲 耐 「喬,矛矜矛柄。 疏 所 者 喬 馮 相 目 借 必 辯 以 也。 是 嗣宗復京。 至「矛上 荷 即 周 用 以 之云: 縣 見之, IĘ, 合英、 揭 制 鄭 釋 兵 類 毛羽。」 也。 箋云 車 器 推 此 其 故 乎? 句 喬 云 解 六 而 <u></u> 而 負 畫 此 建 集 近 指 知 爲 朱 當 經

如董 適,不當潰散矣。 董 被甲久不得歸,何自適之有哉? 氏 一釋當音遥,皆不 釋爲 介陶 樂 丽 陶」,毛云: 自 適、《集傳》從之。 又陶字如毛訓 與本 · 音 陶 同 陶,馳 當徒報 果樂 集傳 夫 驅 而 駟 貌 反, 自 無 馬

羔 裘

音而

有

協,不知欲從何讀

不知詩 十年矣。 至釋爲美其太夫,而欲以子皮、子産當之, 有美,故言刺。」夫《淇 羔裘》詩久編入周樂,是年子皮始當國,子 、駟驖》諸篇,皆變風,敘何嘗不言美乎? 羔裘》敘,過矣 陳 古刺今、《詩》之常 止 襄 於 陳 二十九年 靈,鄭二子之去詩世,已五六 ! 且云: 奥》、《緇衣》、《車 魯人爲季札歌《鄭》, 也。 「敘以變風 《辯説》之譏 鄰 不宜

> 昭 而追 公詩説》者,以此詩爲子皮既卒,子産思之 説《詩》,無乃未論其世乎? 近世僞爲《申 裘》,不應取人譽己之詩歌以誇客也。 産之爲 十六年 一賦,傅會至此,知有《集傳》而已矣。 政 鄭 又在其後, 六卿餞韓宣子 魯何由先有其 子 産賦 鄭之《羔 詩 也 ?

乎? 毛順 釋之,於首章云: 爲英飾,與上二章不類矣。 詰詘乎? 飾之裘者如之」,是仍指其 大夫,不言裘,故以三英爲三德。 而美豹矣。 而美。」既言如 於次章云「豹甚武 鄭・羔裘》三章、每章次句毛、鄭皆指 嚴《緝》從古注,得之。 亦自覺其迂 濡, 「直,順 也 而 又言順美,不已複 人耳。 ,繼之日 有 也。 《集傳》槩以 力」,則 侯,美也。 程子改 何必多此 服 又舍裘 其所 裘 訓

遵 大 路

秦康 吁篡 風》、《權輿》二詩,知秦之不復東征 引身而去,不有君子, 武 ,公子五争,二國之亂 皆有賢名,二莊不 公棄其賢臣,穆公之業墜 鄭》之《遵大路 其能國 能 猶《衞》之《考 繼 其 若 乎? (業,哲 焉。 出 也。 人知 厥後 槃 轍 觀 少也 | | | | 矣。 州 絲

号聲。 由 惡,音醜。 反」,又云「與 無我 市 流 《説文》作歌,云 (魏兮」,魏字毛訓 切。」音義皆同毛。 醜 同一殊少畫一 棄,音讎。 棄也。 《集 傳 》「市 從攴 鄭 訓

女日鷄鳴

《女曰鷄鳴》,刺不説德也。首二章士

賓 皆可 宜之也。 字應是女目士之言。 小 説 t 疏皆指賓客,與首章差殊爲未當。今案,子 古注之義長也。 幾,併不得謂 腹之需,斯乃飲食之人,與留 賓客,則 集傳》當矣。 (與土相親愛,老而 民之細行耳,以 德 鳧 升堂 事 雁 也 與説 女 「與子偕老」,承飲 歌 人室 則 德何 陽 之勤生,惡得謂之賢? 始信 宜 耶 氏 之, 惟二、三章五「子」字,箋、 ? 嗣。 此 以 以 爲賢,將白 勤 「與 況 不衰 爲 夙 生解之。 夫 燕賓之 寤晨興,止 子宜之」,女爲 婦 也。 酒言,則所燕之 相 色者 1 圭、猗 若末 燕 用 夫勤生者, 樂 皆 相 自 而 章 7.頓輩 [陳古 去 謀 不 則 及 無

傳 瑀、 琚 》、《玉藻》注、《玉 瑀 衝 襍佩 所 牙之類。」「佩 以 以 納 贈 閒。」孔 之, 府》注,合諸説以推詳佩 玉 傳 瓊琚」, 疏引《説 云: 傳云: 文》、《列 珩 璜 佩 女 有

出

於

蚌

衺

係

衡

之

縣

案

《毛

詩

央

於於

末

若賈公彦《 衡牙組之中 **《詩** 圖》、《韻會 梁,下以 保傅 故 著 珩 兩 V 日 所 故 玭 後 傳 》傳 E 衡 同。 玉 H 璜 言 頭 篇作雙 螧 别 横 央, 牙 府 琚 謂 半壁日 》皆從之。 \Box 亦 雙 玭 組 珠 有 組 強 ,步因 略 瑀 又以 使 兩 韓 縣 疏 衡 琚 末 相 則 璜 前 言之 於 詩 「璜,乃《逸禮 納 數 瑀 切。 漢書 佩 又以 同 納 F 二組穿 衡 * 下 後 其 其 於 玉 於衆 垂 之 珠 有 觸 》顔 詳 而 閒 璜 有 , 琚 兩 衡 以 雙 師 不 璜 者 也。 衝 組 葱 古注、 瑀 横 璜, 玉 琚 》記文,見《周 及 頭 納 蠙 牙 縣 衡 故 組 所 與 瑀 琚 其閒。」 ^ 也, 在 於衡之中 兩 衡 魚 繩 蚌 之内 玉 置 E 珩 瑀 衡 了牙、衡 **灬豢《魏** 組 兩 一當於 即 衡 府 有 也 之 之 皆 謂 璜 珩 角 牙。 禮 閒 五 珠 末 葱 疏 略 也 注 未 中 牙 是。 繋於兩 用 二説 又 琚 佩 或以 琚。 牙, 皆 之處,以 上 組 謂 詁 佩 惟 爲 繋於珩 穿珠 》皆 制 下 不 而 賈誼 大珠 源 各 中 佩 較 係 應旁組 瑀 祖其 案 璜 異,黄氏 組之中 名 璜 珩 於 新 物 在 明 中 瑪瑪 守中 上横 其 書》云 又 或 中 居 於 而 閒 亦 組 乃 有 閒 雜 其 則 孔 琚

即

衝

牙。

蠙

禮

云:

玉

一藻》疏

突

前

大戴

禮

云:

制

約

大宗伯

》注··

皆

有

壁

玉

爲

横

名,琚在旁組之中, (説,而: 有 ٠<u>,</u> 置 有 組以 石之可 用 閒 交 矣。 故 琚 在 朱《傳》之言琚 之,故 韻 垂 琚 又以 瑀 佩 貫 E 瑀 中 交納 會 瑀 左右交牽之,兩 玉 於瑀 石 朱子《集 以 瑀 ,旁組之中 閒 捍 組 **>** 珠 爲 納 賈 在 專 兩 珠 mi 貫 蓋 以 琚 Ö 疏 中 其 爲 存 貫 拘捍之,故 E 納 者,非 錢 中 朱 組 之,不 以 閒 拘 元 其 傳 緊 言 捍 之 以 謂 閒。」錢 蠙 瑀 木 × 珩 中。 組 琚 賈 琚 兩 珠 稍 錢 别 佩 兩 言 瑀 下 瑀 衺 疏 組 異。 語 氏 名 耑, 繫 錢 其 繫 之言 皆 謂 所 組 相 雙 旁 本 玉 也 孰 置 以 此 之 詩 爲 璜 衝 交 下 兩

又毛 在 是美石 玉 云: 《詩 物 也。」《玉篇》、《廣韻 衡 ĕ 傳 牙 詩 名 琚, 云 組 「報之以瓊 非非 詁》之説 中 佩 央, 佩 「琚, 玉 玉 名。 不 (琚。)」與 良是 名,不 》瑀注皆與《説 佩 言 玉名。」 今 兩 疏 本《説 得 璜 所引不同。 與 之組 孔 成文》同。 文》云: 琚各爲 疏 中 引《 瑀,石 有 然 佩 説 繫 瓊 則 中 文》 玉 琚 之 次 瑀

以 方曰 云: 瑀 玭 納 美玉 許近古,當以《詩》 琚,大珠 其 珠, 又案 「蒼珠爲 閒 ; 愐 《大戴禮 琚瑀 赤 琚,石次玉。」《三 日 者 瑀。」朱《傳》云: 瑀 以襍之。」盧 曰 琚, • 保 説 傳及《說文》爲 白 琚、 (博))篇 者 瑀 禮 E 辯 各 云 瑀。 注 圖 玉 不 <u></u> 》宋聶 同 Ē 長 或 玭 一宗義。 博 而 總 珠

凡, 會意也。 从 佩、《説文》云: 巾 俗别作珮字 佩 必 有 巾 「大帶佩 ,遂以 巾 謂 之 从 也。从人,从 飾 人者爲 。」徐 服 云 用

> 《玉篇》,云:「本作佩 之稱 从 玉 者 名其 器, ,或从 非是。」 玉 然 一則 珮 字 誤之來 已 見

赛裳 揚之水 蘀兮 狡弃

鄭事 九 計 童》、《揚之水》四 爲作於前立時,以《 案忽六詩,孔氏以《有女同 世 矣,而國人閔之刺之惓惓無已者,豈 七年冬遇弑 子當 月 忽 奔 ,殆不謬也。 兩 鄭 爲 衞 詩二十一篇, 立,而 君 其 其繼以 不克 前後 始 篇 以 忽之立而即 令終, 山 爲 在 桓 桓十 有扶 其六篇皆爲 作 位 + 於 五 不及三載,事 故 蘇》、 車》、《褰裳》二篇 後 年五 年 獨 立 六 出 加 《蘀兮》、《 時。 月 奔 月 憐 歸 忽 也 立 借 非 今合之 为 而 是 至 以 至 與 作。 狡 ? 其 年

得擅命 内也。 後立 多惋惜之情。 在内也。 子、近小人,主弱臣 節 復見弑也,因惡高渠彌 裳》之思見正,皆汲 能恃宋以 大援,或當時有賢方伯 忠愛之思,千載如見矣。 人之執祭仲也,釁 無自萌矣。故《山有扶蘇 四詩,其作於忽之未弒 使忽能 ,與忠臣良士共 然則 竊國矣。 韶 未弑, 用賢 立二詩,其 起於外也。 專, 故《有女》之刺 去姦,斷 汲於外援也。 故多憂危之語。 圖 加 起 孤 立無 或 不能去也,禍生於 而正之,則鄭突不 作於 》諸篇刺其遠君 政 制 乎? 輔之事 威 使結齊昏,有 則 福 忽之既 臣 辭 忽之歸 既 權 下 香,《 奔,故 ,所憂 詩人 之逆 臣 奔, 不 而 褰

有女同車

舜,凡卉也,而屢見於經。《詩》「顔如

紀其 舜華」,喻其 言華有光 櫬 貴,名朱槿。 佛桑,音轉也 名赤槿,其華深紅色,大如蜀葵。」 或云白 音 時 褪。 日 也。 1椴,赤 豔 其 照 《爾雅 華 色也。《月令》「仲 嵇含《艸术狀》云: 有 日,如東 日 亦 赤、 櫬 有 也。 赤、白、黄三種、赤者尤 别二名 白 海扶桑樹也。又名 單 種之異者名扶桑, 葉、 日 夏木堇榮」, 千葉 椴,音段。 「朱槿 之殊。 日

山有扶蘇

用 臣 矣。 龍 本平正明簡,康成不用其説,分首章之興 肖易位,高下失宜,山、隰之不如也。 皆艸 一之失 扶蘇、 後 儒争出 也,宜於隰。 所,次章之 橋松, 新 皆木 説 以 也,宜 興爲養臣之失所 勝之, 反 介喻昭 一於山 總 公用 不 如 人,賢 荷 傳義之 華、 傳 製 八爲 義 不 游

之鳥 嘉穀 詩 喻 當 后 人託 君 彻 子 妃; 而 而 興,正 7,荷 原 興 興 鄭 淫 衞 華 狼 易 佳 亂之事。 君 不 傳 含 植,不 如 及 之意 潤 夫 此 而 拘 應 儗人於倫,未可 11-興 也。 喻 爲 周 小 兔 扶 公; 王鴡 人耳 絲, 蘇 小 良 鷙 雉, 木 藥, 殊 鳥 以 耿 不 不 律 介 mi 知 應

忠良 亦 굸: 喻 以 以 鄭 何 洵 當 美 用 説 得 美且 Œ 舍失 同 ,狡童訓 好 並 是 都 子 都、 開 妍 也 列 文義 都 當對言,正 然 也。」箋 媸 昭 子充指 則 毛 爲 公 有 都 差 子 哉 以 君子小人之喻,次章子 云 貌 殊 血 都 ? 狂 無 君子 美别 乃 亦 狡 「閑習 實 一敘 仴 閑 未 目 ,狂 所 一首 則正言之。 婦禮。」此 習 昭公,失之矣。 杰 謂 訓 章 且、 禮 善。 爲 「所 子 法之君子 閑 狡童指 美非 都 篇 今案, 習 狂 都 於 兩 美」也, 字 且 小 禮 前 充 章 ',義 詩 狂 篇 訓 鄭 傳

> 姣。」《 狡爲狡 又作 篇 蓋佼、狡、 毓 貌 小 與 且 昌, 白華》箋「妖大之人」、《釋文》云: 無 人 疏 申 次 乃 之 姣。 實 箋 章 佼 愚 亦 陳 獪,是變詐之義。 别 妄 訓 云 好 與子 . 姣三字,古 也。 例 無 貌 狡 月 也 知 ~ \ 爲 充誠 出》篇 之 然 此狡,狡好之狡。」下《狡 狡 釋 小 又充爲充實, 鄭 好。 僞 人 文》 以 「佼 相 通爲美 狡 \wedge 對 亦 굸: 人」,《 齊 二者 爲 義 是 . 狡 Œ 好 亦 還》篇 好 是 言 正 釋文》 義 佼, 可 故 相 真 m 通 亦 反,君 誠 本 非 箋 訓 矣。 亦云 妖,本 作 之 又作 喻 爲 云 童 妖 義 語 孫 有 子

本元 義 明明 作 Ш 是 槁 有 破 與? 字 橋 松, 然 不云 鄭 讀 「當 爲 槁 作 松, 槁 釋 贵 爲 鄭 枯 所 槁 之 見

蓼。 據 游 陶 龍 隱 傳 居 云 别 紅 録 肿肿 ×, 也 則 紅 陸 與 元 馬 恪 蓼 以 兩 爲 艸 即 也 馬

璞云: 蓼,而 鼓,即 是。 小,炊炒初爪切,熬也。 本草》言蓼有七種,水葒又在七種之外乎? 士呼爲 云: 案,水葒 墨記 甚長大。五月采實、《詩》稱游龍。」 水 「馬蓼生下 即 葒 艸 也。」又云: 蘢 華淺 亦 古也。」蘇 有 濕地,莖斑葉大,有黑點,方 兩 紅 可食,亦蓼屬 成 種。 穗,子 「葒 頌 其最 圖 生水旁, 如 經 一酸棗 大者名 **>** 也。 以 如 陶 蜀 郭 馬 而 爲 蘢

蘀 兮

字連 應 也。 爲羣 倡和之常理以正之也。 讀,然傳義勝矣。 ,言倡者當是予,和者當是女也。 如箋意,則 臣 叔兮伯兮,倡予 相謂之詞,言女倡矣,則我將和之 「倡」字當略斷 和 鄭之君臣 女」,傳以 康成之意,徒 了予和 不 爲 相倡和, 君 女」三 箋 責 以 臣

> 荀林父爲伯氏,宣十五年。 鄭 案,《 以 不可施於臣 べ属 叔伯 公謂 左傳》魯隱 乃兄弟之稱,當是羣臣 原繁爲伯父,莊十四年。 乎? 公謂 公子疆爲 安在叔伯之稱 叔 一自相 父,見 晉景公謂 謂 五 耳。

年

狡 童

相反。 也。 曰 : 之稱,箕子曾以目紂,亦不自《鄭風》始 矣,何嘗疾之如 不 「雖」代「維」,又横增入「未至」字,與詩意 -知詩 憂之至不能餐,不能息, 晦翁意主排敘,故 維子之故,使我不能餐」,朱《傳》釋之 「子雖見絶, 之刺 忽, 寇讎乎? 非惡 未至 而 曲 於使我 刺之, 護鄭 《辯 説》云。 忠 乃 忽。 不能 愛 憫 見《辯》 惓 餐。」以 而 至 狡 惓 刺 説 之 ĪĒ. 童 甚

9

形 狡 諸 度,此正 《童》、《褰裳》二篇 筆 世 爲《鄭 士所 每 展卷至 不 風 《》傳 忍 出 墓 此 諸 書 滿 1,輒 蕩 紙 欲 不 婦 皆 掩 淫 知大 目 角 媟 尤 之談 儒 る個 何 耳 穢 以

寒 裳

鄫城 水。 委。 之 潁。』《漢 鄭 地 th 名 名 或 彻 水 又云 北 在 脜 今案,溱,《 # 密 西 也 主 毛 縣。 詩 鄭 • 鷄 末 傳 地 縣 絡塢 ・親宋 馳又音愧。」 三月上巳,士女祓 $\dot{\exists}$ 止云水名,箋、 理 洧 西 「潧 記 (説文))作潧 北 作《國 水 下 》洧 與 亚 出 東 洧 地 mi 語 水 潁 南 補 食 亦 Ш 音》 流逕賈 注 溱、 同。《 陽 云: 其 疏 Ĕ 云 溱 城 除 洧 亦 水 復 Ш 水 於此 「芣騩 出 「潧 未 溱、 小經》云 東, 城 桂 詳 潧 音 陽 西, 洧 水 其 水 北 又 浮 非 隗 又 # X 出 源 幐 鄭 鄭

童

至

一於曲

洧

則

新

汲

縣

之洧

也

杜

注

굸:

今

額。」《 與? 中,由 異。 之 年 北 鄶 又 云 歷 又 南 餘 左 1伐鄭 其下 洧 鄭 東 南注於洧 食 合 调 馬 水 下 大水, ?。」《水經》又云: 茅城 也 酈 南 嶺 溱、 H 滺 水經 斯二 西 注 過 Ш Ш 水 .積 洧 北 長 調 邑 其 一水者, 龍 其 水 》言 逕 人 又東過 即 東 社 成 陽 又 郛 鬭 鄶 成 《詩 ımi 此 北 北 南, 城 洧 + 敗敗 於時 潭 城 出 洧 又 七年 Ш 水 西,謂 又 》「溱與 左 其縣 又 其 其 大 廣 乃 發 門之外洧淵 一會承 東 東 南 城 徒兵於 四 而 晉 馬 源 调 调 南 之柳 南 洧 + 潧 縣 以 嶺 與 習 洧 雲 新 小。 許 水 之統 (() 説 流 諸 又 陽 汲 Ш 洧 泉水。 是 步 出 左 東 侯 奔 縣 城 水 文》、《漢 淵 上。 也。 洧 河 名 傳 壑 伐 皆 過 西 東 又 南 分 一,崩 折折 鄭 鄭 北 深 又 襄 史伯 鄭 昭 逕 世 密 縣 難 東 其 自 縣 + 元 鄭 入於 又 縣 謂 注 記 南 測 南 東 戲 南 九 年 城 伙 之 士 所 西

以 應 證 新 린 潧水至新鄭縣 汲縣 遠 爲 兼 良 則 有 離 不 在 治 鄭 謬。 溱水 鄭 都 曲 城 洧 會 縣 城 洧 故 酈 臨 水獨 而 溱 併 與洧水合」,此與桑《經》同 洧 注 並 水。」 目之與? 洧》之篇言 非 流,信矣。《一統記》云 舉二水者,意以 之,以 至 潧 爲 洧 至下文專言 士女祓除 在 合 流 密 縣 洧 桑《 南 水 不不 經 洧 中

東門 則引 此二 其 譏 宣 於《褰裳》,則以 之水》欲指 辯《子衿》以 詞 首 子 東 朱子《 l 敘也。 ,語,而 篇者多矣, 》三篇, 萊 至 語 辯 不 爲 辯《 蓋此數篇者,心欲 爲 皆 以當之,●然東 著 説 淫 詞 云敘 其 爲 》,於《丰》、《揚之水》、《 風 詞 可 意 何 、敘之失,本於子太叔、韓 雨 盡 加 儇 談,而 以 **>** 目 以 詩之文義 薄,夫《詩》之音節 失。 爲 爲 淫 不言其誤 詩 萊之譏後敘,不 於《野有蔓 奔乎? 非 詞 難 輕 之,而不得 通 佻 之故。 至《 也 狎 / 艸》, 出其 暱 揚 似 則

> 淫風大 谷云: 篤 教化 時 事 養 敘 記 鄭俗淫亂 昏 訓 不息、男女相 之亂 未 》「鄭地 不 兄 論 不 不 嫁 確 爲 미 弟 也 可信,班 虚 也。」《 行 爲 專 猶 鄭、 日缺 是 言 歸 Щ 昏 事 當信之, 居 於 姻, 固之書 風 野 漢 衞 棄 偂 斯斯 谷汲 亂離之故,使爲 聲氣習流傳已久,不 合者哉? 多淫 二《南》之義 書 而 此 誠 **>** 後 尤 (男女 以 況 何 有 詩, 然, 可 爲 師 裨 以 笑。 衞 此 風 傳 治 必 亟 至 特 由 有 逐矣。 土 聚 道 미 豈 辯《溱洧》以 據《漢 之習 自乎 上之化, 信 會 之言,縱 民上 作 乎? 詩 語 使然, ? 噫 者 爲 者 耳 鄭 知 地 嚴 敘 兵 乃 其 教 革 不 則 華 以 夫 理 此 由

■「引」,原作「有」,據康熙抄本、大全本、《四庫全書》本

丰

文》: 盛之意耳。 傳 云: 艸盛丰丰 逢、蚌等字皆从此。 丰, 也,從出上下達。」豐 豐 滿 也

篆

作

¥,

^

説

其契、耕等

滿

īĒ

字自从丰, 丰讀 如 介,與丰異。

東 門 之 墠

得禮 室中 蒯 - 之藏 墠 難 平 毛 難 易 親 踐 義本通 阪 以 興 峻 香 難 也。 姻之際 **、登**,行 鄭 以 上 得 爲 之 禮 女欲 . 栗 則 易,不 易 奔男 鐢

詞

,遂爲朱《傳》之濫觴矣。

改其度與?

風

雨

是世 比 服以 崔季 度焉 有心 膠膠 若,不與俗 亂 一日,君子行己之道,祇 來天下奢靡,轉 而 求名, 人無常, 珪等用事 稍貶,非君子 猶喈喈, 0 於矯俗, 傳 以 魏盧欽稱徐邈 瀟 同 圃 瀟 亦非 而 ,故前日 徐公不改其常,故 則 ,貴清素之士,於時皆變易車 爲 徐公有常也。」噫 無 暴 君子 也 所 相 疾 ş 倣 加 之通 日 也。 焉 則 放效,而 得其常而 以 甚 乃今日之介也 世 故 世 於 「往者毛孝先、 亂 敘 徐 之 淒 而 人以爲 云不 公雅尚 亂 己。 淒 加 兹爲不 也 矣。 峻 改其 以 日 通 自 世 甚 是 云

〇四

 \overline{Z} 也。 也。 字亦可作給、縊。 文》又有衿字,云「衣系也」,籀文作縊,則衿 以襟字爲正、衿、裣特通用耳。 作襟。」嚴《緝》謂衿、襟二字音義俱同,非 知《詩》字多通用,不必彊爲之説也。《説 也。」衿字石經作裣、《釋文》云: 小帶也」。《説文》止有裣字,注云「交衽 交領也」。 案、《爾雅·釋器》「衣皆謂之襟」,注 「古者衺領下連於衿,故謂之衿。」不 然則衿、襟、裣三字各一義。《詩》當 青青子衿」,毛傳云: 又云「衿謂之袸」,音賤。 「青衿, 《顔氏家訓 「衿,本又 注 青 云 領

也。」古者教以《詩 嗣音」當以毛義爲正,云: 》、樂,誦之,歌之,弦之, 嗣, 習

毛詩稽古編卷五

則朋友相思之常語,非序意也。

校廢、當責其學業之不習。若以音問爲言

世子》「春誦夏弦」證之、當矣。

此詩本刺學

舞之,孔氏引《王制》「四

術」、「

四

教」、《文王

揚

之

水

矣。 耳。 乎? 售其欺,雖有忠臣良士,奈忽何? 「維予與女」、「無信人言」,慮之深、言之苦 「不與我言」,「不與我食」,則廷女者已 而讒閒又人之,此所以終於孤危也 狡童》、《揚之水》,其一 忽有兄弟而不可據,同心者僅 人一 時 之作

出 其 東 門

茶,傳云「英茶」,箋云「茅秀」,語 異而

野有蔓艸

其毛、 歌 也。 白 物 然古人託 美女顔貌,如茅茶之柔也。」』《集傳》本 又異於毛、鄭,而實 1華也。 同 云「顔如荼」,注: 朱子以茅華輕白 鄭二説,則孔氏右鄭得之。 其 言奇麗白如荼也。』師古云: 喻,義各有歸,正 取 義 又 異, 本《漢書》注。 應劭 傳 可愛,喻女色之美,説 取 不 其白,箋 굸: 必 援彼釋 《漢》郊 『茶 取 其 野 此。 此 祀 邨

字讀 且」、《釋文》云: 義,子徐切者 存 :也。舊子徐反。」合之上章, 毛義在存,鄭義在思也。 匪我思存」,毛以存爲存救, 鄭 、箋以 鄭 爲思之所存, 義 也。 「且,音徂。」《爾雅》 陸 不分毛、鄭,而 則 下章「匪 思 則音徂 應 則 讀 思 芸 者 應 我 爲 别 毛 思 如 去

> 章矣。 之於韓 君之稱 鄭子太叔之於趙 萊疑後敘是講 零露漙兮」,望澤之喻也。「有美一人」, 敘 宣子 也。 云「思遇時」,殆謂 ",昭 玩傳文亦 師 + 孟、襄二十七年。子蠹昨何切。 所益,其信然乎? 年。 無男女慕説 皆賦此詩,未必 處 亂 而思 之意 治云 [《]左 盡 東 爾。 斷 目

溱 洧

春時矣。 涣涣,春水盛也 祖《韓詩》注 溱洧》士女秉蕑、《集傳》以 鄭 云 也 一。」 今本無春水二字。 仲春冰釋,水涣 毛傳 無 明 文, 爲上巳被 則 然 涣 亦 所 然。 以 云 爲

後反爲舊,未知舊指誰家。

香艸 又云 而 爲 川則 一女駢集、《韓詩》之説爲長 淫 泆 非 「男女感春 之 祓 除 行。」言仲 矣。 竊 氣 謂 春 並 出 鄭 則 託 俗雖 非 上巳 采芬香 淫,不 言 應 託 之 無 采 啪巾

蘭。 上品, 綱目》以爲即今省頭 都梁山 萠,毛公皆以 佳,人亦莫珍,而古 故名。」其説 方》言夏月置 王者之香 人最重蘭,《左傳》言其有國香,孔子以 久,遂執今卉以實古名,此不可不辨 古香 女子小兒喜佩之,又名孩兒菊。 謂之水香。 或 ,又名都梁香。 風》, 艸 ~, ~ 名,後 良是。 如《鄭 爲 離 髪 蘭是也。《神農本艸》列 騒》 中,令髮 陶氏《别録》名蘭澤 人借以 人顧 然今之省 咏之尤多, 州,云: 溱洧》、《陳 須女子種之,又名 重之如 不 脏,之力 名他 「唐《 頭 艸 彼 . 圃 艸 澤陂》之 兩 氣 切,黏 寶 相 此 也 《本 **щ** 見 物 經 爲 沿 不 性 也。 驗 啪巾 女 出 於 於 是 其 古 既

蘭艸,失之矣。《吕氏讀詩紀》曰「蕑即今之遺》皆以今之蘭華其葉如麥門冬者,當古之有變更耳。 宋寇宗奭《衍義》、元朱震亨《補

蘭

」,誤亦同。

記》、陳 零陵。 《炮炙論》劉宋雷敦著。 爲蘭 已辨之矣。 證 色,或一莖一華,或 與二蘭而三焉。 華、赤白色、成穗。」又有生山 也,小澤蘭即澤蘭 莖素枝,赤節緑葉,其 蕙、蓋誤 》、陳 香是 **भ** 蘭 艸與澤蘭同 止 正 始於 莖微方、 齋《 敏 也。 盜 黄 遯 後 蘭 其日 齋 Щ 節短、葉有芒者爲澤蘭 也。 人以 説 閑 谷。 類 一莖數 》、方 云: 並 覽 而 蕙者,今之苓蘦或誤 嫩 葉長 園、節 × 然 小别,俱 時 虚 熊 朱 公華者 「大澤蘭 可 谷《訂 晦 似茅,華 太 中者名山 '佩,八 長、葉無芒者 菴《 古 彊 生水 蘪 冀 離 九月 名 即 旁,紫 黄 越 騒 爲 巓 蘭 有 集 辨 蘭 緑 фф 作

07

是 問 風 藥 藥 艸。」東萊 不 香,華不 藥當之。 華乎? 仲 + 歇 以香艸 注 фф 華 春 傳 |引《月令》|「靁 非 艸 乎 第 與焉。 云 則 所 爲 勺 ? 五 朱 謂 否矣。 以 集傳》以 候,恐亦非 佩 藥 香 傳 解 勺 不 無 蓋 \forall 亦 鄭 必 香 藥 況 佩 以 嚴 詩 在 始 氣 欲 贈 上 爲 也。 香 發 緝 \equiv E 柯 今之勺藥, 其 治 啪啪 非 、聲,下 》皆 葉, 月開 久, 被 又王 往 是 除 故 柯 從 往 疏 力 華 時 有 砅 葉 其 以 引 取 勺 未 豈 藥 音 殆 安 之 其 陸 説 属。 審 藥 艸 與 據 得 香 柯 璣 榮」, 鄭 閩 之 有 雖 葉 然 今 云 素 勺 勺 中 勺 之 古 何 婑

> 爲 勺 藭 經》云「 根 而 土 北 藥 稍 江 者 女 Ш 離 並 别 爲 相 夫蘼 經》 細細 稱 靡 洞 也 贈 云 蕪 庭之山 葉 蕪、芎藭,本與 容 董以 繡 又案 似蛇 既 或 Ш 結 以 勺 ,勺藥之名 牀 之。 根 ·藥爲 艸 艸多勺藥、芎藭 者 者 多 爲 爲 案 江 薮、 江 , 蘼蕪,是三 穹藭,大 離 兩 離 本 蘼 或或 見《 艸 同 蕪 非 類 Щ 葉 注 勺 誤 **→** 海 坤 而 似 言 藥 經 芹 中 經 司 未 芎 與 Ш 類 者 結

之類也 離 宋 雖 蕪, 葉 董 屬 似 氏 臆 因 蛇 名 别 見 牀 江 録 韓 然 而 ***** 離, 詩 <u></u> 云: 香 江 **** 芎 離 離 騷 藭 香 艸 人 蘼 祌 語 苗 取 見《 爾 也 遂 以 雅 90 爲 疑 離 恊 譬 勺 騷 説 隱 藥 文 則 居 亦 是 並

作

云

蘭

江

毛詩稽古編卷六

吴江陳處 人士啟

其立 言周烹哀公,不言何王,惟徐廣以 無失德,受譖烹人定是暗主。 然哀公烹後立弟胡公,胡公於夷王時被弒 作。」孔疏申之謂: 王之立,王室遂衰」,明是懿王受譖矣。 言懿王時詩人作刺,或指《鷄鳴》 正懿、孝 一必非夷王時。 詩 ,而夷, 君當三 夷王之前有孝王,孝王 《公羊傳》及《世家》但 懿 王烹哀公,變風 王, 《本紀》稱 諡 而言。 法 爲夷王。 》,保民 胡 且 懿 始

> 二年。 鼎。」徐 《譜》應不誤。又案、禮記》疏 年》 皆證據之顯然者,不僅 表》亦以哀公當共王世,胡公當懿 猶爲疏也,不應更後矣。又《史記・三代 公、癸公及哀僅四君,較 後歷昭、穆、共,至懿 伋逆子釗」、《左傳》楚子言吕伋事 先儒所取信也。又案、書・顧 非 耆艾曰胡」,知胡公歷 檀弓》「比及五世」 詩》疏異,意彼有舊文因而未改耶 夷 Ŧ 則齊丁公伋與周 廣 「夷王三年,王致諸侯,烹齊哀公於 也。一孔 應本此爲説。 此言當 疏 凡 年久矣,益 康王 言夷 如 五王,丁公後 矣。 其世次,以哀值 然《紀年》之書,非 孔氏 同 王 案,《汲 亦 時 命》「齊侯吕 烹 所云 出 康王 明 也 哀 孔 王世,此 烹 也, 手, 冢紀 歷 昭十 康 哀 與 懿 E 年 圃

鷄

鳴

之時 設 君之怠惰,不已 待再告,再告又 度促之不起,至蟲 又自言警戒之故,與上二章 以爲立言之次第,非真有兩度 朝,朝已昌盛,則君聽朝。」《玉藻》云: 君夫人可以朝之時 日 爲 此三告」, 此警戒之詞 傳云: 鷄 鳴》 次章 「 鷄鳴 可 不起 甚 謂 耳。 而夫人作,朝 飛 乎 不 集 傳云: 時又促之也 參活 ? 待三告,夫人誠賢也, 傳》 首章舉君 夫詩 百 此 句 盈而 東方明則夫人纚 亦 矣。 「君 人 君作。」次 語 夫人可 再 陳 時 Ħ 告 也。 出 古 語 告不 二,末 面 刺刺 視朝。」 末 以 非 今, 笄 章 起 章 起 兩 IIII

也。 本命 蟲亦可 》篇稱羽 古人飛走之物皆可名蟲,《大戴 名鳥、《夏小正》丹 蟲 、毛蟲、 介蟲、 鱗 鳥 蟲 白白 倮 禮 鳥 指螢 蟲 是

> 之節。 翔 飛,其鳬雁 蟲 與 鄭》、《 蚊 而弋之。 孔 蚋 疏 齊》 是 皆 也 之屬 以 兩 君 與夫 爲 ^ (鶏 乎? 鷄 羽 鳴》 鳴 人人,豈 蟲 觀之,可 理 Ž 羣臣早朝者 蟲 能 或然 飛 貪 同 定古人夙 矣。 ^ 桑 夢 也? 柔 或 羽 **>** 之 Í. 蟲 興 翺 晨 飛

還

不從。 音義 矣。 公」,而云「四歲 騶虞》、《伐檀》、《七月》毛 獬 **>** 《夏官》注先鄭引《 傳云: 同。 「還》篇之肩,《七月》之豜,二字形 其云「一 然《齊》 豕 歲 日 三歲 「肩」, 傳 日 豵 궁: 與《 豳 日 豜。 》詩 歲 詩 潤 焉 》傳 日 亦 則 = 特 作 戾 似 歲 故 故 獻 微 則合於 日 肩 有 肩 異 後 鄭 于 别 而

0

宁 東方之日 東方未明

故時 如《商 耳。 如以 五年。子夏作《詩》敘,又在其後。遠乃六七百年, 在宣十年壬戌,至哀十一年丁巳孔子反魯删《詩》,凡百十 詩時世,近者百餘 號 定是刺哀公。 未審刺何公。 所刺之君。 所指,固 衰」、《東方未明》敘云「刺 諡 爲舉 ,君號諡或著或略,不獨《齊》三詩然矣。 源謂孫説良是也。孔子删《詩》,去作 宁》敘云「刺時」、《東方之日》敘云「刺 頌 何得闕 無 》則千年矣。 F 孫毓 容悉知。 明下,則《魏風》七篇、《檜風》七 其 且言子夏 孔疏以 所刺? 以爲自哀至襄,其閒八世, 年,《詩》止於陳靈公,靈公之弒 敘者存其信,闕 典文放失 此三詩在《還》詩後、 作敘時 此特 無節」,皆不斥言 舉 當知 必 上以 多 7,美刺 其 明下 齊君 疑,

> 《補傳》言《詩》敘亦考其 世,而太史公亦不能爲世家,信夫。 篇,敘皆不斥言何 久,并其史而亡之,故聖人不能知其 君 何 嘗 人於史,魏、檜 有 E 篇 口 詩 明 爲 亡已 乎? 何

宁

曰: 耳」,黈,黄縣也,《宁》詩弗 雜綵綫爲之,君五色,臣三色,即今絛繩,詩 華、瓊瑩、瓊英是也。 紞爲充耳,又誤以纊爲紞矣。 於紞,以黄綿爲之。《漢書》「黈天口 玉瑱,瓊華等爲佩。 素、青、黄是也。此鄭義也。 「充耳以 充耳,瑱也,君以 纊 外又有纊者 縣 瑱,所謂 玉,臣 縣 頭以 毛以素爲象瑱,青 所 以 及焉。 紞 紞 石 也。」是誤以 以 都 爲之,詩 縛 《集 切。 感 瑱 切。 纊 而 傳》 黄 充 織 瓊 屬 爲

東方之日

明 也。 而 未 援古刺今之詞耳。 日 融 月 ,取義甚迂。 君 臣 之 象 也 此 傳義。 東 方, 鄭 明 以 東 盛 方爲 之 時

東方未明

故敘 刺哉 莫」, 然與《鷄鳴》之警、《庭燎》之問 云前 則 未 明、 有 時 無節」。 未晞,皆言早 失之晚 蓋太早、太 矣。 ·也,末 詩 互文 晩 何 章 殊, 以 兼 云不 相 有之,不 而 備 以 夙 也 爲 則

不可 云 爲 不能 「不能時 藩 犯夫 辰 節 夜」,傳云: 無守 此夜之漏 不 能 察 刻也。 漏。 辰, 時 敘 柳 謂 木 也。」 挈 柔 壶 脆 疏

> 字爲 耶? 氏 不 能 晨,云晨 抑有意耶 掌 其 職 夜之辨 ? 正 指 此 甚 明 朱 而 傳 不 能 改 知。 經 文 誤 辰

刻,孔 箭之説 氏 銅鳥,引水 七日疆半而 氣分爲二箭,周 浮没不 謂 「箭各百 挈壺之法,孔 氏 亦亦 謂: 同,大槩則一 漏 據 而 刻,水淹 水 易一箭焉。」此 唐 下 「浮 壺 制 歲二十四 注 内, 箭 而 疏 浮箭 刻 言 壶 以 據 一。」信 則 内 没 爲一 而 周 以以 氣 刻 然矣。 上 刻也。」 禮 漢法 爲 爲 出 登, 四 度。」《周 注 刻 十八箭, 則孔 陳 也。其 謂 爲 氏 度。」 氏 唐 謂 禮 》疏 定 浮 制 賈 來 每

南山

也 }° |≪ 内 冠 緌 則》 雙止」, 注 궁: 《説文》云: 「矮,纓 之飾 「矮,系冠 也。 疏 纓

而 垂 \overline{Z} 未明 結 纓 額 集 下 傳 以 古 訓 冠 爲 冠 結之餘 E 飾 者 襲 散 而 》注 下

然詩 其 與 字 訓 又 而 詩 丹」、《駟 于 有 敘 明 美 爲 思 分好 爲 是一,故易之。」不知美 人 其 則又有其 權,云「勇壯也」。 云「陳古以 其 宣 頌 鬚 才 驖 指 人 也 君 髮 美 年 》之「舍拔 儀容,與美異義,何 往 好 且 往 政也, 鬈則 容貌 語 風」,故三章 鬈」, 訓 及之。 爲 偲 證 與 則獲」皆是矣。 毛 爲 才技 疏 云 則 《終 多 又 申 兩章 鬚 雖 有 - 皆 是 鄭 南》之「顔 非 其 以 美德,首章 嘗 意 而引《左 意 好 美仁之比 容 美 謂: 複 貌 乎? 也 德 《集 矣。 _, 爲 偲則 如 鄭 一傳》 主, 傳 況 渥 此 傳 好 破

> 也 貌 鬈 不云鬚也。 云 '。」《釋文》、正義 鬚 義 思 引此詩 字 本《説文》 也。 也。 **企**左 且合「于思」二字爲 與毛 又 傳》 (案,《 耳 《説 傳稍異, 載 杜 説 賈逵注云「白 注 文》云 文》云: Z: 而義 鬈, 一于 亦通 義 一偲 好 頭 思 非 貌 貌 多 彊 偏 不 力 釋

敝 笱

然于 已卒, 言歸 有三: 歸。 即 朱《傳》以爲 嬔 者。 ^ 於 歸 則 不得言 敝 詩 彭生之手 時 符 于歸也,歸 文姜如 文姜淫 言「齊子 **>** 刺莊公,失之矣。 篇 歸 敘 寧。 齊 以 詩 行 歸 寧也,大歸 始於桓 爲 未 何 止」,定指 又 惡 得 著 非 魯 責 也 見 末年 桓 其 出 末 案,女子之歸 也。 微 防 **一**,不 于 耳 年 弱 閑 歸 ·, 時 如 得 舍是 而 是 無 云 僖 以 疑 也 大 爲 無 桓

既 矣。 歸魯刺之,旨深哉 敝於彭生乘公之日,而敝 自安,勢不得不畏内,養成驕婦之惡,已非 盛 媒介,自會齊侯于嬴,以成婚文姜。 諸 刺 愛女,於其 與與 失考證,義味亦短 朝,特於晚年發之耳。然則笱之敝也,不 侯 哉 詩人探見禍本,故不於如齊 見討, 文姜之 蓋 嫁嫁 急結 嘗考之矣。 ~ 驕 也,親送於讙,則嫁 逸難 婚於齊,以 制 《集傳》 魯 可 桓 於子 知。 固 弑 其 以歸爲歸 君 量逆女之年 桓 位 刺之,而於 自 既 時 故 立, 又僖 恃 扈從 齊 不 惟 之 以 公 由 恐

板切。 慈損切。 盈 魚 然案《本 車 同 者耳。」事見《孔叢子》,正義引之。 嚴 而 稱,非甚大之魚。 **深**緝 而 艸 稍細,大者三四十斤, 一大,頰 鰥 魚 似 體 鰥 鮎 似 音 與 鯇 私。 筋 衞 而 人所 触又名鳙魚,又名鰱 而 腹 色黄 平 公釣,偶 斯語 頭 又 鱗 似 良 性 得其 似 鯇 果 餺 華

> 魚。 敢 善 鱤者,敢也。 吞陷 故 又名 鮥者 鱤 音 哨 感。 也 魚 則 又 定 名 非 鮥 敝 音 咯。

載 驅 所制矣。

五日 也,解甚明易。 協,翱翔、游 雅 開 不妄也。 發夕」,毛云「自夕 亦。 • 圛 釋言》之義,云: ,古文作悌。 訓爲 齊子豈弟」,鄭箋「豈弟」作「闓圛 況此 開 敖 明,本《 公字義 詩 朱《傳》訓夕爲宿,恐未安。 賈 (達以 四 發 相 一章 洪 今文較之,定爲圛 協,篇 「愷悌、發也。」郭注 至 範》稽疑之文,卜 發夕、開 旦, 法 謂 當 明 乘 爾 文義 夜 矣。 引 合《 而 此 兆 詩。 行 爾 又 相 有 音

猗 嗟

俱美。 指爲 連 故 揚。 眉 末章「 揚。」此詩三揚 此 婉,好眉目」,總上清 抑,美色」是也。首章「美目揚兮」,言目 廣 得 抑 也 顙」爾。「抑若」者,美之之詞 揚,顙之别名也。 眉之美,一字而 揚 因 爲 猗 清揚婉兮」,清 稱 義 謂 案,《 毛云「好目 雅 嗟》詩言揚者三,首章「抑若揚兮」, ,次揚字訓 目之上下皆 三揚 鄘 釋 一爲顙,二爲眉。 風》 訓 實一義矣。 揚眉」,著揚之爲 疏 云 彊 爲目之動 指 云: 曰清,眉之上下皆 揚 分三 毛訓 目,揚 言也。此二揚,皆 一義焉 猗 《集 廣 一目 嗟名兮, ,惟末章揚字 揚,猶《易》云 指眉。 爲清,眉 傳 顙即眉上, ?》首揚 也,毛云 眉 毛云 目 也。 L 字 E 爲 揚

魏變風

技藝之可名。

瞽説 《左傳》文。 言 因《 儒 則莫得而詳也。《大全》載 霍 以 楊、 左傳》襄二十九年。 矣。 魏 + 韓、魏皆姬姓。 武 所 五國之魏,鄭《譜》以 富 有 王 封,爲文王子畢 辰 畢 封 歷數文、昭十六國,僖二十四 畢 無 故 公高 魏 也。 知之。 晉叔 於 畢 一公高 齊 史記 劉瑾 其 爲 語 後 爲 與 云虞 之後。」此 語 絶 . 何人之後, 周 曰: 「先 封 魏 同 號 世 姓者 焦、滑 庶 真 年

丁切。 今《詩》「名」字,乃是「顋」字之通用,與名字 爲名。」毛公釋《 本訓不相涉矣。 案,名字亦作類 眉目閒也。 詩 朱子恐其驚俗,改爲威儀 **>** 詩》「猗嗟類兮」。」然則 《玉 亦 同。 一篇 蓋 **>** $\frac{1}{Z}$ 古 訓 相 顛 傳

莫

如

此。

何等 寓目 也。 妄 封 魏 詩 其 不 爲 封 伯 截 -畏後 在 侯。 世 語 於 然 於 ,遂爲七國之魏 車 》、《畢命》 、又受 本不 「學》者, 言畢 此二書與《尚 魏 魏。 乎? 先 於 右 兩 長 或 書,可 又言 儒 人撫掌乎? 可 安 國 在 足辯 保 與 而 知 此 也 縣 中 乃妄以 伐 釐 晉 諸 也 特 西 或 謂 不學至此。 魏 之命,《 篇 聊 成、 滅 村 北 無 其苗 或 紀 魏 公 而 紀於此 學 事 識 七國之魏 書》 康 見《左 滅之, 其 在 始 畢 究 矣。 又謂 時 書 皆非 又具《左傳》及《史記 事,皆稱 夷 村 裔 因 畢 |傳》杜 萬 畢 狄 爲 修《大全》者,又 先儒言之,不知 瑾 近世俗下書有《魯 以 因 降 公以三公爲 _ 顧 僻 畢 萬,仕晉 爲 注。 語 食 見《大全》之詒 晉 命》、《 不 伯 書也,瑾 十五國之魏, 畢公,則 mi 采 爲 厂,成 言 魏 傅 焉 大夫,復 在 封 會 王進 獻 康 魏 河 一曾未 其 後 公以 東 王 不 東 世 謬 爲 録 是 之 方 分 改

> 誤 後 學 不 淺 也

叔 封 夏 駘 與 世 同 、芮、岐、畢 ? 已有 周 姓 詹 魏國 豊 桓 伯 滅 丁,其 吾西 日 彼 . 來 耐 土 舊矣。 封 也。」《左 我 此 自 鄭 如 夏 《譜 一傳》 成 以 E 昭 后 之 云 九 於 周 唐 則 以

君 刺 敘 云 在 此 刺 儉也。 詩 云 : 儉 未 貪 个,其事 Ē, 必然 不 疏 中禮 國 謂 未可 魏 國 數 也 魏 相 「削,小 之世 侵 者, 縣 風》 反,故 悋 削 定耳 》七篇 必不貪乎? 嗇之人,往 次無 役 民 鄭 無 于大 前 考,其 於 所 左 五 容。」 或 方 往 篇 爲 中 況 好 刺 \wedge 此 + 分 利 儉 君 畝 陟 後 爲 無 篇 詩 之 岵 厭 二篇 未 閒 君 數 嘗 敘 安

葛屨

音,惟嚴《緝》辨之。同。則讀如銛。二字音稍别,今人槩讀爲銛廉反。則讀如衫。纖、《説文》息廉切、《釋文》然摻、《説文》作攕,所咸切、《釋文》同。惟徐邈息然摻、说文》作攕,所咸切、《釋文》同。惟徐邈息

案《西京雜記》言武帝宫人搔頭皆用玉,後之」是女手整治之也。「左辟」,女至門之儀之」是女手整治之也。「左辟」,女至門之儀之,是女手整治之也。「左辟」,女至門之儀之,皆指婦人耳。《鄘風》傳云:「揥,所之佩,皆指婦人耳。《鄘風》傳云:「揥,所之佩,皆指婦人耳。《鄘風》傳云:「揥,所以締髮。」疏申之云:「以象骨搔首,因以協髮。」疏申之云:「以象骨搔首,因以以稀髮。」疏申之云:「以象骨搔首,因以

是丈夫而釵矣。「楴枝,整髮釵也。」《集傳》謂「大人佩揥」,豈揥之遺制與? 揥字又作楴、《廣韻》云:世詩詞亦有玉搔頭之語,搔頭正揥髮之義,

汾 沮 洳

《緝》引曹氏語辯之甚悉,以爲藚非澤蕮,其 蕮之説。 説當矣。 郭、陸之言,吕《記》、朱《傳》亦因之。 澤蕮。」蓋明以陸《疏》爲非也。 如續斷,寸寸有節,拔之可復。」不用陸 牛脣」,郭注云: 疏》,不爲置辯,亦疏忽矣。 也。」孔疏引郭璞《爾雅》注 「言采其竇」,毛傳: 《爾雅》别有蕍蕮,郭注 「《毛詩》傳曰「水蕮 ,又引陸璣《 案《爾雅》「蕢 「蕢、水蕮 孔疏 - -惟 兼存 也」, (艸木 音昔。 幾澤

粛 有 桃

爲 或 豈 也。 重 非 也 譏 非 興亡,而 國 斂 含 敘 小 ,是謂魏之侵削 知本哉? 可 小而迫」、「日 有 信如斯 朱子《 鄙 爲 又辯《伐檀》非 而 mi 在 訓 仍 無 小國不 司 位 乎 襲 政。」 辯 何 言 ? 其 君 説 敢 意 夫無 子 則德教之有 然《集傳》云: 必 貪 ×, 以侵削」二語,其餘 何 專 殘 自 於《園 刺 敘 政 因 至 彊,大國 不 貪 者 甘 或 顧? (,《碩鼠》非 有 Œ. **小**,不 有 心 知 無 無, 困 桃 恐 德 持 不 窮 無關 由 教 妨妨 敘 論 ? 未必 詩人憂其 於 之謂 自恣矣, 如 刺君 皆 非君 獨 於 無 此 心 國 德 以 取 、 然 也。 贵 服 乏 好 爲 其 教

文也

毛傳反之,疏

以

爲

傳寫

之誤。

案

Ŧ

多

艸

木

岵

無

艸

木

峐

屺

同。

此

爾

雅

,餘皆小棗 《詩》言 [棘多 也。 然惟《魏》「園 除 楚薺 有 青 棘 齫 毛 詩

王

傳 Ш 棗 即 案 出 此 爾 滑 棗 雅》「 臺 矣。 者佳 《神 樲 故 酸 農 棗」, 以 經 氏 **>** 其 列 郭 於 縣 注 焉 E 云 品品 「樹 小 亦 名 實

陟 岵

毛説, 《卷耳》之崔嵬 博 故 岵 云。 肅 爾雅》非 述毛 土 景 不用,恐 皆與《爾雅》同 又《釋名》、《説文》、《 帝 見《孟 殆姑仍 子 者 事 也。 也,其 子題 非 武 朱 傳 解 與 劉 意 帝 注 文之 (岨,及 瑾 則誤 屺 終 而 乃 毛傳得 岵 孝文之世《 舊 軍 謂 此 在 耳, 玉 亦 辯 毛傳 詩 爾 篇》、《 依 豹 自 屺 非 雅 文 河 岵 無 爾 真 之書 艇 爾 間 疑。 廣 雅》,《釋 見 朱子俱用 鼠 雅 獻 韻 傳 後 又案 E 亦 是 E 出 文 在 记 獻 тí

 \wedge

武

+ 畝 之 間

其民, 非 故 説 滅 無 也。 衞 獨 理。 淡機 魏 而 小 此得 其無理,以 然矣。 然孔 男 此言良 敘云「言其國 女渡河者七百人, 地 疏 陿 是。 已 民 爲 有 稠 晉 説 國 者 削 取 削 矣,古者 小, 以 陽 則其 民 樊 民皆 民 有畏 而 民隨之,敘 無 侵 出 所 不 寇 其 依一、《 隨 其 地 而 民、狄 乎 内 則 地 文 人 虜

意。 十餘 致 地 水 H 迫 經注》言: 里,北 蹙 隘 魏之褊 故故 耳 國,漢之 非 去 著 小, 7 首 地 「其 河北 由 勢 Ш 畝 使 逼 + 城 之詩。」案,酈 近 然 餘 縣 南 彊 里 也 也。 西 處處 鄰 今平陸 若 面 河 屢 魏 皆 見侵奪, Щ 語 君 距 縣 之 能 殆 河 屬 閒 非 廣 僅 解 以 州 其 詩 土

伐

之,豈

以

此

爲

限

哉?

德教,開

拓

其

疆

宇

則

踰

河

越

Ш

皆

得

而

有

檀

干, 言河水清者,獨 河 矣,何必 清,取義必 意 河 水,不專指河干也。 當如 ΙĖ 雖 《伐檀 謂 濁 此。 置 而 取濁水 在是。 一 檀 在 泂 於此 河之干 以 此 一句, 圃 濁 耳。 若指隱居之地 詩三言之,豈無 加 顯, 毛 者則清。」不 以 《詩》咏 至言清 傳 而 清名? 以 此 河 詩 河多矣,並 清 H. ,則 漣 興 意 董 章 知 則 明 平 皆言 氏 詩 言 君 統 言 河足 日 舉 其 詩 洄

解 力 用,雖欲自食其力而 伐檀,本 也 集傳》釋《 不素餐者,謂 爲 車 伐 以 檀》 行 不 不 陸, 詩,判 爲 可 得」。 其 今河 事 爲 則 水 此 賦 不 清 體 語 食耳 謂 吾所 漣 無 非 不 所 用

毛 詩稽古編卷六

毛詩稽古編

計。 彊 乃實 謂 苦伐木 至「不稼 一釋爲美君子, 爲 事 以 其 矣。 爲 爲 事 不穑」 興 之。 而 天下有此 體 仍 猶 既欲自 四 不 詞 一句, 食 費 F 也。 而 託 以 愚 食其力,不 意 言耳。 刺 而 明 晦 貪言,本 不情之君子哉 矣。 知 車 以 無 爲 應作 甚 賦 所 明 體 用, 此 捷 ? 是 拙 何

雅》 李 用 貊 云 貊之譌 貉,今作貊,音陌,北方豸種也。 義較古矣。 文》云: 時 》語 珍 鄭 安 形 此 貊 箋云「貈 IE 得 本 狀 與 釋《 誤 分 帅 與 貆,貉之類。」 又劉楨《詩義 貛 爲 信 》反 貉 詩》 同 劉 兩 子 而《説文》以 異。」案,貉、 謂 İ 貆 説 潤 今狗 字,安 矣。 名 貆 爾 ? 貛 雅 其 兩 況《伐 問 義 也。 **>** 劉 訓 〈得譌 説 崇云 本《 貆 獸名者本作貈, 貈 貊 説 不 爲 彼 檀》箋 子 本 爾雅 非 哉? 同 貉類 見《 貆, 也。 字,本 貉 而 **%** 故 埤 引《 李 子 貆 近 《説 雅 爾 世 爲 又 乃 日 作

> 뾜 胡 桓 此 名鑵。」耳,非 官 一,徐、郭音晅 乎 説 切 ? 耳 不 貛 貛, 即《 知 呼官切。 貛 貆 ,《爾雅》釋文音丸 爾 也。 乃野 雅》之貒 豕, 又案,貆、《釋文》 一字音形各别,豈 亦 音 見《説 湍。 注云: 文》。 云 豚 也

中。 皆同 又十 今億、惠二字皆作億,此隸楷之變。 此 恵加 萬之名也。 胡 字,字从寓从心。 取禾三百億兮」, 人爲億,安也。 三百億、 百 億本作意 **声**,快也,从言 三字皆於力 億、千億 、萬 滿 切 也 从 億

唐變風

之惡 宗國之罪。 晉 ,故不稱 大全》載 噫 晉 瑾 而 魏 劉 稱 所謂君 風 瑾 唐 首 語 調調 晉 晉 子 詩名唐,見武 又 者 君 見 子 何 獻 欲 人 公滅 絶 耶 武 公滅 公於 同 季 姓

得 爲獻、武二公詩,僅《無 耶 是稱 二十二年。 何 亦數其思深憂遠,有陶唐之遺民。見《左傳》襄 以爲 於唐 於晉 唐之名,昉於帝堯,而爲晉之本號,未嘗 未必 也。 也。 後歌 札 弗之思 兩 1 觀 風之次第名 晉爲唐,乃以美之。 有 則 也。 如 即 以 樂 唐 至於《魏風》七篇、《唐風》十二篇,其 堯之遺風。 無 瑾 使 一字寓褒貶,《春秋》教也 時 也 則 仲尼欲 所 所謂 唐 語 借 晉之稱唐、唐之 繼魏、晉 詩 不 邪 ,況魯樂工 V 稱 . 謀 未 ? 絶 詳見下條。 ,專爲二公而定耶? 而 武公,何獨靳一 經 稱 合, 蟋蟀》敘 删 唐定 衣》已下 定 瑾 可 所 也 以 見古 繼 吴季子聞歌 歌 自 爲 魏 論 E 仲尼之筆 然 四 刺, 義 非 稱 爾 ,非《詩》 已 篇 不 晉名,而 唐之故, 耶? 先 何其 耳 仲 誣 歌 尼 也 唐, 下, 亦 魏 瑾 悖 劣 又 教 筆

蟋

蟀

理。 之儉 亦太 朱子漫不加察,合刺 特附見《蟋蟀》敘耳。 敘又 憂深思遠,儉而用禮,有堯之遺風。」此 經文 章前四句,云「以禮自娛樂」,指後 (唐風) 以 儉 愚未敢信 諡 據此 反過 鹵 人 云 八正相 得之」,殆深文耳。 蟋 奢,而 莽 而言,不專目 蟀 於初,而民之俗猶 矣。 語,是俗 合。 此 變之漸 刺 也。 晉也, 且其 朱子 僖 之既 古人國 敘 詞 僖爲一 必由 謂 圃 一詩,與刺 文句 説 日 謂 其 奢者,必不 必有 之唐。 敘 相 奢示 上及下。」今謂 「風 顯 事 知 反, 云「及時」,指 然,非 用禮 本, 而 儉, 俗之變, 不 僖 譏 本 朱子 一、恐無 之,讀 口 全 能 難 其 四 或 無 知 解 句, 風 復 統舉 譏 涉, 也 俗 也 儉 是 示 君 常 書 與 每 爲

由

禮 褿 染未深 IF. 一合如 ,堯之遺 儉 此 故 何 又 猶 風 常 何 知 也 疑 惟 用 焉 禮 僖公始爲 E 之 且 化 以 耳 規 非 切 禮 唐 之儉 其 民 L 儉 事 然 而 理 俗 用

古詩云 促 民 説 以 詩》,《玉臺 敘「儉不 閔之」也。 八爲 É 、《文選》十九首 俗 如 西京時人 漢傅 勤 此,敘義 儉 中 |毅《舞 新 傅毅,明 禮 蟋 夫 詠》 作也 蟀 同。 勤 有 賦 傷 以 本、 **※**云: 儉, 昭 局 爲 帝 哀之,傷之,即 可 此 明 促 美 枚 時 知 時 列 乘 人。 德 毛學 哀蟋 矣。 於蘇 局 作 也 古詩 促 9 朱《傳 未 蟀之局 之義 李 乘,景 何 行 前 亦名《 可 7而《詩 敘 云 促。」 帝 所 以 則 正 局 爲 雜 謂 龃 時 亦

逸《詩》云「 月之交》篇 職 思 其 職 云 居一, 競 職 作 競 羅 傳 由 」,襄八年。 云 人 左 職 傳 晉范 主 鄭 也。 宣 子 子 駟 ^ 青 + 引

> 字爲「 失之。 其憂, 職 其 居 廢其 皆 章思其居 句 自 戎 在 而 云「顧念其 職 人憂者, 矣。 法 相 職 訓 憂,憂又 云 謂 思其 職 戾 也 多 主。 謂 言 所 而 夫 經 事, 矣。 破 思思 思其 居 語 語 居 碎。 主 之 字 在 思 之 ൬ 職之所居」,則 本 漏 謂 歐 云思其 者, 思 其 可憂之事 極 職 更思其外。」 渾 洩 主思 ^ 陽 豈 外, 外 也。 成、《集傳》既 而 大全》 言 氏 則 成 也, 至 其 解 È 語 憂,不云 職 文 於 其 文義 所 本 當 汝之由 憂 輔 職 理 憂 外 居 如 亦 思 又 乎? 也。」此 氏 之事 不 即 例 謂 似 以 其 此 日 思 啻 其 所 職 訓 爲 外」云: 若 . 徑 所 而 襄 非 職 誤 職 職 義 爲實字, 亦 述 + 憂 庭。 思 實字 之外 不僅 任 爲 在 職思 四 改 朱 也 也 之義 主,復 年。 居 況 而 其 也 也 在 E 其 不 思 思 愈 故 職

《爾雅》云:「瞿瞿、休休,儉也。」蓋儉

是有 休 瞿 休,樂道之心。」 静 瞿 爲 而 瞿 節制 蹶 瞿 囂浮, 蹶皆形 而 、蹶蹶之效,誤矣。 所 休休爲恬静之義, 樂道 容良 以 爲 則 儉 士之心 無 也。 欲 耳。 毛傳云: 亦儉 良士之心 輔 意 廣 也, 以 休 休 與 恬

山 有 樞

相合《 此襲《 析,故治誤 爲句耳。 枌, 榆白 東門之枌》毛傳云: 白 《説文》 釋木》。 一,粉。」 隰 榆 榆 有榆」,朱《 《説文》 也。 白 於《集 孫 丽 枌 枌 此文當 炎 誤 也。」 既 用《釋 云 也。 傳 傳》 白 **%** 於 於《東門 |以||榆| ^ 「粉,白榆也。」解 木》 爾 榆 然《 榆 雅 成 白 之白者名 榆 集 「榆,白粉 語 安得又白 之粉》 傳》 釋 爲 而 木》 句、「 於 不 也。 此 枌。」 日 加 云: 枌 分 於 IE.

可

枌乎 但 謂 ? 是陸璣之誤,則《艸 蓋 亦弗之思矣。 木疏》並 嚴《 緝 無 辯 此 此 語 甚 當

誤記 許爲陸乎? Ш 有栲」, 疏 引俗 諺 云: 樗、

或謂 謂 中, 橓,式閏切。 爲春秋」者,又名橓。 也。 漆, 綱目》云: 榦栝柏」 也。俗書爲椿。 陰之役,孟莊 Ш 茹 樗 亦 相似 之栲櫟。」此特 **櫄乃杶之或體、《書》作杶,《禹貢》「杶** 與下田樗無異,葉似 虚 山 樗皮粗,肌 是也。 大,爪之 如 樗不名栲。 椿、樗、栲三木同 一。」案,栲,山 椿 子 ^ 皮細,肌實 斬雍 椿本别一木,即《莊子》所云「八千歲 今俗誤寫 左傳》作橁,襄 如 虚 據 腐 而 栲葉 方 門之橁 朽。」 白 俗 燻爲 如 差狹 其 類 語 樗 而 陸 椿, 櫟 葉臭。 耳 以 而微分、 也。 赤,嫩葉 元 假 耳。」然 爲 十八 可 恪 而 栲之爲 樗,臭 公琴」是 爲 不 亦 栲 年「 歸 車 香 陸 生 本 云 久 又 山 甘 草 矣。 平 櫄 Ш 栲

ρú

徐鉉 樗,《 聲,苦浩切。」陸《疏》云「許 此切 阚 説文》栲作 雅 非 許 毛 傳、《 意 矣。 概,云: (説 文》皆同 《詩》栲字 慎栲讀爲糗」, 从 不不 木 協 尻 誤 杻 若 也 陸 刀 切。 語 則 又

揚 之 水

濟,輕 側 非悠揚矣。 經注》云: 狐 突遇申生處。」觀此 唐 津 風 無 • 揚之水》謂涑音栗。水也。《 左邑,即曲沃也,秦改名焉 緩,故詩 「涑水白 人以 左邑 益信揚水是激揚 爲)城西 急 揚之水。 注,水流 水 水 急

皥 釋文》胡老切,《玉篇》、《廣 廣韻》又云: 同字,皆爲白 説 文》無皓字, 1色義。 「四顥, 而《玉 \sim 今作 唐風》「白 篇》有之,與 : 皓。」是與 韻》音 石皓皓」, 亦同。 (顥又 皜

> 亦誤。 皆同。 作鄰,嚴辯之甚悉。 厓石閒粼粼也,从<

> 从

> 器

> 聲。」

> 《

> 玉篇》、

> 《

> 廣韻 言深く以之水會爲 く即畎字, 公即澮字。 同 **粼粼」,从以,不从**似。 字。 廣尺、深尺爲く, ^ 今《詩》本惟 韻 會 以以 皓 爲 石 **///** 餘本皆从似,監本注 果 廣二尋、深二仞爲公。 經及吕《記》、嚴《緝 也。 《書》「濬畎澮距川」, 《説文》: 老 切 《揚之水》「白 不 知 「鄰、水生 何 流 石

椒 聊

I 陳氏、吕氏 升,云古升 匊之大小。 ·陶人》疏引《 椒聊 上徑 》毛傳但 亦言二升日 宋董 小爾雅 氏 了引催《 寸,下徑六分,深八分。 言「兩手曰匊」,不言升 匊。 集 注 案《周禮·考 一以以 爲匊大於

升之數僅得積方五百二十二分有奇,不能 兩龠 得二百分。 石。 據董引《集注》之言,以立方之法計之,則 二分容一升之數,所言相符,當不謬也。若 六千分。平方一寸積方分者百,二則倍之, 十寸,容一石。」據此,容一升之量,立方一 匊 寸積方分者千,十得萬,六得六千,爲 之説應本於此。又《考工記・桌人》疏云 匊。」宋咸 粟米算法,方一尺,深一尺六寸二分,容 升, 一龠,多寡 爲 也,積一萬六千二百分。」正合十六寸 也,積一千六百二十分。 縱橫十截破之,一方有十六寸二分,容 豆。 注 長尺、廣尺、深二尺五寸爲古斛法 百六十二寸,容一斗, 千六百二 굸 豆 《律吕新書》云: 四 相縣,始不然矣。 知半升。」與 升。 今《小 (賈疏 爾 雅》云: 所引不同。 「合龠,爲合 十合爲升,二 又案,近世 兩手 陳 一萬 謂 容 吕 之

視今稍 法,每升多八千二百分,此 五,爲方分者二萬五千,較賈 + 是 寸,每 每 石 積 古爾。 升積方二十五寸也。 方二千 若三代嘉 五 白 1 每斗 量之制,則賈 雖 疏所引 云古 方 積 寸 方 斛 粟 者 米 百 特 算 疏 Ŧi.

綢繆

近之。

得之。 鄭矣。 時。 以 而 春爲昏期也,毛義不易矣。近儒李氏 毛以季秋 非鄭 爲 既 鄭 毛以三星爲參宿 援 以 得 又此詩 吕《記》主鄭 **以據典** 至 爲 `昏姻,夫 確。 孟 心 本刺 春爲昏期之正,鄭 宿,歷舉其 星 婦相語,尤非 香姻 而 斷 兼 宜 舉 失 毛,朱《傳》則 指 失 昏 時,而朱《傳》反 [姻之] 參 時 一,華 以 詩 E 則 爲 意。 谷 有 期 專 刺 辯 從 專主 以 以 ,是毛 如 仲 刺

之詞 此 夕」句, 此 必如本。 解者,殆因越人《擁 良 也,安在 人 爲 何 嘉美之談 孔疏 明 其 是 ハ喜 辯之,理 欲 而 耳。 見 自 楫 I慶乎 而 歌》用 殊 不 不 哉 得 知 見 此 引 詩「今夕何 朱子 無 詩 口 斷 之爲 奈 何

不

自

長

矣

形 似 鼎 之耳。 立。 ,三星鼎立。」此瞽人之道黑白 心三星,正 鼎 足而 《大全》載 立者, 似 連 图 珠,雖 如 瑾 織 女、 語 小 胃 曲 耳 宿之形 然 心 不 宿 口 之 差 謂

當 逅 本 日 云不 言 案《説文》,不 此 亦作遘。』《唐》 經文必 獬 義矣。 期 亦 逅, 鄭》之《野有 作 而 有 會」,《 .觀。 而 ^ 不 (唐) 期 兩 同矣。 此 傳 而 唐 釋文云 詩「 釋 會 了字形 章 》傳 之,義 是 艸》、《唐》之《綢繆》, 見 邂 此 鄭 - 互. 逅 邂 異, V 解 各 釋文云: 本訓 逅 説 邂,本亦 不同 略 之貌 指 口 昏 鄭 見 《鄭》傳 姻 》詩 者 作 「 近 , 也。 解。 皆 Œ

> 殊, 以 會? 昏 文》音「蠏悦」,其義則箋、疏 女,皆夫目婦之稱, 而 韓詩》云: 上下章傳義推之,良人爲 和説,豈指初昏之狀 姻 亦足證此 之 宜毛公之别 禮 必 「避覯 邂 相 逅 約 與《 爲 面 則此 不固 鄭 釋 後 也。 》詩别矣 與? 章義 成 之貌。」 美室, 豈 傳 應相 俱 미 無 釋 解 雖 言 粲 發 類 文 説 不 與 者 明 <u>_</u>, 又 毛 期 解 爲 載 義 緩 釋 竊 而

閒 世, 並 判 刺 父弑之,亂 云 綢 爲 昏姻失時、父母 不 何 「晉始亂 明是 $\frac{\cdot}{\Delta}$ 君 ~ 昭 綢 諸 公詩,殆 刺 流以其 繆》、 亂 篇 昭 斯 後始 口 公。 《杕 甚 見 知 昭二年。 爾。 非 在《 作。 杜 矣。 又言「 莫養 也 椒 》、《羔裘》三詩,敘 昭公時 聊》、《鴇羽》之閒 然 昭 ^ 鴇 也。 鴇 昭 公之 在 羽》非 羽 公之後, 未 位 成 シ紋 文 僅 至大亂 師 , ~ 昭 七 云 乃 公詩 左 年 「刺 昭 大 傳 公親 致 亂 迨 時 不 民 潘 雖 則 槩 五

外, 後 後併 言 失時、父母莫養者 也。 叔 則 一、二君之世。 父,昭公又以 義 於曲沃。 昭之後, 固 所 無 謂 不 同 通 歷 父、同姓 也 綢 孝、鄂、哀、小子、緡 曲 沃 此時晉亂 繆》以下四詩, 而曲沃 孔 封之, 疏誤. 自 目 E 不 解敘意矣。 已久,容有 其君之近 在 得 晉 爲 當 君 薄 五 作 五 其 君 宗 屬 服 香 於 最 之 姻 族 而 而

杜

雖異 依 寫,妄減其筆 目 也。」無依之人多傍徨驚顧 鷩 義實相通矣。 視 獨 也 行 瞏景」, 景字 畫 引此詩。 耳。 又毛云: 从 今詩皆作景,俗人傳 目 袁聲,《 與與《 「瞏瞏,無 说 説 文》 文》云 語 所

不 伙焉」, 嗟行之人,胡 兩 胡 不 不 非 比焉? 望 訶 乃 人無 決 詞 兄弟 也 胡

> 惟 臣,朱以爲 助 説 外 人,胡不來 萊 他 得之矣。 求飲助?」《逸齊補 釋 毛無傳 ,不害於文義乎? 人 決 此 不 詩 輔 意 求助於行路之人,意 相 謂 若甫言他 助 當 親 我 |如|| 比 ? IE 他 鄭 凡 見 傳》解 人 其 以 如 人 不 爲 不 미 無 如 此 如 求助於異 恃 忽 兄 亦 同 異 弟者,胡 與吕 則 又 父 而 望 行 也 誤 同, (姓之 其 路 相 之 斯 不 東

羔 裘

究爲 其 不 雅》李巡、孫 究究,猶居居。」是二語 與民 困 傳云: 窮 是 相 極 窮 親 人 極 八之惡 是不 炎注,以 人也 居 居, 狎習也。 因 居居 説 衍 懷 究 其 悪 究 爲 意 不 意 與 不狎習之惡, 用民 궁: 也 相 傳 親 異, 力 疏 比 懷惡 面 而 之 引《 不 阚 宵 憂 而 究

之心。」斯與窮極人者異矣。 勝。《祈招》詩云:「形民之力,而無醉

飽

鴇羽

之。 豈得 不 爲 世 而 併數昭矣。朱子初説 作《無 數也 Ŧi. 無 世 緡在位二十八年,視 鄭箋以 鴇 **彩** 一,此非也。 衣》之詩,不容言晉亂者反闕 羽》敘云: 昭公、孝侯、鄂侯、哀侯、小 又滅緡之後,曲 敘既 ,不數昭 云昭公之後,自 昭公之後, 前 數 沃 而 君 武 獨 數緡,最 公始 久, 大亂 緡 繼 其 不 晉 而 時 得 應 侯 五.

也,从匕从十。俗本寫作七十者誤。鴇音保,从鳥上聲。上,博抱切,相次

同。 黍與稷、 黍、稷與 粱與秫 、梁、秫苗 穗 葉 粒 相 各 似 相 似 而 穗 而 與 性 之黏 粒 不

> 漢以 其 其 與 疏 土皆食之,呼爲小米。 極 粒 粒 不 後 長。 奴 買 同 亂 分始 切。 稷、粱以爲飯,黍、 粱之黏者爲秫,一 稷之黏 以名粱之細粒 也。 者爲 又古以 黍 粟 而 爲穀 秫以 莖 莖 短芒者。 數 之總 爲 穗 穗 酒 而 而 名,自 堅壯, 今 北 散 猶 杭

無衣

此 矣。 子,猶勝於 他人」云爾,此 斯旨,謂是敘者 其臣之意,此孔氏之善讀敘 之意美之耳。」蓋 乃大夫見請 至「豊 敘云: 爾、汝,亦 日 云 詩 命之事 美晉武 以 一云,猶 人句調之常也。 武公本 爲美、從 詩 因 公也。」 贵 人稱謂之常 無 而 敢 而 可 咏述之,非 也。 疏 美,美 愛之」、「 譏 云: 之,亦 朱子 稱 之 也 天 子 豈 弗 者 即 已 其 爲 無 況 固 究

此 ,無乃兒童之見與? 詩上之天子,求其 錫 命 也, 謂 爲 倨 慢 無

禮

有 杕 之 杜

況不求乎? 求賢之道,當如此矣。 致其誠,外 恥立其朝,譬猶特生之杜,人罕託足,雖内 繼《無衣》而作乎? 卒,其兼有宗國 而惟恐其不來也。 武公以莊十六年命爲晉侯,至十七年 盡 故 其禮 僅一 云「噬肯適我」,望君子之來 「中心好之,曷飲食之」, ,猶恐不足枉君子之駕 武公以不義得國,賢者 年耳、《有杕之杜》其即

葛 生

葛生》篇嚴坦叔定爲悼亡之作,而 以

> 況次章之「于域」固可爲死亡之證,而 然與上章之「于野」及葛蒙之棘楚一例語 猶《大車》篇之「同穴」,不必死後方可言也。 耳,不必目其 之,此非也。 次章之塋域及末二章之「于居」、「于室」證 之「錦衾」,獨不可爲生存之證耶 「蘞蔓于域」,傳雖以爲 大夫所 葬 也。 「于居」、「于室」 **塋域**

采 苓

鄭 案,「爲言」毛無傳,鄭云「爲人爲善言以 字釋文有平去兩讀,而以本或作僞 俱通也,宜《釋文》之兩讀矣。 孔疏申毛、 善言」之爲當平音,則經文爲字平、去二音 薦之」,據此文義,「爲人」之爲當去音,「爲 ,俱從定本作僞義,於經文雖 《采苓》三章,皆兩言「人之爲言」,「爲 可通 爲非。 稱

解耳。
云:「王肅諸本皆作爲言。」但未知王作何安,相對成文,則讀「于僞反」義優矣。 疏鄭意也。竊謂經文「爲言」與「舍旃」一譽一

於理。 行 苦、苦味惡 乃其釋君,此甘苦並進 葑,葑味上美而 申生事證之,謂: 失,莫大於殺申生一事。 居曲沃,此甘言也。 彊於君,此苦言 則苓,苓味美 《采苓》刺獻公,《逸齊補傳》 其説三興義,亦曲 也。 下惡也。 終則甘苦之言並 也。 也。 「工讒者始以甘言投之, 繼夜半 繼以苦言動之,譬則 又請 也。」案,獻公信讒之 而 用以 驪姬始 中。 君老而授之政, 而泣、言申生將 實此詩,頗優 清請使 以 進, 驪 申生 譬 姬譖 則

毛詩稽古編卷七

吴江陳處士啟源著

公之後,亦誤

公卿、 侯也。 諸侯,故得有之,似矣,然非直此 官者,疏謂 亦云「大夫視伯 襄公始命」。 大夫、士、《 車鄰》敘云「秦仲始大」、《駟驖》敘 是秦仲尚 附 庸,雖未爵命,自君其國, 始大,國始大。 」,秦仲爲宣王大夫,自當備 禮記》謂之内諸侯、《孟子》 未爲諸侯,而得 始命,命 備 也。 寺 王 猶 人 爲 朝 若 之 諸 云

風》。 修因 事 夫侍御、僕從、豈給使令賤役者邪? 侍御、僕從,罔非 人之令,《詩》非 及《左傳》爲證,見傳命是其常 告,不過使令賤役 書》,皆始於此,故聖人録《車鄰》 以 其 閬寺守門,古制也, 議論 爲 、語,遂 後 雖美,然非《詩》本旨。 世 刑 極 以 餘 論之,又牽合繆公學箸人 正 耳。 爲 爲 人,今秦用寺人爲失。 刺 周、召,法律爲《詩 也。 欲見國 車 鄰 嚴《緝 **** 職。 疏 君 引《燕禮 者俾之傳 以 謂 然則 冠《秦 楊 三代 用 寺

寺人之令」,毛云: 「寺人,内小 臣

又朱子《辯 雖君其國,未必有寺人矣,疏語 禮樂,無疑 加 次國之制 和之、謂大夫不得有寺人、此詩疑作於襄 非 説 也 復 》以《車 況詩 附 庸 之舊 以創見故美之,則前此 郷 》非 『,其有 秦仲 車馬、侍御 治未 詩 劉 盡 瑾 從

Ξ

車

鄰

秦變風

意也。 矣。 耳。 通 豈 孔 細 也 人官》所 謂 之官也。 非 小 疏 可 裁去「非謂寺人」四字,是引疏 此詩朱《傳》襲用毛傳語、《大全》亦 之 唐 注 寺人即是内 疏申之云: 哂已。 乎? 於下, 又横 臣,即今内小臣之官也。」吁「 屬内 [改「是」爲「今」,夫孔氏 《唐書 先儒之語,經其剪裁,便致不 一小臣,與寺人各一官,故辨之 而節 示 一寺 其 ·百官記》未嘗 臣 語 人,是 一之官 曰 也 在 「寺人是在 内 蓋 細 小之臣 所謂 有内 而反 禮 今, 其 引 小 謬 内

駟

士「媚于天子」、「媚于庶人」,又如文王四友)使君 公之媚 臣 和 子」,毛、鄭 合。 疏 申之謂 釋 之 謂 如 能 以 卷 道 SII 媚 》古 於

> 義矣。 嚴 美稱 耳。 之稱 能愛 傳釋爲「諂諛之人」,惡 嬖當之,其舛 衆心者,與之圖謀國 要豈無一二智畧之士,可以宣道德意 愛之人,蓋以秦廷未必有大賢,如孔 有 亦嬴之雋也。其臣雖 詩》,是刺 氏 疏 也。 人 ,惟《書》言「側媚」,乃 然襄公復世仇,興祖業,始 此 附 加 ",皆能 解 案,斯言得之。《集 己。 也,非美也。 不 尤甚。 惟 和 其 合 昧 日子者,王 他 於《 事哉? 以 人, 不及疏 嬖臣 詩 其側,非 況《詩》篇媚字多 使 \forall 以 相 理,且 從 肅 至嚴《緝 附、吉士之賢, 傳》訓 側 親 獵 以 惡 列 爲 爲 加 於諸 媚,故 其 罶 著之 疏 爲 卿 不 》以 和和 媚也 於 所 大 僅 所 侯, 字 FL 爲 於 輯 夫 稱 親 便

注。五臣多謬誤,不足信也。 後 儒 謂 載 以 獫 輶 歇 車 驕 載 犬,其説 載 始 也 始 一,始 於《文選》張銑 犬、馬皆畜 試 習 之也 逸 毛異, 獨 名,以 以證 犬本 雅》釋《詩》、《書》字,音義 驕从犬,以合毛氏 集傳》又引韓 此 ,亦不成文理。 二字因 古。 以 何此 車 能 載犬,所 嚴《緝》引《補 走 二字 毛而 見 愈《畫記 長, 必欲合毛乎? 以 改 歇其 耳。」此尤 乎? 何 反 傳》謂 心為據 騙 用 同 其 逸。 加 馬 釋《 爲妄説。 後 形異者甚多, 力 詩 阚 載 況 世 歇 雅 歇 亦 之 事 驕 沙改 其 閒 恐 乎 非 \wedge 爾 歇 ? 與 難 驕 犬

小戏

征 不休 有 戎 患 戎 功,十二年伐戎,至岐 之時 尤劇 是 戎 世 也 矣。 爲 《小戎》敘所 秦患, 幽王亡於襄公之七年,秦救 襄公奉天子命 加 襄公時 謂 而卒,此數年 西西 周 乘國 戎 有 驪 方 彊 Ш 一之禍 中 征 好 周 伐

> 之本。 收其 矣。 之鋭 余,益國十二,遂 至七世孫穆公,用 力碎也。子文公始敗戎 然襄公以 心,終身不 成功耳。 義興 尒小 能平 霸 内史廖之計 戏》一 師 西戎,自此 戎, 民 () 收周 方 心樂戰,故子 詩,實 張 之寇, 餘 戎 取 秦業 民 弱 其 M 信 而 謀 有之。 興 孫 難以 秦 臣 盛 得 疆 由

切。 之戍 惟馵。 歲也 足。」《易》震 郭所謂 戎》詩「駕我騏 名馵。」今郭 云 又唇 切 从 爾 馬 直 一左足白,馵。 雅•釋畜》有二馵: 馬,一絆 膝 名 絆馬 埤 注 馵 上皆白 卦「爲馵足」是也。 無 雅 者 馵」,毛云「左足白曰馵」, 也 此二 **>** 也。 其足, 云: 从馬 爲 語,蓋 惟 案, 馵从 孔氏《 讀 馵,後 以 如 音 傳 躁, 《詩》疏 弦 圍 寫逸之。 馬 左 徐 回 故 又墨,馬 膝 ,二其足, 脚 也。 上皆白 引郭 云 白 絆 象回 户 者 其 直 則 小 注 而

三四四

明。 馬絆 爲義 厥 也。」蓋繁即唇之重文。 又案,今《左傳》唇作繁, 而稍 其 執 足, 為馬 不同,音形 讀 前。 如 軱 成二年。 徐 亦别、《説文》辯之甚 云 陟 此三字皆以 立 杜 切 注 左 絆 傳 馬

之,韔 皆見《左 又名鞬,又名弢,「右屬 邁》二詩。 約之,則又納之韔中。 抑鬯弓忌」是也。 弓有韔有閉,皆見《小戎》。 以 韋爲之。 傳 又名韣,「授以弓 僖二十四年,一 閉 又名櫜,見《彤弓》、《時 狀 報字 橐鞬 如 《弓,約 亦作鬯《鄭 韣 」、「伏弢 哀二年。 見《月令》。 於弓裹 閉以竹 晶 風 血 亦 既 爲

柴。」然則閉、靱、 注 一注引 引此 毛云: 詩作 此 詩 製、《儀禮 皆 閉 作 秘、柴四字,文異而 柲, 紲 也 又云: ·」《考 • 士 喪 工 禮》、既 「柲,古文作 記 義同 弓人》 夕

> 從之。 如《釋文》切, 文》、《玉篇》、《廣 縢 《釋 文》云 則宜 韻 讀如澂 直 》皆徒登 登 切 俗 一反,與 作澄。 縢 吕《記 字 同 音。 説

子,不應此 但上二章「温其 鄭指君子言,朱指 勞。』《集傳》云: 載寢 章獨異,則箋義優矣。 載興」,箋云: 如 「思之深,而 玉」、「温其在 念君子者言 「関 君子寢 起 義 邑」皆言君 居 皆 不 미 興之 通。

蒹 葭

也。 復變 以 下 諸君, ,下迄漢、唐、宋,終不能復文、武之舊 雍,戎 自襄公不用周 周 丽 爲戎 變戎 狄之墟 狄, 狄 也, 而 禮 一用禮、一 爲 周、 以 周 成 秦皆 風 襄公以 俗,秦遂終於 不用禮之故 興 焉 下 諸 公劉

説 論世, 之棄禮,僅《蒹葭》一篇及之,又全篇託 葭》詩,著千古世道升降之大關也。 語意深遠,必得敘而始明,此讀《詩》所以貴 用禮,詳見《豳風》、二《雅》、《周頌》諸詩,秦 **久則胥化而爲秦**,安之如故矣。 襄公實爲 西京文物,驟見襄公之棄禮,故 終不得此詩之解。 而 論 罪首矣。 世之不 可無敘也。 此時周之遺民,猶及見 朱子不信敘 夫子録《蒹 異 ൬ 但周之 刺之, 興,

終南

名亦互通 木,但楸葉大,榎葉小,畧異耳,故生於山者 也。』《爾雅 今之山楸。」是 有 條 也。 ***** 有 陸《疏 梅」,傳云: 「槄,山榎。」 木 ·而異 》謂 Щ 名 楸亦如 也。 音 條, 賈。 楸、榎 下田 槄 注 云 音 本 叨。

則楸、條、楰三者,亦同類而稍别與?其釋「北山有楰」,又謂楰爲山楸之異者,

辯,見《總詁》。此非似杏實之梅,有器物皆佳,良材也。此非似杏實之梅,有高十餘丈,大者數十圍,氣甚芬芳,爲梁棟、生南方,似豫章,其樹直上,童童如幢蓋。生南方,似豫章,其樹直上,童童如幢蓋。

亞,與「亞夫」亞字異。 王《玉 黻。 誤。 案,「亞」字亦誤,當作亞,古弗字,因謂之 字,無音可讀,非戊己之己。」斯言當矣。又 之曰:「黻之狀亞,兩己相戾。」案,「己」字 吾友楊令若旭。云: 見《漢書·章賢傳》師 篇》。 黻衣繡裳」、《集傳》用孔氏《 則 此字上下 兩畫,當中斷文作 古注, 「當作己,不成 又 (書》傳 見 顧 野 釋

黄

鳥

罪 然諾 主之所爲,應 良迫於君父之亂命,不能 聽 待人迫而納之壙邪? 諾,及公薨,皆從死。」竊意此三人者,定是 此樂,死共此哀。」於是奄息、仲行、 云: 歸 穴惴栗之言,是康公生納之於壙 良,爲之悼栗也,箋語甚明,朱《傳》謂 詩》敘專罪穆公,信是定論 其 當从末減。 」,恐非是。 自殺,則 不苟、俠烈輕生之士,何至臨 臨 「穆公與羣臣飲酒酣,公曰: 其 穴,惴惴 亦不 爲首惡 《史記 若穆公要人從死,乃昏君 能 其栗」,言秦人哀 無 ·秦本紀》正義引應邵 也。 罪。 但康 以 左 、義决从違、雖 公不特爲禁止 要之,康公與 傳》文六年。 班 固《敘 穴惴栗, 『生共 罪 鍼 此 虎 觀 有 《傳》 及 暴 許 有 臨 所

> 晨 風

罪

穆公要人從死

,亦得之矣。

稱

田

横

義

過《黄鳥

 \forall

劉

德以

爲

黄

鳥》之詩

見 曰: 濟。 叮 以 公之業,棄其賢臣。」非 **詒笑於諸侯**,非自取之乎? 秋,見擯於中國。 林,信有之已。 里奚、蹇叔、公子縶、公孫枝之徒,謀 戎,亦嬴之雋也, 目 爲 康公棄賢 然傳謂賢 其夫哉? 婦人思夫之詩,夫「君子」之稱,豈 穆公 「子無謂秦無人。」見文十三年《左傳》。 雖 介有 不 人歸之,駛疾 爲 康公嗣立,秦業遂衰,終 人 而得士力爲 盟 而 士會之歸 主, 不 用 無稽之談也。 然 也,卒爲 寘 如晨 敘云: 多,如 也,繞 晉 救 風之人 晉 荆 由 朝 所 余、 朱子 志 臣 謂 獨 霸 紿 北 穆 之 春 濟 可 百 西

駁 也、《易》疏獨取王義,則字當作駮 毛傳義。 馬 雜 註同《雅》,駁註 隰 駵白,駁」,字从爻。 馬。」 能 義 疏 有六駮」,《 》義 食虎 同。 字从交。 駮、 則《秦》、《豳》二字俱 駁 別,取 青白駁拳、网 宋衷云: 易》「乾 金音同 ^ 爾 其 云「馬色不純」,亦與駵白 稇 圃 雅》 至健。」則《秦》之駮也,此 爲 風 形 》「皇駁 「天有五行之色,故爲 駁馬」, 異,義 「駮 兩字並見《説文》,駮 如 通。 馬 亦 馬,倨牙,食虎 王 其 赤白 、異。《 一廙云: 馬 《秦》梓榆 , ,皆雜色 秦 爾 風 雅 駁 相 此

無衣

爲民自述其 人之常情 無衣》詩敘 在 好 爲 戰 君 以 兩 者 爲 意 務 刺 相 廣 其君 反 土 地 好 夫 戦、朱 不 樂 生惡 恤 民 子以 命 死

> 乎? 情不相協。 時兵 則 事之可考者 之獲,始以好 秦俗雖勇悍,要自 好戰或有之耳,謂 與晉遇,殆 怯乎? 夫不 也。 戰成 樂 九 論世,何自知 鬭 朱子又 風, 商君變法之後 乎? 敗 民 春 而 自好戰,豈其 秋 詆 不樂鬭 勝耳, 世未必 小 敘 詩 情 以以 乎? 利 秦 然 哉 民 爲 於首 情 也 果 與 此 哉 詩 實 勇 其 虜

之絝。 與正 以 脛衣,今之韤也。 非絝矣。 爲 裁足覆胷背,又名鄙 義皆引《説文》云「絝 與子同澤」,鄭箋以 劉、許皆漢人,未 古人上衣下裳,不用今 澤爲 檀, 也」,劉熙《 知 、孰是。 又名 褻衣、《釋 羞襢 又絝 釋 名 文 訓 則

其民 易以 晦 翁 重厚質直 此 成 無衣》篇、《集傳》極 言,乃趙宋 富 彊 後 ,周用之易以 世 建國者 代之習見 稱 宜 爲仁義,秦用之 雍 定 州 非 都 土厚水深, 萬 焉 世 一之通

弱

,故宋世

謀

或

者

É

以

爲

憾

論

巾

祖

嘗

欲

都

關

中

而

不

中

推

爲

奥

品

神

皋。

殊

不

知

古

則禮樂 率交 地 果 不 論 彊 邑,豈容執 帝 氣 減 其 刑 弱 王之興 口 後 惟 土 政 於 堯 稱 漸 一俗也。 了,反 秦 Ŀ 羡 致 所 之 各 晶 削 旨 應 或 公與 身執 之後,首棄姊言,又背 故 不仁,必 於宗國,繁之謀 二公子之仁、不 一,得 先置 哉 愴 馬,母 然 於秦,姬 如 ",故詩 夷吾 益 孔 母 氏 願 思 之 申 復 本 重 以 宿 而 耳 之,深中 送 死 呂 母 菲 心,知之深矣。 之仁。 争以 舅之詞 利 秦 顧 姬 於 弗 施 之 人 晉 釋之。 當 共 及 閉 願 登臺 時 見 知 也 而 事 糴 情 之。 敘 詳 口 履 以 姬 事 況 見 召 云「念母 憶 薪 今重 見 夷 穆 晉 之時, 鄰 往 夷

吾

之

及

耳

反

康

自

若

良

性

貞

淫

厚

薄

未

嘗

盡

由

乎

?

況此

特

論

其

形

勢

耳

非

因

利

乘

便

相

度

時

宜

以

建

Ì.

都

其 則 秦之納雍,晉 也 心。 令狐之役,非 念 無 然 母 信 宋 非 不能 廣 之心爲之,母之欲置文公, 記 漢張 秦之罪 × 自克 修 逆之也 朱《傳 氏謂《渭 怨 也 矣。 於 》皆 令狐 非 陽》「 源 初 貪 録 又 逆之,後 之役, 利 其 謂 念母,康公之良 説 也 康 公 爲 然 怨 此 距 納 欲害 以 而 之, 誤 雍 其 矣。 也 之 īĒ.

渭 陽

所

後

化

耳。

如

心

件

地

氣

爲之,

非

以

雍

興

也

俗

有

淳澆

力

有

義

不

下

於文、武,元

之

一彊

暴

秦穆初 姬 反 (), 億母 生 存 敘 心 云「康 之時,欲 宿 心 本 公念 ·欲置 故 使文公 念之」。 重 母」, 耳 孔 反 惑於公子繁之謀 斯言 疏 《國,康 申 善於 之, 公見 以 論 爲 世 舅 矣。 得

姬

惓

惓

語

×°

然

吾

反

或

當復 康公念母之心,且此舉若 豈料晉之變計 吕、郤之難,而多與之徒衞,其慮之也周矣, 足以慰母於 非公子繁置夷吾之譎 得不納? 也 雍 如初 能繼文之烈。 好 善 ,不至有河 納雍者,是穆公置重耳之初心, 而 地 長,文公愛之 哉 下矣,故 晉又以 曲之師矣。 故余謂 計 於其 也。 成 而 康公乃以爲是 無 ,則秦、 令狐之役,益見 入也,猶監 宦 君 諸 而逆之,安 晉 秦 和好 誠 於 立

權興

李本 《釋言》文。」案,今本《爾 屋, 大具,其 作幄。 箋云: 與 箋義 意 屋、握、 屋, 勤 勤 具也。 然。」 幄 當 以 三字 雅》 渠渠, 爲 疏 屋作握 云 Œ 必 矣。 有 猶 勤 ,邢昺云 始 是, 屋 勤 則 具。 大 禮 愐

> 是。 傳》 具, 也, 亦可通。 祖 今 或云夏 王 則 肅 無 餘, 屋即 以 然箋義出《爾 屋 文 食俎,猶《閟 爲 義 屋 相 宇, 應 雅》,較 楊 斯 宫 用 解 修 爲 有本。 詩云大房 譏之, 長。 ^ 良 集

陳變風

亦足表 敝習。 故俗 用 理之難 女,獨不率教,乃行 國夫人、大夫 自大姬 地 之。 理記》亦謂 好巫 〈詩譜》 況傳 正 始 曉 其 鬼。 者。 也。 封 稱 謂 其説 内、民 妻與漢 大 大 胡 竊 朱子喜闢 姬 姬 怪 公不淫 事淫 畧同,皆言陳俗之不美 婦 好 文 顧 人 巫 濱之游 王 不 尊貴 覡 見 見 漢儒 后 從 巫, 歌 妃 君 **企** 開 好好 舞, 女,大 然 之 而 傳》 陳 德,化 從夫人,皆 祭 民 昭 此 地 祀用 俗 八 説 姬 數 年。 化之。 及南 獨 百 親 巫, 孫 斯 年

四

0

國者 憂或閒 以 覤 詩 舌 諡 者 mi 之惡見於《左傳》,隱七年,桓五年。《墓門》之刺 出 餘 公之愿 (詩))敘,可 爲 其 也。 憂 號 自 閨 斷 皆 也 《男女聚會之作,淺之乎言《詩》矣。 宛 爲 所 彊 不 房,燕笑之語或可 採風之官,所指時世定有實據,安有 辨 朱子 鳴》、《小雅》之《車舝》皆此 力君 之,非其正矣。 · 得 昏亂之君,忠言不人,惟賢妃 淫 宜 邱 配 以 mi 一,尤非 於《陳 詩者、《東門之沱》、《防有鵲 而 》、《衡門》、《墓門》三詩 已之思 不 爲 信 資後儒之見聞,何忍棄之。 欺後代之理? 思 非。 讒 自 無 風 mi 也。 證也。 立,他 其 (》十詩,惟取《株 憂者,正也,男 (本屬 ^ 漸化 朱子舍正而 衞》之《静女》、《齊》 典 其 有 闕 幽公之游蕩,僖 其 本 據 之,猶幸 心,此 非淫亂 而 7女有 意。 疑 林 也 取 **心與之共** 忠 爲 * 之詩 巢》二 邪 存 陳佗 朱子 私 臣 首 無 敘 與 m 同 愛 於 以 敘 據

> 粉》、《 門之枌》云: 今淫詞 夫子一 然于言中 知戀 「寤寐無爲,涕泗滂沱。」言其 棄女工 有淫者之自述也,朱子何弗思乎? 面 天下 是刺 示人者。 赤,決無將己身淫污之行,編 色而 ·雖至 淫之詩 東門之楊》、《月出》、《澤陂》 一言以 而不事,疾之之甚 豔 ·, 豈 曲 即後世《玉臺》、《香奩》之咏,及 |無恥之人,發其淫私之事,則 已,鄙之之甚也。 蔽之旨,何其不相 ,皆是文人墨士寓 而 淫者自道 「不績其麻 指爲 淫人之自述者、東門之 語 邪 也。 市 譏 也 更 類與 興 刺 ^ 多婆娑。 澤 無 爲 之意,已 加 .陂》云 他 詩 辺 ? 爲之,未 一言 況《 事, 歌 詩 赧 其 也。 東 惟 其 近 以 然 本

宛邱

毛公之傳《詩》,李巡、孫炎之注《爾

之,益 忞 符 也。 考》載《輿 非 雅 南」,而郭氏 者,故《 邱之形,難 王 案,《水 似,而與「邱上有邱」不合矣。 上有邱,宛邱」,若以 宛邱上文有 「水 反之,謂 一隱云 ,宋人,何由見之,殆屬傅 無 邱 皆以 理也。 又宛 上有邱」之語,元 信 爾 漸欲平,今不知所在矣。」據此,則 經 中 酈 宛 地 雅》言「天下有名邱 注 邱 央隆 以 語之不謬矣。 孔 廣 邱 歲 以爲宛、營諸邱 目 記》,歐陽忞著。 疏是毛,終不如郭之當。 爲 久,遂 驗而知,宜先儒之各執 高 潦 日 四 所 方高 宛邱。 爲中央下 宛 止 爲 魏 平 邱 泥 在 中 地 時 會 邱 因《爾雅》宛 玉 謂 斯斯 E 央下」,獨 碌 五,其 陳 其改爲之説, 」,下文有 ,則與泥邱相 海 宛 城南 失 碌, 乃 邱 • 邱 邱 詩 未足當 地 所在 道 之小 一説 形 地 在 東。 山田 中、 又 河 宛 IE. 理 璞

東門之粉

容人 差擇善旦 地 而 八擇邪? 游,下文 穀旦于差」,差音釵, 一,未 若箋之當。 南 方 原氏 女家 陰晴未可 訓 是 擇。 也 箋謂 預期, 今以 擇

爲

善

衡門

涓 寂寞 則 可 飢。」廣大正目泉水言耳。 泉水也。洋洋, 樂飢 流 游 心,然可以樂道忘飢,與上衡門 漸 息 泌之洋洋, 語 兩 意迂回 廣 喻 大,喻人 本 廣 可 意。 大 況首章二興,文義參差 以 也 君進 樂 孔 飢 樂 疏 德, 蓋 申 飢 毛 波 傳 亦 可 流 乃 云: 積 以 壯 小成大, 以 樂道 雖 闊,至 陋 泌 志 而

恐 更 丽 非 捷 傳 意 又 樂 飢 鄭 本 作 樂 療同。 義

東 門 之 池

則 孔 二字已具 而 趣 遇 氏 味 釋 亦 通 可 之, 較 爲 對偶之義,是 血 有 解 永 謂 晤 解 晤之意,亦通。 矣 歌 晤 <u>_</u> , 意,不必複 況 《釋 毛 以《詩 毛、鄭義本 訓 言》云: 晤 × 爲 出 語 但對字雖 遇 觀之,「可 相同 鄭 遇 訓 .也。」朱 偶 平 爲 也 與 實 對 0

《小雅 菅」,孔 木 后,茅喻褒 已漚名菅」之語,而繼之曰「未漚 疏 郭 以 疏 氏 菅 白 注《爾 既 似,其説 爲 華 引 · 》 詩 似 郭、 茅 雅》、以菅爲茅屬, 菅、茅並 陸之説 良 則菅、茅 是。《陳 又 乃 引《 風 又 各 以 但名茅」, 白 陸氏 菅 草。 可 華 以 喻 草 觀 筝 温 申

> 爲一,實自 耳, 豈茅之 疏 是誤合菅、茅爲 矣。夫「已漚名菅」,對「未 雲下露 養彼, 鄭始 謂 哉? 一,又不 可 以爲菅之茅。」則合菅 然《白 悟 華 其 與 × 漚 次 郭 名 章 野菅」言 陸 簺 意 云 異,

株也。」 然則 根 而滑 莖,枝柱 下 五 根 澤,莖有白 可 與莖 徐 寸中有白 以 也 漚 莂 : 一营」,《 矣、況 枝生於莖,故曰枝柱。 粉。」 人 粉,不云 土 集 根 此 日 傳 下五寸乎 用 根 尝云 莖。 陸《 在 疏 案、《説文》: 土上 語 菅 然 葉 日 根,木 株。 似 茅 云

東 門 之 楊

也,朱《傳》則 「衣錦褧衣」,庶人嫁 此 詩 與《 以 鄭》之《丰》, 爲 始 有 服 私 也 約 皆 昏 親 既 以 迎 mi 爲 不 而 期」, 從。 不 至 親 夫

迎之候也、《詩》有明證,何云私約哉?

墓門

乎? 於後世則均。 誅,傅相必不能獨免。 陳 崇教商臣 佗 之惡 弑 師 君,卒享其富貴。 傅, 猶 崇特幸耳,其蒙惡聲 楚 商 臣之 佗以 有 潘 逆 崇

是。 醉予不顧」。 陳第《古音考》引王逸《離 歌以訊之」、《釋文》云: 徐息悴反。」案,徐音與上「萃」協,良 及《 雨 無 正》詩瘁、訊 協 「訊又作 騷》注引 韻。 證之, 《詩 誶,

防有鵲巢

益信

而有徵矣。

「誰侜予美」,侜與譸義同,故《爾雅

皆聲也,俯取舟之載,譸之壽又焉取乎? 借矣。濮一之謂「侜,从舟,有裝載增加之 云: 案,鷊,《爾雅》作虉,《説文》作鷏 亦見《詩》傳。 綬草名旨鷊,皆見《詩》。 意」,見《大全》。 而毛公即 舟,有廱蔽也。 貝母名蟲,葒草名游龍,梓榆名駮馬 俯張, 誑也。」本釋《書》「 用 穿鑿杜撰、最爲可笑。 以 此植 釋 譸 訓 此 物 詩。 加 也。」則侜爲正 以禽 蕨名鼈,蓷 又 虫得名者 説 譸 張爲 文》 舟、壽 名 講乃 云: 幻, 也。 鵻

月 出

沉三語皆兩字連縣,共爲一義,《集傳》窃、姿致也。《集傳》以狀思者之情,殆未然。舒遲之態,指佼人言,言其行步舒遲,有此

. 古編

糾二字分爲兩釋,尤屬臆見。

株林

乎? 矣,尚 子也 從夏南 即 言之。」是已。 匪 是 ||字是諱 首章上二 「從夏南」,非以 以 曰從夏南耳。 疏云: 故耳。」夫 爲 非 辭,各二句 適 朱《傳》曰: 一句「胡 株 「婦 夏 林 南 人 然則 平 株 爲 夫死從子, ? 本 林目 爲 乎 在 非 一意。 文義殊 一是問 株 適 其 一君胡 林, 母 株 了,夏南 「適株 辭,下二句 林 有 故主 既 爲乎株 也, 礙 從 夏 特 夏 目 林 南 以 林 南 其

澤陂

「秉蕑」宗毛 陳 鄭 一 風言 「蒲崩」 萠 則從《韓 毛 並 訓 詩 爲 蘭 破 萠 鄭

> 不必以 至三 實 爲 蘭 據他草。 落 雖 蓮 章 陸 萏其華,三章 此 同 草 疏 法拘 又蘭爲陸草,不産澤中,似矣。 物 申 亦 其 徒 也 生 故 當以當以 取文義 水 旁, 以 連 爲 咏 傳義爲正。 何 完 荷 整 妨 物,不 者 於 耳,古人手筆 其 澤 莖 應 陂 次章 蓮 咏之? 者 但 别 其

檜變風

羔 裘

思」, 或 凡 秋 作於待放未 (去君之禮,待放於郊,得 義 前 下 可 羔裘》敘云: 見古· 斯 風 去 絶 貌 之 國之臣,不 矣。 時 , 故 《集傳 大 大夫以 忍忘 玦 章 用敘説 道 乃 皆 君 去。 去其 言 如 却 豈 此 此 君 遺 不 詩 也 去 春 爾 應

四四四

好潔。 且 臣 古狐 云 ,息民之祭服之,即 司 孔申 服之。 功粗惡,好潔 裘 「以朝 狐 有 一狐青裘,大夫、士之服,非 裘 鄭義甚明,蘇氏改訓狐白 以 若檜君 服 朝 燕,以 錦 者必 服以 衣 鄭 祭服朝。」祭謂息民之 狐 此 以 不 白 詩之狐裘 朝,是僭 爲 服之。 裘,天子之朝 黄 衣 狐 也 也 裘是 :君服: ,失不僅 謬矣。 黄 故箋 衣 也。 也 狐 君

素冠

年當 冠 當先思其遠,不 記 ,是朞即 》從毛,朱《傳》從鄭。 調 素 冠 布不當名素,一也 年 **特解服** 毛 將終,少 以 - 當思: 違禮之甚,敘不應止云「 爲 練 其 月 冠 日 近,二也; 孔 鄭 耳,若全不 申 以 刺不能三年, 鄭易傳之意 爲 祥 不 冠 見練 能三 一,吕 刺

> 衰,即 而問 猶存 也。 冠則素衣」之語、《名物疏》辨之良是。 子从鄭,得之矣,但次 也,安得 暮 秋世,尚 三年,孔 三年中畧少月日者,即異而 不能三年」,故王 歌, 疾,如蟜固之於季武子者, :,喪禮尤所最重 源謂 宰我 則子路笑之,成人聞子羔爲 西周 有禫 語 夷、厲之世, 短喪之問亦僅言之耳,非實行之 良 八時即 加 是 不忘 也。 有易三年爲期者乎? 肅、 後此 一,時人習於禮法 哀,如孟獻子者 去文、武尚 孫 章 毓 素衣又襲毛傳 二、三百年,當 皆 刺之,以爲 以 而魯人朝祥 箋 未遠 宰則 爲 見 禮 長, 齊 爲 不 朱 教 兄 能 衰 春 有

隰 有 萇 楚

也。詩本疾君之淫恣。又首章之「知」,「知」訓爲匹,惟見於《萇楚》詩,匹謂妃

兀

一四六

雅 與 康 成 . 釋詁》「 用 之。 章 之「家」、 知 宋 匹 儒 以 語 其 (驚俗 一, 殆 室 專 仍 爲 當 解 此 ___ 爲 詩 義 知 注 耳 識 脚 義 故 爾

匪風

其 Ŧ 家之私 同 毛 》語合,吉治《韓詩 毛 傳 而 易之。 説矣。 解 厞 風 朱子 (》首 章 喜 》者 用 與 漢 而 韓 義 E 詩 古《 同 ×, 毛 弦 H 獨 則 昌 以 非 邑

見 叙 言 周 道 思 周 周之 道 」,故改 治 道 也 作 傳、 道 路 箋 解 義 同 朱 子

浲 爲 專 風 嚴 以 训 》篇其 急 優 其 柔 窭 意 作 監 寬 謂 於 謗 更 簡 夷 車 厲 舊 爲 利 E 厲 章 治 世 時 民 此此 制 T. 焦 法 ? 檜 所 伙 之 謂 則 周 不 變 安 周 見 自 風 道 生 文 咖 始 矣。 武 也 於 作 以 板 厲 ^ 來 戀 厞

> 言至 宋 斯 爲 氏 碎 仕 指 而 也 有 法 政 蕩 治 惟 0 自 言 周 問 儒 亦 於 煩 是 來矣。 焉 談《 柱 日 諸 毛公窺見斯 IE 周 時 而 一德易 詩 民 治 周 史, 者 民 也 詩 詩 治 煩 民 道)寓 散 簡 之道 ×, 得 大 則 告 又案,《 也 口 而 其 畧 窺 或 散 六 以 乎 知 説 自 於 周 若 或 月 也 ? 周 旨 古治 於 興 室 知 故 **>** 烹 語 書》言「帝 之 敘言 烹 、義 毛公師 一藏 而 烹 > 小 毛 舊 匪 亦 箋、 術 魚 書 鮮 魚 傳 政 烹 風 \langle 率用 云 則 <u>云</u> 疏 令, 詞 授最 述 魚 \forall 小 德 意 詩 厲 知 俱 之説 近 所 雅 斯 使 始 寬 治 IE 人 無 而 遠 聞 **>** 消 烹 以 簡 思 革 盡 相 民 發 不不 傳 意 以 烹 遂 明。 魚 得 典 矣 廢 司 遠 立 莫 獨 語 煩 魚 顧 周 亦 聃 老 之 則 至 則 西 IE

蜉 蝣

之至此乎? 蜉蝣之不能久存 朱《傳》判 蟲 耳, 蜉 蝣 미 ",興也 爲比體,通篇皆指蜉 共 雖 處 一三章 乎? 是託言,亦 ,欲其於我 況與 止 各首 恐礙 人 歸 何 旬 蝣言 理 處。 親 言 蜉 ,遂爲憂 夫蜉 圃 蝣 愛 耳。 念 蝣

得玉」别見他篇,而近本逸之乎?

349

草綱 閲 云: 地 始 誤。 謂 而 生 目》云 出 時 開 蜉蝣掘閱」, 然二 掘 形 也。」孔 解 土 容鮮 而 使 義 容 開 俱 疏 蜣 閲 閲 閲 通 申之作 鄭 蜋 。」鮮、解字形 也。」又云: 也。」亦依定本。 云: 故 蜉蝣、腹育、天牛皆蠐 並存之也。 鮮 掘 閲 地 云, 云: 「定本 相 解 類,必有 閲 案、《本 埤 作 謂 雅 ...解 掘 其

> 惟《 曰 者。」房玄齡注云: 日 而 闕 出 Ш 螙 權數》篇 其 蝎 掘 掘 蠐 所化。」蠐 求 閲 螬 得玉。」今《管子》書並 勿反。 所 <u>云</u> 化 螬 與 ? 生 闕, 北 掘 糞土 又《埤 求月反。」 穿 郭 中 有 也 雅 掘 而 》引《管 闕 穿 蜉 豈「 無 地 而 蝣 此 至 得 掘 掘 語 泉 龜 闕 地

也。 也。 也,吉、 同 多也。」多,卒章言其朝夕變易衣服,以 裳之整飾,次章言其 如 夕深衣,如《曹風 則染以玄黄之色,惟深 雪」,謂深衣也。 用十五升之布, 之以采,則 三代時 諸侯、大夫、士、庶人皆服 凶俱 棉 用 之, 種 與 》以 祥 未 但鍛 止 入中 服 如雪者,鍛 衣裳之衆傳云: 咏 以 異 濯 昭 衣 精 國, 焉。 公。 灰治之,純 不 粗 染。 凡所 爲辯 《詩 首章 焉 濯 灰 》云「 謂 又與大祥 八治之功 言 見其 諸 「采采,衆 面 布 音準,緣 麻 古 侯 其 皆 衣 衣 朝 服 麻

四 七

毛

詩稽古編卷七

言 次 也 口 m 集 乎 猶 句 体傳 ? 衣裳,是目其 復 朱《傳》 可 況蜉 言 遵 也 衣 用 蝣黄 解 確 裳,不 之者 指 此 (黑色, 爲 羽 也。 已 麻衣,愈不 旬 翼 複 即 耳。 黄 此 乎? 指 黑 《爾 蜉 首句言羽言翼 色 蝣 雅 泛 得 而 言, 以 以 郭 云 衣 蜉 夫 如 注 裳 蜉 蝣 雪, 而 借 蝣

候人

也。 或説 而 何 「暫下 皮 叔 戈 平 音殳。」毛晃有《毛氏 重引之,文連羊皮,不知 役,《 城郭市 與 ? 以 、役。」《詩》 説文》云: 又《説 驚 里, 牛 高 馬 文》 縣羊皮,有不當入而 日 祋 祋 與戈 が故 殳 韻 「杸,軍 增》。 也。 从 並 示。 證殳乎 何, 以 从殳,示 中 爲《 ·士所 定 詩》 《詩 ? 是 欲人 持 Ē 殳。 聲。 證 没 殳 .

已作祋矣。又杸、芾不協韻,毛説非也。字乃杸之誤。觀《説文》引《詩》,則東漢時

誤矣。 用 爲 是 爲雲氣, 女,文義相應也。 也,爲將雨之徵。 一書 也。 小雨之驗。 升氣日 「 》詩 《詩 至薈 亦未 語 影兩言 一隣,《 張 蔚, 當 木華《海 子 正 朝 周 《候 朱子分薈蔚 厚 指 禮 隮 解 朝 ***** 獣 人》之「朝 **隮** 賦》「薈蔚雲霧」,正 級蝀 朝 祲 隮 掌十 》之「朝隮 婉 爲 爲 變,正 隮」,雲 登 煇 草木,朝 Ш 九 伐 指 日 木, 也 季 虹 隮

篇。 女 弱 小 者必 也。 人柄國,病害 正 季,幼。 此意矣。 帝 至 堯 大 困 嘉 女,弱。 孺 生民,彊 詩言 子 哀 斯 婦 字 力者 飢, 人, 各 猶 見 ___ 所 《南 堪 義 以 自 華 獨 傳 存 及 天 云 道 然 季 幼

顯然。 末章 天 也。 何 日 晦 不 援古刺今、《詩》之常體,不 翁以 「胡 假之年,使至今存 不 爲是美 萬 年」,蓋 非刺,徒 思之 也。 而 以 不 詞 ·獨《鳴鳩》然 得見,若 思古之意 而已。 況 日

案,

魚陵切今作凝、《説文》以爲俗

字。

下泉

必 非共公之罪。 侵刻,下民失所正以 王賢霸也。 遠思王霸之正 慶讓之典不行,則諸 朱子譏敘,以爲此天下之大勢, 夫使曹有賢君,民各得所,何 己乎 此、《下泉》詩 侯 無 所畏忌,共 所以 思明 公公

洌,从水,清也。冽,从仌,寒也。「洌

也。 《記》、嚴《緝》皆从三點,非是。 臣鉉曰: 彼下泉」,毛 字从冰」,冰即仌字。 象水凝之形。 「今作筆陵切,以爲冰凍之冰。」 訓 洌爲 冰,水堅也。 寒, 《説文》云: 則當 从二點。 孔 魚 疏亦 陵 「人,凍 切。」 云

乎? 證 草 《下泉》浸物,本喻虐政 何據。 筮,皆草之可貴者,故恐其傷。 俱浸,不應舍禾 草,蕭蓍之屬。」凉草不見《爾雅》,不知鄭氏 ,康成當別有 鉏 浸彼 鄭 而 孔申其故,以爲 意 去之,惟恐不盡 或出出 苞稂」,鄭破稂爲凉,云: 據耳 前 此。 言稂, 凉爲 、困民。 稂乃 , 此 何反 草 得 禾 名, 之而 中 蕭以祭,蓍以 以 稂爲 ·别草, 無 見 未 冷害苗· 他 傷 盡 典 爲 浸 也 之 凉 慮 則 可

、藥,其 稂、 莠雖 莖治目 害 疾 苗之草 ,名光明草。 IIII 皆 有 用 韋 於人, 昭 或 莠可

詩稽古編卷七

毛

又云: 草也。 毛。 米, 白 能 非是,羅 引 即 注 矣」音提迭。 烏木,云荒 稊苗似稗, 不成者、《草木疏》亦以禾莠而不成爲稂、皆 篇》作蓋,云亡庚反。狼尾」,及「稂,童粱」,皆此 此。 昭。 色,莖葉穗粒 亂 云 미 苗 荒年亦可采食。」《説文》以稂爲禾粟之 : 問荅曰: 以 今目驗此草,誠 《本草》云: 而皆可 願《爾 「莖葉穗粒 療飢,又名狼尾 一莠似 年 而 是 可 也 穗 稷 雅翼》辯之當矣。 食, 代 並 如 而無實。」 糧 莠,今之狗 粟、紫黑 如 並 「生澤地,似茅,作穗。」 而 斗可得米三升。 黍、稷,有水、陸 似 如粟,而 殺蟲 草。 稷 而 見《魯語》。 、色,陶 《爾雅》「孟、《玉 尾 不 爾雅》云 穗色紫黄,有 草。」《 實矣。 又稀、稗 隱居 又韋 二種 爾 謂之 「蕛 稗 稂 雅 翼 黄 亦 有 曜

稽古編卷八

吴 江陳 處士啟 源

月

七

猶寒。 温 孔 義較優矣。 其説,各有 月令》,毛傳 晚 疏 之驗 取 豳 其 陸德明《釋文》以 風 説 ,隕蘀、 不 • 至鄭荅張逸,以 以 同 以 七 述 月》所 楙 毛 入室之類爲 孫 土 为因 毓 晚寒釋之。 紀 [指舉 以 爲 人事物 爲 爲 晚 趾 沝 寒 節 、藏 晚温 土 晚之驗。 候, 寒 而 後 冰 亦 氣 多 儒 之類 較 晚 寒 遲 雖 推 寒, 宋 爲 陸 晚 明 於

《月令》五月鶪始鳴不同,二也 耜、 孟· 于耜、 秦風 多在 異 此 嚴 閱之禮,不以仲冬而以二之日,三 不 也,咸陽、豳、鎬總 温 栒 大秦,皆 爲 遠日則 應相 分南 事,亦見於《周 邑,詳《公劉》篇。 日 最 寒頓殊。 粲駮之, 土著 極北之地 道 得 春 舉 異。 所必 寒。 之, 北 耕 趾 和 書。 煦, 謂 帝 不分東 而 在 若 經 今案,傳、 況《月令》作 藉異 猶 温 正 温 至 南 饒 秦、 二月, 未 晚 北 在中 物 禮 在 西 期 寒無異 豳 西,南 盡 寒 相 産 》及《周 域 二三百里内耳,温 皆 當 箋所 也。 國 同 諸國, 與《月令》季 雍 此 蚤 也; 西,不在 於秦相不韋,當據 方近 也。 則 地 指 可 源 鄭 雖 語 謂 也 證 晚 如于閩、身毒 言 故層 日 ; 東 \approx 七 矣。 地 寒有三 藉 北 則 寒 西 月 周 也 纘武 氣 田 也,不 晚 冰 懸 温 冬修 鳴 亦 温 豳 飛雪, 北 絶, 非 鶪 即 較 寒之 孔 條 寒 雍 乃 疏 大 耒 尤 應 漢 總 方 與 閲 地

六也。 早 則 落 所 時 類 在 几 季秋嘗 令民人室,此 (月令))季冬取 贵 个,各 此 指 律 Ŧī. 齍 鳴 理或然 咏 仲 耒耜 在 月 論 百 mi 晚 得 有早 其 云「十月 秋 夏三月。 寒 矣。 年, 夏、商之閒,一 九者,非人 「稻,此云「十月 澽 血 纵绕 嘗 有 言 止 晚,天 也 民 制度之變更,土俗之沿革 則 麻 論 六 以 H 閒 冰,此 遲 物候, 條 隕 改 孟 收 此 令 落 八子嘗 一,何 達」, (事, 也 云 歲,仲冬。 春 之 穫 丽 \wedge 必 云二三之日 則 始 始 同 月 在周、秦之際 新 輒 二也, 即 九 穫稻」, 悉 耕, 鳥之鳴、木之落, 耳 期? 令》仲 《月令》季秋 盡 物 薦 月 同。 三也 者 仲 候 廟 叔 踰 季 也 春 耳。 當當 春 《月 至 苴 月 納 四 秋 則 倉 紀 五 于 _, 在 也 mi 令》季 入室, 無 論 庚 其 穀 勝 《月令》 民 物 相去千 五 草 人事 不 鳴 始 難 之 陰 畢 初 也 木 《月 耕 非 秋 從 季 > 種 則 以 黄 此

> 令》 也。 駆 即 不 先後之異,非 風》所主在 之、《豳 有 必 天 是 趾 所 過泥 下, 言 大閲 二之日 主 其 風》、《月令》二書 或 在 耕 纘 紀 稍 布 耳 鑿 武 地 風 更先 政 冰 非 氣 俗 教 子 藏 必 使然 多 公之 丑 之, 必 原 舉 兩 其 舉 也,毛公晚寒之説 制 其 或 月 始 所 其 遲 皆 盛 也 主 未 初 __ 可 而 各 口 而 月,不 言 行 季 不 言 知 自自 冬取 同 周 也 , ~ 足 家 不 冰 無 月 異 鰯 網 既

養老, 雅 年 詩 咸 女心 詩 》以 祭 於 》,三分《七月》篇 蜡 田 傷悲」乃民 迎 周 置 人 祖 暑 禮 酒 君 龡 之 龡《 . 稱 ^ 仲 籥 慶,功 网 美 翢 秋 章 政, 頌 風 迎 * 雅 ₹, 成 故 寒 故 以當之。 \approx 以 之 擊 氣 指 指 仲 息 事,故 穫 土 爲 亦 春 老 稻 鼓 如 擊 與 翢 物 之。 土鼓 指 春 (籥 以 風 章》 「朋 樂 酒 鄭 凡 飲《 註 爲 田 氏 酒 作 或 小 畯 異。 嫲 簺 貅 斯 酒 祈

得

故

敘

蘇

祈

皆亡 薺》諸: 高》亦 風》何 夫《楚薺》 好。」彼皆 有《雅 分始 説 年 以 有 實,遂取《雅》、《 雅、頌 取 爲皆通者,吾未 逸。」夫 報 「家 諸 云: 於 篇 害爲《雅》、《頌 萬 王 社 *\ \ 儒 爲《 義 以 夀 安 》諸篇| 父作誦。」誦、頌字 雅 稷 皆遵 他説 ,是壞六義之體。 無 無 頌 稇 石 稇 一吉 等樂 也 礙 疆 謂 乃幽 雅 侯 用 也 甫 耳 而 》,《噫嘻 《頌》諸 之, 爲 章 或 作 得 不得 王刺 假令有之,則《詩》有 見其 朱子 耳, () 哉? 蒙風、 並 誦 稇 此 嫲 。」又云: 篇 自 無 古 方 據 頌 詩 可 非 **>** 異 叙之 有 **%** 自 諸 己之臆見,以 彊 之, 也。 頌之名, 至朱子所取 解。 不 本 噫 篇 奮 雅 别之以 雖 知《節 以 心嘻》諸 説, 通 》、《頌 戎 爲 屬 至朱 爲 説 用。 狄 張、 其 貅 臆 風 閒, 則 豳 謂 南 **>**, 子 篇 頌 風 《崧 度 中 程 也 山 爲 安 廢 乃 嫲 之 楚 = 肆 不 詩 鞉 以 籥 乎 風 或 孰 也 爲 雅 未

説

得

云

見

簫、鯱、 《邠詩》 殆無 妄,考之《周禮》,全不相 全篇隨 頌。 四四 特 擊 雅器 ? 贵 也; 也 史編《詩》,不 風 火 ? 也,魯人 頌 因 頌 是又自戾其初 以 而 篴、音 通也。 者,籥章 夫風、雅、頌,詩篇之名,非樂調之名 事 之聲合 磬、 ^ 音節 矣。 孰 龡 器 邠 ൬ 雅 之可 和 笙 變,其 雅》 笛。 何 ? 季 而 聲 一磬,凡 黄 I 籥也; 以鼓、鐘、琴、 應預 不 札 變哉 者 孰 不 管、春、 東 雅、 併 音節 觀 頌 司 發又述 笙 説 歌 樂 ? 四 可 額 ? 耳。 之? 也。 師 器 可爲 時 頌 以 **郊** 牘、 如 必 合。 龡 , 四 案, Ŧ 因 待 然 獨 頌》 應、 竽、 詩 皆 詩 瑟 風 雪山 一音節 奏樂 則 此 不 全 之目 \forall 説 四器之聲合 者 豳 雅 笙、塤、 未 可 兹三説 爲 説 用 謂 一之説 詩》、 爲 删 而 闻 壞六 尤爲 眂 令七 矣。 後 雅 七 也 瞭 籥 月 月》 林 謂 況 則 口 亦

耳。 樂器 耕 又 以 地 **龡之,牘、應、雅三者則舂之。舂者,築之於** 所掌十一器 風 以 祖 詩 籥 雅 與 此 雅」,而注 乃乃 以 、雅之雅、名偶 但 也 耳 師 之也。 也 三器 爲 不 亦 口 影有 且《甫 豳 始耕之祭。 瑟擊鼓」而 無 安得 歌《 ·知《笙師》之雅,即《樂記 聲, 鐘 頌 以 至 雅 風》,不 乃奏樂之名, 、鼓、琴、瑟 《籥 田》亦 頌 奏《裓夏》,經有明 非十二器也。 云「狀如漆桶,中 皆籥章 , 有 乃磬名,音容,字亦作鏞 風、雅、 眂 章》之文,止言擊土鼓 相 傅會之與? 瞭 飲《豳 可 不言鐘 一所掌, 同 歌《雅》、《頌 有 義 四 頌之别 一詩》以 頌 1器,王 也 不 **豈樂器之名** 不 、磬,故 **学、笙等八** 應與 相 有 哉? 文,與《豳 又此 迎寒 《甫 豊 涉。 推」者也,與 》所 八 笙 師 妄 》也? 因《 謂 暑 田 四 生 彼徒 又 前 器 非非 **>** 笙 者 訊 此 御 耶 龡 眂 非 ";何 雅 田 則 師 説 見 況 ? 疾 始 田 网 瞭

之日滭冹

拔,分勿反。

其

引《采菽

())詩作

笙師 器 \equiv 吹角屠玂以驚馬也。」《説文》引此詩作「 之名,安得槩彼諸器,悉爲 如 曰籀文。 此,不知黄 也 頌之頌。 + 觱本作玂,从 器 眂 今玂省作觱。 瞭 又鞉 之 氏 眂 職 何以 瞭 及頌、笙 角鸑聲。 亦 三器,止 、取之。 不云奏《 《説文》: 兩 溪,古文詩字,或 雅 各 磬 豳 頌 止 器 哉 頌 = 蒙 器 ? 一美人 也 雅、 非 所 頌 且 四

寒」義反,例字得之。 水,則此詩古本元 本烈字豈 二之日 一下泉》、《大車》兩詩,孔疏皆引《七月》 栗 衞 **沁**例」, 包 所改 以 作栗 證 公乎? 冽 冽 字 烈从 唐 當 初 从 火,與傳「 猶 仌,不當 然矣。 从

來也。《集傳》曰 同 我 婦 一子, 饁 彼 老者率婦子 南 畮 同 謂 而 餉之。」 婦 子 同

《漢書·食貨記》引此詩,師古注云「其婦 勞,不 乎? 迂矣 同 「斑白 以 食來饋之」,正 1 應 此復别爲之解 詩,亦止言婦子,言婦 不 況《孟子》云「頒白 及 提挈」,此先 文 老 者。 並 不 觀 言 與 何也 (古注) 《甫 E 老 一之禮 不負 者 田 同 士 \approx 何 戴 也 ,可見矣。 ^ 得 朱子 」、《王制 大 彊 則 田 甚 鰪 安 × 餉之 一愛顔 蛇 了 又 載 足 云

前 畯 南 田 ,此時 畮 神 爲 也, 爲《 詩》之田 形 始 未 事 即后 豳雅》,豈 郭 明《 ? 稷 [畯,田 也。 詩 康 》義 成注 合 鄭 官 田田 也。 氏《 《禮》在 畯 篇 《周 至 章》注以 喜 禮》之田 未箋《詩》之 與 樂 饁 畯 田 彼

説

而

則 子同歸, 爲公子娶於國 歸 者止是女,何 女心 而遠其父母爲悲。 傷 悲 中,其許嫁之女 殆及公子 云「及公子同 日 然以 歸 預 (人)《集 歸 歸 以 乎? 爲于歸 將及公 傳》以 文

> 傳云: 娶於 其 僖二十五年《公羊》。 義 公子躬率其民,同 大姜,有逢音廳。 生民》詩。 先可 不 、鄰邦。 順 矣。 例推,安得豳 大任,摯國女也,大姒 春 女思 宋三世 況 古 秋 氏 可 國 時 女也,或云有邰 内 證 君 出 士 國大家 娶、《 不 也。 悲, 同 臣 春 感 時 即 其 連 其 歸 秋傳》以 以 妻之父,往 姻 幸 物 也 周 氏女,有辯,見 公室乎 化 或 事言之, 此 也 女也 解 ? 爲 往 网

能定爲 虔以爲白 草》不著形狀,後 以紀時,而《詩》、《爾雅》亦 氏 爾 爾 以名官。 雅 雅 鶪 雖 惡 || 郭注 今之 脰鳥,李時珍以爲反舌。 鵲 鶪 《夏小正》、《月令》、《 聲之鳥, 頻 何 醜 鳥。 其 似 人無從 鶷 飛 胡 近 然能 也 達切。 世 翪 别 李 應 識 一音宗。 而大」之語 載 鵜午鎋切。 候 時 其名。 説 珍 而 者紛 郭云: 周 鳴 本 故 **鵲** 草 一。合之 但《 紛 少 本 據 用 皥 正矣。

Ŧī.

六

惡。 鶪 與 鳩 於 知 世 上下。 然物産之古 至 ~; 目 11: 信 争 黑 有 驗 伯 人多 苦 否 色,以 則 伯 好 説 忧 也 奇 鳥 文 竦 單 捎 悪 化 者 作 翅 棲 I有而 之, 鶪之説 爱 又案, 四 當 上下。 百 血 月鳴,其 是。 注 俗 今 鷯 云 香 稱 鶪 無 相 金 其 合 婦 亦 者固 類 斂 鳴 説 此 博 被 作 鳴 足 云 則 數 勞 故 姑 也。」 鳩 F 不 蛇 者,是乃鶪 以 虐 苦 之文, 少,正難求 以 其 結,●其 爲 死 苦, 「苦 夏 異 所 至鳴 名 鳥。」 又名 鳥 化 以 聲 大 爲 矣。 伯 不 之 姑 鶪 冬 此 如 今

以 雅 FI. 叶 華 爲 ıfri 疏 實 即 葽 四 則 F 今 繞 不 月 葽 一秀,小 藥 棘 以 秀 繞 中 蒬 爲 葽」, 華以 小 語 然。 草有 草。 鄭箋 宋 又 ·華,不 月 ^ 曹 参 名 疑 7開,不 以 粹 物 葽 得 中《 劉 疏 八爲 云 以 》非之,謂 向 詩 王 秀。 苦 四 萯 説 立葽 月。 如秀 之 房 據《 九 不 説 切。 其 是 爾

> 以三 將 説 濇 葽爲 味苦、苦葽 文 榮、秀、英四字分别異名, 如 不 垂 稱 而 剣 築 寒之漸 黍 如 醫家 月令》言「苦菜 叶 草 曹 苦葽,其 稷 月 此 通 而 華 説 言 也 實 華 者 以 非 方 其 信 源 日 耳 也 本 E 甘 ^ 謂 爲 華 秀, 』。」 劉、 言秀者 詩》 來 訓 當 草 曹 有 , 可 古 亦 也 煑 榮 説 本。 以 日 调 言 矣。 之方 秀」皆是 許 而 四 得 執 四 實 況 專 之。 實 月 皆漢 哉 今 月 秀 此 取 口 者 成 所 ? 藥 秀 章 成 秀 用, 人,已 亦 實 茶 也 謂 葽』, 中 以 實 字 案, 可 有 對 又 又 小 乏 成 原 通 華 文 有 何 物之 草 訓 劉 阚 義 象 説 名 則 如 葽 味 此 向 雅 疑 禾 文》: 别 野 繞 極 詩 説 乎 小 始 實 華 菊 秀 散 ? 草 下 苦 之 紀 此

金

埤 伯勞之血則 雅 九日 香。」 鵙 蛇 鳴 則 結。」 又 H

今以 惟 貊 雅》作 代 本 作 貉 貈。 貈, 而 左豸右舟。 貉則以代 貉 本莫白 貈, 切 今經 不可 北 方 傳 復 考 皆 正 作 種 矣。 也 貉

貈

又作

次線

字當讀 經言往 當 不言皮,故傳 也。」傳語 爲 句 也。」竟以貈爲 文》諸書。「一之日于貈,取 貈 言皮, 一讀,音 讀 也。 事 狐 謂 ,不言取,故傳 音豆。 貍 取 、狐、貍是三 ,誤矣。 豆豆 則 毛傳 簡 此三 也 貈 貴,讀者多誤。 之 補言皮, 「皮也」二 謂 獸皮 于 굸: 狐 推 爲 取」二字當 貍之總名,而合 貈 其故, 皮 爲 猶言 種 「于貈,謂 口 ,皆以 補言 裘 潤 知 字當 殆 耳。 于 名,見《爾 補爲 取 因 耜 義 傳 彼狐 句。 句。 ^ 讀 又 取 集 傳 謂 釋 毛 互 于貈二二字 傳 貍 于, 三句 往 經言 也 傳 相 雅》、 狐 狐 取 而 乃 爲公子 備 貍 往 貍 且 狐 所 失 狐 云 《説 一,皮 也 也。 狐 貍 其 指 貍

> 也,猶誤讀之,況經乎 貈之事 爲 共 同 康 吕《記》解貈 朱子誤讀 句 ,故其 尊者」是 ,箋云「于貈 成善會毛意 義。 ,皆讀毛 申毛 陸氏《 傳 也。 (),併 爲 往 狐貍之居,因 故 傳 埤 誤 詞 仲 雅》以于貈 釋 多 達 而 搏 不 經矣。 誤者 牽 誤 更 貈 合, 讀 解 以 也 但 ,謂取狐 自 幸 不 爲 爲《周 彊合北狄 一分别 木 獨《 夫 裘。 失 傳 集傳》 貍皮爲一 用 經 釋 禮》 狐 裘之不 意 貉 經 祭 並 耳 字

當以 以 豵。」《爾雅》文。 歲 周 鹿 豵 日 禮 既 與 脾 物 「言私 豵, 易 》「大獸公之,小禽 庸 而 爲 傳, 三歲 分大 鹿麕 絶 其豵 則 有 豜 豜 小, 之有力者。」案,經别公私 力 獻 亦 字 豣 靡 見 非三歲之稱 豣 無 。」《説文》作麉 豳 于公」, 訓 鄭 民 私 云: 愛君之誼,且 之」語 疏 毛 申 云: 笺 古 豕 相合。 ^ 意 賢 阚 生 切 雅 謂 豕 正 與 意 鄭 E

周

公

大

閲

注《大 之法 又《 既 台司 四 之豵 康成 咏 歲豵 馬 小 歲 耳 其 肩 爾 い。」《説 戦 注 故 事 雅 尚叢聚 於《 禮 小 亦 手 文》 異 引 傳 (詩 × 於《詩 此 以 笺《 $\stackrel{\sim}{\sim}$ 也。 云「豵, 詩,義 彼 即 詩 豕 文 倣 :>) 傳 豜,三歲豕 之大 \forall 爲 此 生六月豚。 不 俱易 然 證 義 口 者 以 非 易 而 調 其 定 大 也 先 之 (解,左 義 仲 肩相 鄭 豜 所 先 之 冬 楨《 李 下 江 甘 而 (史記

矣。

關

也

鄭

惟

及

《者。」皆與

毛

義

百

日

小

莎 以 樹 雞 爲 F 龃 用 又 莎 斯 雞 崔 日 爾 説 **螽** 非 樗 雅 樗 雞 蟋 「螒, 雞 蟀 誤 也 爲 矣。 莎莎 天雞」,此 物 雞 崔 生草 而 豹《古今注 異 莎雞 名 崩 亦誤 樗 也 雞 **>** 又 郭 牛 以 朱 注 樗

亦 本 注 名 謂 燕 傳 之山 薁 云 葡萄,云: 本 鬱, 草 * | | 棣屬 蔓 薁, 俗 生 名 菔 一,與 野 嫩 葡 葡 也 萄 萄 相 蘡 似 唐 薁

> 異 誤。 草 爲 葡 薁 鬱 Ш 李也。 。
> 以 説 萄 與 東, 李,大似 李 子 小, 惟 毛 可 即 | | | | | | | | | | 常棣 是鬱 作 爲蔓生,子又 言 m 實 相 詩 味 亦 是 百 棣 如 子 酒 似 蘇 甘 有 實似 義 》詩 *, 傳》 + 此 小 李 頌 類 葡 莖 間 酸 見《文選 别 四 閒 櫻 以 大 則 ^ 而 「隱夫鬱棣」,徐 萄 有 而 桃。 株 圖 蘡 同 辯。 以 爲 如 宋《 小 言 經 細 株 實 英 椀 薁 别。 鬱 有 F **>** 又 而 圖 計 大 李 者 李 以爲 林 樹 唐、 案 大小之異 則 味 經 如 又言 即 賦 廣 高 <u>*</u> 酸 李,張 株。 冬月 宋《 》李善 郭 木高 薁。 (注引 | 薬乃 Ŧi. 璞言 晉華 《本草 六尺, 案 注 郭 惟 車 ^ Ŧi. 木 揖 《本 草 孔 下 凋 林 六 葡 蘡 陶 生 亦 × 木 李 葉 尺 實 蓋 東 薁 萄 爲 疏 謂 草》 疏 III] 「鬱,車 即 則 本 大 有 居 似 薁 引 子 藤 小 此 言 恐 本 燕 爲 車 如 劉 牛 汁

草 木 疏 》以 唐 棣爲 薁李,誠誤矣, 然 以

草》以 爲二, 爲 即 誤 棣木 蘡 必再 爽爲草, 薁李 俗字。 不不 **奥字** 英 釋也。 爲 生 意陸 爲 | 英爲 知 與 則 燕 實 藤 通 燕 陸 而 所 大 作 葡 薁 薁、薁李,陸 名 而 同 其 謂 如 奥。 蔓 萄,皆因 木 名 也 而 深釋葛 李 燕 (生,不 葉 栯 不 薁, 郁 如 不 李 釋 郭、 藟 又 爲栯 棃者爲栯。 | | | | | | 非 誤 |陸《疏》藟 相 有作 陶 分 以 即 也 類 爲 爲藟 二家及唐、 薁 矣。 郁 亦 以 兩 其 李 分 者。《 薁 植 似 釋 也 似 玉 燕 即 燕 也 《廣 燕 一篇》以 爽、爽 不 廣 薁,延 翢 唐 薬 語 宋《 案,栯 韻 然, 韻 棣 風 不 本 以 而 李 以 蘡 唐 蔓 之

荍 也 惟《七月》詩 魯頌》之茆 荆 而 古有 葵也。 葵爲之主。 五 菜, 「亨葵及 今名錦葵。 鳧葵也。 韭、 其 見 鬞、 菽 然此 於《詩》者,《 小雅》之芹,楚 薤 專 俗。 名爲葵,乃正爲 特借葵爲名耳 葵、 蔥、 陳 葵 風 藿 也 类 是

綱目 也。 饌。 葵菜, 露 術》言種 啓》、王 《記》以爲《爾雅》之終葵、 所烹,定指 曰 : 采,有冬葵、春葵、秋葵之名。 葵,子輕虚 勝,大葉小華,華紫黄 白 同。 人種爲常食,有紫莖、白莖二種 雅 小以紫 解 莖葵、《本草》亦專名葵,人本 今人不復食之,亦 本豐而 今考之,《埤 收 但 觀此可 維 葵,陽 葵法 必待 莖、 傳 詩 如 此 所 耐旱,味 白莖當之,嚴《 箋、 云 霜 菜。 見古人食葵 榆筴仁,四 草 云露葵,皆 降。」 也。 IE 雅》之説 後 義 葵以 甘 世 其菜 色。 掐苦治切 俱 侕 無 如 [時皆 無 是 露 以 無 種 宋 當 易 其 繁露, 緝 訓 物 毒 名 此 者。」已上見《本 玉 最 矣。 生,備 》宗 釋。 可 、蔬茹 也。 王楨 瓜 種 賦 意 小 經 種 刺 爲 案,紫 以 所指各 者 在 上 其 也。 曹 陸 IE. 《農 齊民 四 白 經 斯 名 品 之要品 説 植 氏 必待 時 年 莖爲 乎 鴨 嫲 書》 莖 之 七 要 民 收 脚 古 不 埤 草

注及《後漢書 或 庭 稱 胡 隱 又名吴葵, 葵,今名蜀 菜之名。 子 又 葉肥 廣 紫草, 謂 除之玩 層、 華 如 其 臙 居 雅 兔葵、《本 葵 亦亦 脂 云 性 五 家以 染 纍 厚 。」《蜀 止 一味子, 滑 乃斯 火火 軟 布 葵。 名 若 地 也,不爲菜。 ,見《别 注 滑 結 子 物 故 承 種 膚 夫 《本草》之黄 作 皆 實 種 · 草 生 本草》云: 露 名 八荍 ·紫色,女人 兔葵 爲 録》。 京熟 或 一青熟 滑 也 学之 用用 蓝 之 地 亦名 假葵 ,特葵之一 菜。 則 和 爲 葵, 之。」 又名天葵,見 鳧 防 黑。」李 汁 肉 荆 葵又名水葵,見 天 葵,《素 又如《 以 與 皆宜 至 如 觀 葵 蜀 以 、葵,亦 終 爲 鳧 臙 此 葉 漬 葵,今名秋葵。 名 氏 葵、 葵 脂 類,不 爾 諸 買 爾 粉 問》之龍 耳。 八九月 《綱 、楚葵之類 女女 説,今俗 名 雅》之育 厚 繁 雅》之莃 傅 人 如 臙 露 面 經經》。 ·得專 其 飾 杏 脂 戎 **楚** 開 謂 亦 菜 葉 面 葵 詞 皆 名 戎 葵 所 細 之 名

稱雜亂,不可悉辯矣。

收。 青、斑 切。 藊 亦作 更可 言菽, 一大豆 豆 路 丸 是 其 豆 切。 角 胡江 , 也 ,俗名刀 豆 籬上 蹽。 今沿河 一,俗 € 爾 其 人 日 菽 切。 菽 數 率皆 [莢,葉 雅 小 藥、《神 豆 者, 一篇》云 豆、 呼 種 豆。 也。 也。 籬 豆 孇 野 ,今用作 穭 大 豆,又名蛾眉 崱 衆 卷 音 豌 又 日麓, 緑 本 力與 豆 有 小豆,苔也 北 豆 豆 農 巨 豆。 草 也 夏 之總 典 赤 員 切。 經 收。 拾遺 爲 切。 切。 今作藿。 豆、 豉 其 胡 豆。 大 列 醬 豆 蠶 白豆、 名 胡 鹿 》有 豆 之上 豆 西 《廣 諸 腐 豆 也。 0 藿 豆 有 莖 陽 種 黎 韻 油 一然實 其 則 丽 緑豆 黑 品品 F 襍 作 别 者 豆 登 有 實 其。 廣 皆 义 俎 穭 録 廣 是, 白 通 豌 在一女 一、營力 57. 豆 (名貍 雅 雅 爲 豆 夏 黄、褐 有 中 亦 而 穆,布 一一菽矣。 詩 亦 種 挾 琬,於 名 黑 豆 刀 九 切 所 切 鹿 者 劒 有 以 秋 虎 元

云。《玉篇》曰「欇,豆名,虎櫐」是也。豆。而黎豆者,實《爾雅》之「欇,音涉。虎櫐」

物,可 至用 言《本草》專名稬爲稻,累朝釋畧無言其可 野 爲醴 也。 爲酒者。 酒」,則益信矣。 俱爲釀用,尤足爲明證。杜少陵詩「煙霜 黍乃稷之黏者,秫乃粱之黏者,而與稌、稻 者直名秔也。 以爲然,然非古也。《説文》云: 穤,又作糯。又誤讀 「秔,稻屬。」然則 日,稅稻熟天 獨言黍、稌、《月令》命大酋亦言秫、稻, 爲 稌,稻也。 米之疏者曰 秔,黏者 見謂稬爲稻,唐世猶然也。 酒 不知稻之爲稬,不僅見《本草》也 , , 詩》、《禮》已言之,《本草》偶弗 觀《豳風》「十月穫稻,爲此春 風」,稅稻與 奴播切。 非直此也、《豐年》詩爲酒 沛國 稻、稌、 謂 稻則其總名,今人皆 稬皆目黏者,而疏 稻日 煙霜對,定是二 稬,奴亂切。 稬。」又云: 宋張舜民 「稻,稌 俗作 淒

> 非謂稻不可爲酒也,又何疑乎? 及稻。後之釋者往往藍本舊注,未遑增入, 及耳。凡穀之黏者皆可釀,北土多用黍秫,

所加。 「九月叔苴」,傳云:「叔,拾也。」《 於云:「从又,未聲。南人謂收芋爲叔。」 文》云:「从又,未聲。南人謂收芋爲叔。」 云:「未,豆也。象未豆生之形。」徐曰: 云:「未,豆也。象未豆生之形。」徐曰: 云:「未,豆也。象未豆生之形。」徐曰: 云:「未,豆也。象,豆生之形。」徐曰: 云:「未,豆也。象,豆生之形。」徐曰: 云:「去,豆也。象,豆生之形。」徐曰:

復正 子》「華 樗,又别作樺字以代樗。 脂可以爲燭,非惡木也。 木,敕書切。 「采荼薪樗」,樗字本應作嫭。 冠 縰 樗,乎化切,亦木名,以 履 是也。 樺亦作穫、華、《莊 今諸書皆譌 沿習已久,不可 皮裹松 梼, 梅爲 惡

聲之學,始於元 家聲,家字 集傳 協 九 月 ,古讀 築 場 故 如 圃 魏,古未之有, 切 姑 以 亷 稼 與 字《 則 稼 釋 轉 協 文》有 爲 補 去矣。 案,稼 布二 補 然四 字 布 音 諧

室處」之前, 屋 治 塞向 野廬 墐 治 之 户」,治 屋 野 力 也。 廬 之屋,在「人執宫功」之 都邑之屋 治都邑之屋, 也 在 亟 人 其 此 乘

可

後

,皆豫爲之備

執 庶 從 禮 是 鄭 X 促之,誤 豕 人 國 雖 塞 同 而 有 咏 家 以 mi 朋 用 於詩 爲 故 大 已, 矣。 酒 響也。 八典,歲 國 亦 斯 獬 君大飲烝之禮 也。 古 饗」,毛 不 民 得 人飲 禮,大 歲 反 横 殺 舉行,宜 用 渠 羊 燕 傳 羊 解 夫 也 食 以 乎 爲 響 無 爲 説 ? 與 民 皆 故 公 黨 鑿 饗 劉 有 雖 不 īE. 非 君 冰 殺 常 不 飲 酌 度 羊 制 其 同 酒 獻 也 丽 羣 之 未 諸 羔 則 禮 兕 庶 聞 儒 之 總

> 如 君 民 自 觥 本 而 自 以 罰 有 勸 爲 意 爵 之飲 之,是 此 爲之乎? 制 尤 非 則 嫲 草 民 是 俗 野 所 抑 麻 之人 雖 以 公歲 或 古 敬 家 樸 君 無 歲 本 也 未 故 索 有 必 攜 民 況 此 之 相 壶 制 斯 酒 挈 狎 平 響 食 至 榼 ? 也 此。 就 也 如 民

覻 鴞

亦

非

體

矣

^ 然訓 與 杰 居 管、蔡之後矣。 不 書》 蔡 故 미 埽)毁我 仲 鄭 既 傳 周 解《鴟鴞》詩 默 謬 公居 本 取 書 常矣。 周室。」蓋 無 我子」二語 東 誤 遂舍《集傳》而 也。 鄭 即 乃 種 氏 是 亦 毛 後 種 誤 東 以 公《 之 則 害 以《金 征 云: 述 鴟 義 詩 辟 别 朱 鴞 縢》 爲 傳 即 者 朱《 》詩 之説, 寧 雖 致 傳 因 居 爲 亡二子, 無 辟 其 》从毛 東 作 明文, 於誅 晚 爲 孔 何 其 澼 年 氏

悖也。居東,辯詳見《尚書·金縢》。

殆祖 矣。 以爲 於葦 用 鳩 則不 云: 養其子,適以 孟子》,以鴟鴞爲小鳥, 章 亦名巧婦,即《小毖》篇桃 傳 · 萵 以 王説, 巧婦, 鴟 爾雅 鴟鴞, 鴞 ,此與《荀子》所言蒙鳩事 鴟鴞爲惡鳥矣。 云手 鸋 説 圃 鸋鴂,貪 鴟 病 病之,不託於大樹茂枝,而 音 陸 皆 鴞 同。 氏《 病,故能免乎 鴂, 鸋 埤 鳥 鳩。 惟 毛傳 \sim 也。」 雅》力證 王 陸《疏》釋鴟 韓 郭 一詩》謂 叔 蟲也,故 不 則 注 師《 言 大鳥 與 云 巧 相 鴟 何 其 楚 鴟 合。 趙 鴞 婦 之 鳥 是, 鴞 詞 類 岐 之 難 别 **>** 今 亦 愛 鳥 注 注 託 觀

云: 反, 經 本作戟。 予手 手 語 病 拮据」,毛 互 挶 相 病。 音 備 匊。 也 卒 - - -也。」「予 瘏 兼 韓 詩 手 拮 尝云 据 口 口 卒 則 撠釋文云京 瘏」,毛 拮 据 П 足 亦

> 此詩 爲 据, 事 戟挶 ,始兼 日 拮 也。 据。」 取 毛、韓之義 拮, 手 意 亦 與毛 共 同。 有 所作 《説 也。」因引 文》云:

東山

史 郡 頭 又 烏蠋 葵 之,非確見此 之下,亦桑 藿,似蠶 云 焉 形 名 蠋、《説文》作蜀、云: 中 注、 乎? ,中象其 蟲。 傳云 俗也。」 「在桑野, 而不食桑。 羅 毛晃 疏皆不言 野 身蜎 願 蟲之 之 蠋, 云 日 故 地 蜎。」今皆作蠋,殆 食桑 桑 知 也 \wedge 蟲 桑蟲。」 桑 詩》云『桑野』者, 蜀 蠋, 也。」《 也 蟲。 案,《 ,本从虫。 「从虫。 葵 則 是傳 又 爾 中 爲 説 此 雅 葵蟲 蟲 文》 第 詩 上目 * 以 順 亦 以 疏 而 信 又加 别於 象蜀 經 葵藿 食 申 蠋 矣。 蚅 解 毛 於 爲

語聲 程 進 爲 衎烈祖」、「禴祠 之烝,與冬祭之烝,雖及之,然不引《詩》「 然罩罩」,箋、疏 烝皇皇」,烝訓 王烝哉」,烝訓君,「天生烝民」,烝訓衆,「 烝之浮浮」爲 烝在桑野」、「烝在栗薪」、「烝也 字 烝 可言蠋,不可 紅有進 訓烝爲升, 不 書》 知何 Ш 以 衆、久三義。 詩 本。 釋 火氣上行,乃烝之本義。 厚,《韻 兩 烝當」爲 '言瓜,久義爲長 皆訓 即 言 烝 進 又案, 字,獨不 烝 義 爲 會》皆及之。 在 也。 久, 譜 衆 黄 何可 非 嚴《 氏 及 朱《 所 ^ 久 此此 緝》 《傳》以 韻 以 遺 無戎」、「 義。 會 得之矣。 也 喻 辯 其 **>** ? 之, 獨 \wedge 升 備 爲 「皇 詩 宿 烝 進 烝 烝 發 其 引 以

義。 之望 曲 杰 一,古注 今槩指行者思家言,趣味短矣。「我征 人情,不嫌 東山》次章是行 如此 重複。 ,既合敘意,又兩章各 者之思,三 程、吕 諸儒皆 一章是 遵 居 用 意 者 斯

> 苦, 栗薪 既以爲行者之語,遂謂 不見之久,寫 因 今三年」,言久不見君子也,感 聿 [洒埽 至 思致纖巧,恐非古人文義 」,喻君子留 以 言 待 我 其 之行 室家 來。 滯 者 望 於 又指 1當 歸 外 遂 之情,婉 三年不見,是不見瓜 也。 至 瓜苦爲 也 陰 自 而 喻 瓜 我 ন্য 至矣。 苦、 不 而 而自言 見 興 于 在

來已久。《玉篇》作蠨,先幺切,則此字音形之改,其以肅得聲,陸氏所云乃叔重之舊音矣。案,以肅得聲,陸氏所云乃叔重之舊音矣。案,以肅得聲,陸氏所云乃叔重之舊音矣。案,以肅,《觀文》作嘯,

蠲 是 根 光,乃茅根所 也。 所 是也,亦名宵行。 化 本草綱 亦名爲 種 長 化 目》論螢有三種。 如 蠲 蠶 吕 氏《 尾 ^ 明 後 月令》「 堂 種水螢,居水中 有 月令》「腐 光 無 腐 種能飛有 翼 草 爲 草 乃 竹

飛。」 言 傅 李 得分而三之? 氣 後 會。 而 氏此言,始未 生 此 翼 通義 一,或草或水,隨 案,宵行 説 了,其 初 得 時 如 之。 如 蠶者,是初 蛹 必然。 非 至宵行之名,是因朱《傳》而 又螢 蟲 腹 名,楊用修 下 近棲託 從 螢之化 草化 有 化 光, 時 故 也, 數 亦 爾 辯 是 得 H 先 之甚 陶 變 濕 有 種,安 熱 隱 而 光 確, 之 能 居 而

説

載《

得,遂 知之。 也。 其上,誤矣。 故 雨 得 H 及 韓 鸛 毛、韓 帶 毛 而 謂 疏 鸛好水,長 云: 始 之 蛇 蟻 明 亦 好 也。 兩 知 《草木 者 水, 無 家 雨 垤, 並 明 師 至鳴 如《 而 不 蟻 解。 授各異, 鳴 出 疏》言鸛 云 東 塚。 垤,鸛 而喜。」此但 之必 好 山 朱《傳》求 食蟻。 **>** 將陰 詩 於 然 就 食 垤 鸛 毛 食之,遂鳴 魚, 雨 傳 朱子 鳴 ,則穴處 其 言 初 之 埤 于 説 不 蟻 雅》言 此 意 垤 言 之 而 於 知 先 是 不 其 有

> 然矣。 殆 將 日 雨 文選》張華 見 雨 0 格 物猶 垤 而 鸛 蟻 《雜詩 而 未 水 出 知 至 壅 鳥 》注,李善引之。 之, 土 與 ? ,鸛鳥見之,長 巢 故 喜 居 案 知 而 , ^ 風, 鳴 蓋 韓 鸛 也 詩 穴 鳥 鳴 居 傳 薛 本 而 知 意 君 不 喜。」見 雨 始 章 知 曉 將 天 旬

字矣。 類。 爵 本又作雚。」不云字又作雚,蓋 鸛旁之鳥爲 合此二説,灌、鸛大小異形,定 鳥,乃俗人之誤 增》、黄氏《韻 于 旁,如鷹、 也。 垤」,故後 何獨 説 陸氏《草木 文》無 疑 於鸛乎? 鷦 俗 儒 會》直 皆 所 鸛 鵻 字, 加 以 疏》云 鶴 鸛、 然《説 非 謂「雚已从隹 面 等皆是 東山 雚 **權字** 篤 爲 論 文》云: 一》釋 注 也 鸛 詳 字。 引 亦不以 文云: 非 似 見 字 詩 鴻 總 兼 毛 鳥 而又 而大。」 嚾 詁 鳥、 氏 爲一 雚 Ě 鸛 以 小 加 韻 隹 鳴 字

破 斧

琳 風》七篇,《 七月》、 ^ 鴟 鴞 × 《狼

跋

於義 大夫作,朱子 詩 (俱 敘,朱子 通, 無關 以 無 譏 得 爲周公自作,此稍異矣,然 失 焉。 也。 《東 《伐柯》、《九罭》二 Щ 一》詩 敘 以 爲 周

詩,敘以

爲

刺

朝

狂

不

知

公,言公不宜居

東,

不能 似 而 王當早迎公歸,朱子則 勝 欲留之,二説乃大 及一 也。 方,東人留公於東,何爲 公在朝 則澤及四海,公 八相反。 以 爲 較 東人喜得見公 而論之,敘 在外 乎? 則 況 義 惠

而 則公之身 公之居東,因王疑未釋也,王 西 歸 ,王室之幸也,天下之幸也, 一日不 安,何足爲 公喜 疑一日未釋, ? 王 亦 疑 東 釋

新切

於民

用

,喻國家

之

有

禮

義

四

或

一破之、

如

人之幸也,不以爲喜,而

顧欲留之,斯

乃兒

詩

女子之見,非有識者之言矣,夫子豈録其

原無 T. ? 不 至《 通 傳 破 斧》篇 以 四 或 美 爲管、蔡、商、 周 公 而 惡 四 奄,有《 或 敘 尚 説

所作,以荅前篇 書·多士》篇 可 證。 不 知 朱子不從,而 何 所考據。 又 改爲軍 訓 或

而詩人惡之,何謂 無理 哉

爲四方之國,

而譏

敘

爲

無理。

夫

四

國

作

亂

毛云: 「隋駝、妥二音。 銎 曲容切 孔 也。

日

以 斧,方銎曰 取桑,非兵器也。 斨。」然則二者皆斧耳。 毛又云: 鑿 屬 嫲 日 人用

木屬曰 銶。」孔氏未能審厥狀, 而《 釋文》以

此詩 兵器 銶爲 每章首二句,毛、鄭本以爲 也。 獨 頭 《集 斧,則二者 傳》謂爲征 亦斧 伐 類 所 而 用,殆 興,毛以斧 制 稍 不然。 别 非

缺之,是其罪 也。 鄭 以 喻 成 王、周 公,不

毛 義之正大。

朱子既以《破斧》詩

7爲軍

主

荅周公矣,

發兹歎美之言。 者,特出於己之臆見耳,乃 之計,蓋亦莫非聖人之徒也。」夫創爲此 皆能以 又 於下,殆若目見之,其自信亦篤矣哉 從 圃 周公之心爲 爲 之説 日 : 周 心, 公唱於上,衆軍 當 加 H 不自爲一身一家 遂據 披 堅 爲故 執 鋭之人, 實 土 和 説 而

伐柯 九罭

公,亦見王之迎公當早也。 以 處公,即上篇以 言迎公當得其人,次章言迎公當厚 説。 王以迎公之道,詞旨畧 九罭》篇首尾皆言衮衣,欲王以上公之位 鴻不宜於陸、渚、喻東土下國、非所 鄭謂 伐柯》、《九罭》 刺羣臣,非 也。 禮迎公之意也。 E 皆 肅 刺 相 孫 王不 同。 毓皆 毛、鄭、孫、王 是 ^ 知周公,此毛 毛。 伐 中二章則 柯》首章 而 其禮。 以 因 諸 居 告

> 而已。 爲訓 家説 白 讀者絕無觀感 人之私情 已,於《九罭》不過曰「喜得見公,惟 之情,好賢之意,纏 用周公,又惟恐王之待公未盡 之德爲人所説 於後世 「首章比見公之難,次章比見公之易」而 也。《集傳》悉埽 雖 夫東人以見公爲 小 ,何關 殊, 而 ,且使古人作詩之苦心,無由 服,亦 朝 大旨 廷 緜 理 見 不 懇 斯 一亂之故哉? 作 外 惻,具見於詩 喜 義 詩者 此 而欲留之,乃一 ,於《伐柯》不 其 惟 不 道 恐 獨 不但· 恐其歸 王 見 之不 故 憂國 周 调 足

以 退 狼 兩 爲 難 詩 之 以 惡 喻 狼 潤 爲 非 初 興, 所 不 但 計 以 其 取 喻 物 其 聖人,故變其說, 之 跋 胡、 善惡也。 疐 尾 爲 伊]]] 進

自如 倫,反狼之惡,以 爲 狼 以 ,意甚美矣。 欲 而陷 然以 見聖之美,是 於機穽,公以 狼 喻聖,固 無 又以 欲 爲 、聖與 僻 而 非 舒 其 泰

較論善惡也,亦非所以尊聖。

出。 辟告老,故云孫此大美耳。 非 言,非敬公,乃譏公也。又案,公孫謂 周公之遭謗,豈 秋》襄十四年杜 釋其 自出 氏所逐,《 自解曰: 耳,不使讒邪得 公之被毁,非四 -謂遭 _ 噫 ! (旨,謂譏其君之自取,以示警也,見《春 爲 公孫碩膚」、《集傳》以爲詩人之意,謂 文,並 春秋》却書『公孫于齊』,如 過矣。 「作詩之體當如此,如 注。 一無書某人出其君某者。 公攝 爲魯諱,惟書孫,不書 加忠聖也。 國之所爲,乃公自讓其大美 亦自取 《春秋》凡諸侯出 政 七年 乎? ·,致太平,一旦復 或譏其傷巧,又 「赤舄几几」,則 若如朱子之 昭公爲 奔,皆以 致政, **一奔耳**。 其 先 自 儒 季

又言其留相成王之事。

陿矣。 可笑。 几當 安重 意。 而德 約是舄 訓 ,特其一端耳。 ·稱其服,居位無慚之意,自可想見舉足 詩但舉公之服 「几几」,傳云「約貌」約字亦作屬,見《玉篇》。 王氏 頭 爲安。」安石最多 飾 謂: 几几几 飾,以見公之留相成王 即 几乃 執此以爲公之美意,反 其 貌狀, 人所凭以安,故 傅會,此 初 未 尤 及安重 鄙 几 凌

一六八

毛詩稽古編卷九

吴江陳處士啟源著

鹿鳴 之 什正小雅

小

雅

樂,國君以《小雅》,天子以《大雅》。 謂《文王》爲兩君相 或上取,燕或下就。」所謂上 天子之樂,斯言謬矣。 雅》、二《南》,不歌《大雅》,可見《大雅 劉瑾申之,以爲考《儀禮》上下通用止《小 朱子以《鹿鳴》三篇爲上下 見之樂、《 鄭《譜》云: 取 禮記》言賓人 者,如《 -通用 然而 左傳 之樂, 》獨 用 響 於 爲

鹿鳴

相槩也?

華》二詩,何不併以燕饗通用釋之,而仍從 作詩之本意也,與《四牡》之勞使臣、《皇華》 之遣使一例也。若夫升歌合樂之類,則就 見《儀禮》、《學記》之文而改訓之,曰:「此 見《儀禮》、《學記》之文而改訓之,曰:「此 ,那合樂,必三詩連奏,朱子於《四牡》、《皇華》 升歌合樂,必三詩連奏,朱子於《四牡》、《皇華》

射》、《大射》諸篇,稍及奏樂之制,何可執以 多,所存諸 孔疏引證,瑾獨未見乎? 廟 大門而 》,下管《象》。 奏《 侯之禮,止《鄉飲 肆夏》,又言 《傳》、《記 兩 》既有明 君 《儀 相 禮》闕 見 燕 升歌《 文,又 禮 **>**′ 逸甚 經經 鄉 清

一六九

歌《鹿 非 敘 乎 《诵 所 義 以 ? 鳴》者 釋 沂 當 詩 世 則不 矣。 耳 鄒 忠 僅 旧 允 燕, 作《 辯 之, 燕饗 鹿 鳴 以 通 爲 者 用 是 專 亦 非 爲 非 非 燕 響 mi 説

箋義 亦言 求 食,故訓 苹 耶 食,食萍 ,葉青白 「嘗畜麋 兩 長矣。 字, 青 云 爲 色, 容 而物色已不同。 藾 鹿, 色,莖似 又孔氏申箋,引《草 有之,不 蕭。 白 苹 性 莖, 一嗜水草。 宋羅 蓱 如 也。」 箸 必 箸 願 而 易 鄭 輕 謂 傳 誤耶 然 以 肥 廊 止 經 水 豕 近 倒 ? 木 明 朱《 草 亦 儒 置 疏 言 抑 就 非 捎 (傳》 * 野 白 他 水 宧 鹿 苹 有 則 光 旁 所

禮》注之説 或 四 之臣 牡 嘉 一及諸 賓 《皇華 一、毛 也, 侯 鄭 上》等篇 之使,蓋 殊不 專 指 知 羣 皆言 孔 本 臣, ·於《鄉 疏 己 朱《 己 或 有 飲 傳 羣 辯 V 酒 臣 矣。 兼 指 鹿 又 燕 本

鳴》不應獨異,畢竟古注爲優

之餘 必有 位 作 音 " 此 孔 見矣。 德音」爲先 解 昭 後 後 即 儒 訓 如《 釋 爲 箋《詩》方 經 嘉 鹿 所 王 鳴》篇 賓之明 立 一德 新 教。 改 説 德 周 訓 當時 康 行 「周 往 訓 往 成 行 舍彼 是 爲 注 爲 先 至 《禮》時 圃 道 周 儒 取 之列 吐 己 棄 德

於下 月生 皆白 必 結 蒿」,皆直云 雅 實 以 *** 苗 如 , 此 他 蒿 粟 之 名 蒿 莖 蒿 米。」《本經》名草蒿,又名方潰 類 相 葉 獨 鼓」, 1蒿耳, 别 甚 俱 青, 也 多, 深青 去 殆 刃 不若 ^ 惟 切。 此 本 七八 青 異 草 莪、蘩、 \wedge 蒿 與 綱 詩 月有黄華,甚 ? 得 目 Š 亦 專 ** 、
、
、
、
、
前 又云 云 蒿 名。 食 之屬 諸蒿 野 ^ ′;列 細 之 爾

知 何 語 云 而 疏 疏 圃 敘 後 鄙 義 云「有 説 鄙 哉 也。 ? 功 夫見 視 且敘言見知 圃 土芥、寇讎之論,尚 見 知 知則説矣」,朱子 而 説 ,人情自當如此 則説,不言必 譏其 待 藴

沙初作 文》煮 池語 無董 袤 案,今《 傳以不堅訓之。」《大全 五 光 一十一里,廣七里,周一百一 氏 攻 海 E 所云 煮 爲 説文》鹽 緻 事 爲 妄説。 海 **□**, 靡 鹽 鹽 蠱 況池鹽 煮池 四 字注 又案,毛傳 盬 牡 日《記 字 》云「不 爲 云: 乃風 》亦 注 盬 載 云 引 結 董語 堅 釋 盬 董 鹹 成,不用煮 苦 固 盬 氏 ,誤以 十六里。」並 也 河 字、《鴇 而 日 東 爲吕 易 : ^ 古 鴇 鹽 敗 |《説 者 氏 羽 羽 池 日。 宿 故

也

訓

文,證 不堅緻之義,此説 疏 以 蠱 . 鹽、 疊 是 蟲之害器敗穀者 字異義 近之。 同, 引 昭 故爲不 元 年《 攻牢 左 傳

案,嘽 相蒙 曰 : 武》「嘽嘽」毛訓盛貌,遂合彼 也。 息貌 云「馬勞則喘 0 解亦殊,始知 則喘息乃本訓 矣。 朱子見《采芑》「嘽嘽」毛云衆 ,「駸駸」爲 傳 字 嘽 訓 原 此 嘽 「騑 从 ,衆盛之貌。」 爲勞使,彼皆 息 騑 三,蓋 旁,《 、驟貌 古人釋經 爲行不止貌,「 矣。 以 説 皆取 馬之勞,見使臣 文》云: 與「勞使 用 出 疲苦之義 意 軍 兩傳以 精密 義 嘽 嘽 臣 各有當 嘽」爲喘 也,《 也。 訓 故故 喘息 義 此 之勞 常常 又 詩 又

鶏,不、 記》引郭注 住 傳云: 鴀、鳩,各音韻 云 郭注 離,夫 今鵓鳩。』《 不 同 一今鶏 也。」《 而 字 鳩 集 形 爾 傳》亦云 異 蓋 雅 也。 夫、鴂、 **>** <u>云</u> 吕

七

·詩稽古編卷九

《方言》、陸氏《草木疏》諸書皆無鵓鳩之名, 譌, 是 忽切 鵓字不 誤 則鵓鳩之名,殆始於宋世。 《埤雅》 鶏 鳩兩名並 爲 鳩 口 見《説 辨鵓鳩 鵓 鵓 哂 , 鴻音速。 嚴華谷論 矣。 繼 列。 文》,而《玉篇》有之,云: 非鳴鳩,亦不言與 則 大抵 案,《爾雅》注 鸦、 鳥。」不言是鳩名也 鵓 鵻 鸦 分爲 有十 鵓字形相 兩 四 疏、《 稱 名 祝鳩一鳥。 似 而 廣 譌 鶏 雅 以 始 一步 鳩 惟 仍 也

皇 皇 者 華

爲 鳴 見《六月》小敘,其先 鹿鳴》之三」也,見《儀禮》、《左傳》諸書, **※** 《 四 先遺後勞、《 詩 牡》、《皇皇者華 之次 弟, 皇 華》當 雖 後 閒 不 <u>*</u> 有 在《 可 倒 易 詩,所謂 四四 置 矣。 牡 者, 》前 李氏 然 鹿 直 以 又 歌

> 謬 説

鄭後司 《魯語》 王肅 旨。又末 無 是斷章立説,未必 方書》,及《鄭》詩之言「懷」,皆 語》姜氏引此詩,戒重耳顺身縱欲,又引《西 文本作和,其作 及。」孔疏 <u>云</u> 私 毛傳無「每,雖」二字,又據《春秋》外 也。」 雖内懷中和之道,猶自 所 爲 即 及 鄭、 每 每 農云: 心此 穆 每 用 懷」語, 王 懷靡及」,傳云 子 並 章毛傳云: 人懷其 以 各 日 載其説,而 述毛,於義 Œ 首 : 述毛意, 「和 因 私 私 章「每, 此詩本訓 破 者,亦即 當作 懷 ,相稽留 毛 和 允當。 不辨其孰是。 傳「 脯 雖 私 爲 以 雖 。」則是《 每懷。」韋 無 説 鄭説 一每 有 和 ,則於事 也,懷私 所 不 中 懷, 爲 孫毓《詩 一字爲 及。」鄭所據 雖 和 同 耳。 私 和 魯 當自 · 將無所 恐非 義 王 昭注引 不私 傳「懷 之解 惟 語 云 評 》原 謂 晉 毛 要 和

和爲 義,皆曲説 亦 私, 毛傳上 又 也。 彊 下 解 自 中 相 和 申 爲忠信 成,得之矣。 以牽 合 鄭 「周」 既 破

《傳》四字皆作二反,似不必。《禮部》『十九侯』,諏字將侯切。」然則《釋《禮部》『十九侯』,諏字將侯切。」然則《釋《説文》及《玉篇》皆同。《示兒編》云:「今

也。 爲使臣之德,故傳云自謂 注於五善之外取「周」以備數,與毛公詩 六德,無所及是謙 不合。孔氏申之,言周者彼賢之質,不應數 文自明,注亦無異義。 德」之説,咨、諏、謀、度、詢爲五善,内傳本 也。 外傳之六德,本文亦自明矣,云: 春秋》内外傳説《皇華》詩有「五善 源謂 毛義 誠勝,但孔疏之言猶未盡 虚、謹慎之義,當以 至外傳 無 所 及於事 之六德, 之爲 則 韋 成 傳 昭 六

> 乎? 和爲 能掩其失也。 德之一,誤又與韋等。 懷和爲 外,「雖有中和,自謂 爲兩德,是其誤也。 内傳之訪問於善爲咨耳。 語是矣。 之以六德。」據此文義,則所謂六德,即上六 咨親爲詢 ,與外傳正相符,義不可易矣。 每懷 又謂傳「中 一德,而康成破和 「忠信爲周」,言答於忠信之人,即 ,忠信爲周。 ,咨才爲 和」是釋「周」義,而指爲六 諏, 咨事 懷和爲每懷,在五 無及」,傳以 孔 君況使臣以大禮,重 疏雖 爲私,懷私 爲 周、咨一義,章分 謀,答義 曲 爲 備 且 口 六 穆 可 1護,不 爲 德之 善之 謂 叔 度, 德 以

常棣 伐木

、皆燕也。然《常棣》兼飫禮、《伐木》兼食《常棣》之於兄弟、《伐木》之於朋友、故

舊

禮 文律之。」理 或 Ħ 或有 文王 然 一詩 當 殷 《世,不 得 以 周 家 禮

孫 和 應 族 謂 記 稱 内 兄弟,九族 之兄弟也 稱 兄弟,九族 〈常棣》之朋友,而《常棣》之兄弟,非《伐 之親 兄弟, 矣。 外 之朋 爾 相 . |箋云: 大傳 與 溷 常常 友矣。 異 也 不 竊當辨之。 棣》、《伐木》 常 姓 》所 當當 以 可 以 棣 信,俱 明謂 外 謂 内 以 稱 九 **>** 九 公歌《伐 六六 也。 六 九 朋 也 族 族 《常 章, 友。 族 次從 世 内 \sim 九族在五服之中, \wedge 兩 内 己, 木》 親 伐木》之父舅兄 伐 歌 傳 棣 詩 九族之外 外爲 屬 木》之諸 上至 云 以燕之,兩 所 》之兄弟 常常 竭 言 棣 斷。 矣」者 一高 崩 以 祖 友 九 無服 父及 ^ 常常 燕之, · 下 兄 也 在 族 詩 禄》之 斯斯 弟 弟 九 至 會 同 所 IÈ 即即 木》 族 玄 禮 用 九 姓 日 可 口 名

兄弟相承覆而榮顯,朋友相切正而和

《總 木 通 直諸 詩 平 兩 公作詩 然經文本 則 深 之,使其 兩「豈字、 集傳 % 上 上 微 求 興鳥鳴,又以 其萼然 話》。 則 則豈有 旨 也 語 ()字尤 寓 是點金成 語 乎? 時 於此 槩 旬 實二 方 其旨於興 朱《傳 無此 而 尚 法相 兩 芟 成 如兄弟者 屬 外見者,豈不 無 兩詩將先 其 前 倫 「乎」字 興 横 六字,朱 當於六義,必待二千載 釋《 似, 鳥鳴興求友,殊滋葛 鐵 **>** 要道 不 體 人,不 釋 中 也。 用 耶 不復 常 興 乎?」 棣 後 , ? 相 此 體 儒 而 至《伐 顧 子 呼 ₩ El 論 先 之學 華 誣 文義 韡 始增 應,是 常 往 其 儒 矣! 以 ·萼 . 韡 : 木》篇 義 棣 往 言 ,者,何 爲 乎? 相 × 趣 今讀 用 興 兩 承、 乃 常 又 耳 數 所 伐 興 「則」字、 棣之華 别 藤 六 嚶 則 之 凡今之 自 助 以 有 木 體 字 豈 不 後 鳴 以 窺 語 不 辯 矣。 **>** 伐 其 中 之 周 詩 厭 切 兩 衍 詳

萼相 孔氏 兄弟 如 稍不同,鄭義勝 此説詩,方可以 承 申之,云: 常 而 覆 棣 毛取衆 加 之華,萼不 光明,猶 矣。 多 興。 華 爲 多 義,鄭 兄 下 韡 而 有 弟 難」, 不睦 萼, 萼下有 相 取 和 毛、 相 ,安用多乎? 順 承 鄭 愐 覆 皆以 榮顯。」 : 柎, 華 爲義, 興

璞語謂 木。 有赤、白二種。 **鉛證之,●則鬱、** 小雅》之常棣常 鬱實大如李 い、棟 孔疏謂 各 栩 風》之鬱, 木矣。 「鬱即 **薁是鬱類** 《史記 而色赤,棣實如櫻桃 薁各 一 木矣。 車 華, 陸《 車 下 相 白 下 疏 李, 而 棣 李 如 小别,又引晉官閣 棣 又 樹 也。 傳》注徐 謂 實 也 似 陸 薁, | 疏 櫻 三者各 而 廣 薁 郁 桃 IE. 》謂 李 李 引郭 白。 也 實 則

> 甚。 之曰: 矣。 常棣爲郁李之别名,是合三木爲一,其誤逾 草》,於郁李條下引陸氏、《常棣》疏 李氏《綱 大如李,常棣 棣兩木,未嘗誤 陸元恪以 後 世 「一名薁李。」是合 目》 説 既 者 實 唐棣 襲其 多 如 誤。 李 也 誤, 爲 而 郁李, 掌 小。」則薁、棣各 又以鬱李、 禹 薁 錫 固失之,至釋 棣 修 爲 車 · 而 嘉 木也 下李、 妄益 祐 一木 本

矣。 儒釋常棣,並 昇所 目 如李,棣小如 》既以薁 然則陶 謂 鬱、薁、棣 子 如櫻桃 爲 隱 櫻桃。 野 無言其 三木 居 葡 所 萄, 甘 相 謂 薁 李 酸 名薁李者。 類 又以常 子赤 而 而 是 薁,非 少 結 色可 濇 實 棣 異,鬱、薁大 爲 咯」, 寇宗 《本草 | 薬李, 常棣, 奭 韓 保 所 綱 先

「官」、嘉慶本同、康熙抄本、大全本、《四庫全書》本作「官」、嘉慶本同、康熙抄本、大全本、《四庫全書》本作

0

毛詩稽古編卷九

但 謂 西人謂 古注言「棣,今之山 常棣子熟時 不 ·得 加 謂之薁李耳。 之棣子」,所言名状正 御 李 Ē 子 赤 紅 色, 熟 櫻桃」、《急 可陷 又《漢 可 啗 1,俗 書》《相 者 呼 與《本 就 定 小 如 篇 櫻 是 傳》。 草 常 桃 注 · 》諸 隴 棣 師

注合。

以合 指 《示兒編》辯 世 李善注謝 世已然,李商隱詩云: 漢 詩》,皆作棠棣 此 有 1雅 草 因音誤故字誤 常 杜 意當 華 俗 棣, 業 宣 呼 稱 傳 常 其 遠 時常字已有棠音, 棣 》引《詩》作棠棣, 目, 本 詩 棠, 誤,當矣。 ,傳寫之誤,不 及曹 併改「常」下从 如 華色 也 字, 子 黄 俗 「棠棣 建 今案,此 春 閒 親 乃 故 末 知始自 師古注 親 黄華 有 開 顛 木耳。 表 誤 讀 倒俗 李 發。」近 大抵 棠 亦 何 兩 詩 者。 同, 呼, 年 又 引 唐 定

「萼不韡韡」,鄭讀不爲柎,訓萼足。今

桁音 發聲。 後矣。 華不 是。楊用 否。 本萼 皆 世並 讀 久 皆 於是不字有 「夫」協 游 酬 切。」 祖 與 从 劉 楊 又因 雖 協韻 不之不,音跌 其 Ŧ 注 讀逋骨切,蓋始於温公《指掌圖 加 弗 柴 又辯 最古 説。 然箋云「古聲 韻 古詩《日 肅 ılı 孫 桑 S',亦作 修《丹 義 同 是 餘 奕《示兒編》、陳 讀 3.借爲 「反驚 詩》「不」 甫鳩、甫 韡 黄公紹《 , ~ 也。 不 X 内 字从琴,不从琴,此 谿 鉛 柎 出 聲 孫愐《 不 典》「不」也 證 俗 音 東 總 口 之,尤 示、柎 矣。 録》論 因音借 久、分勿、逋 也 南 與 韻會》遂 案 之不,音弗。」斯言 隅 唐韻》始有分勿 , 鄭 周」、「秋」、「疇 又 行 説 Œ 同 爲 爲 夾 甫 》,「不」與「敷 **萼不」之義** 敏《 作 文》 詳 收 可不之不, 漈 鳩 此 則 確 遯 骨 人二 切 云 音 甫 語 四 齋 **>**,以 矣。 久切 陶 説 切 亦當 沃 閒 不 見《 靖 不, 切 覽 杯 韻 近 引 良 而 節 其 通 甫

亏聲。 舜,象草木華下舜形。」俗借邊垂字,誤。案, 雩音吁、《説文》云:「草木華也。 从舜

隸無弩字,遂从藝作韡

方困 之事 原野 恃。」此説得之。 聚喻兄弟相求,義甚迂緩。 ,當死生患難之可畏, 俱未安。 ,惟兄弟相求,解裒 窮 原隰裒矣,兄弟求矣」,鄭箋以原隰 離 散,羣聚 伊川云: 郊野時, 爲 此 則思兄弟之助 積尸,亦屬 則求兄弟相依 朱《傳》謂積 章 敘兄弟相 武 斷。 賴 尸 相

點者 爲發 語 郭忠恕《佩 況瘁」仍從毛 正 語 《玉篇》、《 與《邶》詩「兹之永歎 説文》云 況也永歎」,毛云: 詞, 觿 又欲破字爲怳,左矣。 集》,始别况、从二。 訓 廣 兹。 「寒水也。」有从久,旁二 韻》以 又案,況从水,旁三 爲 公同。 「況,兹也。」則此 俗字,得之。 朱《傳 况、況爲三 《出 「車》詩 以以 宋 況

餘義皆借。《正韻》襲《佩觿》之謬。形況。」此乃妄説,古止有一況字,訓寒水字,云:「況,發語之端。况,寒水也。況

「欢酉之跃」,毛云:「跃,私也。」《爾亦不必改音矣。朱《傳》則從内、外傳。傳》及外傳之文。」據陸語則務字不必改字,《爾雅》云:『侮也』,讀者又音侮,此從《左《外禦其務」、《釋文》云:「務,如字。

氏。 云: 飫 似 从勹鼤聲。 故通名之與? 異,許以 不在公朝,故爲 雅》義同。 以爲曆。 遂譌 案,厭飫字本作匓。 飲酒之飫」,毛云: 「飫,燕食也。」飫立 燕飫爲 飫 \wedge 箋、疏 唐韻》亦云: 爲 俗因 燕, 殆因詩 厭飫。 今作「厭飫」 申之,以 私,良是矣。 飫義與燕連,而 ^ 左傳》「飫賜」, 本 匓,鲍也,乙庶切 爲飫 飫,飽也,厭 而燕坐,二禮本 燕 「飫、私也。」《爾 解, 兄 《説文》引 禮 弟 燕、厭音 在 則 丽 路 始於蘇 説 寢 杜 也。 内 飫 解 相 此

併亡其字矣。 後儒相承,竟以飫代匓,而飫則亡其義,匓

以孺子慕親牽合爲親慕之義,爲費力。穆相敘次,二義不同,合之方盡屬意。後儒同。王與親戚燕則尚。」毛、鄭云屬者,以昭、「和樂且孺」,毛云:「孺,屬也。《爾雅》

伐木

也。 父、諸舅之稱,天子所施 稷,故知是食。公食大夫禮 饗亨太牢,故知燕禮用羊。 皆天子之事 友以成者。」此泛論其理耳。 八簋,天子之食禮 父舅兄弟而以爲朋友者,天子之下交, 敘云: 也。 「自天子至於庶人、未有不須 肥羜,天子之燕禮也。 也。 若諸侯燕,牲以狗,不用羊豕。 燕惟 六簋,故知天子八簋。 於同 飲 酒,無 若詩所言,則 姓、異姓之臣 飯 食。 簋 天子 盛黍 諸

> 親,即 矣。至臣庶之取友,則不僅是。 不 過 百 王姻黨,舍父舅兄弟 辟 卿 土 周 之布 在 列 丽 外,無 位 者 可 非 爲 王 友 懿

知舉伐木可兼鳥鳴,古多省文也。李氏以 爲興,止因二、三章皆承伐木爲端耳,殊 高木者,鳴求在深谷者,喻君子居高位 忘故友,三義也。 而遷,喻友自勉厲,得升高位,二義也; 木而驚鳴,喻朋友相切直,一義 四牡》詩「將母」例之,良有見。 伐木》首章 毛傳取 興 而 取 興本優,鄭易傳 義 凡三 也; 既 聞 不不 不 不 處 鳴 伐

矣。 聲,引《淮南子》「舉大木者呼 毛公本漢人,何必舍毛而取《淮南子》。 云: 「伐木聲。」朱《傳》解爲衆人并力之 然以漢 許許,傳云: 語 證 周詩,恐未 「林貌。」《説文》作所所, 足 邪 心據信。 許」證之,似 況 小

兄弟無遠」,箋云:

「兄弟,父之黨

姓也。 此章言兄弟,則朋友之同儕者,何得獨遺 尊卑之等。」其意偏指異姓爲兄弟矣。 母 言父舅,則 亦可言兄弟,箋、疏之意,皆以兄弟 之黨。」 朱《傳》曰: 疏 同、異 引《 爾 姓之尊者,皆可爲 雅 「先諸舅而 • 釋 親 》之文,謂 後兄弟者 兼 朋 上章 同、異 妻 友。 同 黨

許許, 阪, 其説 句。 爲一疏,作三次申述。 毛,當六句一疏,分爲六條,今乃總十二句 下疏 諸 孋 舅」爲二章,「兄弟無遠」爲卒章。 》、朱《傳》從劉氏説,分爲三章,章十二 語 良然,然此不自劉 劉氏以三「伐木」爲章首,故分爲三章, 伐木》篇毛傳分爲六章,章六句。 吕 酒有衍」爲卒章上二句,又指「諸父」、 孋 統釋 酒 有與」爲二章上二句,「伐 一章,例置每章之末,此詩若從 又小敘下疏指「伐木 氏始 也。 案,傳、箋 是此 木于

> 吕 句,當援 章忽有異同,又不明言其故? 氏 詩三章,章十二句, 亦 也。 止 但孔 云 孔 從劉,俱若未見孔疏者,此皆不 疏 疏釋《詩》專遵毛、鄭 爲説, 圃 孔 竟以己意 疏 已 如 此 劉欲改 斷之。 何 不 此 始 毛章 詩 於 分 劉

天 保

可

解。

姓乎?

聲。 字當 讀。 底也。 能下下以成其政」,此一上三下,惟中閒 篇》、《廣韻》上字訓高者音去聲,《韻會》以爲俗 義與《説文》同。 訓 上去聲 其訓爲上之、下之者,則 ^ 説文》云:「上,高也。 登升者音上聲,與《説文》異。 户雅切。」此上、下皆指 耳。 《釋文》云: 《天保》敘「下報上 下 讀 其 時 去聲。 ·下俱 位 掌 當 切。 一也。君 下字音 户 讀上 **玉** 下, 下 嫁

一八〇

反。」恐非是。

新、 況 除 云 讀去聲。 也。《集傳》改除訓 福 舊 禄 ·積累, 何 開 之來,但 福不除」,傳云: 其 出 演 以 不尤爲 平聲者,訓 子 欲 之。」故《釋文》「治 其 福 增 而 之大乎? 新 爲去舊,即 不 「除, 改其音,疏矣。 何 取 於 開 開 去 也 除官之 慮 ・」箋 出 舊 反, 義 ?

然《説 解。 與翦 雅 義,迂矣。況福義本可通,何必求 頌 釋詁 案, 同 實 文》 戰字注云: 戳 始 聞 穀」, 圃 文。 人氏 訓 翦 爲盡,吕《記》、嚴《緝 商」爲證 傳云: ^ 之説, 《集傳 V ,故合戬、翦 敦 止因《説文》戩 滅 戩 聞 也 人滋之説 轉一。「 福 也。 新 滅 以皆從 爲 義 本 常字引 爲 謂 ^ 耳。 盡 此 戩 爾

祭,往事先王也。案,周之追王,雖止太王、「于公先王」,毛訓公爲事,謂四時之

成》稱 義不必易。 王皆是。 王 Ŧ. 一,外 季 然后 傳 后 稷爲 不 此詩言先王,足兼諸盩已上矣, 窋 稷以下,亦統稱 稱: 先王、《周禮 先王,又數后稷至文爲 大宗伯》皆 先王 一,如《 書 + 稱 • 傳 武 Ŧi. 先

姓日 以 以 也。 爲至治 食」,與此 食、相燕樂 歸 爲民皆質 用 美於君 民事盡 民之質 也。 而 不 義 而已。 程子訓 知,《 同。 E 實 平,則 矣, 耶 無 ? 「易大傳》之所譏也、《詩》反 虞之無 僞 日 《易》需 質 爲君上者,惟 用 日用飲食 爲 飲 實 爲 食」,質 介而 ,周之垂 桂 九五「需 《集 而 有 傳》因之, 一拱,所 成 日 也, 夫 用 于 白 以 飲 酒 平

證之。 黑義 釋詁》文。《集傳》改 耳 然訓 一黎百 況 用 黑者本 姓, 秦言以 笺云: 作 黧 解 訓 黑 周 黎 詩,何 訓 愐 黎, 履 以 黏 秦 衆 如 也。」 徑 或 言 遵 借 黔 首 周 爲 本

公之《爾雅》哉?

訓 之恆 **云** 訓 義,解 義 登切。」《天保》恆訓弦,古恆切。 月,乃以 義各别。 反。沈古恆反。」則此恆,元與訓常之恆,音 也。 也 爲 如 古鄧切,其皆借乎? 《釋文》云: 古文恆,从月。」作死因 則恆 俗作恒 稱 常盈 嚴《緝》謂 月之恆」, 「常也。 願 字 其 而 元以月取義,上弦未必非本 君 不虧。 从心,从舟,在二之閒 乎? 毛、 恆 恆,字 鄭 無 夫古無 案,恆,本作恆,《説 弦 訓 義 亦 爲 止 引《詩》「如月 然 月上 作 盈 《説 -緪,同 **《**生 有常久之 而 弦, 不虧之 文》 一民》恆 古 此 又 胡 鄧 古

采 薇

正雅篇次,皆周公所定,其先後之敘,

先。 戎, 記》言文王 戎、《縣》詩之混夷、《孟 爲非文王詩,殊不知敘之昆夷,即 役,故歌《采薇》以遣之。」晦 北 薇》詩敘言: 作,遂謂以後諸詩皆非文王事,左矣。《采 見,良不妄也。 然,於《魚麗》敘下, 之,託於文王,親兄弟之義。王 誅,若在成王詩中, 雖作於成王時,既在治内之列,則不得 以下治外,義各有當,非苟 雅》文王 自 有獫狁之難,以天子之命命 有 顔師古注《漢書》,以犬夷、畎戎、昆 又《詩譜》推 取 義,不 詩 伐犬戎、《 九 篇 以 「文王之時,西有昆夷之患, 朱子 、 天 作詩 其 故,以爲 則彰明其 傳 因《常棣》一 、保》以 書大傳》言西 時 特著其 子》之昆 世 而已。 爲 翁力 周 上治 罪,故 斷 公閔管、 説。二 將 夷 内,《 也 抵其説,以 篇是 《常棣》詩 肅 帥,遣 也。 詩之 伯伐犬 亦 推 采 如《 子所 夷爲 周 以 蔡被 而 史 西 戍 公 不 小 爲 H

《武 古質,非 立 他 文王詩,無 目,其《克殷》篇,《史記》亦采 書》七十一篇,見劉歆《七畧》及班固《蓺文》 西 戎 0 典 西 稱 ,獨見於《逸周 距 帝 文王事 僞 昆 Ŧ 斯 託 夷 可 # 疑矣。 之書 非 八北備 紀 伐 歷 亦 獫 也。 歷 書》敘,其言 獫 言 狁之一 有 狁 文 然 ",謀武 據 Ŧ 則 者 時 證 謂 也 有 用 以 ^ 與 E 混 采薇》 之, 昭 ? 獫 夷 威 且 狁 文 懷, 逸 之爲 文字 不 此 周 見 作 Ŧ 伐

陽字 陽」之文,是 子也,足證《小 至九月 矣,鄭説 木 剥。 小 歲 同 X 亦 長 方 所 也。 陽 毛以 鄭 至 腓 止」,毛、 傳》《 以 + 又 爲曆 歲 月 歲 箋云 鄭 陽 詩 陽 盡 專 鄭 即 引《爾 無 有陽之月,自十 皆 據 首 周 指夏 + 章 腓 Œ 月, 歲 雅》「十 當 爲 《莫,周 + 作 而 一謬説 月 ... 毛 · 一 月 月 則 E 而 蓋 建 爲 否 解 復

破字

也

集

傳

云

腓

猶

范

也。

一竟用

注

疏

及《本

義

皆取

躁

動之義

傳

》則

於

躁

動

立物,

非

隨

動

之物

也

易》

咸

艮

兩

桂

全》。

然吕《記

×

嚴《緝

。皆

用

此

解,不

知

腓

乃

毛當謂 説,朱子 從 書 慆 萉 而 避 腓戎車,不得 爲 詩皆從毛,獨 字及《生民》篇「牛 君子所依 四月》篇 之鄭,不 ジ注 弗 患 字 而不萉」、《文選》注 ,音肥,又房未 敢乘,何嘗 ,王之述 訓 鄧 此 Ě 展 如 誤 戎車者, 覺 亦 從 百 矣 訓 有避 此 其 毛 毛 依 卉 避,義 詩 非 誤 之 然 戎 案 具. 反。 君子所 患 當當 破 欲 避 耳 重 腓 羊 腓 字。 ,其實 義,故易之。 也。 戎 也 E 曹 班 腓 删 字 引小小 車乎 毛訓 大家 與毛傳 字 古 = 之 依 孔 至引 之, (毛意 而 見 而 疏 ? 幽 人所 病。 訓 未 乘 推 程子 通 詩 合。 萉 案,腓 毛皆 及。 未 其 夫以 賦 腓 鄭 \leq 爲 必 意 於於 》「安 隨 朱《傳 避 人 , 此 語 訓 如 動 所 避爲 彼 亦 亦 以 詩 見 此 《大 漢 避 之 慆 作 當 爲 腓 兩

咸訓躁動,於艮訓隨動,在一經中已自相矛

盾

矣。

出車

牧。」 遠 云: 굸: 地在 牧 郊之地」,斯其證矣。 者,即牧地。 車》詩首章言牧,次章言郊,鄭箋云: 内。」又曰: 朱子不信《爾 郊可 爲 郊、牧異地, 遠郊。」是 爾 名牧, 王國 近 非 雅 郊 無 五 百 ^ 雅》,此 一前 據 又可 周 + 里 郊 也。 禮 然統言之,皆可 里 軍 爲 即 邑 名 遠 已至牧,後軍 . 外 遠郊。」又引《白 却 牧 郊。 載 然則 集 泥之太過 也。 謂之郊, 郊百 師》職「以 傳》 箋、 近 里 疏 日 郊 疏 引《司 0 名郊。 但 郊 合 미 牧 猶在郊。」 兩 可名郊, 外 郊 見 田 虎虎 馬 章郊、 謂 在牧 任遠 遠 ^ 通 法 牧 之 郊

> 事,其 之言, 治兵、 從者未 之, 郊野 之旂爲即 翼 也。 職 相 非 圃 通。 後玄武,左青龍 旗 云: 也 ,則交龍爲旂 載 幟之名也, 君若主兵,則 ,以爲 彼 亦寓出軍之制 前、後、左、右, 《曲禮》言君以軍行之法,●《大司馬》 必 旐。」今以《曲禮》之前、後、左、右合 熊 旟 諸 青龍 虎 一國,亦 旐 旗 侯 爲 斯 即 載旂, ,此誤矣。 旗, 即即 與《 ~ 朱 應 當 而 鳥 集 即 左青龍矣,載之者,國 周 宜 右白 分列 居 軍 又與《大司 右白 禮 旐 傳 中。 吏 相 **企**曲 \forall 即 左右 虎」,是 引《 載 同 玄武 虎 司 若從王 旗, .禮》 也。 矣, 曲 常》所言各 不 馬》文義不 禮》 百 軍 日「前 因 軍 應 官 大司 出 陣之法 及 吏 以 專 載 征 朱鳥 楊 實 下 爲 旟 馬 氏 載 左 則

之。 前 偏 楊豈未見耶? 名,本崔 玄武,而 王,何以當 當爲後勁? 《禮》,以陣法言之,良 之朱鳥, 爲 右 軍 ・
史是 翼 郊野 靈恩之説,已經孔 於 爲 而 諸 了者乃 此 前驅? 義 百 軍 皆 官 何 帥 州 難 取 者 所 長 彊 ? 克 將 龜 以 有見也。 爲 卿大 蛇 且 下 乃 之説矣。 氏《禮 之族 鳥 所將 鄉 夫,以其 隼 遂 -之旟, 爲 之正 羡 至以 卒, 疏 鄭 在 駮 卒 爲 爲 氏 後 屬 何 正 旗 之 衞 在 其 注 以

羅 子 南 贊 解 而 車》詩傳云: 生 》,其以爲禹 國分,南仲即其 泌《路史》言 云「禹 而 南 也 [仲之名,見《出車》、《常武》二詩、《出 手 後 把南字,號 斯 有 語 男 「文王之屬。」未詳其譜系也 後, 禹後 信 氏 人後。 則 矣。 」,索隱云 有南氏 見《史記 泌語本《 南 泌 赤 子 二臣,勢均争 龍。 苹 • 夏 謂 周 系 孫 本紀 書 本》 仲 • 史記 爲 男 盤 權 作 紂 庚

典,殆妄也。將。」據此,則仲乃殷後,非夏後。不知出

何

垂,連 靈、夏,今寧夏衞,在漢爲 云 信 南 餘 周詩哉? 漢自借《詩》語 方是何地,朱《傳》始以靈、夏等州 大名皆言 朔,北 也。 里。 仲 「朔方,●北 毛傳云: 雖 平二寇乎? 方也」,皆其 商之末造,邠 漢置朔方郡 良將,豈能 朔 又靈、 方、《堯 以 「方, 夏 方也。」 名 人廣號。 在 於 朔 爲 郡 典》「 朔方 岐 武 方 陜 耳 近地, 之爲 年中, 帝 之極 遗 疏申之,以 宅朔 ,近獫狁之國。」又 朔方郡, 傳 時 可援 與 靈、夏, 邊,去 皆 賈 方一, 窮兵直 疏 淪 鄭 當之。 似矣。 漢 皆 於戎 爲 E 吾未 郡 孫 不 阚 至 安千 指 北 以 狄, 宋 北 然 朔 方 王 敢 釋

●「朔方」、原作「方朔」、據康熙抄本、大全本、《四庫

全

諸儒豈不知其事? 而不用以釋《詩》,良有

見矣。

諸侯 方,總 辯之允矣。 西 婉 何必復作此 未得歸之詞也。 望之情,夫「豈 今以首章爲 當年用兵方畧,此先 戏」,其詞 曲 ·歸附之情,令千載後讀 詳盡。 昔我往矣」、「喓喓草蟲」兩章 敘往返始末。 前章自朔方出 奮 語 既歸在塗之語,後章爲室家思 張,非 耶? 不懷歸,畏 既身在 後章 室家思望之言 儒 至「赫赫 釋經 歸 更述 此 塗, 所以 平二寇,復還 此 簡 南 則 南仲在西方 詩 書」,欲歸 仲」、「薄伐 能 還家有 者 論世 如如 、笺義 則東萊 日覩 期, 也。 mi 朔 最

韻》皆兼此兩讀。《説文》許偉切,則上聲,音虺。《玉篇》、《廣文》許偉切,則上聲,音虺。《玉篇》、《廣本字,《釋文》許貴切,則去聲,音諱。

杜

悲,情 未獲遽 之春暮 歸 還 思」,正謂踰 歸止」,則實欲歸矣。 「征夫遑止」,僅言可 此陽止之時,女心所以傷也。 師之初,告以歲暮 止」,即《出 止 萋止」爲時 後則 兩 詩, 首章□ 謂 同 歸, 也。 遣 知其 而 皆 H 事 戍 I 實紀 踰期至春暮, 車》之「卉木萋萋」,謂 三詩一遣二勞,語 未黄落,在歲暮之前 「曰歸」之時耳。 異 將 月陽・ 年之歲 矣。 歸 歸 即歸,至期 止,即《 時 而 次章傳云「室家 以 暮 望之益 前雖望之,明知其 之景色也,故首 歸耳,次章云「征 也。 則卉 采 次章 切 而 薇》之「 孔 木萋矣。 然連平二寇 也。 望 意 疏 ,此於文義 之,情 遣 相 申之,以 卉 踰 應。 戍 歲 傷 章云 木 時 明 亦 也 未 則 夫 陽 出 年 萋

一八六

未順,恐非毛意。

孔 則上之人探其情而念之,所以爲 之,或室家代念之。 鴇 疏 羽 以爲婦目夫之稱,迂矣。 古人行役,未 》、《陟岵》、《 北 有 惟《四牡》、《杕杜》詩, 不 Щ 一》諸 念父母 詩 皆是, 者,《 正 汝 或 雅 人 墳 自 也。 念

文 王爲 以待武王,又耄期受命諸務日不 之王業,悉定於文王之世,惟 有聲》。 八,《文王》至《靈臺》。 鹿 、菁菁者莪》。 》、《華黍》。 ,必文、武並 ൬ 鳴 畧武 周家開 》至《杕杜》。 正《小雅》二十二篇,其爲文王詩者 周公、成王詩者八。《生民》至《卷阿》。 與? 正《大雅》十八篇,其 周 創 公、成王詩者九。 武王詩者四、《魚雕 之主,而詩篇 稱,至《康 不 武王詩者二,《下武》、《文王 獨 詩 然 獨 也,《 留 少 (爲文王 酒 暇 ノ者、良 伐 心》、《南 (南有 語 書》 給 紂 嘉 · 故詳 陔》、《白 述 以 詩 魚 事, 九 無 先 周 武 ~至 者

> 者、欲 業,豈 武 逸》、《 可 見 蔡仲之命》諸篇, 善於論世者哉? 彰 周室開代首王,斷 其 事 殷之小心, 則 反 盛 應 諱 稱 屬 其 文德 文。 造 周之大 後之 而 不 學 及

魚 麗

皆 憂勤 馬 氏 蓋《毛詩》敘至此始行。」案,葉語 初 東京 鼓鐘》毛 用 相 四 語 年韶 謂: 敘 如《難蜀父老》云: 王伯 圃 賦》云: 語 終 傳也 可 云: 厚名應麟, 於 逸樂。」此《 謂 漢世文章 非 $\overline{\wedge}$ 德 一當武 《曹風 漢 宋末人。《困 廣 世 所 【》刺遠 一無引《 耶 帝 被。」此《 魚 「王事 時,一 麗 (詩))敘 君 w 學 敘 未 子 漢 紀聞》引 當明帝時 也 有 非 近 廣》敘 者 是。 不 小 班 始 魏 及 固 於 黄 葉 司

字關 見物與酒稱,語見《大全》。不知此篇言萬物盛 多,酒成於人力,雖多有限,物僅與之稱 陳櫟言多、旨、有三字上言酒 旨、旨、有六字皆承酒言,下三章文義未 三字仍可説魚,三章各末句結上三句 在其盛多乎? 於「酒」字斷句,句法較渾成。 旨、多、旨三字言酒,下多、旨 各二字爲 下三章疊此三字,不得復言酒也。 旨」三字絶句,下「且多」、「且旨」、「且有 無 既旨、多、旨,魚又多、旨、有,中俱用「且」 礙 兩意,下三章遂承魚而言,句法與文義 也 句。 《釋文》云: 源謂「有 酒 「異 斷 此讀則非。」因 、有三字言物 但旨、多、多、 而 句 下言物者, ,多、旨、 《集傳》 耳。 ";安 順 E 有

詩之鱨 愐 色 黄 孟 了,羣 詵《食療本 也 游 亦 作聲 名 黄 軋 草》 館 軋 魚 有 音 又名 黄 揠 類 魚, 黄 故 又名 頰 即 魚 觖 魚 無 魝 麗 鱗

> 飛,取 孔 注以陸爲譌,失之矣。 爲名黄揚,正以 音央鴨。 疏釋之,以爲魚有二名,豈非 義於 又名黄 輕 揚 觚。 色黄 乎 ? 毛傳云: 圃 《埤 性 雅》之説。 揚 也 此魚 鱛 陸 本 元 有 揚 ·草 》 恪 力 也 以 解

亦云。 種,出 音币。 切。 鯊,吹沙也,《爾 背皮粗錯 大者長四五寸,居沙溝中,吹 鯊魚有 沙而食,味美,俗呼阿浪魚。 東 南 如真 近 二,一吹沙小魚也,又名鮀 海郡,亦 珠斑,有鹿 雅》云「鯊, 名 沙 沙、虎 鮀」是也,毛 魚。 沙、 沙而 魚麗 鋸沙 鮫 游 徒何 学之 魚 諸 啑

毒, 重。 者 阚 鮵 雅 無 魚,人本經 0 鱧 益,不宜 魚、《本草》名蠡 音 注 奪。 以 爲 埤 上品。 食。 鮦 雅 ***** 又 意 以 物 云 而 魚 爲 陶 亦 鰹 性 即 隱 此 音堅。 古今不 名 居言其 魚 鮦 矣。 大鯛,小 音 同。 同 今俗 有小 也。 乂音

呼 並 稱 黑 贵 魚 亦 非 視 珍 爲 品 美 北 味 耶 ^ 魚 ? 麗 詩 鱧 與 魴

注作鮧 矣。 北 本 且言 滴 爲 意蓋 云 云 F 文,皆以 詩 鰋,今鰋 義 從 X 鰋 鮎 乎? 强 右 魚 傳 F 音 爾 鮾, 郭矣。 則 。 曰 腹平著地 目 鰋 亦 啼。 本 郭 鰋、鮎 雅 郭注《 驗 額 南南 鮀 以 鮎 草 以 《詩詁 毛 又 白 鰋 魚,注 世, 鰋 从孫 緇 在 人 ^ 魚。 解 爲 爾 爲 埤 私 鮎, 目 日 宜 與與 》及《韻 反。 **→** 鮀 鮎 雅 雅 鮎。」 V 鮎 云 列 而 得 世 、《説文》 V 鮎也 ^ 鮧 既 惟 孫 不 鰋 别 分鯉 不 魚 會》皆 是 明 引 郭 炎以 魚之名,● 「古日 名 名,亦非 協 麗 鰋 璞分 斷 郭 鯷。」《詩》釋文引 · 鱧、鱧 ,恐古今名異。」 V 鮎 而 釋 鮎 其 注,又溷二 爲 剿 鰋,今日 触 文 是 亦 爲二,云 襲 直 郭 即 引之, 魚, 、鯇 非 Ē 陸 訓 爲 氏 鰋 鯷 艘, 毛 爲 疏 將 之 鰋 鮎 魚 魚 注 四 額 焉 Ħ. 重 又 公 郭

> 魚、 也。 魚 人魚, 説 又 皆 へ案,《 勝 陶 先 隱 别 儒 居 録 以 惟 爲 有 鰋 皆鮎之屬 艧 胡 鮎 化 之 切。 分 爲 魚 鮠 則 音 危 非

六笙

者多 篇 詳 則 何 後 原父。吕《記》、嚴《 僅 自 確 儒 名,若有聲 取 具 冠 來 辯 六 、 笙詩 之 乎 詩 證 載 ? 中 最 以 長 多, 、《集傳 或 ^ 無 一、二字,或 儒《通 魯 號 而 詞,則《 鼓 近 不 》以 × 緝》 義》中 世 能 ^ 南 郝 爲 薛 俱 更 總括 核》、《由 仲 有聲 不從, 立 鼓 矣。 輿 》有 别 其 敬。 無 名 源 大義 譜 可 詞 矣。 又 之論 庚》等名 稱 而 謂 説 卓識 無 朱子 以 作 尤 本 詞 立 詩 爲 劉

● 「列」,嘉慶本同,康熙抄本、大全本、《四庫全書》本:

無篇章,何由數之爲什乎? 無篇章,何由數之爲什乎? 無篇章,何由數之爲什乎,朱又反收之於什 中,又推《白華》爲次什之首,何自相矛盾 中,又推《白華》爲次什之首,何自相矛盾 也! 夫什者,篇之總也。無詞則無字句, 經》,或附見《禮記》,不當與《雅》篇並列矣。 取以爲證,非其類也。況聲者,樂也,詞者,

一八九

毛詩稽古編卷十

吴江陳處士啟源英

南有嘉魚之什上正小雅

之舊也。 之説,於《詩》之篇 據 詩於什中,而 數六亡詩 據《儀禮》,則不能 末,抑《魚麗》於《華黍》詩下,更以《白華》爲 《儀禮》奏樂之次,升《南陔》於《鹿 小雅》次 夫子 蘇子由嫌其非孔子之舊,仍數六 而以《南 由之更什,祖《六月》敘 更以《南 什之首, 言有嘉 第 無議焉。《鄉飲 元 陔》爲 魚》爲什首者,毛公 無 至 改 宋 八什首。 也。 儒 而 至 兩 酒禮》: 朱 朱子之 及 更。 心鳴》什 康 子 成 文 不

^ 《南陔》在笙人之列,則不得 亦然, 邱》; 氏移置於《南陔》之上。 憑《儀禮》之文,定《詩》篇之先後 倒置矣,何不依合樂之敘正之乎? 當移置二《南》於《小雅》後。 終,所奏者《關鵙》之三、《鵲巢》之三也 以定《詩》之先後,則閒歌之後,尚有合樂三 麗》,笙《由 陔》三詩,所謂 三,越《草蟲》而 此奏樂之度,豈編《詩》之次乎? 在閒歌之列,則不得不後。各以類相從 六月》詩敘《魚 魚麗》,笙《由 此《儀 歌《南 樂《南 庚》等六詩 禮》奏樂之次 咳》、 Ш 庚》; 取《采蘋》,今此二詩視之爲 麗 有 笙人三終」也,次閒歌《 心》句本 臺 ^ 白 一》,笙《 7,所謂 歌《南 華》、《華黍 在《華黍 夫鄭未移之《詩 也。 由 有 不 閒 儀 嘉 又《鵲巢》 先。 歌 夫先樂 魚》,笙《崇 学下, 若必 》,乃閒 矣, 終地 朱子 派禮 魚 又謂 據 而 亦亦 《南 麗 耳 魚 鄭 既 此 歌

魚》爲次什之首,良爲有見。 坦叔《詩緝》一依毛傳之舊,仍以《南有嘉敘,遠在千餘年前,朱子何自見之哉? 嚴

歌而 相謀。 禮》 耳。 勤 麗》、《嘉 誤哉? 也。 詩 有此三詩,後乃取 萬物盛多,能備禮」者,作《 、朱《傳》皆釋爲燕饗通 鄉飲及燕皆閒 作 不知 賢」者,作《南 嘉 樂與賢」者,作《南有嘉魚》之本 魚麗》、《南 宋馬端臨《文獻通考》論之甚詳。小敘 此 魚 魚》皆謂 朱子專以 古人之用樂,與作詩 極 三詩 》傳 道 也。 云 其 美 以 有嘉 心爲閒 敘自釋詩,不釋樂 歌 所薦之羞起興。《魚麗 燕、饗釋三詩,故 且 山有臺》之本意也。 道 此三詩, 多,以 歌之樂章,非專爲 魚》、《 達主人樂賓之意。」 用之樂,特見《儀 見主人禮意之 南 魚麗》之本意 之本意,不 因 Щ 據以立 有 於《 臺》 有有 意也 所 魚 既 謂 必 説 何 閒

> 詩也? 臣則 詞意 之「和樂且 侑之意。 所有,既 厭夜飲」矣。今《有臺》篇所稱南 肥羜」,云「陳饋八簋」矣; 兄弟則云「儐爾籩豆」,云「飲酒之飫」矣, 夫對客而自誇其饌, 湑矣」、 燕朋友則 言酒肴樂舞之事,及爲 君子,是何禮 殊與 云「鼓瑟吹笙」,云「我有旨酒」矣", 不不 非饌客之需而頌美君子,又絶 若《鹿鳴》之「式 - (燕飲) 孺 醉無歸」者也,安在其爲燕饗之 」,與《伐木》、《湛露》之「飲此 也? 孋 不 酒 類。 有藥」,云「有肥牡 至《南 何 凡詩爲燕飲 鄙 動侑 也? 八燕以 Щ 燕諸 之詞。 有臺》篇,玩 敖」、《常棣》 對 侯 山、北山 客 則云「厭 作者,必 如 圃 こ、「有 無 燕 自 勸 之 羣 其 燕 稱

一九二

南有嘉魚

發語 也」,得之。 來,又能任賢之久。 共之也。」 至誠當斷句, 於賢之未來遲 與賢之心,非必於詩詞 久如遲之也,違之者,謂至誠也。」《集傳 烝然」爲「久如」,以合敘「至誠」之意, 且君子至誠與賢,其心 小 聲, 尤屬 敘云: 昌《記 之而 臆 「太平君子 説% 》祖 已哉? 詩直言與賢、敘 Ŧ Ŧ. 惟 有專指 義 肅 至 至 述 遲,直冀反。箋云: 始終如一、豈僅 誠 一誠 毛云「烝,衆 則 也。 樂樂 影以 能 康 烝然爲 致 與 更 賢 賢 成 推 固 釋 其 之 者

穴 木》之樛、《甘瓠》之甘云爾。 八魚飲 日 南 1抄》日 乳泉而美,未必元名嘉 有 1嘉魚 . 》,嘉非魚名 「嘉魚、非 指 也,猶 黄氏宋黄震,字東 丙 穴之魚。 魚。 下章《 自《詩 樛 丙

> 以後 沖《蜀 之慎矣。 得 丙穴已有 魚。」皆不 所産也。」箋、疏亦止云: 得乎? 言嘉魚不指 傳》引此 而《集傳》因之耳。 詩》語 名,非 世 都 事 以名之耳。 蓋丙穴之嘉魚,直是後世好事者采 賦》,其名之來已久,豈因《集傳》 也。 以釋《詩》,世遂名其 嘉 以 不 可 魚之名,而不 嘉爲魚名也。 丙穴,是也。 以丙穴魚釋 證周詩乎? ' 嘉魚出於丙穴, 見左太 毛云: 引 《詩》,《 言嘉 南 孔仲達 以 足 江 魚爲 爲 見先儒 方水中有 魚因《集傳 漢之閒, 埤 證 嘉魚。」 者,豈 唐 雅》之説 釋 非 黄 松平 盖 而 魚

既從古注,復載或説 思」,箋、疏 思」兩「思」字,皆助 來」與「又」協、皆不 纍之」「綏之」 以 爲 燕 而 兩 ,以思爲思念,祇贅耳。 又 用句尾爲韻。 詞,故「纍」與「綏 燕 「之」字,「來 ,得之矣。 「式燕又 朱《傳 思」「又

《嘉魚》末章之興爲全不取義,《通義》駮之 立教,下即以此成德 者,意主於專壹,皆與設教之旨同。 喻賢者。彼勞使臣,義取 見《小雅》,《四牡》以況使臣,《南有嘉魚》以 之鳥,故掌教之官有 少 皥 以 祝 鳩 名司 ,無異趣也。 取焉。 徒,祝鳩乃 於慤謹 翩 翩 《集傳》以 孝 者 順 上以此 此美賢 謹 兩 慤

筵》有 第《古音考》以 『又』字皆當音意。『燕又』與來協,來音利 右也,右手也。 又」、《集傳》皆音亦,「室人入又」,則由、怡 二音,「矧敢多又」,則亦、異二音。 南 ·不又」與富協,富音係。 『人又』與時 有 《詩》以「又」字協韻,凡四見《小雅 其二。 嘉魚》及《小宛》 「嘉賓式 爲俱無的據,且言: 《詩》右字有以、意兩音, 各有其 燕又思」、「天命 -, ~ 近世 又, 賓之初 協 時 四 即 不 陳

> 熾 協異、 矣。 聲,支、紙、寘、質可通爲一讀,而 本自協耳。至富字,古方二反,《我行其野 必作去讀也。 音職吏切,「燕又」之來、「人又」之時 亦與質通用。 字多在支、紙、寘韻内, 音是。『多又』與 止,裘協試之類,不勝 ,併《小宛》凡五見,所協皆同。 然古人韻緩,凡與右、又同韻 瞻卬》協刺、《召旻》協時、《閟 「多識」古注元讀如字,不必 來字,古陵之反,時用 識 協 識 屈 如仇協達,母協杞 指。 職 吏切。」其説 又古不分四 職、物、緝 者,所協 ",亦不 今音 似

南山有臺

草,可爲養笠。」郭、陸俱誤。別有辯,見《無羊》。故云:「可以爲禦雨笠。」《草木疏》云:「莎母以臺爲夫須,《爾雅》亦然。郭注

子。 端復 與夫 傳云: 生。」 郭、陸之誤。 香附子 臺、籉一字 作臺。」然今本《爾雅》仍作臺,與《詩 莎 薃 韻 玉 都人士》 於吴 所 文葉如 「增》、黄氏《韻會 一篇》及《唐韻 音浩。 此 須 其 益 出 緹 一草。 ,又名雀 根 求 近 數 老 編者,莎 稱臺笠 時 有 葉。 雀 侯莎,其實媞。」音隄、夏小正 而 都 非 而分爲 要 須 頭 以當《詩》之臺笠字,於是臺 一,五六月 \wedge 人士》釋 開青 藥 隨也。 爾 香 . 頭 須 》即《廣韻》。 矣。 也, 即 雅翼》以 香、《江表傳》魏 下 三矣。又案,《爾 》皆載之,云「笠也」, 華 此 緹者,其實也。」即 結 而 抽 文 字 ٠, 成 陶 子 云 或 莖,三棱, 《本 爲 穗 又有籉宇,毛氏 氏 从 草綱 其 如黍 不 草 根 枚枚 識 臺 作 文帝 即 諸 , ~ 目 中空, 臺 此 轉 中 藥 草。 一》「緹 S 云 雅 爾 同 有 注 相 中之 遣 殆 ***** 皆承 也 雅 縞 亦 細 莁 使 蓋 延 後

> 府》以 名胭 其 可 今俗呼灰莧。 藜、本草綱 (葉可 爲杖。」原 灰藋葉心 脂 萊 爲落帚 菜, 食, 傳 亦 莖 加 굸 有白粉如灰,故名,藜心則紅粉。 目》云: 憲 者 日 葉 孔 誤 藜 鶴 稍 氏 杖 草 頂 大 取之,當矣。 草。 應 也。 河 門, 即 朔 嫩 陸《 灰 即 時 人 整音掉。 疏 是 名 可 案,萊 物 食 落 以 し。 藜, 爲 之紅 老 案,灰 草 則 亦 南 \wedge 名 韻 恭 名 人 心 藋

也。 篇 基 王 之基」、「萬 爲樂哉君子, 之「樂只」,正 者樂之,下文盛 兩 也,與敘義最 義俱通,前 以爲樂是君子, 樂只」,只字古訓是,今訓 壽 則 小 無 合。 君 已 期」云云耳,非 敘 稱 子 辯之矣。 所 則 則君子 其 自 謂 效 只字訓 指 樂 E, E 得賢」也。 正謂賢者,樂 至《 者,樂即 所謂 是 樂得賢之 哉。 爲 南 立太 Ш 有 樛 平 邦 如 木 之 乃 樂 家 以

《易》姤卦「以杞包瓜」,一杞也,而釋者

可見古今藥物興

八廢不

同

如如

此

各異。 梓比 則所 以 而 而 才,襄二十二年。 (小雅) 滑,可 材 爲 者 干城之將 謂 Щ 》之「南 見《易》釋文。 大木也 木,王 張 爲函。」樗 《草木 日 大 Ш 伯 《孔叢子》載子思之言,以 木, 又 有 疏 《左傳》楚聲子以杞梓 厚 杞」、「 稱 **※**云: 非 此 馬 以 其 材 Ξ 曰 爲 連 木 木 枸 在 杞 抱,是必木之高 「其 也, 杞 皆 彼 梓, 杞 載 樹 鄭 耐 見《困 棘 於 謂 如 日 」,嚴坦 樗, 杞 杞 學 詩 如之, 柳 紀 理 比 聞 白 大 杞 卿 叔 而 凡

味 也。 此 注 引 甘 語 宋玉賦 橘 案,嚴 故 證 爲《 踰 南 柏 飛 淮 Ш 風 「枳枸 矣,云: 説 有 鳥 爲 賦 枸」, 枳。 慕 非 是。 而 來 枳 (巢)以 傳 句,曲 巢之。」孔 句 古語 陸元 云 來巢」字作「句」,李 證 也」,音溝 恪《 日 毛説,嚴《 枸,枳 枳 惟 草 枸 謂 木 來 枸 枸。」孔 疏 巢 木多 非 緝 已 毛 枝 其 引 義 譏 善 疏

殆

僅

取

其

形

似

乎

之枳,句爲 陸、孔 字本 李 爲 m 疏》爲證 哉? 木其 俱 曲 所 通 唐 兩 枝 用 以 疏 李 則 詘 訓 各 來 而 曲 枳 善注《文選》,不 曲 取 巢 孔 句 其 之鉤,是李之謬 稍 先 爲木名,而妄以 義 實 於 不 俱 則 李, 同 甘,二 口 耳 安 通 知 得 者 要之,枳 也 引 俱 也 據 枳 毛傳 句、 足致鳥。 李 爲 況 、枸之 加 橘變 及 枸 陸 非

或 耶 也,豈 枸、《禮 椒 燕 日 曰 金 雞 似 ? 食 其 銄 距 以 枳 記 字又 蜜 以 子, 形 木 枸 爲 祚 屈 其 也 棋。 雖 庶 律, 日 作 甘 南 羞 雞 枅 則 楨 美 産, 見 雷 爪子。 栱 婦 椒 如 木 公 而 人 内 ? 飴 蜜, 日 炮 則》。 以 咏 見 本 炙 交 其木 爲 於 日 草 陸《 論 加 摰 木 是 周 尝云 木。 名又 疏》。 ·, 見 列 北 詩, 餳 其 土 曲 日 或言 其 日 名 故 亦 禮 白 在 木 弊第 遠 日 珍 其 珊 石 致 蜜 其 禮 木, 瑚 之 楨 味 君

孔

即 俾 經》有甘華、《海外北經》平邱、《東經》蹉邱、《大荒 赤枝幹,黄華。」楊慎補 》蓋猶之山 審 閉 槓 椒 、《西 也。」蓋 淡 図 經》有沃之國 如 此 酒 木 霑 能 交。」 注 皆 薄 有此 以 ?酒矣。 爲 注 木。 即 云 枳 郭 又《 枸。 注 云 Ш 交 海 加 南

之喻也 然則 傳同。 持説 枸、楰, 此 是 廣大,喻人君有賢臣以自尊顯。」義亦平正 風》之「條」,得 楰」,得兼楸 詩 也 甚優。 條 Ti 梓、椅、楸、榎四木,同 又名虎梓,見郭注。 取興於卉木者,凡十焉,皆以爲賢者 章 爲 郭以爲楸屬,陸 Ш |埤雅||縷 而臺、萊、桑、楊、杞、李、栲、杻 然鄭箋云: 一楸, 楰 、梓之名。 兼 又條之異者與? 楸、 而 析之,每物各豎 又以爲 榎之名,《 又名苦楸見陸《 **楰名鼠梓、《爾雅》、毛** 一 山 類 有草木以 而 Ш 小 楸之異 小 别,故《秦 雅 又 成其 義 》之 案, 疏》。 者

荅趙

商,以

爲

四夷

總言四方;

夷狄、九貉

《逸周書》同

注

周

之

或

蓼 蕭

外, 夷。 之四 互異。 海 是周 記 蕭 貉、五戎、六狄、《周 同 位》、《周禮·職 鄭 . 」釋之,然鄭箋之言又與《禮 》敘「澤及 而引《爾雅》所言四 制 邢昺 明堂位》之文也。 海。」案,九夷、八蠻、六戎、五狄,此《 古人言 箋,下文今本無。 箋云: 述先 理或然 四四 四 云: 儒 海,多專指 海」,鄭箋 九 方氏》、《爾雅 與? 云: 禮 夷、八狄、七戎、六 同《明堂位》,而 《爾雅》有二文,上文 海 四夷、八蠻、七閩、九 所 職方氏》之所掌 上文是殷制,下 及《虞 以 荒 服 爲 裔之國,故《 · 釋地》之文 或 《書》 記 在 數也。」鄭 九州 • 外 、蠻,謂 明 無 薄 也 文 禮 之 九 堂 四

賈疏 即 傳寫之譌。」豈 然鄭於《蓼蕭 李巡本有之,鄭 也 布憲》則取下文,蓋亦未有定見。 九 爾 謂 夷,在 雅》下文相較 戎 狄 「《詩》敘與《 之數,或 東 》笺 方 於與李 則 上文與 爲説也。 取 五 八 同 或 上文,其注《 蠻 爾雅》及《禮》異,是 時人,當見此文矣。 六, 在 南 兩 《爾雅》下文惟 方 文 異。 閩 職方》及 周 此 其 禮 鄭 别

六戎、 語,以 踵 蠻,一天竺,二咳首,三僬 鳧臾,六索家,七東 之,李注 九夷,一 雅》之文,不辯 五 戎狄之數,或五 五狄 爲 穿胸,六儋 無 今見《禮記 玄莬,二樂浪,三高 國名,李巡之注《爾 或 數 其 可 耳,七狗軹, 孰是。 明 屠,八倭人 或六,康成 故 王制 不 孔疏 僥, 敢定。 驪 **>** 九 載 八旁春。 疏。 雅》,已備 四 四 兩存《禮 天鄙。 其荅趙 跂 然 蒲 疏 距支 飾,五 八蠻 云 切。 六 列 商

殷之夷 所言 也。 缺, 奴,四 朝 北 載伊尹爲四方令,東夷十,南蠻六, 戎, 而 獻者,凡六十國,既與《明 又案、《周 文,無足據信 不敢定」者,豈 同 文,餘俱 息 時,李 明堂 狄十二,亦與《爾雅》上文不 隸 傳聞 六 職 周 又案,盧辯《大戴禮》注謂 單 僥 天 方者 國 時 所 于, 夷,二 所 本 異 剛 書 [似矣。 來 服 (詞,戏 知,鄭 李 者 • Ŧī. 四 五白屋。」惟 注 國 耶? 五 E 以 戎 ,是朝者之數浮 海 狄, 然以 數, 會 李所指諸國名 狄 安 種 夷,三老 源案, 解 有 落之數、《 五 闕 戎論之,朝明堂者六, 爾 影記 六之數,信難 未 疑 月支,一 雅》所 悉 淵 堂》、《 之道 九 成 白 博 周 夷 加 之會 明 言 如 四 人據《東 二,當 械 於服 同 不見 云 職方》異,又 堂位》所 夏 鄭、又與 耆 如是 貉 無 所 羌 西戎九 經傳 以 也。」夫 書史殘 四夷 職 夷 服 或 臆定 \equiv 五 方 傳 也 與 李 匈 鼻 來 正

未

見

盛 嚴 恐 緝 費 解 力 孔 燕 爲 盛 燕 然 孔 本 訓 其

使 難 諸 臀 學 通 侯 教 者 者 之列 所 疑 被 其 盧 矣 皆 所 又 口 聞 譏 猶 言 是 鄭 未 服 引《 未 得 朝 識 謂 爾 則 康 之 雅 成 稱 服 ジ其 闕 臣 平 疑 數 ? 奉 之意 不 貢 此 同 説 自 矣。 炊 之 比

夷 堂位 越 太 伞 党党 統之 -,實 年 來 周 良 朝 之王業 在周 周 事 盛 有 書 以以 公輔 然 . ^ 爲 雖 也 蓼 Ŧ 此 成 成 蕭 會 合《明堂》、《王 詩之作,當在 於 王 V 解 文、武 時。 ***** 澤 及 篇 嘗 四 讀 然 海 想 興 戴 周 見 一會》二 一禮樂 公 孔 當 記 攝 疏 時 . 介,致 明 文 引 政 華

以

弟」, \(\overline{\text{Z}}\): 讀 此 則 (蓼蕭 詩,覺 與 訓 詩 之 燕 兩 》首章「燕笑 爲 燕 燕, 成 安 而 周 前前 笑 義 語 當 會 後 _ 0 『,儼 畫 異 語 孔 解 兮」,三 然未 氏 0 矣。 申 鄭 散 一章「孔 之 源 氏 爲 謂 於 燕 以 首 燕 孔 飲 章 贵

燕」爲

其

燕

飲

則

不

詞

以

燕

災

語

爲

安

樂

IMI

笑語

文義

無

礙

也

則

兩

燕

俱

訓

安

爲

之《載 也。」革 有 垂 革 韓 轡 鶬 者 也 奕》所言 則金 也 靶 日 見》,皆言鞗 雅》之《蓼 末 革 勒 革 以 以 飾 金 是 絲 是 ^ 之貌 首 飾之,狀 也 爾 E 也 也 蕭 轡, 雅 狀 革 × * 説 此 以 沖 ^ 文》 詩 轡 采芑》、 革 ^ 如 沖 蓼 之沖 首 日 鳥 垂 蕭 鞗 謂 螠 靶 飾 沖 鞗 之 傳 必 韓 貌。」 ? 名 革 云 駕 之有 奕 載 日 切。 案, **>** 見》之 金 ^ 郭 餘 鞗 鞗 頌 厄, 云 革 侕

~ 此 車 非 劉 駟 0 仍 瑾 也 此 傳 疑 和 其 語 詩 疏 駟 織 與《 耳 傳 云 雕雕 驖 云: 駟 況 箋 驖 和 鄭 云 集 傳 鸞 注 在 傳 所 異 鏕 夏 在 置 日 謂 官 鷥 組織 先 鑣 於 字 儒 大馭 在 彼 鑣 本 當 鑣 取 作 無 異 曰 及 定 笺 衡 於乘 織馬 文 解 經 此

轉

甚

爲

氏

又

謂

四

牡

鷠

見《采芑》、《

烝

民

不

辯

以

經

無

明

文,未

可

臆

決

乎

然

羅

? 異 馬

П

兩

旁

各

置

純,

四

馬

應

八

組織

矣。」

一

祖

此

疏

至

杜

謂

和

在

衡」,

與

毛

鄭

孔

亦

羅

願

謂

詩》言

四

牡

八鸞,鑣,馬

銜

也

則

和

必

在

衡。」

據

此,

則

在

鐮

之説

長

也。

宋

安得置八

編門?

以

此

知

續

必

在

鐮。

灣

在

常當調

馬

有二鸞。

鷡

若

在

衡,

衡惟

兩

馬

如

一」,則

衡所容,惟

兩

服

馬。

詩

海言

孔 和 此 經 蕭 詩 解 《烈祖》 . 疏云: 則 »,< 鈴」,桓二年。 無 内 傳 明 傳 在衡、 一在 玉 文, 及《 箋又云: 藻》 軾 且 「《考 在 大 皆 日 殷、 杜 戴 日 鑣 和 I 禮 純 注 俱 周 記 緘馬 在 在 或 通 . \approx 保 衡 鑣 也。 在 異 輪 組織 傅 日 鐮。」蓋 崇, 和 故 纜」,箋 又《左傳 在鑣,和 篇 在 鄭 車 軾。」 文 廣 爲 和 也 兩 , 衡長, 編 不 蓋 **>** 在 解 易 然《蓼 所 依) 衡。」 錫 之。 在 組織 韓 據

鄭 矣。 衡。」 若 疏 以爲説天 韓 謂 天子 意 奕》、《烈祖 斯 或 其不 且言 然。 語 車 易傳 子 車 亦 名 車 有 飾 組織 者 飾, 不 理。 路 諸 以《駟 是正指鸞路也 言 詩, \wedge 豈 蓼 馬 反 乃 蕭》之鞗 飾 驖 置 王 純 臣 則 Ē 於 非 及 明 革、

在

口

知

此

從

미

知

灣當在

衡

和鸞,

鄭

馬

當

在

侯

國

之車

湛

附益 郭注云「安詳之容」。 正,其義則 懕」,亦云安也。 云「安閒 安也 ,久也,足也。」久訓 厭 至 厭 之夜」,《 夜 一「安」足 厭 飲 足」當 然則 爾 傳云 雅》作 作「猒」, 以 詩字 ^ 説 蔽 出 之。 文》引此 亦當以「 懕 蘇 厭 懕」,云安 氏, 殆因 《説文》云: 厭 朱《 安也。」 懕懕 傳 詩 作 \forall 日 也 懕 疏

九九

100

早切。 講 猒 厭 借,不得又 文》「笮」迫 궄 猒 當 義 和 譌 其義 飽 釋壓,是 俗 説 舛 也 又 貌」,與安義殊,而 至 ,再 也 加 兼 此。 从甘 阻 派 誤 土,誤 緣 厄 又《韓 也。 俗 切。 从 誤 狀。」《詩》 也。 案,厭 俗作「壓」,厭 因《詩》之借厭 而 詩 又 舍猒字不 厭 加 亦 字,於輒切。 厭 相 誤 派字 作 近。 也 倍 已从 本爲 用, 愔 小 而 薛 _ 學 感之 輔 而 ^ 説 君 不 以 以 膟

屬 姓 古人一燕飲 穿鑿。 也 杞棘 湛 露》篇, 然 一响 亦亦 謂 庶 同 寓 鄭分下三章,以「豐草」喻 姓 姓 「親疎 行,桐 則 夜 厚薄之等,其説 椅」喻二 飲,異姓 王之 則 否, 後 不 以 可 見 似 冒

室 之自注矣。 蘋》傳云: 一。」宗室 在 宗 二字,箋、疏 載考」, 又《禮記 宗室,大宗之 傳云: 俱 昏義》「教於宗室」, 無 廟 申 也 夜 官。」是 述。 飲 案,《 必 即 於 毛公 采 宗

宗,乃 朱《傳 小 廟 得 然。 爲 同 西廂 室耳。 注 侯 是寢,非廟矣。 大夫、士之禮 西室,此 在宗」義 楚薺》又云 寢 私 在 在前,寢 夜飲之禮 與,故箋、疏皆以「在宗載考」爲 云 備言 有室 燕 ,非廟中室矣,恐不得名之爲宗 廟 》以宗爲 天子 **爾** 中, 燕 爲 私 宗子之家。」 IE 曰寢。」 , 燕禮 燕 雅 在 燕 則 私 「樂具 同。 × 同 미 一故有 惟 即《 同 後,故言人,入寢 路 ^ 姓 ,則宗室 姓 同謂之宗也。 鳧鷖》詩 是廟、 但 楚薺》之「燕 寢之屬, 與 (人奏」,謂 在 則 八諸 彼 室有東 宗子。 成 蓋 父兄 爲 廟 之, 寢 亦 後之 賓 者 既 則 俱 指 若《湛 弟 尸 西 直 異 由 是王之燕 可 燕 廟 在 共 寢 廂 姓 私 廟 毛又 名 謂 于宗」, 八之,異 即 室。 則 日 而 燕同 也 廟 宗 室。 露 廟 在 11: 人 釋 門 廟 然 类之 宗 一之矣。 要之, 寢 孔 姓 夜飲 姓 之 與 燕 此 無 疏 也 也 與 諸 之 此 寢 不 東 在 則

然,康成徒取同類、異類爲説,箋以杞與棘異類 以興「豈弟君子」,豈弟,樂易也。 子」,顯允,明信 喻異姓諸侯,桐與椅同類而異名,喻二王之後。 類,故廣舉豐草。 杞、棘 皆堅彊之木, 遂無暇及此義。 也。 桐、椅是柔韌之木,故 故 以 興 詩意 顯 惟同 允 姓則 君 較

彤 弓

功」,不云饗也。 經意矣,況經不言燕乎? 主賜弓,饗亦因 主,且釋經者,不應故與經違也。 燕,雖饗畢之後,容或 彤弓》詩經文明言饗,而《集傳》反言 賜 今先言燕 加 繼以 設耳,故敘云「錫有 燕,然畢竟饗爲 而後及賜,已失 又此 詩 車

之於家也。《左傳》襄八年:「晉范宣子來「受言藏之」,謂諸侯受天子之賜,而藏

《緝》仍用古注。 矣。持論雖佳、恐非詩旨。 獻而藏以待賜,鑿矣! 指諸侯言,無異説也。王安石以爲王受弓 嗣也,敢不承命?』」宣子言受言藏,若爲此 聘,公享之,季武子賦《彤 藏爲已私分,至有以武庫兵賜弄臣,與此 以立論,謂藏之王府,不妄與人,後世 詩下注脚矣。 弓於襄王,以爲子孫藏。 匄也,先君守官之 『城濮之役,我先君文公獻功於衡雍,受彤 毛傳、鄭箋及王肅述毛意,皆 迂矣! 朱《傳》從之,嚴 弓》, 宣子 東萊 視 踵此 日 異 府

但不如毛之渾然。 但不如毛之渾然。 如毛之」、「歸之」,毛、鄭異解。毛以右為,韓爲獻酢之後,主復醻賓受獻爵,奠於薦然不指酒也。鄭以右爲賓受獻爵,奠於薦然不指酒也。鄭以右爲賓受獻爵,奠於薦

0

之而

得

見也。」案,此

語

未

盡

然。

官爵之者,

在

成材之後

耳。

此詩

主君子長

育人材,而

菁 菁 者 莪

耳。 此 所 與 學《詩》者示一變通之法,以救後 從來遵敘者株守太過,不 説 有 從 杰 經文,領其微旨,故悉埽舊詁 (菁莪》)之長 一古注 亦不 末 小敘,而自立新說。 偏 廢 日 學之陋 諸 . 今人奉《集 朱子釋《子衿》、《菁菁者莪》二詩,皆 朱子 家 相 可廢。」可 「廣《 之義 輔 固 也, 而 育 自 青衿》之疑 行,原不謂《集傳》一出 ら、門 也。 非朱子之本懷 傳》爲繩尺,束 知之,應不 見朱子傳《詩》之意, 其 人請 中或 及作《白 能 其故, 荅曰 **凡問。**」 矯 廣 罪 也 枉 注 别 開 後 又 鹿 過 學之滯 疏 開 心 儒 日 洞 直 眼 丽 牛 之 賦 不不 玩玩 不 面 指 便 祇 **学**,中 觀 爲 摘 無 口 俾 索 爲 舊 示

馬

有

辯論之權,或當兼目之。

而

得

見也,所見之君子,直應謂

E

而

司

物,喻君之用

人,則此一「既

見,因官

爵

十有二,見於九詩,《汝墳》、《風雨》、《唐 『既見』二字無 華谷非之,謂: 主君子言也。 喜樂,又以禮儀見 既見君子,樂且有儀」,箋云: 所歸 歐 「以『樂且有 陽氏《本 接。」是樂主見 ^ (詩)中 義》全指 :儀』指 一既 者 見 揚之水 君 君 君子二 ,言有 子 子 心心 則 嚴 既 儀

菁莪》首章箋云:

既

見君

子,官爵

學養老,則併得見天子矣。末

章

以

舟

之

載

也。

所

見之君子,

在

鄉

則

鄉

老、

鄉

大

夫

諸

職,在國

則大司成、大、小樂

IE

諸

職

, 如

遇

視

觀敘

語

可見。

源

謂

前

三章皆以

莪之長,喻

天下喜

「樂之。

至

於成

材

而授官

「, 乃

其

餘

材之育,則此三「既見」,因教誨

之而

得

見

義。 以 其 喜字、休字,歐 見 車 有 者 接 ·鄰》、《 但一 儀指 喜 旬 出 也。」斯言得之矣。 皆述喜之之情,謂 句分 車》、《蓼蕭》、《菁菁者莪》、《頻弁》、 君 子,元 屬 陽 以 兩 是 人,終 屬君子,實 見 者自幸之詞 見君子 未 源 渾 謂 爲無 樂字 成 者喜 即 H. 無 理 《隰桑》。 以 妨 下 非 儀 鄭 章 文 所

禮儀者 語 善教之作 長育人材之道 未 明 暢 内 成, 外 東 是有 兼 萊《詩 養, 固 儀主賢 多術矣, 非 記》載 心 過 才。」言得之矣, 行 而 吕 無 莫先於禮 氏之説 所 從 日 儀 此 惜

爲

相

接

之儀

,趣味

亦

短。

嚴《緝》云:

見

説

爲

是。

禮儀』。 人言儀,並非 材所 以 旨 成 哉斯 也。 僅容貌之謂 言 故 曰 $\stackrel{=}{\sim}$ 嚴 菁菁 説 ,儀、義、宜三字 應 者 本 此。 莪 廢 案, 則 本 古 無

相 通 如如 作 滅 義 ^ 記 鳲 》作 鳩》 傳 : 儀 箋 訓 訓 宜 」,皆是。 儀 《文王 爲義,《 《説文》云: 詩 烝 「宜 民》 釋 鑒 于 文

> 紋下 要術 儀」, 之。 詩 儀 **※**言 此詩 語意本相應,可見詩言育材, 度 吕 而 禮 也。」度謂 首章 氏 首 儀 得 ,猶言 章 其旨 正 有 解復用歐 法度,合於法度則謂之宜 禮 矣。 儀」,與《六 義 《詩 云耳 陽 記》 故 語 不 月》敘之「禮 録 育 吕 以 材 知 者必 果 説 禮 於 儀 以 何 小 爲 以

篤 無 以 是常服」之類。 取 非 震」、「載夙」 亦 亦 任 用 所 爲 經 載 何 載 定, 舟之則 中之載 。」孔疏謂 浮物 Ξ 굸 汎汎 之義者 無 於 楊 亦 定? 義 沈 何 司 舟, 載。 多矣, 尤 則 載 心 余謂 類,當訓 字, 浮 載 疏 專 況 喻 沈 訓 疏 一謂 與 經 喻人之未 人 未 載 語 爲 文 之載矣」、「受言載之」、「 君 爲 載 浮」,箋 見 則 太 初 則, 飛 用 ᆐ 邪 拘 無 思 ? 鄭以 見 未 云: 見, 君子, 詩 載 文 見 至《 学中 載 亦 止 繋 君 集 解 用 念 沈 子 而 載 義 載 最 心 字 武 物

之在水,豈有是乎?以爲無定,則是浮而又沈,沈而又浮也,舟也。又舟之浮者,常也,沈則不復浮矣。如

毛詩稽古編卷十一

吴江陳處士啟源著

南有嘉魚之什下變小雅

六月

> 哉? 傳云: 順。 末兩 然後用師。」可見首二章,毛皆指簡閱言,章 應在此時耳。 田 擇其士衆車馬,如《周禮 常。服,我服也。」夫簡閱者,將出師,先選 己矛盾,復爲之説曰: 孝友之臣處内。」傳義顯然矣。 王猶親莅之, 況命將出征乎? 及《大司馬》。 佐己,其云「佐其爲天子」指吉甫言,更爲明 ,教民坐作進退之法」是也。 「出征」,則明簡閱之故,何嘗以爲親出 至王建大常,雖《周官》有明文,見《司常 故末章傳云: 棲棲,簡閱貌。 然玩傳語,未嘗謂 二章傳又云: 「使文武之臣征伐,與 「王出鎬京而還,使 • 大司馬》「四時蒐 飭,正也。 建此 肅見此傳與 「必先教戰 平時 大常之建, 以行也。 日月爲 簡 閲

吉甫 未解 云: 怪 師 師 而 何 任之,乘輿 - 早 業已就道 彻 自當躬 動 迫 不得載 逐, 乃至大 孔 輕 疏 率 親 欲 如 乃未見 可 其 常, 證 此 以 事,征伐 成 乎? 簡 無 原。」 王 閲 出,此事 敵 説 遣將 則尤可笑。 又案 而 在 先 以 千里之外,擇 獨行。」此吾所 婦,中 小簡 爲得 勢之常,無 閲 毛旨 興賢主 近 躬 在 率 乃 足 人 京 六

嘗 也。 正 月》,方可 此本不足置辯,但周世民閒 之月,吕《記》從之,朱《傳》以 一至朝 「建卯、《十月之交》之十月未嘗建亥也。 國家大事 小傳》宋梅 必 六月棲棲」,劉 如《豳 廷大政 定 其 丁,焉 風》之《七月》,《小 堯臣著。 爲 令,必 夏 有舍周 IE. 執 耳。 謂 以 中 正 \sim 周 彝。 \sim 詩 而 IE. 小 紀 用 以六月爲 紀 物 爲 明》之二月 無 夏 月,出 候,或 建未之月。 雅》之《四 周 正 正,非 者 哉 用 建 師 未 ? 夏 日 征

有辯,見本詩。

有之。 字,意 雅 知非 兩 其解矣。 征 古文烏作經,又省作於,隸變作於,借爲「於 用于,而 從万,從一。」夫「于」象氣之舒,「曰」從口 乙,亦象 説文》「亏」字注云: 」,若不訓 訓 釋 偶 ,故不用 于字有 元 今莫 詁》,其曰 遺之耶? 於字 相 口 孔疏 同 氣 入識 于爲日,文義終不 \equiv 亦 矣。 之出 日 謂《詩》中于字,傳 訓 日 閒 義 義,然《六月》詩 ,於也, 義,郭注引此詩 又案,于、於同 案,於、 出。 述毛,不知傳文質 ,見《説文》。 於,本古文烏字 「於也。 往 曰二義,皆見 也 可 古 日 義 象 止 通 兩 也 人 證之。 鄭 氣之舒, 有於、往 王 製 (詩)/多 略 詩 此 于 也 從 又 爾 安 得 出 具

^{■ 「}逐」,原作「遂」,據康熙抄本、大全本、《四庫全書》本、

乎」字,其 借 央居切。 則 歎詞矣。又於爲 頌,則釋 武》、《板》、《清廟》九詩,凡十七字,皆于義, 著》、《權輿》、《蜉蝣》、《九罭》、《白駒》、《下 而 不離本義者 轉 俱 文有兩音,要音烏之義長 至《伐· 其 輔 義而 矣。 木》、《靈臺》與《雠》、《齊》二 歎詞,元象烏鳥之鳴,斯假 ,故他典作鳥,亦作鳴 於字 不改其音也。 見《詩》者,《 又爲于義, 也,餘皆 静 女》、

本謂 既音 皆訓 義 王 明》之「靖共爾位」、《召旻》之「昏椓靡 朱《傳》云: 用鄭説,述毛 一、徐音 否也。 嚴 共爲恭 爲 共 者 一供 武 恭。」王、徐之音,述毛者也。 與 觀《巧言》之「匪共」、「止共」、《小 之服」,釋文云: 具」之供, 翼 ,又引鄭箋云: 亦讀如字,恭音之義無 者共 共 、與供 典兵 則 同。」未知 意當同矣。 事,共典猶 「共,典 「共,鄭如字, 王 一、徐 同 嚴《緝 也。」箋 聞 典 孔 共」, 亦 耳 焉。 此 疏

> 非以 共典兵事。言文、武之人備。」此義亦勝。 人,云: 文 收之耳。吉甫文武 節著,或以文德優,人各有能,在 嚴者能率厲士氣,敬者能 義, 典 將 釋 誰 共 羣帥之中有 欺乎 也。 ? 裁 割先儒之言, 俱長, 又 案, 威嚴者,有 撫 箋 所以爲 緝 一分嚴、 衆 心, 而 用才者兼 元帥也 恭敬者 翼 或 不 爲 顧 以 其 武

釋,惟 傳》,彰彰有 地名 也 也。 以《六月》之大原,非《禹貢》、《左傳》之大 涇 涇水之北,涇水 陽縣當之也。 ,方也,涇陽也,大原也。 朱《傳》始以今大原府 \wedge 加 焦穫 六月》詩所言 已。 則 據 惟 疏 前 大原 引《爾 北 鎬、方無 注 非 地 之名見《 一、疏 雅 名凡 地,初 。】耳。 皆 可考,直以 陽 無 Ŧ, 毛、 曲 不以 禹 鄭 縣釋之。 焦 語及之, 鄭 貢》及《 訓 秦、 穫 槩 爲 涇 也 漢 無 北 陽 良 左 之 原 注 方 爲

孔

以鄭述毛,不爲

無

見。

原 也 載 後 應 寇 底 原 ∇ 之大原,其 而 此 H 《吉日 (皇矣》 # 後 定 績 得 不 沂 魏 謂 西 向 即 車 之 毛、鄭 之 又 名 取 始 大 西 相 原 使 × 百 日 州 矣 陽 ,見於《詩》、《書》者,《禹 以 置 北 接 詩 E 原 公劉》 因 證《 曲 壤 而 即 諸 度 去 其 復 後 南 膽 面 詩 哉 去 唐 其 古 詩 原 命 仲 彼 魏 亦 降 $\check{\mathsf{H}}$ 獫 原 一吉甫 之 鮮 》乎 不 取 名 既 中 猶 無 在 「度其 狁 原」,《 遠 州 類 名 或 平 通 原 原 有 確 ? 自 安得 取《 與 據。 傳 今平 稐 義 大 是 亦 隰 ? 案, 皆 緜 聞 狁 又 原 詩 屬 西 原 駮 反 涼 後 雍 **>** 日 定 雍 果 》一大 臆 府 漢 北 即 Ě 其 東 魏 地 固 屬 在 州 説 之 # 伐 又曰「于 誤 行 瞻 周 去 原 貢》 忧 高 维 之 貴 原」。 狄 逐 西 ,允矣。 州 彼 況 周 原 平, 之,至 丁,其 州 地 反 及 日 戎 ^ 溥 未 官 膴 涇 北 六 不 漢 多 原 胥 心 千 膴 原 源 遁 州 則 月 高 境 知 以 地 隰 或 斯 然 餘 謂 亦 平

但必欲確指爲何地,則穿鑿之見耳。

狁 應 肘 方 數 里 城 縣 斯 八 一,縣 巢 腋 + 北 北 言 密 穴 之 百 里耳 濔 七 殆 毛 城東二十 + 里 際。 反近 如 今 未 傳 此 里 涇 伙 云 何 而 在 周 陽 也 得 獫 而 況 百 世 縣 狁 便 五 咸 里 吉 戎 即 焦 焦 13 與 里 陽 内 甫 狄 穫 漢 穫 在 爲 獫 縣 , 尤不 逐 雖 池 又 都 狁 古 周 之, 亦 多 陽 名 城 鎬 爲 地 在 錯 縣 瓠 可 尚 數 鄰 京 接 府 信 也 處 口 行 + ? 於 城 焦 千 中 里 在 獫 在 西 穫 西 威 外 里 周 去 北 西 今 狁 之 安 涇 者 亦 直 畿 Ŧi. ľШ 不 是 僅 府 陽 + 内 獫

未 也 焦 謂 注 詳 護 瓠 爲 中 所 集 阚 ·, 乃 今扶 + 在 傳 雅 藪 釋 . 釋 風 穫 之 釋 焦 焦 池 護 地 郭 護 陽 , \bowtie 璞 則 勿 非 縣 周 以 分 焦 偏 瓠 有 中 爲 而 釋 穫 焦護」, 是 護 爲 瓠 乃 也 也 中 <u>-</u> 地 與 然 知 爾 穫 非 則 引 同 雅 郭 巫 焦 爾 以 郭 地 所

雅》注矣,又不玩其文義,何耶?

之閒 則 之朔方郡當之哉 里,方復較 云 圃 侵鎬 方, 益知《詩》之朔 矣,方之去周京,當比 「千里之鎬 而 出 及方,至于涇陽」,言 涇陽也。 車》,傳謂 近焉, 方,非 猶 則不及千里矣,豈 是朔 方 以 即 方之地 漢 爲 朔 遠。」 方 朔 獫 鎬 ,觀《六月》詩 方郡 ,在涇陽 狁之來 鎬 爲 矣。 近 去 京 可 以 與 師 劉 由 詩 云 漢 向 千 鎬 鎬

先焦穫乃侵鎬、

方。」

蓋

亦

同

涇 遠 其縱兵深入,迫處 至 即 是 陽 m 焦 以 涇水之陽,久居 來 而 穫 以《詩》之文勢,合之今之地 紀其 乎? 其 止。 ,故言鎬 久 居 内 詩數獫狁之惡,故 焦穫最 侵 加 與 所 不去,故 方 内 極 地。 則 近京邑,獫 紀 也。 實 其 繼又追本其始 指 E 外 以 其 一整居。 侵 其 先言 地 所 初 狁 名 理 經 至,故 一、涇陽 焦穫,見 犯 初 也 立詞之 周 至 自 言 則 曰 當 其

> 常也 也。 方地 言,鎬與方皆舉遠 穫 見,自應先舉其 亦 名。」獫狁之來,由 孔疏云: 在 其 涇 北 水 耳。 經 流 **鎬** (近,後 總之,焦穫、涇陽皆舉近 千 而言 六 方雖 遠 百里,水北 箋云 舉 而 近,詩 在焦穫之下,不必 其 由 「鎬也,方也 遠 人據 非 加 近之路 目 地 前 皆 所 焦 而

子雲 不必與 荆 其 徙 馴伏,故可 東、西、南三 海 出之而已。」疏申其意,以爲宣王德盛 來 疆 無 常 威」、《江漢》 圉 所 常常 薄伐獫狁,至于大原」,傳云: 居 戰。 謂 ,令不我犯足矣。 武》詩 生性 中 招致而臣屬之。 一夷皆 此 國之堅敵 桀驁好殺,不 日 語 有 徐 古 詩 城 然, 方既 曰「于疆 郭室 也。 然猶 故《采芑》詩 來,徐方既 廬 北 善 可 未 謀 于理,至 狄 德 知 盡 或 綏 逐 慕 也。 者 威 水 德 同 日 兵彊 草 攝 大抵 言 于 但 南 轉 逐 或 古 揚

10

致

其

朝

稽首闕廷焉。 而宣 言諸國之來侵也,意所云背叛者 形、縱 職 貢 Ŧ 或或 自 輒 兵 稱 舉兵 正 若《六月》詩 蹂 其 雄 、跳,彌 於 封 人 域 其 一方,又甚則旁犯 了, 如 (地,彼 亘千 臂 則 使指 餘里, 異是 亦 惶 一,述 懼引 京 Ħ. 一獫狁 ıÉ 畿 鄰 彼 罪, 是 重 其好 吉甫 也。」 言 日 持 語 私 燕 論

耳

寇情

不

·修貢

詩

不

吉甫 諸 地 一、半爲 國,望風 出 征 戎 「,僅 懷附 馬 敵 僅 之場,彼三詩 勢,豈 也 [驅之遠遁,不若 彼三詩多 勇於 彼 寧 而 有 稱 怯 蠻 是 詡 於 到,淮 乎? 國 此 威, 哉 ? 此 徐 至

詩

反

張

皇

屬 當 衡,古今事 年 爲 事 郡縣,惟 勢,實應 暑相 北 同 爾 狄 爾。 倔 讀宣 温 後 沙漠,長 王征 世 東 伐 南 荒 四 與 服,漸 詩 中 或 口 得 抗 内

其槩矣。

同 甫之友,非王之友 心 之友與之飲 飲御諸 友」, 以 疏 也 云: 盡 其 吕《記 、歡。」 進 然 其 宿 引 則 范 諸 在 氏 家 友 之 諸 乃

> 厚耳。 其 《燕禮》: 常常 事 友與之共飲,使得 , 且 》「大史友,内史友」,君 至若吉甫召 牲用 ,尤失之。 E 雖 一何關 狗。 以 美,然非 羣 於國政, 加 臣 以 自創 爲 珍膳 詩 詩 友。 盡 正 意 友 而著之《雅 見 歡, 以 矣。 東 燕飲 王 寵 又於常牲之外 萊 一燕吉 ^ 固 異 又 集 於 以 申 功臣之特 傳 私家,乃 甫 臣 之 **>** 爲 以 必 進 爲 友

采 世

耕 故 詩 治之方新 人以采芑 宣 王 能 新 美 新田 士之勇武 天下 爲 之士 喻 由 然 田 於教 後 之 肥 用 養之有 美, 之, 由 傳 語 素 於

⁰ 亘 原作 直 據康熙抄本、 大全本、《四庫全書》本

脱 疏》語 鉦 車 實事矣,豈三代 也 集 據 前 去「似」字,豈欲溷茶、芑爲一物乎? 傳》 有鉤 則 金 (集傳》以 而《集傳》不 鐲 而 路 此 文曰: 以 誤 革 非 鉦 節 也。 是 戎 路 鼓,非静之義,傳云「 爲因賦 鐃 車。 節制之師乎? 無 一從,未 疏》云: 非 · 艺,苦菜。」此 之, 鐲。 又鐃 起興,是采菜、 經云「鉤 解其 Œ 與 「芑似苦菜。」今 義辯之,皆 何故 鐲 直 膺」, 襲 通 角 義 切。 用 鉦 則 ž 民 ^ 草 歷 以 皆 此 田 有 名 又 静 路 辯 木 乃 有

汁。 苦蕒,結子亦同。 毛。」李氏《綱目》云: 本草》謂之白苣,王 療 正、二月下種,三、四月開 芑菜,陸《疏》以 生 本 草 菜 **学**云 不 離 袁 八月、十月可 白 爲似苦菜。 禎《 世 蓋 葉色白,折之有 農 白 似 苣、苦苣、 書》 萵 華,黄 苣, 再 謂之石苣。 案,宋《 種 葉有 色, 萵 故 嘉 白 白 諺 如

而

異

四

以 風》。 芑是白苣,同 俱 美,得專其 爲 宜生食,不宜 相似,信矣。 稱 也 烹 《集傳》不察, 類 然則茶是苦苣 通 而 可 小 别 生菜。 耳。 溷 一,辨見 元窓今作格 爲 加 白 ~~ 菜。 苣 稍 谷

卒盡 張之説也。 極其 壬, 之談,容或過 子譏其文害詞,詞 邑及諸 以爲 T ? 三及之,不憚 於六鄉 起。 乘,見《左傳》。 盛 則十八軍矣,非 王國六軍,用 晉 而言, 用 侯邦國 霸 鄉鄉 孔疏 侯 或 況萬 國之兵。蓋古者天子用兵,先 耳, 不足取 甚 未必實有 。 皆本 以 一,然 重複,殆是紀實之詞, 乘之國,出 昭 爲出六遂及公邑, 害意 車千 而 十三年 此 漬 有 出 六遂,遂不足取 詩「其 啟 ,故《集傳》云: 此 師 乘。 此數。」夫詩人 疆 制,非 之常,故鄭 治 《采芑》「其車 所 車三千, 車 言 兵 三千」,一語 臆 邾 長 説 南 轂 後世 公卿 以 何 也 甲 九百 誇 足 非 爲 車 此 羨 爲 詡 采 虚 干

取

氏

見 詎 Ŧī. 昭 足 T Ŧī. 爲 乘 年《左傳 多 矣。 而 過 宣 疑 Ŧ 尚 之? 不在 成 周盛天子,三千之車 其 中, 合 而 計之,幾及

鳩 隼 氏 則 文》 徒 喻賢 切 鳩 也 《九家易》言其 (詩》言將父將母,以之爲 思 定 鵻 皆 (,主教民」,亦取 也 離 允 非 《易》解 人。 見 此 ^ 説文》以 誻 切,始 鷙 爾 皆隼也。 從鳥 齇 《左傳》謂之「 爾 隹 鳥 雅 也 聲, 性 雅 卦「公用 翼 隹 疾 横以 作爲 不害。 以 一聲,或 明 日 據 案,鵻 隼 與 其 其 隼音加之耳。 詎 鵻 鷹 爲 隼 隹 射隼」,以象誖 孝 説 可 隼 從 之或體,云: 或 異 乃謹 其,鴂 也 祝 合爲一哉? 醜 隹 體 讀。 以 鳩 **興,而《嘉魚** 其 爲《詩》之「翩 一。」徐云「 少少 隼 慤 當 鴀 又訓 孝順之鳥 爲 飛 必 皡 又案 有 也暈」,注 氏 注 爲 逆之人, 誤。 以 況《説 祝 熱 》篇 鵻 「今鶏 思 名 鳩 徐 鳥 司 故 允 以 祝 翩

> 芑》、《 乎? 類 以 也 隼,皆言鴥。 而 云: 羅 疏》云: 也 云: 鼓 己。 比 施願《爾 明 量」之謂, 翩 翅 矣。 小人、 隼 鍋鳩, 鵧鷑。」 (沔水》 鵻 暈 吾則以《詩》、《易》、《爾 《詩 今俗 雅翼》 、鴥隼亦各爲之疏 翬然疾」,此 即 鳥也,《 亦以其 . 可見鷹 兩言「鴥 名 鴥者,迅疾貌 秦風》「 春 疑 鵶 化 鳥 鳴。 貪 爲 説 布 鸇 文》以 殘 將符悲切,音皮。 彼 鴥 而 穀 隼 與 者。」 善 兼 則 飛 彼 也 隼 搏 = 又 晨 隼」,咏 爲祝 ,正《爾 同 ,皆以爲 鳩,果 風」,《 撃 是 則又以 是 雅》之言 也 鷑 璣 鷙 鳩 鸇 之釋《 鳩 雅》「 小 安所 其 鳥。 兩 陸 鷑 爲 晨風 與 雅 禽 氏《詩 鳲 音及。 《易》 鳩 其 斷 折 爾 . 矣。 鳩 雅 殊 采 咏 衷

動 釋 也 訓 % L°(爾 雅 玉篇》云: 蠢 不遜 詁 ≫: 也 動 ら、《説 也, 蠢 作 文》: 作 也 也 % ∫ ° € 動 廣 也 韻

以 因意、蠢隷文相似 是誤以惷愚義爲蠢義矣。 之有,語本伊 音同,義亦相 焉」,昭二十四年。今本惷作蠢,是也。 之爲言蠢也」,先儒釋之,皆不 不遜 云: 又溷意,意,亂也。 蠢」、「允蠢」、《詩》「蠢爾蠻荆」、《禮記》「春 蠢爲無知之稱目,反忘其動 與? 出出 也 蠢,動 《書》「 近,無 動 川,而蔡氏亦祖 也。」然則 蠢兹有苗」、「越兹蠢」、「今 而 ,致斯謬也,治誤至今,輒 《左傳》「今王室實蠢 妨通用耳。《采芑》、《集 無 知 貌。 動 意,書 其 義矣。 此以 無知義,古未 本 離 容、丑江二切。 義,而 動 釋《書》, 義。 **悲、蠢** 借爲 蠢 字

壯。 」一似 壯猶 非 證 後世趙 引 與? 元老壯猶,《易》所以稱「丈人吉」也。 曲禮》云: 營平、馬伏波,皆以老 朱《傳》曰: 老將所能, 「五官之長,謂三公之爲二 「方叔雖 短於義矣。 將立 老,而謀 功,非其 況 則

車攻

《車攻》傳,而以尚純、尚彊、尚疾推明厥旨。 及焉。不獨此兩詩 矣。然兩詩皆紀田獵,宜專以齊足取義,而篇 中言四牡、四黄,乃齊力、齊豪之事,齊足反不 足」、《爾雅》此文,釋《吉日》詩也。 曰乘駒,皆齊力也。 蓋《吉日》云「既差我馬」,差,擇也。 我馬既同」,同,齊也。 宗廟齊豪、爾雅》作毫。 也,凡《詩》曰 曰四黄、乘黄,黄騂色。● 擇之使齊,二義 戎車 齊力,田 四牡、乘牡 毛公用之人 **庫** ·攻》云 相 獵齊 因 E

四

也。 耳。 與? 馬即 驪色。 别其名,而配以駟乘之文矣,宜其不著於《詩》 其以力舉者,止有 之。凡軍事,物馬而頒之。」毛馬即 駟 據毛色,而力與足不與焉。 之駿,不在恆畜之列 **裹**奴了切。 名,惟云「絶有 E 四 若夫騉 其 齊力也,亦 皆齊豪也,獨齊足不言駟 案、言詩 黑 《爾雅·釋 師 ,白馬黑鬣。 色。 田之馬,力與足既齊,而色復齊,則 **驂之屬** 音昆。 「大祭祀、朝覲、會同, 》載 力,駥」,如融 駠 無 馬 ",皆彊 騵 蹄、 駒、牡 日 畜》所列 名最多,類皆以毛色爲定, 齊足之事,豈 赤 也。 乘 騉 馬 力疾足之馬名,然非 鴇,驪白襍毛。 、除、音徒。 兩稱,並 白 竊意古人之名馬,止 腹。 切。 諸 雖有 馬,亦以毛色辯 乘。 則 \Box 齊者,亦無由 齊 以 無 四 盗 又《周 齊豪也, 毛馬 足 彊 以 日 騏 驪 非 疾足得 乘 宜 力得名 ,青黑 駽 周 而 禮 乘、 色 物 青 常 制 頒 .

> 詩人特 《駜》之乘黄、乘駽以在公,則齊豪而已,不必 《秦》之駟驖、《鄭》之乘黄、乘鴇,及此詩之四黄 兼力與足矣。 之乘黄以贈人、《裳裳者華》之四 皆是,要非天子、諸侯不能具也。若夫《渭陽》 月》之四驪、《采芑》之四騏、《大明》之駟 表 異之, 以 見 畜 牧 蕃 息之美。 [駱以 保禄位 如《 六

會而 客耳。二章《集傳》云: 以爲 猶未田獵也。 獵。」五章又云: 會諸侯爲主,會同之後, 先獵 有 《車攻》二、三章言「行狩」,言「于苗」, 司 , 0既 先爲戒 會 孔 而 疏 具 既 復獵 以 是 會 爲 也 「 至 者 同 因 先 丽 致 宣 帲 語 東 田 意 其 田 王 都 獵 適 意,吕《記 殊 獵 而 未 以以 東 選 明 都, 似未 徒 娱 割 以 賓

一」。原作「二」,據康熙抄本、大全本、《四庫全書》本

嘉慶本改。

草。」則圃、 北 子,故直據此 以 甫 則 東有 二十里,計二地相去僅百餘里,各舉一名, 韓 甫 甫 廣成頌》曰: 互 七里,敖 H 否 有 詩》作圃草, ,鄭音補。」朱《傳》從鄭 田 圃草」云云。 見 也。」然案圃 ,嚴謂: 圃 之草也 甫 其 草」, 草」, 所 甫二字,古本 Ш 在 文解之,非破字也。 在 注訓 傳云: 「下章言獵於敖地,不應又言 康 義 「《詩》咏圃草。」章懷注引《韓詩 今開 見《後漢書 鄭 田 成先受《韓詩》,又馬之弟 有 一澤在今開 圃 亦 圃 封府鄭 爲大,云: 可 「甫, 田。」故《釋文》云: 通 通 ,吕《記》、嚴《緝 用。 也 • 大 州 封 馬 也。」箋云: 河 府 又圃田《 又案, 甫草 融傳》。 又《周 陰 中 「茂大之 縣 牟 西 縣 語》 水 北 融 西

東 都 畿 孔 疏 内, 謂 故 宣 王 官 得 王 往 時 未 田 焉。」此 有 鄭 或 圃 語非 田 是。 在

經注

一》作甫

田

,其水爲甫水,尤足

爲

譜

爾 侯 境内,天子自應 鄭 \sim 正當全盛乎? 又《左傳》文十年,楚子與諸 而 天王狩於 賦 王制》設封建之法,名山 也 田 圃 ,何況天子? 襄王以衰,周 於宋之孟 田,不得 ^ 周禮 河陽, 》九州澤 在 諸,宋不以爲 得 其 弱主猶狩於其境 河 孔氏之言,不稽於典矣,然 封 田。《春秋》僖二十八年, 陽 藪皆 内。 晉 地 掌 大澤不 且 也,時文公方霸 於 非 嫌 直 職 也,霸 以 内, 況宣 此 方 胎。 也,諸 正 正 È 使 音 尚 王 侯 有 班

傳 夏教茇舍之法也。 夏。又云: 獵之總名。 》以苗爲狩獵之通名,殆不然毛説 夏獵曰苗。《車 故毛傳 「艾草爲防,或舍其中。」 東萊《詩記》從之。 行狩不言冬,而 攻》言夏獵也,行 于苗 狩, 正 言 仲 乃

案、《小爾雅》云:「屨尊者曰達屨,謂之金「赤芾金舄」,傳云:「金舄,達屨也。」

朱《傳》從之。

二 六

不屨 黑 也。 舄 最 孔 调 申之,以 猫 舄 異 赤 之爲 者。 古 子 屨 舄 舄 得 而 約。 「其説 魚 之 在 達 古 黑 金 赤 最 人重之,以 達 注 約 約 名 金舄之色直達 名 爲金舄 舄之下 言 屨 E 也 彻 鮒,著《小 又甚優,而 達者 黑 詳 宋 屨 傳 注 其 即 C, 故 咸 文 意 爾 爲 其 伍 赤 赤 注 雅 達 E 尊 成 與 舄 舄。 則 孔氏不用,未 於約 云)屨,義 未 達 人之飾 約 皆 金 先 屨。 達。 與 冒 舄 舄 聖 所 絇 當 有 亦 禮 九 此 赤舄之尊,莫 異 以 《玉藻》 約 是赤 三等, 應 代 殆 殊 者 色 爾 知 孫 臆 其 屨 舄 舄 īĖ 何 白舄、 説 制 青 其 孔 之 頭 見 意 童 耳 約 書 特 疏 飾 金 而 子

取 + 賜 Mi 之,賤 ·, 其 文 射 在田田 餘 餘 車 獲 頒 攻 勇 獵 之事 賜 力 之先 第 臣 Ŧi 貴 下 蓋 章 者 褿 0 鄭 \coprod 然 讓 疏 獵 忧 必 以爲 謂 所 [習射澤宫,令中 承上 獲 事 諸 禽 在 侯 一章諸 Ŧ. 田 從 獵 E 擇 侯 之後 H 來 取 罷 會 者 ___

典,不 諸 之事 諸 章 無 惟 車 此 H 目 通 庖 驐》之二、三章、《定之方中》之首二 \mathbb{H} m 助 文 指 Ξ, 》之四、五章,皆取 禽 侯 獵 爲 與 求 無 言 我 射 以 雖 義 田 乃 事 蓋 也 射 非 Ė 令其 舉柴」在 而 待射 順 定 詩 不 夫,決拾 獵,事之前 是 禮 贅 名 班 是 廢 朱《 王 人 乎? 遂 也 事 餘 惟 達專言: 故故 射 敘 所 解「決 (傳》 相 之 既 事 「舍矢如 擇 有 然所主不 、弓矢皆射具, 次 射 助 獵 射 況射 取 於七章方及澤宫 積 後,終 嘗 公拾 以 禮 我 缺 乃 故 之三十禽 文便 禽。 有 舉 諸 中之後, 如矣。 有 射 破 先 柴」, 夫 班 未 若方獵 在此,竟 侯 下 也 後 即 之前 餘 順 爲 倒 亦 指 七 獲 與? 故言 也。 章, 後儒 射 方 置 因 諸 章 射 時 미 m 就令 者 以 皆 班 侯 所 案, 之特 獲 釋此 集 習 章 其 其 射 士 爲 餘 謂 禽 如 射 大 第 所 夫 故 兩 説 又 時 田 詩 殺 目 章 詩 之 夫 大 獵 出 駟 謂 聚 Fi. 如

壓、 殺 獲 尚 潤 布 盡 相 物 散原野中,未可言積也。 枕 藉者哉? 如 後 世 所 舉柴當在澤宫,明矣。 誇 風 毛 ায় 血 王者之田 禽 相 鎮

傳云: 自若也。 故子夏之徒特著之於《爾 器,見《周禮》,詩 也。」舉全句而釋之,其專爲《車攻》詩 詩》者,不至誤解爲徒行耳 雅 「徒, 釋訓 輦也。」義 所 * 咏正 指此,但文義未顯。 亦 「徒 同 雅》, 無如後 矣。 御 俾後之讀 不驚輦者 輦,載任 人之誤 可 知。

吉日

皆祖 職方》雍 孔 其説 吉日》篇 疏 則 州之浸」以 漆 沮 此 「漆沮之從」,宋 漆 在 涇 沮 解之。 在 水之東,一名洛 馮 翊 ,即《禹貢》之漆 吕《記》、朱《傳 李樗引《 水 尚 即

與馮 渭。 録其略 西 馮 未 沮也,去鎬京三百餘里。若出 西安府界,至富平縣,合漆水。 至子午谷,合子午水 縣,合沮,歷 縣,人西安府界。 延安府甘泉縣,鄜 Ш 沮 自 水耶 [普潤 又謂 聞 水 多獸 也。 杜 此洛水即漆也。 ,近韓邦奇云: 自 翊之漆 漆 E 廢 ? 近世馮氏《名物疏》 西 惟漆水又名洛,不當併以 ,水多魚,漁 沮 、縣,故 北 其 爲涇 者也。 注之, 蒲城 洛水出今陝 扶 漢 風 汭 沮水出自延安府宜 同 州 經耀 漆 漆 與 出 獵宜於 其沮 所 宜君 縣 歷 水 鞏 州至 杜 隔 州 昌 也, 出 水合,《 贵 之 中 縣子 府 及 西慶陽 自 此 朝 階 所 流 部 謂 同 能 鳳 州 地 經 縣,東 邑 地 在 午嶺, 扶風漆縣者 官 翔 此 角 飛 齊詩 孔 岐 縣 近焦 縣 府 理 沮 府 渡 馮 東南, 至富 Ш 環 或 爲 仲 麟 南 而 翊 至 北,大 君 縣 有 穫,其 東南 洛 之漆 所 達 遊 合 中 流 云 爲 縣 平 部

併入 濯作 矣。 渭。」 源 洛 漆 其 水。」 沮 馮 歸 注 東 馬 慶 泪 亦 水 南 德 異 乃 注》云: ,二水名, 謂 八合水 香 此 今《水經 陽 爲 縣 各 東 至 īfīi 云 ,濯水人焉,俗謂之漆水,又謂之漆 漆 〈》「導 漆 扶 洛 府 流 注 委 謂 沮 作 風 蓋 柒。 有二, 合 水 同 而 ,注於洛水。」今此文見注 漆 之 水 同。 指 亦 名 漆 水 耳 馮 泪 漆 沮 又 Ħ 洛 縣 洛 沮 漢 所 不 漆 而 泪 又云 東 水 即 洛 隋 水之初 水 案 謎 書》引《禹 得 此 也 出 過 水, 沮 馮 出 也。 詩 置 俱 漆 翊 俱 北 漢 北 出 漆 洛 名 泪 緜 之洛水。」此 人 地 入 蠻 以今考之,漆、 . 馮 沮 源 洛 鄭 、洛、洛 **>** 貢 直 塞 地 詩 夷 翊 是 縣 渠 孔 》此 路 則 爲 中。」 漆 理 北 馮 於 在 傳 縣 記 猶 源 而 人 文 翊 其 太 沮 云: 稍 東 漢 北 滑, 疏 未 之 東 以 皆 F. 顔 不 引《水 水 歸 盡 指 同。 北 名 皇 三水 人 地 統 師 沮 德 沮 此 洛 縣 郡 名 陵 漆 古 後 又

故 漢懷德 合乎洛 平之石川 沮 言洛 德 之源 亦謂 爲 在 水 洛之委也。 東 其 也 <此 孔 沮 在 南 禹 白 陽 華 東,洛 貢》北 於山一 安國 水 其中,馮 也。 又《 洛 故 人 原今省 與《禹 東 滑 城 河。 入 出 流 丽 Ш 塞後 一合水 又 班 條荆 入耀 又在 以 \equiv 南 漆 洛之委 海 名 案,《 貢》傳、 謂 周 固 水 流 州。 經經 經 縣 注 沮 女 皆指 槽 合 漆、沮 不 Ш 雖 **>** 於渭 與與 郎 地 又東 《實宇記 云 鄜、坊、 得 在 渭 分 與漆、沮合, 山 疏 理記 併名 隋 懷 職 南 。」宋樂史《寰宇記 在 東, 南 及 至 德 在 方 洛 》言 下 朝邑 白 白 師 至 人 同 洛 氏 合水 源 漆 馮 有 漆、 古注 於 司 渭 水 意 三州 縣 至 過 翊 注 彊 西 沮 之 州 之水 縣 同 縣 華 梁 懷 合於 則已兼 亦 南三十二 意 Ш 白 溷 乃 北 原 言 德 此 原 同 爲 人渭 爲 水 此 而 洛 縣 皆 洛 洛 雍 縣 俱 一里,有 皆 言 西 有 洛 水 出 注 人富 里 流 **>** 録 乃 合 漆 洛 以 懷 水 出

得其 沮 而 二水 H 真 洛 矣。 人 即 焉 漆 又案,「瞻彼洛矣」 沮 説 也 亦 相 韓 合。 邦 奇言 韓, 洛 一指此 雍 自 人, 所 洛 心洛,宋 而 見當 漆 Ŧ

氏

以

爲

東都

水,非

是

沮 是 其説 皆指 東過 王 岐 宜 石 水矣。」惟《吉日》之漆沮,宋蘇子由、李迂 香》篇 緜》 禹 陽之 爲 鼓 有 貢》之「漆沮既從」、疏以爲扶風水,誤也。 爲洛 岐 文 漁 詩 漆 雍 也。 所 + 陽之蒐,語 地 之 州 獵之地,信矣。 沮 馮 で,實周 云多魚 有 則 篇, 翊之 自 是 潛》傳云: 二漆沮 馮 紀 也。 土 漆 家 浴者 翊 言 沮 之水 見 較 沮 也 一漆」、《 一,在 王 在 獵 地 昭 扶 田 馮 且其 然扶 近 四 之 也。 獵 風 潛》 翊 年《左 漆、沮 場 焦 之事, 者入渭之上 者 水 近 穫,多産 風 頌 經 人 楚 世 之「猗 一傳》。 之漆沮 一,岐 流 渭之下 地 一馮 椒 岐 亦 周 舉 嗣 下, 魚 世 言 之二 與 在 宗 流 流, 潤 又 仲 傳 成 IE 漆 祖 岐 而

漆 禮 禮 有 爲在扶風汧縣西。 鄭 之體製,頗與《車 汧水所 鄭樵云: 云 之藪,汧水出 其多獸多 陽,其文次篇言漁 産、有麋、豕、麀、鹿、雉、兔、鮼 弦蒲· 樵云「卑連反」。 沮 、《吉日》之漆沮,安在 期 之弦 驅 「汧,水名。」末篇言 職方氏》「雍州之澤藪曰 處 在 漆沮之從,天子之所」,毛傳云: 故 禽而 自 汧。 「吴即吴岳。」汧 魚,不下於焦 蒲、 出 驅禽從之也。」蓋古者戰不出 至天子之所。」孔疏 疏 焉。」《爾 皆 ^ **鯡、鄭樵云「音白」。** 爾 云 與 攻》、《 於 雅 扶 楊跨 汧 水 狩於吴岳 **>** 風 雅 **与** 之 穫矣。 出 水,云河 之漆 吉日》 與 非 》「秦有楊 Щ 扶 楊 扶 焦 在 風 陓。 穫 沮 弦蒲」,注 風之漆 相 汧 又其 鰋同。 汧縣,吴岳 ,云「吴人憐亟」, 鯊、 各居十 也 云: 相近。 似 沔沔」, 音 跨 西 鱮之 絝。 地 沮 所 有 鯉 即 乎? 王厚之 ・藪之 又文 以 注以 述物 弦 「從 云 《周 頃 類 鮧 浦 周 即

深矣。 左右 所。」是徒以 從之,惟漆 後世人主盤於遊畋,始有歷邱墳,涉蓬 職云「設驅逆之車」,皆是禮也。 於防中,然後射之。 天子、諸侯 H 王左右者,獨非從王之人乎? 云順其 右之宜,以安待王之射。」射禽必自其左,故 禽之左右,以安待天子。]箋云:「順其 悉率左右 《駟驖》詩云「奉時 敝 不 於叱 出 ,以燕天子」,即上章之意,傳云: 輕萬乘之重,更見三驅之仁,其義 《騶虞》傳云「虞人翼五豝以待射」 八宜也。 防,不逐奔走。 吃,手倦於鞭策者矣。 田 沮之旁爲盛,宜爲天子田 是 利 獵之禮,必使虞 《集傳》云: 騰 一從 爲樂,古 王 辰牡」、《周禮 未嘗登歷 一者率 此三語亦見《車攻 制 同 「視獸之所在 事 蔑 人驅 Щ 如矣。 之人」,夫 誰率之,而 下章「悉率 「險,蒐 大司 此禮 禽 而 》傳。 獵 廢 又 驅 求 至 一蒿 馬 謂 之 而 左 m 良 狐 故

字,乃李所益也。

右」,句法

較完成

然玩

孔

疏,則「於王」二

《文選注》李 傳「驅」字下,更須補出「 箋殆易傳,孔以 爲往,文義始明,然以釋經,不如箋之優也。 玩傳語,竟似訓 之宜。」箋語釋經文最順,而 箋申之曰: 誰 所率者乎? 悉率左右」,傳 善 「率,循 文義殊不 引 爲 「率」爲驅 此 申傳,未必然矣。 傳 也。 云 云 循」義,方可通耳。 可 ,而傳「之」字應解 驅 悉 驅 通 驅 申 禽於王之左 禽順 禽 ·傳義 之左 其 又案 猶紆 右。」 左右

此。

漢

蕭

望之曰:

「爰及矜人,

哀

此

鰥

毛詩稽古編卷十二

吴 江陳處士啟源

況此流民,豈必皆偏喪者哉?

憐之人。」則「爰及」、「哀此」四字爲虚設矣。

鄭矣。《集傳》曰:

劬勞者,皆鰥

寡可哀

寡」,上惠

下也。」望之治《齊詩》,解

亦

同毛

鴻

雁

鴻

雁

之

什變小

非是。 收恤 미 歐陽以爲使臣,義亦同。 雁》是流民作,訓「之子」爲流民 憐之人也。「哀此鰥寡」,哀此 之也,皆「之子」劬 一《雅》皆士大夫作也,朱《傳》謂《 之子,侯伯卿士爲王巡行勞來 「爰及矜人」,恩澤及此 勞之事 古古 自相謂 孤 義 獨 者 者 本 治, 也。 如 而 鴻

雁比 説。 小曰 大於雁,似人家 之白者亦鴻也。 鳧,白色,今人直謂鴻。」 鵠羽毛光澤純白,似 鷖之屬,飛而遵渚。」《草木疏》亦云: 「 醜 案、《鄭風》雁與鳧並言、《爾雅 大小、陶隱居云。 下也,則不止大小爲異矣。 ,而《九跋》箋言: 矣。 鴻與雁 三異者,色有蒼白,羣有多寡,飛有 雁」是已。《博物記》又有三同、三異之 陸《 同 疏》 類 蒼白見《本草綱目》。 蒼 文云: 而異禽,毛傳云「大曰 陶 鵝 隱 鶴 居云: 謂 加 鴻,大鳥,不宜與 之駕 則 大。」則鴻之大,非 「有 鴻 或謂 自 》亦以 鵝。」案 小鴻,大小如 「又有野 有二種 亦各不同 凡雁類,其 鳧 駕 爲 一鴻 雁 鴻 鳧 高 雁

戈,《 鵝。 白者鴻 音六。 小而 川則 说文》作 也、大 鵱 蒼 鷜,力于反。 鷜 者 又鴚 而 雁 鴚 蒼 · 云 也, 鵝之别名 者 小 鴚 鵝。」注云: 而 鵝 鴚 白 也。 者 鵝 小 也 爾 鴻 90 「今之野 雅 也 合 ** 大 mi mi 論

夫以 也 司 嘗合雁、鴈爲一也。 字爲鴈之重文,其雁字則依《説文》訓 若鴈」,並 云鳥 玉 字明 從 篇 爲 又 也 雁 而》、《廣 廣 ,義 據 摯,昏禮 後 鴈二 韻》異。 菲 鴈 徐 人 無所取 韻 説 字人鳥部,云鵝也, 重文,則二字異 習 一字俱 韻 》皆 加 鴻 會》云「 用 今玩《説文》, 不 ,當從雁 雁字 以 見《説文》,雁 之, 徐鉉以 察,二字 鴈 故 爲 當 雁 從 鴻 從 或作鴈」,始 省聲, 雁 鴈字 隹 禽,亦異字 久 則徐 爲知 作 而 诵 又云 則 字 雁 謂 丽 用 説 雁 時 人 與與 鴈 别 鳥,大 鳥,未 爲 隹 鴈 非 以 字 出 **②** 玉 矣 部 古 爲 不 從 讀 鳫

中。 作」, 者誤 章 卿 加厚 則 窮。 然,故以僞亂真之「贗」取 乃畜 也。 魏 此 舒 雁 口 收 + 校《六書精藴》釋鴈字,謂 稱 鴈 以 雖 劬 者 名,觀《說文》雁 禽,定 爲 矜人則 此 也。 勞 則凡流民俱及之,而矜人、鰥寡 恤 矜人,貧窮之人也。 、《莊子·山木》篇記主人烹鴈事,是 目 與 而 來 流 鵝 勞爲言 之,「哀 \pm 雁 安集 行 民中之最苦者, 又案,《 矣。 相 收 指 賑 撫綏之政,委曲 類 恤 鵝 ,當有此 餼之,「爰及」之謂 ^ , 此」之謂 也。 尤厚於賑餼。 詩 不 爾雅》及《禮 應徑 > 雁 意謂 字注 字 三者 釋 也。 ,皆當 其義」, 則 爲 鵝 而 鰥 周詳 爲鴈,古人 之 鵝 此 益 無告又甚 寡 鵝 記》 差矣。 從 F 勞 似 信 理或有 章 石 如此,故三 隹 鳥 無 來 俱 也 雁 矣。 乃 告之人 安 號 其 亦 而 侯伯 統 於 堵 在 集 本 鰥 德 近 鵝 從 名 其 貧 世 之 不 鴈 爲 鳥

乎? 則爲 皆使臣 安宅」,指使臣言,文義甚協。 也。 尾二「劬勞」異,誤矣。案,「 ,然以「之子」爲侯伯、 上者亦身享太平之樂,豈不一勞永逸 鄭箋獨 《集傳》三「劬勞」皆指 鴻 經理之,安得不勞? 雁》詩三言「劬 以 次章 「劬勞」屬 勞」,皆 卿士,毛 雖 流民,義 及民各得所, 流 于 則劬勞,其究 謂 民 侯 垣作堵」, 言, 伯 義 斷 雖 與 卿 首 畫 不 士

亦從 則毛以爲一丈,鄭以爲六尺,而堵、雉之長, 堵,接五堵也。 案,毛、鄭所云 板 爲堵。」鄭箋引《公羊傳》以 二尺,纍之,則 爲堵,五堵爲雉,雉長三丈則板六 圃 百堵皆作」,傳云: 異。 《公羊》後於毛,未足深信。 五板,纍五 一堵之牆高 纍言其高,接言其 板 「一丈爲板, 破之,云: 也。 鄭所 其板之長 長 尺。」 板 云 五 廣 五 五 板

爲説,於義較優。詳見孔疏。「雉長三丈」語,鄭又據《左傳》「都城百雉

伯》詩 詩義 日 也,故亦以 謂 同,矜憐撫掩,有類於姑息, 解 決不謂之驕耳。 也,義似 役作衆 謂我劬勞者,以我 得之。 . 我宣驕 維彼愚人,謂我宣 「驕人」,謂王 此吾 人爲 通 者,以 蓋 而 「驕 1驕灌· 此 實迂。 驕 「驕」 奢。」役作,指上于 與 我 夫罪。」用 吕《記》載王氏之説 矜憐撫 「勞」對 聽信其言,所驕縱 字 作堵 于征、于 與 [驕],箋云: 本以 言。 掩 「驕」字亦同 驕子」之「驕」義 則 爲宣驕 垣爲劬勞也 安民,雖 疑爲驕。 **©**史 垣 記 也。」此 此二 之人 云: 愚人 田 作 謂 ^ 巷 蚡 堵 我

可易。

時

庭燎

於勤 盛則 則莫」,是早晚無常, 美 自問早晚,爲宣王之過,恐非敘者之旨。 云 倒衣」,則 而 也。 因 易衰,故鋭始 勤 「美宣王 箴,特善中 政,美德也。 箋釋「箴 直 以 因 爲 以 者 刺者,彼詩末章云「不夙 小 」義,謂不正雞 昧 失 箴之。」美其 然精過 或 寢 以鮮終 耳。 興之節 《齊》詩「未明」 用則 矣。 ,乃暗主所 勤 人之官, 不繼,氣 《庭燎》敘 ", 箴其 又 而 渦 太

前, 非 必 「未央」是王問夜時,非對王之詞。「未艾」爲雞 真 真 有 鄉 有是問 庭燎》問夜,是形容 \equiv 晨 一度問 爲 也。 辨 也。 色 注 時, 疏 假令未 以「未央」爲夜半,疏云 亦 是 勤 中時 設 政 之心 爲 庭 漸 燎 次 如 心已設, (此,不 如 鳴之 此

爲,與勤政者異矣。

又問 諸侯已至, 鄉晨 時 王 直 又 問問 應起 耶 而 視 朝矣,何 得 未 艾

盡 於王肅之述毛,而 央」,原未見其 不相遠。 之前,●其早彌甚。 理論之,夜半而諸 「央,久也,已也。」又引王逸《楚 央, 盡 央,盡也。」又云: 説文》訓央爲中, m 朝 夜未 者 也。」 來 源謂此詩 央」, 於情 盡 確爲夜半 毛 與 侯 則是夜尚未中,又在夜半 訓 孔 理 已 「央」字,當從 《釋文》引《説文》云: 「央、極,已也。」諸 至,終屬 央 爲近,且 氏申明之耳。 義 爲 也。 同。 日 太早。 夜半 與 鄭 詞注》云: 廣 (傳、 訓 盡 雅 之説, 爲「未 義,夜未 箋義 然以 宋 云 解 儒 始 渠 俱 據 事

^{●「}又」,原作「文」,據康熙抄本、大全本、《四庫全書》+

^{■ 「}逸」,原作「翼」,嘉慶本同,據康熙抄本、大全本、《四

字 相 央,中央也 回,或從 ,豈《韻 宜 土 譜 可 作 坰。 從 用 逸之 也。 大在门 與 E 又案,今《説 ? 久 之内。 也。」 嚴《 並 緝》引《説文》, 口,古熒切。 無 文》云 也 古文

則

與今同

也。」 云 已可通,何必更新。 或 未艾」注 並不云盡,不 王安石訓 夜未艾」,毛訓 芟末曰艾,音乂。」孔右鄭, 證 爲盡,李迂仲引《左傳》昭元年。 之。 知 然 艾爲 李所據 今杜 久,取 注 何 굸: 注 耆 1艾義。 然 毛義 艾, 義 絶 勝 鄭

煇,光 明 燎盛 光」本同義耳。 之見也。 也 爲火 也。」然則 庭燎》二、三章傳 一,断 氣 晣 天欲 則 集 其衰也, 王氏 「晣晣」、「有 傳 明 因 以 而 其説 意别之曰: 云: 煙 煇則光散矣。] 斯穿 光 遂 煇 相 」,與首章「之 訓 晣 雜 晣 晣 「光者, 又 晣 明 謂 爲 也 昊 小

> 義而 案、《説文》断 下文「言觀其旂」,故别 才老説煇字有功。 廣 韻》断、煇並訓光、皆與毛傳合矣。 易之。 然字訓 訓 明, 此特見上文「夜鄉 須 煇 有 訓 爲輝字立 本 光、《玉篇》 豊 可 一解, 臆 斷 又併 亦 晨」, 乎 同 断 ?

耳 達過析之。光煇、晣晣字訓 而 王介甫彊分之。 然亦不可過 未央、未艾,義本不 拘 彼謂作 甚 詩者立言當 相 本未嘗有 遠 也,而 異也 有 孔 仲 漸

何也? 音,叶 以「斤」得 煇」字以「軍」得 則 俱 聲,讀如芹,皆古音 叶 可 也,《集傳》一音一叶 聲,讀如 薰 也。 音 旂」字 則俱

乃 疏 坦 謂 末 叔非之,以 年 庭燎》詩或引姜氏脱簪事爲證, 怠政之 宣 王美詩, 爲此 事 詩乃鋭 非 多是三十 同 時 意求治之初 也。 年 此 前 誤 事,箴 矣。 脱 而 孔 規 簪 嚴

詩 稽 古 纑

此際。 後。 行其野 德盛時 箴 故 之篇 將 作 月》至《鴻 有未 於美乎?」 衰 巾 、美惡兼 況《庭燎》敘元謂 當 作,其 》,是王 央之問。 且安知不 又 在 雁》及《斯干》、《無羊》七篇,皆 謂 + 事多 有之時 德 年 因姜后 《大雅》六篇,《 詩人慮 衰 後 在 時 , 也。 初 王 美 作,多在三十 年。 德 其不 一言,復 丽 脱簪 漸 自《庭燎》盡 因 衰 能持 [箴,則 己諫, 勵 《小雅 容 久, 精圖 美 九 容 正 故 年 或 王 刺 治 寓 六 德 前 我 E 並

沔 水

官 諸 王 侯 廢 從 周 長 是 語 文 而 少,仲山 不 十 二 睦 不不 年, 甫 睦 諫 宣 則 m 王 朝

伐

魯,

立

孝

宗之

典

缺

矣。

弑

<u>√</u>

魯之亂,

宣

王

爲

之也,何

以

服諸

侯

不

聽,終

致

魯人

平 三十 ? 二年之後 宜 有 不 朝 乎? 者 矣。 沔 水》之詩 其 作 於

諸 氣 起居不寧也。案,「起」「行」與「 緝》以「起」「行」指念亂之人, 相 侯 應,箋、疏 妄 載飛 相 侵 載揚」、「 伐, 爲 長。 喻 載 起 正 載 也 行」,箋、 謂念 飛 吕 之甚 記 疏 皆 指 詞 而 嚴

雖 詩。 河 相 」當作「 僖二十三年。 似 晉公子賦《河水》,韋 不 應内、 沔」。 源謂 外 杜 傳 預 杜 兩 注《左傳 注得之。 書同 昭注 誤。 \approx 或 河、 以 語 沔 爲 \forall 字 是 以 形 逸 爲

鶴 鳴

四 陳》之《衡門》,體製 焉 ^ 鶴 而 鳴 不 皮 詩 Œ 純 意。 是 託 相似,非古注則 此 興, 與 《秦》之《 章 之中 其旨 兼 設 葭 喻者 茫

後 舉 乎? 當旁求 加 居談 意 相 玉, 有 無 而 而 他 爲 测則 在 而 論 木 知 發 本 可 錯」, 山 石 棄 其 戾。 又引 理之言,非 測 然以 不 之石」喻 其 口 文義各不 語 也。 遠 讎 朱 識 思 修 云「誠 意 既 攬 程子之言,證 矣。 者 程 子 斷章 省以 謂 詩 定 嚴《 解 耳 子之言 棄 揚 不 以 有 毛、 爲 異 不 則 相蒙。 成 而 以 緝 及 石 兩 因 專 口 或 英 可 私 影既 不 鄭 憎 喻 側 義 事 指 掩 沈 謂 德 怨 用 以 納 賢 哂 迥 非 而 遵 滯 君 明 夫古· 爲 而 安 别矣。 者 誨 知 此 如石之攻玉 古 自 取 之賢 其 子 蔽人之賢,如 誨 得 之 理 詩 其 注 〈義,則 立 程 譬之意 人 受小人 宣 無 語 正 善 ,又附程 个作詩, 新 , 見 以 E 詩 又程 定 也 解 石 解 用 面 在 E 也 前 次 喻 在 賢 者 横 皆 分 語 分 後 至 也 章 小人, 他 語 古 逆 首 取 詩 雖 復 乃 四 有 爲 説 Ш 於 以 之 之 平 僧 自 攻 章 爲 意 爲 四 必

> 義 正 相 反。 愛 其 詞 之 美, 而 志 其 義 之 乖

疏

矣。

其生長 使小人 石之可 身隱 遺 求賢之道 人皆樂 居 疏 而 稍 ~ 賢 述之, 列 異。 猶良 矣。 諸 而 鶴 名著, 以 他 並 觀 故 朝乎? 魚之在 鳴 語 不不 處 邦 爲 於 求 多 其 誨 沈 錯 其 之甚 與 忽於 冗 閒 滯 宣 焉 朝 温,不 鶴鳴之遠 複, 但 王 未 矣。 難 如 俱 側微,不 賢 舉 求賢,毛義 今約 也 彼 當 人 者 似 然賢 東 招 小 皆 不 之上 誠 聞 舉 致之, 魚之在渚 貪 閒 人不 置 其 有治 無 於遐 名 之高 檀 説 異 允 利, 爲 擇 矣。 或 而 也 速, 我 之才 位 地 下 此 性 可 一,而 用 而 蘀 但 則 好 賢 不 毛 也 猶 無 者 不 求 间

鄭

美 可 用 惡之喻 詩 他 以 山之文不 他 也 山 喻 異 如 爲 或 興 虚 非 意 一設 在 平 以 玉 玉 石 石 又《説 相 則 對 凡 文》 石 爲 皆 訓

因 玉 錯 下 特 **《説** 其 文》作 端 言 攻 耳。 爲 ,當不僅在此 玉 厲 一,故不 首章傳 石 則 ·更及 謂 錯 之爲 他 錯 義 可 用 琢 11 博 矣 若 蓋 治

取「爲錯」之意

桑,種 楊 以 茹 如 無定也。 之,詩人取興,偶 梅 柳, 爲惡木,殆因 《本草》亦用 有 草木疏》謂 可 雌雄 食, 又案,今亦名楮,亦名構,亦名 雄 不 上章之蘀而 以 結 者皮 因 穀皮可爲布、爲紙,葉 入藥,其 實。 時寄 班 雌 可 者 託,物之美惡,元 益 爲冠 連及之與? 皮 於人多矣 白, 一華成 結 實 V 長 如 穗 榖 要 傳 可

祈 父

未 定此詩之作在戰敗之前與後 祈 父》詩 毛 、鄭 皆 姜 戎 之 也 戰 嚴《 譜 緝

牙,專 衞 皆 出 在千 甚。 軍 斷 正 司 所惡。」若爲出 굸: 民 P 又見司右勇力之士,《 右、虎賁、旅賁所掌當之,良是。 十,作者 朝 師 者乃是虎賁 大 饔」,皆非 右 可 爲 《國 儀 稱。 畝敗 原, 未 也 敗 取 虎 祈父》詩「王之爪牙」,凡 於姜戎時所亡。」乃料民 敗 ,路門之右,言虎士 賁 司 語》言「宣 呼祈父 人不 吕《記》引董氏之言,取 績之後,因 Ш 時 氏 右所 - 敗後 甫 作 連 足 氏 軍 諫 掌 而 官 謂 所 用,乃令祈父 加 (語,此 ,俱 勇力之士,孔 責 詩 王 掌 料民,豈 喪 (之,所 既 中 虎 周 率 師 信矣。 「靡 喪 禮》不 土 屬 無 而 一,遂曲 不不 南 **得言** 於大原」,是 以 所 故 以 料 國之師 刺 止居 衞 言 而 言其官; 民 至 爲 出 無 守 料 宣 王 爲 疏 鄭箋 禁 一謂 夏 王 非 一,故 民、天 之解 故 衞 王 泥 官 宿 料 衞 宣 哉 其 韋昭 釋 屬 司 衞 民 料 以 王 有 則 而 説 + 守 之 路 謂 爪 從 料 者 以 誤 母 司 民 注

是其常 《揚之水》集傳之説,已有辯,見《王 非是。 指 衞 衞 備車右之選,非必人人皆右也,安得以趨 門之左,言大右 與徒步,俱非 爲恨哉? 中,豈必 之車右, 者,持選爲 爲 此 以釋《詩》「爪牙」之義,則 相 士專 六軍之士、《大全》又 勇力之士,選右當於 明 王則爲 步卒,故 也。 善謂 主 職,今見使從 取足於衛士哉? 則 衞 、右與趨走,皆其本分,從軍 此 總之,此輩 恨 王 六軍 甸 以 王,故 五 也。 所甘心。 賦 論《周 路 即 以 所 此 及屬車之右耳。 稱 司 衞 出 禮 語 軍 右。 職 王之爪 甲 王室,不出 録朱善語 疏語 則 其中,若車 殆不然。 在 士三人,右已 不言 設官之意 稍拘 且此勇力之士 衞王,不在 不爲 牙。 恐 其 非 矣。 車 屬 征討,蓋襲 以 所 ^ 詩旨。 右 風 申 集 右, 則甚善, 若六 疏 謂 ·則乘 互 《傳》泛 從 之, 在 使之 選 出 又 文 軍 又 走 以 謂 以 皆 其 軍 右 征 車

> 句,語 苦,所謂 之自主饔飧,尤是憂恤之最 我 有母在,當爲主饔以 也。」與上句文義未 意 靡 本 所 轉予于恤」也。 無 止 居 異,嚴《緝 靡 所 養之,汝乃不知,是 **>** 解「尸 有 底 母 止, 甚者。三章末 不得 饔 皆 奉養, 向云 自 道 使 其

不

聰

順

不從征役」之令矣,不聞以 中未有以見其幼也, 者,三十有室,不名孤矣。 仁,則尤可笑。 朱 人 矣。」不已鑿 言 善 而言,安得宣 母 泥 也。 酒食是議,婦人之事 嚴説, 嚴 乎? ^ 遂謂 絹》 幼 王爪牙之士,皆無父 面 況詩之作,不專 曰: 孤 無父 且古 子從征 ,故尸饔不言 爲 有「親 見《曲禮 言有 無父而免之也。 孤 謂 見祈父之不 母, 老無昆弟 》鄭注。 = + 主 則 也? 無 父 父 下 ᅦ

白駒

計 於 有 幽 直 始 哉 以致之。 接 Ŧ 諫 爾 不 迹於朝 能求, 之世 ,聽讒言, 後 鶴 嗣 鳴 繼 尹 《伊 海 雖 不 氏、 古 `君子見幾,當有拂衣而去者。 Ŧ ·能留, と 訓 聖 一
求
賢 虢 王之暗 **>** 主 日 石父及皇父等七子,小 (,≪白 王德之衰 樹 人, 亦 「敷求 駒 》刺 由宣王之棄賢 豈 有 哲 僅 王 漸 一人,俾 爲 不 用 賢。 拒 輔 世

設言 反。 遥」, 非 來 後 知 又言 其來則 而 台 儒 欲 其 「駒》詩是賢 留 讀 今此 所 之也。 當 爲 滴 如 思思 賢 如 此 字 人於何遊 之甚 也。 「縶之維之,以永今朝」, 人既去、願望其來之詞 語 直 也。 所謂 而 息 義 焉 伊人,於焉 乎? 訓 短 矣。 何, 箋云 於 ^ 然 釋 消 净

朱子隔. 韻之法,先自亂之。 四 五 但 反,與駒字協,尤不可 句 、六句,何反 思 協之, 《白駒 字複 句協韻,已屬 見 第三 何必 耳。 舍之而 次句 章 然《 多 兩 詩》 先 解。 協 事 句 協 首 恆 又讀「來」 ? 首 旬 有 韻 ? 句 次 之, 天 韻 旬 是 無 然 自 」爲云俱 韻 隔 有三、 礙 相 應 句 也 協 協 協

也。 奔, 矣。 徐音破之乎? 之,故望 文》云: 歷 ,自光遠而 訓 《白駒》賢人,徒爲 元朗 賢人君子,人閒 爲 其 來之疾, 言毛、鄭, 「賁、徐音奔。」此又王氏 來思 有耀 也。 然隋曹憲注《 云 全用《易》 ^ 如 本之於王 之景 集 玉之輝 傳》載 風風 星、 (廣雅 爲 之賁,詩 慶 或説 山 氏 雲, 珠 案,《 之 豈 之 身 謂 音 所 潤 欲 所 賁 惜 飾 本 爲 以 遊

百 義,亦當音奔,則徐 解 也 疾來義 雖 可 邈 通,不 此音,未 如賁飾 必 不 優矣。 與 毛 鄭

期。」恐 肯來, 勞國 不來, 爵人邪? 是解,華谷蓋有所本矣。《集傳》曰: 也。」亦得之。 平正。《詩緝》云: 爾豈侯耶? 詩記》以 爾」字不能 事 言惟 則 爾公爾侯,逸豫 礙 無有逸豫之期。 以 於義。 此二句爲責在位之人,則一章四 果能之,何不留賢者使 公侯 阚 畫 《楊用修集》言宋人經義 何爲逸豫無反期 爲公, 一,文義亦未安。 得 作詩者 以 以爾 「爾若爲公侯,則 逸 無期」,傳、疏謂 何 豫 爲侯, 蓋羨其退 耳, 人,乃能 爾豈 也。 加 勿 逸 居 以 此 去 公 「若 也? 公侯 豫 已作 之樂 將 解 耶 責 其 無 勤 其

今其人固不可見,寧獨無音問之可傳乎?猶設生芻以待之,誠愛其人之德美如玉也。末章言白駒一人空谷,不復返矣,然我

近之矣,但語焉而未詳,故更爲述之。也。箋、疏解「生芻」二句,頗迂拙,《集傳》萬勿吝惜於此,而有遠我之心也。望之至

黄鳥 我行其野

何不還 不至如 注自通,不必易也。 娶,此二詩之婦人,當是自異邦來嫁者。 身在他邦語耳。 釋之,因篇中「此邦之人」、「復我邦家」,是 王失教而然,所以 《黄鳥》。 樂郊 此二詩,皆棄 可適,西京之世,反不若乎? 踵 幽、厲之甚、《鴻 王氏《我行其野》。之説,俱以民適異國 · 而 流 離 然古者士、庶人得 失 爲 婦之詞也。 宣王末年雖多秕政,當 所 刺 也。 乃爾? 雁》矜人甫獲安堵, 朱《傳》祖 室家相棄,由 魏之民猶有 越 范氏 或 古 而

黄 鳥

聞之,何得 耳,不知此 雀,此妄説 孫 奕《示 心也。 鳥 謂 無 兒編 至冬始蟄,秋日鶯聲 彼謂 ? 況季夏、初秋,粱黍自 **>** 以 七、八月閒不 此 詩 黄 鳥 爲 應有倉 Щ 今之 間 嘗 庚 黄 可

成熟,今北方皆然。

《月令》嘗黍在仲夏,嘗

以爲蟬 《左傳》言三良殉 爵。 穀在孟秋矣。 疏又以《秦風・黄鳥》亦是黄雀,尤誤。 大水爲蛤」,指斯 鳴,黍以仲夏孰。 晉語》「雀人于海 穀,鄭注以爲黍、稷,其仲夏所嘗,蔡氏 葬,在文六年之夏,詩 禽也,並無以黄鳥名之者。 黄雀,古通名,雀字亦 爲蛤」、《月令》「爵人 人覩 案, 作

也。「莫我肯穀」,穀字從禾,百穀之總名《黄鳥》「無集于穀」,穀字從木,木名

徒雷反。

疏云:

「《釋草》無文。」案、《爾雅

言采其蓫」,箋云:

「蓫,牛蘈。」《釋文》

物起興,此時安得有黄雀

乎?

猶甘草名大苦,謬矣。 也。 也 則穀善之穀,本借百穀之穀,不借穀木之穀 又 穀、穀各一字、《埤雅》乃謂惡木名穀 善 也 皆 以 設 得 聲。 殼, 苦 角 反。

我行其野

《記》云: 曰: 之不如。」何等明 必依惡木? 姻之故 傳 而始思之? 義 是 樗、蓬、 我行 而就 也。《集 惡木 野中,依惡木以自蔽 菌,傳以 爾居。」夫野 文義 本爲昏姻 順 尚 傳》 口 如 澤爲 爲 花, 此,誠令人難 嚴《緝 而 託 中豊 往託 而 興、箋 賦 爾 》亦同此 體, 無 何 不 以 嘉 我 ,於是思 而 云因惡 爲記 樹 畜 演 曉。 何 則 其 時 爲 義 樗 吕 木 香

引此 又《詩》釋文: 是别草,宜孔氏 與陸《疏》之牛蘈不符,則《詩》、《雅》所言定 有 顏」,即益母草之紫華者,詳 一合箋文。 「蓫,他六反。」字音亦不同 詩 殇, 音湯。 及箋語 然 兩 證《爾雅》之牛 馬 「蓫,敕六反。」《 以 處 尾」,又有 爲《釋: 郭注所説 見《王風》。 草》無 「藬, 莖葉名狀,俱 蘈, 謬 文也。 吐 阚 同 回 雅 甚矣。 反。 經 邢 字, 牛 昺 釋

尺,赤黄色。」

之稱。 與? 굸: 鬼目,然郭注所言莖葉及子皆與《本草》羊蹄異,非 牛舌菜,一名鬼目,洪邁《續筆》以 本經下品,一名東方宿,一名連蟲陸,一名 云: 名蓄,一名秃菜,子名金喬麥,獨 遂、《釋文》云: 「今人謂之羊蹄。」案,羊蹄《本草》人 「今人呼 又李氏《綱目》云: 惟鄭箋及陸《疏》謂之牛蘈 秃菜,即蓄音之譌。」 「本又作蓄。」陸《 「羊蹄以根名,牛 爲即 **爾** 理 陶 無 雅 或 隱 4 》之符 疏 草。 然 蘈 居

> 之形。 狀云: 爲《爾雅》之菲 至即枯,秋深復生。 舌以葉形名, 人夏起臺,開 近水濕 秃菜以治秃 及費 地 極多,葉長尺餘,似牛舌 (者,誤 華結子,華葉一色。 莖葉陵冬不死,根長 瘡名 矣。」李又 也。 説 鄭 樵 其 近 夏 名 指

也。 營切。 注云: 《七啟》云: 美。 本不佳,得霜而 **堇字異而音義同,見《廣雅》,亦見《唐韻** 注引《詩》「采蓫」而云: 不死,正霜蓄之義矣。 曹子建著之於《七啟 此詩「采葍」,箋以 **遂雖惡菜,然陸元恪言其可爲茹** 茅也。 爾 雅》有二萬,葉 「蓄菜與葵宜於霜露之時。」意蓄味 葉大而華白 「芳菰 始美與? 精稗,霜蓄露葵。」李善 又案,蓄當作茧,蓫、 爲 細 「篴與蓄同。」張銑 復香者菖, 當音富 营,陸《疏》亦 而 《本草》言其陵冬 華赤 亦 以 者當 爲 佳 滑 一,蔓渠 同 而

臭氣 然陸 以 系。」 則 又云: 「「「「「「」」 當之葉 「其草有 復 兩 有 種 細大之分矣。 三、葉細 而 莖赤 傳 有

説,以 也。 祇以 朱子 論 仍 語 ,用毛、 意甚美,然太巧矣。 新之異於故耳,責人而 川《論 影引 爲雖實,不以彼之富 成不以 之作 鄭 語 義 富,亦祇以異」、《論語》引 》誠義,亦屬疏忽。 「誠」 解之。 耳。 及釋《詩》 又《詩》本作「成」, 《集 m 不失忠厚之意 傳 厭己之貧,亦 》釋《詩》成 則更立 此 新

斯干

十五 疏 新 学,非 宮」之名見《儀禮》、《燕禮 斯干》之爲宣 小敘一家之説 鄭、杜兩注及《詩》之箋、疏見 Ŧ 也, 詩,見 而 朱子 劉子政《 \sim 左 紁 傳 以 《由儀》敘 》,昭二 爲 昌 疑 陵

> 下。 即《 所闕則實之,意在立 斯干》詩。 皆以 爲 逸篇, 於 先 面 儒 朱子引李氏 異 所 而 信則 己。 疑 之説, 之,於 先 以 儒 爲

文矣。 重者? 猶《無 成則釁 營宫室,宗廟 義甚 鄭氏 成,謂之考牧云爾 考字多訓成, 記》考義自 有成,是爲考牧。」然則考室、考牧,與《 故《無羊》疏云: 以鄭氏 兼寢 廣 羊》云『考牧』,非獨 斯干》「考室」,孫、王述毛,止言宫室, 八爲非。 又劉向《昌陵疏》亦寢、廟 ,寢成則考,敘言考室,不 後 國富民安,居室安樂,皆是考義 以廟言。 别 儒執《雜記》之義,卻 並 爲先。」詩人美 官 然孔疏已有辯矣,言「考之取 廟 非 後 「牛羊復先王之數,牧 既 燕飲落成之説 儒 [《]曲 成,謂之考室,牧 執《 禮》曰: 據 雜記》之文,謂 入 宣 王 燕 違 得兼 贵 並 食而 也。 言 曲 君 反 「禮》之 廟, 子 己, 略 事 經 有 雜 事 其 將 典 廟

所 以 也 語 説 來思」、「爾牛來 牧字從女普木切,小擊也。 君 羊》之考牧 成者,成室 通 名牢 以 臣 訓 相 見 羣 符 用 考牧 也 牢之成,是於 聚 則 爲 於 守養 經 ,是作牧養之牢 愐 嚴《 卷 一牧字爲 傳 飲 牢 緝 無 思」爲來歸於牢,謂 義 酒 中 其文也。 》泥 於 而 而 經 牧養之牢, 其 牧 考 飲 外 中 從牛,會意,養牛人 義 地 酒 彊 也 亦可 而 爲 又解 耶 生 落成 落 ? 名牧。 嚴 枝 成 首章 尤屬 節 又 將 之。 兩言 因 矣。 引 謂 爾爾 謬説 謂 若借 陳 宣 夫 來, 作 羊 氏 \pm 落 無

毛云: 斯干》首章, 一干,測 也。」 喻 E 傳、 德 箋皆以 流 行 南 爲 Ш 興 喻 體 或 澗 用 富 水

四、五 優。 言。 廟、 好, 其美,非立言之次第。 發 政,使國富民安,然後及營繕之事,故詩 足,竹苞、松茂 此 修宫 亦指民 興 宣王 源 章 謂 ,爲全篇引端耳。 始極言之,首 寢 承 以 間骨 也。 亂 詞 則 喻 何 肉 今則釋 今説 人 得 相 民 遽 親 遽 衆 爲 愛言 興 爲 以 多 近 況 土 賦 竹 而 棟宇堂室之盛 功,必先 以 如 體 苞、 佼 義 此 好 松茂 徑 則 故 指 古 兄 布 能 形容 宫 德 注 弟 文 宗 室 修 爲 相

鄭 榆 皆以 矣。 之義 毛訓 後」、「 亦 雖 以 俞 猶、瘉古 改 ,與好反,一 猶 無 得聲, 字, 俞 口」字協 爲道,言 相 得聲, 非 猶 無 圃 矣」,鄭 音 諸 因 圃 可 本 勸 無 字 見。 也 夷 相 同 ,俱 由 責 改 戒, 觀 反, 託 又 猶 集 以 定 正 瘉 相對 侯 傳 道 爲 益信 反。 與 也 瘉 月》詩 訓 媮 取 瘉 義,較 渝、 義 猶 偷、鍮、 瘉 勝 猶 爲 「瘉」 羭、 乃 同 於 明 詬 揄、 謂 愉 與 書 病

歸

牢

」, 則

下

章

兩

言「爾

牧來思」矣,牧人

亦

牢

官

王

耳,豈區

品

頌

一牢

乎?

況「來思」果

爲

詩之意

,在牧

人

稱

職,牛

羊

蕃息

以以

歸

美

於

居耶

下

文

即

繼

以

何蓑

何笠」、「

以

薪

以

蒸

豈

亦牢中

耶

等字協 蹇、鼎、 與 取 相 均 「思」、「之」協、《四月》詩「莫 義 而 「梅」協,梅音迷 圖 鄭 與 謀 一音猶。 爲當矣。 旅六小 好反,音與 ,載音 稍 迂。 象皆有尤字,與 載 也 **鞑馳**》詩 與 力尤 也。 猶 毛 並 等。 無 《易》賁、 同 不 耳。 我 同 或 入知其 有 猶韻, 説 疑、喜、之、載 但古尤字 尤」、「尤」與 改作 剥、大畜 (尤)「尤」 則破 光, 字 音 亦

指 旨。 取 續」亦可指寢 嘗有此 以下是成寢,「攸芋」章則總言之,而 《楚薺》 廟也 = 「廟 箋謂 斯干》寢、 》詩 乎 云「笑 ? 拾級登階, 攸寧」復言 一似 四、五 也。《鳧鷺》詩 營建宫室 續 語 妣 廟 章 交 並 祖 經經 獲 孰非 寢 營,康成之説長矣。 文 是 也 乃繼 分 立 躋 則 四己 廟 平 云「來 然 居 述 兩 ? 細 處 之事 築室百 意 玩 笑 燕 不 詩 恐 則 必 來 「攸 語 語 非 處」, 爲 亦 「似 何 躋 堵 祭 口 詩 但

> 已,釋[西 傳義之平正矣。 之四户,則獨有 夫一房之室户 也,安得一一分配 祀 也。 薦馨受福 南 其户」爲 則 其 哉? 較偏於西,比於宗廟路 獨 南,尤爲穿鑿之見,不 天 非 子燕寢之户,比 寜 至破「似」爲 乎? 不 定 巳午 是 於 燕 如 大 寢 之 息

從之。 禮有以 如」之翼,取 云 企足竦臂 如跂 「如人之企竦翼爾。」孔 企足 翼 人斯翼 爲 《然。」 喻 敬 本 者 嚴《緝》云 極 乎? 翼 明 指 徑。 迂矣。 人 翼 歐 之 疏 如《論 陽 兩 云: 訓 然朱、吕皆 臂 翼 語 也 一如 爲 》「翼 敬 毛

之角 棘作 之隅,即 異 而 L·朸,旅 爲棘, 義 如 同。 矢 毛 斯 即反,云「 蓋 之 毛云: 棘, 古 棱 [有此 廉 如 鳥 隅也」。 名。」 孔 棘 斯 申 革」,毛、 一是矣。 棱 毛 廉 見《釋 云 也 文》。 韓 毛又云: 指 兩 韓 矢鏃 韓 詩

以 鄭訓 變也。」夫以急爲如矢行急而直 爲毛希革露,謂此 毛之翼 云「翅也」。 革 變爲鳥驚變而竦顧,其迂不更甚乎? -,翼 棘 歐 爲戟 陽 ,兩家之訓 也。」《韓詩》革作鞠、《說文》云古翮 又以 見《釋文》。《説文》注同。 ,謂如人之挾弓矢戟 臆 爲 相 時必張 解 同, 日 可 其羽翼,固 見其 「棘,急也。 一,猶 其財 義 韓之翅 可 有 通 本 已迁 訓革 革, 也。 也 切。 即

干》以 體 以爲華采而軒翔,庶得之。 定指翬之五色而言。 顯。]又云: 云: 「此章四『如』,皆謂廉隅之正 比宫室 言其勢。」恐鄭 雉,五 古 翬,鳥之奇異者。」顯與奇異, 色成 取其 章 意不盡於此。 一飛則 疏申之云: 勢,亦取 尤 以其文 爲 絢 ,形貌之 《集傳 爛、《 也。 翼言其 箋 斯

冥爲 幼 噲 噲 鄭 其 以 IE. 正 爲 噦噦其冥」,毛 書,冥爲夜。 以 詩 IE 備 爲 述室 長,

《爾雅》「正,長」與「孟 《釋詁》文,「冥,幼」本《釋言》文。 Œ 長言其堂廡之彌亙 爲長短之長,字形偶同,不妨音義各别也 不皆本《爾雅》。 斷不得讀爲平聲。 欲讀長爲上聲者,特泥於《爾雅》之文耳 長」不協,故 闇之義。 孔疏以深闇之義雖安,而 如字,本或作窈。崔音杳。」案,「正,長」本 文》云: 各異,正當擇善 意,允矣。 之寬明,無暇及人之長幼,疏 冥,幼」俱用崔音爲毛義, 冥,幼」或作「冥,窈」,孫炎、某氏皆訓爲深 相當 矣。 「長,王丁丈反,崔直良反。 但 據 |傳語 王注 而 《雅》自爲 從,不 簡質, ,窈言其窒奥之邃深,意 然毛傳 述毛。 ,伯」、「耆,艾」並 必舍毛從鄭。 而王、崔二家 亦可 字訓 長幼之長 源 謂 通也。 中鄭易 自有 正 《釋 與「正 一、長」、 幼,王 師 傳 孔必 述 傳 列 言 之 釋 毛

毛詩稽古編

席。」 莞 特 席 今江 意 爲 之説長 此 郭注 用 注 離 之莞蒲 曰 釋文》 完 見《 矣。 不 有 形 : 之 云 一莞蒲 完完 乃 「東謂之苻蘺, 爲 鄭云「小 釋文》叢 似 爾 濮 矣。 荷 浦 :。」郭氏 謂 莞。 席。」是二 小 本 雅 離 語 而《 莞 亦 蒲 草 É >/ 據《 之 「苻 鼠 證之,言莞與蒲 有 草 * 集 蒲之席 而 蒲 つ謂 一莞是莞 牛 叢 會 日 屬 傳 之名,元 釋文》,此莞乃 離, 形 苻 莞 : W 非 生 西 莞 離 亦 景 水 方亦名蒲 纖 其 别 意 白 訓 語 即 類,不得 庫。 中, 西 細 孔 草 F. 與 莞 蒲 與 耳 燈 方 引 似 矣。 鄭 莖 藁 方 不 心 爲 蒲 人 龍 寐 異 景 名 草 草 浦 爾 呼 知《 切。 專 鼠 ^ 須 音 草 席 雅 苻 浦 中 而 斯 完 江 誤 莞,箋、 據 翮。 《釋文 学符 莖 爲 離 鼠 有大小 干 可 、箋、疏 名 南 故 其 善 完 一爲 莞 · | |上 以 某 鄭 以 楚 會 離 萬 蒲 苻 彼 鄭 疏 爲 及 謂 氏 以 爲 郭

> 注合。 注云: 萜。 鼠 珍《綱 也。 人《本 本 言 莞。 名 是 鄭樵 龍 鼠 目》以 草》, 廣 莞, 又《 又案 須 韻》曰: 謂 龍 郭 Щ 非 亦 完 爲《 鼠莞 須 海 苻 注 言 也。 有 中 别 離 不 其 是 、録》有 應言 胡官、古完二反, 經 也 似 似 可 龍 》「賈 0 繭 莞 織 芻 燈 而 而 龍 席 但 似 心 超之 員 常草 細。 及 龍 草 龍 蓑 須 8%神 Ш 皆 宋 似 伙 與 多 矣。 開 龍 字 龍 非 寶 農 爾 須 亦 修 李 鼠 始 雅 經 作 即 肼 莞 載

獨 與? 當先 子 肅 下 裳, 一之義。 冕 申 不 毛云 裳, 服 知 服 然古 載 也。 爲 之 衣之裳」,毛 以 鄭 盛 臣 人 便 「之子 以爲 子。 天 衣 也 趨事耳。 0 必 下 畫 無裳 斯 以 與 無 H 以 義 裳 裳 生 衣, 爲 」,則 勝 俱 爲 m 有 下之飾 矣。 盛 取 裳, 貴 낈 雖 當 者 爲 燕 豈 ^ 何 主 欲 集 憂 私 遽 目 外 取 傳 矣, 爲 亦 爲 絺 事 習 **>** 然,不 君 惟 服 繡 日 爲 之 童 王 鬼

盛乎?

聲取其同 音攷》以爲音啻,誤 翅同音。 説文》亦作 裼 傳 又案,햼 韻耳,非讀 云、緥 襜 裼、裙 《廣 也」、《韓 也。 如啻也。 雅》作稿,注天帝切。 皆他 《説文》從衣 詩 計 》作べて見《釋文》。 啻,施 切,音替。 智切 啻聲,諧 《古 與

無羊

有。 暑 雨 以 言,與笠二物 (疏》 臺,所 亦 禦暑。」蓋 B 用之。)謂 孔 無 以 疏 則 臺 羊》 禦雨 亦 兼 皮 故《良耜 傳 蓑專 言 言 堅 也。 云 臺 一之矣。 細 爲 笠,所以 滑 笠 康 雨 緻 是 設, 成 蓑 〉傅云: 又《都 謂 可 笠主 所以 物 禦暑。」是臺指 爲 以 臺 詧 人 皆 於禦暑 禦 「笠,所 笠 皮爲笠、陸 土 與 雨 毛 南 傳 異 笠, 以禦 云 而 恐 名 蓑 遇 所

韻》云 箬葉。 襫』,韋 惟 但爲 笠爲 又案,蓑字《玉 衰,從衣象形。 後 萌,不用臺,明矣。 名,而笠字從竹,不從草,則 襫以莎草爲之。 知。」又云: 萌,竹萌之皮所 굸: 未 等衰」字用,而蓑笠 傳義 人因别 必 然。 衣,不爲笠。」案,羅説 臺 物 其臺爲衣,編之若甲氌氌下 昭 精 注 確, 但 作籉字 也 羅 蓑,草名。 口 云: 願 一襏 不可 篇》 爲衣,不可 ^ 又作 齊語》『首 阚 襫,蓑 以 今人作笠,亦 ,而訓 易。 有 了茅 自鄭氏 雅 爲 復加 素 爲,古文也。 可 翼》辯之當矣。 笠。」則笠不用 蒲, 簦笠 爲笠,誤 薜 和 又案,蓑、 爲 音避。 草作養,非古也 爲笠,不應合臺 合臺、笠爲 雨 戴 素 古人爲 良 衣 茅 П 是。 多編 也。 蒲 以 衣 素 切。 説 生誤 也, 垂, 笠 臺 後借 身 茅 筍 回 文》作 一,用竹 是 臺 衣 其 音 則 皮 則 或 ^ 物, 也 廣 爲 與 草 及 作 略 洂 襏 口 襏

因 衰 ·,俗有從竹者 以莎草爲之,故後 近 草 -可爲 衣 誤。 則 莎 人轉讀 也, 贵 蓑 如 谷字元 莎 乎? 讀 如 蓑從 衰

「三十維物」,傳云:

異

毛色者

三十

物。 耳 多魚 疏 傳 鄭 則爲豐 異者各三十也。」五色各三十,合之則百五十 物耳,而其數已及九十,牧事之盛可知 也。」疏申之云: 魚 ,於年何與 謂 둜 解 麗 上文黄牛、黑脣之犉,特黄色三十中之一 爲 衆爲人衆,云「人衆 由 「陰陽和 人也。 衆維魚矣」,衆謂衆多,言魚之多也 〉詩美 年。」此 豐年之夢,義 魚 多 萬物 故 則魚衆多」,並不以爲人衆也。 (乎? 人不 尤尤不 捕者衆,彊 「謂青、赤、黄、白、黑,毛色别 盛多,獨 如魚之多,夢人乃是 可 又「人乃是魚」 E 解。 相 相 舉 符。 與捕 通 人如 魚 兩家之説耳。 爲 ^ 魚」,迂矣! 集 魚,特 言,此亦 傳》 語 人滿 E 魚 以

之説

出焉。

羊》之旐、旟、二物也, 《吉日》之伯、禱,一 劉 朱子必欲齊 旟」猶言「旐與旟」,兩「維」字不 文便耳。 言旐旟,語意 云「旐、旟所以 子 此當爲洪水之祥,何反爲豐年之兆 云 旐、旟各是一物,箋云「夢 二微 「衆維 禹, 以一律,故人少魚 異 聚衆」是也。 吾其 而 魚 句法同,古人不妨 事 猶 魚 也, 云「衆 而 **| 子 | 云** 止一言「維」,各 而 上專言魚,下並 兩言「既」、《無 哉 爾 **※多、旐** 旐 必過 魚」,「旐 見 與旟」, 昭 少旗 有 元 泥 年《左 也 多 維 從 傳

禮 所 案、周禮·春官 司 旟 一大司 頒 馬》二職之文, ,州里所 ^ 旗 無羊》朱《傳 物 馬 各 所頒,仲 建。」此 異,蓋 • 而 錯 **》**云 秋 司 司 各取 舉《 常》、《夏官• 治兵之禮 常 所 周 其 領,仲 が施 官 , . 郊 不 司 彼注 冬大閲之 大司 知 常 野 何 所 云 《大 建。 意

野

則

注 建旗 之,《 次鄙 又次間,又次比,皆建旐。 注 物之互 空。 以爲 是冬之空 云「族 謂 謂 以以 不 辨 大司 也 司 大関 ,又次酇 如 鄉之下次州 治 公邑大夫。 建 尊 旗 郊, 州 出 常》云: 異, 兵 海, 鄭 卑之常則 物, 此賈公彦《周 里、縣 馬 當 軍之時,空辟實 是 是 謂 其故 避 冬簡 建旗」爲 出 教戰,非 皆 鄉 秋 軍 鄙 遂 建 如 州 實 法, 又次黨,又次族,皆建旗 載 如 軍 之州 禮 異,餘同。 旐 此 鄉 郊 冬。 實。 旐 》疏之説也。 出 里 故 實 遂之官 野 者 軍 又次里,又次 今以 寄 出 建 長、 也。一 載 大 以 之法也 遂之下次縣,又 出 軍 旟 以 賈、孔皆申鄭互 閲 旐 出 縣 其 旐 軍 之法,故 賈 孔氏《干 備 軍 縣 互 百 IE 將 之 疏 軍 旗 之 鄙 約 官 羨 以 旗 申 禮 二職 旗 言之。 二者言 載 建 下 旄 鄰 於彼 卒 其 開之 施。 旗。」 則 》詩 而 皆 約 也 也 旗 如 旌 之 疏 未 數 乃 則 少 鄙 觀 相 下 疏 與

疏

旗

秋

言,則五職建 羨卒乎? 官之屬,豈能 引《周禮》, 少之故,非 時之卿、大夫屬各六十,有選當行者。 百官,卿大夫也。 建旗之 一, 而 反之,何其不 略相等也。 倫,豈得 之,是《司 謂 不爲軍吏者將之,公邑亦然。 旗統 焉 鄉 野 遂之正卒屬軍 人多。」其 與 州 是 若就朱子所錯舉之文而較論之, 源 各 誤矣。 白 里,止 旐 馬》之郊,已兼《司常》之州 多於六 旐,五職 官官 所 取 以《大 統 稽 能 其 又在其 人甚 於典 説 當 載旟者,以 《集傳》又云: 知 建 鄉、六遂及四等公邑之 司 本於張子厚 , 也。 建 吏,其羨卒 多 乎 以 旐 馬 外。 旗 相 之郊之半,而野 以《司 》所 俪 所 配乎? 旟 其 頒 統 至 職文義 屬 常》所 然 而 鄉遂之民 少 其 使 衞 言, 朱子之 也 旐 統 天 州 王 則六 頒 統 本 合此 人 里 地 也 長 多 不 以 而 四

毛詩稽古編卷十三

吴江陳處士啟源著

J N N

節南山

節

南

Ш

一之什變小雅

明 其 思 此 求車之家父,與之同 《左傳》 八説 東 詩 目 遷 之作 核 求 ,謂隱三年「尹氏卒」,即此 後 矣。 本作 車之家父,非作 \ 《雅 》 非 朱子 幽 君 王 Ě 氏 一時,意 猶 降 卒」, 爲《 疑其人之同異,祇 . 時 主 誦之家父,正 《風》哉 此 君 於 尤 氏 (較小 可 ? 隱公母 笑。 詩之師 敘耳, 劉 隱 瑾 義 一聲子 附 獨 欲 辯 尹 年 之 證 和 不

朝, 作耶? 尹氏, 卒。 也 汹 注本 耶 以 焉 之言,得於 左氏 也 訩、大戾等語,皆亂 文,謂平王 武氏子來求 常武》詩云「王 一,後 訟、 ? 爲 肯 距 夫隱 以喪 親見國史,所書又魯事,必 據哉? 奔喪? 其 儒 乖 何弗之思也 而凡 隱三年二百二載矣,亦 二字 ^ ·戾爲 自 春秋 亂 公如 言尹 一崩 誤 傳 爲 氏 隱 況 膊」耳。 民俗之不善,未嘗謂 聞 解 二傳之不足信 **>** 者 疾疫,卒斬 周 7,舛謬 如 氏 耳 昭 謂 公 · ,不見《春 1 瑾 反 尹 必 奔 公公》、 亡以 意,必謂 十三年 氏 是一人,然後可 喪,尹 瑾 膊 執 最多,其 」、《常武》亦 又謂 禮 後 此 爲諸 穀 尚 之詞 以 氏 秋 書 明明 喪亂 西周 缺 疑 爲主 侯 》經, 可 釋《春 尹 無 殊 傳 矣, 自 經 致其來求 合爲一人 、卒斬 氏 誤誤。 時 王室亂 之文 乎? 放故 相 不 立 豈 經 東 不得 。二傳 也, 秋》 殘 遷 知古 王 旧 可 書 耳。 且 亡 後 則 有 執 其 此

言 既 卬 毒 古 戎狄侵陵、諸侯 石》以下三詩敘可 》、《召旻》二詩 不僅政 降災荒 訖 人 幽 乎? 我殷 稍 E 見亡徵, 九 殷邦」,此 命」,微 亂 年, 而 已,饑 背 王 即 子 所云,及《小雅 叛、蓋 室 見,必以爲東遷後作,不 時 極 Ė 始 口 饉 紂 殷遂喪」,箕子曰 一言之, 騒 未亡也。 亦多有。 、寇盜、癘疫、流 與 如 ^ 祖 大 觀《 又況 乙曰 雅 漸 周 幽 一天 一天 語》 膽 之 王

儒 背。 门, 音載。」凡三音。 山 出 陬 專 當之,誤 口 隅 」字之譌 讀 釋文》云: 高 又 節 爲截音、《詩詁 Ш 譌 南 矣。 之几 作 山 , 岊, 子結 》, 節 漢 也。 其如 耳。 池 節,在切反。 世 切。 陽 與 趙 字,乃岊之音也。 遂 縣 毛 説 此 凡 爲 以 傳 文》 有 夫 今涇 池 高 理 陽 以 出 峻 也 又如字,又 陽 巌 義 字 節」 縣 嶭五葛反。 岊 注 元 在 字 不 省 云 後 作 爲 西 相

> 截 説,而録之於《韻會》, 安得 府 安府 引 古 」。 斷 此 部 西 北 遠 北 京 詩,朱子章 也 指 五 在 五 一十里,而 + 今 與高 池 陽 里。 咸 北 陽 大 詩 句 之嶻 縣 何 **截**嶭 言 訓 西 關? 南 何弗考也。 嶭 爲 南 Ш Ш 耶 又在 截 咸 況 ? 然 明 陽 節 縣北 是 高 黄公紹信其 縣 音 鄗京之南 在 又《禮記 截, 七十里 今西安 亦 非 誤。 訓

注云: 譜 古本《説文》元作 廉 《詩》作「憂心炎炎」,不作「如炎」。 作炎,才廉切。」孔 注引《詩》「憂 》之譌 詩。 切。」二字音義各異、「憂心炎炎」,似别是 憂 但孔、 「惔,憂也,徒甘 心 如 陸二家所引同,不應 恢」、《釋文》云: 心 如 如如 疏亦云。 恢 炎」, • 與今《詩》正 切。 而「炎炎」乃《 今案、《説文》引 炎,小熱也, 恢,《 俱 其恢 同 以誤,豈 説 字 韻 又

截

也。

旁。 既 草木平滿其旁猗之畝谷 草木之長 實字,毛、 所引非其 之義,杜注 爲 瑾 木, 説 與 以 可言草 (蘇 草木爲 尊 又以「我 以以 ,以用衆士之智能 「實」字、「猗」字之證,殊 落其 猗 毛謂 説 顧 爲 爲 有 俱 木之枝葉,不 皆不 會 亦 長 實 未 茂 證 南 鄭 亦云吹落山木之實。 Ш (落其 而 其 當 茂, 矣,宜 明順,吾寧從古。 Ш 皆 之實,則 取其 猗 興 甚 以 高 訓 吕《記》、嚴《緝 大 通。 實」、《淇 政 |峻、而 滿 師 朱 、材」,實對材言,定是果 朱《傳》先 教 或説 尊 子 文義 養 可言草 鄭 盛 有滿之使平均者 以 育民 猗 ,使之齊均,興尹 〈澳》詩 謂 出 **前** 爲 字,毛 又未 非泛指 不知 不 蘇 述 山 庶 木之實。 有 》皆 氏,以 既 其 傳 安。 ,使之齊 緑 益 為訓 訓 箋,後 高 诵 一之使 從之。 草木, 長, 峻,又 竹 也 ^ 實爲 (左傳 猗 爲 若竟 鄭 平 載 猗 均。 長 Æ 有 均 因 訓 图 雷 图 草 或

> 其 意 改 後 爲 也 訓 爲 儒 至 一、箋又 愍 爲 據 節 愍 恤 成 南 七年、 之義,然 恤者,杜注之説 轉 Ш 『》詩 全 襄十七年《左 爲 兩 善 玩左氏 言「不 言「不 兩 弔 耳,未必 傳,善 昊 傳 善乎昊天 天」, 影引 義 此《 邱 傳 自 明 詩 也 訓 通 本 弔

問 刺 正 下 自 王 察 王 相 章「不自爲政」,王 爲 ,得之。 哉 應。 委任 政也。 弗 躬 一尹氏 蘇 教 弗 氏 自 \pm 親 ,方嫉尹之擅權,反教以躬 謂 爲 躬 尹氏 政, 親 弗 肅 機 則 付 問 以 務 尹 政 爲 弗 氏 問 姻 政 仕, 不 察 婭 不 民 得 由 古 誤 專 王 注 出 恣 欲 目 親 其 继

本 小 相 爾 則 通 勿 雅 民 也 刎、 將 罔 末 君 末二字同 略 子, 欺 罔 箋 其 破 訓 上,比 勿 爲 爲 無 末, 傳 是 義 言 勿與 爲 不 徑 末 問 捷 察

《説 同。 文》云: 釋 昊天不 文》 云「敕 傭」, 「傭, 均直 傭 龍 訓 反」,《 均, 也。 毛 詩》、《雅 余封 傳 與 切。」 \wedge 爾 案, 同 雅

鉉以庸音施於均直,恐非是,宜以《釋文》庸,賃也。」然則借爲賃義,故轉音庸耳。徐《玉篇》:「傭,恥恭切。均也,直也。又音

詾,云: 爾 《集傳》訓 雅》云: 「説也。 爲 省作訩。」毛傳 「酗,訟 亂,不 ·知何 也。」《説文》訩 本。 訓 訟 與《 爾 作

爲

IE

《説文》: 雅》同。 息之時乎? 生白」、《釋文》引司 終,皆不離息義。 蓋指室之牖,殆反借閉門義。 俾民心闋」,傳云: 「闋,事已閉門也。」事 更借之爲止 莊子 馬 彪 》「瞻彼闋 云 ,爲盡,爲 闋, 翼 Ě 息 者, 也。」 終,爲 閉 空也。」 門,其 虚 案, 室 曲

正月

也。 人云: 所不知。」殆是臆説 病。」孫炎云: 説文》,要之與痒俱諧聲,非取 宋劉彝日 傳云: 「癙 癵、 癙、痒,病 癙 力專 「鼠 者,畏之病。」 切。 病 而 也。」《爾 **煙、痒**, 憂,在於穴内,人 鼠、羊爲 雅》同。 癙 皆 憂 字 憊 不 之 義 見

賢 以爲無罪而役於園土,罰爲 後,從他人受禄 總是言王之濫刑,非言國亡而身爲 王刑殺不辜,并及其家之賤者。 下言。「于何從禄」, 念我無禄」,指己身言。 (君,然亦 民之無辜」四 預計之詞耳。 也。 句,申言上 即 瞻 無 烏爰止」,方謂 「于何從禄」,指天 詩人語意,本 禄意,非言國亡之 臣 無 僕。 説 禄 臣 雖 鄭以 也。 虜也 不同, 别歸 有 毛

禄 次,《 屋 復從何人 可 忧 集 平 小傳 六 而受禄, 句 意 無 如視烏 複甚 罪 之民 矣, 飛,不 況謂 俱 被 . 知 囚 被 11-虜 於誰 虜 爲 未 受 之 知

以 朝 有 廷 賢 興分明可見之意,與刺 省 者 中 一, 而 小 ·林宜有大木,而維見薪蒸,喻朝廷 人 但見小人。 也」,蓋 毛、 韓 韓 時義何 日 . 詩 解 外 矣。 | 傳 | | 關 亦云「言 朱《傳 官 V

毛、鄭 曰 : 得 平 訊之占夢,又皆自以 之是非乎?」不 言君臣皆自聖,賢 妄信徵 改 ? 爲 指 召彼故老,訊之占夢」,言侮 之説,後儒 譌言 祥也 詢 故 乎? 老 0 如 與 此 ·知自以 具 占 既 而 莫有易之者。 愚無別 日 自 夢 王莫之止,及詢之故 爲聖人,亦誰 予聖,誰 平 謂 爲聖者是 ? 聖 也。 人,正當 故 知鳥之雌 老 意分 本 何 惟《集 能 一言召 慢 人,指 兩 自 別其言 層,此 元 負 雄, 老 傳 老 知 何 Ŧ

義實乖矣。 言,何以言之是非反不能别乎? 文似順

反。 陸誤,殆未 互易 作 文》引《詩》, 蜴音亦,陸氏誤 反。 :蜥者。 蜥、 字又作蜴。」後 字又作 胡爲 蜴兩字, 意《釋 之 虺 蜥。 亦云「胡 思 蜴 也 以 文》元 以致音與字違。 ^ 蜴爲蜥 詩 人傳 釋 緝 爲 本 文》 虺蜥」,是古本多有 寫 本 也」,信矣。 云 據今本爲 之, 云 謂 嚴氏反 蜥 蜥,星 蜴 然《説 音 正 析 冷機 歷 遂 歷

語 逃,朱《傳》以 而 皆通 而 分 箋、疏 兩 意 E 以 氏 。鑿矣。 虺 虺 以 易場馬 場見 池 喻 肆 人 害 毒 而走,喻民聞 人,以蜴 害人之喻 喻 義相 王 命 反 而

醫 物。 ,以注鳴者。」又云: 蠑 蠑 螈 螈 蜥 説 蜴 文》作 、蝘蜓、守宫、《 榮 蚖, 在 草曰 云 阚 蜥蜴 雅 築 》以 在 蚖 爲 壁 蛇

《古今注 蜴之名。 也,龍子二也,蜥蜴 E 蝘 蜒。」《 陶隱居辯之,以 本草》又有 蝘 蜓、守宫、 三也,蝘 石 龍 龍 爲有 子 子 蜓 爲 四 亦 四 種 得 也 物,其 守宫、 崔 醫 長 豹 蜥

爲一 唐本注》以 物。 蘇 頌 龍 子、蜥 圕 經 蜴 以 爲一物、蝘 在 草澤 者 蜓、 爲 蠑 蠑 螈 螈

細者名蜥

蜴

短大者

名榮

蚖、蛇

醫。

蘇

恭

蜥蜴 蜥 皆未得其真。 蜴 在 即 石 屋壁者 龍 子,其在 今參以毛傳、陸《疏》之説 爲 蝘 蜒、守宫。 水者名榮 諸 蚖 説 又名 紛 則 紛 蛇

醫, 蜓、守宫爲一物,蠑螈、蜥 異,故《 蝘 蜓 爾雅》合四名爲 即 守宫,在 屋 壁 閒 物也。 蜴 爲一物,石 形皆 分之 相 類 龍 則 而 蝘 小

矣。 又名蜥蜴,守宫者又 虺 蜴」指此,在草者則兼 説文》之榮 蚖 水 爲 蜥 乎水、陸 物,其 蜴 也 。 正 焉 爲 種 月》 凡 詩

《説文》云:「坡者曰阪,一曰澤障,一

處 隰者,止 者三,而 日 可食之土也,故特 其 Ш 一脅。」《 Щ 以 阪 脅之謂 陂 與原、隰 E 陀 月 不 乎? V 苗 箋 **Y** 並 得生之。 耳。 以 然 列 阪 焉。 \wedge 詩名 田 爾 雅》十 爲 阪之不 爲 崎 田 嗰 士, 嶢 則 如原 可 角 食 之 是

比之? 是,況 此。 訓 語,多離其本訓 夫詩 言仇仇, 慢賢者。」毛、鄭釋《詩》亦同,蓋 * 《集傳》曰: 執我仇仇,亦不我力」, 執 仇仇、 留 之固,亦是美意,何 何 敖敖,傲也。」注 ,此篇之京京、瘐 嘗言如 「執 我 仇 堅 固 乎 ? 如 古 云 ^ 爾 瘐、蔌 至 古 義 仇 雅 以 人 讎 相 仇 皆 • 釋 用 蔌 然。 傳 傲 儲 重 如

作, 傳 通義》辯之,謂 以「赫 攜 集傳 \pm 奸 赫 》載 命 宗 或説,疑《 見昭二十六年。 周, 西周亡 褒 姒 後不 Œ 威 月》 之二 即東遷,引《左 語 詩 ,及《汲冢 是 語 東 爲 遷 後 紀

畫 恐 爲 燕 屋 中 姒 識之士,固已明知之,且明言之矣,安 然則周之必亡,而亡周之必爲褒姒 謡 相 害 但 邑 + 年 雀 Ė 所][[爲 未 以 作 」、「有穀」等語,顯是荒 威 公爲周司徒,謀逃死之所,史伯引檿 龍漦之讖,決周之必弊,其期 則 周 必 此詩之作,在 年 號 血 處 震 西 於東西周 云「具日 謂 然也 之語 周 公翰 堂之態,若 化 ,伯陽父料周之亡不過 庚 西 青 未 午, 周 立 燐 Ė 予聖」,及「旨酒」、「嘉 獨 初亡, 夫「赫 至 之交。 王子余臣」 時 不 ,身膏 一明年 語 可著之於《詩》乎? 西 犬 耶 周既 赫 未 戎 案,犬 白 辛 ? 宗 即 未, 刃 君亂 事 亡 周 東 亂, 國 褒 平 戎 證 而未東遷之時 尚 遷 語 玉 之, 臣 一,信 人周,在 得 Ŧ + 姒 石 奢縱 不 始 以 年。 幽 而 威之」, 有 俱 常當時 及 肴 富 徙 王 以 然 焚,此 淫泆 三稔 在 貴 弧之 都 妣 況 又 此 矣。 鄭 有 年 驕 有 何 洛 結 Ŧ

人哉?

之制 詩「乃 虞作 借 涉。 解 孔 從 車 車 亦音才再反,誤矣。下章「不輸 反 既 爾 近 脱 疏 面 也 相 因 載」同、朱《傳》無 載」之載 釋 甚 事 之物,如今人縛杖於輻 作 。」其從車旁,殆 《説文》云: 酺。」然則 依」,僖二年。 輔 九章三 [此載 棄 之云: 輔, 詳 揣 字 爾 度 雖 見《易》咸 指 輔 獨 不過 而 從 載」字, 車 不 爲 頰車乃輔字本義。 專 車 中所 及 此)與「覆 注云: 爲 以 旁,然製 輔 説 人 車 車言 卦。 取 音 惟 載 也 頰 不言作 義 而 |載|字 之 爾 爾 一、毛、 車 《釋文》云: 乎牙 「輔 有 物, 雅 也。」《 載 字之義 協 考 以 ~ 鄭 輔 同 故 車 工 頰 亦 防 爾載」,與上 釋 釋 皆 義,朱《傳 異 記 矣,故字 輔 左 惟《 屬 則 輔 器 其 文》才 無 傳 與 疏 輔 車 正 車 音 明 忽 車 亦 作 是 ·, 牙 月 耳 蓋 亦 輔 再 無 可 無

也,形如車 文,後人無 Œ 兩 韻》曰: 一旁木日 由 輔 輔 故曰 確 車 。此此 指 輔,夾 爲 輔 特 何物矣。 據 車。」反以車 車 孔 兩旁木。 疏 《韻 語爲 故實也 會》云: 又頰 木爲本 顋

義,而

借爲頻

車,誤矣。

皆「言」字、「言」字草書似「云」、 雲字也。《説文》云:「雲,古文省雨作云。 歸附,亦取旋義 足暢毛旨矣。 其以云爲言,義乃借 又作5、,象雲回轉之形。」後人加雨作雲耳, 埤雅》曰: 晉不鄰矣,其誰云之。」襄二十九年。 昏姻孔云」,傳訓云爲旋。 《左傳》鄭游吉引 「雲氣 周 也。 旋盤 趙凡 因 而 薄 夫謂 致誤。 此 故 案,云 經 詩 日 此 典「云」字本 以 旋。」此 而 未必然。 云爲 同即古 日 :

「天夭是椓」、「昏椓靡共」,俱從木、《韻會》收。《書》「劓刵椓黥」、《詩》「椓之丁丁」、《説文》有椓字,無椓字、《玉篇》二字並

椓」,誤矣。 以《説文》椓字注訓拯,又引《詩》「天夭是

「佌佌」、「蔌蔌」語,可謂善於體物。陋之情態,雖富貴亦不改也。《正月》末章貧賤仍自若也。小人宜在人下,其猥鄙瑣君子宜居人上,其高明廣大之氣象,雖

十月之交

之,逸齋又據經文證其五妄,允矣。 尚 惟昏主。 厲、幽均 併改詩敘刺厲爲 莪》後、《六月》前、毛公移置於《正月》篇下, 旻》、《小宛》四篇皆刺 知悚懼,不敢自擅,故厲王之世,楚子熊 鄭氏謂《十月之交》、《雨 無道, 暴君 重 圃 刺幽。 斂 其 煩 實 刑, 有 属王 其説甚謬。 殊。 而政 詩,篇第在《菁 厲 由 無 乃 己 正》、《小 出,臣日 暴君 源亦謂 蘇氏 駮 民 幽

致姦

出

未

渠畏

欲,不復録用 空,目中不知有天子,使在 (卿士,以六 忠貞之召、 .徐者之後人,仕於幽王之世,而不克紹 氣 之役,民當共 (兇之輩弄權植 大子靖 一田,肆惡無忌,真蠹國之渠,病民之首, 内之卿 封 「弁髦、《十月之交》之「皇父」是 去 伐 就令有 厲 乎? 也。 於向,挈其百僚以行,朝 王之虐,能 去 其 昏主荒沈酒色, 士乎? 尚 其 存 穆公同 師 由 三子 後。 幾 者,宣王中興,自當 是言之,則作都之皇父,定 之重,委之罪人之子弟,使 不 食其肉,不特皇父一身而 E 黨,蔽主 懾遠 乃征 執 況皇父作都,徹民 免,皇父之家豈 號 兵柄,不 裔之彊 則 一徐之舉,首命皇父 厲王時,其敢 虚 置 流 民 政 彘 潘,反 · 幾拂 了,甚且 以 事 廷 於 前 爲之一 順 也 民 罔 能 民 不 視 威 牆 聞 所 獨 能 然 皇 君 福 噫,緯 賢,山 後,可 伯 語 Ш 申 其 一 則 侯 崩, 前 烈, 厲 信 即

萊民

流

彘

制畿

乎?

父

入就

1

如

《詩》事同,山崩水潰 之,又進之於王,則褒人之族 安知七子不因褒姒 於龍妖,不 文至厲適十世 十之世,權在相。」又 之交》爲厲王 助其説。《中侯》曰: 二云爾。 知矣。 書之言,其 崩水潰納 緯 王 \equiv 應有 后 書 如吉甫之後]]] 而 仲達 詩,至引《中侯擿雒 也。 自應姜姓,何 震、 一,剡、豔古今字,豔 趣馬之蹶, 小人,家伯罔 七 可 岐 子 又孫 爲鄭氏 而 信哉 Ш ,之親。 日 進 即 「昌受符,厲倡嬖, 有 崩之事,不必 毓《詩評》 乎? 此詩 ? 「剡者配 師 左袒 爲 得 尹 宣 殊 主 川 韓 即 姓 不 王元 , 異 申 沸 奕》 剡 妻、家伯 力證《十月 貮 其 知 疑 載 伯之 親 ? 山 》之文以 褒姒 舅 蹶 褒 姬以 震 舍《 崩也 父 是 人育]]] 後 周 生 沸 申 謂 放 之 與 期 有

十月之交,朔月 、辛卯。 日有 蝕之」,孔

是

征

隨

王

與

刺

而

謂 漢 世 通 儒 未 有 以 曆 考 此 辛 卵 日 蝕 者

蝕議, 日 在 吾 疏 五 妣 友 時 千七 Ŧ 顧 六 英 百九 推 年 白 世大儒 之,是 Z 偉。 九分,人 丑歲、《大衍 云: 歲 蝕限。」余案 十月辛 虞 廣 曆》 卯 推 以 朔 + 《唐 泛 爲 月 交十 然。 辛 書》 ýI] 以 日 四 朔

生於唐 論,黄 益 詳。 初 宜 初,不見大 以 乎 來,始 辛 卵 課 日 衍 蝕 H 曆 漢 信議,故 蝕 疏 世 蝕 密 不 無 非 考 至 以 常 張子 虞 也 闕 劆 之言 仲 信 而 達 而 不

言漢

皆

以

日

宋、元 精 爲 然耳。 故 以 漢 刻 以 要之,曆家推算之法, 計,今以 前 日 蝕之 分計。 差以 日計 英白 至後 博 唐 極 以 世 羣 時 而 計 愈

尤精 又 觀 所 著 於天文曆 二司 天 考》可 象,而考據 見 其言 詳慎, 信 悉 而 有 本 經 徴 矣。 史,

孔 厲 較之無 疏 而 言 不 其 能 術 以 II 以 Ŧ Ŧ. 基 基 孔 謂 之説 之右 此 交 爲 鄭 會 个, 欲 然 在 共 箭 則 和 在 此 之 幽 詩 前 世 爲

> 無 疑

正言 亦言 如 夏正 真無 亥三月也 於夏正皆言月,於周正 之交也,併誤 朔考》。 傳 言朔月。 朔之月,故 藻 吉月,古人多 豳 夏 》作 》,凡月朔 風 爲 日乎? 正 稽之論。 則午、未、申 朔 謂十月之交乃是夏之十 •七月》篇耳,以 朔月辛卯 別也。 必言月, 日,當 斯 申 日 尤 皆 又 倒 月以前 解交義矣。 朔 夏之三月,於 爲 況交乃 是 稱 如《四 則載 語 日, 妄説。 傳 朔 三月也,其冬日 無 朔 以 月, 寫 陽之月 月 月》篇之秋 足 安得「百卉 日 證周之不 之誤。 日 猶 皆言日, ^ 異 月 論 陽 詩 月 也 之交 補 乃 周 語 月 朔 》以 傳》 案《 夏 爲 陰 也 一月,爲 亦 魏 會,非 改 日 日 此夏正 之 夏 取 則 具 又謂《 禮 以 鶴 , 若 時月, 春 義 紀 而 今本《 痱」,亥 月吉 酉、戌、 記 Ш 月, 非 以周 非 何 兩 周 著 詩 以 惟 故 以 月 此 爲 集 E 玉 E

月以前,安得「飄風發發」乎?

爲 電 在 不 月 知 蝕 據 傳 非 畢 之 何 之 未 眩 國 建 時 將 目 據 里 知 辛 m 語 亥耳。 也 在 ýp 震 ımi 結 幽 原 電 何 日 在 作 人 世之震電,必有過 以其意 況 蝕 年 \equiv 八以「爗 |||ΪΙΪ 然古太平之世,雷 併 -,要非 年 曆 沸、 沸、 特特 數 《史記》本 推 爗」表之,異 Ш 從 Ш 欲 當 必 崩,豈 崩 前 U 在 俱 六年。 非 災 年 指 變 肼 事 紀 必在十月方 常常 爲 而 言之耳。 也 在 在 者 + 不驚 雷]1] 当當 過 月 電 震 詩 年 常常 人,電 證 事 Ш 時 大 下,不 崩 爲 以 + 不 朱 H

與 彼 者 三年 ",沸 Ш 出 百 $\overline{\prod}$ 不][] 相 Ш 震 同 震 沸 乘 , ~ 是 岐 騰 陵,是水 (詩 》 歳 Ш 111 崩 》所言 即 冢 之 竭 粜 盛 事 自 崩 亦 漫 也 是 非 溢 厲 孔 沸 IF. 王 與 氏 騰 周 時 震 以 語 事 又百 異 爲 沸 幽 斯 III 又 騰 Ŧ

> 語 大 謂 膠 云 正 水 沸 在 滯 文異 泛 之 騰 涇 見 溢溢 歲 非 渭 己。 而 震 中 汭 小 事 耳 ? 也。」 同 水 地 震 專 何 也 震 贵 時 舉 害 則 得 疏 則 其 爲 水 安 疆分之, 大, 沸 溢 流 騰 事 百 ? 勢 ?][] 震 所 固 ^ 後 兼 \equiv 必 詩 甚 則 然 目 111 **>** 己 與 其 又 韋 何 ^ 昭 竭 或 得 注

釋文 恤 雅 當 而 也 此 之文,言 議」, 爲 訓 孔 反。」是陸 訓 得之。 云 爲 説 五規反,鄭 爾 爾 崔 盡 疏 Ш 雅 雅 鬼。」據 不不 申 頂 以 **崒**,舊 釋 箋 之云: 之巉 應天下 Ш 子 文云 作鬼。 此 頂 恤 冢 徂 巖 反 則 峚 恤 當 Ш 有 IE 子 徐 釋《詩 者 反。 頂 崩 崔 萃, 恤 貌 盡 落者 厜 鬼之義 以崒 子 反 宜 崩 才規反,鄭箋 **》**「山 非 依 恤 也 故 子 與與 反 爾 爾 鄭 恤 冢 鄭箋 崒 雅 雅 孔 依 反 作 詩 崩 義 爾 依 崔 則

「蹶維趣馬」、《周禮》趣馬下士,鄭箋誤

注、朱子《詩傳》皆襲鄭之誤。以爲中士,孔疏辯之甚明。顏師古《漢書》

可稱妻稱婦乎? 《小雅》言豔妻,猶《大雅》言哲婦,色豔而性哲,各舉其一以目之耳。傳云:「豔声,褒姒。美色曰豔。」是也。孔謂天子之妻,褒姒。美色曰豔。」是也。孔謂天子之妻,褒姒。美色曰豔。」是也。孔謂天子之

字古音本同,故往 與」,孟 之,以爲懿、噫音義同。 韋昭讀懿爲 婦」,鄭云: 文》云: 抑此皇父」,鄭云「抑之言噫」。 蜀始 「抑,徐音噫。」《瞻 改意 抑,蔡邕石 懿,有所 爲 往 抑。 通 用 傷 經《論 又《楚 是抑、 痛之聲。」 印 · 》篇「 語》「意與之 懿、噫、 語》「懿 孔 懿 意 戒 疏 厥 釋 四 申 哲

臧。臧,善也。」孫毓《評》以鄭爲改字。案,「曰予不戕」,《釋文》云:「戕,王作

此詩 改,則古經乃 存王説,殊 毛 無 傳, 爲 疏 臧 王 漏 字矣。 述毛: 作臧,孫 孔 疏 用 又 鄭 以 述 戕 毛 而 爲 鄭

憎毒讒 者,讒口耳。 處守正,不撓衆枉,勉彊以從 從王事 訴。」因 而不敢告勞,臣子之分也,所惡 劉子政《封事》曰: 引此 詩, 向引此詩 王事 作 密密 勿從 「君 則 反 子 見 獨

● 「音」,原作「因」,嘉慶本同,據康熙抄本、大全本、《四

得,因 乎? 是《韓 謂 所見亦小矣。 爲從皇父之役,誤矣。 衆枉耳,豈從其役哉? 詩 下章「我獨 爲此怨詞,成何品行, 意 正 與 居憂」,又云「 箞、 疏 皇父之徒, 同 求媚於權 朱《 而夫子 皇父 傳 IE. **>** 録 病之」, 訓 門 劉 其詩 從 而 向 不 所 事

案,《 怠 無禮無義,非先王之道,意正相合。 水,會意。」此足暢毛旨矣。又案,《板》詩 曰。」徐鉉云: (釋文》所引。 噂、《説文》作 泄泄」,孟子以爲 一字皆引 緩 悦從,則 説文》云: 噂沓背憎」,傳云: 小人争先獻媚 此 詩 傅,云聚 反 噂 語多沓沓,若水之流,故從 其 「沓,語 注 猶沓沓」,亦取雜沓競 義 三云「聚 ,每有此 矣。 也。」今《説文》噂、傅 多 又《釋文》云: 語 「沓,猶沓 沓沓, **. 醜態** 也」,傅注 沙與 若以 從 下文 水 沓。」 如 爲 從 進

雨無正

乎此 政 異, 此。 曉然。 下 叔謂 甚 以 幽 意,原作 伯 無正》之名尤難解。 多, 王 爲 遂及人心之離 乃 所 也。 也。 政 此 朱子譏其尤無 《常武》、《酌》、《賚》、《般》, 當闕 謂 詩》篇 圃 敘 詩 也。」箋、疏 詩 事皆苛虐,非 詩 首章言刑罰不當,蓋 雨自上下者也,衆多如 七章 語簡質,詞旨艱深,古文類 由 之由, 疑。 以 此 意 而 源 無 ,忠言之蔽,仕進之危,又 發明 取 如 作,非 謂 衆 義 敘云: 名者, 是 敘 多 理,不已 所 其意,以爲王之 而 此詩 非 以 必 른。 政 詩 爲政之道,意 ^ 者,解 \sim 雨 之義, 中 亦 過 所云 雨 凡 無 語, 乎? 無 雨 無 正 政之義 衆 悉 命 與 正 而 而《 多 教 不離 題 敘 多 又永 非 ^ 非 之 絶 有 始 巷 刺 所 雨

曉 使敘 極 之語 其 果 敝 出 而言之, 而故 漢儒 艱 手, 晦 何 其 何 嘗 詞 難 非 開 依 衆 傍 多 後 經 無 世 文,爲 政 以 意 疑端 平 明白 ? 乎? 易 且

觀此敘,愈信其來之古。

饑饉 世 得 罪 言 戮,其無罪之人反牽連 天之省 爲此乎? 王 圖之,舍毛云「除也」。 天下,其災更有甚 王 一之詞也。 專 而 示 ,俾聞之者因之省悟 ,謂天不 爲 死 能繼長其德、毛云: 滅國之災,而旻天又疾王以 雨 Ļ, 悟 怨 無 乎 天之語,刺 大 則 彼 正》首章,古注 其 有 集 如 惠 之 傳 罪 況 一者,將及王 而 V 何 ൬ 使 彼 用 降 饑 ? 荒 詩 有罪而伏辜者不 蘇 耳。 相引 饉 此災,如何不 「駿,長 主 之 源 氏 謂 作, 亂 之説 謂 既 語 而 天 身。 臣 伏 詩 偏 本 語 也。」致天 原 ",全以 辜矣,此 ·浩浩· 得 怨天,豈 得罪,皆 以 刑罰 王不 刺 委 諷 圖 亂 廣 其 降 切 慮 天 加 慮 威 大, 責 欲 當 不 無 刺 刑 之 恐 此 戀 而

> 得之。 慮 矣。 弗 此章上五 以 下,不 句, 미 箞、 易 疏 也 稍 爲 嚴《 煩 緝 碎 》從 其 古 解 弗

者」。 其 譏之,豈因 高 必 饉之 喪 采邑,尚不 窮困 無之理也。 也 蹈,在下僚 ~後,羣 饑 又謂「正 乎? 疏 饉 也,斬 降 饑 能 臣 饉 則 餬 離 大夫離居」是 離 喪 可,非 其 而 居 散,其不去者作 伐 饑 П, 去 者,自 也。 饉 乎? 大臣 豈散去之後,反能 斬 朱《傳 爲 伐 身爲 一所當 因 遠 四 禍 饑 》總 或 爲,故 王 計 饉 詩 一臣,家 之以 爲 耳 而 以 ·, 見 散, 詩 責 義 免 有 幾 此 去 饑

昊天。 天」者, 旻》首句 孔、陸意異,而孔 首章《釋 定 非 m 也。」疏 本作昊天,俗本 誤耳。 文》云: 得之。 云: 《埤 雅》云: 作「旻天」者,因《小 上有 旻天,本有作 作旻天,非 昊天 幽 明明 王 時 也。 此 亦 昊

今注 F 昊 天 疏 疾 威 集 繼 傳 》經文皆作旻, H 旻 天 疾 威 惟 亦 石 據 經 FL. 作 V 説

之朝, 之時 作。 諸 周 歸 宜 父、史伯 亡 也 不 羣 爲 居」及「 一,而 侯 宗 也 臣 應言「周 東 不 者 也 似 懼 遷 至 朱 其 五 應言「遷于 而 一,何 矣, 王 朝,天下 禍 爾 後 子 以 子 論 諱 祖 肅 因 遷 離 詩 宗 嘗 E 而 周 周 言 伊 述毛 于王 居 實 既 周 「乃底滅亡」。 以 図 室爲 之亡,皆直言 亦 則 不不 無 不 非 滅 宗 不 瑾 曰 Ī 都 以 復 祥 也。 隨 ·若後代之甚。 既 既 天 ∇ 都 爲 有 語 滅」 下 附 之 王遷,若 去 訖 一,以 宗 大 先王之法, 而 所宗 語 和 而 殷 不 康 周者,謂之既 一似 之, 譜 挽 語 無隱 命 紂 出 雖 也 之,當 此 使 謂 ,疑《雨 是 失 諸 雖 詩 東遷 妣 位 妣 無 即 古 Œ 有可 此 是 一,夏未 Ŧ 王 平 道 Ħ 亦 雖 如 東 大 香 尚 之 ? 澴 無 宗 滅 伯 香 殷 遷 夫 幽 在 際 正 之 亦 況 陽 暴 未 後 離 E

> 羣 遷 乎 遷 夫 反 戎 可 寄 遠 意 道 居」、「出 既 一,此 ? 瑕 無 臣 復 亦亦 孥 害 相 知 滅 幽 合。 禽 禍 非 出 號 者 也。 尤必 無不 王 没 語,不必 平 至 Ŧ 居」,正 鄶, 棄 以其閒 ? 大 戚 鄭 謂 可 去 無之 之, 抵 爲 桓 而 東 \wedge 0 即 羣 左 昔 故 逃 公,王室 幽 事 一待 遷 因 復 與《十月》末 世 傳 平 死 E 來,固 之 日 臣 東 族 》襄 之計 王 時 字而 際,羣 遷 不 西 也 既 東 後 歸 京 + 懿 見 滅 當 遷 從 疑之, 宫 東 方 其 幾 親 臣 王 室 都 可言 官居 年 吾 之士多有 章「我友自 屬 取 一有禍 懼 還 爲 ,將安歸 不 七 周 疏 義 禍 曰 禾 也 幾以 姓 伯 而 亦 歸 黍 司 不 從 從 輿 在 優 矣, 徒 又 犬 隨 去 王 之 平 文 而 下 逸 大 害 戎 ? 犬 言 者 郧 離 Ŧ 尚 是

● 「害」下,康熙抄本、《四庫全書》本有「意」字,大全本有

千里 何 不 首 乎 也。 從 則 \Box 至若 ? 敢 式 章 從 E 一之「若 遷 淫 臧 ,求故主 晉、宋之南 又篇 能 而 覆 幽之 刑 者 來 力 以 出 此 中 亦 東 不 逞, 無 而 「爲惡」 無 語 底 不 能 道, 事之。 且肆 遷 乎? 罪 少 達 有 淪 也, 矣。 況立國之初, 者 是 斷 行惡 必必 則當 中 也。 古今人情 胥 不 又 政哉 以 朝 可 無 日 平 舊 鋪 通 Ħ 能 人情, 雖 于 臣 從 人 次 東 党基 庸 若 而 類 心 章 遷 暗之君, 皆 但 荲 不 一之「庶 未 後者 跋 欲 門 相 有 固 遠 涉 者 欲 圭

故 則 圃 謂 指 日 將 周 鎬宗,在東 周 宗。 宗、宗周 有易姓之變,殆是臆 宗,尊 見於 周 則指 也 經 朱《傳》 Ŧ. 傳者不 城 説 爲 解宗爲 一, 在 天下所宗 族姓, 西 周

道 其 義 之言 聽言 也。 則苔」,與《桑柔 鄭箋 以 一答爲 以 此 距 爲 違 口 》篇 以 聽 對 用 一聽言 之言 爲 應 則 彼 對 語 爲

> 而 解 異, 鑿矣。 當 以 傳 爲 正

同

進

言,兩 嚴《緝 受之。 恝然? 也。」 受用 言。 之。」蓋 之意,王信讒言 Ŧ 退 有問 讒 如朱説,則聽言是己之言, 譖言及己 人 言字 聽言 》稍易之,然 也」, 若 佞 責 此於義皆 ൬ 有 王 則荅, 不 欲 若 疏 譖 也 應 聽 有 申 則 毁之言, 其言"則 異 雖 道 譖 其 朱《 不 難 退 解。 欲 言 聽 意 如 通 而 不退, 傳 非 則 古注 也。 離 曰 苔字内 退」, 荅之而 **>** 則 法 : 居,責 以 之言 一之當 吕《記》用 亦 用 爲 毛 王 不 其 譖 亦 其 責 傳 己, 好 可 言 則 無 言 恝 臣 得, 云以 信 而 應 不 不 是 然 其 淺 人之 云 敢 罪 荅 何 盡 於 近 盡 退 而

言 非 不 -賢者。 得 言」,以「哿矣能 五章,毛傳 夫曰「 箋、 世 疏 所 以「哀哉不能言」爲「哀 申 謂 之, 言」爲「可矣,世 則 謂 賢者 僅 見 之中 許 于 有 俗 所 此 賢 決 能

常可 耳。 蘇氏 解、 也。」得之矣。 達引以 必是聖人語,七十子之徒得之於傳聞耳,仲 有反用爲美稱者哉? 簧」、「厚 拙 向引「不 能言」, 側 書》 人意者,佞人之言也,此 云 杜注謂 種 媚 爲 與 顔 類 恐 證君子之言信 能言」,證 證,誤矣。 令色、孔 失 」,而孔子尤惡之,屢見於 舉,《小 叔向 言之忠者,世 毛 旨 、時《詩》義 壬並 小人之言 雅 至《左傳》昭 古 《表記》「詞欲巧」,未 巧言》 未 而 稱 有 有徵 《周 如 所 以 世之所謂能 此, 僭 謂 巧 篇 了, 此 書》 而 不 言 亦未必然。 八年晉 亦云「 無徴 能 爲 比特斷 亦 言 詞 善 與 也 意 引 叔 加 岩 便

小

「潝潝訿訿」,朱《傳》用蘇説,以「相和

當竭 良然。 故謂 心。 不能 **渝然** 疏 云 而 相 以 爲 詆 之不 患其 力以 此 專 稱上意,而 今不惟不爲上用,而反爲 「翕 解 權 説 之, (上, 訿 供職也、《雅》 翕 也 効 争 訿 蓋),詩 勢 用於上,而精 訿 因 爲 訿 又故與上違,以 義 翕 患 不 然思不稱 殆 是 上,背公營 供 不 合 職 與 然。 義 (傳 也。」夫人臣之職 白 訿 殆 其 毛 無 E 是 傳 相 上。」《爾 私 私,以 思 患; 毁 發明。 云 爲不 爲 義 不 當 不惟 依 稱 雅 潝 孔 E 傍

或 爲禮 靡 訓 義各 小, 論 膴 靡 靡 膴 膴 不定釋之,義互相參差矣。 相 用王説 膴 或 又 配 爲 無 雖 法。 取 訓 靡 孔 箋 矣,則 止, 疏 小與少,禮與 一義。 王 申 民 肅 毛,既以 以 雖 述 朱《傳》以 靡止爲小 毛,訓 靡 膴 靡 法 爲 止 毛 民 少。 可也,乃 爲 兩家字訓 又案,《 訓 雖 小矣,及 不 靡 鄭 多 止 訓 以 訓 爲 止

何。」然則王以爲少,蓋本《韓詩》。 文》云:「靡膴,《韓詩》作靡腜,猶無幾

謀乎? 説。 攖小人之怒,文義正相合,何必全篇皆言 末一 面 臧,譏王誤聽,因又自言當明哲保身,未可 之而實非。 子,故祖其師説,非《詩》之正指也。 危殆之意,本於《荀子》狎虎語。 不知 受,非若異世 此篇諸章止言不能聽謀,並無畏小人之 章獨爲自警之詞,蓋先言小人謀議 荀子引《詩》是斷章取義,毛乃 毛傳 而用爲正解乎? 荀、毛師 釋《小旻》卒章,用不敬小 詳玩經文,前五章皆刺時之語 徒據 弟同堂,其《詩》説應 成書 也 荀果斷章,毛 華谷非之, 荀之弟 斯言似 人則 得 之 聽 不 亦

《傳》曰:

「各敬慎爾之威儀,天命已去,將

爲相似,獨「天命不又」一語,終屬難通。

埽諸説,定爲兄弟相戒之詩。

合之詩詞

.;

朱

朱《傳》盡

小 宛

《小宛》刺幽王,解者紛紛。

鳩 喉, 鵬鳩、 而音 好 朝鳴矣、《月令》之鳴鳩、《莊子》之鷽 禽經》「林鳥朝嘲,水鳥 陟交反。《字林》作鵃。」 《氓》之鳩、《小宛》之鳴 同 鶻鵃也,傳亦云鶻鵰。 矣。 亦作 嘲鳥, 朝 鳴 夜碗」是也。 鳩 是鵃、 E ,如《爾雅》之 《釋文》云: 嘲 夜鳴 鵬 形 鳴 異 E

下復云:

大夫戒其兄弟,可妄稱天命乎?

「時王以酒敗德,臣下化之,故首以爲戒。」

不復來,不可不懼也。」惟天子受命於天耳

仍不能脱刺時

義矣。

二六〇

明 鳩 爲 (,吕《記》、朱《傳》皆誤 班 ·, 鳩 左 傳 非 学之 是。 鶻 鳩 埤 司 雅》 事 及《 皆 此 爾 鳥 雅 **>** 疏 陸 辯 元 之 恪 其 以

真。 鳴鳩 之説 中。 能 榆 疏》 天,興王不能自彊 高 重 本 戻天 謂 枋 明之功者, -草》言鳴鳩在深 辯之,亦 即 時時 又與《莊 許 鳴 也 以 乎? 小 鳩 讀 則 莊 吸《詩》 鳥不 奮 不 子》之鷽 同 讯 説 至而 則毛 子》及毛 毛氏之説 圖 其 能 雖 而 意 羽,直刺 戾天,興 相 未 傳之義 控 ,鳴鳩之不 林閒 鳩 反, 究 |於地」者,乃 傳 其 所 也。 而 合,不謬矣。 爲允。 (旨,故 飛翔不 E 謂 小 取 一飛數 人 以 義 決 如者,歐 八之道 實 小 有 ·遠,當得 干 又案,許 斯 起 鳥 同 此 士,人 鳥 而 尚 不 ^ 誤 矣, 飛, 名 然 陽 思 能 耳。 其 雲 焉 物 叔 搶 案 E 戾 成

善道 人皆可行,蜾蠃 集 傳》 》釋《小 ·宛》三章 負子興不 以 似 庶 者 民 采 可 教 菽 丽 興

> 意 得分爲兩義 别爲善道 似 此 大 亦 以 彊 乎? 式 爲 ? 穀 分 配 況似之者,正似其善道 終 語 采 耳。 菽 意 采菽之興,何自 似 之 終 負 何 子

爲 之。 似, 盧之得子, 得之。又此 相承,采爲 似 言王不能治民,則 爾子 案、《詩 式穀似之」、《詩 殆 采菽,負 謂 章以 》中「似」字多 未 嗣 然。 有 上 汝之萬 爲 四 詁 負 句 將 興 蝘 與 爲 以 民 蠕 此 能 似 耳。 嗣 則 二句, 治 爲 通 鄭 者 似 一似 此 之 繼 文 云 續 口似蒲 亦 義 圃 解 之 當 各 良 有

化 上 圃 食葉。 爲 復 蛾 伸。 螟蠕、 尺蠖 螟 尺 蠕 蠖 又 似 與蠋,皆 似 蠋 尺 而 小,行 蠖 不 脯 能 青 崱 穴木, 小 首 尾 至 相 惟 夏 就 俱 在 羽 詘 樹

盧 又云「土蠭 蜾 鸁 雖 名 土 蜂 則二蟲 然《爾 也。 雅 尝云 蜾 鸁 蜾 又名 嬴 細 蒲

者爲 見陶 其雖 土蠭 氏 號土 又名 分别 蜂, 録 蠮 此 ~》,郭 螉 不就 也。 入《神 景 土中 其 純 細 農 日 作 要 大 經 窟 **>** 遙 下 但 則 在 品品 摙 陶 地 土 隱 中 土 作 居言 作 蠭 房 房 則

者也

我 雅 及 地 蜘 及 閒 《墨客揮犀》。 文》之説 細 者爲 王 》、毛傳、《説 屋 中 蛛 筆 要 之 、鑑也, 壁者 也。 管 之 我 阚 者名 土 類 蜾蠃,穴地 日 亦 雅 蓋 繿 蠮 斯 × 謂 同 俗 故 戒 浦 爲 邁 其 螉 呼 是 文》皆以 Ŧ 盧 是 蠮 類 惟 爲 宜 而 蜾 螉 爲巢者 有 捕 蜾 蟲 蠮 蟲 與 月 也。 鸁 = 蠨 鸁 耳。 螉。」《詩》毛 羣 斯 而 爲 蛸 蒲盧。」 臣 至巢 四 征 爲 蒲 與 物,必 銜泥 名也。 蜾 勤 蠮 盧 蟋 鄭云 鸁 于 勞 螉, 注 誉 幒 捕 於 書卷、筆 無誤 蒲 1巢于 巢于 云: 桑 宋 政 傳 盧 彭 蠖 彭 事 及 也 蓋 及 書 屋 乘 ~ , 我, 管 爾 小 以 卷 H 釋 壁 即 著

> 皆 矣」同義,則「我」字爲贅矣。 有 訓 所 爲 往 月 日 月之 有 所 行 行 甚 無 速 止 與 息 ^ 也 論 語 歐 陽 日 及 月 王 逝 氏

寡,雖 詩 以 處之泰 訟,云宜者,言其勢 政 謂之宜 致濫,容 人 以賄 之旨 。 哀我填 由 然, 故 成,窮盡 上之失道 或有之耳。 何 可 (寡,宜 哀 至 寡 争 也。 財 訟 然君子 犴宜獄」,言 不 之人無 哉? 歐 歐 . 得 陽 陽 不 氏 樂 惟 以 辜 然。 謂 道 此 無 被 因 爲宜 知 安 衰 繫, 夫致 窮 亂 貧 小 寡 在 一、恐非 之世 民, 自 民 而 上 反 窮 應 窮 争

小 弁

贵 及 爲《辯説 因 趙 小 岐 弁》 注 》,則 及王充《 詩 又 朱 疑 子 宜 論 注 臼 衡 孟 詩 皆 子 與 **>**, 指 傅 爲 作 純 伯 皆 用 奇 敘 無 據 義

二六二

》主》。 于王朝得失,吉甫父子私家之事,朱必入故裵回無定見耶? 然二《雅》所咏,必有關

何本。他。《集傳》曰:「弁,飛拊翼貌。」未知此。《集傳》曰:「弁,飛拊翼貌。」未知爲樂意。「弁彼鸒斯」,以鳥之樂,興己之憂爲樂意。「弁彼譽斯」,以鳥之樂,興己之憂

容也 蟬 心,放子孤臣,情 柳淵之不如。 大,不能容一太子,使之如舟流之靡届 不容」,毛、韓異家 讀《詩》者漠無 主全不取義之説,故於此 ,淵深而旁生萑葦。言大者之旁,無 小弁》四章,箋云: 韓 詩外傳》引此,亦云「言大者 觀 詩人以 感 事 而同義矣。 應 此 爾。 託 人俱略 「柳木茂盛 朱子論興 興,直是觸 而 夫以王者之 弗求,遂令 體 目 所 則 無 曾 名 傷 不 多 所

「析薪扡矣」、《説文》「杝」從木也、聲音

巧言》首章兩「憮」字,上

「憮」毛訓大

音侈。 拸,俗作扯 從 《説文》,音從《釋文》,失之矣。 豸。 辯此甚明,而《正韻》仍襲朱《傳》之誤。 日俗下書有《字彙》者,辯《詩》杝字從木不 手,彼未見古注疏 《玉篇》亦然。《釋文》「扡」 音隨形異,其義 也。 則同。 又案, 地字亦作 《集傳》字 黄氏《韻會》 從手 也 從 近

巧 言

刺時也,乃刺天矣,恐無是理。 也。古注本如此,今皆以爲歸罪於天,則非何昊天」、「昊天已威」、「昊天大憮」之類,何昊天」、「昊天已威」、「昊天大憮」之類,「昊天不惠」、「昊天不平」、「浩浩昊天」、「如

大,其釋「已威」、「大憮」云: 下 甚矣,昊天之威甚大矣。」二句意兩分,不應 畫 「王甚虐大」,不成文義矣。 憮 , 則 無 傳, 鄭 義 鄭 勝 兩「無」 矣。 「昊天大憮」,疏申 皆 訓 傲。 朱《傳》從毛 「昊天之威 兩「無」 毛云 必 訓 E 欲

《傳》改訓爲審,可謂巧於諧俗。慎,至《巧言》兩「予慎」,非誠義莫通矣。朱案,「慎爾優游」、「考慎其相」,猶可釋爲謹繁多用此訓,宋儒以其不人俗,悉改之。《爾雅》云:「慎,誠也。」《詩》慎字毛、

下句又蒙威字。

耳。 字與僭同音,亦作不信解,則從 諸本異。案,幠字本《爾雅》注,郭引此詩。 云: 人從言,皆可 又「昊天大憮」,注 憮、僭二字,吕《記》作「幠」作「 「大,音泰。 通 也。 本或作泰。」今吕《記》、朱 但譖 流 字不 本作大、《釋文》 應讀 J. 從 潛」,與 側 巾, 蔭 從 譖 切

《傳》、嚴《緝》皆作泰

得之。 不信。 皆作不信解,而仍讀側蔭切,義從鄭而 毛,恐誤。 音咸。」皆音隨訓異,不 「僭,毛側蔭反,鄭子念反。涵,毛音含,鄭 僭始既 涵字毛訓容,鄭 吕、朱皆有此失,惟嚴《緝》 涵」,●僭字本 可 訓 溷 同。 訓 也。 數,音朔。 《釋文》云: 近世 無 音從 鄭訓 僭 字

雅·釋詁》「嘆」莫字。字亦與貊同,訓爲定,「不民之莫」,「莫」與「赫」、「獲」協韻,「貊其信者」、《左傳》、昭二十八年。《樂記》引《詩》、「我民之莫」,「莫」與「赫」、「獲」協韻,「貊其氏訓定。案,莫之訓定者,當音貊、《大雅》氏訓定。案,莫之訓定者,當音貊、《大雅》氏訓定。案,莫之訓定者,當音貊、《失雅》從王

●「僭」,原作「譖」,嘉慶本同,據大全本、《四庫全書》本

則莫 旨,漠、謨二字、《爾 作漠,或 度」,豈同 貊 又 同 .彼莫 作 音。 : 謨。」 乎 可 是 ?《釋文》云: 雅 知 》皆訓謀矣。 毛之訓 此 詩 莫 謀,乃 入字 協 作」, 詩之本 「莫,或 協

費力。 此於「心數」及「自口」二語 往來俱可通行。 古注之優。 而 由 之言,必再三思,惟心知其善,然後 心焉數之」,與「出 言 衷 宋 儒皆從之。 之準則 ,故敢爲大言以欺世。 往來行言,心焉數之」,箋、疏 矣。 又 碩 小人之言,但 朱《傳》又以 歐 本 陽 自口 訓 以 大, 行 矣」正相 俱 言 知乎此,可以得 轉 少義 爲 碩言爲善言 取 爲 道 口 反。 善 給,不 趣,不如 路之言 出 義 義 之,故 長矣。 君子 殊 N

又云「或作 從扩 童 既 聲。 微 /通。 且 籀文從允 /通 案, 允, 《説文》云: **種**」《説 作進。 文》作 毫玉 潼」,云 篇 彼 河, 布

> 火切, 大 作 之形。」今監 / 瘇。」 :瘇,《 蹇 也。 漢 曲 . 本從九作尰,非是。 賈 脛 誼 也 傳 鳥 光 切。 「天下之勢, 從 又案, 大, 象 方 偏 **介重** 病 亦 曲

何人斯

暴亦 遂會 善 作壎,蘇成公作箎」,譙周《古史考》「暴辛公 爲 即 然蘇、暴二公之諡,因此 甯《穀梁》注亦同。 加 燻 鄭 暴 河 《有,且 雒 東都畿内國與? 則 内 蘇 戎,盟 温 與 未 成公善箎 聞。 暴, 縣 與維 ,本於《左傳》杜注也,成 箋云「皆畿 于暴」,杜注云: 今案,《春秋》文公八年「公子 戎 盟 幽 孔 于 王時 又案《世本》「暴辛公 此 疏 得 内 皆斥其謬,當矣。 鄭尚 傳於《詩》敘,不 則 國名」。 地 必 未遷,暴未 鄭 近 地。」范 疏 + 心洛,意 謂 年。

爲無補。

者得之。《集傳》曰: 當情不通之義矣。 反。 知。」則否字成贅 否,復難知 人見我,則我 云 否 難 「鄭符 也。」方九切當譖否之義,符 知 與 也」, 鄙 女情不通,女與 反。」案,箋云: 《釋 細 玩箋文,讀爲 文》云: 爾之心我不 於 「反 否, 譖 符 · 得 方 圖 鄙 我 又 不 九 ൬ 切 切 與

此詩 則上 皆承見我,上言一來見我,於女何病,下 章盱病是蘇公自謂。 《傳》吁 詩》之義,難 來見我,於我得安也。又《卷耳》之「吁」, 章盱 及《 俾 訓 一都賦 我祇也」,毛以 都人士》之「盱」,毛皆 憂歎 病 指何 》證 盡 行, 以 望義, 人而言,鄭説優矣。 文拘 訓 望,各隨文釋之,不 鄭以 也。 祇祈支反。 然《易》之「盱豫」,古 祇止支反。 又引《易》及《字 爲病,則上 訓 病。 盱、 祇 爲安, 朱 言 知

疑毛而信吕、左,可乎?注無訓望者,至吕忱、左思二人皆後于毛,

律曆記》文,此二人各述所聞耳,班書後出 較古矣。 古今字異。 毛 燻、 丽 信昌、左 又毛傳「土曰燻」,疏以爲《 周禮》、《爾雅》皆作塤,孔 案、《説文》壎從土熏聲, 可 乎 漢 疏 則燻字 以 爲

毛不得襲其語。

就魅 放謂 域者, **魎**蜜鬼。」師古所云「魅惑」,正指此。 魆與蟚古字通。 人不得見,故詩人與 書》「人主之大蜮」,東方朔以 善引《漢舊儀》東漢人衞宏著。 古所云「魅骚」。案、《文選·東京賦 魆 短 短狐 爲鬼爲蜮」,蜮,《釋 洵 狐 淫 也。 爲 氣 篤 所 《韻會》獨取 論 昔顓頊三子,一 生,朔以 鬼 源 亦 並 指 謂 言 文》或、域 云: 或音, 短 偃,正當 比 若是魅 狐 居若· 董 潛居 偃。 謂 魆 兩聲, 不 水爲 鬼鬼 》注,李 即 然《漢 水中, | 魊,則 必遷 宋劉 顔 也。 鯛 師 音

六六六

然也。又案、《文選》「魊'鬼」之蜮,●亦音域。亦鬼耳、《詩》並言之,不已複乎? 黄説殆未

見《廣 굸: 同。 一音。 必 無 本 范蠡曰: 目。」疏 云「有靦 爾雅》注 窮 異 官誤,當 極 疏引《説文》云: 《釋文》云: 雅》,又訓 有靦 未 耳 云 面 知 <u></u> 云 「余雖 以 目 面 並 面目之貌。」《説文》亦以 孰 疏引爲 ,視人罔極」,但言其與 目」,傳曰 無 是。 「靦,人面姡然。」又《越 姡 可 靦 爲 醜 案,箋云: 然而人面哉?」韋 正。 之意 靦,皆不及醜 「姡, 面 面 見 也。 醜 靦, 姡 人之貌 面 也 今本《説文》 靦 |。」《説文》亦 「姡 義 也。」與 也。」活、括 靦 然 人相見 爲 況經 昭 孫 有 面 今 注 炎 面

見 非 我 鬼 蜮 有靦 也 蓋 與 面 以 人相視 收 目,視人罔極」,言有 全篇之意 方無 窮極 也。 贵 案,此詩 能 面 奴 目 身 則

> 説。 以 靦 疑 面 已。前四章「不入我門」、「不入唁我」、「不 章,言詞 何爲乎? 五、六章兩言「壹者之來」,望其 見其身」、「其爲飄 耳。 然 也。 窮 七章要之以詛,亦欲與之相 極 加 末章又言, 必欲與之相見,彼將 其情也,而絶之之意,不言可 人 煩複, 面,終有 彼反側 要其旨歸, 除是 而 相 風」,皆怪 抱 見之期,今之不 愧 鬼 於心,所極難者見 蜮, 不過 無 則 其 地自容,正所 責 來見也 不來 不 見,面釋其 其來見而 可 見也 來見 見女 此鄭

巷伯

「周禮》「内小臣」,奄人,而稱上士,是

^{■「}蜮」、康熙抄本、《四庫全書》本、嘉慶本同、大全本作

故不以 寺人無 于《 内 奄官之長,故箋、疏以 小臣 即巷伯 周 禮 當 爵 則誤尤甚。 伯長 • 三, 且 已失據矣。 天官》屬 屬 之稱。 於内 下, 夫内小臣 小 巷伯當之。 宋之説《詩》者,謂 朱《傳》又謂寺人 ,臣,則 明是二 奄人之卑者 與寺人 職,豈未之 伯,長也 並 即 列 寺

見乎?

也。 當自 澼 納鄰之嫠婦,雖執燭繼 益 毛傳以經文「侈兮」,侈之言,●是必有因 比之《小雅》巷伯之倫,因有是説耳。今案, 毛傳引顏叔子、魯男子事、《漢書 朱《傳》以 嫌 一大之義,必因小嫌構 必若魯男子閉門不納 ,寺人,奄者,所 (巷伯) 避 嫌 爲 之不 詩 遭讒被宫,故作 是本爲寺人又被讒譖 審,故引二人之事。 薪 然人不可户説,是避嫌之不審 嫌 ,則避之審矣。 不必因 而 成罪。 此 男女,是明以 詩 疏以 作詩之人, 史遷贊》 ,徒見次章 爲 而作 顔叔子 止 一證 而

> 篇末 遭讒 因 人 而 傷悼之詞,故取以相方耳,非 班掾比史遷於巷伯,止以 傳,則知毛公意中未 閹,安得自稱寺人耶? 詩 不安於前説乎? 譖 被宫也。 而 也。」設 引 爲既宫之後也。 而 日 楊 然,此兩者皆非 孟 氏 遭 子者, 況子長之腐刑 語,以 讒 而後宫,則踐 罪已定矣,而將 爲 だ 説 不 必如朱子之説矣。 又末章毛傳云: 所 以 司 同 據 此 出 是閹者,又皆 而 矣。 ·謂兩· 刑之時 傳 於帝意,並 亦 之言合之前 ^ 踐 有 人皆 集傳》 理 刑 尚 一,殆 遭 未 作 寺 於 此 亦 非 有 爲 讒 至

貌,哆、侈爲微張貌, 哆」、「侈」,正言 是形容其 首章「萋」、「斐」, 、張大。 南箕。 ^ 集 謂 由 傳 Œ 小文而 言 訓 是 萋、 形 貝 容其 錦。 斐爲 成貝錦之 文彩, 小文 次章

■「言」上,康熙抄本、大全本、《四庫全書》本有「爲」字。

於天,有一定之形,何得云由 錦 踵狹,成箕爲舌廣耶? 則 箕也,遂并萋、斐二字,亦依此立説耳。 舌廣」語,謂踵狹是微張,舌廣是大張,而 案,朱子之爲此解者,殆因鄭箋「箕星 過,致成大罪。 大文,由微張 義,絶不相蒙,小文之解,尤爲穿鑿 文章相錯,明就已成之錦言,與有因益大之 星踵狹舌廣」,是舌因踵而益大,申明傳義, 不知傳訓哆爲大,侈爲有 哆、 出於人工,其文固 侈句已]兼踵舌義矣,安得分哆、侈 而成南箕之大張,以 説雖巧,恐非詩意也 積 小以成大,南 至於萋、斐,傳 所因,故鄭以 小 至大 喻緣 箕 夫貝 訓 乎 飾 踵 縣 「箕 爲 ? 爲 殊 狹 成 象 小

謂如詩之侈,非謂詩作鉹也。

董誤

解《

説

詳其文義,蓋謂

鉹字聲音讀

如

崔《集注》作「侈兮哆兮」,《説文》作「鉹兮哆

"哆兮侈兮」、《詩記》載董氏道。

語,

謂

文》義矣。

《詩》乎?
《詩》乎?
《詩》乎?

E 詩 稽古 編卷 干 四

見其必

然也。

扶摇謂

之焱,

即

《南

華》之扶

炎之説

而

郭

璞因

之耳。

據《

爾

雅

正

文,未

吴 江 陳處士啟

《爾雅》者,止因

穨

是下墜之名,故爲此

火,火乃炎

上之物,

安得自

上而

下乎?

注

摇,信從下而上矣。

焚輪謂

之穨

焚取象於

然以字義考之,穨从秃貴聲,秃貌,又暴

之 什變小雅

也。

隤从阝貴聲,下

墜也、《説文》、《玉篇》諸

書並

471

風

谷

風

谷

風

者。 風薄 維 風 相 及 扶 穨 而 _, 上,喻朋 傳 云 友 相 穨 須 風 而 之 成。 焚 風 輪

此。 薄指 上升 孔 穨 賴 疏 風 谷 解 風 相扶 此 扶 甚 指 丽 之 谷 八、嚴氏 耐 風 上, 也 譏其以猋釋 以 喻 穨 友 風 之 力 相 薄 穨 成 不 誤 能 如

下 而 上 穨 從 F 加 下,是李巡、 孫

傳語

簡

貴

贵

可

以

粗

心讀之哉

同。 轉 扶摇即猋是也,羊角 疏以 其升愈速,喻 薄當爲 墜之隤,釋暴風之穨矣。 兩家之説, 莊子》曰: 風之鋭而 而 俗通作 L 風 薄 迫義,谷風、積風 如燄焚輪之象也。」案、《莊子》釋文 指穨 上者爲猋 頹。 毛意未 朋 摶 風 是二頹本各一字,不 友 扶摇羊 相 相 必 即 風 扶 規 然 穨 指 切,則 角 皆欲 之旋 毛傳 也。 谷風 是 加 也。 上者九萬 德 上升 而 陸 , 特 風 上者 業 今羊 農 薄 通 益 相 得援下 師 相扶」, 毛、郭 迫, 爲穨 進 角 里。」 也。 旋 則

二六九

二七〇

合之《 允協 上行 引 司 1,若羊 馬 爾 可 彪 雅 Ē 云 景 × 角 純 則 然 之誤。 上行 謂 風 之羊 E 如焚,旋 行 ·角。」 謂 之 放轉如 陸 扶 義 摇 輪 應 本此 名 風 義 曲

蓼 莪

分。 語 味 蒿 辯 知 直,蔚粗 刃 切切。 各 何 以以 」,及彼 異, 據。 朱《傳》云 莪、 也,蔚 爲 討 在《 蒿 我始生,香美可 其 而 注 嚴 《夢 爾 名 莪 則 疏 蔚,分之各 雅 緝 細 不 点 》 莪 》 詩 「蘩、蕭、莪、 ×, 形 同 牡 據 「莪,美菜。 莪 至 鼓 稍 ^ 則 爾雅 意 也 異矣,然 秋老 莪 草, 食,至秋 主於分言, 蘿 《埤 蔚之類,始 》「蘩之 成, 也 蒿,賤草。」 合之皆 雅 一,蒿 初 則 高 無 莪 則 醜 皆蒿」之 大 美 則 俄 蒿 秋 蒿 生, 各 惡 則 而 鼓 類 之 爲 未 粗 蒿 去

> 乃 惡 蔚」終屬難通,不如古注之當 是 不 無用之惡子,其 可 食, 喻 子 初 生 一,猶 取 義 是 優矣。 美材 但 至 於 長

正。 但 子 極 木 ,精神慣 匪」、「伊」二字爲虚設耳 東萊 能 視 報 莪 父母 謂 爲 亂 莪蒿不能 蒿,猶 之所致 之劬 勞。 云 也。 看 報 説 朱成 天 箋、 本 地之生 歐 疏 碧 陽 此 也 解 育 亦 憂 較 可 猶 思 爲 通 平. 之

大東

明, 禮 賦 之世,侯國 則」字, 而 ,喻天子恩施之厚。 惟直 非 毛以首章爲興,故 興矣。 録 豈 富足,吕《記 詩 所 語 謂 \wedge (集傳》 全 而 不 於 取 E 》、嚴《 亦 歐、 述 義 四 云 傳者言以 蘇 者 旬 緝 興 平 釋 中 》皆從之,此 ? 閒 此 而 然 絶 謂 待 各 客 簋 先 加 無 之 有 發 王

一義。今乃曰「有飧則有匕,如砥則如矢」,飧,鼎有匕,各一事,砥言平,矢言直,各

是何理

哉?

此,而 賢,克舉 之子,殫民之財,竭民之力,所謂君子者 氏、號石 五章以 章爲全篇綱領,下章所譏,皆反 箋分飧、匕爲所履,砥、矢爲所視,迂矣。 之均直也。 時,布德 飧、匕,恩施之厚也。 在下之小人,又何所視乎? 詩人所 下,取譬不 厥 父 輩 職 所履、所視、當總目此 接 也。 行政,雖出 迹於朝 一,則 幽王之時,皇父七子、 ,皆巧佞之徒,貪殘 專刺 於王 砥、矢,貢 曠 一,亦由 此 官。 爲 而 在位 良以 義。 賦 言 賞 首 如 尹 名 周 鄭 罰 而

此解甚自然,蘇、吕皆從之。今以爲東方大多少也。小亦於東,大亦於東,言其政偏。」「小東大東」,箋云:「小大言賦斂之

以

之而潜然也

小之國,失之矣。

禾。 竊謂優於毛矣。 云: 穫,落」、《爾雅· 鄭云:「穫,落,木名。」則字宜 無 「今梛榆也。 浸穫薪」, 釋木》文。 毛 其葉如 訓 穫爲 榆。」從鄭 陸 艾, 氏《草 則字 説 一從木。 木 宜 也 疏 從

似。 人所 無見 功臣之世」二語證之,正相合。 穴氏之職。」 世臣之子孫,退在賤官,使搏熊羆,在冥氏 其致誤良 之子,熊羆是裘」,改 也。 加 況古衣裘字原作求,象形,其从衣,後 鄭箋破 耳。 舟與周、裘與求不僅音同 有 疏引《裳華》敘 此詩傳寫之時,昧者 經字,爲 由 也。 箋云: 後儒 舟 爲 周 所 「棄賢者之類,絶 「周人之子,周 譏 裘 爲 然 一概加 7,形亦 如 求 舟 則 之, 非 X 相

刺素食也。」夫以瑞玉爲佩,傳云:「璲,瑞也。」《爾雅•釋訓》:「皋皋、琄琄,輯同。

則居 箋、疏用《 見其 官 勝 者 《雅》意 彻 也 而 釋《詩》本 不 以 其 才之長 無 誤,後 故 儒 日 易之, 素 食。

見恤 無其 職 之道 首章 之正矣。 反 也 覆 一,賦 一君子 了,鄭以 事,意正相 m 大東》詩 《韓 怨之之詞 役 詩 所 平 喻王朝官司 外 履」相首尾。 均,今之在 五、 傳》以 同 "; 其 六、七 今皆解 、説始於歐 南箕、北斗 虚 章 位者反之,故 列 古之君子法 爲 取 m 陽,不 興 望天恤己,不 無 星 實 喻 漢 用 如 有 古 位 爲 先 正 詞 義 曠 與 面 王 意

通矣。 織女 云 人何德於星,而 有 報章,傳云: 《集傳 織之 西 無 用 東,不見倒反,是 》改爲報我之章,未 緯 望 其 ~報 報 來 我 反成 邪? 一去, 無 是報 章。」 成 見 也 其 反 疏 。」義 (勝,且 成 申 章 儘 之

「服」雖从舟旁,然製字之義,會意在

箱」是 相 也; 服 得 車 傳》從之,恐不 屬 名 者亦 成文 説文》服字 也,《 也。 兩較 有二: 矣。 詩 謂 箱 之牝 》「兩 以 注 <u></u> 如 邱 容 氏 1物,在 毛義之當 服 服 四 車 謂 一也,《 上襄」,「 馬 右 服 外二 兩較之内 騎 箱 所 以 猶 爲 兩 詩 舟 駕 驂, 服 旋。」 車 故故 齊 不 内 其 首 而 服 以 以 朱 箱 服 是 爲 車

明, 西故 爲 庚。」 《史記索隱》引 爲 理 疏 大白晨 者 爲 長 日 星。 曹憲 東見,水在 兩歧 庚」。 則 啟明、長庚、毛傳、《韓詩》、《 既 鄭 出 之解, 注 毛傳云: 三家 東方 此 樵 則 謂 語。 分 明 之説 日東故西見之説也。 晨 爲 爲 丽 星 見 廣 啟 後 金 日 爲 相 東 雅 明,昏見 、水二星, 儒 影云 符,不 方爲 長 異 庚。」 日 説 啟 出 紛 可 西 「大白 明,昏 ^ 則 紛。 易 而 方爲 韓 廣 明 謂 矣。 詩 雅》皆 其 謂 星 金 見 長 夫金 在 最 自 之 爲 庚。」 云 西 日 無 孔 方 長 啟 以

皆指 在 水 聲,教也。」明星義取 水星有昏度無晨度矣, 豈不謬 日 各 東 爲 有 金星 耳。 晨 「启,从户 昏 度行 如鄭言,是 ,與毛傳 晨 从 口,開 于開,依字當作启。 度 合,最得之。 金 則 星 在 也。 有 日 哉 晨 西 啟,從支启 度 行 又案《説 無 香 《集傳》 昏度 度 則

祭器 箋取 毛 之畢,取 説 焉。 而 有掩兔之畢,傳 施 象于畢星,而 疏 罔 兼 焉, 存二説,又 蓋 右 鄭 掩 取 兔之畢,又 也。 引 焉。 孫 今世 毓 有祭器之畢 語 謂 則專宗 取 象 祭器 于

在 雖 北 説 南方,直是 己之語 蓋 人之東、西言 有之,然 因孔 維 也。 北 箕 亦微 疏 有 案, 西 有 、斗」,朱《傳》兼 而斗 矣。 「箕斗並在 南斗 則 此 東 況上章言東、西,原以 與箕 章 耳,其爲南、北之分, 維 皆 南 南 以 南斗、 方, 維北 初 箕 秋昏 自 南 北 斗 當 見於 而 斗 與 枫

> 以 之同 北 斗當之爲允 意 何 偏 以二 星 相 較 而 分 南 北 ? 源

> > 謂

四月

當矣。 數 怨,文王之師 先祖 行役不親祭祀,攝主修之,亦未有闕, 亦無此意,因 修子道」。 月行役,六月未得歸,闕 詩》止以爲歎行役,嚴《緝》 月之閒而以 ^ 獨非人乎? 四 毛傳質略不 月》篇,當亂 孔疏 引 ,猶采薇 爲刺?」孔又自言「首章始 孫 非 毓 王何忍 之, 明,王 語 而 以爲敘 而行,歲暮乃 謂: 行 一時之祭,故云「我 肅 不恤我,使我不 役之詩 譏 述其 其未 不言征役, 從 意 征 、盡詩 也。 以以 歸 踰 豈 年 爲 意 有 又 乃 傳 得 四 韓

然詩 情 也。 子之思祭。」則王氏之解,歷有明徵,仲 時之久暫乎? 者,雖久何傷? 何 月》,見征 伯會公于 漢」,定應身在南國,故有斯語,獨非征 文相備,往往有之矣。 冬兩祭俱廢,其爲當怨,不言可知。 案,疏言敘、傳不及征役,則 《孔叢子》記 一證乎? ,當時被役之人,必有不 時未久,而引文王《采 秋 人託 文王之出師 日 Ó 冬日之下, 役 , 棐, 欲其 興,恆 一根 又《左傳》文十三年公自晉還 瑜 孔 Ŧ 子云: 時 一之忍。 據 至若 ,所謂説 時不 思歸祭祀,不欲如晉。 (如晉 目觀爲言,六章 更無 幽 復 敘、傳雖不言征 祭,猶 請 闕 吾於《四 王之無道,不 微》詩 以 平,季文子賦 先 能堪 先民,民忘其 祖之言」? 誠 祭 以 然矣。 彌 相較 爲 命 [月》,見 者,豈 「滔 怨, 應 詩 多 役 恤 則 至 滔 語 則 鄭 一役, 怨 孝 又 四 之 論 勞 江 秋 謂 源 互 下 非

之,過矣。

平。二 爲政 人,雖 亂 平」,箋亦云: 傭」、「昊天不惠」,鄭云: 僅怨也,直是詈矣。 《正月》詩怨父母爲比,不知「匪人」二字, 解 頓挫讀之方明暢,如《節 孔仲達既指爲悖慢之言,而復曲 温 ? 此 柔敦厚,而 不平,又爲不和順之行。」又「昊 「巧言》篇「昊天已威」、「昊天大憮」,箋 夫以 先祖 皆云 邨 夫 匪 九我 傭 己 作是 一人,胡 醫,不 身 先 遇亂之故,至詈 祖 語 豈 寧忍予」,漢、唐、 源謂 ·忍出 哉? 非 乎! 人 諸 古 南 子,忍 「昊天乎 解 口,豈 人文字簡質, 山 者 師 **>** 何 詩「昊 尹 爲之説 先 使 有 弗 爲 祖 詩 我 宋 思 天 政 天 人之 爲 遭 也 諸 師 不 不 不 須 非 匪 尹 引 此 儒 ŧ

● 「一」,原作「二」,據康熙抄本、大全本、《四庫全書》本

嘉慶本改

祖獨 則王肅之解自安,不必更新 傷,當少易其説耳。 呼天,不知 其以匪人屬 之,當云: 亦云 可控告之詞耳。 忍使我遭此 蓋呼天而 皆「昊天」二字讀 可署乎? 昊天 訴之也。 解先 先祖 亂?」呼天 「先祖乎 乎 祖 又 宋儒釋 斷 ! 一,宜也。鄭氏知解昊天爲 此特 爲 若以爲行役思祭之詩, ,下二字自 此詩先祖,亦是呼而 王甚 呼祖 1 呼 依鄭 經,但求詞氣平正, 我獨非人乎? 祖 可畏,王甚敖慢。」 党贵天 也 ,總是怨極 義,爲 指 不可詈,而 師 尹 遇亂 與 耐 王 自 無 何 訴

之「腓 腓 傳 굸 與 「萉」通 訓 則 爲避,《四月》詩傳訓爲病。 本作 腓」字三見《詩》,《采薇》、《生民》二詩 」,義訓既殊,字形亦異。 韓 前前 诗》曰 痱 《文選 於《采薇》詳之矣。 謝瞻《九日詩》。 百 卉具腓。」薛君 訓避之「腓」 今案,三詩 其訓 注 『》李善 病之 曰

> 字人《毛詩》,後遂相沿,莫知改 義,則腓是足肚,萉是枲實,痱 案,腓、萉、痱三 詩》作痱,不作腓,唐世寫《詩》者,誤 病 風 **腓** 也。」今本作 ·病」。各不同。《詩》三「腓」,皆借用也 變也。 謂 腓 變 一字皆 字 加 ', 非 黄 口 也。」毛茛 也。」據 訓 爲 避, 是 李言 病、《説文》云 日 但 正 耳。 論 以《 則《毛 其 韓 又 本

《釋文》: **忕爲大之誤**,信矣。 疏亦云: 也。」以大爲忕,當是後人傳寫,增入心旁。 詩 言大於惡,則 於惡。」案,忕 貪殘,爲民之害,無自知其行之過者,言大 詩》時,原據傳中「大」字爲説耳。 廢 爾雅 爲殘 「定本廢 「忕,本又作大。 賊」, 釋 訓 Œ 詁》 是大 慣習,箋 毛 訓爲大,與 又箋云: 傳 爲殘 云: 語 廢,大也。」《四月》 賊 並 此 也, 無 鄭不 是王 廢, 「言在位 慣 是康 習意,其 大 音 肅 同。」則 成 義。」 誓。 者

述毛本同,孔、陸皆以爲異,殊不可解。

北山

謂 則 杜》、 口 常菜。」《 枸 牡 食 以 杞。 枸 》、《杕杜》、《四 杞 此二杞 華 北 然惟《四牡 ·谷辨《詩》有 春 北 Ш 生 山》箋云: 爲枸杞、未必毛、鄭意 無 可 傳。 作羹茹,安得爲非 月》、《北 *\ \(\lambda \) 三杞, 杕杜》箋云: 四 「杞、非可食之物。」 [月》毛 山》此 以《 小 訓 四 雅》之《 枸 詩之杞 常菜,不 陸《 機,《 「杞,非 疏》 杕 四

傳》「庭實旅 氏疑 人之力,不得云衆力,故 書 此 秦誓 北 兩 Ш 『》詩「 旅 百 力」,但指作詩者及良士,是一 旅 杜注及《後 旅 力 既 力方剛」,毛、 愆 改 孔 漢 訓 傳 爲 亦 傅毅傳 鄭 陳 訓 旅 衆。 引《左 訓 》注 衆。 李

> 因朱、蔡而 旅,人之一身以脊骨爲主,故 通用,古未之有。 放,音偃。 从从。 文始作膂,从月 是。 日 剛 云: 爲 屬膂,取義 耳力、手足力 則 證 旅 膂乃脊骨,人之背脊非用力之處,以 0 與 不 \sim 訓 秦誓》 膂 詞矣。」案,華谷 旅 附會 既 同」,蔡沈《 力 疏 也。」或 夏氏 爲 非 八从旅。 从,俱 陳 惟 又古膂 典 解 力 黄公紹謂 也 説 云: 也,故 旅本五 書傳》宗其説,殆 於 旅 斯 本作 義 言得之。 爲陳,然陳 一衆 亦 日 爲 百人之名,从 膂 吕,象形,篆 力,如 通 衆。 力。」此 膂通 嚴 膂、旅 集 目 力方 力、 緝 特 作 力 非

「促遽」反也。 意自 次二「或」,「息」與「行」反也。 「逸」與「勞」反也。 [相反。 北山》詩連用十二「或」字,各 首二「或」,「 又次二「或」,「湛樂」與「 又次二「或」,「舒 燕 與 又次二「或」, 「瘁」反也。 兩 遲 或 與 畏

也。 呼召 發 也 呼 反 召,正 其 ,故《釋文》號字讀 今號字讀平聲,言 也。 ПЦ 號之義,毛訓 劬 終二 勞之事, 或, 深居 呼召 去聲,協平聲。 不 閒 聞 暇 安逸,不 ,孔申之爲 之 所 與 元 以 爲 聞 煩」 安 徵 叫 夫 逸 黴 呼 發 反

實。 異 同 也 ,殆未然 促遽必 掌、毛云失容, 其 釋鞅爲負荷,掌爲 失容, 鄭乃 鄭 以 云 申毛 促 奉 一持,正 遽, 耳。 語 孔 促 異 云 遽 而 意 之 旨

之聲,義亦可

通

爲 類 爲 意 也 任 己,所以 異。 類 事者置身事内 則 風 議事易, 刺 如 圃 應 陸 鄭 義 如 八音風 音 較 字。 暇 而 風 優 而 任 矣。 而《釋文》「風 乃 此一出 乃 事 勤 風 風 難。 也。 刺 逸之風,與 人風 議 之風,與下「議 又箋云 事者 議」與「靡 音 立身事 諷 上出出 風 典 猶 事 外 爲 鄭 不 放

無將大車

《詩》,每 外 乘 役意 傳》以爲 此 미 也。 與《荀 傳》引此詩,以證 見 乎? 古 無 況是興, 義 執 子 將 行役勞苦之 相 大車 大 詩 傳 車 大略 詞 ·, 牛 非 如 》,敘 爲準,此 賦 此 篇》引《詩》合。 車 所 也 以 樹 也, 非 詞 爲 非 篇 二大 以 恐非是。 其人,亦同敘 家之説 詩 任 夫 詞 重 侮 非 何 將 又《 也 嘗 朱 行 小 韓 子 有 役 ^ 所 行 説 集

聲。 文》: 小明 氏《詩詁 熲,火光也 也。 熲,火光 不出于頻」、《集傳》曰 耿,耳 》始創 在 憂 亦作 也。 著 爲 中 此 頰 耿 解 耿。」 从 耿 也 火 然 朱子 並 頃 从 不 無 聲。」《 耳 能 用 : 小 出 以 烓 明 釋《柏 也 潁 之訓 口 玉 與 迥 篇 切。 案《 耿 舟 同 説 錢 省

二七八

此 此 彼 丟 詩 三耿 「冥冥」正相應,義本優,不必易也。 耿」重 則當云不 「使 人人蔽 文, 爲 出 闇,不得 貌 于 狀狀之 小 明 出 7,成 詞 于光明之道。」 猶 何 語 可 平. 通 施 鄭 於

小明

觀《書 《左傳》言「許 於明上,以 必是孔子删之,故無聞耳。」案,此説非 明》、《小宛》、《小弁》亦然。 歐陽氏 《小明 《小雅》有『明明上天』,故名篇者,加大、小 黄鳥》」、《國語》言「衞武公作《懿戒》」, 詩 (),所 名「小 非之,謂: 金 一縢》言「公爲詩,名之曰 記 以 明。 别 穆夫人賦《載 别 也。」蘇氏 於 鄭以 「《大雅》有『明 () 大 爲 八雅》 亦 幽 其在《大雅》者, 之《召旻》、《大 謂 王日小 馳 「《小旻》、 明在下 其明, 鴉》」, 人賦 是。 可 而

《小旻》所 矣。 之不能高飛, 鸒斯小鳥 若歐、蘇二家以 然則「小」之爲義,縱未必 裘》、《揚之水》則三見,何 《國風》同,而《白華》之名,兩見於《小雅 《杕杜》、《黄鳥》、《谷風》、《甫 見作 鳴鳩、鸒 「小」,此與「日小其 記別哉? 預知幽王之世,有作《小明》者,而加「大」以 小宛》、《小 或 百 風》之《柏舟》、《無衣》,則 《大雅》之《大明》,作於周之初年,安得 又案、《小旻》、《小明》,鄭皆 詩 + 時 斯皆小 一篇,並 篇名已定。 刺,比於上二篇爲 且《詩》篇重名固 弁》,鄭 鳥, 爲 是 别於《大雅》,萬 無 幽 明」之説, 作者 發 王才智卑 康 而甚樂,歎宜臼之不 知,疏 成云 自 獨 如箋、疏所 甚多矣、《雅》之 爲 不 小,故 俱 推 亦 名。」 田》,名皆與 爲 迁 其 有 兩 記 關 曲 旨 訓 取 無 斯 似 見 别 雎 難從。 云, 釋 名於 此 鳴 也? 以 言 敘 羔 鳩 爲 以 至 箋。 理

如。意較平正可用。

之矣。 同, 燠,述毛者未必得 莫,不指二月。 新舊代禪之時,《 論之,毛訓「除」 除」、「方燠」爲 聿云莫」。 除」,三章云「日月方燠」,又此 云「二月初吉,載離寒暑」,次章云「日 《洪範 **艽野」,則** 昔我往矣」即指始行,「方除」、「方燠」即 且 引《爾 鄭以 小 與 然鄭謂二月 明》首、二、三章,皆紀節 下 雅 燠日 與毛 述毛者皆以二月爲 章 二月爲 ***** 方方 四 四 爲 寒,寒爲冬,則 又二 異 唐 月,釋 月爲 燠 也。 除 始 毛旨矣, 風 始 月天 陳 **学**日 行, 行, 相 余」。 今總 生新,二月仲春, 「昔我往 四 應 與毛 月 氣 月 不如 也。 兩家之義 除、 其除」,自指 方寒, 到 兩章皆 燠 同 |矣| 爲 始行之時 艽 余 鄭 前 爲 孔 候。 野 夏。 字 讀 不 疏 了,則未 釋 三云「歲 異 得 月方 除 初 首 日 而 得 音 爲 言 歲 非 較 到 方 是 章

既到 當。 天 冬,作詩 天」,《爾 詞 īfij 向 **聿其莫」同,彼** 「二月初吉」也。「歲聿云莫」,與《蟋蟀 暑」,總計其自始 除」、「方燠」,追憶其 月初吉」,正 巳月始行,至丑月尚 夏四月也, 月,周二月也,建丑之月也。 由暑迄寒矣。 向莫也。 末之詞。 起 也 興, 時 凡《 一月 因 者 詩 雅》「冬爲上天」,而 歲莫在十月,九月實未莫, 訓 是已九月 述 指 建巳之月也。 往 》中「昔 爲 指未 所 所 爲 建 疏 暑 見之天以 至之地,紀所 到, 丑 以 行 得 即「方除」、「方燠」, 我 之月,故 暑退 爲 至 歸 不太迂乎 (始行 未 往 九月,聿 不 得 而 矣」,皆言 得 丽 作 之時 歸 \sim 起 寒 小 歸 詩 首 IIII 興 丑 來,亦 《爾 故曰遂莫,言自 訓 之時 值之時, 之時 句 也。 明》大夫當是 ? 作 月 遂。 詩 云 始 於 雅》余月 源 「載 也。 也, 耳。 遂者,自 出 既 夏 明 追 謂 時 以 時 憶 寒 詩一 而 明 時 離 之 歲 方 總 H H 寒 爲 即 非 此 始

月當 也。 菽 章「昔我往矣」,是言始行,鄭又誤以 始行也,鄭 是當二月朔而 野,不言始行 第如 計 至艽野」。 之久,不 方除」、「方燠」爲二月, 我往」之誤,不 我征 夏 其 或執詩無周正語,謂 Ē 建子,冰 此 離 徂 言 ,二、三章又追數始行之期,見 家之日,以 西,至于艽野」,自言 過即首章意 之,必 後儒 云二月 壯 也。 多取 追計其已歷寒暑,不言二月 知 地 丑 其二月始行 「二月初吉,載 坼之時,安得 月 起 朔始 七毛而 方 曲 下憂畏之意。 歲 暢之耳。 行 舍鄭,然但 二月 而 莫,聿 不 之誤,故 誤 顧 西 是卯月。 有 ·莫爲遂,莫 矣。 義 然 征 離 蕭 之難 知 寒 而 則 首 可 爲 皆 鄭 暑 首 至 離 章 夫 以 往 通 訓 艽 童 家 次

毛、鄭釋《鼓

鐘

》篇,皆

以

爲

幽

E

作樂於

鼓 鐘

伐而平之矣、見《書・費誓》及《史記 終不 也? 居注 幸之 不自 徐夷、 於淮上? 所缺,幸存於 以 緝》亦言古事 淮 《詩》即 爲 上。 爲臣 乎? 事 往 史與 又淮夷、徐 淮夷已 史也。 歐陽疑 胡 初無 也。 經 吁,謬矣。 氏 不 異 經,豈得 能 然, 灶 固 不 成 斯皆篤 史無 猶當 爲 王至 有不見史,而 Ŧ 夷之在周,特叛服 ___ 何 周 時 幽 由 數之,如 幽 淮、徐之 臣 淮 論。 舍 反 王 保 一,宣 夷、徐戎 王十一年中巡 史 東 疑 其不 胡 而 巡 經 王 一桂 信經。若史之 事 後 事,豈得作 遣將 而 因 代實 信史? 並 經以見者 謂成王 興,伯 至淮、徐 征之, 不 世 齋辯之, 家 常 録、 禽 非 起 游 樂 時 亦 又

可

穫

《通 自 往 不 也 臣 征 鑑 外 淮 周 紀》云: 北 也。 召公征淮 ,則徐方來 常常 成 武 E 南 詩 庭。 年 則 宣 周 疆 《詩》有 王 公定 理至于 親 奄 征 及 未 明文,胡 淮 南 夷。」 嘗 海 不 未 未 Ŧ 自 嘗

湯湯。 言 水 釋三洲 繼之,殊少畫 解 也。 刺 先後也。 湝 可居者曰 幽 其 一階 王之久於淮上 湝 流 而 又繼言「三洲」。 湝」與「三洲」 鼓鐘》咏淮水,首言「湯湯」,繼言 後 湝 連 三洲,淮 則 見 洲 水水 忘 且此三章 於 。」可居之地,必有 返 ,直是: **一**矣。 流 義 也 上地 難 也。 出没 通 皆祖 也。」與毛意異。 蘇氏 止刺 又蘇 名。」初不分水之盛 毛傳云: 水 洲, ^ 毛 奏樂之失 爾 曰 中 説 説 水 雅 沮 雖 落 尝云 湯 洳之場耳 人民室廬,若 新 又引蘇 而 巧 湯,水 所 湝 洲 미 ^ 耳,非 喜,然 小水 集 見 湝 語 非非 傳 也 盛 中 以 衰 猶 湝

可居之地也,何得謂之洲乎?

乎? 《集傳》 文釋之。 況 不得詩旨 止也,至 則是作詩 猶」,皆指 宜,至信 思 者 又案,懷之爲義最 懷 止 用王氏説,以爲思古之君子不 而 宋儒必欲概以思之一義,故往 也,來也,皆見於《詩》,傳、 允不忘」,懷,至 是「懷」 者自謂 淑 不可忘,與次章「不回」、三章「不 君 與與 耳、經文「允」字不 子言,箋、疏 下二章文義不 多,思也,和也, 也 0 用 本 禮 無 箋各 樂 倫 能 誤 得 志 也 往 隨 其 安

磬; 終,比 節 之卒章,謂 鼓琴,笙磬同 合樂三終,歌 鄭 歌 樵據《儀 節 以 閒 凡奏 瑟 音 歌 三終,歌 禮》作樂之次 樂 者也 次 ^ 有 節 南 四 笙 已上 笙 節 人三 所 相 : 皆 謂 禪 首 ., 所 以 |奏《雅 「以《 終, 節 解 謂 輔 升 雅 鼓 歌三 笙 鼓 **>** 鐘 以 瑟 以 四

禮》而 用之 所咏 歌、 未 禮》、《禮記 夏》、《湛 禮 射》、《大射》者則已略,此 洒 之文,盡周 具於亡 及《新宫》、《肆夏》、《陔》、《勺》等數 詩 南 概 也。 禮 口 合樂四 ~樂 、天子 見。 知 *\<u>\</u> 篇之文, 者 人樂者,二《南》各三,《 一篇,而 要 (禮》 節 又《詩》三百篇皆 露》、《彤弓》諸詩 也 燕 與 至《文王》、《 心 作 》、《左傳》,而 家奏樂之制 節 $\check{+}$ 禮 詩 非 樂之 性性 旰 今不可考矣。 無 傅會而 》二篇文耳。 章, 鄉 文手矣。 鄭 此二 事 飲 未 之 酒 也 必 傅 一篇爲 爲之説 清 與 可 與 其 會 儀 侯 乃 廟 可 所用 彼 鄉 爲 乎 詳。 或 禮 》、《振 鄉 歌 升 鄭 所 或 小 朝 哉? 一》弗 之 或 也,其 歌、笙 至 欲 哂 聘、 雅 據 同 其 燕 稍 禮 此 者,《 矣。 也。 執 : | | | | 載 羽 見 見於《周 詩 也 燕 也 平 《鼓 此 焉。 》、《九 (見《儀 於《 十二, 一,其 外 非 ? 鄉 其 品 鐘 一篇 品 所 雖 蓋 餘 鄉 閒 王 飲 真

然未必是鄭

意

諧。」 器, 毛。 磬爲 器 瑟,備金、石、絲、匏四音,以當八音之半耳 箋言八音,故分笙、磬爲二,使 則笙乃磬名,信 笙 ,其申鄭,以 磬、 未見其 亦 其 (東方之樂,明是阼階之笙磬,見《大 笙 雅 與 釋「同音」云: 一磬 (傳「 然 南 同 四縣皆 音」, 也。 笙 俱 爲 不 與磬爲 箋不 一器矣。 孔 合 同一語 「謂 疏 古 解 申 義 一器。 意 堂上堂下八音 「笙磬」,意 毛, 辯 至箋之分 相 見 以 合。 與 案,傳 下 笙 鐘 條 磬 孔特見 及琴 対機 爲 爲 必 訓 克 百 笙

雅 文、武 雅樂; 謂 籥 、小雅,詩六義之一 樂, 雅是二《雅》,南是二《 以 ,異於毛,不 傳 雅 南 義 者, 以 允 南, 矣。 四 以 方之南 可從。 鄭 籥 以 也,非樂名也。 不 南》,舛謬 樂 僭一, 雅 宋 爲 蘇 雅者, 萬 籥 Æ 舞 者 復 尤甚。 自立 羽舞 與 先 樂以 籥 E 説 大 之 之 分

賦》。 《雅》矣。至二《南》之南,猶十五國之國 云 毛傳 代皆雅樂也,四 《文王世子》之「胥鼓 \(\bar{Z}\) 六代之樂,舞四夷之樂,大德廣之所及。」六 之義,三家《詩》説皆 文王之樂,俱不云二《南》也。又案,雅、南 樂。《左傳》之「南籥」,襄二十九年。 周、召不足以盡之,故不言國 目其 雅名,則《風》、《雅》、《頌》皆得奏之,不僅二 不得與二《雅》並列于六義,況樂名乎? 以雅以南,韎任 和 於雅,以其人聲音及籥不 亦云也。 注劉淵林引《韓詩内傳》云: 地而言也。 「南夷之樂 毛 詩 又《後漢 無 夷 當時所采詩,或得 日 朱離」,注引《韓 則 「韎任朱離」之文,蓋 南。 南 南」, 與毛同。 樂在其中 • 陳禪傳》引《詩》 四夷之樂, 鄭氏 而言南耳,尚 《文選》《東都 釋 僭差也。」又 也, 杜氏以 爲南夷之 一詩》薛 于南 「王者舞 惟 德廣 南 國 也 見 君 爲 云 語 可

南爲南夷,古義皆然矣。又有辯,詳《總詁》。毛,而齊、魯之詩,復備列於四夷樂名,可見《齊》、《魯詩》。」即注語觀之,薛君南義既同

用協。《集傳》:「僭,協七心反。」案、《釋文》、《集傳》:「僭,協七心反。」案、《釋文》

楚 薺

《黍苗》思宣 成,一中興,皆周家令辟,尤詩 名者、《楚薺》四篇思成王、《 葉》,凡十三篇,敘皆以爲思古詩。其可指 瞻彼洛矣》、《裳裳者華》、《桑鳸》、《鴛 魚藻》、《采菽》、《都人士》、《黍 《楚薺》、《信南山》、《甫田》、《大田》、 王 也。 此 三王 者, 魚藻》思武王, 開 人 所不能忘 苗》、《 創,一守 為 瓠

+ 當 三王 情 不 者 《瓠 外 偂 矣 外 此 葉》又思及 其 有道之主,僅 餘 惟 敘 ^ 黍 稱 其 苗 古 **>** 民 王 則 有 兼 不 康 思 知 Ŧ 其 詩 何 臣 屬 人 所 都 要 指 人 以

錯 詳 之 平. 也 時 也 口 車 深 屬 野 、,元、白之詩,多 娓 ? 謂 脱 读 詳 錫 刺 在 雅 娓 命之有 楚 又人 死 杕 楚薺》以下 固 詩 此 不 語 薺》 麢》 杜 無 有 平 休。 當 見衰 風 ? 少 不 多 敘 諸 章 刺 衰 和平 可 以 嗟 班、 篇 世之意 安在《楚薺》十篇 之意, 亂 十篇,朱子《 爲 怨 泥 禮文之必 所 之時, 咏 張 傷 一之語 之 其 言 開 之 詞 今思古 如 詞 ,似矣。 .) 賦 祭 元 《行 道 出 者。 列 喜喜 典 之 谨 大平之樂, 於正 勝 之 手 辯 露 ^ 述 報 不 采 然 肅 事, 説 × 西 不 功 風、正 應 詩 當 薇 ^ 京 農 皆 可 標 恤 人 + 是 謂 *\ ~ 此 之 腎 政 必 爲 梅 寓 篇 其 TE. 雅 之 之 意 盛 刺 出 意 相 雅 和

> 多乎 厚 詩 之情,已 亦 ? 非 民 躍 愛 手, 物 然言外矣 之 + 恩 詩 詞 者 煩 當 特 而 日 不 思 斑 古 殺 爾, 非 感 乃 歎 訝 無 其 作 聊

於變詩 經 得 詩,其精 變,分於時 風》之《七月》、《 爲 變雅 也,安得 朱子 ? 深 文 ? 且 宏 之治 云 粗淺 海,不 斯 百 言誤 亂, 雅》之《六月》、《斯 儉 篇 \sim 减 炳 皆 楚薺》 不分 矣。 於《 之詩 經 ^ 楚 也 於 風 詩 而 薺 詞 × 精 爲 不 \forall 之工 經 論 深 雅》之 何 哉 宏 Œ 以 Ŧ 變, 拙 博 皆 Œ 也 爲 諸 何 列

耳 之薺。」蓋 文穎 (大全) 趨 ·, 其 以 義 注 《采齊》、《肆夏》,先鄭 采 則 載 漢 齊」,康 異。」 謂 劉 書 齊音當 瑾 非 語 謂 成 皆 日 以 注 采 讀 云 爲 如 齊」 逸 灰 先 即 注《 耳 詩 儒 齊 ·, 孔 周 以 楚 當 禮 疏 薺 爲 惟 云 楚 \checkmark 詩 楚 玉 劉 音 薺 藻 忧 即 同

《采齊》。」豈誤讀康成注乎? 何闇於文義

至此

蠅》以 則二 通語 之閒 純引之,正見凡艸木有 之棘。」合此二文,策、 也。」《方言》云: 方言》注 茦, 東 有 耳。 詩之棘,當泛指 謂之萊,自關 ^ 刺 棘 棘 詩 -0 爲 緝 《橘頌》意本謂橘枝有若棘, 云 是酸 》言《 樊,必非 案,「茦, 棗。 詩 「《楚詞》 凡 而西 有二 啪 《楚薺》以 酸 刺」注云 , 艸木刺人, 木刺 刺者、皆可名棘 刺 謂之刺,江湘之閒 棗, 日「曾 棘。 信有 當是《 人者 枝 棘 棘名矣。 吹 北 剡 配 彼 爾 燕 艸 八棘』, 薺 棘 雅 刺 也。 朝 而 心 **>** 景 之 青 亦 又 謂 鮮 鍼

又云 爲鬼 云 神 「安而 神 神 稱 保 保是 號 蓋 響其祭祀。」未嘗合神、保二字 也。 饗」,毛云: 戸 之嘉 朱《傳》 號 既 則 從 「保,安 又 毛 非 訓 毛義 保爲 也。 安 鄭

> 尸 今詩中 巫也。 是以 身耶 故因 瑾 字,古人原不 得賢好之巫 姱」,王逸注云: 比 羣巫之長也,其 職,豈可合爲一乎? 至尊, 申之日 肩 行、況尸 ? 巫 以 神降 降神 不 號 朱《傳》又引《楚 將祭,始 説 户。」夫尸以象 乎 之稱。 ımi 巫 與 ·用 ? 一,當 祖考之神,降 託於巫,身則巫, 神 爲 秩中士而 又案《楚 相 1 从 便是尸。」案,此 靈 朱子又曰: 保樂 號 而 《周 巫 得之,巫 詞》「靈保」證之,謂 神耳,神豈真降其 也。 禮》有「 也。」則「靈保」二 詞 已,不敢 而 姱,好貌。 安於尸之身, 思 賤 而 司 靈 役,有 與祝、 誤 心 靈 保兮 巫,乃 保, 尤 則 甚 神。 賢 常 神 思 中

則 也 殺而 奉 縣 加 鄭 毛訓 進之, 讀 肉 「肆」 於架,分齊其所 肆」爲剔,言剔 此 爲 既熟 陳,「將 時 也 其 爲 當用,此 骨 義 齊。音 體 各 有 於俎,「 劑。 屬 未 熟 謂 將 口 時 既

互易。朱《傳》「肆」從毛,「將」從鄭,於事爲

言孔碩 鄭 心舌。 俎,薦 之爲 俎 炙合爲一事,亦 非之,以 ,已具上 解 用多端,有薦 熟之俎 爲俎 肆」「將」爲肆骨體 而 也 爲 一、燔炙皆從獻之物,故名從獻之俎 章 是薦 孔碩」,鄭解 然鄭 0 有 又有 熟 此章之 以 之俎 理 腥 碩 也 斯 之 爲 其 爲「從獻之俎」,東 俎,謂之從獻 俎 肥 因 (新 而 一,薦 碩 燔 進 一音。 肉、 之,則薦 爓 亦 炙肝 俎 通 余廉 所 切。 不,不 案, 熟之 與 以 燔 載 之 萊 俎 口

其 同, 嚴 彊 熯 字 氏 順 通 此古義 引《王 常訓 乾 我 何 義 孔 必 於 也。 與 風》「熯其乾矣」、《左傳》「外 熯矣」,毛以**熯** 以 詩 詩 筋力既 也。 吕《記》從《説文》訓 意 遠矣。 夫敬 竭, ^ 而 見 集 爲 不 盡 傳》 敬, 愆 禮之難 於 訓 與《 禮 竭 乾 阚 蓋 彊 哉? 文義 此 雅 中 欲 乃

乾」語以證竭義、尤費力

物之器。 體 鄭非 既 生音皇。 改字也。 匡」之匡 聲。 一、箋訓 医本訓 今作 爲 王 筐,蓋筐乃匡之或 飯 一,隷 器,从厂 省也 音方,受

詞,遂 祭祊、 雅 禮 禮》、《戴記》,而 受嘏、利 牲、少牢、士大夫 缺,天子、諸侯 少牢禮 : > 諸 也。 篇 鼓 楚薺》所 判 又謂 资 鐘、迭尸 成之類 此 何 天子 詩 侯 非 爲 咏,皆 國 祭 之類 亦 是 天子 詩 公卿 大 禮 禮 見於此詩 也 不 夫 無 天子祭禮也、《儀 推 詩哉 力 是 應列於《小雅》,夫《小 所 存 其 類 也 農 行,非天子公卿之 焉,故箋、 天 以 奉祭之詩 子祭禮 者, 明之,如 朱之據 則 如 疏 少牢 不 載《周 禮 剥 燔 引 知 嘏 特 廢

金 鳴 奏,以 鐘 鼓以送尸」,是已。 鼓 鐘 鐘 鼓奏《九夏》」,《肆夏》其 送 尸」,鼓 與 鐘 ^ 周 禮 器 鐘 也。 一也,尸 師 疏 「掌 云

相違 出 爲公卿奉祭,而 之金奏,而掌以 人奏之。 定戾。 《名物疏》駮之,允當 雖鐘 復 鐘 鼓 用《鐘師》文以 師 偕 此 作 '', 仍 王 禮 以 也。 鐘 釋 爲 送 集 主 戸 傳 故), 自 以 謂

信南山

雅 王 時,武功多於文治,禮樂制度尚有未遑。 詩人追思者,孰 之名,周之後王皆 曾孫,傳、箋指成王 始號太平。 公攝政之六年,制禮作樂,頒 不能修成王之業」語 及《周 時 所定,康王以後坐享其成而已。 信 頌 南 》,文、武 Ш 疆理之法,祭祀之典,大率皆成 * ^ 有 甫 可 如 ,因《信南 而 田 稱。 也。 成 × 下止有成王 王 東萊 令大 然周 一哉? 田 山》敘 度 之後 非之,謂 文、武 量於天下, 詩 王,可 有 詩, 故 開 曾 餘 幽 皆 周 後 TE. 當 創 孫 Ŧ 咏

勝

焉

則《攷 路,理 之宜 下田宜 畝 疆義 地 大界,理 物,各以 疆,分土地之宜。]又云: 理,分地理 王 疆理」,孔疏之解 所宜之理。若《孝經》注 弗及焉 文 而 有 義 爲 我 工 布其 辨。《左傳》云「先王疆理天下物 稻麥」是也。」案,理字如此 土宜」,與此詩 疆 記 相 遂 爲 也。」正 我 接 溝 溝 》有 利」,成二年。 則思古者惟 理」,傳云: 耳 洫 塗; 水水 然 澮 義申之云: 亦相 ║ 屬 非 劉氏以 古義 理 傳、 符。 思 彼 杜氏注云「布 孫」之 疏同 三云『高 成 「分地理者,分别 徒 也。 疆 宋 疆 王 取 爲 王 義。 語,劉 若 與 「正經界之 畫 固 田 夫 氏 其宜 解, 論字訓 宜 經 南 畛 以 《縣》詩 界 黍 氏較 塗 方與 東 疆 殖 也。 也 其 道 爲 之 土

稽古編卷十五

説之疑,亦太苛矣。

説

哉

且

敘 語

不類《詩》者,朱子既以《詩

無此意

置

而

弗

、用,其類於《詩》者,又有生

吴江 陳處士啟源著

甫 \blacksquare

甫

田

之

什變小雅

語 寫》敘用「彼交匪 惡、《裳裳者華》敘用「似之」二字生説、《桑 彼洛矣》敘以「命服」爲賞善、「六師」 者多矣,彼果欲傅會 年」生説、《大田》敘用 朱子譏小敘,謂《甫田》敘用「自古 欺 後世 也。 敖」生説,總謂 然小敘之文,不與《詩 ,何不每篇用 「寡婦之利」生説 其傅會《詩》 語 爲 以 》類 膽 生 罰 有

> 案,小敘之古,指成王時也,《詩》之「古」,與 説哉? 「古」乃《詩》之「今」,非《詩》之古,豈用以 山》推之,謂此 譏之,以爲敘專以此 古,古字偶與《詩》「自古有年」同耳。 朱子 以爲思古,不獨《甫田》然也。《甫田》敘 「今適南畝」對,則指成王以前。 楚薺》、《信南 古 亦 山》、《甫田 禹,理 立説,斯深文之論矣。 或 然 》三詩, 疏以《信南 矣。 敘之 敘 生 思 皆

右以 優。 髦士」以爲進髦 外立説紛紛,雖 如「今適南畝」以爲王之觀稼,「攘其左 《甫田》詩毛、鄭 爲 饋 饁 之 物物 亦 士而勞之,兩「農夫之慶」以 短長互見,要不及古注之 者,子由之説 異 解 後儒 又於 也。 「烝 毛、 我

然。 曲 取 大古豐年之美、成王農政之詳,次章又備 爲 近之,其「攘」、「嘗」二語,姑從近義 是言矣,不聞 下,誠爲厚意,然一人有慶,兆民賴之,古有 亦非勸勞矣。 止」一章,不已複乎? 報祈之禮,至三章始及省耕 今適南畝」即解爲王之親行,則「曾 見 俱 賴農 而 源謂 可通 上下之相 較之王、述毛。 夫之福 一,但詩 首章傳義不可易矣,餘三章 兆民 賴農 親 而年豐者, 人立言,當有次第。 摹寫 有慶,一人賴之也。 夫之福 鄭易傳。 適畝 情 紫陽之説 事, 而 不 之解,差 勸農之事耳 有 指 雖稍 年,歸 E 可 一,則 嫌 也。 首章言 爾 烝 孫 則 爲 其 惟 美 述 鄭 自 纖 攘 於 晕 來 文

甫」爲丈夫 十千,言多 十千」合一成公田之數,似勝耳。 首章鄭易傳義,而孔 也。」王 以 取 陳」爲 肅 孫 験貰 疏是之,然鄭惟 毓 皆從之。 世、 毛云: 其 以 以

> 亦云: 貰,不如傳言「尊者食新,卑者食 田二 年豐治功,所以美大而成定也。《生民》傳 尤屬 者爲農夫耳。 指少壯言。 有 草」,傳皆訓 以丈夫爲 「止」爲定,言治道 老壯,示孝養之道也。《七月》詩「農 介」爲舍,皆彊 常典,但盛世家給人足, 即大田之義也。 臆 説。 「介,大。止,定。」正 田名,則太迂,不如傳 老者不任耕作之勞,故專目壯 不如 大, 至以「介」爲廬舍,字訓無 立異也。 大實甫之恆 王 所大、功所定止,蓋太平 肅 《齊》「甫 述毛,以「介」爲 甫、父 民 義 訓 田」、《 或無 矣。 本 雖 此 陳 謂「天 同 雅 一,别 藉 夫」, 補 義, 於 助 大、 F 賒 亦 其 固 甫 然

休之注《公羊》,范甯之解《穀梁 畝,是爲八百八十畝,餘二十畝 之法,皆以爲 韓詩外傳》及《漢書 八家各受私 食貨記》論 田 百 爲 畝,公田 趙 廬 岐之注 舍。 井 + 何 H

九〇

治、共 野外 況 公田 儒,又失鄭旨 鄭氏《匠 之,安得爲同 十畝 是九之中税 (信南 孟 甫 孟 1.共治則推諉易生,分治 ,内外 家 子 田 子 舍 之 百 皆 爲 八治 同 Щ × ***** 廬 畝 廬 私 孔 爲 皆指 三》中 一人》注 俱 養 通率 宋 舍,則家 疏 以 説 百 者 私 可 均 據《孟 一,國中用 便 由 īffi 畝 此 養公 H 言同 之 爲 就公 並 田 有 源 失 ? 忧 百 什 説 無 案, 其 廬」及此 事、《七月》「亟 别私有百二畝 畝 H 不不 子》之言以 家 此説 田 非 本 , , 樂 ? 孔氏 取 公田 必 百 旨 故謂之徹。 貢法,是十 孟 緯 公田 俗俗 又謂 斯 八 畝 × 子》 以此言 詩鄭箋解 諸 三十 家 勤 統言 以 皆 翠 儒 + 聚 郊 惰 規 鄭 以 皆 畝 以半,何 外 於 畝 其 非 其 可考,若論 之耳。 其 意 爲 襲 一處 大 失, 篤 用 之中 各 將 乘 班 攸 同 然 其 數 論 助 自 屋」、 得 焉 於諸 固 謂 介 也。 耳 也 謬 法, 分 給 取 税 治 m

> 爲八家 其餘皆 説 也,其 竈 或 田 百里 通 丽 立 禮記 矣 廬 藉 外百 率 税 法 者 爲 之 舍 而 V 地 里 共 九 百 什 無 Ě ,多寡相 不 僅 意 治 税 爲郊, 義 mi 弊 方 與《 而 税 八 亦 , 什 於 白 則 孔 • 百 仍 漢 里 義 分 郊 縣 約《孟子》、《樂緯》之言, 氏 八十畝 記 者 而 通率之,安得爲什一乎? 則 治 以 所定也,其釋《王 既 **>** 尤 四 善 税 内 同, 非王 耳。 矣。 疏 所 ,以外二 蓋 者,才居 謂 者 王 九 亦 至 或 畿 無 於 而 不 中 偏之 千 税 郊 一十畝 能 而 白 里 外 守 制》「公 用貢 之四 工,爲方 政,又 , 其 爲 + 國 井 者 中

之神 田 耕之祭也。 也 7 祖 農夫之慶」則 《甫田 ,社、方在仲秋,蜡、 祭百物,臘 一》次章所言祭典凡 社 祭 土 蜡 神, 與 先 必 臘 臘在孟冬,皆報祭 祖 與 也 稷 五 五 俱 御 祀,始耕 方祭 \mathbf{H} 祖 社 也 五 則 祭 官 始 方

尾,其 此 始 章先 耕之祭,以 、猶《信南山》之由 言 報,後言祈,合兩年 孟春吉亥行之,則獨 「雨雪」 之事 而及 爲祈祭。 「霢霂」, 相 爲 首

田

與《生民》「以興嗣歲」之義

乎?

即 且 古今來爲 禮·大司徒》謂之田主,《籥章》謂之田 祖 雅》謂之農夫,此田官也,非 神矣。至《七月》、《甫田》諸詩之田 禮記 田大夫」,「今之嗇夫」。 籥章》又有田 其 田 先嗇 (前身乎 祖 「生而 琴瑟 郊特性》謂 一,皆指后稷也。 是 也。」案, 神農,於田 田 擊 官 爲 鼓, 畯 田 者多矣,安得 非此詩之田畯。 畯,死而 田 以 之先 神爲最尊,安得田大夫 祖 御 則田 田 嗇 神 祖」, ^ 爲 噫 当 祖、田畯,乃一 而 死 神 田 嘻 名 即《郊 毛云 便祭之乎? 也。 祖。」謬矣。 指神農 不同 **>** 頌 畯,毛云 王安石 及《 特 牲 祖 也 爾 周 田

> 也。 有鼓、鐘、琴、瑟之類,不言土鼓 曰社,曰方,何嘗專樂田 》次章「擊鼓 然此四詩言祭多矣, 朱子 疑《楚薺》 了,以 御 四 H 篇 祖 祖哉? 爲《 曰先 語 與《籥 幽 也。 祖,曰皇祖 雅》, 所述器名, 章 況與公 因《 ·》文合 (甫

卿之説,又自相戾矣。

得之。 具,不必複出也。 養,鄭義允矣。 義較相屬焉。 以穀我士女」,毛以穀爲善,鄭以穀爲 「穀士女」文承「稷黍」下,養 又上章「烝我髦士」,善義已 《集傳》兼二義而主於養,

致。 者, 有 語耶? 耘耨穫時,未 則確指 乃秀實義,不又似穫時乎? 然 曾孫 易 夫 易 來 耘 長」之下,復言 미 止 時 ൬ 治理 矣。 定也。 」,鄭云「出觀農 豈據下文「禾易長畝 長 ^ m 集 傳》以爲 竟畝,信 善 有 事 二,成 二,其 爲 來 而 耘 鰪 爲耕 所 大 耘

耶? 渡, 舍其 氏 夸美之旨矣。 《傳》, 申 則 容車者, 之,引《孟 然 如 以 必高 梁 茨 爲 如 爲 即 廣,故以 梁」, 而 輈 《小戎》之「梁 子》之「輿 取 H 喻 毛云 旬 於車 衡, 比 禾 上之一物,非 其 梁 積。 高 梁 輈 廣 -, 謂 車 劉 能 岢 梁 梁 瑾 别 幾 能 彻 釋 詩 有 容 何 人 ? 據 朱 重 孔

大田

月「善 冬,民 詩 下 短 司 的首言 肥 歳 稼》「辨種稑」、《草人》「物 瘠 命 古 相 出 二既 一皆可以 $\dot{\mathbb{H}}$ 人 Ŧī. 官講求之,以令於民,故 樹 種 地 種 穀 所宜,五穀所殖 證之, 疏 IE. 蓺殖,而 必 其 先 事 相 也 又引《月令》孟 地 地 之 無遺 箋 地 宜 引《月令》「季 相宜」之文, 利。 及《 而 隨 擇 《大田 周 土之高 其 禮 春之 種

> 及豪富 穑之事 化爲 此宜 之民 之種 然見 則 揚 種,試其與南土相宜者,凡山 米、黍子,即古之黍、稷、粱、 固 口 樹之以爲常,其下田 有 見 州 聞 菑 止 高 古 有 面 1金,而 · 任民· 有力者倡率之,以爲民先耳 恃 變通 阜 宜 樹 不 人 越鄉 農 者 之 稻 稻 乎 政 自 爲食,一值 之法也。 水旱皆 自爲之,彼 曲 之詳 ? 要 應 一,豈能 止 ^ 雜 密 周 約 「無患· 樹 矣。 禮 略 遍 仍 源 早 他 老 其 • 以 謂 歷 矣。 暵 穀 後 大概 職 農 秫也,當多取 天 蓺 今 高高 也。 世 方 原遠水之地 雖 下,訪求百穀 稻 北 是 不 氏光言 鄉 耳, 精 則 近 土 在 講 輒 於 所 其 士 墝 日 農 告饑 其 大 埆 謂 江 閒 政 業 夫 其 南 口 地 稼 小

其 改 役 门以以 説 爲 順 順 曾 王 孫 民 事,不 所 是若」,鄭 欲, 奪其時。」 殊 無 <u>云</u>: 意 味,然 一於義 「成 王 允 諸 於 矣。 家 是 蘇 止 從 氏 力

爲

我驅除之云爾。

後人緣此乃立焚蝗之

政、蟲蝗不生,詩人歸功於田祖之神,言若

則生,消之則付於所生之本,蓋明

君

出

加

爲

陽

氣

贏

者、盛陽也。」孔氏申之,以爲四者盛

田

祖

有神,秉畀炎火」,毛云:

「炎火

時也。 所以異乎? 言,不若《生民》詩歷道苗稼生成之次第,故 先有爭甲,而實猶未堅,所謂阜也,毛云 彼詩「實發實秀」相當耳。發管而秀出,則 之「方」,毛以爲極畝,鄭以爲齊等。 已具於前章「庭」、「碩」中矣。 彼連用十字,而此僅 未堅者曰阜」,故兩詩皆以「堅」、「好」繼之。 ·方」,毛無傳,鄭以爲生房,謂孚甲而未合 好」,即《生民》之「堅」、「好」也。 方」、「阜」、「堅」、「好」、 彼生時統言其苗,此成時專言其實, 然則此詩之「方」、「阜」,正與 以四,蓋生長之條茂, 皆指穀 又「堅」、 至《生民》 此詩之 實 實 而

> 《七月》、《出車》、《玄鳥》皆訓 《集傳》以爲古之遺法如此,殆不其 畀者乃人也,非田 訓徐靚、《大田》訓徐,諸 法,謂之善於斷 《詩》中「祁祁」凡六見、《采蘩》訓 章 祖之 則 可,若用 神也, 訓 惟「衆多」稍遠, 與 衆多、《韓 爲 詩 正 解 語 舒 戾 則 奕 遲 秉

信乎土俗各殊,難以 爲食,夏月插蒔,非 黍、稷、粱、秫,故宜此耳。 之世,雨不破塊」者是也。 徐徐則人土深而能生穀,董江都所謂「太平 案,「霢霂」言其小,「祁祁」言其徐,小 餘皆不離「舒徐」之義,嚴《緝》辯之詳矣。 翻 盆大雨,則農夫束手 概論 若荆、揚、惟恃稻 然北方所 也。 蓺 Ħ 名

「不斂筥」亦音穧。」是同一《集注》也,孔以「穧」作「積」。」董氏曰:「崔靈恩《集注》「此有不斂穧」,疏云:「定本、《集注》

如孔之真也。《集注》一書,唐尚存,宋已無之,董所見,不爲「穧」作「積」,●董以爲「穧」作「筥」矣。

之,此 秋而報 令》 案,《 神,此 氏自立説,謂隨所來之方而禋祀之,誤矣。 則與二祭皆不合,恐無此禮。 周 刀 曲禮》 **[箋、疏之義,後儒** 來方禋祀」,謂曾孫之來,禋 • 大司馬 》「秋 時 成萬 時 迎 俱祭也。 謂「天子祭四 氣之禮,此 物。 注引《詩》「以社以方」證 若隨 獮,致禽以祀祊」,乃仲 莫有易之者。 一時 所致 一方,歲 各 之方而 祭 徧」, 祀 四 ,即《月 方 祭之, 獨 方之 也。 董

竟終 何 乃與其婦 集傳》云 獨 日不 茅 田 「家饋 穫 食耶 子 而 饁,乃其常事,非 鰪 餴 農夫相告日 ? 彼 也 ? 穫 且 者。」然 一穫者即 皆 所 未 曾 則 農夫 解。 曾 以夸示 孫 孫 也,相告 來 其 不來 矣,於是 八以爲 觀 者。 饁 者 農

之《甫田》之饁耘,差有據矣。 穫,豈因下文「方」、「祀」乃仲秋事乎? 較

盾矣。 朱子以爲如 爲荅《行葦》,以《假樂》爲荅《鳧鷖》,何周室 荅《桑寫》,以《采菽》爲荅《魚藻》,以《既醉 《裳裳者華》爲荅《瞻彼洛矣》,以《鴛鴦 斧》爲荅《東山》,以《大田》爲荅《甫田》, 君臣上下唱酬 一人所作,又分爲一贈一荅,是自相 《集傳》以《山 出 之 手,則《甫 盛 有樞》爲荅《蟋蟀》,以《破 也。 至《楚薺》 田》已下六詩,乃 等十篇 》 爲 矛

「積」,原作「種」,據康熙抄本、大全本、《四庫全書》本

0

嘉慶本改。

矣

《禹貢》之漆沮,而 澤之喻也。 周浸溉水」,鄭亦以爲水之灌溉,爲明 京,當指雍州之浸以 詩人託興,多取目驗爲言,幽王變雅作於西 云 周 洛 禮 出 ・職 王氏以爲東都之洛,非是。 懷 德。」 詳 方氏》「雍州,其浸渭洛」,注 亦《瞻 起興矣。 見《吉日》。 彼洛矣》之洛 故毛傳云「宗 此 洛水 王 也。 恩 即

載, 士 韎 其 體。 冠 通 色韎 船 服 **载與船,皆祭服** 也者, 韓。 **給」本** 則 見《説文》。 故 無 然則鞸也者,士及大夫以 「韎柗有奭」, 士之所獨 韍 作「帢」,左从市。 而 有船。 謂之爲韎哈。 而 也 異制 一以配 制 鄭 如 訓 者。 榼 爲諸侯世子未 爵弁,見於《士 音弗。 · 而 大夫以 其非祭,則 缺 E 載乃其 所 四 上服 同 角。 或

> 也。 者。 惟士得專之耳,豈概爲戎服之名哉 書》臆度之見,不足信 兵事之韋弁,必非韎 船所配 物,元無確據。 事哉? 韎 服」,鄭云以韎韋爲弁,又以爲衣裳,不言以 爵命之服,王 不然也。 「否」讀 左傳》「韎韋 韋 杜氏訓爲戎服,若袴而屬於跗, 爲 安得以衣弁爲 鞸 爲「幅」, 又爵弁、韋弁, 案、《周禮 也。 跗 氏據《周禮》「兵事,章弁服 《左傳》「跗注」或作「否注 注」之文,而 況爵色微黑, 注 韎 訓 章,而 司 也。 陳 爲「屬」,謂 服》「凡 氏 然 改訓 牽合韎 之爵 禮書》 則 圃 兵 韎 韎 爲 弁。 船 事 色淺赤 戎 船 疑 皆 幅 章 之稱 服 爲 爲 非 有 《禮 及 屬 齫 弁 恐

琫, 爲鞞是刀鞘之名,琫是鞘之上 刀」,毛云: E 鞞琫 飾。 有珌」,毛云: 珌,下飾。」《公劉 「上曰鞞, 下 日 「鞞,容 琫。」 飾。 篇 疏 刀 下不言 鞞 申 鞞 毛 琫 也 以

毛詩稽古編卷十五

《廣 爲 嘗 言 對 皆 劉 珌 云 Œ 疏 飾 在 則 又 琫 《釋文》云 之詞 相 其 高 是 《引《釋名》「下末之飾 ,故傳言上下 珌 ·, 上 鞞之飾 傳 雅 譏 指 下飾。 矛 E l,故言 又 疏 飾。 毛 意 刀之 也。 爲 盾 則 並 之 説 轉,下 耳 也。 何 鞞 無 也 Ē 自 ^ 物 削 今案之,殆不 反 爲 以 釋名》「下末」之説,殆誤 飾、下 。」《説文》曰 相 鞞 飾。 孔氏申之,善達 耶 謂 鞞 E 據 下矣。 鞞 而不言 矛 字 ? 靳, 折、製二音。 則 之室,室 以 與 爲 盾 飾 彼 有 ^ 或 下 規 孔 瞻 文 飾 古文簡 作 飾 毛 飾 異, 彼 \wedge 不 碑。」 可 者。 琕 蝉 〈公劉 然 洛 謂 口 當 得 名 也。 兵》 傳 之 是 平 毛意 非 況 鞞 馮 質 已 玻 ***** 偶 刀 鞞 ? 疏 以 鞞 欲合鞞 飾 不 即 ^ 而 誤。 削 刀室 引 鞛 小 鞞、 亦非 也 爲 鞞 達 以 爲 又 公公 也 解《 意, 爾 字 之 琫 下 《名 此 琫 而 也。」 琫 劉 雅》 飾 詞 義 公 百 物 琕 詩 彊 未 琫 料 EN. 鼬 傳

> 篇》、 篇》 飾 也。 爲 足 阚 切 信 **?** 雅 則有之,則以 而《玉篇 (書》作 字, 又案,杜 當以 廣 宋 韻 蓋 咸 ジ亦 此 據 注 | 同 蠙 詩 注《左傳》以 此 以 以 傳 其 也。 EW 珌 爲 、誤,先 是 疏 爲 爲 即 然《説 爲正 琕 玭 1 F 字,云 飾 與 飾 儒 鞞 玭 文 已 爲 互 琫 同 譏之矣。 蒲 有 上 爲 無 異 飾 蠲 不 下 琕 辩 同 飾 與 浦 字 鞞 賓 , 爲 俱 ≪小 同 玉

裳裳者華

車 此 三章,皆援古 諸 猶 失其禄位 詩 Ш 幽 榮 觀《巧言 華之裳裳 、顯,上 王之世 放故 之 以 × 固 規 有 \sim 而 讒 何 今也 有 光美焉 (裳裳 諂 人 譽 盈 斯 有 庭 者 × 勳賢之家,子 慶,下之亦 矣。 ^ 惟 華》之刺 巷 讓 伯 勳 諂 ()、《角 賢 不 之裔 駟 焉 馬 孫 弓 故 相 前 因 乘

敘所云讒諂者,其號石父、暴辛公之流與?「右」、「有」,子孫當世享其禄,不應見絶也。徒步矣。故末章盛稱先人之德「左」、「宜」、如此。今則不然,慶譽轉爲憂畏,乘駟降爲如此。今則不然,慶譽轉爲憂畏,乘駟降爲

襛,不訓 襛厚,亦牽合而 謂此 爲厚哉? 襛矣 》爲 何弗深考與? 又云「或黄或白」,書傳並無言常棣華黄者。 集傳》既從毛訓裳裳爲堂堂,復引董氏 之華即常棣,則謬甚。 2 裳裳者華」,裳即常字,信矣。然董氏 裳 衣厚以 也 無理。 自 嚴《緝》訓 且 一衣、裳各有厚薄, 證 又甚不倫。 且引《説文》訓《何 詩云「芸其黄矣」, 裳裳爲如衣裳之 衣 厚 何 得 自 語 彼 偏 訓

詩 同 所 而 /蕭》爲 情異 以 裳裳者華》之首章,與《蓼 貴 大子 矣。 論 世,不可以 燕諸侯之詩, 彼爲躬逢,此 詞 害 也。 以《裳裳者 爲 蕭》 追 憶 集傳 相似 也 華 以 説 語

爲天子美諸侯之詩,殆徒以其詞也夫。

内乎? 上宜 外者,無不似其所 耳。《集傳》曰: 子孫宜嗣其禄位。 傳云: |與「有」耳,「左之」、「右之」,可云在 且形之於外者,又何所指乎? 「似,嗣 有。」夫「維其 「有之於内、是以形之於 以 也。」言先 似爲嗣、《詩》之恆訓 人 有之」, 有 是才德 正 承

桑寫

國以 徒 治其歡,政令於是乎成 其敘,家邦、鄉國、内 則尊卑得安其位,親 世,不可一日無 人之樂,而天下之樂也。 寧,四裔以服,天祐之,萬邦賴之,此非 禮文法度,王者所 也。 故君臣 外、大小皆得循其分而 疏得遂其情,長幼得明 以 ,風俗於是乎美。 辨 名定 上下守此勿失, 樂莫大焉,故 分,範 圍 中

之朝, 迁 衍 何以 之「戢」、「難」,君上之有禮文者也。 E 思柔」、「匪敖」,臣下之有禮文者也 矣。 樂 暢 猶 其 見孔 示 動 有 軌物 近以 説 無禮文,則放 疏。 胥 ,保福禄乎? 爲 至鄭 一之可 足稱 皆 語 忧 詞, 以 觀 閎 0 「胥」爲「有才智之名」, 尤無 毛 義, ,人反不 恣 云。 騙 然猶未 義 解 孫 不 趣 毓 然, 如 無 述毛 、醒,故 乎? 所 鶯 不 然 「樂胥 末 爲 幽 之 聊 章 =爲 將 王 之 章 桑

事 名 於 倒 求 語 萬 福 也 福 福反求之。」纖甚矣。 嚴《緝》得之。 來求」,猶 云「自求多 《集傳》 福」, 日 古 人固 無

鴛 鴦

體 也 鴛鴦 交 萬 詩 物 四 有 章 道,不 以 實 僅 義 在鴛 爲 興 鴦 此 之「畢」、 又 興

> 之政 恆 廣其 羅 秣」。 日 固 義。 減 自 舉 ,亦僅以 未易 奉 要之,祭魚獸 以 養 更 概 有 (僕 道 其 節 數 其 餘 9 矣。 略 不 故 而 耳。 止 傳 後 於 田 以 明 乘 漁 爲 E 馬 齊 興 惠 之 愛 而 撙 舉 摧 篓 節 而 復

事,正 戢其 之言妄矣。 於外,左不 傳》引張子 之,舉其雄者而言耳。 右 掩 左,雄 左翼,以 難 鴛 以 鴦 用 釋古 語 在 張 而 相 左掩 梁, 日 豈 經 右 依 . 得 戢其 也 便 於 右 於 故 内 禽 雌。」 目 也 案,《 左翼」, 舒 鳥 』。」果 驗 並 其右 乎 疏 爾 棲, ? 爾 説 雅 言 翼,以 本 * 以 然 則《 IE 此 右 目 阚 驗之 翼 防 鳥 倒 ^ 雅 集 患 翼 掩

反,云 與 疏 粟 申 無 其 四 乘 意 事 馬 馬 則 以 在 忧 一廄」, 摧 爲 摧 E 鄭 所 乘字 訓 芻 乘 如 也 是 字,云 毛 有 天子之馬 無 傳 事則 Ŧ 所 Ŧ 秣,秣, 乘 徐 圃 之馬 繩 常 證

也,正見其節用。二説較論之,鄭義爲長。

類 弁

也。 子, 言死喪 此 是 者,「飲 證 此 是保』之類。 幾何」、『人生幾 勸人燕樂多爲 也。 也。 所 語 庶 美刺 以 而 朱子《 幾説懌」、「樂酒今夕,君 有願 酒之 案,《 一欲斷《頻弁》爲燕樂、非刺 不 無 미 不 日, 辯 《詩》中 無 嫌 其然而言之者,此詩之「既見君 飫」、「飲此湑矣」、「不 且 説 敘 司 此言,如『逝者其耋』、『他 漢、魏樂 何 便謂 也。 譏 詞 燕樂語, 是 頍 必 孤 也。 弁》 論 危將 府 其世,方知 有即 猶 斯言 敘 亡。 如 日 其實而 此, 子維宴」是 時,終 似 不 矣, 醉 如『少壯 知 敘 其 無 道之 然 古 非 見 歸 執 確 人 詩

毛以皮弁在首,興王者之在上,而鄭不

伊異 既 兄弟乎? 弁者 相 飲 而 欲王 兄弟 也。 也 發 以 也。」玩其文勢,以 句,於上無所承也。 句,當各 有 而 前 嘉, 端 應 憂,既見則冀 爲 頍者弁,實 酒肴, 王 同 人」承酒 諫 之明,不欲王之暗,故未 與王 興。 奚弗爲? 則 言 正之者,意 也,有 呼 二句自 豈 休戚相 王 蓋 起 燕具 又《集傳》本以此三 伊 服 天 元 肴, 酒 維 是 異 子 也。 其 爲 有 弟 伊 嗣 皮 各增一「乎」字,使其 鄭 燕 人 實實 偶 開 在 肴者 弁,維 匪 何 乎? 解 同 如 兄弟,當 此 悟 乎? 他 了豈伊 維 集傳》之釋此 優 姓 蔦蘿之託 爾。 而 伊 矣。 則服 又王 何 樂。 乃 斯 何 爾 爲 異 然 好於 兄 見則恐其危 與 皮弁, 一章爲賦 夫 也 酒 平 承 人 則 其 弟, 皮 既 燕之人也 ? 於松柏,皆 頍 此 思 義 何 弁, 旨, 章 弁, 而 乃云: 特 故 得 矣。 與 宜 而 句 歸 匪 起下 上六 王 燕 舉 爾 以 比 燕 服 法 豈 他 肴 以 服 燕

傳》二「乎」字,實貽之誤 輔 豈 廣 逆 劉 兩 瑾 相 改 應 爲 是 賦 興 也 而 興 此 又 未 比 必 因 (朱意,然《集 伊 何 與

作樢。 語尚存古音,而學子反失之。蔦、《廣雅》同。《正韻》泥了反,不知何義。今吴下土同。《正韻》,俱都了反、《説文》、《玉篇》皆

名,可 《名物 以 語, 矣。 又以 注《古詩十九首》,於「兔絲附 唐,曰蒙,曰王女,蓋一草而六名也。 疏》辯松蘿 概彼也 方俗 然草木多有異物 兔絲、松 爾 施 疏》諸書,率宗之而爲説, 雅 於 殊 災以 非 兔絲,亦可 稱, 陸以 兔絲,後世《埤 蘿 女蘿 可 爲 目 勝 驗 兔絲 詰 物。 施 而 而 乎? 同 於 疑之,過矣。 爲一物、《頻弁》傳 兔 名者, 況古今異 别草,不 雅 絲之別名又 女蘿、 女蘿」既 * / 《爾 其 言 松 心 ~ 州木 雅 引 李 執 蘿 甚 翼 善 之 明 陸 此

得之。《疏》之言,又謂古今方俗名草不同,斯語

從鄭 也。 期, 解 實 詞 維 而 期 也。」故《釋文》 何 無音反,殊爲 .期」, 笺云: 期音基。 疏 忽 何 期 猶 伊 何

車牽

吕《記》遵傳,❶得之。 車 華》 古者娶婦之家,三日 爲 燕 樂其 新 香 1, 殆未 不 舉樂 講 於 斯禮 朱 傳 乎 ? 以

以 見《説文》,牽人舛部,云 牽爲轄,意二字其通 左傳》叔孫昭子賦《車 用 乎 ? 轄 車 案, 牽 軸 昭二十 耑 鍵 轄 五 也。 年。 並

轄人 則 兩 轄 穿相背,从舛,篱省聲。 既 車 爲 部,云: 車聲, 又兼舝義,字亦作轄,見《節 「車 -聲也。 篱,古文偰字。」 从 車 害 聲。」然

南

Ш

有聲矣。 語良然。 故古人以 取於轄乎? **牽也。」朱《傳》以爲「設舝聲」。** 閒關 今人以「閒關 」字本此 閒 宋董 關 要之,車欲行必設牽,既行必 爲聲,又爲驅 詩 氏 也。 曰 千 里」爲涉歷 案,毛傳: 車鍵 馳,本諸此。」斯 而 聲之義,其 長 行 則 閒 塗之稱, 有聲, 關 設

之燕 其酒 女而 舞,而今之歌舞不 飢 匪 喜極之詞 肴之不美也。 喜不必 渴」, 忘其 車 ·牽》首章,與三 好 飢渴 友 也。 必 惟 也。 有德 好友可以燕喜,而 惟 章 式飲」、「式食」、忘 詞旨 有德之人 也。 略 皆設爲 相 同 可 得 以 今 季 匪 歌

韻

《玉篇 像義 先聖之道也。」 慕之説。不知當以景訓明,行訓踐,謂 傳,景訓 景行爲明行, 疏之釋敘,必欲與詩義合耳,不如孫氏隨文 重複,又須補 疏亦訓景爲明 經敘》有『景行先哲』之語,●後 解之,較明暢也。 ~》即《 與做 《示兒編》論「景行行止」云: 》「景,光景 景,大也 唐 大,訓 傚 韻》也,《 相近,或 出 ()但謂 晦 明 孫此語當矣。 法 菴 並 明也, 又案、《説文》「景、光也」, 也」,皆無 則之意,敘 孝經》注成於天寶二年 以 無 法則此 可轉 景行爲大路, 訓 像 慕 也,光 爲慕。 明行 者。 慕 案、《孝經敘 語 意。 人因之爲景 也 未 哲王 自 今之《廣 炽炤 鄭 爲完善。 明皇《孝 《廣 博 文義 考 箋以 也。 明 韻 踐 經

嘉慶本改。 孝」,原作「考」,據康熙抄本、大全本、《四庫全書》本

耳。 豈 爲遠大之行,與箋小異而 哲王也。 厥」之類皆是、《孝經敘》正暗 謂 孫 「愐《唐 古人采用 唐 行止者, 世景 韻 又案,毛傳云: 字 ()成 經文多歇 有 則 於天實十年,二書之出 倣 而 X 傚 之 行 之,箋云。 後 訓 語,如「友于」、「詒 大同。 耶? 「景,大也。」疏申 用「行止」意 謂 殆非 則傚 也 同 古 時 先 源

箋 言觀之,可見馬 心安,非 融論之詳矣」。 其心怨恨。」《釋文》毛傳亦作 姒,大夫不遇賢女,徒見褒姒 云: 慰,怨也」。 云 「本或作『慰,安』者,是馬融義。 以 「愠,恚也。」孔疏言,孫毓 慰 異於傳,肅 「慰除我心之憂。」疏 我 。王肅述毛,亦云: 心」、《韓詩 案,今傳云: `融以前述毛者,皆主「慰, 言非傳旨。」合孔、 》作「以 云 「慰,怨也」,而 讒 「慰,安也。」 巧嫉妬,故 「新昏指 載 愠 馬昭、張 毛 憂除則 我 傳 陸之 心 作 褒

> 傳,豈 説優矣。 訓 孫、 怨 思、末仍以惡褒姒結之、篇法宜然、孫、王之 詩本因褒姒 相合,安知毛傳《詩》時,經文不作「愠」 獨行,而「慰,怨」之解 毛、鄭爲主,不得不伸鄭 安、怨兩 一日恚怒也。 安,此傳訓怨,字同 王及《釋 源謂慰字《説文》本 立拘於一 鄭 義並行也。 爲馬弟子, 而 文》皆作「 律 恚怒與怨近矣。 思賢女,通篇 乎? 始以「安」義 奉敕爲《詩 況 而 後 慰,怨」,是 義 有 怨 儒 而 異。 義 兩 莫 朏 極言賢女之可 與 訓 聞 王 (() 韓 《凱 毛自得之 疏》, ,由是安義 申 唐 聞 詩 風》 日安 亦 毛。 以 莫信 傳慰 乎 愠 原 前 也 師 ? 以 猶 然

0

[「]奉」上,康熙抄本、大全本、《四庫全書》本有「孔」字。

青蠅

之比 比、興 徒興 聽,則讒 謂: 君子之不宜聽 傳》分首章 (其詞乎? 興,元不 詩 不同。」案,斯 「首章青蠅對君子,下章 三章 人之構 皆 如 可 爲 以 此。 亂 知 比 蠅 미 乃晦 ,下二章爲 辯詳 興 知 興者,興其意乎? 讒 總 菴創立之論,詩人 討計》。 言 讒 初 以 興 詩言君子 對讒 無 、劉瑾 罔 兩 極, 人,故 體 釋之 也。 抑 則 無

賓之初筵

鄭 後儒説《詩》者或從毛, ,次章從毛,此崔《集注》之説,吕《記》從之。 此 詩首二章毛 以 爲 或 燕 深射,鄭 從鄭,或首 以 爲 大射 章從 皆考

《集傳》引天子熊侯、諸 依鄭 衷也。 也。 其文雖異,其義原不 劉 文,不顧 異,宜分别下 射,遷樂於下」,《鄉射》之事也,既禮文各 爲大射矣,而《集傳》所引多《燕射禮》,此 閒 據 矣,然引《大射》「宿縣」之文,此 燕射之同於鄉 又《鄉射禮》而 侯,乃獸侯也, 可 解者一 禮 蓮以 雜 解以爲言祭,則 文爲言 樂人宿縣」、《大射》之文也,「厥明將 取 其釋首 爲 大射、 後 也。 參約二禮之文。 人 語 指 燕 射者也,則宜以此章爲 燕射如之者也 章,有不可 燕射之侯 大射射皮侯,燕 獨 摘乎? 爲 射之禮 朱《 鄉 相妨 此章 射 傳 矣,乃仍蒙《大射》之 侯麋侯,大夫、士布 也, 源 此 是將祭而擇 則 解 則 夫參約 不 在 將 者 不 可 ,遷樂之事,亦 口 不 射,繫 知 耳。 不可 射 解 焉。 毛 其 射 之者,必 者三也 大射之 解 何 不 獸侯 左綱 士,宜 燕射 次章 鄭 者 所 之 折

子、諸 塞 解 著 之事 解 題 也 言當爲天 妨 以 mi 不 《燕 品諸 一後學之議 者 其 節 者 以 射 避之,諸 下 改 射 六 制 侯禮 , 故言 立 諸 爲 不,不 五 所 縣 侯、 ?》、《鄉 口 也 度 也 異 侯 武 以 · 須 孔 平 大 大射不 物 矣。《集 公悔 子之大 申 改。 侯 又不自 天 疏 乎 ? 凡此 夫、 色, 詩 射 鄭 與 子 論 ? 既 调 禮》,所 意 此 蓋 士 之 而 臣 宫 改縣 六者, 射 爲 詩 至其從《韓 一之異 也 敘 傳》之釋 不 其 諸 明 行 縣 悔 矣。 以 口 明 侯 則 禮 其 禮文 階 以 過 然諸 其 此 反 此 略 解 故 前 申 13 朱《 復 而 詩 能 不 章 不備 者 毛意 彊 大 獨 非 口 可 妨 侯 爲 一詩 服 方 傳 及 四 益 侯, 舉 刺 考也 平 大 射 刺 諸 先 焉。 洲而 **>** 也 也 遷 天 ? Ŧ 既 射 軒 位 幽 儒 既 侯之大 樂 子之 譏 須須 、《集傳》 不 縣 引《大 王 此不 之心以 歷 則 此 無 孔 文 小敘 不 遵 則 陳 所 不 改 改 疏 於 侯 敘 可 天 口 射 足 所 縣 射 縣 引 大

通議》辯之允當,兹不復贅。

於加 也; 仇、 = (傳) 爵 「人又」, 用 各奏爾 各奏 中 獻 酌 尸、 彼 爾 康 加 能 能 賓 爵」,弟子 爵二 」,子孫 長 以下, 兄弟 意 一而 獻 鄭 及 舉 P 所 康 觶 佐 之 指 爵二 食 之 祭 禮 禮 加 末 也 爵 之 也 語 之 禮 亦 禮 總 手 朱 有

今俗 目 剩 畫 衺 从 ,誤矣。 本 斗 也 賓載 , 鄭字, 左 奭 聲, 目 手仇 剩 把 九 又作 鄭 俱 也 遇 作 切 鄭 箋 蓏 奭 左 亦 仇 奭 右 音 本 讀 視 拘 召 爲 也 公名 从 喇 从 間 兩 从 又 目 案 加

知《 位 矣 鄭 訓 禮》 康 引 酌 注 爲 彼康 或 康 謂 虚 説 圭」證之,以 爲 爵 而 高 讀 以以 毛 坫, 康 義 奏爾 爲 亢所 爲 抗 允。 爲 時 引《禮 受圭,奠之於上 即 朱《 坫 毛 傳》 上之爵,不 訓 記 康 既 爲 明 從 安, 堂 毛

他注者,反遷就《詩》語以合之,誠不知問一破字,見於箋《詩》者,輒痛譏之,見於乎。又鄭氏注《記》,讀康爲亢,乃破字也。非圭之名也。彼上有「崇坫」語,故義可通。也。是亢者,猶言舉耳,《禮》疏云。「亢,舉也。」

何意。

名。 猶夏羊之羖 見漢世已然,不始於晉。 黑羊牡者名羖。箋又以羖爲牝、牡之通名, 羊牝者名羖。《説文》: **羧攊,音歷。 又云今人便以牂、羧爲白、黑羊** 三説各異。 有角。」羧羊,黑羊也。 爾雅》: 然則黑羊牝、牡皆名 俾出童羖」,箋云: 「夏羊 案,郭璞《爾雅》注謂夏羊爲黑 也。 《爾 牡,羭; 雅 「夏羊牡曰羖。」是 学云 吴羊白,夏羊黑。 「羧羊之性,牝牡 羖 又案,吴羊之牂, 也。 牝, 羖。」是黑 羊 觀箋語可

> 羒; 漢末之稱釋羖,故與《爾雅 毛據漢初之稱釋牂,故與《爾 牡羊,則吴羊之牝牡 "胖,**牝羊也。**」而《説 音墳。 牝,牂。」《苕之 溷 文》、《玉篇 福,信. 》異 華》傳 雅 如 》皆 》同。 郭所云矣。 亦 以 牂爲 굸:

毛詩稽古編卷十六

吴江陳處士啟源著

魚藻

魚

藻

之

什變小雅

興,乃興之不離正意者。

豆之菹也。

皆所以待諸侯之禮。

以此爲

次章之芹,加

《説文》: 《釋文》云: 字專之,他典特借用頒耳。 分、賦。 讀頒爲布還切,而不存舊音,疏矣。《玉篇》 詩頒字,乃其本音本義。惟寡字从頒,頒訓 「有頒 要之,訓分而讀 「頒,大頭也。从頁分聲。」則此 其首」,傅云: 「頒,扶云反。」《説文》同。案, 布還切,自有 徐氏《韻補》徑 頒, 大首 分 貌。

采 菽

符云切,

又音班

《廣韻》亦有二反。

首章之菽,牛俎之芼也。

如箋、疏之義爲允。 中矣。東萊祖子由之説,以爲專指上公,不皆得服之,故詩言及,則五等諸侯,皆在其皆很以下,至於毳冕之子男、絺冕之孤卿,

則「檻泉」之檻,但借濫義,不借濫音也。文「檻」銜覽、下斬二反,從檻字本音。然从水監聲。」引此詩。徐云盧瞰切,《詩》釋泉」,《詩》「檻」字乃借也。《説文》:「濫,泉」,《壽沸檻泉」,《爾雅》、《説文》皆作「濫

讀。 雅》 義 案、《玉 同。 濫 泉」、《釋 篇》「濫」作「灠」,盧瞰切,云 兩字音本不同,不知邢欲 文》 無音 反,邢 疏 云 從 濫 涌 何

泉也。張揖《廣雅》「濫泉」之濫,與《詩》釋

文檻字同音,殷敬順《列子》釋文,濫字亦咸

又案、《爾雅·釋水》有四泉,其三見《詩》。上聲,是濫字二音俱通,邢殆欲從檻讀也。

昭五年。「直出」釋之,此詩濫泉是也。一沃一濫泉正出,正出,涌出也。注引《公羊傳》

十一年。

亦取

遠

人服從之義

風》「冽彼下泉」是也。一氿泉穴出,穴出,泉縣出,縣出,下出也。注云從上溜下,《曹

泉」是也。惟一見一否爲瀸,音纖。《詩》所仄出也。注云從旁出也,《大東》「有冽沈風》「冽彼下泉」是也。一氿泉穴出,穴出,

未及。

昨。《説文》用昨音,然當以子洛爲正矣。《采菽》「維柞之枝」有兩音,云子洛反,又音作字五見二《雅》、《釋文》皆子洛反,惟

存其音。《韻會》止存昨音,未當。朱《傳》,《車舝》才洛反,《縣》篇子洛反,

兩

哉? 辨治 於天子,其臣從之,乃其常 屬之國、《集傳》以 小國,使之循順,所以 又《左傳》晉魏 平平左右,亦是率從」,鄭以 爲 絳引此詩以規悼公, 諸 侯之臣。 爲 事 有 于,何足 功 左 也 夫諸 右 稱 爲 若 侯 美 朝 能 連

無優字 又云: 典 優游與饒意近,併優於優,亦可 通。 本注 以優爲優游 游哉」及《白駒》「慎爾優游」是 不不 《玉篇》云: 疏作優,餘本俱作 優游之優,本從彳, 丑亦切。 别用優字矣。 ,其優字則訓 「通作優。」案、《佩 優爲 倡 「優,優游 饒 優 又案、《説 一,誠 又 優矣。 觿 訓 是 也。」《廣 矣。 集》 倡 文》 也。 门,已兼 二字義 也。 此詩 辩此二字, 然《説 今惟 今世文 韻 》同 亦 優 文》 相

與? 以 亦近 徐鉉 《詩》「布政憂憂」。 相 一种,豈後世以 (憂聲。」「憂,和之行也。 日 别 其《信南山》之「優渥」、《説文》引《詩》 繼又因優、優形溷,遂并優於 「息見於顔面,故從 憂代息用,因加彳旁於憂 「息,愁也。 从夂惡聲。」引 頁。」優游 从心从頁。」 優

角马

名弩曰弲。 弲,火全反。」案,《説文》: 也。 不然,則唐本《説文》與今有異也 『鮮鮮 **騂騂角弓」、《釋文》云:** 「觲,用角低卬便也。 陸 烏全反。」並不引此詩。 角弓。』息營切。」是騂自作鮮,不 遗 一因《説文》名角弓爲弲 「弲,角弓也。 從羊牛角。 「騂、《説文》作 又案、《説 而 《詩》 誤引

> 《集傳》曰: 今北狄所用, 豈唐世華人已不用乎? 見《詩》、《雅》及《説文》,必古有此器 之角弓,則角弓之别是弓名,信矣。 也。」《爾雅》: 是三者,不聞 兩 以玉者謂之珪。」注云:「用金、蚌、玉飾 雅》云: 飾者以爲美觀,在既有弓之後耳。 角僅居六材之一,不得以名弓。 用,於古亦應有之。若弓人合六材以成弓, 「弧,木弓也。 一則不成弓,角乃弓之體,何云飾 頭 ,因取其類 孔疏謂角弓乃别是弓名,如 「以金者謂之銑,以蜃 「角弓,以 弴,都昆切。畫弓也。 弱,角弓 用 以爲名。」 無緣者謂之弭。」郭以 角 也。 角飾弓也。」恐非是。 然則弓之飾當以 又案,《説 者謂之珧 斯言當矣。 今北 耶? 六材缺 但 文》 |角弓 爲 狄 孔 **爾** 謂 弓 所

矣,而孩童慢之。」箋義亦同,皆取侮老之意,「老馬反爲駒,不顧其後」,傳云:「已老

與? 言王 也。 不量力之意焉。 虚 任」,於義亦通。案,杜 」,是自嘲其健陷,雖老年 朱《傳》曰一 侮 然少陵用 慢 老 人,不念後 「讒人貪取 事,特斷章耳,若《詩 朱子之解 少陵詩 日 爵位 其 年 如少壯時、蓋 老, 「老馬 <u>,</u> 而 因 杜 不知 亦 》之正 爲 而 引伸之 將 駒 其 亦 總 不 侮 解, 有 不 勝 己

疏義長。

吕《記》從古,甚當。

能飢 爲 驚俗,然善悉老 道 者,當度其所勝多少。」鄭以此語釋《詩》,雖 人子者,尤不可不讀 也 亦不 如食宜 箋云: 能多 饇,如酌孔取」,教王 人之情 「食老者,宜令之飽。 醉, 曲 此箋。 態 體 矣。 其 情, 老人 斯 以敬 爲敬 氣 衰 老之 飲 不不 也。 老

去切。 又云: 説文》作要,云: 猱,毛 獼 猴 「猴,變也。」《廣 也 以 一。」《史記 爲 缓 屬, 貪 陸 潤 雅 索 ^ <u>*</u> 隱、《 也 疏 **>** 漢 云 書》 猱、狙 日 獼 母 猴 注 猴。」 也 親 引

獸,而 即 郭 潤也。 故毛以 孫 獸,與陸 屬 以猱爲猴 言侏儒倡優戲弄之態,必不取 案,缓 之,意皆 也。」案,狨色黄赤,故名金線 宗始禁士庶不得乘狨毛煗坐 皮可爲鞍褥者。 獼猴之類,又云猱似 猱,乃高反,又音柔,即今之所謂 注 王孫」,此 ,非即猨。」得之矣。 猴之别名 合。 戎音柔 性 與 爲 猴 静 與 意 ^ 猨 當 各釋, 、猴性 異。 陸 埤 ,與元 屬 ,聲之轉耳,今被 同 是 也,亦 雅 唐世以狨皮爲鞍褥,貴賤 \wedge 也。 孔 躁 恪《疏》同, 殆 漢 因 樂 申 不然 其 書 獼 名胡 猨、猴二獸 樂記》 傳 記 ,見葉夢 》《相 説 猴 《爾 三 云 也。 注 而黄,則 孫 遂 如 雅》 得 一優 亦 當 傳 嚴《 以 石 狨 音 喻於静者矣, 釋 漢 郭 以 猱乃 雜子女」,正 戎。 猱 形 林 獶 王 緝 爲 猱 注 顔 戎 顔 燕 狀 通 爲 延 》云「猱 狨 語 非 云 E 與 注 猨 語 亦 用 相 獼 即即 爲 、猴别 猱 之輩 獼 正 云: 作 ,宋太 類 猴 狨 亦 有 王 與 猴 此

= 0

至 云: 猴。 傳》作蝚,當以《説文》 變字爲正。 「巳、止皆象形。」 孫賦 又案,猱字《樂記 「從頁巳止久,其手足。」鉉等曰: 唐 杜 甫 有《覓 影作 胡 - 獿,《 孫 詩》, 、史記 《説 皆指 相 文》 如 獼

黜,則 之怨,因敘 注之得也。 吕《記》、嚴《緝》皆祖蘇説,不如《集傳》從古 疏》引《詩》,亦同 小人,日能消雪,喻王能誅小人,劉向《災異 親 雨雪 睦 自敦,怨恨之消釋,意足該之矣。 有「九族 瀌瀌,見明 此義。 相 怨」語 蘇氏 消」,箋、疏 也。 訓爲消釋 然 讒 以 雪 邪 親 擅 族 喻

菀 柳

《詩》「我之懷矣,自詒伊戚」,及「何以恤我,古人釋經,不輕信其所疑,故《左傳》引

神」,恐非闕疑之道。 自瘵也」之語,欲改《菀柳》詩 者可知矣。朱子據《戰國策》「上天甚神,無 證。 《小明》、《維天之命》三詩者 我其收之」,杜注皆以 蓋《詩》語多有相同,見存者尚然,既 爲 逸詩, 「甚蹈」爲「 而 亦 説 不 《雄 用 以 雉 其 逸 爲

解古人語,正不必過求深也 我,居我於凶 然此詩本旨正未必然。 每言夫居,見君心之所關 王所以自居,與「式居婁驕」之居同, 書》 「惟厥攸居」語 居以凶矜」,吕《記》、嚴《緝》皆解 危 之 地。」意 證之,以爲古人論 重也。 鄭云 雖 淺, 而實得之。 意甚美矣, 「王必罪 治 爲 而 亂 引 妣

都人士

朱子《辯説》云「《都人士》敘蓋用《緇

瓊玉 也。 《詩》、《書》皆聖經,亦往往有之。敘所謂 髪,皆平常之服 並非紛華綺靡之事。 異,若較論之,則敘義長也。 後,不復見昔日之盛美,而歎惜之」,義稍 古之節儉,駮今之奢淫,朱《傳》謂「亂離之 《詩敘》,尼子作《緇衣》,孰先孰後,未可定 則民德歸壹」,當是先正遺言,敘《詩》者與 尼子各述所聞,著之於書耳。 也,何知非《緇衣》用敘,而必爲敘用《緇衣》 衣》之誤」,是不然。 敘縱非子夏作,然其 十子之徒,與大毛公俱六國時人。 古者長民衣服不貳,從容有常,以齊其民, 、笄珈之儀容,載於《國風》及《左氏傳 春秋之世,亂 古人文字互相 《緇衣》,公孫尼子作 飾 離更有 也,臺笠緇襊,尤儉之至 狐裘、充耳、垂帶、卷 仍襲者甚多、《易》、 加 矣,冕弁、裘服 也。 觀詩篇所述, 又敘意 尼子者,七 毛公傳 是 舉 來

> 關於世教,而夫子録之哉? 乎? 況舉古之節儉,以駮今之奢淫,方是乎。 況舉古之節儉,以駮今之奢淫,方是

容也; 爲言。 於外,行不可矯於一時也,行尤重焉。 行也,與《表記》正相合。 之法、《孟子》論堯、桀之異,亦以服、言、行 於事,故德必驗之於行也。《孝經》論先王 其德,恥 士》首章「狐裘黄黄」,服也, 無其容,恥 美,往往與容、服、言、行爲言,四者 而可信也。《表記》曰:「君子恥服其 古之所謂有德者,必考其實,故稱 雖不及容,而服足兼之矣。 「出言有章」,言 有其德 有其容 丽 而 無其行。」德藏於心,行 無其 也; (詞,恥 然容、服、言可 「其容不改」, 行歸 有 其 俱 於周」 《都 詞 服 人之 有 面 見 無 洂 而

傳》「 必 爲忠信乃《詩》、《書》之常訓 周。」 意 君子引此 之美,顧 欲易之? Ī 與 畧 讀 詩,以證楚子囊之忠,杜注: 毛合。 其 如 所 字 重 毛云: 乎? 周 訓 「周,忠信也。」況 鄗 左傳》襄 京 何 誤 足爲 矣 + 「忠信爲 異 四 以 稱 年 周 而 人

達,冠 夫。 笠緇 耳、 也。 詩 羅 侯使者「草笠 組 氏 所謂士,大率主貴者言耳。 垂帶之 》辯其誤, \wedge 襊 然則 而 玉 所 彼都人士」,箋、 實 藻》云 以 敝 「臺笠緇襊」,一 一飾,非 爲 源 之。」是未 尊 ,而謂 而 賤服,然《郊特牲》言,蜡祭,諸 謂 野 至」,注引此詩「臺笠」。 士之稱 士大夫不 服 土 始冠 ____ 與 敝 (女對 疏 之時,貴 諸 緇 可 則因 以 侯 布 通 能 舉 士 使 當之。 冠 一,是貴 民望之目 事而 於貴賤 者 自 爲 賤 庶 服之, 貢 皆緇 必 諸 賤 惟「臺 民, 於大 旧 侯 士 之 布 大 此 诵 嚴 下

> 從容有常」 服 則 所述言行、 言民,亦通上、下稱之,不專指 者,徒見敘「民德 獨舉其貴,不應 不可哉? 士、女對舉。 焉 初 冠 何必定指 而 服 者,即 服 之, 女稱 飾之美,正敘所云「衣服 爲 雖 土 以 歸 君 庶 非 偏 五 壹」之文 貴者 民 子,女則大家女也。女 指 章 其 皆指長 況 常 賤。 此 服 耳 詩 民 鄭 要 民 中 不 以 也 亦 者言, 三章,皆 知 士 有 不 古 且 爲 時 貢 何 民 而

髻,此 字難 末無隆 之髻密 巧 見女德之盛 箋 云: 而 通。 反 心亦未 綢 殺 一 拙 直 「其情 且 也。」蓋内密 嚴《緝》 如髮」, 然。 直 朱《 耳。 性 如其 傳》 案,此篇除首章 後 密緻,操 用《 傳云: 儒 訓 、本髮,不 解 圃 貪 爲 頤 外正,又始終不渝 取 髮之美,既 行 新 「密直 髮字立説,故求 正 語 用假髢 直 而 説 如 如 外 謂 髪 於「如」 以 髮之本 下 也。 爲 此 女 四 高

倫耶? 美,殊不知「尹吉」一章,閒於其中,何獨不 言性 章皆以 朱《傳》反 美其儀容,三章之意各有指,末章承「帶」、 言 「臺笠緇襊」耶 髮」一意 獨直」咏其性行,「尹吉」稱其氏族,「卷髮 卷髮」同 行 四、 女對士言,若從毛義, 況四 也,此章之士,何不亦言垂帶,而 謂 而 五章皆言容飾。 以 咏歎之,不與上三章一 章、五章,士言「垂帶」,與女言 四章、五章推之,當言髮之 若從鄭 則二、三章 例也 説 則 皆

室昏 也。 孔疏 但 之尹氏、姞氏之女、言有 傳,讀吉爲姞,其乙切。 云: 尹 、是氏,姞是姓,兩家女子一稱其氏, 姻之舊姓也。 申之,以 鄭以「謂之」二字,是指 彼 (君子女,謂之尹吉」,毛訓 爲正直 人見都 而 嘉 禮 善,蓋以 成事 法。」其説 人之家女,咸謂 「尹氏、姞氏, 而言,故 尹 性 亦通。 爲 行言 正 周 易

> 者云爾。 類是也; 氏,則有舉其父母家之氏者,狐姬、孔姞之 也。 稱其 姓之女,則當云己吉矣。 尹氏,而以賢著聞者,當時舉婦人之賢,輒 之類是也。 繫姓於字,孟姜、季姬之類是也。 繫以别之。或繫姓於謚,莊姜、定姒之類是 專有指目之稱。古者以姓稱婦人,必有 姓,未有獨舉其 而指目之詞,猶曰彼大家女子,有號爲 云「尹姞」,故《詩》言「謂之」,明是本有是人 或繫姓於國,韓姞、秦姬之類 姓、文義 尹乃少皞氏之後,己姓,若並 有舉其夫家之氏 周之盛時,必有姞姓之女,嫁 不 氏者。 ·倫。 且古 源 意 者 尹 稱 者,夏姬、 婦人 吉二二字,是 或 是 八必稱 繁姓 也 某人 欒 於 祁 於 或 所 其

之美詳於首章,女德之美詳於二、三章,美直」、三章「尹吉」,皆言性行之美也。士德「謂之尹吉」,畢竟傳義爲長。二章「綢

是 謂 人 之二二字 者 固 宜 未安 詳 於 耳。 德 矣。 然 尹 康 正、吉善是美 成 之易 傳 祇 因

守

禮

之格

俱

隱

然

於

言

外。

詩

人

思

古

之

意

礙? 正 謂 當 之」云者,言人稱 盛 況 時 幽 了, 其 王 一時,尹 女子之都 月 鳥 其 大 美德 雅、 師 蹶 嫻 如 麗 惟 此 趣 ,於文義 豈 馬、二氏 必 不 如 何

昔

而

顧

云不見哉

於阮 皆作 藴 孽」,昭十 从 藴 皉 此 苑 反。」《禮》釋文「於粉反」、《 我 温 一釋文 詩 心 年。 聲 苑 詩 苑 亦 於 》釋文: 結」及《 結 積 「紆粉 粉 也, 切 苑 反」,當以 禮運》「大 又 本 引 滯 作 於粉反, 泛左 蕰 也, 此 積 傳 詘 ^ 鄶 反 徐音 説 焉 **>** 巾 爲 文》 . mi 蕰 素 「鬱,又 Œ 不 俗 利 云 矣。 冠》 苑 作 生

> 句矣。 如 「自然 古之爲 此 然 所 閑 猶 容 以 美 者 有 有 不 從 不 晶 假 其 致 於 修 自 飾 人 飾 然 之 17 義 世 而 則直 焉 非 教 也 彊 爲 朱 之。 欁 蘇 傳 體 是 氏 之佳 惡 日 E 知

采 緑

者,正 詩 形 也 云: 曠 譏 之作 90 容 耳 其 其 此 敘 不 刺 誤矣。 必 幽 征 云 但 幽 必 至之情 王之時, 役 憂 王 有 過 也。 思 舅 刺 韔 時 於王 而 遗 弓、 怨 鄭 多 王 曠 真 綸 氏 怨 政 政 也 欲從 謂 不 繩 曠 之 之失, _ 0 欲 會 者也 興 蓋 特託 君 從 敘 謂 衰 子 行 意 10 故 刺 爲 於 哉 民 則 復 釋 肼 此 外 風 刺 申 之 之 語 之 況 非 言 怨 名 日 美 刺 以 禮 曠 之 恕

末

有

禮

法

存

焉

面

古

Ŧ

制

禮

之嚴

都

禮

白

當

有

旗

可

見

衣

帶

之

微

筓

總

之

則

有

旗

」,箋云:

帶

於

禮

É

當

有

餘

髪

於

匪

伊

垂之,

帶

則

有

餘

匪

伊

卷

之,

困,誰 異,而 猶 害 謂 而 惡,故聖 此 元 굸 非 詩 后 婦 尤 誤 實使然? 上之失道,不 父母 怨 刺 人 甚。 解 人 較 曠者自作,非 敘意 録之,以 則是 ,不反爲妄語乎? 論 征 得 役 則 君之於民,竟 失, 頻 同 爲 興, 何 後 又謂 人刺之, 駮敘 哂 室家 世 也。 永 非 鑑 睽 口 有 朱 言 隔,民 秦 刺 子《 乃 越 可 於 與遵 品 知矣。 視 辯 L 品 也, 愁 則 敘 與

也。 謂之大葉冬藍。 故《月令》仲夏有禁。 葉如白菘,馬藍 者華 藍 澱 堪 又有吴藍、 實 染 藍 相 青, 笺云 同 蓼藍堪 而 「染艸也」。 葉 莱如 木藍 《小 稍異。 染碧, 苦蕒。 ,與諸藍 雅》「采藍 馬藍 蓼藍 惟 案,其 見《爾 蓼藍 馬 不 葉 藍 一,不 同, 如 口 種 歲 雅 蓼 作 有 미 *, 知 丽 /, 菘藍 三刈, 澱 五 郭氏 皆 何 , 菘 堪 藍

五日爲期,六日不詹」,傳云: 「婦人

爲期,去時之約也。」遠行而 耳,豈實指采藍 日、六月之日, 是 日月長 日 Ŧī. 諸侯之制 爲 H 御 __ 御。」 遠乎? 之期 庶 疏 至六 申 益婦 乎 殊 人 此 其 不 無 解 日 意 ? 知 此 優矣。 而 以以 禮,故 作 朱《傳》曰 不 爲舉 詩 至, 約 者借 鄭 改 以五 猶 近 以 訓 以 以 禮 五 爲 日 爲 見 爲言 日 五 恨,況 五五 遠 月 五五 御 端 之 日

旁哉? 瞻字: 紀》。 吾未敢信。 案, 亦云古矣,不誤也。 詹訓多言「至」,乃借也 甚多, 然「至」 傳云: 何《采 義 瞻借 「詹,至也。」《 自 藍》、《閟 通,不必 詹,雖《史記》 朱《傳》曰 宫 改 爾雅・ 然 》二篇,獨 訓 詹 義 有之,《周 出《 況《詩》中 與 釋 瞻 雅 詁 去偏 同 傳 同 本

悔 當 **、いまり** 時 不 與之俱往。 綸繩,箋、 疏 此 以 必 爲 無 婦 之 人因 事 夫不歸 뻾 或有

未必然。

妨 m 於義 趣 味 也 7,改訓 較 作 短 詩 爲 者 追想君子在家之事 探 其 情 而言之耳。 ",説 後 미 儒 通 以

黍 苗

公先朝 父作 王 世之後 城 難 尤 孫 後 一之闇 、謝邑,上能宣布王徳,下能慰安衆心。 而 非 有 不 都 桓 及 穆公,皆克紹先烈。 周 無 以子代之。 (,猶歌 也。 公所 ,然使得大臣 於向 舊臣,年高 家十臣,惟太公之後 忝 厥 然穆公之乃心王室,忠貞勞勩 得比。 思不忘,有《黍苗》之篇 祖 萊 矣。 民 及王立,復爲之平淮 之 望重 驟諫 故 如穆公者董其 H 當當 徹 盡 属王 時 周公雖 民 既 悴 有 事 ,又脱宣王於 之屋,雖 咏 桓公,召公之 國,不 其 元勳 役, 事, 也 ",其子 敢 則 由 而 夷, 穆 任 妣 皇 奕 告

> 不能 大臣 爲民 重 牛 患哉? 行召伯之職。」詩旨良 也 必 有 其 敘 制 云: 此《黍苗》篇 告成歸 王 不 處 能 不 必 然 膏 徒 有 潤 刺 其 天 王 期 一、又刺 下 何 , 卿 至 其

《詩》疏引之,有明 人在 之説,本於《周禮 也」,豈以「我車」爲駕馬乎? 車者事也,所謂 牽傍去聲。 事,云「有 集傳》易「我 前 我任我輦,我車我牛」,毛、鄭分爲 牽 牛者 負任者,有輓輦者,有 之, 牛」之訓 在 「我車」也。 -0 旁傍之, 徵 . 駕 矣 牛人》及《罪隸》之文, 車之牛 八,焉 曰 「牛所 用 所謂 其 更 在 案,鄭 在 新 轅 將 轅外者,須 乎? 以 我 中,此 車 牛」也 氏 駕 牽傍 大 車 將 有 四

廣平。 口 原、隰最 食 者三。 陸 原 也 隰 利 於 既 高。 隰 人一。 平, 也 阜 下, 下 也,大陸 疏言「五 案,《 濕。 平 爾 也, 雅》有 陵 土 也,大 大野 有 + + 阜。 等, 土 原 一,其 也 311

《公羊傳》何休 指 此 原、 也 非 也 斯 下 大陵。 可 樹 隰之名凡再見, 藝之地 食 土 者。 者 = 七 也 者 者 原 注 非 孔 高 云 也, 謂 沮 下 而 洳 可 不 原、 萊 食 可食、不可 同 原宜粟, 者。 濕 沛 最 皆 阪 即 利 叫 也 險 隰宜 於人」, 陂 食 種 陗 異 者。 而 墝 麥。」 焉。 食。 埆 濕 亦

隰, 隰既 也。 加 遵古原字,从是从备从录,自《爾雅 王 水旁爲源。 疆 鸰 並 阚 ¥. 目 理 原、隰、阪皆 在 雅 見 上, ,《詩》 所 原 於《 原 獨 有 隰 師 詳 詩 兩 度 裒矣」, 以 有 也 ×, 原 辨其 其 可 兼 濕 故《周 至 異 隰 言 食, (名,而 于 原 實 日 其 原 太 加 而 哟 隰 禮 原、 原 同 可 詩 》變爲原,而「原泉」字 有 畇 者,曰 • , 名, 食 隰 人 猫 原 夏 丁,其 日 咏之尤多。 隰 尤 言 官》之屬 不 一于 利人, 原 膽 可 不 者 曰「 彼 彼 不 可 原 原 辨 設 先 中 日

今以《 苓」, 其鮮 原」, 及《 視 豳 弟 原 游 田 畛」,曰「隰 又 日 堇 小 隰有 龍 隰無疑。 、召伯之所平、公劉之所 日 宛 小 必 將 茶 則用 瞻 日 原 日 日 如 非 欲 学之 隰 雅 爾 樹 彼 一中 「隰則有 飴 墝 建 以 有 檖 雅 溥 中 日 託 隰有 原 瘠 或 」、《文王》之遷程、《公劉》之遷 有 栗」、「隰 **>** 至《皇 詩,各 原 于 原 兩 立 之 興 有 茛 日 ۰ 有 ()不過 場。 都, 原 泮, , 胥 菽 榆」、「隰 楚」、「隰桑有阿」者各三。 菽 華》喻 隰 隰 著 斯 有 墾 有 有 合而 可 曰 日 隰 原」, 獨 邶 \blacksquare 廣 楊 采,《 杞 之 */ « 言 使 蓺 平 有 隰 周 桋」, 曰 論之,曾孫 所 穀,其 曰「復 日 杻 下 度,其爲可 臣、《常棣》喻 有 隰 原 唐 縣》詩之 産 濕 膴 荷 者 */« 隰 之通 榆 膴」, 華」、「 (所誉 隰 降 一组 有 秦》 杻 六 有 在 名 日 周 食 駮 之 濕 隰 三風 度 原 栗 隰 也 相 原 兄 之 所 度 徂 有 有

駮及 栗 有 可 實 赤 則 餇 千 口 篇 棟 大大 耦 陷 Ш 聚 厅 、苦、苓。 亦 īfii 切 嘉 耘 即 植 焉。 桋 枸 也 中 機 此 爲 車 杞。 而 六 輞 原十 載 미 俱 入藥 芟》之「隰 三隰 材 木 定 檖 也

隰 集; 之「原」, 미 以 荷 有 食之土。 《六月》之「原」,戎馬 華」、 泮 射 鄭 獵 游 讀 所 至於《常棣》之「原」, 爲 龍 向, 畔 -, 必 水 稱 非 草 中 稼 也,《 所馳 必 穡 瀦 之 鄶 中 地 》之「羊 ^ 禽鳥 合目 ^ ^ 鄭 衞 所

隰 桑

澤

障

而

己。

桃,

即

長

楚。

蔓

草

也

而

隰

生焉

則

亦

沮

洳

在 留 野 7 也 隰 而 能著 桑》之思 留 7 庇蔭之功 隱 君 居 子, 而 周周 能 猶 廣 尚多賢矣,惜幽 邱 農 中 桑之利 有 麻 ';君子 之 思

> 與《風 詞 東 莊 矣。 周之不 兩 王 雨 皆 同 復 棄 西 而 使 不 也 編 用 人《 也 雖 或 然,《 此 風》,朱子定以 西 隰 周 桑 之 所 詩 以 音 東 爲 節 淫 略 而

進,不 《左傳》 及他 箋末引《論 此 티. 欲進忠告於君 猶告也。」 矣」,「遐」 詩 表記》鄭 矣。 》,箋《 ^ 詩遐、瑕二 應徒 詩》 然玩 武 武 鄭 作 欲 此 請 詩 注 伯 中 語 執 解 子産之見規 詩 受其 取 也。 享 》「愛之能勿勞乎 其 遐 時 明 語 趙 子,此又 舊 往 字。 順 《表 , 及 字,《 卒 孟 鄭 解 往 ,故朱子 鄭 章。」襄二 日 記 也。 然 子 改 箋, 0 集 **>** 鄭 誨。」東萊之説 用 産 其 引《隰 傳 吕 並 先注 定左 賦 前 用 瑕 念記 無 \wedge 説 多 + 之言 ? 以 傳 隰 桑》「遐 規 \wedge 訓 1 釋 記 》杜 桑 釋 所 忠 誨 年。 爲 此詩 胡 》,後 此 見 意。 焉 何, 注 能 杜 趙 必 本 以 不 也 謂 箋 勿 於 注 孟 爲 有 併 謂 惟

之,不 《左》癖,而 其義 誤於杜 誨 勤」,決不 略 相近,故有規誨之説 能 ,杜注《左傳》,又貽誤 何,故 無 語 疏於《詩》矣。 誨 疏 引以 以 申 此 海 其 則 爲 意 中 證 驗。」杜見「忠 謂 心 鄭引《論 不 善之,心不 謂 知鄭本訓 於吕 彼 也 以 語》,既 千 中 元 誨 能 餘 凱 心 謂 忘。 年 貽 與 雖 善

愛勞,不在忠誨 符,故鄭引之以 用孔説。 之,孔安國《論 得箋意也。 釋詁》勞、謂 詩》言愛之,則 皆 語 訓 鄭訓 勤。 注: 也 證 不謂, 謂」爲 論語》言愛之,則必勞來 「人有所愛,必 非證 必 「勤」,勤 勤 不忘也。 恩 欲勞來之。」鄭 之, 與 勞同義 語 意 意 在 相 應

善。 藏,王才郎 鄭 説 中 見 心 反。 箋, 藏 則 E 之, 肅不訓 説 見《表 鄭玄、 善 記 與 禮 疏。 王 肅 疏 然 異 皆 意。 詩 謂 《詩 釋 訓 文 藏 云: 釋 爲 文

> 所謂 作 念 亦 字必作臧,故訓 加 一恒藏 藏 可 艸 王,或 訓 ,故《漢書》 匿 匿。 非 解 心 肅 可 中」,晉 觀《孝 乎? 知。 爲 藏 蓋 善也。 孫 經》引此 故 古者 」皆作「臧」。 秀舉 《表 然臧字 止 記》皇氏 此 詩, 有 詩 臧 以 注 答潘 字 本兼藏 云「愛君之 當 疏,亦 時 後 岳, 人始 詩 義 訓 亦

白華

未有

能

辯其

故

者。

源

又

謂

孔

疏

申箋,

亦未

包藏

何據。 大子傅 手,何嘗自 敘 作 後世《長門賦》、《明 以 耳。 此 作乎? 詩 朱《傳》 爲 周 人 作 指 爲 正 君 申 如 詗 后 》皆出 小 自 作 弁 文人 不 詩 知 是

貌 豐 鄗之閒水北流 皆不 滤 池 以 北 滤 流 池爲 • 」、《説文》作淲,云「水流 傳 水名。 云 滤, 《水 流 經注》云: 貌 箋 云

《水 爾。 水之 鄗 貌。一而 滤池之水矣。 滤 西,正 經注》又云: 池 凡後 在 水出 世 豐、鄗 一豐、鄗 傳 世地地 鄗 以 池 爲 閒 之閒 案,酆在 名 西 mi 水名。」蓋 與 , 北 而 「《毛詩》曰: 也。 經 北 流者,名之以 語合者,率皆此 西, 流 後 亦 人 鄗 人因箋 同 於 在 .鄙 鄗 東,滮 意 語, 滤 則 滤, 池 遂 池 會 類。 流 取 云 在 有

鶩咏於《詩》,又人所常見,臧文仲聞人也, 何 環氏《吴紀》,謂 扶老,善與人關。 及奔馬。 至 京 識 似 近世《本草 而祀之乎? 鶴 而 清 海 濁 鳥爰居即此 脯 不同 綱 脩食之,益人氣 目》據景焕《閒 ',所謂秃鶖也,亦 禽,誤矣。 八力,走 談》及 秃 名

解,信 失其常釋之。 雅 t》,又與《易》「男下女」意相合,此箋、 加 鴦 有徵者也。 戢 翼 取 陰 朱子宗横渠之説,以不 陽 相 下 義, 義 本 疏 ^ 之 爾

緜 蠻

鳥所望 以爲鳥自謂, 云「徹土」,云「捋茶」,云「予羽」,云「予尾」, 此詩皆爲鳥言,不成文義,尤爲篤 其誤,至詳確矣。 詩》之託 辯説》譏《縣 於人哉? 爲鳥言者,必如《鴟 宜也。 説具《通義》。 蠻 一》敘 此詩之教誨、車 近 世 場》篇 又謂《集傳 郝 仲 輿 則 論 載, 敬。 미 案, 彼 釋 駮

色也 以 執中 也,其見於《詩》,曰「睍睆」,曰 貌 君章句云: 聲音著者,惟《葛覃》、《出 而 彝。 非 毛傳云: 聲 曰「交交」,曰 則 殆 臆 同。 「緜蠻、文貌。」語雖 説 緜 朱《傳》以 也。 蠻,小 縣 案,黄鳥、 蠻」,指其形也。 鳥 爲 貌。」《 車》兩詩,俱日 鳥 「熠燿」,目 倉 聲,本 小 庚, 韓 異,其爲 詩》 於 劉 其 其 禽 薛

也。 喈 喈 階」而 喈 凱 耳 風 外, \forall 云 更無 七月》云「 好好 可 音」, 儗 似矣。 有 不 知 鳴 ۲, 如 何 不 云 好 也 如 何 意 鳴

則言 教 [教而誨 未 誨 誨 事 而 一義也。 在其中矣。 異 教 文, 之, 故 事 敘 爲 至 云 此 而 分 誨 釋 飲 之, 耳 食 鄭 教 其 因 載 實 經

瓠 葉

蓋 意 筵》,幽王 不以宴其 面 賓之初筵》 心,似 坳 不 Ŧ 肯 瓠 所 用 葉》敘言 與宴 親 乃宴飲之過,故 然《 族 刺 飲皆 (類 華 其 則 谷非 幽 弁》 沈 與 匪 E 湎 〉詩 此 人,狎客耳 之, 棄 淫 言 敘 禮 泆 此 意 以 王 有 詩 正 爲 雖 非 旨 極 相 觀 有 刺 合也。 陳 酒 至於嘉賓 牲 ^ 其 簡 賓 牢 奢 嘉 之 儉 罋 也。 肴, 芝 況 初 餼

> 筵》詩 其 禮 惟 懿 則 不肯用矣,敘之言詎 有 戚 獻百拜之儀,又其 廢禮愈甚 刺 載 固 其 其 號 越禮 所 載 疏 呶 ~ 瓠 而 牲牢 不 (所畏 亂 欲 葉 饔餼 爲過 我 沂 詩 籩 而 也 乎 刺 所 不 豆 其 以 欲 其 而 廢 行 行 宴 己。 禮 也。 禮 飲 之時 也 惟 至 ^ 賓 於 宜 越

箋謂 名 羞 嘗之,親 禮 其 用 烹其 幽 彼 焉。 一,備 雖 風 ^ 等耳。 (葉也。 瓠、壺 禮 夫 獻 瓠葉》篇 壺 **>** 爲酒 飲 斷 不 酢 親 體 壶」; 下 酒 醻 也 同 本 與 孔疏 庶 之 所 類 此 爲農夫之食,一爲庶人之菜 以 言 儀 落 用 人, 庶人依 而 燕賓 爲 庶 引《七月》以 物 瓠 其 微 行禮 類 人 别,瓠 菹 實 儉 明 飲 一, 儉 也。 先與父兄室人 而 庶 酒 亦 派形長, 士禮立賓主爲 禮 也 事 ^ 農夫之菜。」 小 重 能 耳, 證 賓 雅 也 行 壺 瓠 然 敬 至 「瓠葉」, 體 可 葉云 加 賓 厦 酌 以 以 也 也 酌 觀 兔 而 故

以

人

酒

之美,於此可見。 有 古 稱 I者教 ·士行,《詩》所言,乃紀其實也。 君 子 民 彼 醉 以 mi 徳 伐 行 德 道 者 蓺,故 小小 X 庶 而 人皆知 已 成周風俗 矣。 案

漸漸之石

與? 起,因 秋之世, 不至 晉之霸,稍攘除 夷交侵,中國背叛,用兵不息。」三敘所言 公羊傳》謂 時之事,而不 王 一, 乃 然周之一代,實與 一之以 之 漸 處 命 漸之石》 時 處 饑饉 將 西 中 皆 帥 . 戏、 之。 見於史,此可補 唱。」《何 或 有 》敘云: 東 不 戎 東 征 咝 絶若綫」,僖 狄 夷 草不 0 王 戎 交 ^ 滅 一時, 「戎 《苕之 狄 侵 - 黄 | 衞 相 Œ 中 狄 伐 終始 敘 其 其 四四 國 華 叛 年。 蠢 邢 闕 云 ·》敘 之, 師 動 矣。 賴 病 之初 自古 旅 云 荆 齊、 乃 舒 四 並

傳云 闢 傳 皆叛 戎。 公避 夏之世,中 稷子不 萊 中 戎 逮 其 又敗於犬 伐 夷,伐獫 戎、始呼之戎、 以 狄 聯 末 徐 夷 國 聞 來,風 應 戎。 錯 Ili 年,竟有千畝 至厲王之末,而 狄 島 不謬。 窋, 禍作 則未 處 宣 以 、狁,成 夷、 來, 戏。 秦 中 Ŧ 懿王 華之有戎狄 竄 氣古樸,深 '', 而 始 中 西 必 華 E 徒戎 翳 戎 王 皇 興 一之世 然。 孝 王 周 季 故 肅 了, 四 徒 之類,皆 王 再 逐 伐 轍遂 翟 爲 之敗,繼 謂「自紂 伐 之戎。 出 一,西 伐 案《禹貢》, **獫狁、蠻荆、徐戎、淮** 西 患 出 之。 西戎, 淮 山險水 即 東矣。 ,其來遠 落 最 征 戎侵 夷。 貅 鬼 劇。 伐 在 孔 文 以 地 時 戎 僅 夷王伐大原之 九 鄗 穆 E 戎 幽 也。 去秦未 蓋 孔 翟 王者聲靈 矣。 淮 州 又 E 伐 王之 三代 克 安國 夷、嵎 夷始 伐 境 翟,伐 伐 此 低 大抵 内。 余 定, 侵 皆 白 以 香 犬戎 無 年 夷 岐 前 暗 開 后 之

秦興 之戎 其被 咏是 則討 能 興,亦以之亡。 父伐戎被獲,襄公復伐之。 西 草不黄》之詩作矣。 國坐受其敝,而《漸 不在戎已。 一, 表仲復爲戎所殺, 子莊公破戎, 孫 獠 徧及,戎狄嘯處其閒,如今楚粤箐峒中有 患,秦 滅 戎 也 平 耳。 之關 之,如《采薇》、《出車》及宣王 患亦略同。 無王 乘諸夏之式微,時出爲寇,王 獨 紐乎? 者 當之矣。 而秦復以之興,興亡之故, 則狼噬豕突,無 漸之石》、《苕之華》、《何 秦犬邱、大雒之族没 又案,周、秦皆興 然 三詩 同 自周 敘 戎 所 也,周以之 所 轍 指 顧 東,而 諸 忌, 其周 於 者 詩 雍 # 於 雍 中 所 興

苦

分配 王 叛,上二 、孫三家述毛,皆以 詩 漸漸 一章次二句 之石 説各 卒 》三章,毛傳 不 章 E 同, 四 興釋之,將戎狄、荆舒 句 鄭以上二章上二句爲戎 爲 荆 舒不 本不 至,每 言興,鄭 章下二句 狄

> 況經 至,東 爲東征。 與荆舒耳。 牽合乎? ,直是賦 征 止言東征、敘本用兵之由、故並舉戎狄 總 王、孫以每章上 六 句 體,非 詩止言道 必欲分裂經文,配此 而 言。 興也,宋諸儒之説得之。 多支 四句爲戎狄叛,下二句爲荆舒不 塗之險 離 穿鑿 艱,跋涉之 ,俱 二役,不太 非 毛旨。

雨之徵 張説 復載 乃月 也。 久雨 水 久雨多潦,濯 《緝》推 傳》以「豕」、「月」爲 濯 離 横渠 之方見白 太巧,不若毛之平。 張 則豕 有豕白蹢, 了,謂豕 語, 論之甚 于畢,雨徵 以 進 而 此 其 性負塗、雖有 涉 不 蹢,則穿鑿之見 明暢,是 爲 辨 塗 水波。」蓋以 烝涉 久 又見,此 而見白,是 其 雨 將 異 波矣」,毛傳云: 之驗, 張 同 雨 豕 意 之驗,既從毛 苦 不 白 雖 此 而 本與毛 雨 也 雨 蹢 負 已 爲 以 之 止 塗 疏 而 將雨 離 甚 未久 不見, 乎? 然 殊。 畢 也。 爲 之兆 謂 將 也 又 嚴 因 潦 再

此 月入 陽 後儒妄託也。《史記》列 得之目驗, 者,但必 焉 又嘗謂: 語 得 爲 子長 之 謂 説 顧 非 即 英白云: 離 相 有若之不知 雨 其 世 然 也 傅 「余言月之離 馬 陰 掌天官 則 著方 則 天街 離陰 得 水乎? 雨 謂 月 「當知 在畢之陰,七政 離 遠之則 由 入畢 《家語》。 陽 傳 其 畢, ,必非孔子之言 其 畢 載 陽 中 〈誤耳。 報有若 則 宿 則 未有不在 否 則未 早 在 名 矣。」此 乎? 事 天 雨 敢 街 中 獨 信 舊 之陽 道 英 其 刪 余驗 낈 也。 也 白 陰 夫 乃 陰

耳。 畢 淋 語 畢 之 星 漓 即即 上 畢之爲 而 漉 月 有 下 雨 魚 離 加 。」噫,此 若 底 于 器 毛 柄, 漉音鹿,滲也。 畢」、《大全》録朱子之言 雨 氏 有 下 然。 一,見《 以 開 決 爲所 畢, 非 兩 叉,形 小雅》、《月令》、《 朱 以 星名,義 叉罔,漉 子 掩 語,記 兔者,此 亦 類 魚 取 畢 之者 則 此 田 故 其 日 獵 或 妄 月 水 今

之畢 故 但 二也 從其 謂 雨,自 星 謂 郭 星以 無 淋 之器,何可 魚 載 朱子居閩,豈言其 以 辯 名 漓 後 畢 ,且叉罔之名甚 鼎 璞之《爾 罔 爲形、 若 之 世 義 妃之所好。」 宿 實者,此 也 名畢,郭璞 是陰 先王 如 學 取 雨,故天星象之,豈未 雨 耶 , 者見 此 諸 ? 見《 雅》注 以 亦 木也,爲 陽 制器尚 魚 證 謂 因 即 之氣 祭 特 其 罔 以 有之, 古經? 星 器 牲 , 其 理 説出於朱子 其 畢 八土俗 不 之 饋 而 象,仰 相 名 或有然。 説皆然,不 金 典,其 誤 。畢 得名, 周,孔 食 爲 妃。 而 三也。 乎? 禮 其 也。 感 不 觀 疏是郭。 \approx 誤 似 召,《 畢 孫 好 俯 並 ,遂不敢置疑 而 有 乃 也。 畢 宋季閩 乃 毓 ায় 口 察 不 鄭 叉罔 謂 洪 之 誤 西 不 易 耶 今反 云 氏 叉 範》 宫 ? 本易 見 也 詩 器 罔 畢 用 粤 時 以 之 謂 評 其 鄭 水 捕 本 天 以 爲 孫 史。 知 象 誤 H 注 好 取 魚 助 炎

類者 苕華者,而 瞿 瞿 陵苕, 其别名曰 蕃之稱,陸《疏》有 則《爾雅》有黄 本經》中品有紫葳,郭景純 本草》者,率沿其説,然未有用以釋《詩》之 詩》,三書所云當爲一草,無疑矣。 恭修《唐 陵,見《本草》,鼠 麥者,則 及**苕**,故 名又相 詩 焉 》有苕之華、《爾雅》有陵苕、《 一葉、日 援 朱《傳》始用之。 本草》,始以紫葳爲陵霄,後之注 張 孔 以 揖 合, 華、白華 疏 注 茇,見《爾雅》, 茇華、陵 與 通 故 似 陶 爾 尾,見陸《疏》。 孔 王 爾 隱 雅 一之釋, 疏 芻 雅 居之誤 * 而 又援《爾 而 見《本草》紫 及鄭箋、陸《 今驗之,有 華 鄭箋有紫 毛 赤葉青之説 也。 傳 以 雅 顯 其 其 苕 談以 赤 神 慶 以 貌 葳 不 華 疏 蒔 相 中 爲 狀 農 mi 釋 爲 亦

之説, 久乎, 北,得 物而 當危亂 候,非因 言其盛,不可喻時之衰也。 則芸黄爲衰落之色。 耳,何足爲奇異哉? 《别録》注引《博 三也。 陸《疏》言苕華 陵苕 背黄,無紫、白色者,不類 下濕水中,故《陳 同,今陵霄華 疏》别釋爲苕饒,今陵霄偏 生,雖榮不久爲説。 可染 紫葳 取 二物色性皆殊,明是别草矣。 則 特生 喻殊 苕 阜,沐 已集 華有 草。」必當 mj 失實矣。 葉 好生下濕、《本草》經 於枯,何榮之有? 久、附物 物記》云: 俱 黄紫、白紫,今陵 髪 風》「旨苕」生於 無染阜之用,不 即 奇異。 若陵霄色黄,則芸黄 案,笺、 黑 物名未 而 夫華之榮謝各 速也。 也。 本 故朱《傳》别 「郝 疏言苕華紫赤 生於燥 今陵 草 覈 施一行 卭 霄 經 況詩 陸《 霄 則 而 類 土,不 邱 又陶 亦言 所 乃 太 華 經 僅 則 二也 疏》言 意亦 言 人身 有常 凡 行 取 面 云 不 乃 卉 附 氏 類 生 亦 Ш 陸 赤

殺,學《詩》所以重多識。

其 陸《 鼠 其可染阜,此 亦名烏草,即《爾雅》之葝 經》言下濕地 種爲稍異,然較之陵霄,猶爲近之。 尾名又同,當是也。 (可以染阜、《别録》言其生平澤中、《 「疏》 蘇 頌《圖 有 鼠尾之名也 與陸《疏》之説苕 有之, 經 疑 陵 而 藉 陶 惟 案,鼠 隱 爲 韓保昇言有 鼠 居、 鼠 尾 尾 華 尾 陳 也 草, ·俱 亦 藏 相 名) 因 苕 器 郭 赤、 合 陵 蜀 注 亦 翹 白 圖 華 而

儒 治日少而亂日多也? 罶」,言不可久也。 之説,徒紛紛耳 牂 羊墳首」,言無是 「人可 傳語 以 道 明白簡當矣, 食,鮮 也。 可 以 星 飽 後 在

天廟 日 魚笱中 ,取象於人事,爲星之别名耳。 心之爲明堂,猶房之爲天駟,營室之爲 「心出在明堂者,正也,至將 -,其能久乎?」 語見吕《記》。❶ 没 此謬 董 而 氏 望 矣。 於 逌

> 周 心 星光,故云不久,豈 其 即 明堂, 行疾速 又出 在 明堂乎? 必謂 將没時 且 **総**,不 乎 天 ? 星 能 書 久 夜 留

何艸不黄

色。 彝直以爲黑腐之色,與鄭異。朱《傳》云「既 夏以建寅之月爲正,故尚玄亦取草木牙蘗之 以爲鄉緇之閒是也。 兼赤乎? 蘖者將生必玄。」蓋謂明年之春猶未 而 玄」,則從劉 以草玄爲初春,鄭説信而有徵矣。 何艸不玄」,箋云: 案,玄與黑不同,《 也。 然草之朽腐 燕名玄鳥,正以其羽色。 「玄,赤 周 禮 黑 黑 . 而 色。 歸 已 鍾 也 氏》注 一,豈 草 復 黄 劉 芽

全書》本改

^{●「}記」,原作「語」,嘉慶本同,據康熙抄本、大全本、《四

毛詩稽古編卷十七

布號,諒應有之,必非仍守侯服也。

即

以

此

吴江陳處士啟源著

雅

大

文王之什上正大雅

氏稱王之説,謂敘言受命作周,不言受命稱 「文王受命作周」,歐陽據敘語以駮鄭 文

王

緯書「赤雀」、「丹書」之語雖不可信,然改元 言受天命也。 王也,信矣。 但《詩》、《書》言文王受命,皆 天命之,豈僅命爲諸侯乎?

> 書》,又不信逸《書》,故以七年爲斷。 傳解》「文王受命之九年,召太子發」,以是 案、《武成》「誕膺天命,九年」、《逸周書・文 受命七年 矣。 受命九年而崩者,孔安國、劉歆、班 證之,則九年之説信矣。康成不見古文《尚 逵、馬融、王肅、韋昭、皇甫謐之説也。 向讀《武成》書已有辯,今因歐陽語復論之。 詩觀之,於文王則曰「其命維 「天命靡常」,明謂天 雖不顯言稱王,而其實已不可掩也。 文王受命之年,先儒論之各異。 加 崩者、伏生、司馬遷之説 以 命殷者,改命文王 新」,於 殷 一固、賈 以爲 以爲 則 也。

被囚,其年得釋,即以歲莫伐耆,六年始稱 已露,況三分有二,儼然 王,此言非 孔疏謂文王受命之五年,勞還帥,勞訖 也。 受命改元,縱未 勁敵,紂 稱王,其形 豊 得囚

於康 紀》、皇甫謐《世紀》,皆言受命元年即 年之期互異,尤未可 而歸之。」斯語定不謬,孔謂其年得釋,與 約 囚文王七年,諸侯皆從之囚。 又《左 成《乾鑿 既 囚 傳》襄三十一 豈得 度》注,原屬 復釋? 信也。 年。 揆之情事, 臆説 衞 至六年稱 北宫文子 ,史遷《周 紂於是 當 王,本 云 不 稱 本 + 爠 爾

以首二句爲文王既 之本,在於受天之命,受命之本,在於與天 而 著見於天。末二句 合德、《詩》美文王,德乃第 人,皆能奉若天道。 言受命之事。 (,以末二句爲其神在天,升降于帝之左 仍 以德之顯、命之時相配 《文王》篇言文王受命作周 首二句言未受命之先,德 没,而其 '言既受命之後,事天治 中 应 句 一義矣。 神在上,昭 正言受命之事 而言。 放首· 蓋作 《集 章 明 傳 周 己 即

與古注合,後忽易之,不知何見。徵鬼,義短矣。案,吕《記》引朱子初説,本右,是以子孫蒙其福澤而有天下。舍人而

《繋詞 **追從** 無亹 云: 此 雅 本讀若媚 不知董 矣,可勝改字? 爲據、皆謬説 又引《説文》云「娓,勉也」。 經典相傳皆作亹字,改之驚俗」,當矣。 **%** 解,則勉義非無徵矣。宋徐鉉以《説文》 字,欲改「亹亹文王」亹字从女从尾,董 而和之,又引崔《集注》作「娓 亹亹字見於《易》、《詩》、《禮 「娓 《爾雅》云: 《詩》傳、《文王》。《記》注《禮器 氏 其 何 順 由 無 也。 也 並並 見也 匪 崔《集注》宋世已無 切 經典字不載《説文》者多 ,乃徐音也 無 亹亹,勉也。」《易》 宋庠《 勉 訓 案,今《説文》 或 又娓字許 語 補 記》、《爾 娓 其 文 音 皆用 》謂 王

「陳錫哉周」,朱《傳》解爲上帝敷錫於

周 可訓始,其曰「載行周道」,王肅 用乎? 復代以「于」字,「哉」與「于」本不相倫,可 爲語詞者,李氏之謬也。《集傳》用其説,而 毛、鄭合矣。「哉」字毛訓 施、《國語》一引此 上帝乎? (左傳)、《國語 非也。 至載、始兩 《左傳》兩引此詩,皆 陳錫」謂文王能敷 》引此皆作載。《左傳》羊舌 詩,即 訓,毛、鄭雖殊,然載 承之日 載,鄭訓 施 布 述毛意耳。 恩惠,豈 程之 始。 利,皆 其訓 E 亦 與 通 指 能 《春秋》本旨

注曰: 道。」「載成」者,始成之也。 詞也,與 載周以至於今。」「載周」與「至今」,首尾之 造周」正是始義。 八造周 「載行 同 周道。」預事晉武 義。 韋 昭注 《國語》芮良夫 惟 云: 杜 帝, 預《左傳》 「載成 肅實帝 周

年。

職云:

「文王

一所以

造周,不是過也。」宣十五

云

本支百世」、「不 顯 亦世」,言君世 爲

之外王父,宜乎襲用

其

語

矣。

滅繼 勞」,又引《詩》刺 疏 蘇、蔡諸族、皆周 譏世卿 君,臣亦世爲臣也,所世皆 不始於東周也。 居?」此篤論 云 絶,王者之常,譏 之例矣。 鄭《駮異 也。 幽王絶 譏世 又春 初 可 人義》, 公卿後,宣十年《左傳》 見世卿 卿乃公羊子之説,非 秋 世卿之文,於義 功臣之世。 引《尚書》『世 時 顯 自是先王舊典, 周、召、毛、凡、 德之士,不在 然 選 則 何 爾 興

説也。 説之異於先儒而 訓「大」者,蘇氏之説也。 止」、「緝」訓「續」、「熙」訓「廣」者,歐陽氏之 顏氏之説也。 「思皇多士」,「皇」 毛云: 「緝熙,光明也。」「假哉天命」,「假 毛云: 有理者也 「皇,天也。」「於緝 訓「美」者,吕《 毛云: 「假,固 《記》引 也。」此 熙 敬

之如此、二語意本協、此箋義 有商孫子」,臣有商之子孫也,言天命 也。 今云「即

出矣。 有商之孫子」,觀之既不接上義,下語又複

其 拘 微子來見 言最 大夫入天子之國曰 濟多士」即其明證。《集傳》曰: 得此名,此文「凡周之士」、「思皇多士」、「濟 者,男子之通稱,五等諸侯及公卿大夫皆可 何嘗指其臣屬耶? 孫之臣屬。]其説本《漢書》師古注。 朱子自 侯于周服」,此服 了,殷侯也。」 疏謂即 了,如何以臣屬當之。 也。 愛 殷 一顏說,兹其一與? 土膚 祖 二王之後來助祭,有《振鷺》之詩, 廟,有《有客》之詩,二頌所美, 敏,裸將于京」,毛云:「殷 「黼冔」,而 某士。 且前章云「商之孫子」、 前商之孫子,當矣。 然釋「士」字,何 則殷士者,商子 「裸將」正侯服 「諸侯 士 之

云: 「王之進用臣,當女祖爲之法。」●夫「王之蓋臣」,傳云: 「蓋,進也。」箋

而復轉爲忠,不已遠乎? 今忠蓋二字習爲恐大迂。蓋本染草之名,詩人以其音同,故裁前後相應,古注允矣。今解爲忠蓋之臣,故

常語,忘其本訓

乎? 「不易」,言命之所以去商而歸 命」,言命之歸於周 新」、「帝命不時」、「假哉天命」、「上 正詩叙「受命作周」之「命」也。「其 也。」天理即 「永言配命」、《集 源謂此篇凡八言「命」,當 德 耳, 也。 言修復,言 傳》 言「 曰:「命, 周 靡常」, 配,不 通 也。 爲 命 既 帝 天 文王 兩 維 複 既 理

《四庫全書》本删、

致多 與 義本同,不須復解也 而行,不云 則 天合德,故能 福 亦能配之。 配命之實,不外聿修,配命之效,自 四四 語 何者爲 意相連 受之。 配命者,謂 命,正 貫。 成 以此詩屢言命,其 毛、鄭 王 能 配合上帝眷 述 但 修文 云配天命 王之 命

改之耳 不易也 學》引此詩,鄭 難」之解,其 《釋言》。 則康成初説 此詩毛不 反,言甚難也。 又相接成矣。 **聿、** 通皆訓 駿命不易」、《釋文》云: 一。」彼 德即爾祖之德,故云述而修之,句 爲傳,孔疏 釋文云: ,原以爲「難易」之易,箋《詩》 出 今以爲發語詞,未知何本。 注 於王 鄭音亦,言不可改易也 述、毛義也、亦《雅》義 肅、 述毛,則仍用鄭説 「易,以 孫 天之大命,持之誠 毓 與? 或反,注同。」 「易,毛以 案,《大 也。 一。」然 時 義 甚 豉 見

> 蓋音隨訓異也。朱《傳》則訓從毛,音從鄭 之義。《釋文》云: 言文王與天同德,終首章之義,何前後之不 神在天,則已非合德之意,至末章,《傳》又 應矣。朱《傳》解 文王,此正見文王德合於天也,與首章義相 天無聲臭,難可 宣 昭 義 問 三,毛 「於昭」、「陟降」,皆以爲其 訓 倣 義,毛音儀,鄭 義 傚,欲順之者, 爲 善鄭 訓 如 爲 當法 字。」 禮義

大明

相顧

也

連及之耳。夫《文王》詩之爲周公作 作之以戒成王,不知 傳信之書,録其説以存 於《吕覽》,《吕覽》之言,出於戰 大明》、《緜》二篇,《 何 本,殆因《文王 疑可 集傳》皆以 也 國策 《文王》篇 爲周公 士,非 ··, 僅 》篇

尚未可確指爲周公,況此二篇乎?

相 猶大譏之,以 天命乎? 文、武、不言 必如敘説。」是謬矣。《詩 任、文王、大姒、武 旨矣。朱子《辨説 王,立言當有賓主也,敘獨言文、武,得詩之 有專歸,猶《思齊》亦言任 季、大任,欲言武則追本大姒,詞雖泛及,意 文王,此篇由 敘於文言德,於武言命,互文爾 爲 戾 武 《辨説 耶 王也。」夫文、武皆有明德、皆受天命 大明》敘 周 命王季也,況 則 爲 文而 南》敘 云: 禮 謂 樂 婦 E 及武。 》曰:「此詩言王季、大 皆 刑 僅 「文王 人 一而 政 美后 有 受天 一、姒 悉 明 任 欲言文則 》、《書》但言天 有明德,故天 德 出 妃之德化,朱子 一、姒婦人,亦 而 命 婦 而 總以 ,是何言之 天命之,非 人之手,及 前篇 頌 追 美 本 專 受 命 Ė 復 文

「明明在下」章,毛傳目文王,鄭兼指

明德 文、武 蒙,恐無 理,章末 之,下七章方詳述之耳。 興,繼言天之棄殷,愈見 首章爲全詩發端,先言周之得天,見周 爲泛然論 顯 敘言文王有明德,與天命武王意互相備 凡言「明 爲泛論其 首句「明明」言耳,若泛論,「明明」不得 以《詩》之「明 ,當兼美惡爲義,與敘不合。 ,爲 、此篇 又言 明」,皆爲美稱 理 理,尤不合也。 篇 ,則不然。 法 殷 之 明」爲文、武 而 總括 不言 敘言 有 兹 鄭 周,與 周 若章 案,詩 説 何得 所 之明 勝 以 全 首 矣。 明 主美 興, 獨 詩 徒 況《 德矣。 德 異? 絶 泛 此 三, 正 近 周 詩 論 總 所 解 皆 是 相 其 以 又 中 爲 指 而 以

之正 通 同 母 論 適也。」疏 庶兄」事釋之。 一天位 事 出《吕覽》,不見正經,何足深信 殷適」,傳 引鄭氏《書》敘 夫同母 궁. 加 紂 注 分 居 「微子 適庶,最非 天 位 爲 而 紂 殷

爲正 鄭據之以 一適,名稱自合,何必同母乎? 微子庶而 釋《書》敘,孔 長,故 爲 又據之以 元子,紂 少 釋 加 《詩 適 ~, 故 過

當别 注云: 當。 號,而 與周 則 國於薛 亦周 言,則周亦商之諸侯,不得獨名擊爲商, 商 此 於周。」疏申之云: 云: 不 墊 語得之。 耳,非 分 案、《周語》云: 有食采於王畿,如 爲 擎仲氏 必定在畿内,此未必然也。 云自彼, 彼此 既 擎國中女日 畿 三國 内 相 商 《集傳》以爲商之諸 也。 國, 任,自 湯 也,文義 「奚仲、 以 致王 信 自成 商 矣。 大任,從殷 彼 對周,故知 殷 仲虺之後。」夫 ,爲開代勳 「摯、疇之國 難 王 殷 周 商, 又《唐 時 通,不如畿 商 之周、召二公者, 追 八爲有 來 述 自 商 嫁 侯皆謂 書》世系表 而 臣,其子 天 之畿 由 其 于 言, 就 下之大 仲 内 畿 太 周」,箋 任。」 之説 則 商 之殷 内 虺 内。 孫 墊 雖 嫁 而 時

> 乎? 之後。」 大任 子,乃古公初 久,祖己事 云: 牒,故多謬誤,良然矣。 已生 宋洪邁言《 此 祖 己 語 於摯,安 武 七世 非 年 丁 是。 也。 ,其子當與古公同 唐 孫 書》世 徙 得 計古公在位 季 或 其七代孫 歷娶婦 於 系 摯, 表皆承 祖 時 己 尚 方 去 時,此 者 或 用 武 未 各家 於擊 爲 T 仲 時 未 世 虺

譜

《堯典》孔傳本 同 述毛 使行婦道於虞,並 證之,此本鄭箋,然非詩旨也。 之意,又引《書》「釐降二女于潙汭 于周」,詞甚明白 ,意優於鄭矣。 曰: 曰嬪于京」,朱子以爲 盡 謂 婦 「,何必 舜能 道 不如朱子所云也。 於大國。」正與《 以義 重言 理下二女之心, 以釋 疊 言 上句「來嫁 之哉? 以 ,嬪于虞 釋 書》 王肅 E 傳 況 旬

祥」爲善。 文定厥祥」,毛以「文」爲大姒有 鄭以「文」爲納幣之禮,「祥 文德

而

非 爲 求之,是當時 字作兩解,殊少 德,又言文王 云善者 毛訓 1 此 占, 了, 猶 祥爲善之意 意各别 云 1嘉禮 以 嘉禮因大 畫 禮定其ト吉之善祥 矣 , 耳。 也。 孔 姒文德 大姒賢,故文 疏 而 竊 以 申 謂 卜吉爲善祥,亦 毛 香乃 而定,毛意 既 言 嘉禮 ··, 則 王 大 聞 姒 文 一、毛 當 文 m

+ 里,有古莘 造舟爲梁」不 親 里。 迎 岐 于渭」者,當是循 幸 周 國 即 城。 在 今 今西 鳳 知過 二國 翔 安 何水。 府 肾在 府 岐 渭 司 Ш 而 州 . 渭 傳箋 縣 行, 郃 水 在 陽 之 無 非 府 縣 北 明文,嚴 渡 城 南 渭 所 東 二十 也 謂 Ŧi.

讀,本作船。 天子船曰艁。」《廣韻》云: 方言》云: 造舟爲梁」,造字慥、草、早三音 《説文》云: 艁 舟謂之浮梁。」《玉篇》云: 「造,古文从 以 舟 爲橋 舟。」 俱 口

《緝》以

爲渡渭、恐非是

如 造爲 必 義,餘 曰: 艁 注李巡 舟,大夫方舟,士 不全語矣。 義,言舟相 船舟 造,作也。 何 曲 作,是 便 此 至義 「艁舟,比 訓 於 其 日 成 皆借一 河 證 梁 詩 至 作 以 矣。 耶? 耳,觀古文从 僅言 而 通 舟 昭 比其 舟也。」然則 並 元 之,迁 于河 特舟」,本《爾雅》文 案, 年。 荷 作 比 舟 傳 不 ,比之 舟 孔 而 矣。 補 耳 天 疏 渡 舟 出 子 굸: 比 日 而 本 口 ^ 比 作 造 艁 舟乃艁字 見。 集 加版。」夫訓 爲 義 舟 舟 舟。」孫 傳》云 詩 止 比 艁 《左傳》 諸 舟, 也 成 幾 爲 侯 爲 何 至 本 炎 彼 維

如

於 幸 也。 纘女 維 長子維 幸」,纘 行」,莘 大 任 之 之 長 女 事 女, 者 維 維 大 在

⁰ 庫全書》本改 原 作 嘉慶本同 據 康熙抄本、大全本、《四

任 兩「行」字義本同,今以爲「女子有行」之 大姒之配 之 德 也。 文 王,亦 大 任之配 維 德之行,故 王季 , 維 德 曰 之行 纘 也。 ;

行

非是

或 西伯,已三分有二。及武王伐紂,諸侯 書、白魚之事非所欲言乎? 明。《集傳》於此三字不甚分别其 孟 天命,故以當之。 須一一有歸也。 王之受丹書,已云降德滅殷。 安之也。多生賢輔、年壽九齡、助之也。 命之。」疏申之云: 不期 津,白魚人舟,是又遂命之也。」剖析 保右命爾」,箋云: 而 會孟津,是又遂命之也。 源竊爲之説曰: 庶不人讖緯之説耳。 「身體康彊,國家無 「安而助之,又遂 然經文字義 發誅 義,意 民 於紂及 文王爲 心即 八百 虞, 文 丹 甚 渡

臨 敵 ,反曰「維予侯興」, 武王告神之詞,已稱周王發矣,至牧野 此 本 其 初 而 言也。

> 際,故 《緝》載朱子之言曰: 言此 稱之也。」義亦 以侯 抑揚其 而 興, 詞 通 即 且 知 使 彼 後 「予侯猶言我后,商 以 王 知 而 鑒矣。 亡, 興 至嚴

之

孔以 用 人協和之應,故孔 語 贗作,其可爲據耶? 父鷹揚發之,皆謬説 矣,故以清明 率衆先涉」此兩文爲證,且言 陳」及《六韜》「武王至河,雨甚雷疾。 止,則傅會殊甚。 之,然毛義正大矣。 下清明。」鄭易傳,解 心伶州 其説 得 會朝清 而 雨 鳩 反其義,可乎? 爲天 ,州鳩言 爲 明」,毛傳云: 助,而嚴 得天助,太公先涉,故 傳引之,證休命之意。 彼引《尚 陳 也。 至嚴《緝》以 清明 孔安國之言,本於《周 未 以 《六韜》之書,後 畢 書》孔傳「雨 雨 爲 而 師 止爲天助也。 昧爽,孔 雨,爲天地 「不崇朝 以 清 雨 敗 明 太公 以 者 疏 止 爲 耐 神 L 名 是 尚 畢 天 1

緜

及大 豳,在 首章爲大王居豳 室,大王何爲 若漆、沮 五 沮合流之處。 水 詞,合之毛傳 至扶風之地, 漆 不密 名 里 縣 物 泪 一,當 Ŧ 漢縣也。 今西安府 一徙居戎 疏 緜 在 自 在 栩 》語已詳 **>** 林 麻 詩 之 嫲 元廢 地 一自 遷 翟之閒,在今慶陽 陶 門,則 故 西 梁 一、二水 知 岐 ",明 邠 未 南。」孔 1土沮 事 馮 復 Ш 於《吉日》篇 公劉 世 州 踰 有 者,始於康成耳,毛傳 語 陶 在 復置。 東 梁 淳化縣 家 良是 穴」哉? 一今西 漆」, 于 流 仲達《緜 室 Щ 亦過 耳。 始 界,當 安府乾州 也。 豩 是 西 矣。 斯 扶 至 周 源嘗 今以 百二十里三 府。 正 館 風 岐 涇 地。」 詩 以 馮 之漆 水之 Ш 己 大王 城 又云: 公劉遷 疏 非 北 復 有 西北 굸: 漆漆 西。 泪 也 本 詩 宫 初

觥獻

兕、勝陰

春酒,諸禮

儀文物燦

然畢

真,

家室? 之。 諸 處」、「人執 夫遷 之居傳訓「土」爲「居」。 此 之居矣。 遷 無 再考《七月》篇所 沮之閒」,合周 言家室而 而 五章「俾立室家」、「作 未有」與 語 不 岐 是 穴之,則明以 公劉居豳,至大王已經十 岐之始 之事 應 説 獨 也 有 不獨「于豳 又曰未有 (五章「俾立」遥相首尾,彼既 不言廟,故補 在 宫 而 嫲 傳 功 室之證 繼 草 原與 於 矣。 之 復穴係之岐下 萊 首 日 稱 甫 斯 漆、 寢 哌 漆、沮 章 又三章 也。 陶 闢,復穴 其 館 廟 寒 廟,未敢有家室,蓋 即 沮 其未及 其 」見《公劉》篇 翼翼」並言,此 乘 向 述 至 爲一 土 即即 屋 墐户」、「入此室 一於蠶 傳 大 而 ?,是明 而 居 ,是明以首章 日 王 復之, 世,安得 ,爲古公初 此 一周 躋 居 績 避 理 周 裘 彼 狄 原 以 陶 原 (裳、稱 公堂 在 加 或 尚 此 章 其 去 矣。 岐 漆 無 有 章 因 止 到 壤 楙

538

既

定

即

繼

以

築室

、耕

田

事

相

接

續

次

、章之

章

追

數

遷

居

情

事

文義未嘗

不

順

且相

度

而

稱

之也

獨

不

思首章先

言

岐

下

風

士,

次

時。

則

見

傳

訓

古公爲

豳

公,

遂

謂

因

在

楙

則

見次

章

方

説

遷

岐,首章定

是

未

遷

預發之首章,决非毛旨。 「爲二章發」, 經營之次 宫 初 初生」, 原之民 後儒相習,莫覺其非,得馮 必 自 義 面 目 過 自 獬 ,故備論之,以俟後之博識 泥 而 應 乎? 傳釋「民」爲 來 與 若泥 則 下 此章之誤,始於鄭 諸 雖 豳 在 章 公爲未去豳之稱 岐 連 周 介,亦 貫 人,獨 成 可蒙 文 義方見毛傳之真 不 也 豳 者 미 m 公之號,不 證 ,則「民之 又古公本 成於孔 其 爲 周

子孫 喻 爲喻 胄而 誤 前 王 緜 認 也。 肇基 緜 先言其 詩旨。 蕃 箋 亦微 後世益微,不能如譽之爲天子,故詩 瓞爲 衍、 後 Ŧ. 云「縣縣 世文 瓜 先世之衰,故言 迹,則非瓞矣。詩欲 細 宗祀 之意 紹 人人用 而 延長, 然若將無長大之時」是也 學是 小 於先 瓜瓞 與 瓜,稷 1 爲 歲之瓜,稷 瓜 世 故 瓞,以爲式 1 實 美大王之盛 至紺是 年 者,專以 同意 爲 心瓞,大 微之 譽之 %, 以 況

之,但

不應太過

其

實。

況

同

岐土

始始

榛

蕪

而

後輪奂,方見大王創

造之美,何

得

以

翢

相

以爲立文之勢。

夫詞

氣

抑

揚

詩

人容

或

有

較,乃成文勢乎?

然箋、疏之致誤,其

故

有

室

工, 因

欲美大王

在岐

新

<u>v</u>

故

云在豳

未

有

孔

又

過

執

箋

説

曲

爲

解

釋,

謂

在

嫲

實

有

故

於首章之述

遷

楙

則

解之日

第,立言之敘,當

如

此

也。

康

成

誤

認

傳

意

岐土之荒凉,下章方言大王

相

度

不知二章傳安

得

豈

六

居

人所

能

辦

邪

?

則首章

所

言

其

爲

到

岐

周

追築室時

事

無

疑

也

首章

先

復、穴皆 土 室 復則 纍 土 爲 之, 穴 則

句法。 《傳》云 於土 寝,言於地 穴,覆、穴皆開 又案,古者窟 也」,引此詩。 物,爲古公所 居於窑内 地 爲 上。 之, 案,復 其形 矣、恐 上 陶,窑竈 地 居 皆 重 居 (字本作覆,《説文》云「地 其 朱子「重窑」之訓,不知 曰穴,皆 無 似 ,下又贅 隨 複 上以 此 窄 爲之也,高 地 理。 也。 竈 取 而 明 如 造 「陶穴」二字,不 復,重 況陶、 箋 陶 平平 然。」 云 地 地 復既各 窑 則 順 是 也。」是 復 鑿 也。 何 者 + 土 爲 本。 爲 爲 卒 首 成 朱 復

爲 頭 云: 枌 榆 烏 而仍用《釋文》之謹音,疏 頭者音靳。 堇茶如 「芨, 堇 堇茶如 則 堇 是美菜,非苦茶 一种。 飴,孔 飴」,堇字訓 朱《傳》從 郭 疏 E 云 爲 _ 孔 革 即 矣。 之 =疏 昔 類 鳥 内 者音謹 頭 以 則 八》『堇 堇 也。」則 釋 爲 艸 昔 訓 鳥

了其烏

頭

乎

若堇荁之堇

一,雖非

周

原

?

滑 名 者甘 美? 觀之,二 冬萱。」注 惡菜也。 毛傳 虞禮》: 而 又荼雖名苦菜、草木 菜,且其味辛,亦不苦也。 美之 亦 今堇葵 本草》: 鉶、芼皆有滑。」注: 茶則 然 美,故《禮》羊之芼、 自 地 如 云: 甘 此堇定是堇荁之堇。 革 能 矣。 飴。」若是烏 禮 物 也 味 以 又《爾 鉶羹同苦,若薇,皆有滑。 IE 使草 甘 用 嚴 堇,菜 苦爲茶, 荁爲 堇 是同 葉 美,茶亦 以 汁 爲芼, 雅》: 無美惡皆猥 緝 似 類。 味 柳 也。 非 頭, 甘。」《公食 子,似 之, 安得 甜 豚之包皆用之, 疏》言其得 苦茶、苦堇 鄭箋云: 滑,堇荁之屬 則 脆 齧、苦堇。」注 謂 堇 孔失毛、鄭意矣。 當云 堇 米,汋食之滑。 謂 大,豈 烏 屬 案,嚴説 非 頭 則 大夫 草,不當 類 乃 禮 合 霜 能變 同 乎 毒 菜 用 此 則 以 一二二十 禮 良是。 夏葵 物 苦 以 諸 云 雖 毒 本 甜 爲 非 孔 説 苦 得 脆 爲 肥

壤,豈能變爲 周 誤 證之,是康 訓苦爲茶、荁 地 獨 如 大 抵二菜元 飴 成注 爲 所 甘 堇屬 以 哉 《禮》,明以此詩之堇爲苦堇 美 ? 非 也。 ,即引《詩》「堇茶 苦 又案、《士虞禮》注 物, 若甚苦之物 但 未 必 如 如 ,雖膏 飴 飴 耳。 既

矣,孔雖申鄭

而

不得

其

意

隱

則》注 本注 《釋文》云: 之堇 案,苦堇 後漢 「石龍芮」 言其子也,人草部中品。 説文》言 唐本草》「水堇」言其苗也, 亦 無 孔 云 云: 生 以 復 馬 网 石 堇 詮 其 見《 融 爲 釋。 「荁,堇類。 上, 根 傳》注言其 一世 此 鳥頭,朱《傳》又從之,故 本草》,草部及菜部皆收 其葉 如 菜 一似堇 今案,堇、荁 薺 野 菜, 芮 生,非人 圃 . 芮 冬用堇,夏用 華紫,葉可食。 如 葉大。」是已。 然短 柳 人菜 種, 烝 小, 類 葉似 部,本 食之甘。 也。 故 陶 名。」 隱 堇 之。 ^ 唐 又 居 昔 經 内

> 華 有 紫 種黄華者 色。」李 ,氏《綱 ,有毒殺 目 : X = 1 人,謂之毛芹。」 此 早芹 也 又

宜,截 也。」 **畫、《說文》云:** 《釋文》作强,云: 語矣。 確矣。 今俗本 但作者以「乃」閒 耕,箋云: 於右,乃爲之疆 畝,授民田 誠 田 其 (居,乃 疆 也 慰、止、左、右,定民 然兩 又此 事 然又云: ,从二田 乃或體,又 此 「時耕日 也, 詩, 義 止 也,各分四 詩「 行,何 定 皆 疆 一,音與 宣。」乃治其田 場,乃分其 其 增 疆 是分其 之而 界 可 作 處,乃 土 疆 本 字,監 合 也。 彊、壃、 畳 作 理 義。 成句耳。」夫時 爲 亦作彊,同 同 經 疆 處 是 從 居也,疆、 矣。」 界, 本 孔疏云: 乎 地 之於左, 疅 畕 畝。」分疏 注 ? 宜、畝 理,乃 理 ,三,其 案,疆 疏 是 此 又案, 畕 居 不 辨 渦 耕 教之時 乃 理、宣 良反。 从 亦 本作 界畫 其 處之 泥 與 明且 乃安 土, 同 治 箋 土

田

比

良 章氏《考索》謂 鼓」、《考工 通 記》 用 「皋者,緩 「韗人 , , 周 禮 爲 . 皋鼓」,總 也,故以節 地 官 **>** 鼓 人掌 役事」, 鼓 也。

門,亦有應門,誤矣。 言皋門 諸 或 朱子辨之是也。 外作 朝門 爲 年《左傳》宋人 侯 官之外郭之門。一案、彼《釋文》言「澤門,本 朝 皋 亦有皋、應, 手 門 門者,豈 傳 也 也 者 以皋門、應門爲天子之制,鄭箋謂 毛云: 據杜 ,誤」,孔 服 毛 注,澤門 稱 孔 「王之郭門曰皋門。」孔 、賈諸家之説 説 皋門之皙,謂 疏 所據、當此 當 欲 宋築者謳言 矣。 證 是 鄭 宋 諸 が説 東 郭? 本矣。 侯 城 諸 引 無 澤 南 侯 襄 皋、 云: 門,不 門 有 公十 應, 「郭 則 非

Ŧ 爲羣姓立 正此大社矣。 **云**: 社 土,大社 泰 朱子謂大王初立 社」,疏 也。」案,《祭 云「在 庫 門 一岐周 之内 法 之

> 立大社 亦 有國 正 漢社稷證之,語見《大全》。誤矣。 社 侯不得立,何大社 武 未 惟 社 可 天子得立 王 證 乎? 、侯社,大 一通立 周 也 皋、應二門爲天子之 周 耳,安得天下盡 社 夫以下又 反 於天下, 通於天下乎? 且 有 以 置 立 漢 社 大社之尊 平 初令民 制 宁,安 況 得 漢 則 諸 又 立 侯

又爲 則 故今文王不绝恚怒敵人之心 王而 故」之故矣。 故,承上章立社言。 「今」義贅矣。 肆, 肆」字從 亦 今,義 作, 釋《詩》也。 故今也。」今,指文王言。 肆 ൬ 不殄厥愠 毛 推 相 **《爾** 解 本 反 又「故」爲因上之詞 ,又以「不殄」爲大 於大王 而 雅 郭 》「肆,故今」,與 兼 注 大王立社 亦不 通。」 乃 云: 應 · 隕 殊 以 厥 非《 文 也。 有用衆之意 《縣》詩爲文 問」, 王 肆 詩 Ŧ. 既 毛 即 爲今也 朱《 × 傳 事 傳 非 爲 ^ 云 傳 雅 故 同 新 則

柞

棫,《

爾

雅

>

云:

棫,

白

桵。」

音

緌

赤

其

説,不 有見 之言, 郭 物色形 豆,有 核,人本 可 材理全白 大全》引東 木 葉 食。 有 注 高 大 似 矣。 以 能辨 桵 與 五 如 枸 文 種 相 陸《 爲 ~ ~ 六尺, 朱 杞 經 Ŧi. 理 至 小木叢 皆與 本草》 疏 無 上品 意 其 而 味 陸《 陽 種 如 赤 狹 正 孰 據《三蒼》説,以 子, 許 莖 疏 郭 不 心者爲白桵。 長,華 胡 是。 相 生,有刺, 氏 閒 用 結 氏 》之棫,亦載《本草 多 桃 反, 陶 語 其 有 實者: 同 朱《傳》本 細 核 隱 申之,則 核 白 刺 而 朱 刺。」宋 ·; 子 居 爲 l 名棫 引 子 蜀 - -實 此 藥 以 附 獨 如 韓 = 爲 孔 ,是也, 爲 純 名 從 取其 莖 一大 耳璫 棫 家 蘇 保 證 疏 襲 蕤 生,紫 郭 即 昇 注 頌 陸《 並 儒隹 舛 注 説 紫 柞 ×, 如 然 所 云 云 存 矣。 疏 切。

鳥

此 詩 棫

耶 ? 豈非 爲拔,何此韻 殊,義實 本蒲 旁,蒲貝反。 韻作拔,从木旁。 又見曷、點韻」, 後人傳寫妄易偏旁, 八反 柞棫 於泰韻 相 因 訓 拔矣」、 耳。 擢。 獨 注 疏 爲柭 云「又見 云 則 《韻 柯 注云: 四 柞 平 葉 會 韻 生 棫 拔 共 隊 》拔字四 Œ 斯 然 而 韻 拔 拔 字。 生 禮 禮 擢 <u>,</u> 柯 於隊 韻 韻 [見,獨 之狀, 拔 葉 彼 字 也 \equiv 併 韻 續 l。」 柭 降。 音 从 注 收 於 韻 皆 云 之 泰 手 雖

而

兩

矣, 豈 韋 語 木 殏 非 昭 也。」孔疏云: 靡笄之役,郤 仲 注 困 昆 達 倦 云 乎 夷 何 ? 也 駾 未 矣,維 短 喙, 郭 憶 氣 獻子傷, 注 及 短 亦 喙之爲 其 云: 氣 耶? 困 喙 貌。 之 矣」, 曰 狀,此 困未詳。」案,《 今 又《方 郤 毛 江 以 「余 云 喙爲 東 足證 言》 呼 病喙。」 病,病 毛 喙 爲 義

74

毛

詩稽古編卷十七

非

言

良

紀

赤

作 殇。 字 注 韻 () 療字 通 亦 因 用 云 江 引 矣。 亦 外 引 東 傳 又《 此 呼 郤 詩 極 廣 語 云, 爲 雅 寮」,然則 》療 困 又 日 極 困 也 同 喙、喙、寨三 亦 療 訓 作 極 極 喙 也 亦 廣

紛 與 業 是乃 成其 也。 成, Ŧ 首 請 一動之 敘 尾 乃 成 平 大,故 成矣。 成 ~、行 義 案,成 非 義 也 虞 周家 合 而 爾,正指 -詩旨。 成、 同 芮 益 繼之曰「 言一 從此 乃鄰 疏 質 董 王業之生,大王始之 後 一大,正見文王之興,本由 云 厥 儒 成 相 歸 國結好之稱、《左傳》求 成一, 解「成」字、「生」字異説 或 皆 讓 蹶 周 詣 質,成,平 此 而 厥 者 傳云 文王 退言, 義。 生, 四 干 而 蹶 質 ·餘國,文之王 始 ·, 得 生 厂厂厂 而 争 質, 釋 成 與 成 愐 漸 其 詁 初 頭,文 成 大 今讓 猶 生相 和 E 文, 成 也 紛 平. 云

棫 樸

之,不 少,況能官人,不益見其德 文王之德, 夫文德雖 政教之美,見官人之 之惡俗。」綱紀之施,能使 人之化,能使汚俗 豈僅助祭之髦士,從 才之用,乃漫解爲天下歸之。 舟 奉璋,三章之六師,正舉祀、戎兩 朱子論興 楫 一,是策力畢 棫、樸、薪、槱,是俊 究其義, 體 最 宜其 輕,於此二興,止 ·
効
之
喻 八以敘 盛 新,箋謂 征之武夫 效 敘 一、恐助 四方咸理,則 耳。 爲誤 X 盛 所 盈 乎? 朱《傳》 謂 矣。 理之人 朝 夫天下之歸 已哉? 「作人者,變化 能 以 之 大事,見賢 數助 至次 喻 官 總 又言 亦 烝 歸 其作 字 也」。 章 不 徒 於 其 之 畢 口

孔 疏 亦以 棫樸 傳 》次 解 「璋」而 章 ·, 王 肅 不言瓚,則不 述 毛, 以 爲 以爲 不 言

非祭也 圭乎 不 ? 知 ? 傳 傳 云 肅 文 謂 質 半 璋瓚 圭 略 E 偶 璋」, 不名璋,疏引 不及 璋 瓚耳,安 瓚 之璋 E 見 基 獨 語 其 非 必 駮 半

而

仍

用

肅

説

以述毛,不

知

何意

恐破 興 質。 德,正 我王之勉 美之人爲誰,朱子曰: 之琢之,所以美其文。 政教之美,及於天下耳。 介綱紀 碎不成文義 勉勉我 一所謂 追 四 琢 勉也。」據此,則 方 「勉勉」也。 其章,金 王,所 矣。 上二 以 玉 綱 其 一語各 金之玉之,所以 紀乎四方。」或問 「追琢金玉 綱紀四方」,又言 相」,皆言文王 「其 《集傳》云: 1四字 相」、「其章」當 分爲 一,所 兩 以 之 美 「追 截 賱 其 其 聖 所

飾 也。 集 也 傳 相 》以此章爲興,失之矣。 追 周 金玉者其質,比其 琢其章,金玉 王之質也。 其 追琢者其文,比 相」,二 精 純 章 也 ·, 周 語 皆 王之文 比 喻 其 也。 修

> 《詩》,多於興 IIII 皆是,《集傳》概以 《詩》中比體,類 亦比 綱,紀爲絲之紀,以 駒 IĘ, 我 》篇 又以爲興,殊不可 心匪 相 也。 爲 金金 席」、「价人維藩」、「大師 形 玉爾 假象於器 況, 中 音」,同 分立 此 有 者 客》 喻我王 賦目之矣。 物, 解。 一比體 多有,如 篇「 句 圃 "獨此 法 一之爲 去 追 耳。 其 琢 「我 如 其 詩本比 政 維 但朱子 心 綱 似之稱 於 旅 垣 匪 爲罔之 ~ 四方, 」諸詩 石」、 也 白

早麓

德 者,得山 上二句爲 和 教。 山 首章 藪 一始以 殖,故君子得以干 之潤澤 -毛傳 興 爲 也。 興 純 也, 、體矣。 鄭易 用 喻 ^ 周 周 之日: 疏 語 民 禄易 申 豐 爲説, 其 樂,由 意 樂」,本不 林 謂 木 其 茂 君 陰 詩 之 美 盛 以 陽

之矣。 喻也 邱 先 楛 以 此 富 語 君 нП 魚 氏 祖 見 詩 足, 》遺 銮 喻 如 備之」。 德 雕 説, 單 百 、疏 而 君 即 其 Œ 受福, 子 穆公所云 ,其義同也。 詩 榛 Ш 以斥文王 陰 以 興 以 所 藪 、栝二木, 即 君 陽 以 源 意 養 以 魚 民 謂 子 亦 榛、 和 ,毛傳亦於 民 養 所取 此 自 以 爲 酒 民 括 得 麓 山 一,故 詩 乃 大 此 主, 藪殖 以 之旨 古人引《詩》雖多斷章 安得 正 材 王、王 章 物, 取 明資 不 也。 十爲興 解 興 作 以 應 而 也 謂 亦 季 用之 滋 乃 明 周 意 惟 物 惟 别 茂 紀 而 吕 萬 産 未 論 語 也 圃 論 || 記記 饒 實 賱 蕃庶 淡及 盡 草 物之盛 草 吕 喻 一,故 義 裕 事 木 君子 木 **>** 毛 記 舉 則 以 平 筝 財 傳 非 》用 ^ 殊。 多, 榛 承 ? 用 取 申 周 杰

彼 莊 玉瓚」, 貌 詩 毛 瑟 一言瑟: 無 彼 傳 柞 棫 뻾 箋 瑟 傳 一兮僩 云「潔鮮 云「衆 兮」, 貌 貌, 傳 云 案此 瑟 矜

> 則 璱,云「从玉 瑟」《 與 彼 釋 文》云 瑟本異 瑟 聲,玉英 又 字矣 作 璱 華 説 相 文》 帶 》引《詩 如 瑟 弦 **>** 也 亦 作

大 被飛 意 解 地, (遠去) 也。 本 以 則 潛 與 爲 鳶飛戾天,魚躍 「聖人之德至 魚 傳 一,魚躍 變惡 躍 萬 義 于 物 不 喻民喜得 淵。 得 爲 遠 所, 善 ,及箋《 是其 於天,則 乃作 作 于 人 所 明著 詩 淵 氣 人之義,殊 義 \leq 象 為飛 於 鄭 則 短 加 天 矣。 以 氏 此 戾 ≪中 鳶 地 天 尤 不 也 疏 飛 庸 爲 知 申 喻 道 此 於 注 廣 鄭 惡

燎 从 也。」又發與 「从火 袞, 火爱聲。」 段矣。 云 、从容。 民所燎矣」、《釋文》云: 燎别、《説文》: 陸氏 此 昚 天 詩 也。」案,爱, 古 引《説文》, 燎 字 文慎字, 鄭 篓 非 訓 祭天 箋 燎, 説 「燎、《説 熂 文》 燎 放 所 火 則 以 日 文》 也 慎 是

詩,乃直謂文王聖德本於内助,何耶?

后妃而不言文王,朱子猶大譏之,及釋

母賢妃並言,失輕

重之權矣。

周

南》敘

之所行,下爲子婦之所續耳。

《集傳》以

思齊》,「文王所以聖

也」,敘

語。

首

思

齊

文王之什下正大雅

毛詩 稽古編卷十八

於周姜、是此章專美大姒,而

謂

文王聖德

全由婦力也,謬益甚矣。

《思齊》次章,鄭義多勝毛。

以「宗公」

思齊」之「齊」,言大姒思齊於大任,又思媚

吴江陳處士啟源著

孫奕《示兒編》欲讀「思齊」之「齊」爲「見賢 正言所以聖,故專美大任之德能,上慕先姑 又 此 言 聖 章 謙其妃后爲寡德耶? 對異國之謙詞耳,詩方頌美文王之聖,反代 氏以爲猶言寡小君,最爲謬説。 符,較之適妻惟一之解,當出其上矣。 此箋云「寡有之妻、言賢也」,正與二書相 兄」、《康王之誥》「寡命」,皆以寡有爲美稱 謂寡爲寡有,兩見《尚書》孔傳,《康誥》「寡 之訓。「宗公」與「御」,孔疏右鄭,言之備 誥》「寡兄」義合,勝毛「適妻」之訓。 矣,至寡妻之義,並加申述,未置抑揚。 爲「治」,與《大誥》「御事」義合,勝毛「迓迎 爲「大臣」,與《晉語》胥臣引《詩》合,勝毛 宗神」之訓。 以「寡妻」爲「寡有」,與《康 寡小君者 以一御 源

四四 \mathcal{T}_{i} 安。 對。 六句 本 焉 下,令此士皆有 不从其 整,但判「在宫」 承「在廟」,各取二「亦」字、一「肆」字文 於宗廟,「不 俱 有 古之人二句總結上二事,於經 若從鄭,則 作擇者,不 言古人口 訓 ,以「在 鄭 (説 取 爲 猒 雝 惟 顯 官 雝 無 無 爲 名譽,成 四 爲 無 在 篇 爲 擇言,身無 此嫌 破 句 斁 養 宫 壁雕, 中 (字,較 承 老於壁雕,「在 字 訓 在 髦 異 章 爲 終 優 俊 官 而 屬 無 并 擇 二,「不 矣。 也。 義 擇 爲 行 适 同 斷 源 疏 以 又 |廟 章 聞 似 射 謂 文 身 竊 故 屬 斁 化 後 極 義 爲 章 此 有 四 未 郷 臣 取 儒 明 祭 相 旬 各

宗 爲 肆 云 E 雖 戎 而 妣 疾 雛 小 隱 不 雕 變其 以 而 殄 在 若 顯 宫 烈 説 有 臨之,保 假 臨 三章, 之, 示不 不 瑕」,毛以 雕 顯 毛、 安 亦 無 無 鄭 猒 臨 猒 異 射 爲大疾害之 也。一今 無 解 常 射 有 近 亦 所 則 保 儒 守。 以 皆

> 有 别 覯 訓 也。 也,然 其 其 云雖 上 上 此 今則以 不;不 (「不顯 成成 矣。 不不 守 爲 句 不 二語承 言 同 顯 案、《大雅 不猷亦有守哉 則 文,明 此顯 可 絶 既 爲大 也 君 尤 以 惟 之 以 上 臨 德 河抑 礙 例 而 語 難 顯 雕 源 是 下 豊 於文義。 此 自 II,則 雖 *\ ~ 德 謂 IE 獨 」、「肅」,言雖離、 詩也。 詩 絶 下 臨 言 不 戎 毛義爲 周 在 句 民 殄絶,光明 不 無 功 宫 疾」二句 頌》多言 言 顯 業 E 民 廟 不 至 民化上,意 與與 不 廣 優。 猒 無 乎 於 顯, 大 猒 ? 正 雖 特 「不顯」, 是 者 孔 兩 自 無 言 豈 亦 肅 連「 亦 能 申 説 無 猒 不 以 不 肅 皆安之。 毛 守 俱 玷 自 莫 射 顯 臨 長 此 缺 意 耳 可 相 者 子 皆 亦 於 顯 遠 ",此 通 反 常 自 成 德 以 民 反 ? 云

詞 用 也 「肆 字。 思齊》之三、四、五 亦 臨 肆,故今也。 」、「亦保」,言君 章、文 故 者 民 因 義 感孚之妙 相 上生下之 承,故 构

「成人」、「小子」,修德敏行,皆以學術言。「亦式」、「亦人」,言文王性與天合,故繼以惡人殄絶,王業遠大,皆以治功言。

章斷而意接,兩「故今」不虛設矣。

「古之人」,謂古昔聖君,非指文王也, 毛、鄭意同。王肅云「文王性與古合」,是言 古人,正借以美文王耳,於義自通。李氏以 為指文王,非是。《詩》言「古」多矣,「自古 有年」、「古訓是式」、「自古在昔」、「振古如 兹」,未嘗以近世爲古也。東萊引《典》、 《謨》「稽古」爲證,亦不然。以《典》、《謨》 「稽古」目堯、舜、禹、咎繇,亦後儒之臆説, 孔氏《書》傳,不作是解矣。

「擇」者,然則作「斁」而訓猒,乃王肅述毛如是斁字毛無傳也。 疏亦言「斁」字經本有作於有名譽之俊士。」《釋文》以爲此王肅語,於古之人無斁」,傳云: 「古之人無猒

《詩》學有毛、韓二家, 此。 有他據,不足信也 又云毛音亦訓猒,殆習而不察也。 當毛義,而 立解,後儒傳寫,誤讓王語人傳,遂以王説 詩》作「無擇」,此特因 不言作「擇」者係何《詩》,而董 本,故不疑鄭改經耳。 詩》,元有擇、斁兩文,鄭、王述毛,各據一字 是《韓詩》,則當指毛本言矣。 毛無傳,安知不同鄭爲「擇」乎? 目 鄭 爲 易傳。 「疏語」 圃 陸既知傳文是肅語 疏云作「擇」,不言 幸「擇」字尚 而臆度其然,未 竊意古本《毛 逌 廼言《韓 又孔疏 存 唐 他 世

皇矣

三: 大王居位,當商祖甲之世,時商未有之事,殆非也。玩經語,與大王事不合者有首二章傳、箋本指文王,後儒以爲大王

邪? 又遷 大伯 業之基 萊 以爲大王事者,徒以二章言刊除之事,惟遷 自 後 得 避 秕 溯之詞, 岐之始當 之,則當云「至」,何云「自」乎,三也。 舍,轉荒翳 云「帝遷明德」,七章云「予懷明德 一章當言大王耳。 亦 追 大 云 狄 政 程 伯、 漸 溯其前代 受 遷 王季」,蓋謂天之興周 也 至 闢、文王地 遷 岐, 命 然終 愈 何 王季之時已然矣,若 有之,又三、四章 章 而 譜 豐 既 勢 云 二其 成膏 述 一,連 首 身 最 固一乎? 故三章云「帝作 干 微弱 爲 二章之言文王 政 作 腴者也,豈 季,以「自」字發 廣民衆,倍加 諸 殊不 不 兩 侯, 後 ·獲」乎 都 一也。 当。皆翦 知 未嘗 経難寖 生聚 · 述 邦 ? 能 王 受天之命 以 而 先言文王 由 也。 榛 無 邦作 於大王 季之 生明 彊 漸 大王 事 也。 蕪 %端, 盛,爲 蕃 況 於 m ~德,首 對 君 兩 後 爲 則 順 次 刊 爲 大 ら、自 一時 也, 明 儒 敘 而 追 除 廬 草 何 Ŧ 王

> 《齊詩》者而爲此言,則首二章之美文王 郊 德 毛、鄭二家之説 維予宅」,言 祀記 三前 後 》載 相 王 應 天以文王之 自 衡 矣。 奏議 應 屬 云 文 王 都 一万乃 矣。 爲 居 眷西 又《 也。」衡 漢 顧, 非 此

言,

《詩》「宅是鄗京」,王充《論 矣。 宅、度二字 度」是天意,則下語「上帝」,不複 度」,亦應指 與宅」,石經《 也。」「此 「究度」爲天 度」字,疏述毛意,亦引《皇矣》傳 度」、《公劉》「度 鄭 「爰究 其 訓 維與宅」,傳云: 政不獲」,指二 度 通 爰 四國 意, 爲 用,皆待洛 度」,傳云: (堯典 謀, 四 其
隰 言, (》「宅 語文義 非 句 原 占 法 嵎 反 國 」、「度其 義 本 衡》引《詩 不倫 而 宅,居也。」蓋 夷」,「宅」皆作 究,謀。 同 訓 又 也。 則「 矣。 居,傳義 出 ^ 夕陽」,二 ,訓爲居 禮 平 爰 》一此 程 記 ? H 度, 究 子 維 引 允 古 居 究 以 爰

又《小爾雅》云:「里、度,居也。」義亦

相合

之」「之」字無歸著,不如毛説之當。 之」爲「所欲致者」,文義全不與經合,而 之實也。《集傳》用或説,改「憎」爲「增」,訓 鄭謂天須假音暇。此二國,養之至老,取義 同,憎其以淫虐之人用大位,行大政,正惡之 致」,本《武》頌毛傳,較爲有理。 式廓」爲 但以 「上帝耆之」,毛訓耆爲惡,鄭訓耆爲 規模、皆臆 下語合之,則毛説爲允。 創之解。 惟 訓「耆」爲 但 憎、惡義 解 老。 「耆 一耆 亦

宅之,語意 漢世皆作是解 議見本篇首條。 與之居,言天意常在文王所。」此與 帝遷 「此維與宅」,鄭云: 即即 相 此 應。 義, 意 定有本矣。 同,皆以 遷 且天 而 無首! 就 文 爲 「見文王之 始 目 王,與之居也。 天 而言 則顧之,既 居之。 [顧,天 匡 下 德 衡 無 章 丽 奏 丽

> 形體 《集傳》曰: 若言居天子位,是經文乃不宅之語,必須鄭 言何所宅,正連上「西顧」爲文,謂宅西 宅岐爲天與,尤非 以王天下。」鄭漁仲曰: 經意 氏代補,尤屬謬見 天始與之。且周之興以修德,不以宅岐,誇 周自后稷以來,世居西土,不必至文王時 説小異,而以 不 而言宅,其爲 可易也。 汀與 以 此 宅」爲人居之則均,殊不知 -詩指。 假託之詞 程子 岐周 日 與大王爲居宅。」三 可可 至詩言 又同,古 與居 使 「與宅」,不 天子 其 注 居 位。 一妙得 西 土

者欲形容生聚之蕃 不材而去之,孰爲 刊除之事。毛、鄭止統爲一義,並不言孰 作室治田。作、屏、修、平、啟、闢、攘、剔,皆 所主耳。 《皇矣》次章,首八句,言 [《]埤 雅》論 美材 刊 非講 除次第, 加 論樹 留之也。 刊除林 謂始之所去, 蓺之法,意有 蓋 木, 作詩 爲 以

也。 此 以 惟 述 树之材於檉 栵 材 剔 |屏||爲 容之, 也。 其 義 檉 木 意 爲 持 之 優 椐 説 枯 而 夫 以「修」、「平」爲 拔 矣。 則併一 終 廣 其 上弊者 去,「啟」、「辟」爲 其 《則及其材之美 之。 一、椐 美,然 朱《傳》 煩 去其茂者 椔 冗,使 也 非 翳 \wedge 祖 詩 名物 得 灌。 既 程子 之正 成 疏 而 疏 而 長 芟除,是去 密 又 民 恉 之説,以 宜 辯 次 益 得 是 二 且 及其 之甚當,兹 衆 宜,「 留 者。 未 其 作 復 聞 材 攘」、 **熈**、 美 其 闢 灌 柘 材 地

柳 則 栭 椔 草 衍 即 网 木 義 雅》 椔 栵。 鄭 疏》謂之 謂 翳、 灌 注。 蔆、 非 一種,河 灌、 木 椇 栭 春 雨 名, 材 栵、 柳。 師 柳 人 可 餘 君 檉 人 又大寒不凋 天 爲 五 將 藥, 燕 車 椐、 木 食 轅 क्ष 皆嘉 一年 之庶 先 見 概、 起 陸《 柘 植 氣 ,有松柏之 羞 秀, 疏 八 以應之, 也 者, 見《 寇 内 氏 河 除

> 言在 王 川 爲 周 歸 刊 人,而 瑟 爲 古注 性 一,清 哉 之 禾 之 懷 除之列 馬 四 靈 此 日 4 黍。 興 解 鞭 與 饗異常 而《草木 也, 衆 自 壽 及杖。 意 槁、 者 則 興 木 在 轉 繒 然合杖 衰 詩 僅 椔。 即 彼 榛 時 椐 氣 ·疏》亦言其 材 老 概、 不 特借 弊、翳。 棘 袁 象 又 圃 似 不 爲 圃 中 可徒 微 柘 之 竹 此 室 林 弓。 宜 須 於 事 以 廬 麓 泥 叢生灌。 蠶 有 削 見民 草 節 耳, 其 其 榦 節 漸 理 木 中 取 詞 五 豈 一,見 變 之樂 衰 而 腫 長 其 者 也。 也 爲 所 可 八 之木 似 絲 皆 漢 化 就 民 知 扶 九 以 若 有 以 書 居 尺 有 老 美 從 同 弦 宫 詩 用 耳 文 伊 在 廟 於 琴 師 人 口 圍

一行 阚 生 疏 雅 文、《 其 E 謂 灌 栵 葉 其 ۰, 説 如 栵 丽 文》亦同。 榆 朱《傳》从之,不 皆 傳 以 云 爲 郭 木 注 名 栵 謂 也。 子 栭 知 如 程 也 何本。 細 子 此

又古人文體 文》例、列兩音。一元諧 行生相 程、朱之爲此 列之義 配成文耳,不知字訓須有 且 不 解者,定以「栵」字 似後世之拘 經 列聲,何嘗會行列意 文灌 1、 例同 ,豈必兩 句,欲 本,例字《釋 木旁从 取 网 叢 相 乎 列, 生、 ? 配

Ì

乎?

是

栗,其 是已。 也。 栗之稱舊矣。 華,秋實冬枯爲 굸 栗,注以爲樹似槲嫩 名榛栗,見《邶 《旱麓 栵 江 ,細栗。 亦名 栗種最多,其小者有二。實如橡子者, 又《草木 淮 實更小 之 杨 如指 閒 今江東 一栗,見《大雅·皇矣》篇,《 **《筆** 呼 頭 *\ « 圃 異耳。」 疏》 者名 小 木 談 鄘》、《曹風》及《大 呼爲 栗 釋榛 與 》及《埤 而卑小,子如 茅栗,即《爾雅》之栭 此 爲 栗 栭栗,楚 栭栗」,《 亦 栗 不 指栵 殊。 云: 雅 也,然 呼爲茅栗」 謂 但 「又有 廣韻 當爲 春 細 《釋文》 、雅》之 栗者 生 則 * 夏 苹 茅 茅

> 栗,茅字乃芧字之譌,未知果當 否也

説,謂 未安。 歸,字義、句義俱乖 滿,古無 所主也。 克當帝心,又言民歸 民之歸周,皆於刊除見之,若乃習行常道 益大,天意徙就之以 「串夷載路」,謂周家習行此常道,至文王 文王之德,與上章 昆夷, 解。 民之歸周者 帝遷明 至程子訓 王肅述毛,以「載路」爲 而滿路之解則從程 《集傳》從鄭,以「串 此 字訓 德」,謂 也。 「載路」爲滿 滿滿 舛 西西 此。 天意 之,本語 且 路 而 顧」、「與 上言 而 難 毛 去殷 不 通 訓 夷」爲 絶。 帝遷,不 矣。 義 路,後儒 路 居大位,文義 而 相 爲大,當 即 宅」相 夫以 案,此 承 患 周 尔,各有 夷,云 言 載 仍 徙 章 民 其 則 爲 就

字,當从女旁矣。 配 」,毛傳同。 阚 雅 . 釋 毛不破 詁 故箋、疏皆 **\sqrt{** 公字,作 妃, 娩 傳 解 也。」「 時 爲賢妃,而 經 文「 天立厥 即

道

恉。 加 天立 大 ·吕《記》、嚴《緝》从之,義 朱《傳》則宗鄭 姒 厥 妃」,則益信 之。 爾 雅 而目爲 矣。 **>** 某 歐、 氏 大姜 雖 注 可 程 亦 通 解 引 爲 然非 此 配 詩 天 詩 云

然下二 謂 何 士有 斯 人」,是也 Ш 拔 」之「省」,正合斯義,故鄭用 和 小松柏 大事 純 爾雅 其 一語難 釋《爾雅 風 了,省 斯兑」,正 雨, 後 通 於 儒 矣。 》,反云未詳 使 其 以 樹 君」,鄭 訓 又《禮記 木 所 善驚俗 茂 以 省,善也。」「帝省 善其 注 盛 其義乎 ,仍爲省視 非 「省」 大傳》「大夫、 其語。「柞 111 徒 也 亦 春 訓 其 鄭 解, 民 又 棫 其

直也」。 詩 訓 而 調 通 兑 本 解 一,行道 直,各隨 行道故言成蹊,松柏故言其材 》傳 卦 云 而 名, 説 文 成成 言通 釋 蹊 之耳。 ,即成蹊意 也」,《 其 本 《集傳》兩 義 皇矣》傳 也。 也,以 字 云「易 松柏 户 兩 見

> 連 路 爲 通 通 「松柏」爲句矣。 」,又云「木拔道 迁 矣! 因 解 之 通」,竟 E 此 志 言 此 Ш 詩 林 之 「斯 間

者,相 兀, 之妙也。今以對爲當,未見其 共治民,民失所則無以 「克配上帝」,意 云: 白仇。 須之義 帝作邦作對」,傳云: 作 配,謂 天 以 ,天須君以代 君 ĪĒ. 生明君 爲 同 配 爲 故 故 也。」 君 配矣,此 以 治 日 案,《文 臣爲 勝 民, 對 對 古 君 E 配 配 人字 須 配 故故 也 王 臣 法 以 篇 簺 配 日

引《詩》作「文王」,復云近文德矣,申言九德 爲「文王」,則毛本作「文王」可 王」者爲正。 人不敢追改。 王」,是異讀之驗。 王」、《詩》疏及《左傳》疏皆謂 左傳》 引《 此經毛 今王 皇 一肅注 以 矣》之四 無 源 傳,王 意 及《韓詩》亦作 論 之,當 章作 述毛者也 師 知。 有 異 以 《左傳 維 作 讀 此 而 文 文 文

非文王不足當之、鄭以追王爲説、殊費爲文王之德、則傳文決無誤。況王此大邦、

箋既 道,義出《 回矣。 云「善也」。 爲善、《爾雅》文也。 察是非、分善惡,特明中之條目,尚未能 事之是非,分人之善惡,一「明」字足 明義,安得 何必增立「類」名哉? 若聖人明 履,與「明」分知、行兩義也,解「類」字稍 詩》凡言「類」,多訓爲善,如「永錫爾類」、毛 照臨 明 云「類,善」,又引《左》語實之也。 爲知之,「類」爲踐之,蓋轉肖似 明、類二字,程、朱俱不 四方言明」其爲義廣大也。 朱以察是非、分善惡二義相配,夫察 左傳》,是《詩》説之最古者,故鄭 加 分 秉義類」鄭云「善 配 類義 勤施無 乎? 也 私,乃人君之善 不如《左 用 古注。 皆是, 無不燭,則 至「類」 傳》 盡之, 爲 程以 訓 以 盡 紆 踐

> 謂「克比」即「比文」,尤非 毛皆依《左》爲解,則此兩字當分爲二德,孔 義與下「比」合,不已固乎? 定所比何善也; 德,不主於比意,各有指矣。 俱可通。 釋「比」義重於「擇」,孔釋「比」義偏於「從 以比方文王。 而義殊。 而從之」,杜云「比方善事使相從」,是服、杜 意、言服、杜注皆不得 是一意,順、比是一意,彼徒求文義整齊耳 不妄矣。 毛引《左傳》「擇善而從曰比」,疏 上「比」擇善而從,惟取其能比,未 又嚴《緝》謂 但「克比」之比,與下「比」字文同 案,服 下言「比文」,是專美其文 云「比方損 其 明、 毛旨。 解,當謂 類 又「比」與「文 是 孔欲彊 益 擇 意, 古今之宜 「克比 善 長、君 申 而 其 從

似父者,安有稱父而美其似子者乎? 斯已文王。盛德以聖人爲匹。」世有稱子而美其「比于文王」,箋云:「王季之德,比于

皆安。 李氏説 矣。 比 此 傎 謂 指後人言。又「文」爲一德,與 「文」,意當 矣。 以於上代文德之王」,見《左傳》疏。 「文」字,乃美德之泛稱,不專 「文王」,非西伯昌之文王也。 毛用《左 但《 ,謂後 朱《傳》訓「 《左傳 與 世 劉 傳》「經緯天 亦 同。 比 繼 此 2于」爲 箞、 其德,比于文王 文爲 疏之申毛,恐 九 至于,吕《記 地 德 八八德 指謚 劉炫 之 語 較 同 以 爲 號。 , 不 於於 云 例 未 釋 明 合 此 所 義 優 可 則 應 用

《左》。 動 之者,孔據《公劉》傳述毛,謂文王之德 之,不徒人恨之。此詩毛不 愆 也 作作 輒 其 「德」字總上凡德言,《左傳》云「九 鄭 事 德靡悔」,言德盛如 有 謂 無 悔 德 悔」, 悔 比 文王,人無 在 乃此 事,不 詩之正 在 (此,無 以 ·爲 德 不 解。 傳, 也, 應 可 意 自 薄 EK 悔 之舉 應 亦 德 不 而 爲 德 悔 同 悔 之

> 皆以 援取。」 箋云: 韓詩》云: 韓 恨 悔 而 無 ^ 漢 然 王季比之、《集傳 |指德言,與《左》毫釐之差。 畔援」,傳 • 「畔援、武彊 敘 畔 傳 援猶 <u>云</u> 跋 也 **\times** 謂 無 扈。」《釋 一。」鄭義殆本 是畔 項 其 氏 德 道 畔 無 文》 無 换 遺 於 引 黜 是

鄭以 之。 詩 典「到彼岸」之義 訟,皆迂。 爲用兵發端,非講學也,未敢奉 ^ 阮、徂、共爲三國名 毛 集 誕先登于岸」,岸字毛訓 以 傳 阮 **》**云: 程、王兩家 、共、旅 也,晦 爲 岸,道 周 取 菴 地 涉 而祖 之 蓋 名, 川 極 陰 而 濟 高位 襲 至 一旅」爲 難 爲 徂 其 處 義, E 鄭 爲 意 解 徂 此 訓 庶 往 國 然 内 近 獄

黨比

恐

屬

臆説

跋扈

也。《皇矣》篇

曰 :

『無然

畔

换。二

顔

我巴

漢。」師古

E

畔

[换, 彊

恣

心之貌

猶

又本

鄭義。

朱《傳》

祖毛,得之。

正

叔

訓

爲

之,鄭 之旅。 莒音相近,故異文與? 者良是。 案、《孟子》引「徂旅」作「徂莒」,以旅爲地名 説,有當並存之,不必斷其孰是者,此 之。兩家之說種種差殊,然毛之師傳甚遠 殆未必然。 甚精,亦用 鄭説又本《魯詩》,非 以阮、 毛 莒非《春秋》「莒子」之莒,《孟子》疏誤。 以 鄭説、皆非無 徂 阮 共 共 爲 爲 出臆見,而皇甫謐致據 密 密 稽之談 人之黨,而 人所侵, 朱《傳》以爲密 也。 而 文 文 先儒之 類耳 王 王 旅、 師 侵 遏

音乎?

者,其 用此説《詩》,而諱 三十二年,密人降於周 「帝辛三十二年,密人侵阮,西伯帥 以 (説本 冗 爲 於《汲冢 國名,密人侵之,文王因以 其 (所自出 紀年》。 師,遂遷於程。」宋儒 \wedge 紀 年》云: 師 伐密。 伐密

旅」、《釋文》云:「按,安旦反。本又作遏,《爾雅》「按」、「遏」皆訓止。「以按徂

其證也。 安葛反。」是 人七曷韻,注云「捺也」,引《白起傳》「按據 通,但按字並 上黨」爲證。 朱《傳》按亦音遏,豈宋世 此 無 然《史記》注並不音按爲遏,非 詩 遏音也。 按、 遏二字俱 《韻會 可 以始收 用 義 有此 按字, 亦相 俗

人傳寫而誤脱與?惟《集傳》本無之,未知文公削之與? 抑後惟《集傳》本無之,未知文公削之與? 抑後及石經皆同,吕《記》引《孟子》亦有「于」字,「以篤于周祜」,注、疏、吕《記》、嚴《緝》

鮮。」此《釋山》文也。 在前者爲正,則亦宜 云: 鮮 「鮮,善也。」此《釋詁》文也。《爾 周 書 皆息淺反,則 「鮮,息淺反。 度其鮮原」,毛云: ・和寤 解》云: 上 讀上聲。 又音仙。」二音並 聲爲正 「王乃出 注云「不 圖商,至于鮮原。」及 矣。 小 相連」。 案,「鮮 Щ 雅》釋文二 ^ 别 詩》釋文 大 鄭 原」見 存,以 Ш 云:

于鮮 孔 在岐之陽,不 邑在漢爲安陵、《前漢· 汲 疏 原。」直言是地 冢 亦以爲去舊都不遠、通 程 紀 寤 年 出 · |-| 云: 程 百 里。」即 典」,謂 名 帝 孔 辛 程 地理紀 五 此 晁 邑,《 + 也。 以 年 爲 鑑外 周 周 又案,周 近 書》「文 紀》 始伐 岐 「安陵 ž: 周 殷 之地 闞 之程 E 「鮮 秋 「駰以 次 在 原

爲本周之程邑。」即

今西安府

咸

陽

縣

説 中人 中 説 所更。」 吕、嚴諸 人,不以年長大有 不大聲以見於色。 和 述之,謂 少少 以上所能,不 ,學養純 不知疾 不 傳以 長 儒 Ę 各立 若 不 「夏」爲 夏 言遽 粹,方可信其無,鄭 以 大其音聲以 一説,源 革」, 「大」。 色,賢者不免,惟 所變革 斯 足 革,更也。 義 以 漢 孔 美文 優 毛、鄭 氏 獨 於幼 矣。 取 取 見 (王,故 孫、 毛義,毛云: 時,言其 於 不以 康 及 宋 何淺 聖人 顔 成 王 别 謂 色 程 長 視之 德 家 大有 爲 是 天 而 張 性 性 之 立 乃 加

> 傳乎 哉 ? 彼 立 説 紛 紛 莫 能 相 尚 何 不 返 求

文王征 之方, 之云: 亂 親 倫 詢 此 是忿 西 自鄭 猶《兔罝》之「好仇」、《 人也,「鉤援」、「臨 同,乃往伐崇。」此解甚當。 次。 謀, 無 親 伯 章文義 章矣。 兵,非 用 之 事 備其 詢 和 伐, 義, 若以 實之,則文王此舉,乃 怨耦曰仇 阚 同女之兄弟。 論 詢 義兵 既言 器械,然後以之伐人,詩語 仇方」,毛云: 詢之同 又後漢 詢 謀 之,「仇方」、「兄弟」,皆共 仇 於女匹己之 也, 親 爲 之訓 衝」,皆攻敵之具 姓,謀 親 伏湛,治《齊詩》者 征 何以 又 伐 而 假樂》之「羣 君 於羣 説 爲聖人 則 後 仇 臣 臣 用 謂 方言伐 儒 臣 兵 爲 既 臣 遂 以 兀 合, 一之事 哉 爲 修 因引此 間 以 也 (也,同 仇匹 怨 崇 元 親 其 也 而 忽 事 又 侯 戚 伐 疏 本 也。 者 有 其 之 以 雜 及 和 申

證之,意正與毛同,尤足徵傳義之當。●

甚詳。 古音爲然。 作隆。」案,古臨、隆字同音,《古音考》引證 然今北人土語 爾 臨 衝 」、《釋文》云: 猶 呼臨 爲隆 臨,《 則 (韓詩 不 僅

崇,乃降服之,非破滅之也,固 圪 云 矣,傳義得之。 旬 案,《左傳》僖十九年。 不降,後伐之,因壘 圪爲高大,箋以 「牆高貌」,引此詩,正與傳合。 言言」、「崇墉圪圪」,傳以 又案、《説文》「仡 爲 宋子魚言文王伐崇,三 將 而 壞 降。 皃, 意 則文王之於 無 作 事 正 壞 :「圪」, 言言、 相 其城 反。

굸: 以爲並 朱《傳》曰 黄帝。」「蓋」者疑 是禷 祭二神, 碼,祭造軍 「謂祭黄帝及蚩尤」,合兩 是碼」,疏引《周 殊 詞,「或曰」 失 法 者,其 先 儒之旨。《大全》引 (神蓋 禮 一者存 蚩 肆 説 異 尤 師 説 爲 或 也 日 注

> 漢興之初 古禮如是,康成不當爲疑詞 漢書》高 諸 帝祭黄 事 草 帝 創 蚩 豊 尤 必 於 矣。 據 沛 古 庭 禮 以 哉 爲 證 夫 使

注曰: 《王制》釋文又音百。 之義,皆從「百」音 爲百爾所思之百。」取 及《説文》皆讀爲罵,《 其先神。」此誤 如十百之百。』《甸祝》 音、《詩》、《爾 既 周 伯 禮》作貉,亦 碼、貉、貊三字,文**異** 是也 「禡者,馬 疏 雅 矣。 云 × 作 也。 也。 ② 王 新,餘 馬 伯者,長 多 疏 《肆 祭謂之伯、《吉日》之 制 肆師》釋文又音 馬者,兵之首,故祭 應邵《漢書• 獲禽 引 以《周 書 而 也。 杜 師》注云: 皆 義 子春云: 牲、應十得 馬之祖始,故謂之 作 同, 禮》諸 禡 師 敘傳》 祭也 釋文 「讀 陌 「讀 百

●「尤」,原作「大」,據康熙抄本、大全本、《四庫全書》本、

同,《 案,「類」《説文》作「禷」,从示類聲、《爾 伯 伯。二 文作襲。」 伯、馮爲 是 乎 爲 師 玉 既 祭,祭黄帝、蚩尤。 碼,增入去聲 篇》云「或作臂」。 伯 一祭,殆因 韻會》於碼字注引《吉日》詩,是 既 禱 是 馬 應 禡 《爾雅》有明 祭 而 韻 祭 誤 中,誤逾 樗,或省作禮,籀 天 也。 外馴。 IE 是 文,可 甚 韻 類 矣。 》遂 是 溷 雅》 禡 又 讀 溷 爲

或 非 秦之 帥 取 道 附 亦當言祭,傳義 出 一,即行於弔伐 文 師 焉 其 Ŧ 與 存 爾。 侵崇, 臼 先祖、爲之立後。」致、附 是致是附」,傳云: 八國,當 乎? 一克崇,復 案,崇國見《春秋》宣元年,晉趙 不獨崇也、《春秋》時 在 、時,賴 徒 允 雍 秦急崇,必救之。」是崇 挂 矣。 地 於 ,與故崇相 傳語得見之,源 且 此,故東周 古 「致其社 人繼絶 與 去 黎侯失國 不遠 之世,其 禡 . 稷 存 羣 連 深有 亡之 文 神, 乃 穿

> 類 中之國名 奔 及《左傳》。 矣。 衞 後 狄 也,誅 相 豐 在 舒 殷 其 復 君 畿内,乃 奪 其 而 地 存 其 文王七年 見《 祀, 詩 亦崇 邶 五 風 之 伐

事,遂以「受命既固」爲天命大王,因 王、王季有是乎? 畏小懷, 駸駸乎有一統之勢, 方足當之, 大 者,縱非赤雀、丹書之謂,要必三分有二,大 也、《禮》不云乎: 命王季。不知「天命」二字,非諸 文王,三、四 王、王季也。《皇矣》、《集傳》言首二章天 ·詩》、《書》皆言天命文王,不言 章天 八命王 朱子以首二章爲大王 惟天子受命於天。」 |季,誤矣。 侯所敢 夫受天 併謂 天命 當 命 命 天 大

靈臺

靈臺》篇先言靈德及於民,次言靈德

獸,樂 教所係,非娱游之地 靈臺以望氛祥,壁雝以造俊秀,乃國家大政 納牖之誨,斷章以立言耳,豈詩之正 朱、吕以爲述民樂,説本《孟子》。 通,故合樂以詳之。] 此足盡 及於物,終言靈 而 文王立靈 知 鳥 壁雕,正 與民 | | | | | 臺 同 得 鐘鼓 丽 以 德 其 知 驗 所。 見 民之歸 管籥,聞 民 也 於樂,意 物 以 之和 爲 附,作靈 而 聲 一篇之大恉矣。 凡 色喜,是 音之道 也 然臺 層。 囿、 笺 旨 哉 孟 池 與 靈 云: 然合 子 鳥 政 沼 ?

鄭 之也。」《國 也。」諸家語異 孟子》注云: 不終日」,恐不然。 而 申毛云: 施 不 力 日成之」,毛云: 也 四語》章 一,雖多 「不設期日 而 「不與之相 意 昭 同。 注 工作 云: 豈 《集傳》以「不 能 自有次第,非 而 不不 期日 示不 不 成之也。」 終日 程 日 限 有 課 而 自 成 以 H 趙 成 來 口 時 也 雜 爲 成 H 岐

> 是也。 乎? 所爲」,是特從不終日 之精明」、《説苑》云「積愛爲仁,積仁爲 神之精明者 又 蘇氏 靈 臺 靈 之靈, 稱 訓 靈 善,亦通。 」,鄭云「文王化行, 本指 取 義 文 而 王之 朱子 已。 謂 德 言 如 似 靈」, 神 毛 神 云

樂, 以爲 爲德化之所感,一也。 圃 王德化之無不 微之物,亦各適其天性,正見萬物得 必靈道之行? 致儀舞之祥,文王民物含 一以 鹿之馴、鳥之潔、魚之躍 嚴《緝》譏 樂 而 播 偏也。 毛傳 嚴語 其和 非是。 癜 案,虞舜《 一 以 道 行於囿沼」之語 和 和 鹿與魚、鳥, ,皆性之常,豈 而被之樂,其 簫韶》既 而有鼓鐘之 所,文 至

翯。」《説文》云: 申毛云: 也。」《釋文》引《字林》云: 毛傳云: 娛樂 濯濯 游 「翯翯,鳥 戲 亦亦 一,娱游 曲 肥 也。 白 澤故也,二者 肥 鳥 翯 澤 白 翯 貌 肥 澤 肥 疏 澤 曰

如傳》。 互 麀 相 獨 鹿 取 足。 濯 注 潔 濯 文 朱《 白 證之,朱《傳》實 穎 義 傳 曰: 其 移 用 疏 肥 濯 意 澤 濯 與 本 ? 以 肥 此 訓 也。」 然《 濯 漢 濯 師 占 而 [|| || || || || 引 淵

之曰: 奪 即 得 非 論 理」、《釋文》云「論者,倫理 論 倫,義本諸 與「倫」 倫 詩》「論」字,得之。 《樂記 倫」及《樂記》「論倫 其 倫 説之論 一彼注 乎? 倫理乎? 於論鼓鐘」,箋云: 通 「論 與 云「與天意合」,疏 此 此。」殆 論 E 於 論 倫 箋 一制》云 字字 論 倫 無 鼓與鐘 同 也 者」,論 」之論, 非是。 患,樂之情也」, 矣。 無 嚴《緝 也。」案,古「 吕《記》引《樂記 凡 患」, 是《 《樂記》「論」字, 其倫者,安得謂 也」,皆以 制 論之言倫 《樂記 云 \vee 以 引《 謂 五 兩「倫」字 刑 影「倫 鄭 就 論」字 「論」 天 必 以 也, 之 無 論 即 字字 倫 證 乃 爲 本 於 相 論 爲 證 天

> 别 則二 眸子 昭注、 眸子 目 相 文》云: 日 (字林)云: 1也。」孔立 耳 曚 反 字 E 而 顧 矇 無 ^ 矇, 無 亦 春 野 瞍 眸 「朦, 見。 疏 不 官 奏 Ŧ 眸 子 云 甚 \sim 公」, 子 . E 童 矇 瞍, 玉 相 瞽 具 瞍 矇 篇》 有眸 異 矇 \ \ \ \ \ \ 而 傳 目 也 矇 V 皆與 云 無 有 説 朦 子 鄭 韓 見曰 眸 ·詩》醉 ^ 然 司 日 (詩)者 毛同。 故 無 農 無 不 瞍。」 知 有 珠 注 所 明 瞍 君 眸 子 見 也 以 與毛 當當 ^ 子 日 也。」《 釋 周 意 無 故 而 文》 語 瞍 爲 意 知 無 然 説 引 分 韋 有 無 無 IE 見

下 武

家最 <u></u> 大。」 下, 下 武 此字 猶 維 後 周」, 訓 也 稍 傳 迁, 後 云: 人能 뻾 文義 繼 武 先 則 祖 繼 無弊 者 也 惟 矣。 周 箋

又下篇繼伐,方言武功,不應兩篇同意。朱「武功」。「下」訓爲「繼」,比「後」義更迂。「武功」。「下」訓爲「繼」,「武」爲後儒各立新説,呂訓「下」爲「繼」,「武」爲

字也。 子改 功」,伐紂則 周樂名《武》,頌篇 首句 世有明哲之王。今三后雖殁,而 《下武》正述三后之美,言周家 王。 能 天,武王能 又下篇繼伐,方言武功,不應兩篇同意。 配 即 嚴華谷以「下武」爲「不尚 哲王,即三后,謂大 三后,故先以三后發端,末句方及 「下武」爲「文武」,則尤未安,不 全詩之義,皆稱美武 並舉文、武,通章文義,俱 配行其道也。 曰「我武」,何嘗諱 亦名《武》,受命則 Ŧ 四 五王,而 語 王季、文王 言武哉? 相繼 武」,尤無 本 有 精 雜 此 而 倫 元章言其 亂 氣 獨 日 次,若 益 猶 無 破 二武 理。 也。 盛 朱 武 章 在 如

郊,終 爾 雅》。 世德作求」,箋云: 也 案,此求字元作 亦 作 求。」 則 此 「求 殏、《玉篇》 詩 求字,乃 ,終也。」義本 通 用

别爲之説。耳。字可通,而義不可改也,後儒不知,遂

《集傳》用李氏説, 夫則 短,且與「下土之式」語意 其 一孝思 先 人,所 維則」, 謂 毛云: 解 繼 爲民之法 述之孝 複 出 則 也, 其 則,不獨 先 義 人也。」 優 矣。

文與? 父。」 之云: 進。」此殆臆説,毛意未 注東平王引《詩 御 昭兹來許」,毛云: 本 有 禮 進義,意「 法 既 * -許 而 來御」 必然。 後 昭哉 得 許, 進, 者,《詩》之原 來 案、後漢書 進 御 故 也 慎 以 其 許 疏 祖 爲 申

賚。」孔疏 毛,作何 來」字《釋 來許」之來, 昭 解 兹 述毛,從鄭音 也。 來 文》 陳 許」, 氏 後儒 俱 解 云: 與下 爲 皆 有 齊,訓 讀 篇 自來, 來, 如字, 遹 勤 王 追 吅 未 如字, 而説 來 以許爲助 孝 知 各殊 鄭 E 述 音 兩

鄭注 孝之行」經語 之 勤 吕云 王 孝,來者 詞 許 解,則 肅 行 追 義,較 爲 進 也 善善 所 先 嚴 I, 嗣 通 一於義 嚴 人 ,兩說朱 俱用之。 其 八之意 追」應 華 續 爲 短 無 谷 渾 明 長 乏意。 祖 丽 成 順。 讀 也。 較長。「來孝」之來,朱、 朱子 曹 來 也 斷 氏 致 不若 要之,許若 遹追來孝」,如 曹説 其 解 説,云致其 孝,此本《禮 「來」爲後 近之,惜 「述追王季 訓 方來 進 # 後 未 器 勤 則 得 之 儒 而

文王有聲

官 子男方 制 大 有兩 、於諸侯,小於天子。 典 〈命》注 五 解。 城 里,天子之城 伊 淢 ,據《典 公之城 」,方十 命》「國家以命數爲 方九 里之 疏 方十二里 申 里,侯伯 其 城 説 也 |者,此《周 謂 鄭 方七 鄭言 箋以 節 里, 城 爲

> 丈。 説矣。 注 得 之文 五里之制 \equiv 里爲方三百步,每步六尺,方里爲方百八 邑成周 故曰大於諸 記 里之制。 兩存之。 而推之也。 七里,次國方五里,小國方三里者,此《考工 説 |國之一」,雉長三丈,百雉得三百丈,三之 九百丈,爲方千五百 • 爲 雒 匠人》注,據《匠人》「營國 而推之也。 城 長 源案 於土中,城方千六百二十丈」,計 酆城 相符。 又《左傳》鄭祭仲言「大都城百雉 方千六百二十丈,正合天子 以《匠人》、《典命》俱 《周書 侯,小於天子,正 十里,過於九,而 以此二文證之,則《匠人》 天子 ・作雑 之城方 步,又與鄭 解 **※**言 用《典命》注 九 方九 里,大 不及十二, 一周 是 次 里」之文 正文,故 或 公作 方九 [城方 或 爲 方 大 方

淢 舉 方十 淢 里 以 爲 見 成 成 ,成 也。 閒 成方十里,酆 有 名 淢 城 築 亦 城 方 伊

十里, 與城 相 偶, 故曰匹。 古注本明,朱

傳》殊溷。

轉訓爲明著,不已迂乎? 也,言文王之事益大耳。後儒 「王公伊濯」,毛訓濯爲大,即《釋詁》文 由滌濯之義,

謂 爲酆、鄗二京之所共乎? 但欲貽謀子孫,故不得不遷」,獨不思豐水 五 水而言。朱《傳》載或説解 豐水東注」、「豐水有芑」,皆是在鄗京目豐 里。武王雖徙鄗,仍不離豐水旁耳,故 「豐水生物蕃茂、武王豈不欲有事於此? 酆在豐水西,鄗在豐水東,相去止二十 「豐水有芑」章,

諸

《譜》文而漫譏之,過矣。 《下武》二篇爲武王詩,是言此十篇爲二王 周公以後之詩,亦非確 而作,並不云作於二王時也。 鄭《譜》以《文王》以下八篇爲文王詩, 又謂 論。 正雅皆成王、 朱子不詳察 棫 樸》、《靈

> 臺》、《下武》三詩,稱王不稱謚,《旱麓》併不 雅尚未備也,所定之樂,當歌 周公之後,不聞更有制禮樂者,《雅》、《頌 樂,皆周公所定。 通,何必槩指爲没後作乎? 云作於成王、周公以後,則是 稱王,疏以爲或生時 篇之爲金奏、爲工歌,又何人所定乎? 正雅諸篇,即樂章也,今 及未 稱 王 又周家一代禮 周 一時作 何 詩乎 公在時,正 其説 ? 且 亦

毛詩稽古編卷十九

吴江陳處士啟源著

吴江陳

生民

生民之什上正大雅

且 事 立次妃子堯, 子,自應繼譽 大戴禮》、《 理 非直 一,實有 姜嫄 此 也,姜 爲 難通,誠如張 (史記 帝嚳 而 而 立,何 終不及棄乎? / 嫄 》諸書,宜爲 元 果 妃, 帝 得 見《家語 融所駁矣。 嚳元妃, 先立下 可信。 影、《世 宜 妃 則 子 吕《記》、 説見孔疏 棄 然揆之 , 摯, 又 本》、 爲 嫡

朱《傳》皆舍毛

而從鄭

也

鄭,以 難盡 之母,不及其父乎? 樂,而《生民》、《閟宫》二詩,亦何爲獨美稷 母,則周家不應特立姜嫄之廟,别奏先妣 文,見於《釋訓》。 皆不足據,似矣。 妄説,詳見孔疏。 也。況使后稷之生,果係 以理槩耳。 巨 爲《列子》異端,云「后稷生乎巨 跡之説,近 史遷好奇,見《周本紀》,疏引之。 **爾** 於誕 然「武,跡, 天地之大,奇詭 雅》正典, 罔, 人道交接,有 嚴《緝 已 敏,拇」之 跡」。 **\sqrt** 有是 是 變幻 毛 父 緯 説 有 書 非

又毛 字屬 訓 致 不應此獨截去「歆」字,則 也。 敬 介爲左右,而繼之云: 敏,拇· 訓 而 下句讀,其 爾雅•釋訓 歆 神 爲 響 也。」《爾 響,則 屬 下 來甚古,不自朱《傳》始 上下兩 句 雅 爲 》釋《詩 神 「履帝 屬皆通 「敏」字 饗 「心體歆歆然,其 而 武 介 多 敏。 屬 絶 福 舉 句,「 上句 武,迹 全句 鄭 也。 歆 先 爲

亦然。 注引此 字屬 左 鄭之《禮》注 《詩》, 右 下 所 方 詩於「歆」字絶 意 句 止 改其 鄭 住 與 耳。 先注 《爾 句 如 讀與? 有 雅 禮 人 道 同 \forall 句,《周 之感 未 至 惟《 達 賈 禮》賈 儀 疏所 詩 則 禮 明 義 引 疏 以 喪 則 後 引 服 歆 襲 此 箞 >/

子疑 我祀」,大其將祭之事 也。 後世之平直。 之驗也。 八,誕 大其生之易也。 誕同 公劉》篇 其不 五章「誕后 此皆訓 誕降一、大其 生民》詩 耳 -,豈亦 · 甚通 每章冠以 四章「誕 大, 歎 自 ,過矣。 發語 至 稷之穡 三章 美之 次 得 以 實匍 章 「篤」字,與《生民》詩之 爲 詞 嘉種以祭也。 也。 二「誕 詞 至 乎? 古人文字簡 發 」,大其教稼之功 匐」,大其幼 也。 八章,凡言「 語 文義皆 詞, 置」,大其 次章「 尤不敢 即順。 七章□ 貴,非如 而 誕 誕 彌 岐 神 信。 也 朱 誕 者 嶷 異

從竿大聲,或省作傘,它末切。「先生如達」,達字乃借也,本當作

人情。 何必自 不祥,則 母,儗之非其 事 棄,由不 煩 時即收育之,如邓子之於子文可矣。 之,勿問 至再至三,定是欲驗其靈 氏已有辨矣。 記》以爲疑其不祥,後 乎? 證之,其 稷之見棄,毛、鄭以爲欲顯 1隘巷, 必 坼 蘇 其存亡可矣,又不然,當 近坼副 八謬 副 明 、倫矣。 允不 説見正義。 尤甚。 而平林,而寒冰,屢遷 無 菑 菑 信 害方謂之祥 害之故 夫以不 莊 迹乳之説 儒 源 公之寤 皆從《 亦 異,不然業 一,而 坼副 謂 史記 引 一棄不已, 其 生 也 謂 牛 無菑 鄭 奇異,《 之 》,然 致 稷 恐 伯 羊 宣 害 鷩 寤 之 不 腓 己 無 四 史 見 年 棄 謂 其 懂 字 此 生 孔 面

芘」,前已辨之矣。 采 薇》詩「小 人所 ^ 生 腓, 民 詩 鄭 牛 破 羊 腓 腓 爲 字

既 4 之之意。」此尤爲謬説。 意 襲其破 羊之足肚 爲足肚,又 日 鄭 亦 字之訓 從毛訓 牛羊見稷 贵 爲芘,一字安 ,此不可 能芘護嬰兒 避,不用己説 以以 足肚 解 經 也。 邪? 止 得 瀌 兩 花之, 一「腓」字 胡一 而 訓 朱《傳》 耶 桂 如 ? 申 有 耳, 況 其 反

矣。 補 之。」上補 古人造語之妙,信 爲 又曰: 覆 釋 傳云: 傳 一、翼 文質 也。 出 兩 蘇 翼 略,然 「翼,藉也 字, 「大鳥來,一翼覆之,一 氏 字,下 詩本 EI: 非後 實 補 簡 互 人 一。」則藉非 出 覆, 文 可 而 及。 藉 相 盡 蓋 字,經 備 , 也。 如 故故 翼 字 則 鳥 意 傳 本 覆 漏 曉 翼 即 訓 然 藉 翼 以 翼

訓之常, 聲音已大,不復 ,陋矣。 厥聲載 何 載無滿 用 路 求 新 訓 如 」,路,大也。 乎? 辨 呱 見《 呱 皇 時 「覃」、「訏」言長大 矣》。 也。 毛、鄭 以 陳 路 氏 同。 爲 解 大 爲 此 字 滿 肼

> 猶在平林隘 也 一后 稷 稍已長大,去 巷中,而聲音得 初 生 被 達 於路 棄 時 耶 遠矣, 豈

茂,嘉 茂,美也。」言穀種之嘉,或以 又言其美盛,二字各一義。 穀也。」併二義而一之,襲傳 種 之黄 茂 傳云 蘇氏 黍稷色 黄, 日 黄, 嘉 語 當 穀 而 此 也 黄 穀 失

言草,茂、苞言苗,所指各殊。三皆見《生民》之五章,故箋用其義。但豐三皆見《生民》之五章,故箋用其義。但豐

也。」豈未甲坼時不可爲 種,始不然。 朱《傳》謂「方」、「苞」指 實種」爲 毛以「實苞」爲本,而鄭以 雍種, 朱又云: 圃 鄭 以 漬種 爲生不 種乎 種 甲 時 前 爲茂; 雜 坼 鄭 前 種」爲 可 優矣。 毛 以 種 布

字,乃禾生之次第。孔疏以方、苞爲春生方、苞、種、褎、發、秀、堅、好、穎、栗十

至《大 不及。 此 種」,是擇其 擇其種,此詩前言「種之黄茂」,則種已擇 以「方」爲孚甲始生,此「方」、「苞」在「種」、 字,方、種、堅、好皆與《大田》詩 當矣。 時,種 釋方、種字兩 穎、栗爲禾之成而實,尤爲明確也。 之始生而苗,發、 (大田》「種」、「戒」是未耕以前,故以 「方」、「阜」與「堅」、「好」文連,是成熟時,故 褎」前,是苗 「種」爲生 「實種 田》「 言「種」、「褎」,在「方」、「苞」之後,故 源案,兩詩「方」字之異,信如 一、褎爲 然不 」,箋以 與 既 不 如嚴《緝》以 夏長時,發、秀以下 詩異義、嚴推其 種」,箋云「相地之宜 土 初生時,故以「方」爲齊 雜。 性 爲苗生之不雜,是止言不 秀爲禾之中 相宜 此最詳盡,可補孔 ,不僅欲其不雜 方、苞、 故,謂《大 而 爲 同,而鄭 秀,堅、好、 種、褎爲禾 秋成時 而 「種」爲 又此十 嚴説 擇 流流之 等 也 田 其 氏

> 指各殊,匪直時有先後而已。 雜於稂莠,不兼地宜之意。則二「種」字所

神 皇妣大姜之姪伯陵之後,逢音屬。 鳩言 以其 之賢。 《列女傳》,而《史記》正 姓之駘在琅邪。案,大姜之爲有邰氏 是駘猶在,不以封稷,稷封之駘在武 泌《國名記》以爲大王 罪,不應奪其土地,則徙封之説長也。 以邰封稷,自是特出堯意。 矣,云「堯 稷者,或滅或遷, 申之,謂邰是稷之母 、與毛相左耶? 不僅是也、《周 是大姜乃 「武王伐殷,歲在天黿 有邰 見《周本紀》。 見天 家室」,毛以邰爲姜嫄之國 有逢氏女,非有 因 邰 然孔疏 皆未 加 家,當自有君, 一復取 義 生稷,故 미 不用其 亦引之,以證太姜 知。 ,即玄枵,齊分野。 有駘 但 然傳又言之 邰 封 邰氏女也。 八説者 氏 公之所馮 君 於邰 語》伶州 日 未 加 一,豈非 女,見 大姜 功, 宋羅 孔 必 以 我 有 則 封 疏

其 邪 楚之稱 氏之墟 列 左 前 一舊 傳 女傳》,良以 號 非 ,以及大公居之,是大姜之國 荆 昭 而 有 與? <u>二</u>十 日 邰 有能 也。 年,晏子言 此 然 意有逢即邰之徙 無 如 宋 可 考已。 之稱商 有 逄 孔氏之不用 伯 陵 封 居 雖 或 爽 在 唐 琅 鳩

篇》云 見陶 引 然 苗 摩一字下 圖 .詩》「糜」字與《説文》「糜」字字畫 影《説 之 兩 郭 爾 經 字。 隱居《别録》有丹黍米,彊以《 秬、秠,黍類 雅》郭 》皆以 説必有 当當 文》皆作孽,莫奔 摩字 从黍, 之, 穄,摩,似 ·璞注,釋 爲 本也。 故 赤 从 黍、 也 黍, 靡 有 爲 是 宋沈括《筆談》及 一糜爲 白 黍不黏。」 訓 糜、芑,粱 切 説 **一黍**,此 爲 ?,《詩》「糜」 也 赤粱粟 穄 切,音形 誤 即 不 與 也。 類 小,芦爲 稷 知 (从禾 也 俱 爾 也 相 ^ 彼 字《爾 别 説 雅 近, 之糜 蘇 白 徒 孔 載 文》 》赤 玉 又 見 頌 粱 疏

> 亦謬。 類,是 篇》, 爲 二穀,何可合爲 何 Œ 涉 矣。 哉 陶 黑黍之二米者,羅 ? 氏 又案,有 丹 至於丹黍、赤粱 黍 米, ___ 也? 赤黍名糠,胡 其 是物 糜、芑之訓 願 乎? 色 以 個 兼 爲 相 又 切,見《 即 當 司 秠 即 낈 元 秬 玉 郭 是

懷,猶 所 任,未知何 我輦」箋云「有負任者」,則 源案,古「妊」字通 云 謂 對文則異,散文則通 是任 婦 「以任、負 人之懷妊,故 本。 是 負」鄭 異文,負在 作「任」,鄭豈 云 訓 爲 也。 抱 又合任 一背,故 任 與 猶 王 ? 氏 以 任 、負爲一, 抱 然「 抱 訓 爲 也 爲 我 之於 0 抱 肩 疏

應,而 王之後,宋儒皆非之。 以歸 后稷郊祀,毛 中間 肇祀」,末章「后 皆言祭祀,則定指 以 爲 稷肇祀」,兩「肇祀」 然 堯 論 所 詩 特 命, 一祭而言 之文義,六章 鄭 以 爲 不 相

爲祀其 堯與稷 也。 勝。 可易 難 説 言爲 尚不得祭宗 非二王後耶? 譽之子孫在 於舜,不得爲二王 常禮律之。董氏譏鄭二王之説,以爲后 又功及 耳,況聖德如 得分七章所言 更 **m** 通 有 矣。 稷 鄭 也。 以 既 破 爲 先,則稷居 亦然。 萬世、錫以 魯郊 嗣 改 故傳以「肇祀」爲「始歸郊 但以 「肇」爲 后 封 者 .堯、舜時,正猶周之杞、宋耳,詎 廟,必待就國 稷 爲比 堯, 殊不 就國於母家,則 ,修其先代禮物,邰不得亦爲 爲后 毛、鄭二説 也 況「肇祀」者,始祀也,若以 口 「兆」, ,謂成王、伯禽皆非禮,豈 九官之列,爲天子公卿, 後。 異數,非私恩 以 知所謂 稷主祭,末 又李 議 夫舜 禮 不 氏 而 較之, 制度,稷之播穀 如 禮者,創自天子 始祭乎? 譏 繼堯,堯 依 高辛氏之後, 毛 章 字 也,何得以 「特命 則毛爲 首 訓 祀」,不 五句 始, 繼 理又 尤 稷 之 所

> 賜,正 非歸 此 禋祀,不可用之於六、七、八章之肇祀矣。 然則鄭氏 不及至日之郊,或因后稷功在播穀,故特賜 二王後,二也。 祭,若二王後 功后 是報功之典 稷之意,三也。 二王後之説,止可用之於首章之 則 前五章言 ()若因 兼行 至日之郊矣, 此 二王 「后稷: 郊 後 祀專指 功美,帝堯 而 得 四也。 郊, 祈 則 特

乃其 音俞 以沼反。 白。之義,字當作於,又作皎,又作舀。 徹》注皆作於、《説文》作舀,从爪臼,而於、吹 (或體 ,訓「引」耳。 或春或榆」,榆音由 《周 禮 春人》注、《儀 抒臼 抒,取出 非 本音也。 也。 禮 謂 抒 米以 有 揄 舀 司 白 出

鄭,但 从毛。又「釋」左从米,漬米也, 春、揄、簸、 傳 論字義,則毛爲當,吕《記》、朱《 以蹂 蹂 爲 及釋、烝 蹂 黍, 箋易 之次 傳 以 第 爲潤 也 與「解 濕之, 孫 《傳》皆 毓 取

三七〇

字異。

終之以 其 惟 惟 興 稷 因 其中,言當穀熟時 mi 之意,非「載謀載惟」正 繼之曰 mi 戒。 一嗣 [祭而 字 本 之祭,莫 思 繼 社之日,莅卜來歲之稼。 意 往 訓 報 而 語, 當之日, 莅卜來歲之芟。 傳 也。 不不 釋 興 祈年也。 也」,蓋 穀熟 貝 專分析二字字訓也。 載 銮 嗣」之文,可 重於祈穀 傳預透末句義於此 又陳祭時,又預卜來歲之善否, 謀 而謀 語明確 已預 載惟」, 后稷之功,莫大於播穀,后 已謀 ,陳祭而卜矣」,此 透 が、故 矣。 「以 解。 見謀、 度祭祀之禮, 即繼之曰 引 此 腫 云 周 章 然謀、惟 (嗣歲 獨之日 惟 禮 雖 所 諏 言 祀 若 . 謀 之義 ,莅卜來 所 事,正 肆 分 以 祀 其 感 意即 足 以 日 析 事 師 釋 莅 秋 興 、歳之 思 謀 **>** 爲 mi 成 在 莅 1 又 來 念

郊之位在國門外,須祭載而行。蕭、

大典並 矣,一 大后稷肇祀之禮,不應舉其小祭,且與 所祭,即 先本出孝思,祭軷自爲行遠,與祈年之典 指 不相蒙,章末「興嗣」 燔、烈總上兩祭,於三句文義則 郊祀,故以「取蕭」 於上帝。 羝 將 燔 祭時。 章文義相 稱,尤爲 烈 七祀中行神,乃祭之小者, 以 皆 下 興 爲 章 不 承 嗣 軷 類 豆 歲 祭 爲祭先,「取羝」爲祭載 語 豋、香升,斯 後儒以后 _, 也 不 Œ Ė 言往 自 贅乎? 此 稷諸 郊 而 通 之意 往 爲正 矣,但 侯,不得 郊 詩 況 也, 祀 祭 主 軷 祈 先 絶 美 祭 時 此

嚴 肉 **靠,从二手** 無 在豆 僅 Ĵ 以 ,豆豋之豋 嚴《緝》辨「豆豋」 上, **丿之有無别之**, 持 與 肉 登 在 升 有 字 豆 丿。」案,「豆 從皇 上 登字曰: 疏 也, 矣。 隸 撥。 作 登 登 从 登 从 豆 字本 升 絶 手 之 異。 持 作 登

《生民》詩八章,架構至爲精密。首章

爲周 況此 法極 教稼 案。 長篇詩者宜熟玩之。 之初也。 育」之事也。五、六、七、八章言其爲稷官而 推原 繼而見收,以及稍長 載生」之事也。 起 生 室開 次章言后稷之生,不坼副 其工 七章文義,俱首尾相銜,連環而下,章 后 ,封有邰 載 结,遥相呼應,此最有格律之作,學 稷 育,時 矣。 生 结句言「迄今」,由初而推之今也。 基之太祖,所 一於姜嫄,是 而肇祀,烝民乃粒 且起句言「 維 三、四章言稷之始 后稷」,則已爲下七章 有知識,好種植,此 謂 篇之綱領,末二 厥 時維后稷」也。 初」,由今而 ,上帝居歆, 無菑害,此 而 見 「載 棄, 溯 立 旬

行葦

《行葦》雖成王詩,然所言皆先王事,惟

據,豈三家《詩》説乎? 葬枯骨,公劉敦行葦,世稱其仁。]皆以 之不傷。」又《後漢·寇榮傳》云: 指先世有道之君矣。 以 意或相合矣。 彪《北征賦》云: 劉慈仁,行不履生草,運車以避 厚」,是言累世積德,非美 物 勿踐爲公劉事,漢世 法,箋謂指文、武,其 「曾孫 爲成王 ,五章箋以爲先王將養老行射禮 」始目成 承先王之法。 王 耳。 「慕公劉之盛德,及行 愛物、行射之事,當 案,《吴越春 首章箋以 古書史猶多,當 康成 蓋敘云「周 王也。 雖不言何王 莨葦。 爲先 「昔文 秋》言公 七 先 王 家忠 必有 王之 行 之愛 又班 章 董 王 别 窭

有之。 也; 仁及草木,愛物 行葦》後敘,東萊 尊事黄耆 朱子譏其隨文生義 ",敬老 也; 也 疑爲 總爲 無 内 講 睦 復 師 王者忠厚之 九 倫 附 族,親親 理 益 一、恐不 一,容或

詩言射 矣。 字,疑此詩 葦 道 自 是主祭之稱,然非 不僅此詩 必欲易之以就 句,後四章章 此篇毛分首章爲六句,次章四句,三章六 愛物之仁,於義自 章,不以「几」字上叶「爾」字、「御」字下 之筵」四 興之體,音韻之節, 兩章,在本章既遭割裂,在前後章復 學」字耳。 一勿踐 稱 何 三百篇中同 曾 不 爲 孫 句,故言毛公分章,謂之故言。 無 言祭,亦 ,能悉更定之乎? 忠厚之實 以 倫 爲祭畢 殊不知 告三祖 理哉? 四 韻,則 韻 句,文義 而燕,恐未 「通,何 云 祭 而異章、同 詩 此 事,不以 哀二年。 時 「曾 「或肆之筵」四 又謂説此 即 特以毛、 亦可 必 行 孫 允愜。 判 葦 侯 稱 爲 又 必 乃是 章而 氏 爲 興, 鄭二家 因 也。 然。 詩者不 物, 人矣。 興 説見吕《記》。 「曾孫」一 戰時,非 異韻者 體 而 《貍首 曾孫 自 見 成 句 蒯 分 爲 贅 Ŧ 指 或 知 疣 屬 叶 腊 又 者 肆 H. 行

祭時。

不倫。 具 體。 其取興,則以「勿 朱《傳》以 「苞」、「體」、「苨苨」興「肆筵」、「授几」,尤爲 「爾」之實事耳。 兩 生葉苨苨。 葦 敦聚如朱解 是叢生之物,故毛 敦聚 也。 爲 句 踐 則 至肆筵、授几,即 萌之時 履 義豈能相配乎? 勿踐 興「莫遠具爾」,以 傳 釋「 履時葦未 已 非 敦」爲聚 本 「莫遠 成 形 貌 又

雅 苞」、《行葦》之「方苞」,鄭皆 類、皆訓爲叢 其見《詩》者,如「苞 . 釋詁 苞,草名也, 》文也。 生,則 可 朱《傳》訓 通作 爲 栩」、「苞 麤 枹。 履,又本 爲甲 櫟 《生民》之「實 訓 」、「苞杞」之 而 茂,此《 也,茂 未 不不 也 爾

忍傷之,此 苞茂,方將 方苞方體」,方者, 正 成 一方長不折之意,所 體 ,其葉又 苨 方來 苨 而 然 不已, 以 美 爲 好 仁也。 方將 故

知何

本。

鄭箋以爲終爲人用,故愛之,是直利之耳

所見小矣。

毛無傳,故疏以箋義述之,謂無論遠近,皆《燕禮》有「爾卿」、「爾大夫」之文也。爾字「莫遠具爾」,鄭以「爾」爲揖而進之,蓋

揖之使進

則漢 兼存之,亦未 從定本,此特因 董氏言舊本皆作「加肴」,定本作「嘉」,唐改 未知誰得 是當時經文,或「加」或「嘉」,本各不 加。」又云: 脾 箋以 正饌之外所加善肴」, K 爲 世經本已有作 脾 嘉肴脾臄」, 加 函 其 助 爲 正,惜毛不爲傳,無由定之。 盡善。 「定本、《集注》,經皆作『嘉』。 則 加 疏 經文 故 疏云: 語 「嘉」者矣。 而 是 謂之嘉,是『嘉美』之 揣 則 加加 度其 脾與 看1矣。」又云 燔炙是正饌, 然。 孔 臄 合兩 氏 玩箋文, 申 同 - 箋云 也, 宋 ൬ 以

誤也。 忠厚元 故以 期。 所謂 爲 族取義,與下章養老各一禮。 爲賓,此燕射、大射之别,一在燕末,一在 敘所謂 「内 章前後皆言飲酒之事,前言飲 前後所言飲酒爲一事,無睦族、尊老之别 次,孔氏譏之宜矣。 射,而又以爲養老之燕射 後,射以 敘之義,恐未盡於此 二説俱可通 燕 射,孔 王 外外 而兩章言射 必如 非 説 尊 爲樂,養老則先期 爲 一端,後 睦九族」也,後言飲 疏 事 吕意,則全詩 网 然。 也。 是鄭,吕《記 黄 章, 青」也。 在 但 然此詩首敘 敘 鄭 燕族之後,養老之前 此 列 東萊不从後敘,謂 以 射爲燕 言 爲 皆 = 大 ,則失經文 燕 是 義 行 燕 射 族 (射,則 本言忠厚,而 射 王 王 同 以 酒 酒是養老,敘 王既 X 禮,擇 是燕 當 姓 則 肅 案,此 語 之,亦非 先 當 以 旅 述 耳, 族 酬 後之 爲 此 承 土 毛 詩 燕 燕 則 先 以 之 本 以

三七三

以如字爲古音矣。 聲,摹字从喜从竿,讀 文》云: 純、羣、敦、瑋聲韻皆同,則「敦弓」之敦,斷 如本音矣。 本弴字,詩借用敦,依字仍當作弴耳。 徐又都雷反。」此 敦弓」爲畫弓 敦弓 弴,都昆 既 都 堅」,《 `,《説 昆 兩 切 陸音、徐反,俱不必拘 讀 文》導字 雖 切。」則 釋 如純,此 俱非敦字本音。 出 文》云 徐 此 亦訓 鉉、然弴 詩敦字, 叔 重舊注 畫弓 敦, 以 音 亦 傳 墓 是 ^ 彫 忧 得 應 訓 官 説 敦

大,況素行賢,則射亦必多中矣。 鄭謂多中爲賢,較切於射。然毛説實爲正引孔子矍相之射證之,是論其素行之賢也。「敘賓以賢」,毛云「賓客次第皆賢」,復

重乎? 日 「言其 74 鍭 如 八貫革 樹 ·而堅正也。」貫革豈禮射 意 在 美 人其 中耳 , 集 傳 所

「敘賓以不侮」,東萊獨取晦菴「不以中

所折衷有在矣。 侮爲敬,後及不 侮,敬也。」其人敬於禮則多中,此 病 正外直之意,宜 不 中」之説 以多中陵 源 口 終嫌 用 也 其 人之説 今《 巧。 集傳 云 則 即 先 射 朱子之 訓 義 不 不 内

當作 庾切」。 堵今亦同韻,不獨古也,何必改音? 音考》音主爲祖,音斗爲堵,亦謬。 用叶也、《集傳》叶之、贅矣。 斗同音,不僅 徐、沈音,是「斗」與「主」、「醹」元同 枓,都口反。 《釋文》亦兩音,而音「主」者,沈 蔀」字、「主」字協,彼《釋文》云: 説文》「十升日 枓 酌以大斗」、《 此詩「大斗」爲 又 案《易》豐 徐音主。」《小雅》「維 韻 1斗,當 同 何反 釋 文》云: 桂 酌 分爲 切」,「科,勺也,之 日 酒之器,則依 兩 近 中 音乎? 斗 # 見 重 北 陳第《古 韻,不必 斗, 「見斗 字 主、祖、 也。 有 況 文作 斗 È 案, 與 字 據

無 科字亦諧 孟 疑 作見主。」蓋 Ê 斗 韻》 聲 一, 則 以音 四 語 斗、科二字古音爲「主 同,故 韻 中 收 通用也。 此兩字,皆音 《説 文》

主,得之。

從之。 報,鄭 章引、 乞言,以成其 翼、介、福,則善言之益也,敘云「養老 以祈黄耆」,王氏解爲乞言,良是。下 訓 祈 爲 告 福 禄」,正 ,俱未若王義長。 指 此 爾。 毛訓 嚴《緝 祈 爲

黄耉 義 次之也。 典。 會曰耉鮐。」二者省文 廣之言,謂鮐背則老更甚於黄耉,不知 黄 前 知。 毛傳云: 爾 亦 雅 《方言》云: 《釋名》云: 以 * \(\times \) 者 「鮐背,大老也。」不言黄 爲 同 鮐背、 實 而合爲 「秦晉之郊、 九 而 煮, + 異 稱 E 一稱,其 老壽 《大全》載 鮐 並 背 陳楚 也。」 不 或或 如 非 出 廣 E 之 耉 則 兩 何 輔

羅

所言 也。

注云: 翼》以 魚。 大魚不敢啗之。 白,背上青黑,有黄 赋》王 背有鮐文。」疏引《爾雅》舍人注以 鮐鮆徂禮切。 語良是。 案, 鲐音臺, 又音台。 「鮐背」箋云: 爲 鮪 即今之河 鯸鮐狀如科斗,大者長尺餘,腹 鯸 鮐」, 指此 千斤」、《漢書》同。《文選 烝煮 豚 文。 魚。 「台之言鮐也,大老則 食之肥美。」據 魚 性有 也,宋羅 又 《史記 案《文選 毒,雖小獺 爲背 貨殖 願 ^ 此 爾 劉 似 傳》 都 及 則 下 淕 雅 鮐

者乎? 所 頌 黄耉之輔成王 翼」,毛、鄭以爲成王之事 指 禱之詞,則黄耉者,特 《行葦》末二章是養老之事,故「以 目 也 引翼之者誰 ,義皆 可 通 稱 矣。 ? 黄耉、吕、嚴 願 之虚 又誰 朱《 傳 言耳, 所 》指 引翼 以 引 無 以 爲 爲

既醉

雖曰 不 三,其 天子女下嫁,三公主之,故有公 男女稱公子、公主相 享」所稱先王,則徧指后稷以 公未追王 先公之尸者,非是。 王 廟 (大告))稱后 師 圃 天子爲公也,且至今猶然,不 朝則爲卿,皆有君 1舉尊 古,全無 以公名之? 卿 四 公尸嘉 爲尸,卿出 皆王也, 豈大王 一者,自得蒙王號 以 一稷爲 槩卑,然文義 禮 告」,公者,君 文法度,豈 先王、《周禮 朱《傳》又引秦稱 封 例,則 成 道 則 Ŧ ,故稱公尸 爲侯伯、侯 享王祭、《 以下 時 3偏枯 愈疑 成 七廟,爲 也 大宗伯 周 下也,何獨 矣。 無 非 獨 主之稱 比 天子 0 嘏 其 秦也 哉? 皇帝 《武 伯 況周 以 倫 詞 先 l | | | | | 祭宗 乎 公者 爲 成 非非 ,此 先 仕 於 ? 至 秦 mi 周

證尤屬疏漏。

況此 皆尸告之詞,恐非是。 何」語 人全讓禮經 載大夫嘏 文,著於禮 嘏詞,反居其大半乎? 故,非問其告之詞也。 告之,是 有威儀,克當神明之意,正荅以告之故也 集傳》以爲尸告之如 五章文體,與《少 其 氣 何 告維 稍 詞,則天子亦應有之矣。 經 異 故 成 非 乎?」 何, ,故鄭特 語 ,目爲 臨 箋云: 時 蓋 字》版 此,又謂 臆 詩 此 加 祭饌 己詩 撰 訓 又古 僅 維 「公尸所 也, 八章 詞 既 釋,是問 7,尤無 何 美,助 不 自 觀 類 與下三 此 詞 而 是 少 至終篇 成 當 其告 以 祭者又 五 理 牢 有 善 周 章 也 禮 成 皆 之 維

毛、鄭 之嗣 成 王,不應此 子 以君子爲羣臣 君子有孝子」 則與下三章「祚胤」、「孫子」詞 獨 異 也 與 ,然首二章「君子」皆 「威 朱、吕 儀 孔 以孝子爲 時」 連 文 意 主 重 人 故 目

複。 其宜,由君 友」,嚴語尚未分明,當云「羣臣之威儀甚 天下皆爲 王有 孝子之行。 惟嚴《緝》云: 孝。」斯 子有孝行以先之」,則上 得之。 孝子之行 「威 但「威 儀 無 甚得其宜 有 儀上 匱 竭 承 能 承 由 朋 得 成 朋 化

友」既

明劃

前

下起「不

匱」又有情矣

説,不 爲族 肖前 教化, 竭。 非 據《左傳》所引證 相承,實天意使然,故云「永 周語 取「錫」、「 類,謂孝行 人,何善如之? 類,善也。」疏申 孝子 知左氏以 無 謂 釋「類」 有 天 不匱,永錫 貴 與之耳, 類」也 竭 義云「不 證 無 「考叔純 則 責 施 天長賜 之謂: 鄭 與毛義相 竭,長與女之族 況 及」,當取「不匱」 爾類」,毛云: **忝前哲之謂** 以 此 孝,施及莊公」爲 與 阚 錫 王 下章 類 「以孝道 以 也。 成 爲 善 矣。 同 鄭 渞 人與? .言「永 類 夫克 轉相 訓 世 也 義 匱 德 又 類

祚胤」爲天與? 義不劃一矣。

乃畧同 稱 順矣。 相親 聲稱朕,趙高 相傳 重,王者之常事 又與毛傳、《周 毛氏訓「廣」合之《周 天下,毛訓 傳》「深遠嚴 願 於 如此也。 ,以化天下使相親 室家之壺」, 吾 Ŧ, 近有以室家指民閒言者,更爲 是 未敢信。 壺爲廣,與《 成 所以愚二世也,而 肅 鄭 語》不相違, 周 一之説 以 何 賢 謂 勞臣子致 壼 語》「廣 公卿 善 爲 周 道 恐 捆 則意太迂曲 與 礙 施於室 語》合, 裕民 亂 謂室家 可采也。 於 祝 秦宜 義。 詩人 邪 人」之解爲 必 家 ? 亦 先 豎 是 深 而 明捷, 所 至朱 以 居 捆 古 況 廣 不 見 聞 此 九 如 致 義 及

鳧 驚

敘言「守成」,又言「持盈守成」,持盈正

使 所 祈 勿 以 溢 也。」斯持之之道與? 守 云 成 爾。 也 盈 無 易 有 溢 後 溢 艱 傳 則 成 云 者 毁 「言 矣 持 不 敢 之

焉 也 人難信 有 歌《雅》哉? 鵲 似賓 が助 來 用 此 《鳧 祭 燕 朱《傅 詩 P 之 詩 者 爲 語 雖 時 樂 ,祭名也 豈 》乎? 耳。 **>** 咏 國 以 乎? Ŧ 繹祭之樂 繹,非 君 與 然 鳧 公公尸 娶婦之樂、《采蘩》詩 詩 ,祭祀樂章 朱子之爲 又以《假 鷖 必 詞 》爲 即 歌 奏之於 與 席 樂 ,自有《絲 賓 樂》 唱 章 此 尸 宜 酬 不 説 繹 之 一歌《頌 爲尸荅 者, 北令 徒 相應者多 祭 樂, 衣》矣, 時 據「公 豈夫 》,豈 殆 賦 巾 非

鄭 在渚 ,次章「在 箋分之爲 鳧鷖》五 」爲祭天 Ŧī. |沙| 爲祭 章「公尸」,毛 地之尸, 以 首章「在 四 四 方 章「在潨」爲 萬 涇 傳 物之尸 」爲祭宗 皆指宗 、、三章 廟 祭山 廟 言

> 尸矣。 郊,董 祭祀, 信, 引 祀之祭,尸三 社 禮 地 地 曲 Ш 送逆尸,沃尸 隋許規切。 逸《禮 稷,則爲之尸」,是 祇、人鬼而言也。 爲 社 士師》「祀 此 Ш 分 稷 伯 P 大 川、社 《禮記 之 配,永叔 出 不 爲 尸 中 然 户一, 人 稷之有 逆 霤 飯 . 奏《肆夏》」,《 盥」,凡言大祭祀者,兼天 也 五 末 曾子 牲 譏 不侑 禮 帝 是 章 》云: 其 案,《 、逆尸」、《小祝》「大祭祀 則 郊 哨 應説 而《 尸,乃漢儒之説,不 在 問》: 祭五 祀 沃尸」,「若祭勝 亹 周 不 或 天 凡 帝與祭社 禮 信矣。 酢。」又《月 語》亦言 地 大祝》「大祭祀 爲 祭 天子 有 祭 大司樂》「大 Ŧī. P 七 然或 祀 既 矣。 祀之尸 晉 稷 令》注 於 殯 皆 祀 謂 或 神 廟 Ŧī. 有 之 周 足 天

^{● 「}與」,原重文,嘉慶本同,據康熙抄本、大全本、《四庫全書》本删一「與」字。

方 之尸 得謂 有 祀有尸矣。 用 據。 特牲,有 ,是祭星辰 漢儒之説 周公祭天,大公爲尸。」《白 [《]石 主有尸,皆先設席於奧。」是祭 渠 《絲衣》篇繹祭,高子以 論 乎? 有尸矣。 *、《白 況漢世 虎 此皆見於經傳,安 通》所言,《石渠 虎通》云: 近 古,其傳聞 「周公祭 爲 靈 論 必 星 五 大

祖考, 言 祇在下,故言「來崇」,此與敘甚合 子」,則考可知。 祖 也。 鳧鷖》五章,陸 而 末章總之,較勝於箋矣。 來爲」,言考也,傳云 天神在上,故言「來下」, 佃 以 前 四 章 分 厚 來 配 神祇 爲 成 孝 地

Ш

·召公爲尸。』《既醉》正義引之。

未

可

疑

其妄也

記

句如字 字乎 訓 猶助 福 助,故《釋文》云「于偽切」,又云「協 禄來爲」,毛云「厚爲孝子也」, 也」,助之正以爲之,鄭申毛 朱《傳》訓 助 而無音 叶, 豈欲讀 意耳。 鄭云 如

> 假 樂

假 其音爲 直 爲暇義。 訓 樂」與《周頌》「假以 音,其音暇者凡五見《詩》及注。 破字也。 庸》、《左傳》改爲嘉,不知 傳》假 假」字傳 之一 麻 云音嘉 暇,又《皇矣》箋引《書》「 韻 假樂》 爾 作 音, 中 正 此五「假」字、《釋文》皆音暇 雅》三釋文皆 嘉 皆 案,假 誤矣。 列 甚矣,俗本之誤 實 訓 「假」字,音 非音 假字於《 兼 嘉 字 嘉 以 嘉 《商 有遐、 7、暇 溢我」、「假哉皇考」,三 也。 楊 轉 頌 暇 同 兩 用 注 近世俗 ***** 賈、嫁、 假 義 修之博 古 人 訓 五. 昭 朱《傳 音》楊 本訓 也 也。 嘉 年 假 , , 本《集 須 遲 暇 此詩 雅,亦 又 嘉 詩 所 假 遲 案, 據《 格 何 傳 箋 據 假 必 中 禮 而 亦 五

六

乎? 此 也 羣 遂 重 \overline{Z} 百 右 《禮》疏 ? 臣 福 詩 命之。」於《 也 命之」,一指 保右而 之。 毛 舉 右 大 天乃 保, 鄭 無 明 而 本 篓 明 當 後 訓 保 安 於《大 舉之,乃後 》篇 「保 解。 用, 以 假樂》 助 也。 安右 武 此 官人之常, 案,《中庸 轉 王,一指 明 右 解 右, 助 則 爲 学云 命 爲 命 以 薦 命 助 爾」、《假 . īE. 用 爲「成王官人, 舉 之 也。」 成 , 」,何忽異 何 之 爲 \wedge 安 王,文同 集 足稱 義 天 孔 此 mi 樂 傳》 子 氏 助 不 鄭 美 篇 之, 人其 亦 述 義 又 氏 平 主 申 之 注 ? 于 説 必 又 亦 保

皇以 王 E 《傳》則 何 不 下 反 氏 併下二章皆言 既祝子 詳 以 愆 爲 於子 不 子孫 忘 孫 孫 率 導 則 rfri 由 成 畧 與首章所指各别 舊 子孫矣。 王之法,恐不 於 章 成 王 古 也? 詩 注 本 然。 本 又 嘉 指 文 穆 成 朱 成

> 章皆 旨 義 矣 亦 申 不 一首章 相 蒙。 而 ^ 大 全》 分配之,述朱 載 劉 瑾 語 乃 而 謂 失 下 其

得之。 獨横 意大 兩 無 有 説 私 怨惡」,歐 增增 同 怨惡,文義 無 而 其 而 一「私」字也,有私惡必 反 怨無惡」, 以 小 真 爲 異 陽云「其 (鄭義 皆 無 反 私 於後 謂 成 鄭 怨惡 不 遺 臨 云「天下皆 爲 漏 下 於 人 矣。 無 人 所怨惡也,此 有 者,誤矣。 有 ^ 怨惡於人」, 集 仰 私 樂之, 傳》兼載 好,止 不 説 無

綱 也。 非其 言 有 云不 也 紀 族 此箋説。 四方,臣下賴之以安」,文義 常常 食、 解于 燕及 君 也, 族 臣 位不 朋 燕 故 皆勞,民 朱《傳》訓燕 友」,以 굸 燕 相 乃 燕 顧 其常。 及 始得 族人之恩及之也。 矣。 爲安,而 以 安, 示不 羣臣 美 何 解 王 有 日「人 亦 」兼 得 恩 功 通, 臣 意 指 則 之 獨 君 君 但 燕 逸 臣 與 能 降

牾耶? 乎? 弟。 《説文》作「齂」、云:「卧息也。从鼻隶音 同。 《詩》借爲息,故《釋文》云虛器 壓」、「攸壓」,从仰塗取義,訓爲 冀切。」《書》「塗塈茨」《梓材》。當此義矣。 以爲「壓」與「呬」古今字,良是也。案,「呬」 塈」,凡三「塈」,傳、箋皆訓息。《假樂》疏據 云臣賴 逸矣。不解于位,民 可通,但不知 壓」作「概」,云: 壓」,恐不然。 爾雅》「呬,息」某氏注引《詩》「民之攸塈」, 聲。」然則《詩》作「塈」,乃借也。《説文》 《邶風》「伊余來塈」、《大雅》兩「民之攸 至「愍」者,乃古愛字、《玉篇》以當此 東萊云: 君以安,而又引吕語,不自相 何所本。 又《正韻》釋塈字引《詩》「來 「上逸則下勞矣,上勞則 「仰塗也。 所由休息。」朱《傳》既 其《摽梅》「塈」字,毛 从土既聲,其 切,音亦不 依附、説亦 牴 下

毛詩稽古編卷二十

吴江陳處士啟源著

生民之什中正大雅

公劉

尹吉甫四詩,皆美宣王也。 兩凡伯共三詩, 公、芮伯各一 伯、衞武公、芮伯、仍叔、尹吉甫、凡伯,共八 穆公三詩,二刺厲王,一美宣 人。召康公三詩,皆正 有六篇,敘皆得作者主名,召康公、穆公、凡 《大雅》自《公劉》至《召旻》,正、變雅十 詩,皆刺厲 雅也。 王也。 王也。 其變雅 仍 叔 一詩, 則 衞 召

《卷阿》詩則又參以《紀年》之説。《卷阿》詩則又參以《紀年》之説。《松高》、《烝民》,則吉甫自著名氏、餘皆賴敘以明,其説必有所受矣。朱子不信小敘,敘以明,其説必有所受矣。朱子不信小敘,一刺厲王,二刺幽王也。《抑》爲武公作,一刺厲王,二刺幽王也。《抑》爲武公作,

《書‧武成》孔傳云:「公,爵。劉,名。」彼疏云:「公劉之後,有公非,公組絀名。」彼疏云:「公劉之後,有公非,公組絀耳。」《詩‧公劉》疏則取王肅之説,以公爲耳。」《詩‧公劉》疏則取王肅之説,以公爲中於傳義耳。

漢北地郡,今爲慶陽府,不窋冢在府城東三姓城在慶州宏化縣南三里。」案,唐慶州即經。《史記》正義云:「《括地記》: 不窋

土 乎 都 以 甚 皆 六 寧 州 州 邑在 記 也 里 、史記 縣 百 ? 州 曠 不 也 在 西 獨 城 里 治 隔 有 今 民 窋 邠 鄭 在 但公劉 内有 立遠, **>** 稀,不 竄 慶 ,然慶陽 新 西 氏 漆 西 州 Œ 嫲 陽 亦 戎 城 平. 安 縣 州 義 翢 不 與 有 爲 東 廢 府 得 蓋 新 譜 窋 侯 云 而 公 邠 縣 在 六 邠 <u>*</u> 以 夏 平 廟 或 舊 嫲 劉 网 州 本 + 州 縣 常 時 號 邑, 境 是 相 其 里 \equiv 制 西 殆 漢 公 北 去 即 不 所 水 封 限 裔 寧 漆 以 是 楙 劉 今 五 漢 窋 統 域 縣 州 也 已 此 縣 , 公劉 徙 屬 漆 竄 廣 韋 西 棄 六 , 亦 與 則 而 右 居 縣 漆 昭 輪 爲 百 稱 兼 遷 公劉 也 扶 在 + 縣 戎 不 注 里 林 及 都 又 今 風 五 翟之居 應 寧 於 慶 或 兩 在 墓 慶 栒 及五 里, 案 行括 北 陽 今 及 陽 意 語 地 邑 地 豳 之 \leq 本 邠 廟 邠 栒 地 府

迫 逐 公劉 避 中 遷 或 稇 之 一,毛 難 傳 遂 以 平 爲 西 本 戎 居 疏 於 謂 邰 與 之交好 遭 夏 亂 得

盾。 之語 書 民 往 實 在戎 真 後 記 自安 立 窋 避 吕 土 不窋 (,未可 往 之 來 事 或 孫 儒 亂 ,遷都於豳 》,不密已 居 記 異 況 中 吕 居 邰 於 狄之閒 率宗吕 奔翟 緜 尚 非 焉 或 而 栩 不 漫 》篇 詩 閒 以 口 戰 未 也。 是定 未 然 中 爲 而 」,公劉 以 非 止 盡 ,故不言公劉 竄 孔 平. 矣, 即 明有 其 隔 在 爲 毛 也 西 之 不 疏 居 定 是公劉之遷 戎 鞠 非 但 説 也。 戎 而 知 又 於 居 不 于 陶 也。 翟 仲 毛 信 以 以 應 至公劉 豳 於 爰 而 而 達 嫲 氏 遷 爲 自 琳 更 爲 世 遷 夫 方 復 斯 斯 遠 乎? 不 在 遷 參 公劉始 至公劉 其 不不 言 史 啟 興 館 有 窋 邰 嫲 毛 之《 遷 而 民 行 師 已 容 事 猶 復 至《 以 與 以 而 授 或 竄 他 情 邑 拘 楙 興 即 公 此 而 毛 爲 日 小,傳 周 語 於《 网 徙, 於 居 正 劉 遷 足 傳 子 自 盡 拓 允荒 語 楙 相 聞 當 周 猶 网 慶 爲 通 以 相 邰 大 | | | ^ 反 焉 邰 尚 之 節 最 境 史 本 矛 仍 不 兩 而

之績 也。 必 邰 太康 後,不密失官,至是而復。」復其官 年》云「少康 修先人之職,則有邰 則公劉之與不 實難據信。」《 紀 至公劉 之言又 一 定都 避 相 . 時 次之亂 之説 千三 源謂 ,愛民重 計 著 與《 影 再 每世在位八十許年,子必將老始生,以 於 # 當之,應 耳。 後 不密失官奔翟,因夏之衰,韋 皆 遭 史記》索隱、 百 鰯 周 次 儒 三年 夏 八及康 年之久, 語》不 自 耳 農,不窋子 ·窋,相去不 《本紀》 不信毛傳 亂 邰 復 是 不誤。 故 出 成《 合,辨見下條。 Ŀ 图 疆 、桀時。 不密之竄 義 先儒 稷」,沈約 事 以 栩 土 辨之, 2,皆因過信《史記 畧 孫 周 仍 知幾世,决 譜 迨 説見下條。 ,必并復 相 自 已 + 少少 如 》謂公劉 意 當遷 同 五 故。 康 規 亦 注 、公劉之遷 同 世 \tilde{Z} 中 俱 其 而 \sim 當當 於 其 興 未 謬 ^ 始 竹 時 「后 非 與 理 舊 夏、 國 楙 口 世 去 纂 太 昭 祖 推之, 稷之 矣 信 都 孔 譜 有 紀 禹 以 孫 殷 康 齑

> 俟識 以 兩 者擇 君 爲 .焉 祖 孫 世 次 相 近之故,故 特論之,以

説 彪傒 失官 之,謂 疏 滅 子長作《周本紀》,拘於太子晉十五 名爲太康 耳。夫太康之後,又歷 未立之前 公劉乃不窋 何 於寒浞 君有十五耳,非世 王而文始平之」。傒言「后稷勤周,十五 高 漏 王 之世 十五世之語 公劉 祖 ,公劉之爲 ,在太康 據章 言言 時邪? (,則少 遷 ,此特遷就其説,曲 也 ・昭《國 周 孫 栩 自后 始衰 不 毛 鄭 康 后 數 皆見《周 未興 語》注,不密與 傳 盡 應 譜 稷 之時 稷封 譜》之言仍不合也。 於 曾孫 共世,當矣。 止 此 以 八公劉 云 也。 仲康、帝 邰, 語 前, 爲 遭 未 所記 太 夏 積 晉言「后 豈 爲 可 見逐 康 徳累 人 得 信 鄭《譜》 世 世次 之亂 相 太 時 而 但 越 也 在 孔 兩 康 興」。 稷 善 王 兩 謂 清 王 同 + 及 婁 最 民,十 王 15 不 疏 未 日 當 時 敬 衞 爲 始 餘 康 窋 而 護 定 是

賢

Ŧi.

敬 與 當 世 (太康同時,此足正《本紀》及《豳譜 一、公劉 有 據 今見《史記》,子長録之於傳而不改《本 矣。 避 桀 夫十 居 嫲 餘 世 漢 則 初 非 去古 曾 孫 不 遠 避 桀 敬 》之失。 則 所 非 聞

紀》之誤,何弗思乎?

詩

矣。

皆去 兵彊 是 居 章言築室授田 也。 字冠之,則皆 三章言建立 端,而 也。 雖 mi 傳云: 當 之 弗居 太王之避狄遷岐 雖 公劉》之言「篤」,猶《生民》之言「 弗 奔 首章言去邰之事,次章 避 遭 窟之 惜 夏遷 可 迫 「篤,厚也。」 都 安 厚 逐,猶可 以 ,利民富國之事 餘 邑,四章言燕勞羣 豳 而 於 脱 弗 ,尤爲厚之至。 民之道也。 而 民 安, 相 於鋒 , 殆其家法乎? 固守,如篇首言 度 有 敘 從 疆 刃, 容, 所 埸 ,而六以「篤」 言度地 厚 謂「厚於 了,有積 公劉之 經 莫 公劉 臣,五、六 理 加 之勤 周 倉 然二 其 食足 厚 於 民 密 誕 此 非 面 可

> 德之中, 初 絶 而 後動 非 曾中 流 非 離 先 有大畧存 播 徒 有 遷 姑 成 倉 息 畫,去 皇 爲仁,退避爲義者也。 焉,見於《縣》、《公劉》 失措 小 利 者 就就 比 大謀 蓋 其 度可 棄 國 厚 爲 之 兩

玉 不同。 公子陽生於囊,以橐僅容物, 食靈 之,今本《説文》云: 此詩,吕注云: 容人,證 有 反,此又一 無 四 篇 底曰 徐鍇 輒,真食與 説焉。 「于橐于囊」,諸家釋橐、囊各異,約之 此又一 解 [囊,有 其 日 亦 (大,此 説也。《釋文》引《説文》 説 同 毛傳曰:/「小曰橐,大曰 底 也。 肉 無 日 「大曰橐、小 孔 囊,橐也。 於橐,及《公羊傳 説 底 橐。」孫奕《示兒編 《唐 疏 也。 日 申 橐。」《 韻》云: 毛 Ŧ 橐,囊也。」與二書所 ,引《左 日 寶《晉紀 證 漢 囊。」與 其小,囊 橐, 》陳 傳》 師古注 亦 論 乞盛 趙 囊。」 曰 毛 無 底 傳 引 盾 引 可 引

嘗不可容人也。 《漢書・揚雄傳》云「士或自盛以橐」,又云 云 互稱,人各以意名之,故説各不同乎? 然《史記·平原君傳》云「若錐之處囊 國傳》二注皆同。 元范 釋文》反,又一説也。 !雎扶服人橐」,則囊未嘗 又孔疏引趙盾、陳乞二事 無 底 日 宋董氏 橐,有底 意二物本大同 及朱《傳》因之,此 四説各異,而毛傳 E 囊。」《刑 示以 小别,可 法記 '似爲 盛物,橐 淡及 確 中」, 《捎 以 未 最 車 充

《冶氏》文,而繼之云「以其句 句孑戟 擁頸。」又《禮記 疏 又《曲禮》疏云: 二寸,内倍之。 「戈,今句子戟也。 無 發明。案、《考工記 干戈戚揚」,箋云: 也。」疏云: 胡三之,援四之。」注 • 文王世子》注 「戈,句子刃 或謂之雞鳴戟,或謂之 「如戟,有孑刃。」 ·治氏》: 「戈,句子戟 曲有 也。 云 如戟 子 「戈廣 戟 因引 「 戈, 云: 也。」 而

> 也。 閒謂之孑,吴、揚之閒謂之戈,東齊、秦、晉 名。」是戈、戟之用,俱在句子,大類而 戟有上刺之刃,又有下句之刃,故以句子 戟,楚謂之孑。 言》云: 四年《左傳》「楚武王授師孑焉」,杜引《方 戟,云「戈,从弋,一横之,象形」是已。 其横安刃不向上而鉤也。 故戈亦蒙戟名,而以句孑别之。 兵,但小枝向上爲戟,平之爲戈,微有不同 寸,用以句害人。」據此諸説,是戈、戟皆句 寸,●横刃長 横 安 《方言》又云: 刃, 但 「孑者,戟也。」疏 頭 四寸,接 不 郭注云「取 向 凡 L 柄 而 戟而無 處 鉤 《説文》謂之平頭 長四 也。 名於句子也」。 云: 刃,秦、晉之 句孑者,以 寸,並 直 **《方言** 刃 又莊 小 廣 長 别 爲

嘉慶本改

^{●「}寸」,原作「尺」,據康熙抄本、大全本、《四庫全書》本

曼胡 之閒 是服 不向 戈,而楚獨以名戟,杜特 故《冶氏》疏 句 、賈諸家語。 . 上者, 正指戈而 郭注 謂 戟也。」夫戟 其大者 云: 引《左傳》注 不言是戟,與杜異 日 「句子 而 曼胡,其曲 無刃 言。 ,曼胡 云: 7,殆即 據《楚語》釋孑耳, 然則孑者,本以名 0 者 即 所 謂之句子。」 也。 「子,句子。」 今之 謂 横 雞 安 刃 鳴

旅,設 行。 曰: 始也。」文義 二「方」字字 蓋時遭迫逐,道路 爰方啟行」,毛、鄭皆釋爲方開道 「君得此 其兵器,以 亦通 法 士也三萬人,以方行天下。」 相 一,但 同。 方 與 開之也。 《集傳》曰: (上二語· 必 有 阻 少情 ^ 難 齊 故 語 方, 整 **>** 管仲 路 其 猶 師 而

既 諸 亂 耳 侯 緐 也,曾氏以爲民之從遷,而 毛傳謂公劉遷豳 非 同 證 誤 適 网 矣。 也 稇 諸侯之從,不 地 ,從者十有八國,本 能容十八國乎? 引 過 爲 同 既 避 夏 庶 指

> 達 以遷 言鞞琫之中容此 恨」,遂用此義以述《皇矣》詩,殆未 王之無悔 則》也。案,《内 刀」爲容飾之刀,又引或説,謂 「以臭物可以 詩 謂 影疏容 爲悔 鞞 而 民 琫容刀」,朱《傳》 無永歎」, 不恨公劉,猶文王 ,猶文王之作 刀 也。」此 同 修飾 義 . 則》疏 刀,此誤 特釋長 傳云: 形容,故謂之容臭。」正 事 引 歎 解《詩》并 「民 庾 既 無 之爲 之 氏 所 從 無 容 蔚。 可 德,不爲 IE 悔 永歎 刀 悔 義 得毛旨。 爾 誤 如 語 也 解《内 釋「 猶 容 云 民 臭, 人 容 文 與 不

耳。 猕 譜》云: 《詩》多言 獨《公劉》篇 「在《禹 原 隰,皆泛指 「度其 貢》 隰 雍州 原 廣 岐山之北,原 鄭氏 平 下 濕 著之於 之地

Æ \blacksquare 爲 以 之並 從 隰之 巾 濕 鳥 隰 崪 禹 一之多 鼠 此 地 譜 原 既 之 亦 貢 名 一列,定 皆 致功 野 隨 其 以 公 旅」、「原 野 即 少 矣。 爲 作《 。」孔氏《 图 文 Ш 原 此 西西 居 釋 孔 名,下 琳 非 隰 ,則《公劉》篇之「隰原 原 則仍 然鄭 网 之, 疏 隰 譜 [至豬野。]鄭玄以《詩》云「度其 地 隰 底 《書》疏 申 度 ₹, 形高 底績」,是 績 末 ·有 是 氏 之云 是 孔 其 雖 後逃此 豬 廣 F 也 氏 原 下之通 引《 平下 野,是澤名, 又云 」,據 有 復 隰 詩云「度 荆 合《詩 岐 楙 以 此 \sim 濕 岐、 治 $\hat{\parallel}$ 譜》, 當 禹 稱 二之通 田 貢 終 爲 × 原 原 其 三,自 ^ 而 鄭 而 南 稱 地 隰 濕 是 雍 書 不 氏 濕 名。 原 琳 耳 屬 惇物、 州 貅 爲 與 應 既 隰 维 居 地 文 置 孔 原 訓 引 況 與 原 州 荆

亦 非 鐵名 取 厲 也。 取 鍛 毛 傳 鍛 云 者 治 鐵 鍛, 之名 石。 非 鄭 石 嫌 以

辨

殊

屬

疏

忽。

乎? 鐵,鐵 毛之訓 切,與《釋文》異 無禁也 鍛成之鐵 椹 孔 鍛 説文》云: 質。」是 疏 爲 云: 石名 又今《説文》「碫」 未 爲 有名鍛者,豈 已爲 又《釋文》云: 石 鍛 「質 故 ,仍是道其 雖 『碫,厲也。」」豈 申 非 人有,不 , 椹也。 八别有 之云 石名, 辨 鍛金 然 比 鍛 以 實 洋洋 作「碬 山 取 爲 石 也 鍛, 之 閒 石 鍛 所 附 属)時,須 本又 頑 以 朱《傳 以 與鍛 成 録 石,可 供 徐音 之鐵 爲 作 鍛 乃 鍛 Ш 一破 用 乎 訓 質 取 乎 石 加 石 之 爲 爲 則

氏》: 反 以 非 云 芮鞫 取 爲 水 其《 注 名也, 「芮之言内也。」然 芮鞫之即」,傳云: | 禮 證之,及箋《 《禮 雍州, ジ注 字 時 當 未 其 通 詳 作][詩 義》駮之,當矣。 《詩》意 涇 汭 汭 則 則 o 芮 芮,水 不 鄭 ^ 良 乃 用 周 Æ 是也 水 前 禮 注 涯 説 内 引 也。 涯 又案 ^ 職 孔 詩 疏 方

耳。 公制 皆居六切,注云: 記》引《詩》作 況,水文也。」《廣韻》**派** 案,坭、泦、、、、既三字不見《説文》而 如孔疏之當 《職方》 一字皆兼 職方》賈疏 禮時 賈以 鄭 其 ,餘皆借 曲岸水外之義, 注引《詩 汭 過 以 亦辨其故, 澗一故 爲皇澗 汭 又「輷」訓 爲 也 》作 水 水外曰 名 以 之别名,殆是臆説,不 訓 「泦」、《 「芮 , 汭即 謂「《詩》上言『夾 水外,字當作 同《玉 則「芮鞫」 玩。 。 「《韓 鞫 皇澗 漢 爲 阮,古岸也 篇 詩》作 見《玉篇》, 書 外 名爲 鞫字當 内 城、阪 :[城, 地 阮 汭 其 理 0 周

泂酌

公戒 成王, 公劉 愐 意 泂 各 酌 有 × 所 ^ 卷 指 阳 \wedge **>** 公劉 詩 戒 皆 以 召 康 厚

> 母」、「民之攸歸」、「民之攸暨」,民字應概指 之無棄子,與敘意全不相蒙。 薄,挹而注之,可以餴饎,見物 香 是下篇立言本旨,不當此詩 子之於人才彊教悦安,未嘗 有 德有道也 所謂皇天親饗也; 以求賢 民 士庶言,何得 昭忠信」之説 事 得於此詩之義矣。 ,感于神明。 也,《 用 泂 1 成王他 酌》戒以修德行道也,《卷阿 也 專目 ,正合敘意 黍稷非 鄭 賢 日 氏 豈弟爲民父母,所謂 才? 命君 釋《 蘇 ,馨,明 子 泂 陳 豫 又求賢 有 曲 潦 德 酌 日 及之也 皆可 水 所 以 惟 況「民之父 棄 可 爲 馨。」 「至 用《 用,喻 用吉士 猶 薦 行 左 神 父母 潦 一治馨 蓋 傳 》戒 明 君 至 深 有

時 乃 朱《傳》 再 不須水乎? 烝, 可以餴饎」,言行潦 >釋餴 義,謂 似 用行潦專 又毛云 「烝米 爲再 미 熟, 供 餴 烝 而 餴 也 以 館之用耳, 也。」正 贵 水沃之, ____

或作饋 熟,何用更沃水乎? 餾。 熟之,故言饋餾。」然 餾 引《 烝米」、《玉 烝」,並 爾 揃 郭璞 雅 申 之云: 注 孫 無 云 炎注 再烝之説。 一篇》云「半烝 云 餐音修。 烝 則一 又餴字義、《説文》云 米 謂 烝 飯 又案,餴 烝之後,勾之 之 之 飯 <u>`</u>, .) 餴 日 廣 餴 饙 餴 本作餘。 韻》亦云 必 饙 匀 餾 熟 之 便 丽

者乎? 其才,又有以體 載輔廣之言,以「彊教」「悦安」爲成民之才, 弟」、「父母」之義、非有兩層意也。 安」、《大學》「民好」「民惡」之語,不 民 矣,世 (好」「民惡」爲體民之心,又云 泂 有彊 酌》詩《 教悦安尚與民心好惡 其心」,則是豈弟、父母 集 《傳》 引《 〈表記》 「既 彊 過證 《大全》 有 教」「悦 相違 成 以 一世 成

卷阿

王 《泂酌》目 媚 但 之。 非人,故勸王虚心詘己,求豈弟之賢 明農之請,召公恐周公歸政之後,成 賢滿 「吉士」不 多吉士,不可無大賢以爲 藹吉人」也。 敘所謂 言豈弟,箋、疏 首 于天子」,來 媚于天子,不得云王使媚之,均 章云「來游 斯 朝矣。 卷阿》詩十章,凡十言君子,而 語 「吉士」,則 成王,不應 得 良 分爲 是 嚴坦叔推演其説,以 能信任大賢,處之尊位 不是自 指 目 · 也。 來 兩等, 歌 經文之「藹 外 大臣,即敘 朱子《辨 此 而 七章云「維 篇遽爲賢 同 至之詞 之統 説》 盟 藹 所謂 豈 "; 非 吉 時時 弟 謂「賢」 為成 人,似矣。 君子使, 礙於 士」、「藹 君 「賢」也 所 Ŧ 周 其 一,則 子一, 以 加 任 周 公 六 文 與 任 用 有 雖 則

義。 爲之詞耳,詩意未必 歆動之,五章之後乃告以 傳》以 爲 又召公意在勸王用賢,何得二、三、 爲極言壽考、福禄之盛,以廣王 頌 禱 之諛 詞 然。 不一及本旨乎? 致此之由 此此 特 心 温 而 四 朱

完整 賢之效也。 成也。 首章 僚竭 能 則寵 中八章皆盛稱其效以爲 之道也。二、三、四章三言「俾爾」,謂 言鳳鳴之和,桐生之盛,謂 七、八章兩言「藹藹」,謂庶僚竭力也 成就君德,下則能表正 ·取興 力以 齊錫 人主用賢,始則 五、六章兩言「四方」,謂 予以 (卷阿,末章稱 致 首尾 太平,其義 報 二章論 其 功。 虚心 我皆 具 述車馬,正 勸、篇法、章法最 人 而賢者既 詘 民俗,中則能使庶 君 致太平也,此用 〈於《卷 體 用賢之道, 以 民 致 用賢始終 म 俗 用,上 其來, 》詩 E 九章 君 也 矣。 爲 ൬ 德 則 終

> 《紀年》因《詩》而傅 游, 經,故朱子雖祖其説, 則在十八年,非歌於游卷阿 言王游,不言王歌也。/言王歌見《紀年》注 也,詩以 然阿是大陵之通稱,卷是卷曲 戒。」其説本《竹書紀年》。 而增益之耳。 三十二年,王游 歌 卷阿》、《集傳》云: 於卷阿 爲興,不言王 之上,因王 《紀年》之書,先儒 於卷阿,召康 會,《 游於此 而不著其所自出 集 一之歌 ^ 傳》又 召召 紀 也。 時 康 公從」是也 年 而 也。 義,非 公從 因《紀 * Z 作 不 且《紀年》 用 此 歌見 二成王 以 地 成王 以 年 後 名 釋 爲

《説文》云: **粤**,七然切,**脾**之或體 故 發」,《釋文》皆云 云「本亦作 云同意。 首章 [飄 今褜字惟 飄 「火飛也。 風 __ 自南 ,从异囟 飄 其「 見《周 」、《釋文》「飄」作「票」, ,本又作票」。 匪 聲,升高 从火油 風 禮 飄 》,他 也。 兮」、「飄 ,與譽同意。」 書皆作票, 火飛必上升 案,票, 風 發

<mark></mark>
煛即 者 **}** 觀 谷 將 隸 毛 之, 必必 訓 永言成帝「 軍 省 注 脆 輕 <u>二</u> 飄 17 輕 票 師 脆 矣。 風 也 古 揚 乃 者 爲 注 周 而 輕 又《 口 H 「崇聚 以 禮 迅 疏 速 風 風 漢 速 爲 之 云 • ~, 疏 輕票無誼之人」,合諸 書 草 稱, 旋 勁 引《 1》「票 詩 人》「 風 疾之兒」、《 蓋 奥、 V 爾 也。」凡 飄 从 姚 雅 脆 輕 火 票 校 猆 · 》 「 回 聲 文 飛 尉 用 相 風 取 五. 雖 犬 風 近 之 行 異 飄 義 回 票 故 注 記 也 説 旋 李 知

之矣。 乎? 涣, 《記》、朱《傳 不 音廢、《釋文》 如毛訓 鄭 訓 又「伴 伴 爲「自 **茀禄」**茀 奂」,毛 之當。 ... **>** 》引徐、 皆 縦 加 從 訓 字 且本 弛 鄭 *,毛 爲「廣 鄭 沈 之意」,音 解 於 訓 訓 家 孔子之言, 而 則 小 大 用 與 語 音 有 (「優游 毛音, 一畔换, 文章」, 亦 弗 其 鄭 孔晁 不 孔 明 意 訓 ė 音 疏 引之 複 福 疏 辨 吕 判

則

相

通

조 其 有 文章,伴乎 其 無 涯 際。 。」見 Œ 尤 爲

有

據

稱,孔 德言 非 言 有 :詩旨。 言言 德者然後 馮、 疏之 王 馮、 翼、 當 解 翼 有 孝、 可 甚 是 所 德,分 當 馮 施 則 依 用之名, 四 吕《記 「有」 爲 有 所 刀 字 》謂 孝、 義 輔 文 翼 馮 德 皆 義 必 翼 是 指 參差 目 成 賢 得 有 成 行 人 殆 孝 之 之 王

會 以 高 凰 爲 也,鸑鷟鳴 之,當矣。 周書 諸 皇 之别 喻 岡。」其 心孔 侯及四 鳥 鳳凰 名 王 解 岐 也 疏 於岐 案《周 會 于 夷之事 所 山 引《 飛」, 解》云: 言 之舊乎?」此 Щ 詩 書 正 語 箋 × 指 一》内 云: 此尤足爲 韋 云 君 成 昭 史 王 奭 西 注 過 時 **>** 申 鳳 時 굸: 又 日 鳴 凰 以 證 F 鳯 鳥 鳴 城 鳳鳥,方 凰 而 證 矣,于 灣驚 不 既 至 孔不 周 也。 聞 成 之 大 之 揚 又 彼 鳳 興 證 以

澤臻,于胥樂兮民以寧。」詞調卑弱,非三代 翔兮於紫庭,余何德兮以感靈,賴先王兮德 不爲孔所據信矣。 操》。」此《集傳》所謂游歌也。《紀年》非正 云: 引 王十八年, ,豈偶未 「鳳 凰 及耶 鳯 翔庭,王援琴而歌,作《 凰見,遂有 ? 按《神鳳操 至《竹書紀年》云: 事 於 ¥ 河 心沈沈 「鳳凰 典, 神 約 宜 鳯 注 成

人手筆,其爲偽作

無

疑。

容又盡 蘇氏 力」,意皆出《爾 改 訓 力。 藹」、毛云「猶濟 衆多,則下「王多」複出矣。 「藹、《説文》作藹。」案、《説文》: 夫美 雅 容 盡 疏合二義言之,云「美 力,所以 濟」,鄭云「奉職 爲吉士也 又《釋 盡

> 同。 世已有上聲之誤,故孫特致辨與? 害反。」《説文》、《玉篇》並同,止有此一音, 無讀上聲者,又皆入言部。 泰二韻皆收之,非古也。《釋文》: 譪, 藹字、《釋文》與《禮部韻》並音去聲。」意宋 又此 从言葛聲,臣 字近 世有上、去二讀 盡力之美。」亦與《 示 **企** 兒 編 「藹,於 韻 釋 訓 解

之比。 征,以佐天子」相例。 「王」與「天子」文連, 「曰」,出征以佐天子,正王命吉甫 與下句文義難通也,因引《六月》篇「王于出 維君子使」、《集傳》以君子目王 不知彼詩「于」本 無礙 於義, 語也,故 非 自 此 詩 訓 知

差長。 則由 梧 桐 以 王之用賢,此 喻 鳳 明 凰、梧! 王, 此 桐 爲 鄭 毛 義 太平之實驗, 義 也。 也。 以 較 鳯 論之, 凰 而 喻 致 賢士 此瑞

二九三

之盛 王有此 見王 既 定車馬 庶 寵 且 耳,與優賢意 |多」、「既閑且馳」,言賢者車 齊之隆 也。 何關 若君子目王,不 渦 馬

劉》、 也。 也。 樂工 音,是賢者自歌之,末章矢詩而遂爲歌,是 賢者矢之而爲 君子」言,矢詩、遂歌 即首章之「來歌」也。 之述傳,殆未合詩意。 爲三篇 泛言公卿,是即詩之「君子」,而 ·來歌」、「矢音」首尾 《泂 箋以 一歌之爲 明王使公卿獻 矢詩」,即首章之「矢音」也。 總結,似矣。 ·
酌》、《卷 矢詩 異耳。 歌 爲召公自言 阿》即所矢之詩 也。 詩,遂爲工師 末章傳云: 承 文義 然「矢詩」、「遂 來歌、矢音承上「豈弟 但首章來 上兩「君子」言,皆謂 相應甚 了, 疏 前 「不多 歌 敘所謂 明,箋、 之歌。」傳 因 「遂歌 以以 此 歌 謂 矢 疏 與 語 公 督 其

生民之什下變大雅

民勞

有據 紀》同。 矣。 又沖主,特與其雲仍同輩耳 召康 有 厲 是康公十六世孫,康公與成王 子也。《世本》即《史記》所據,亦應 以爲共王生懿王及孝王,孝王生夷 孫也。」 疏引《世本》 及《周本紀》 明其 王並 短 矣。 公最 長 《民勞》敘下箋云: 案《本紀》,孝王乃共王弟,夷王乃懿 故 世,世數不同者,生子 疏又引《左傳》服 計其 稱多 也。 壽 生存時,當及見七 此 語 論 固 衡》言其 然, 虔 「厲王,成王七世 而 注 世 有 猶 同 百 言 數 早 時 八 未 十 差殊,又 世孫,成 晚,壽命 「召穆 王,此 ,穆公與 盡 與《 八世次 歲 誤 本

何足怪。

危也。 云: 與、請乞義。 从水气聲。 異乎? 相 易傳也。 庶幾」,「殆」與「危」,義皆可通於「近」。 意矣。毛云「危」,即「近」義,《易》曰「其殆 云: 文及《説文》皆許訖反,音各不同。 《説文》 毛語未明,故鄭云「幾」,正申毛「危」意,非 當更云危,故以汔爲幾。」源謂孔氏失毛、鄭 小康,明是由 通,毛「危」、鄭「幾」同歸「近」義耳,豈有 汔可 「汔之爲危,無 「汔,幾也。」疏申毛云: 水 饑,音祈。 又案,汔、《爾雅》、《説文》皆作汽, 又《爾 涸 小康」, 气即 也。 但《爾 危即 雅 汔 或 古氣字,省作汔,借爲乞 安,故以汔爲危。」又申 也」。 雅》釋文汽音蓋、《詩》釋 毛云: 日 釋詁》「噊、 正訓,又勞民須安,不 泣 下。」與《詩 幾、饑、 「汔,危也。」 「汔之下云 危、汔轉互 幾、裁、殆 雅 但 鄭 鄭

> 也。」音同 義 又 不 同 許、 陸,而 廣 雅 ***** 訓 釋 又異,當以毛、 汔, 許 乞反。 鄭 盡

爲正

耳,後人傳寫,合兩義於一字,久矣。 憯是兩字。 之譌。又《説文》别 章懷注云「詭誑委隨之人」,朱説當本此 惡,朱《傳》訓 心旁爲正,惟《雨 而實同歸 「曾也。 無縱詭 憯不畏明」、《説文》引之憯作替,云 从 也。 《詩》 日 爲 **兟聲。」臣鉉等以今咎字即轡** 隨」,毛 《後漢 不 無 中 顧 僭字多訓 正》「憯憯 有僭字,云痛也,則贊、 訓 是 書 非 爲詭人之善, 而妄隨 陳忠傳》引此詩 日 曾 當當 人,雖 隨 以 从心 不著 人之 小異

莫考、《釋文》借用《廣雅》「如」字訓《廣雅》云:《書》則曰:「能,恣也。」箋《詩》則曰:「柔遠能邇」,見《書》,亦見《詩》。鄭注

詩 稽 古編

解矣。 訓任 國, 反。」據徐 順 如 若 順 意,不知徐云毛如字,當作何義 也 伽 鄭 文》 但 徐邈晉人,去鄭未遠,宜得「伽」字之 均均 其 箋 毛 反,「能」 也。」釋之, 近者。」則「伽」義當 自 傳 有 「能」字 解 能 與 矣,箋云: ΙĒ 徐云 耐 義 無 用 訓, 通,「 毛 書 孔 如 述毛 伽」當訓 注 字 與 安遠 ', 鄭 (順 恣 也 全用 相 奴 方之 意 忍, 同。 代 釋

板

帝」亦 來矣。 帝板板,下民卒癉」爲君反 柔》首章「天」字,亦斥王 《板》詩二、四、五、六章,《**蕩**》詩 板》、《蕩》首章「上帝」,皆 指 三家義 君。 ^ 雖 阚 無攷,然《韓 雅 釋 一,毛、 計 道 詩外 而 鄭 民 次章 之説 愁,則「上 傳》以「上 謂 万天 -及《桑 有 王 帝 者, 自

> 然。」亦迂。 開 天理 言王者之事,尤難 説 皇、 民,其易 ,最是拘墟之見 王 以 牖 君 其 也 如 民,迁 _ 此。 正 謂 經屬 矣。 以 此 又「天之牖 明上之化下,其 上天。 諸 朱《傳 詩 耳 ₩ E 李氏 0 民 : 後 下 儒 解 天 文皆 爲 易 之 亦 順 其

傳: 管字,乃悹之借也,與管見義何 案,管本作息,《 傅會之,曹氏之陋説,《 繫」,必有本也。 「息息, 整 管 管 」, 無 廣 所 訓爲 依 韻》云: 毛 0 以「管 小 又 詩 見 音 「古滿 緝》引之, 者 管 貫。」 蓋 預 爲 然 因 切。 則 管字 無 《詩 誤矣。 此 所 詩 丽 依

管」,六章「無自立辟」,正此意。 日 其虐,厲王 則 也。」小人逢 厲 始革 爾雅・ 時 典」,斯 紛 釋訓》云: 迎 更舊典 其 其 主 證也。 一,往 必多 「憲 往 か、《周 創 憲 首 立 章 泄泄 孟子解 語 新 》太子 靡 法 聖 以 制 泄 助 法

之交》。 泄」云: 必争先獻媚,各進其説。《説文》解字義,故 文》「泄泄」作「呭呭」,云「多言貌」,「沓沓」 義、非先王,豈止於怠緩悦從哉? 以「泄泄」爲怠緩悦從、恐非 故敢於自立法也。」與《釋訓》意合。 止云多言,《爾雅》釋《詩》義,則推其多言 云「語多沓沓」,義正相符矣。 制法則」似異 沓沓者 故以 「言則非先王之道, 無禮義 1,雜沓 而實同,人主紛更舊典,羣小 競進之貌,辨見《小雅・十月 、非先王實其説。 孟子「沓沓」之 以 又「多言」與 先 王爲 案、《説 朱《傳》 夫 無 非 禮

衆多急蠶桑也,臣之雜沓争獻 而 無然泄泄」傳云「猶 鼓翼也」,「桑者 而 詩》三言泄泄,「泄泄其羽」傳云「 則 同。 鳥之鼓翼 泄 沓沓也」,三「泄 泄兮」傳云「多人貌 八爲求 媚 雌也,人之 也 總 泄 雉 爲 一所 競 飛

進趨先之態。朱《傳》皆反其義。

《傳》既解爲動 鄭原 也。 則「 上、下文正一意,安得謂 出 嚴又譏鄭以上、下文皆責僚友,中忽言王者 附和,唯諾恐後者也,尚 老夫耳,其囂囂 其同乎? 言論宜 國之安危係於出令如此,不得輕變先 者之政教,蓋上文戒羣臣毋助王爲虐,因言 而 令,詞 輯之懌之,臣 蹶」當居月反。 其説本當,而嚴《 云此戒語時之大 辭之輯矣」、「辭之懌矣」,鄭以 天之方 相 意不倫,則不獨失詩意 和協、誤矣。 以下數章觀之,當時 蹶 矣,又云顛覆之意。 者、 亦與有責焉,故告 今兼兩義,不知 謔 蹶, 臣 緝》非之,謂 謔者、夸毗 夫言論貴其是,豈 不 俱 政 慮 倫 衞 教雖 其 乎 反, 不 懽懽者 ,併失鄭意。 出 動 相 者 戒 讀何 戒 訓 於王者, 皆 詞 合 以 也 哉? 隨 止 僚 王 爲王 音 與 聲 法 必 朱 友

言而 也 爲自得不肯受言之皃。以自得訓囂囂,雖 「孟子》趙注,然轉爲不肯受言,迂矣。 不 疏引《爾雅》「警警,傲也」申 聽 我 也。 囂 囂,五刀反,朱《傳》許嬌 囂 毛云 一間 之謂 **囂** 猶 傲 反,訓 譥 慢 本 其 整

韻 輔 類,乃見成 也。 雅》,先儒皆遵用。朱《傳》獨曰: 訓 〕疏乎? 並 》皆作舿舭 即以諛言毗之。」夫夸毗與籧篨 毗 不相蒙。 傳云: 一無作阿 附 沉毗,人臍也,轉訓 稱目,非可分析取 也。 ,舭字《集 「夸毗,以 附 解 小人之於人,不以 者 韻》亦作魄,整與毗 案,夸毗《玉篇》、《 體柔人也。」義 義也,此解 益, 訓厚, 、戚 大言夸 「夸,大 同《爾 施 字 廣 訓 不

之態,而皆見《詩》。今合之他典,則《周書》 也。 夸毗,體 爾 雅》: 柔 也。」此三者曲 **邃**際, П 柔 也。 盡 戚 小 施 j 狐 面 柔

> 乎? 諸,取 戒此 《書》傳亦云:「便辟,足恭。」孔仲達釋「夸 夸毗亦必有所象,今不得其説 疾 案,籧篨《廣韻》作葉蒢,戚施《説文》作鱦 未 而一實也。《孟子》述曾子、子路之言,所謂 恭異此,誤也。 毗三云 令色即 「巧言令色足恭」,注云: 廣雅》及《玉篇》作規閱、《晉 巧言令色便辟」語異 同 名、《説文》以 三者,聖賢之垂訓,古今同符如此。 而言者,其 脅肩者,其體柔 象於廢疾與 面柔,便辟 「便辟其足,前卻 則足恭也,便辟也,夸毗也,三 口 籧篨爲 即 柔乎? 器物,其賤惡之稱 體 乎? 而 柔 義 粗竹席,鱦 耳。 足 同, 取 爲恭。」今經生 諂 人與律身皆當 語 笑者,其 恭 巧 \sim 》以二者 論 言即 ,便辟貌。」 語 黽 口 亦言 與? 爲 面 解 爲 名 又 柔 足

本通也。《集傳》曰:「資與咨同,嗟歎「喪亂蔑資」,毛以蔑爲無,資爲財,義

聲。」不獨改字,文義亦乖。

同。 洩冶 此 必多 也。 民多邪僻,王不宜又爲邪僻,朱、吕皆從之, 暴也,「自立辟」,可識興亡之故矣。 非 詩旨。 制也。成王之賢也,「由 處邪僻之世,不可自立法,意正與古注 自立法,必廢祖宗之法,所 不然洩冶諫君,可言邪僻乎? 民之多辟,無自立辟」,立辟者,立法 《左傳》宣四年,孔子引此 舊章」,厲王之 謂 國將亡, 李氏 之詩,**譏** 謂

衆,而音反仍襲《釋文》之舊,殊少檢點。「立辟」从李氏,訓邪僻,「大師」从王氏,訓大師」,毛、鄭以爲三公,故《釋文》音泰。 吕《記》故《釋文》上「匹亦反」,下「婢亦反」。 下章「大故《釋文》上「匹亦反」,下「婢亦反」。 下章「大故《釋文》上「匹亦反」,下「辨亦反」。 下章「大

「宗子」爲同姓者,王安石之説也。晉士蔿適子者,鄭康成之説也。以「大宗」爲巨室,以「大宗」爲巨室,以「大宗」爲同姓世適,「宗子」爲王之

《左傳》證之,誤矣。 子之謂,鄭説 固宗子, 對獻公,僖 何城如之?」宗子暗指 五年。 有本矣。李樗從王説,反 引此 詩云: 君 申 其 生,正 修 德 引 適 而

切。 得 所改,則 以就之,陋矣。 本之爲生字,可 借訓往 案,《説文》宝从出,在土上出,本象 王,併『出生』字亦省作王」,斯言良是也 『出王』本作生,石經因凡字從生者俱消生爲 長箋》言「狂、廷、誑、往等字皆从生、《詩 獨見此耳,説《詩》者頗以爲疑。 有上聲乎? 王雨芳切。 及爾出王」,毛訓 ,傳義有徵矣。 孟蜀以前經文尚作生也,故生、乎光 異音、 知也。 夫王字止有平、去兩讀,安 ,而《釋文》無音反。 後儒 又趙 王爲往。 艸木妄 不察,妄爲往音 謂 此字是 生 近世《説文 王之訓往 艸出 則 是 石 亦 前 唐 經 可

毛詩稽古編卷二十一

吴江 陳處士啟 **瓜源著**

蕩》敘云: 厲 Ŧ 時天下 蕩 蕩, 無 緇

蕩

蕩

之

什

上變大雅

訓 《洪範》之「王道蕩蕩 蓋 盪 紀文章,故作是詩。《爾雅》云: 八君也。 爲廣大,殊失詩旨。 一上帝本指厲 一,僻也。」箋云: 此詩 王,譏 「蕩 蕩」,與堯之「蕩 「蕩蕩,法度 三,取 其 蘇氏 無 義 法 度, 因 各别矣,歐 此謂 而 廢 蕩 在 壞之貌。」 「版版、盪 小敘 民 無 陽 名」、 上 蕩 氏 爲

> 闢, 漾,近 别矣。 義,而 涉。 也。 惕,狂放義當作像,亦作惕,滌除義當作 廣大義當作潒。 料後人之誤解乎? 坦蕩蕩」,及「堯之蕩蕩」,當作潒,豫訓 蕩」,孔傳訓 書》「以蕩陵德」、《論 與詩之「 則 也 今惕、像、豫三 法度廢 廣遠義矣。《書》「王道蕩蕩」, 閒亦作盪,此 亦 即 蕩」,●及《 廣 如《詩 遠意,當作激也。 壞,正狂 滌除,此盪字也。 蕩蕩」不 》「魯道有蕩」,此惕字 蕩 詩》「蕩 一字不 本水名,與此 俗之譌 放 案《説文》,平 合, 公義矣。 語》「其蔽也蕩」,「古 夫 ·用,以 蕩 紋《詩 也 上 ^ ,古經文必 漢 帝」,此 論 書》「洪 世 蕩 四 語 坦 者 一去古 孔 **%**[] 字 義 義當 贵 像 總 俱 水 君子 水 訓 能 也。 未 潒 有 蕩 字 無 作 開 其 逆

0 「今」。 古」、嘉慶本同、康熙抄本、大全本、《四庫全書》本作

其 遠 ,所 見 後 經 儒 本 徒 較 據 真 俗 本 又 妄 師 肆 授 紛 有 更, 自 譏 故 先 訓 儒 釋 爲 得

誤,豈

非經學之一

阸

哉

原 非 字 隨 昭二十 稱 貌 嘉 樂。 目 如 「藐藐 幾 踳 文 體 也 魚 同 漢 則 瞻 不 謹之。 誤,俗學之沿 屢 同 不 隸之舊 **>** 又 五 而 以 卬 「欽欽」,《 更, 年《左傳》語 案經 可 一「翩翩」、《四 齊 興賢者 以以 復問 抑 人譏文姜亦 經文 一, 況 此 典 爲 典 類 中 古 大 以 之 亦 、《巷伯》 難 晨 然 語 文 貌。 爲不相 譌 遭 屢 忠愛之誼 勝 風》以 字 同 垂 大篆乎? (易, 衛 翻 詘 牡 形 而 用之。 「豈弟 譯矣。 指, 二千 雖 **>** 美 人、《崧高》以 爲 以 以 易 惡 包所改之經,已 蓋 憂, 也, 刺 興 君子」,至 「繾綣從公」, 年後,古 異 自 又 較之 而 讒 使 而 鼓 義 有 加 臣 字 人。 召公惡 鐘 者 經 義 以 删 以 淡以 其 一美之 經 傳 定 爲 同 南 猶 來, 多 之 詭 寫 美 爲 面 有 可

致,此漢、唐注疏所以爲功不小也。

克義。 毛,此 説。 日: 曰: 斂, 注以 勝。 斂 取 意 云, 「掊,聚斂也。」案、《説文》訓掊 爲自伐,毛殆 行 鹽之名。 漢世 或分爲二義,亦 但 其 當是 **掊爲手把土,皆** 蓋定本「掊」作 得之。 「掊克、好聚斂、克 曾 克害之事多 掊斂好 克 《漢書 是 經 害 也 掊 ^ 本 乎 , 《史記 朱《傳》徑解 據 • 克」, 然此 皆 勝之人。」 ? 敘 「倍」字釋之耳。 作 傳 武 端 朱 未 「倍」,倍是兼 毛 止 影師 「倍」也。 是 子 可 訓 釋 寧 剥 本 知 害 最 古 培訓 掊 僅 爲 「掊」義 紀》 取之義 人 注 喜 爲 聚 聚 也。」豈 引此 顔 自 從 斂 爲把,乃 斂之臣 《釋文》 掊 伐, 監 陸,克 倍於人,故 ? 耳。 陸 箋不 視 詩 克 殆 得 謂 顔 面 恐 云 王 鼎 爲 祖 訓 入水 注 以 釋 云 傳 其 聚 遺 從 氏 聚 好 云

《蕩》詩兩「義」字皆訓宜,「而秉義類」

此詩 俄,音同,故用之亦不甚别。 亦 記》引之「宜」作「儀」。 古義、儀、宜三字通 從式」言沈湎之行不宜從 言 云「宜」本作 儀 汝 知 直當「宜」字用 「兩「義」之爲「宜」,毛、鄭不誤矣。 「我儀圖之」、《釋文》儀作義,傳訓 所 義 訓 用之人宜 宜,不知 「儀」。 「其儀一兮」,箋訓 此 善 也。 用。 「如食宜饇」、《釋文》 兩「義」及《烝 也 「宜 義、 而法 簺 訓 儀、宜古皆音 整于殷」,《禮 類爲 式之也。 善。 民》之 後人 儀爲 不 宜。 義

祝興 也。 毛 絶 **彊禦衆怨之人宜黜逐** 也 矣。 未 用人不審 一,而使之得遂,是王用人、聽言之不 流言以對」,毛傳云: 小必然。 孔 申 鄭 則 傳 以 寇 云「爲流言 對爲荅,義短 攘進 也,不 矣,聽 - 根之 以 對 言 遂 於毛。 流流 其惡 不 遂 也。」 審 言宜 事 則 誀 審 遇 夫

詛者,盟之細也。

詛用牲,而祝無之,

疑,乖 子, 之屬 所謂「夫婦皆詛」者也,與箋、疏異,文義亦 爲 於苗 立 後世民情愈澆,鬼神 國人,秦伐楚則亦詛之於神,事不勝枚指。 尤盛,如 以釋其疑,宜其多詛祝矣。 欲詛「何人」,是大臣互相詛 皆掌之以 祝 流言交構,君臣之閒 言》詩「君子屢盟」,是王 司盟詛,民之不信者,其 、怨謗,即周公所謂「小人怨汝詈汝」, 此 又 魯作三 法,下 有詛祝,惟此「祝」如字讀。 民 詛 戾不 之 鄭 베 官,而 細 亦 和 後 軍則詛之, 詛 也。 所致。 莫 王 射 因 重 潁 朝廷之上 古 著 其 考 重 不能相信, 厲王 不足約束之,於是上不 事 爲 叔者 陽 盟 矣。 令。 虎 與 獄 詛 之時 亂 亦 訟 之禮 臣下盟 東遷而降,斯 也,此皆君臣 晉 ^ 魯 秋 自 集傳》以 則使之詛 周 詛 羣 則 至要神質 禮 行 官》之屬 無 詛 蓋 小接 之。 也, 畜 其 其 春 蘇 詛 羣 君 風 官官 迹 及 鬼 相 風 巧 始

厥 通 П 詛 但 厲 祝 平 王 行 監 謗之令, 或 人 以 目 而 敢

皃。」《 意異。 釋文大有 述 聯 自 毛 句》詩「豕腹 彊 云「炮焚,氣 玉 也」,意皆 云 韓 篇》、《廣 卦。 雖 用 引干 派 毛 咆 同 哮 韻 彭 語 矜自健之貌 鄭 實 ",猶 》「彭亨」作 亨」,蓋 而失其旨矣。 注 彭 云: 亨也。」韓 用 二,與 其 「彭 態悙」, 語 韓 亨, 愈《石 案,《易》 然鄭之 咏 驕 注 鼎 滿 云 腹 鼎

是 不同 謂 合,當是 也 。」陸《 之 螗 種。 蟬 名蝘 如 蜩 輔 也。 、疏》云 蜩 郭之注《 蝉, 以 虭。」 然 如 物 螗 西 孔 通 而 爲 疏 傳云 異 語 「宋、 蜩 則 據 爾 也。 名 蜩 雅 梁、 爾 衞 爲 與 **>** 螗, 雅 同 宋 總名,螗 謂 郭 蜩 》舍人 此 以 之 蟬 義 東謂 義 之大 蜩 蟬 殊 海海 也。 注 又 乃 殆 蜩 謂 與 諸 而 岱之 不 爲 螗, 黑 毛 方 蜩 然。 蝘 閒 語 傳 中 色 蝘

> 之云 句 蜩 雅》云: 舍人、既失之、邢昺述郭者也、載 之名居 爾 讀 也 "》疏, 雅 然乎? 蜩 蜋 Ł 所 娘娘 蜩 而 列 者之一 與 不 蜩 蜩 蜩之 不 知 螗 蜋 其 蜩, 塘」,截 如 耳 種 蜩 與 郭之當 七蜩 凡 郭異,其 螗 何 七 去 蜩。 弱 中之二 而 一「蜩」字,意 矣。 方 總 首 疏 語 名之 忽 孔 也。 乎 舍人 尤 舍 ? 蜩 日 甚 郭 孔 又《 蜩 語 總 疏 而 舍 於 取 引 諸 爾 螗

之, 大也。 贔 屭 又《 目。 大也 奰。』《説文》引 其 「奰」作「贔」。 語 魏 0 内 以 都 一目爲膃 平秘 字乎? 从三大 , 奰于 證 賦 》「姦回内 此 切。」然則 中 詩, 音 傳 居 ^ 或 題, 説 語 彼 倦切,目 孔 」,傳云: 文》有爨字, 本 「奰」 「奰」作 疏 贔 作六。 今作 引 圍 |亦作「贔」也。 西西 也。 劉 與「大小」字 「點」,二二: 淵 京 奰」,省文也 三目 不 林 賦 無 引 醉 》「巨 贔字, 此詩 而 别。 靈奰 怒 壯 證

以

殆

発之

破體,後

後遂

分爲

兩字

耳。

鬼方之名,見《易》既

未

濟

推

了及《詩

傳曰: 方一, 故 《大戴禮 必一國乎? 説。 《易》言「高宗伐 蕩 畔,故伐之耳。 方」,則殷時鬼 不知在 方,皆臆説 荆楚,疑爲一事,遂謂 # 施 》之篇。 山本》注 方, 或又謂 於約 然則國 何 北 「鬼方,遠方也。」孔疏云「未 地。 世, 云: 方 《易》釋文云: 帝 也。 今貴 國 之 繋》篇 《世本》謂黄帝娶於鬼方氏, 方本服從于中國,武 王 良然。 孔 高宗在位五十九 所 鬼方」、《 州 一衡言 鬼方、於漢則 見李鼎祚集解。 疏 在,不 本 謂 以 羅 鬼 「成 陸終娶於鬼 案 爲「鬼方、殷之諸侯、 方 施 商 可 干寶《易》注云: 湯化異俗 鬼,遠 即 鬼 頌》亦言高 攷矣。 荆 或 楚。 先零戎。」見 文 年,所 地 也。」《詩》 〈選》注 方 後 T 而 即 宋黄震之 氏 時 伐豈 宗伐 儒 知 懷 古 要 引 復 鬼 見 何 鬼

> 爲 玉 荆楚者非 海 ***** 先 零, 是。 西 羌 也 0 皆 不 言 是 南 裔 則

亡,惟 代 以 爲厲王危乎? 患 知武庚不爲宣王哉? 有土之君,厥德不遠,罔有代德。 民生文、武、民之幸,非 而 其 亡,上天立君之局,至此乃變,後世之興 德者必如文王乃可,穆公假 不亡者,以時 《蕩》以 (惟國 力是視而 紅紅比 人。」語 已。 雖 無文、 厲王,則 見 然訖周之世無 《周 武 芮良 商之幸 書 耳。 厲之惡 芮 大夫云: 良 陳其 也。 商之季,天 夫 如 文 解 時爲王之 (対矣, 言, 不然,安 王 「天下 而 殆 噫 爲 周 然

抑

和元年迄平王十四年,爲歲八十有五,而衞《抑》之篇,其作於共和之世乎? 自共

時,武公尚 或 武 公薨。 其 壽 在 楚 當 語 童 **※**言 年 百 歲左 共 武 和 公九 右 時 也。 則 + 方少壯、《 \overline{H} 厲 E 猶 未 箴 流 儆 抑 彘 於

然。 是後 侯 詩 應作 庶 詩 來 子 於 發 ·, 無 追 此 於 刺 職 際 性 事 情 矣。 蘇 於王 主 氏 孔 一朝,不 文 主 仲 譎 其 達 諫 説 謂 應 作 無 武 而 出 詩 源 公時 刺王 位 以 一之嫌 為諸 爲 一,必 未

老 兀 庶 而 彌 尚 篤 可 少少 爲 之, | 壯時必德 況 侯 或 性過人,彼目 公子? 武 公好學 I擊厲 王

之虐 自警,至耄不忘 而 發 憂 危之語 、人相於 固 其宜 周 必 也。 日 誳 其 誦 後 焉 用 大 以

師 刺厲 之官 Ŧ, 因 亦 以自警。」漢 取 而 列 於《大 侯苞苞著《韓詩翼要》十 雅 矣。 敘 云

卷。 側 年 子 時 九十 亦云 毛 作 韓 當 有 矣。 義 五 同 衞 猶使 也。 又 武公刺 此 人日 詩 吕《記》、嚴《 本爲 王室,亦以 誦 刺 是 Ŧ 詩 緝 而 而 自 》以 作 不 戒 離 爲 非 爲 庶 行 於

> 自 公自警,特侯國 失,遂引侯苞 警 而 作 也 語 朱 詩 以 子 耳 削 ^ 何得 辯 其 刺 説 編於《雅 王 \forall 以 室之説 敘 之 :>哉 刺 夫 王 武 爲

哲人 愚」。 《韓詩外傳 以 城 知 立 而 免禍,不爲 爲哲之意 矣,豈 婦 新 同 乃自 人 説 解 夫既 靡 無 可證 哲 可 謂 非 以 見矣。 無 容貌 》引箕子佯狂 不 無 爲 哲 愚 威 此 儀 哲 人 儀,何名哲 毛、鄭之説 **詩**? 故 朱《傳 謂 猶 而 無貴 後 王 無 況 政 言 威 以以 詳 事 於 暴 儀, 玩 哲 人 以 哲 此 虐 當 乎? 經 ·若哲· 婦 證 ,賢者佯 則 詩 有 文,並 傾 此 刺 無 本 詩,異 城」。 時 或謂 哲 夫則 也 無 而 故 愚 家 成 自 不 此 别 觀 以 不

傳 也 四 方 古注 而 盡 無競維 人道」之 化 其 本 俗,是得 明 人」, 白 解 正當 言 頗 賢之效,正見其 莫 爲 『後儒 彊 迁 於 闊 得 皆從之。 賢 案《左傳 人 所 也 以 ^ 》哀 集 彊 訓

之卿 四 方 + 以爲 -六年, 、箋、疏之解 而引 主,而 ,子貢 此 詩 言 咸 不謬 因 於何有?」 衞 繼 軱 矣。 之日 内 無 獻 此《詩》説之最 之 若 親 得其 外外 無 成

鄭 與 此 及 市 (藝文 傳 漢 詩 以以 報,二 《師古注皆讀爲售,是也。 又 》、嚴《緝》皆從之。 儲 鄭 類 無言不讎 爲售, 反。 **%聚》引** 注 語 酒 以 ĪĒ. 案, 儲 則 讎 相敵,較 此 爲 數倍」,又曰 應去聲,故《釋文》有 」,毛以讎 古 詩 荅。 作 讎 《韓 八爲 詶 優 爲 -, 詩 二 收 不 又案、《表記》引 售」二字 矣,吕《記》、朱 用 亦 》「讎」作 是苔義。 則 讎」,如 應 通 市 平 酬 用 由 苔 淳

矣。 云: 也, 況謹 鄭 子 箋 繩 孫 飭 本 纙 繩 自 此 繩 戒 持 以 ~ 慎 是 《釋《抑 也 爾 保 雅 世之意 意 》作 詩。 亦 故故 同 憴 ^ 螽 憴 蓋 兩 斯 詩 字 云 訓 以 毛 古 傳 戒

> 於 子 味。 孫 取 義 亦 長。 蘇 氏 以 爲 不 絶 貌 殊

> > 短

古人以 也。 香棄 語。 厲 陽 何必援神明以 聖賢主敬之學 及之矣。 王 厭之禮 漏 《中庸》引之,以 朱《傳》純 無 肆 相 道 祀 祀,皆以 亦與《烈祖》篇 在 ,助祭者 爲 又下文言「神之格思」,明 ,尸謖之後,改 爾 大事 室,尚 自 自 以 祭 繩 應 慎 無 伊尹 典 東 如此,非 不 證 獨」立 嚴 邪 設 不虔,爲亡 愧 **叠明** 言桀慢神、武王言紂 連 敬之心,武 饌西 於 文,可 解,夫 屋 北 承祭之説,其 因 隅。 漏 畏 見 國之大罪 鬼 戒 殆 公刺 詩 鄭 慎 不謬 加 是 指 本 恐懼 然 祭 言 詩 也, 也 引 時 應 末

意。 儒 厲 以 倡 源 爲 [嬖郯 彼 謂 理之必 童 厲 配 而 王 角」, 姬 無 用 事之臣 之 鄭 與 緯 投 以 書 桃 喻 一,必 也,誠 皇 報 后 李 有 相 預 無 謬 反,亦 政 矣。 知 圃 殆 自 非 然 狃 用 結 後 於

者,將: 目之稱。 ,自角 有能,詩人設喻之意應 壞 亂 也。」夫無 傳云: 王室,故經文曰「 角 童,羊之無 而 自謂 爾 有 彼」, 角 角 是實有 者 猶 也 無 能 指 圃 丽

自謂

螮 古字通用,與虹霓之虹無 釋言》文。 蝀,而嚴《緝 寅 虹 小 彼《釋文》云: 子」,傳云: 》從之,誤 甚 涉 \neg 也。 「虹、 虹 曹氏 潰 訌 同。」此 也 解 爲 本

或指 親 執政小子」,是當時 之臣,則《抑 又《民勞》以 之則日 武公自稱,非是。 臣言亦 詩人稱目 爾、汝,曰 下 可。 》篇「實訌 諸 其君,尊之則 《周 篇 有此稱謂矣。 雖 小子,難 書・芮良夫解》云「爾 刺 小子」、「於乎小子」, 厲 E 曰 以 實 天, 常常 兼 嚴《緝》以 禮 日 戒用 拘 上帝, 也。 事

左傳》襄二年文乎? 説文》引「告之話言」以爲 然傳本引《詩》,何不 傳語 贵 指

> 足矣。 讀如 會善言也。」古言多善,須合會之,二意互相 徑以爲《詩》語 「話」本户快反,讀如壞。《正 話言」,文稍異,非 云古文語,《集韻 話,古之善言也。」《説文》作語,云: 「華岳」之華,蓋就俗音。 又案,「語」籀文作「譮」,《玉篇》作話。 也? 》同,今經典 許 所引矣。 若文六年 韻 傳 案、《傳》云: 俱 》收入碼 則云「著之 作話。 一合 韻 又

典 文。 是瘳者,瘳寐之義,夢者,昏昧之義。 寐 餘俱當作寢。 夢夢」、《抑》篇「視 「寢,想也。」今人以夢作寢,失之矣。 相承通作夢,其誤久矣。又案、《廣雅 而 又云: 有覺也。 **羻、夢二字義别,《詩》惟《** 「夢,不明也。 莫鳳切。案、《説文》云: 从寐从夢。」引《周禮》六瘳之 阚 夢夢」當作 从夕,曹省聲。 E -夢,莫 月 * 今經 視天 紅 瘮 切

桑柔

之誨 《詩 故 事 伯 覆 子,戒之不從,又作詩刺 往 已,類如此。 知憂恤矣,爵 善,偷生苟安,爵以賄成。」夫偷生苟 作《解》言也 告爾憂恤 T, 先 狂 詩 相合,意芮伯先作《 影,冀 一三賢 亦 以喜」、「維彼 之, 周 意 刺刺 書 其 逢 無 臣 Ŧ 一,誨 . 聞 迎者,正 信 外,餘皆 奈 芮良 以 又厲 而 《解》云: 用 爾 其 賄 改 敘 小人,如 如 忍心,是顧 成 夫 E 悟。 一一、 貪 則 不 解 朝 醉 解》以 僅榮公、 佞 不 》其言與《 除召 何? 忠 「誦言 之乎?《詩》 爾執 小 能敘爵矣,亦 所 臣 人,專利監謗之 戒 云「惟 穆公、芮伯、 是復」,不 憂國,卷卷 故 政 如 王 衞 《桑柔 後 及 小 醉 彼 从 著 安 執 子 愚 輩 》詩 之 既 則 所 政 不 正 也。 詞 凡 於 告 謂 無 圖 小 目 不 往

> 書》所 由 背」、「善詈」、「用力」、「爲寇」諸 而 友已僭」、「貪人敗 足。 ,居可知矣。 戒相符。 其 刺 羣 臣 合《詩》與《解》觀之,流 亦 類 不 外 征 貪 以 佞 中垢」及 語,皆與《周 意 如 彘 之 善 朋

四〇八

毛 劉,大抵皆訓 書》,則良夫乃芮伯名,非字 良夫詩及《周書》有芮良夫篇證之。 毗劉 云「爆爍音剥落。 「予小臣良夫」,自稱當以名,不以字矣。 箋云「芮伯,字良夫」,疏據《左傳》引 經傳多言劉 ,暴樂」音同上。 殺。 如如 惟《桑 而 無 之文亦正 希」, 盡 、柔》篇 劉、 而《 也。 遏劉、咸劉 爾 捋 釋此詩,●蓋 《周 雅 采其 然據《 書》芮 釋 劉 訓 虔 伯 周 芮

0

古義

如

此

故

^

雅》、

傳

同

也

又詩

言

捋

采」,止

取

其

葉耳,於樹之根幹

無

損

何得

云

[「]訓」,當是「詁」字之訛。《爾雅》之文在《釋詁》篇。

傳》訓 殺 殺乎? 亦 不 爲殘 成 王氏 残 訓 即 又 此 稀 轒 劉 疏 爲 爲殺,姓矣,況捋采其 意 盡 蓋 義 陰用爆爍之解 何 其迂也。 集

而 又不肯顯襲其 詞

救

撰,而 之謂 言不衆,則傳 衆,庶得之。 生存耳, 豈謂民皆白首乎? 語 王安石訓爲 者。」此解本通,鄭易傳,訓爲「不齊」,過矣。 也,華谷譏之如此。 施於 民靡有黎」,傳云: 民既被兵,或存或亡,無齊 此 黑,言黎 但 義尤允。 詩 詩 尤 本極言民生凋 謬。 詩 民 本言民遭 不 猶言黔首, 僅民 「黎, 嚴《緝》訓 靡 齊 敝 禍 有 也。」孔申 亂 不 黑 説本杜 一平安 應 少 黎 不 爲 得 成 止

與

難 頻 頻 急也。」「國 謂 謂 天步」、「國步」,步皆訓行。 或 天行 家 步 行 此 茂資 此 艱 困 難 」,謂國家行政輕蔑民之 急於民之道 於 申 后 也。 也。 天 或 傳云: 步 步 艱 斯

> 資用。 訓 運 步爲運,终未安。 ,陳氏以 毛、鄭義 或 步 爲 本 國 如此。 運,今遂習爲常 程子以天步爲 語 但 時

然也 傳得詩旨矣。 代,專恃禮爲治,春秋卿大夫,恒以 斧》、《伐柯》諸 書,謂隆禮爲 無,決國之存亡與人之休咎, 爵」語相接成,故皆從鄭,然傳義實優, 箋正申足傳意。 國之道,當用賢者。」疏謂 亦多言禮。 衞北宫語 亂 也。」箋云: 傳云: 傳皆是。 如《鄭 合也。 儒術之先務,故 又毛公爲荀卿 濯,所以救 今因用賢之解,與 東門之墠》、《唐・蟋蟀》、《 此 「手持 見《左傳》,疏亦引之。 詩以禮救亂 熱 熱 惟賢 物 也。 則以 之 毛之釋《詩》, 弟 人能 子,荀 用 亦其 禮, 濯 濯喻禮 禮之有 周 、上「敘 猶 行 《豳·破 師 卿之 所 家 匪 説 以

好是稼穡」 四語,毛、鄭既 異 解, 而 後

詩 維 嚴 必 功 氏 儒 傳 維 旨 辽 之 於 退 好」言 一代 前 禄 説 之, 民 īfīi 消 蘇 食」言任 衍之,尤爲 養 者 務 復 肾才。 擇 氏之説,謂 農 人各 使 好 人不 以 之 是 代代 賢, 代 稼 意 미 禄 説 明 耕 穡 會 濫 君 食 維 確 而 本 民 吕《記 子 此 寶」言 食 雖 於王 力不 欲 嚴 青 稼 勞 淮 以 穯 出 而 肅 詔 可 兼 而 於 無 好 之 當 邨 禄 不 用 藍 患 稼 申 能 不 以 也 李 矣。 進 可 毛 爲 言 恐 惟 歐 寶 非 則 朱 重 īfīi 有

之以 危 轉 壻 谐 乎 爲 爲 繁屬義 危 具 一見 義 一繋屬 卒 恐 然與 荒 大迁 於 小,傳 荒 兵 遠。 役 虚 訓 義 贅 也 夫 不 爲 有 相 屬, 朱《 所 協 繫 傳 蓋 故 屬 贅 鄭 H 肬、 氏 何 屬 申 贅 義

誤矣 以 至《 旅 桑 力 柔 》篇 爲 膂 「靡 力, 有 於《 旅 北 力 111 以 **>** 念穹 篇 已 蒼 辯 其

> 肯,非 念乎 況 以 小 納 諸 反 亦 釋 羣 正 念天禍 誨 臣 作 因 僚 莫 爲 膂 於 欲 危 合力爲之。 膂 肯 力 王 念 尤 耶? 困 協 解 而 修 力 故 不 不 舉 文 同 須 可 能 政 義 且 Ľ, 憂 解 也。 事 尤 訓 靡 念 念,反云 憂念 不 旅 以 今謂 有 可 天 爲衆,正 挽 」者,是 天變耳 通 禍 П 危 危 焉 天 困 詩 困 用 意 之極 合詩 當 本 拳 m 念 定 念 責 不 勇 意 之 能 平 而 須 無 在 當 憂 力 不 大 朝 何

哉? 或 蟲 指之。 殆 茶蓼之茶乃 未 寧 然 爲 也。 茶毒 茶 爲 孔 穢 禮 疏 草 食 以 薅 所 茶 之欲 用 爲 苦 贵 其 菜 盤 速 毒 蟲之比 爲

故以 義 也 Lof 朱《傳 中 孔 征 申之謂 垢 以 言 》分訓 中 | | | 垢 冥 中 傳云: 爲 是 垢者,土 隱 合 暗 兩 字 處 垢 中 中 爲 方 汙穢 垢 而 成 有 言 鬙 則 垢 冥 鬙 之 由 冥

備 道 此 言,小人反之,其所 誣王 内 之「式穀」,必然光 對,言君子小人性行之不同 蘇 所云哉? 一則闇 也 傳所謂 汙 氏 商。」 也 語 而 冥之不善 闇 尤爲妄説。 以 衍 君子 閨 之也。 冥 門之事 也 ,光明 可 明 行作,甚 知 至 知 Œ 正 「中垢」與「式 汙 小人之闇冥, 嚴 亩 直, 衊 詩 緝 君 且 如 無 **>** 知光明之爲 子, 語 不 此 事 意 可告妻子, 耳, 木 如 則良 可 又 豈 王鳳之 穀」相 中 互 對 如 垢 相 善 人 人 嚴

大賢 此,此 굸: 言。 郭公出亡,御者 言 則 應荅, 則 誦言, 昏 聽言 非箋、疏 以 亂之君 爲 聞 則 誦 然, 不好 對 Œ 詩 責其不聽諫 言則 而 家之説 典誦之言。」 誦 引 書 言 此 眠 一之言 如 詩 卧 也。 醉。 證 如 無 則怒,御者稱 之, 《韓 也。 醉、《左傳》杜注 識 聽 之人 正 言, 詩 聞 與 外 往 淺 道 傳 往 近 聽 之 其 之 疏 述 如 亦

同意。近解迂回太甚

兼及朝 上尚 主民言,殆 盜之行,則民 咎於執政之人。 力 桑柔 臣,故篇末縷陳之也。 耐 不尚 非毛意,當以箋爲 》詩末二章,三言民 心 德 不 上 能 則 欺 安 民 違, 定 行 矣。 邪 則 正 僻 民 俗之敗 王 此 矣。 心罔中 肅 詩 述毛 刺 上 皆歸 王 爲 矣。 寇 而

雲漢

矣。 此王 政事 王 以《雲漢》敘 内有撥亂之意」,是 承厲王之烈」,是去 化 也。 皇甫 宣 尚 王 謐 又云「天下 遭 未 早 以 及 推之,殆 行也。 爲 之年,箋、 宣 王 撥 喜於王 初 元年 其 亂 前 年 疏 在 方 王 事 不 初 不 有 一未遠 化 平 耤 即 能 其 復 ? 千畝,天下 位 意,未 定 行 也。 時, 敘 其 云「宣 早 又云 是 可 見 晚 知 前

信。 據,然 外紀》,全祖 虐,不如訓餘之自 年》以爲二十五年大旱,禱之 臻」,與六年乃 大 爾 雅》本有此訓,故鄭用之,後儒 又敘 合之 年 「厲王之烈」箋云: 不 敘 一士安之説,諒 ন্ত্ৰ 雨 非 説 然 至 謬 亦 六 也。 相 年 符。 乃 有見矣。 又 RE 經 劉道 而 言 孔 烈, 雨, 以 疏 饑 ^ 原《 烈 餘 此 竹 疑 爲 饉 也。 通 不 書 其 暴 口 紀 鑑 薦 無

其《 篇孔 當 祈 大司徒》賈疏 祭 雲漢》詩云「靡愛斯 崩 禱 詩》 水、旱用 料 疏 無 左傳》謂天灾有幣 《禮》疏 皆推 ,若水旱 牪 疏 一,灾 則 明 少牢」,與《 及《 引《 以 滅之 其故, - 歴時 爲 (禮記 祭 初初 後 法》注,見上。 牲 mj 有 禱 遇 . 説 左 」、《祭法》鄭 水 牲 祭 無性,僖一 m | 傳 | 異 各不同。 卓 不 法》、《詩 孔氏 止 先 則當 須 之 + 又 ^ 修 五年。 雲漢 説 賈疏 周 注 引《春 德 用 禮 則 亦 不不 謂 不 云 . 而

> 説,《 説 官 用 . 《詩》疏 幣 大 祝 而 已, 学六 長 矣。 祈 知 注 天 灾祈禱 造 類 皆 襘 用 牲 用 較 牲 論 故

與 藴」, 切。 真 文,古義當爾矣, 甚熱,故暑熱異文。」「藴 而 (臆説 温 靁 《説文》: 亦訓 則古本經文、藴、 藴 蟲 蟲 隆 《釋文》云: 爲 蟲 丽 「鬱煙 藴 熱。 蟲」,傳 積 也。」正 王氏 耶 疏 隆 云 云: 煴、 經本單 藴,積; 義 藴 温 藴 本 云 ,平常之熱 = 藴 舉 字雜見也 又 温 藴 作 字 隆、盛」解 耐 而 煴 暑 定 傳 而 本 隆 爲重 隆 一,煴 紆 隆 作 隆 文

可 斁。 切 妬 音 音 餘 妬 相 ^ 通乎 者,本作殬,旁从歺,音蘖。 與 詩》惟《 俱 斁」旁从支,音亦, 妬 音 亦。 遠 雲漢》篇 但 殬 一舜、斁 之得聲,意 「耗 俱 解 斁 諧 也, 睪 F 古人韻 一聲,睪 土 又 敗 厭 也 訓 也 」,通 緩, 敗 羊 或 作 其 益 音

以 求濟難也。」皆勝古注 以我苦此 之,無使人人被其 丁我躬」云: 苟我不當天心,寧 避 | 憂患,非人主之義,故 子 由 庶 釋《雲漢》詩, 民。」釋「黽勉畏去」云: 與其耗敗下土,寧 患。」釋「寧俾我遯」云: 使 我 有 遯 可 去以 黽 取 勉不敢去,以 者三。 避賢者, 使我 「棄位 釋 身當 無 寧

疏 之遺者」,正使留得半身,尚 漏者。』《孟子》趙注云: 不遭旱灾者。」皆以爲孑然。 説文》「無右臂」之解,遂釋謂 子,餘也。」訓「靡有餘遺」尤明直。 云 靡有 「孑然,孤 孑遺」,毛云: 獨之貌。 「無有孑然遺脱 可 <u></u> 了子 無 以 小爾 「無復 ,然遺 有孑 爲民 雅》云 然 有半 朱子因 失 哉? 得 也 身 遺

于何所至,言民皆餓死,先祖之神將無所歸《釋詁》義同。 疏用孫説申毛,以「于摧」爲「先祖于摧」,傳云:「摧,至也。」與

乎? 也。 是,蘇氏摧落之解,亦屬 留,先祖之神 云 來假耳 轉「至」爲「歸」義, 毛意 ,言酷旱如此,天將使 或如 何不 此。 助我畏此 康 太迂。 臆説 成 改 推 源 早 我 爲 灾 謂 民 嗺 至 加 無 者 固 來 有 假 遺 非 猶

疏 「于」字當讀 神于嗟乎! 即傳寫之脱漏 鄭破摧 爲 爲唯,云: 告困之詞。」 「吁」、《釋文》無音反,非 也 唯,嗟 如箋義 也。 則 先 經文 陸 祖 > 之

以 川 語,無關 滌滌 狄成 一板板」,徒歷反。 如滌 狄、滌爲往來疾貌,義稍 「滌滌 Ш 滌 除,此依文 滌 川 濫 之本訓 Ш 證 川」,傳以 疏 與滌 滌 引《詩》「 云 (傅 也 除何預 皆 會耳。 朱《 滌滌爲旱氣,蓋 物 踧 之 殊 (傳》用 (哉? 《説 踧 形 周 狀。 文》引此 王 道 又《樂記 説 但彼注 證 貌 謂 作 状 П

我心憚暑」,憚字毛訓勞,則丁佐反,

明》「 也。 義 鄭 佐反者,字本作「 訓 《傳》兼 異音并異字,安得兼之於一 「憚我」、此 从疒,單聲。」然則《大東》「憚 畏 則 取勞、畏 徒 日 詩 反 「憚暑 癉」,《 兩 疏 義, 及《 」,皆借也。 説 不 釋 知當 文》云: 文》 字乎? 何 辯 讀。 勞、 之 其 畏二 勞病 又 明 小 T

矣。 義 有 布 病 訓 (雲漢》)之里爲憂,而 聊 傳》「 也 病 與 賴 朱《傳 里 云如 則 悝,憂 無 訓 訓 俚 不憂,憂 憂 》從鄭, 「何里」,「悠悠我里」,二「里」字 憂, 一爲 相 也 兩 ___ 反,安得 無 意 河則 訓里 里 聊 皆 一乃狸、 無 賴 嚴《緝 通 聊賴 爲憂,得 同 爲 悝之借耳。 \sim 》幾 爾 俚 義 之,但 雅 IE. 同 其破 是 則 聊 字, 引《 未 賴 鄭 湹 當 之 季 誤 解

其 義 皆 至 誠 可 昭 於天下 通 假 前 無 王 贏 ,朱《傳》以 較優矣。 昭假二字,王 爲 《詩》言 精 誠 申 昭 毛 昭假」者 假 以 於天, 爲 昭

詁》。 案,「 遲」及 最 當 誠 民 王 明 暇,説近迂。 之, 詩, 明,不容異 假 民 爾 \overline{H} 之事 道 爲 施 義 賑 」,經文一言「于 , , 取 惟《雲漢 朱子初説 尤 昭 通 救之,無 ^ 似 下至於 烝 惠 義,近 此 泮 貫矣。 得之。 ,此又欲其始終不 勝 假遲 於下 民 詩 水 於《集傳》 \forall 解,其 ***** 是 民 遲」,疏 *\ \!\ 解 獨其注《記》《孔子閒居》。 棄其 雖 昭 上章「靡 也, 昭 無或少 率 訓 與 假 長 假 成功也。 惟《 爲 用 三「昭假」,古 下, 遲 於 發 烈 也。 用箋義述 格 感 有留 下 ×, 烝 遲」 祖 天爲 上帝 人不 皆 民 - 倦,故 至 言 意 \sim 贏 \approx ^ 以 此 烈 説。 噫 周 義 長 昭 而《 \wedge 於前 爲 毛 以 一,言 泮 發 嘻 假 較 勸 祖 注 集 昭 民 .水》 其 **>** 順 \Rightarrow 無 以 以 多 後 假 傳 命 謂 , 詳 假 羣 所指 昭 既 昭 贏 文義 噫 以 》則 瀕 於 臣 假 布 湯 爲 昭 見 危 天 嘻 **《總** 寬 易 恤 及 昭 則 自 遲 假

毛 |詩稽古編卷二十二

斯舛矣,王伯厚《困學紀聞》 駮之允當

之,仲達辯之甚明。

而嚴《緝》反取其

未悉《詩》義,故以甫爲申甫,及箋《詩》則改

吴江陳處士啟源著

蕩 之 什 下變大雅

崧 高

文義之常,以同 鄭氏遠取穆王時人爲非 吕《記》譏之,謂二人宜皆宣王時賢諸侯,而 姜氏四伯之後,鄭箋因之,以甫、 稱美之至,箋義 申伯,當矣。至以甫即訓夏贖刑之甫侯,則 一崧高》傳並舉甫、申、齊、許四國,以爲 姓名賢配 不謬也。 中伯 是。 至康成注《記》時, 然以古況今, 圃 申爲 爲言,正見 有侯、

> 也, 以來世世爲司空也,殆非肅意。 曰 : 使召伯營謝之故,肅所謂 「召公爲司空,主繕治。」孔疏引之,以 韓奕》篇。 時穆公適爲司空耳。 「大封之禮,召公之世職。」是謂康公 王命召伯,定申伯之宅」,王 召公,專指 《集 傳》 别有辯,見 引 肅 或 明獨 穆 E 説

必同 賜東平國傅手韶,以爲古制如此,恐周制未 《傳》以爲家臣之長,不知何據,又引漢明帝 如 王命之,定是 治事之臣也。」鄭以爲冢宰,雖未必然,然既 衞武公、虢文公之類。 漢 「王命傅御,遷其私人」,傳云: 也。 申伯當是有土之君, 王臣,非申伯之家 周家王后,皆侯國 人相 臣 也。 王室 御

古申 也。 戀闕 信 相 百 诒 家 統 命 之,恐未然。 國,非始 女, 遷 後 七十 謝 率之者。 連 陽 去 室 其 申 而 中伯 娅? 一國,今汝 州 亦 案《 先 廷, 往 私 伯 里 耳 不 到 復過 以 人」者 未 封 是 甚 過行 申 州 統 鎮 遽 其 也 干 豈 又 遠 伯 境 寧 記 其 服 返 城 舅 能 新 之,此 申 内 府 故 身 則家室已獲寧居 孔 × 自 鯯 或 賓 邑人 若 疏以 伯 有 信 都矣,六 在 今 申 也 至 而 非 古 私 陽 南 E 豊家 而 爲 如 民 猶 家 舊 人, 州 謝 申伯 朝 陽 遷 歸 未 室 下 爲 城 以,其 於 府 當 在 章 臣 習 ? 篇之 在 舊國已 國 自 南 謝 是 南 可 訓 家 申伯 塗,宜 君 亦 陽 今 勝 耳 ~室 申 陽 心,故 城 于 絶,今改 須 縣 安 南 與 府 其 威 仍 齊 誠 王 陽 謝 城 附 徑 任 有 申 得 德, 在 歸 從 將 乃 郭 哉 臣 伯 與 府 兩 北 而 申 是 銜 其 至 地 爲 郿 道 眷 遷 干 大

《崧高》第六章云「申伯信邁」,又云「謝

君,人 留 牧。 非若後 切 餞 較 果 于 Z: 行,非留之也。 又言 離 牧伯 Ŧ 而 行 誠 亦宜 新 「改大其邑,使 論之, 室,王 今 歸 不一而足,玩 「王纘之事」, 王 事 膺 世 箋云: 敦 豈 朝 方信 重 重 又 迫 則 應 氏 寄 則 内 云 再 鄭 爾 北 以 其 自 而 爲侯伯。」 爾 =, 申 説 古諸 爲 式 面 行 輕 應 伯, 又言「 長 E 而 者 遄 其 反 外 執 也。 周 一之數 侯 其 爲 謂 也。 詞 疏 之卿 謙 在 鄭 臣 行 Ŧ 申 引《左傳》,謂 氣, 引 此篇 箋 其 留 士。」又「南 錫」、 伯 況 又當 避 國 殆 以 欲 申 兩 屢言「王 是 宣 則 王 爲 似 伯 行 勤 意 E 王 南 申 始 以 而 侯 國 遺」、「王 正 促 倚 伯 卿 面 伯 宣 疑 是 於 相 是 一命一, 之 王 毗 太 士 而 不 其 爲 職 反。 使 欲 固 念 進 爲 不

嚴《緝》乃謂酆 故 箋云 王 北 餞 就 于 E 郿 有文王廟 命 ۰, 於 郿 岐 在 周 放至 鎬 以 西 郿 豐 非 在 策 適 岐 命 > 謝 申 東 之 伯 路 也

東,與 誤 矣。 八鎬等一 酆、鎬相去止二十五里, 耳 何得 道 郿 圃 人謝哉 酆 亦 在 郿 之

也。 誤 知嚴 愆」語 也。 曹氏 耆艾解,則當音婆,與「 傳義同 勇武之稱 同,而《書》言 爾 減 雅 同。 皤 彼謂 嚴 .改釋爲「耆艾之狀」,而嚴《緝》宗之,非 所 案 其 申伯 其 番 本 見 皤 筆 此 釋訓》云: 目前, 耳。 尤謬妄。 义 或 「番番」與《書・秦誓》「番番良士」 何 畫 本 解不可易矣。 番 [老]是 本 作 番 音 旅力既愆」,則「番番」不 寫 殊不 也。 番, 在《 煩 」,傳云: 番 也。 注云: 知 爲 此 秦誓》詞意 潤 且字 番 番 詩諸 畨 洂 嚴仍音波,音與 書 皤」通,班固 番,矯矯, 則 又「番」音波,若 番 从 有 亦 本 番番,勇武 畨 釆从田 之,元 語其平昔,「 無 無 、《書》作 原 畨字,俗人 作番者,不 勇也 無 不成字 象形 礙 辟 得 義 貌 番 也。 廱 作 與 既 爲 左

去上丿,則米字矣,豈容溷乎?假借爲波音耳。又案,釆音辨,辨别也。

若

《崧高 當也。 芑》、《常武》美出師,故言其軍 蓋《 不 合於人國不馳之禮 高》紀就封之事,故 四 可得見矣。 牡》傳云「喘息貌」,《采芑》傳 四 ^ 雅》詩 》傳云「喜樂也」、《常武》傳 牡》勞使臣,故言其 今槩訓爲衆盛,而 四言 「嘽 以 言其 嘽 見 」,毛公 内喜樂而外安舒 申 先儒釋經之微旨 行 伯 役之 之賢,義各有 容之壯。 解 云「盛也」。 云「衆也」, 勞。 之各異 《崧 ^ 采

然王 相喜 難 又 素 申 與 通 者 有 申 臣 而 周 伯 也。 賢 在申當云周人,不得 慶 邦咸喜」,鄭 君 共 也。 一,不 事,久知 嚴 蘇 必周 緝 氏 》謂 以 以 其賢,何至申而 人代爲之喜,皆情 爲 普天莫 周 指 爲 云周 王 徧,言徧邦之人 非王土,侯 臣 邦、況王 之使申者, 方喜? 事 之 臣 國

字不 方 説 皆 名之矣 諸 固 似 口 平 訓 國 矣 稱 周 爲 何 然 邦 或 此 目 周 名 前 忽 此 邦 者 統統 言 南 「, 豈 既 名 南 方 爲 諸 以 或 一獨是 通 國 周 南 名 也? 得 詩,宋儒之解,不 邦 良 削 南 牧 ^ 何 詩 土 丽 由 学中 喜 皆 見 也 爲 一周 别 南 其 而

烝民

言 末 體 不 能 備 贈 製 言 一章 言 稱 111 行 既 厥 Ш 甫 也 口 烝 始 殊 知 職 甫 之德,三章 民 前 矣。 之 及 經 意)德,可 之耳。首章 八 詩 義 宣 蓋 章,其言「 雖 亦 E 與《崧 因 别 言 一之知 以 贈 Ш 事 行 申伯之職 甫 高 人 E 言 出 而 之 『》詩 (善任 率下 山 祖 作 職 甫 同 然 四、五 保 言 以以 以 之生,次 是 意 贈 致 身 藩 徂 不 出 中 行 翰 齊 專 興, 政 竟 爲 章 在 而

> 詳。 旨 耳,故篇末方言之,復卷 重 烝民》敘云「任賢使能 趣各 故 山 首 有 甫 章 在 之職,兼 既及 也。 《崧 之, 總 高 而 内 」,允矣。 》敘 通 外, 卷 篇 궄 望 城 述 其 齊 建 就 遄 之 或 封 歸 役 親 始 侯」, 其 末 詩 暫 甚

於朋 父子 夫婦 四 法 子 則 亦 則 乃 肢 注 天 爲 相 性 五 友也。 ,義之於君 也。」 疏 行; 性,朱《傳》同之,其義 符 猶云有 兄弟、 有物有則」, 五 則 矣。 臟、 乃 孫 趙注 情 則 性必 六腑、九 吕《記》取 朋 奭 者, 也。 云: 友 云: 義、禮、信、皆天命之性。」此 臣 有情,正見性善 法也, 也。 、箋、疏 ,禮之於 孟子 竅, 楊 所 所 有 釋 六情 謂物 達之於君 氏 謂 謂 物 此 夫婦 较優, 之説 則 物 則 詩 法 者 者, 者 有 日 、兄弟,信之 六 「有物 情 象也 所 以 圃 即仁之於 臣 即 氣 亦善 法 實 物 一、父子、 自 三則,人 〈本《孟 爲 人之 必 是 五 物 性

當。楊氏之言,詳見呂《記》。斯青出於藍矣。與父子同言仁,孫疏專屬之於禮,未爲允趙注「人法天」之意乎? 但兄弟以恩合,宜

韶王廢置」,爲出納之實事 疏亦引《周官 長,佐王出 Щ 納言之官,其 出 甫式百辟,保王躬,賦 納王命」,言出 書·舜典》「出納朕 政 • 大宰》之「贊聽治」及「歲終 者也,故傳 職掌 納 如 雖 後 司 世 政 以「喉舌」爲 命」、《詩・烝民》 加 封駮之任 四方,是百寮之 職 則 異。 家宰, 而已。 龍爲

度也。 孔 他字乎? 反,音義各别,安得誤 之,於本句則理順矣,然非字義也。 疏述之大迂。 我儀圖之」,朱《傳》以儀爲度 法度之度,徒故反,揆度之度,待各 「儀,度也。」乃法度之度,非揆度之 又案,毛訓儀爲宜,文義本通, 源謂 溷 毛意當云: 爲 一,又移其 ()言圖 案,《 八誤於 但 説 度

> 舉也 維仲山 如此則數句文理皆順, 丽 莫能 甫 耳,信乎 舉,我 Ш 亦宜自謀舉之,乃舉之者 甫 圃 之德深遠 儀 、愛「愛」義見下條 圃 莫助也。

字訓解,正不必更新

也。 義,可考正經文者,此類是已。 愛、薆古通用,此詩之字形雖愛, 「《釋言》文」。案,《釋言》「愛」作 毛學由 愛莫助之」,毛云: 師 授,故得 其 真。 「愛,隱 源 謂 而 也。」 「薆」, 義 疏 繹 則 蓋 夢 傳 云

韓奕

由 也,故以倬然美之。 侯,有倬然顯 此路而入朝受命,真屬 首章以禹比宣王,言王能平大亂、命諸 明之道,是道 近 解 戲 以 論 道 乃宣王之治 爲路,謂 侯 道

億革金厄」,毛云:「厄,烏蠋。」鄭

異耳。 端 字 即 孔 名之,如畢以 疏 云 如? 也。 此章「玄衮」,乃龍首也,●「赤舄 語 疏 如 申二家之 則 厄 然古人制器 以 金 毛、 蟲 金 厄既 然。 鄭 爲 星得名,爵 心説 之解金 小 箋以不言如 似 謂 鐶, 厄 尚 金金 往 蟲, 厄,元 象多 往 厄 亦 以 纏 者,以 是 厄 鳥 即 搤 可 故易傳 物, 得 以 於 名 名,皆 革 金接 所 厄, 」,舄乃 切 似 但 何 之物 一轡之 取 之。 是。 必 鵲 義 據

文 炮 案,無、《廣雅》云「牌謂 不 無 釋文無音反,殆傳 口 與 烝 則 無 施 也 炮 炮 於鼈 炮 别 與 鼈 薄 服 鮮 無,皆烝煮之也。」案,《 而 虔《通俗文》云: 交反。 兩 此 魚 詩 及《六月》『炮鼈』,音皆作 炮 寫 疏 字 徐云甫 之 굸: 1,俱 之無」,注音不。 脱 作 漏 炮, 久反。」《六 也。 無音 『炒煮 毛 日爲當 毛燒之義 韓変》 燒 日 肉 無。 \wedge 月》 也 又 玉

> 篇》云 引《 始生水中 「蒸,蒲蒻 烝煮也。 周 禮 維 筍 ·者是。 字今作魚。」牌音皮 之類也。 醢 無 及蒲」,鄭 人》「深 火 熟 案,《説 从艸深聲。」則深蒲自是 也 浦 <u>云</u>)° | « 注 文》作 一,謂 廣 「蒲,深 ,又音碑 韻 蒲 **>** 「蒸」,云: 蒻 云 蒲 入水深, 也。 無 疏

浸, 地白 筵」,《 蒲 也 其見於《詩》 圖 一,惟《韓 入本 如 經影云 弱大如 蒲 《周禮 食筍、大美。 經 미 E 奕 爲 . 》筍 K 品,吴普《 席, 者、《澤 「春 醢 | 柄者, 浦 人》「 亦 初 則 ^ 미 生 周 生啗 爲 陂》、《魚藻》之蒲 加 爲 媆 本 禮》蒲 蔌 ·草》謂 豆, 葉 菹 焉 之, 時 有 故 菹 甘 案。《本草 深 取 之 ^ 是 脃 書 蒲 其 醮 也。 中 筍 又 石。 有 皆 以 心 菹 · 》香 人 宋 蒲 興

言

乃上 ,康熙抄本、大全本、《四庫全書》本有「衮」字。

罕 藥 中 如 蘂 有 武 也 屑 士 食 者。 奉 細 韓 杵 若 奕》傳 狀,俗名蒲 至夏抽 金 粉 云 謂 浦 梗 之 於叢葉中 蒻 槌 蒲 箋云 黄 亦 \Box 深 亦 蒲 華 蒲 本 萼 抱 IE 經 華 梗 指 E 端 밆 大 華

如

K

柄

者。

徒 漢 常 必 古 道 則 可 上 也 也 悉拘 世 無 則 人 引 於 淵 步 傳 禮 孔 近 故 敖 其 失容之大者 源 古, 下則 言 義既 於禮文、然國 當 疏 妻 有 侯 首 視 顧 云 之 先王 顧 自 顧 聽, 有本 憂, 禮 之, 視 謂 故 禮 義。 傾 無 乎 君 升 毛 教 而 敢 ? 則 子不妄顧 毛 車授綏之際,當 猶 豈 君 傳 仲 於 越禮 姦, 傳 於 詩 存 達 反 雖 是 親 必 發明之尤 云: 人 簡 咏 下 正 之時, 諸 迎 寄 子 之 實 儒 視, 之際 之以 目 興 以 皆 而 而 託 當 曲 而 爲 七 推 視,猶 節 明 詞 言 有 曲 顧 美 瞻 + 詳 確 焉 顧 道 曲 子 平 雖 顧 顧 矣。 之 ? 況 云 以 義 顧 無 不 顧

爲

實 覘籢 矣。 聞 顧不 以 明 禮,幸先儒之説縣 以 古人行禮 之」二字, 還 0 釋 其 字或荷 一放達 古 義。 裝 苟之義,置之不講,今世經 楊 正 鳴 論 之 經 用 呼 直 厚 修 至 不 1 成 真 無 一宋儒 論此 憚 薄, 謂 有 禮 風 詞費, 韓 補 節 窺媵御之冶容, 教之壞, 詩, 盡 諸 瞻 侯 於 敢 功 棄 言若非 顧 世 無 忽, 定 古 故 小 令,學《詩》者 教 是 注 節, 不獨 又見古 人 而 師 心者 禮 П 往 尤莫 傳 顧 而 庸 往 生 如 經立 雖 妄 也。 俗 知 此。 遂 據 而 似 顧 人 無 尚 自 古 所 言, 戲 魏、 致 由 習 得 束 可 則 人 之 瞻 見 是 得 闡 於 晉 無 見

小 潤 羆 類 熊 者, 也 而 色黄 熊 有 如 虎 熊 豕, 類 白 赤 也。 有 者 爲 黑 羆 謂 甝 色,羆 貓 之魋 音 有 者, 貓 含。 大 有 虎 於 黑 虎 類 種皆 熊, 爲 也 , 艫 見《爾 色黄 各 熊、 以 式 白, 類 竹 羆 雅 切。 分 ×, 又 皆 句 有 鳌 似

類 狻 即 日 虎 音 也 世 此 洛 酸 貓 世 毛 俘 謂 故 猊 爾 虎 解 之 古 即 雅 矣。 》一武 者 小今獅 ৺ 义云「 其似 畫 王狩 音 子。 熊 孱。 虎 熊 號 禽 貓 者 於 虎 貓 非 虎二十二, 皆 醜 而 旗 捕 1見《爾 , 食 鼠 教 蓋 虎虎 之 則 其 豹 雅 貓 丽 猛 ×, 者 貓 世 都 又 謂 亦 · 相 建 周 之

之,

出

軍

則

軍

吏

載

之。

也。」殆 或 安, 師 疏 二二字爲不詞矣。 譽、 云「古平 游,又 E 一義也。 韓姞 溥 豫似 欲 與 彼 破 **入引《孟** 至《水經 此 燕 韓 譽 ·安時 可 詩 譽」,言既 城 爲 \sim 通 (射義) 義 豫 用 子
三
一 燕 注 衆 同 然 王 師 |
載 民 案 引《 肅 所 元 安之, 游 派服 蘇 所 肅 凱已不 完 貍 孫 築 氏 虔 語 譽」, 首》詩 毓 完 日 注《 又 鄭 謂 皆 有 用 也 篓 左 今 以 見昭 其 顯 訓 傳 涿 燕 則 譽 則 説 舉 元 郡 燕 **>** 爲 燕 矣。 年 方 北 郙 爲 訓 樂 則 扎

> 韓 之證 言之耳 等。 追 謬 謂 Ш 作 秋 應 不 縣 有 城 其 也 事 % 淮 甫 洛 以 得 韓 縣 在 1,四方 貃 夷 至以 侯 城 貃 用 有 例 未 今 《説 行 齊, 國 其 韓 錫 之,洵 又與「奄受北 必 順 ^ 貃 如 沂 侯 韓 師 文》 魯頌 民 子》言 自 然 天 蠻 爲 燕 城 大和 耳 鎬 貃 也 至 府 亦 東 近 爲 \forall 而 是 王 以 貃 非 夷 固 允 然 淮 會 儒 往 東 爲 符 貉 安 五 當。 謂 鄭 命 夷 有 與與 此 夷 國 爲 五 縣 穀 潛 氏 鑾 曫 燕 據 説 北 服 不 燕 且 與 夫 連文,其 貃 貃 注《周禮 城 此 非 者 方豸 咸 生,此 之去 非 今 莫不 論 韓 亦 文 西 至 首 韓 因 服 **>**/ 説 安 種 亦 東 韓 魯,傳 此 無 城 燕 府 爲 此 北 率 \approx 謂 言 萊 也 帰 閒 遠 從 路 北 方 之 據 此 官 一,周 詩 引 遠 遠 於 氣 漢 韓 垂 義 亦 詩 王 不不 邇 韓 其 寒 本 世 相 春 之 不 城 時

^{●「}教」下,康熙抄本、大全本、《四庫全書》本有「戰」字。

裔 無 夏蠻 疑 貊」,石經皆作 矣。 貊 %,俗 字 貃 也。 注 疏作 本 作 貊 貉。 而 諸本 此 詩 一因之。 追 貊 書》

身,尚 矣。 謝 遂 爲 燕 率之,則 謂 又案,召 高》疏載王 未嘗至燕 築此城」, 子孫受封於燕者,率之以 約 則使召穆公,城齊則使樊 意 司 師 '空,不見經典,朱子爲此説者,特因《崧 一天子 在 召氏 然所謂 吕《記 初 未必常居 成 康 所用之衆,乃王師 封 王 也。 此言 當 肅 公歷 而 時 》、朱《傳》 燕師 時 世 語 蒙 也 非 召 居 召公自食采於畿内,若 ,謂「召公爲司空,主繕治」, 事 侯 」、《周 司空之職,況 者,直是 也。 此 公爲司空,王 文、武、成、 國 職 之 以 書 燕 耳。 號,可 燕 雖 燕 城 也。 顧 不 爲 仲 召 國之民, 韓 命 康 知 乎? 公之國, 燕 Ш 其先 命 耳。 Ŧ. 四 宣王 國 甫, 列 以 師 Ŧ 朱《傳 諸 世 穆 其 其 況 前 而 時, 封 乎 公一 召公 臣 召 衆 召 謂 召 説 位 韓 ? 城 公 之 公 爲 當 公

> 司 司 時 此 著 定四 氏《書》傳。 次,召公嘗爲冢宰, 蘇 空獨世屬召氏 徒,而幽 職 於經傳,而召公不與焉,安得 年。 公爲司寇,康叔 邪? 則 成、康之世爲司 又周 左傳》又云: 王 一時 番 家 ,豈其然乎? 爲 六 而 之,鄭桓公亦 亦爲之,穆王命君牙 卿 司 並, 空 「耼 空者,已 川屬 無 季 世 謂 毛公。 爲 職 爲之。 有 召 司 者, 氏 空。」 兩 詳 成 世 人 見 爲 Ŧ 居 明 見 孔

黄羆 \overline{Z} 種 韓奕》詩 豹有赤、白二 成王 \sim Ш 時 海 ?經》春 東 所 獻 胡獻此獸。」 種,皆黑文, 則 山 多赤 各 指 豹 其 羆有 中 也。 山 黄、白二 東胡 玉 海

江 漢

皆尹吉甫作 崧高》、《烝 申伯 民 韓 侯 江 稱 漢》、 爵 仲 韓 Ш 奕 甫 稱 四 字,

之與? 然穆公 召 穆 公 福 稱 稱 名 名者, 殆以 詩 以 寓 興 别於召 而 已 , 公、 非 有 召 義 祖 例 而 也

也 巾 亦《烝民》愛、薆之類 作「痡」,音義 |疏云: (詩)》中字似此者多矣 江 漢 **>** 同。 淮 鋪 夷 蓋 ,病」、《釋詁 來 ,此經字 此 鋪」, 詩 文 傳 「鋪」 之賴 굸: 》文,彼「鋪 m 傳 義 以 鋪 痡 IE 者 病

鬯,未 若 職 非 未 爲 然鄭之爲此 對 和 也 盡 不 舉 舉 鬱 職 和 和 秬 が、故 鬯 經 鬱 則 鬯 mi 鬱 一之爲義,取 傳 秬 分 鬱 名 不 説 中 鬯、鬱鬯誠 而 人 秬 卣」,毛、 名 者,止因《周 秬 鬯 掌 二之耳。 鬯, 鬯 鬱 概 此 芬芳條 此 灣 以 鄭 鄭 毛 有 明 説 未 殊 記 異 未 禮》鬯人、鬱人分 是 暢 和 也。 不 説 也 和 元因 鬯 鬱 知 解 人 已 孔 ^ 和 秬 之, 周 和 所 氏 鬱 鬱 鬯 之分, 禮 掌 右 名 必 草 則 ,尚 鄭 鬱 和 又 而

> 鬯? 哉? 鄭 艸 復言古今書傳香 氏 分 鬯 實 是 得 鬯草生郊」之文,證 而 爲 **>** 氏 名之,後遂 黑 申毛,既引《禮緯 ,芬芳攸 名 》者,不 入執《周 和鬱 爲 黍之 耳 案,秬 竊 -意鬯之名, 而 酒 服 禮》之文以釋《詩 説 釀, 要之,對 鬯之 而 别 則 文》 以 足, 則當 名 與 降 草 稱 已 鬯 皆 本 常 神 》「秬鬯之草」及《 無 鬱金 和 其 字 舉 見 因 稱 酒 也 稱 未 者 注 則 於《詩 ___ 鬱 等 秬 鬯者 和鬱 草 爲 别 云 草 此 鬯, 耳 亦 鬱 》,固矣。 可 散 時 *\ \!\ 可 鬯 而 並 何 何 譜 文 名鬯草 秬 自相 無 亦概 獨 以 故 矣 書 順 黍之酒 稱 取 秬 >, « 中 周 通 鬱 又孔 以 名 使 釀 候 忧 左 巡 戾 秬 於 止

木 今通 根 名 叢生也。」與鬱異字。 作鬱。 同 物 異。 ^ 説 文》: 鬱 金 根 無 鬱,從 香 出 林 蜀 影省 中 影,

引此。 蓉 草之英。 綱目》引此。 或 酒。」此與傅 賓,色正黄,與 黄 俱 華之英妙。」 首月,步 又各不同。 葉萋萋而翠青,英藴 也 ,其色紫碧,香聞數十 獻鬱金, 是香草,故取以 兩 周 楊孚《 書言 南 二月、三月有華 葉似麥門冬,九月 東 本草》云 賦 朱穆《鬱金賦 是華 南 華之色候 以 合。 芙蓉華 州 人》注謂 迥 相方耳。 以 異 眺 至《唐書》言太宗時 物 四 ,覽草木之紛 藴 裹 記 互 -步,華 月 圃 狀狀 其 媆 異,以 也。 鬱草 金黄。」是華 蓮 華 若鬱金之種 如紅藍。」《埤 開 十二葉,爲百 相 而 傅玄 若 「歲朱明之 朱、傅 不 華, 似 蘭」 鬱 實 葩, 狀 賦 金 口 美 《本草 似芙 色正 以 伽 以 出 云 賦 雅 斯 其 毘 香 罽

> 較之, 中 古 林 所 華 人 郡 用 在古 每 何 本産斯 又不同 祭 種 世亦 必 也 卉 用 屬荒服,鬱金非 又 其 而 未 案 種 後 審從 罽 類 世 當 無之,天時 賓、 何 不 取 伽 給 矣, 毘 常 皆遠 有之物,而 不 豈三代 地 知 氣 夷, 古 有 時

遷

與?

王,王 王耳,詩人敘事,自有次第也 者也、《集傳》以爲文 于周受命」,是就文王 秬鬯」,正 何 告于文人」,謂告于召 不 自 賜之爲告文人之用也, 告之而 (王,非 以 廟 賜 命之,此時 虎 是。 氏 哉 先 上「圭 ? 祖 若 方告 又下言 有 是 瓚 文 文 文 德

是 如 者,當是引成 賜 此 之名山、 附 ,非言賜召公也。 庸 錫山 恐非 土 土 田」,傳云: 語 田 毛旨 連及 、附庸 之耳。 孔疏 經 諸 無 申之曰「土 且 附 侯 傳 庸 有 自 而 大 述 傳 功 田 周 云 德 即 制 云

況 謂 於 峄 所 周 召 酆 地 文 基 原 王作酆 世 公采邑亦 ,周之别 鎬 于 周 就就 之名 也 周受命 彼錫 當有 嚴《緝 廟 實 在 命,于理尤允。 多 昉 岐陽,上文「 其 在 鄭 于 焉 廟 以 以 此 贵 耳 周 周 故 爲 爲 殊 獨 詩 酆 岐 錫 不 無 言 周 殊 Ш 知 文 周 土 岐 無 蓋 Ŧ 田 所 廟 乃 謂 岐 ī, 王 以 下 平 洂 彼 别 有

常 武

中 以 知 宣 雖 常 故 Ŧ ·興 論 鋭 德 ()信稱 少 於 世 以 《常 方勤 己。 立武 長於穆公家 始 武》敘 必倦 令主,但 政之初,已 宣王 事 云 因 於終,穆 一懲艾前 以 7,其 英 爲 召 明 資 切 戒 穆公美宣 愆 公早 過 鮮 性 然。」旨 一萬 之純 甚 終之慮,以《常 得 而 精 之幾 學養 哉 駁,公所 圕 Ŧ 治 斯 也。 先 未 言 赫 矣。 純 素 伙 口 有

> 之於敘 善善 有美 詩十 先見。 没 患興 心 武 其 》名 也 實 Ę 無 四 武事 篇 當時國史,深識 也。 刺。 也 篇,美刺 誠 厥 一、《大雅》 後 而 有本之言也。 不立,實 夫子之編二《雅》,厥旨微矣。 然《小 魯 因 戲 美 兼之、《大 文 以 專於美而 雅》兼美刺 由 爲 而 穆 德 諸 戒 侯 又案 公作詩 之不常, 雅 洵 貮 終之以 **>** 老 宣 而 , 千 臣 終 王 小 本旨 此 畝 納 戒,不 之以 雅》宣 詩 詩 敗 誨 六篇 殆 之 而 而 美 欲 王 著 有 戎 深

本之也 封 確 將 疏 韓 父 申 引 證 本 奕 則 伯 祖 孫毓之言,以 () / 篇 南 則 勝之稱 先 仲 而 孫既 遠 亦言「先祖受命」、《烝 沭 援陳 大祖,大師皇父」,毛、鄭 舉四 南 誤 燕,假 仲, 勝 岳 而 舉 鄭説爲長、當矣。 皆本 孔亦不覺,胥失之。 錫 其 兵 名也,非 召 稱 其 虎 項 祖 則 燕 德 追 事 以 民 以 泝 比 爲祖 【》篇亦 爲榮, 之,恐 康公, 異 但謂 解, 加 案, 命 追 非 命 孔 而

續戏祖考」,數詩立言之體,大畧相同。

字爲 疏 此 申之爲「如」,恐非鄭意 其聲,而勃怒其色。]明 通 兩「如」字, 正 用、震、怒又非 王 奮 鄭箋云: 厥 武 一本作『而』。」案,如、而 如 : 譬況 震 王 如 奮 是 語,經文當以「 怒 揚 而」字之解, 其 釋 威 文》 武 三字 圃 日 圃 孔 震

國」文 敦 陳 布 而 미 云: 韓 》引此 從 兵敦 敦 後 爲屯、言陳屯其兵於淮上。 儒 入義 述毛 爲厚,謂 》云 『 迫 鋪 鋪、《韓詩》作「敷」、云「大也」。 迫淮 皆宗之,然鋪 詩 相 敦 亦作 者 類 淮 水之涯 亦費 當當 濆 也」。」大迫 布 「敷敦」,注 陳 是 力。 毛 敦厚之陳於淮 也。 無 字 王氏 典 傳,述毛 又《後 未 淮 引》注 云 醒 以 濆, 爲 鄭 漢 引此 與 厚 案《 者以 破字 敷,布 書 濆。 集 濯 釋 作「鋪 其 馮 征 固 鋪 鄭 敦, 文》 也。 陳 組 徐 不 讀 爲

> 則 敦」,云: 同 ,勝鄭、王之説 敦, 猶 迫 矣。 也 _ 鋪 敷 雖 異 而 敦

迫

痡字 或異文矣,嚴《緝》欲合爲 (韓詩) 通。 》作敷,訓大。 江漢》「淮夷來鋪」, 《常武》「鋪 意 敦 經 淮 濆, 鋪字毛訓 文 兩 恐非 鋪 鋪字徐音孚, 字,古本容 是 病, 則 與

申 也。 翰 翰。」二字各一 傳 義 意 故 如飛如 疏 甚 云: 明。 翰」,毛云: 義,疾言其 朱《傳》統 鷙是 熱 鳥,若 訓 神 速, 「疾 爲 疾,恐遺 鷹 鷲 如 鸇 言 飛 之類。 其 鷙 精 如 悍 如

況《江 又言 夷 浦 繼 , 之國 征徐國,蓋 《費誓 淮 漢》疏言淮 常武》詩 非 浦 『之淮 准 所 夷 伐 此 紀淮 非 殆 時 夷 南、 夷 叛 與 未 北 乎? 北 然。 魯接 者 用 皆 非 兵之事,先 有 意 壤 禹 或 夷 此 貢》徐 皆 ,何《常 時 矣。 在 淮 淮 及淮 北之 州 疏 武 北 有 謂 也 濆 或 疏 淮 淮

然後 徐 大 此 征 用 爲 徐 以 大,宣 兵 之 國 兵 ,得之。 次 臨 王 第 徐 一討 孤 也 叛,先 立 鄭 無 治 箋以 派援,故 其 八小者, 爲 既 不 服 待 支 淮 痛 黨 浦 m 既 又 服 散

瞻 卬

縢》: 則是 亂 굸: 反。 之曰「言幽王 文》云: 古字之常耳。 或 也。 泛詩 鄭箋云: 政 懿 人美之,并非幽 懿 也。」古 「信。 厥 朱《傳》因之, 「噫 與 哲 噫 噫 ! 以褒姒爲 1婦一, 宋 馬 「懿,有 字 詩 李 本 雖 義 樗 作 公命我弗敢言。」彼《釋 異, 釋 本 懿。」然 引《漢 王 且 如 文》云: 美」,此 音 所 訓 美之矣。 此。 傷 義 爲 《書》師 同 痛之聲。」 則 案,《 懿美之哲 一疆古經以 懿、 痛 懿, 夫「爲梟 古 噫 書 傷 注 诵 孔 褒 於 婦 用, 就 解 姒 疏 其 金

> 屬戎首矣。 然皇父七子,皆恃豔妻以爲奧援,則褒姒尤 外,褒姒亂政於内,二詩皆 交》「抑此皇父」是 噫 爲 爲 鴟 抑,則從之,《詩 獨 二,何 不可 美 從 焉 平? ? 況 * 也。 泛楚 又 懿 抑 幽 厥 語 亦 Ŧ 哲 「噫之, 讀 時 婦 懿 皇父 噫,《 鄭 戒 傷禍 亂 + 讀 韋 本 政於 月 懿 讀 也。 之 爲 懿

以 應 旻》箋而爲之説與 耳」,朱《傳》則云: 通 王 一、然詩 致 此 維 亂。」直謂 婦人是近也。」歐 獨 時維婦寺」、毛云: 並 止 稱之。 一言婦 此 人 詩 又歐 亂 兼 幽 或 陽 刺 陽 王 婦 訓 無 一壁 僅 「寺,近 寺爲寺人,義 寺矣, 褒 日 語 姒 及 舉 ,任奄人, 也。 豈 閹 類 因 豎,不 前 言 召 雖 幽

得之矣。 狄 八爲 遠慮。 介狄」,毛無傳,王 案,《 鄭 以爲被 小雅 • 甲 漸 ·之夷 述之,以 漸 之 狄 石》、 介 孔 爲 疏 是鄭, 大道 《苕之

篇 華》、《何草不黄》三詩,敘皆言四夷交侵,下 集傳》本 王不此之懼,而 亦言「日 婦寺當之,殊屬穿鑿。 從鄭,又引或説, . 蹙國 百 反 里」,此 讎視忠臣 介狄之 以 介狄爲女戎, 可 勝歎哉 明 證 也。

召 旻

而

他閹 精 無 措」,亦非寺人也。其寺人僅有遭讒被刑 暗昧」、「頑童 時亂政小人、《詩》有尹氏、有皇父七子、《 秦之高 可 官,未 控 此 閹 號 訴,而作《巷伯》詩 m 寺之禍 一石父,皆非寺人,即史伯所 時 甚焉,三代以前,未嘗 未 必 盡 怙 窮固」、「侏儒 始 È, 寵 見 弄權 又 於齊 勳 미 舊之族世掌國鈞 以 之 知。 戚 鳴 貂、 施 其不平者,其 蓋 有也 二、「妖 宋之戾, 周官 云 法度 試 讒 坳 或 幸 王 至 臐

> 《周禮》閣人之官。 此輩止供洒埽、給使令、未敢 説 説,良爲 爲此解耳,然以 鄭生桓、靈之世 其説,言傳 椓,未嘗以爲 旻》篇 則失之。 昏椓 有見, 意 靡共」,毛傳 閹 亦 閩、香通。 但《瞻卬》篇又 論 人。 與箋合,愚以爲未必然 ,目覩諸 世,則 鄭箋始 椓爲毁陰,孔 疏矣。 常侍 昏 字 以 預 之惡,故 無 以任閹 香 朱子不用 **灬訓,椓** 政 爲 也。 閹 疏 人 官 激 證 訓 ^ 也 八爲 其 召 丽 成 夭 即

以靖夷爲治平,謂王所 **遹之人,實謀滅** 滅,則恒訓也。「實靖 了迁矣。 靖」訓爲 謀,本於《釋詁 王之國也,語本簡捷。 夷我邦」,言此昏 使治平我 「夷」 邦者非其 之爲 後 椓 儒 口

不 三句言小人之盛也,毛 如 時, 召旻》之五章,上 維 今之疾不 如 傳 四 得之。 44 句言君子之病,下 疏 「維昔之富 申 傳云:

也。 從曰。 帶切。 見《玉篇》,入夫部,從扶。扶,蒲旱切,並 音自,與「黑白」字别。 民》篇。 斗也。」與箋異,箋得之矣。 云 牌。」亦簡當。又與「胡不自替」文義連貫 今作替,則替雖俗字,其來久矣。 是糲米一 後儒之解俱不及。又箋云: 彼 明 從二先,先乃先後之先,非首笄之先。 疏 王 徐應指此。 今作糲,音厲。 徐鉉曰: 「粺,毇許委切。 斯 富 音越,與「日月」字别。又作智,從兟。」所臻 又「替」《説文》作「暜」,云: 牌」,傳云: 賢人,今世 石,得米 玉 「今作替者非是。」案,替字 聲,廢一偏下也。 十,粺九,鑿八,侍御七。」 也。 一篇》别 九斗爲 則病之。」解 「彼宜食疏,今反食 殿米一斛,春爲八 有普、普字,而 别有辨,見《大雅·生 粺 「米之率,糲洛 也。 二先爲兟,子 「從並白 甚 又作 等, 《説文》 明 徑 行 云

池之竭矣,不云自頻」,傳云:

「頻,

厓。 子敘《詩》,其有微旨乎? 終以《召》。以二公爲《風》、《雅》之始終,夫 於《周》、《召》,而《風》之終以《豳》,《雅》之 中,宜乎思召者,甚於思周矣。 公,分見二《雅》。康輔創業,穆佐中興,祖 數之頻,而别作濱字以當水厓之義耳。 孫濟美,俱爲王室倚賴,相望於二三百年之 公、翊戴宣王、周文公之後、無聞焉 公,皆周之元臣也。召康公之後,又有 頻爲濱,疏以傳爲古字通用,皆非是。 文》引張揖《字詁》,以爲 涉。」然則頻字本義元爲 厓 王之世、《黍苗》篇思穆公、《召旻》篇 也。」案、《説文》「頻」作「瀕」, 人所賓 周、召分陝而治,爰有二《南》之詩。 附 頻 蹙不 前 水厓,後 頻是古濱字,箋破 而 此 雖然《詩》始 人借爲 從頁 思 故 (),從 小水 穆 釋 康 頻 出出

毛詩稽古編卷二十三

吴江陳處士啟源著

頌

周

頌

凡十五篇。 子》、《訪落》、《敬之》、《小毖》、《 有成命》、《執競》、《臣工》、《噫嘻》、《雝 清 載芟》、《良耜》、《絲 年》、《有瞽》、《潛》、《有客》、《閔予小 廟 周 》、《我將》、《時邁》、《思文》、《振鷺》、 頌》三十一篇,朱《傳》之與敘合者, 其 迥 與敘别者,《天作》、《昊天 衣》,凡九篇。 酌 ×, « 《天作 般

《武》、《桓》、《賚》凡七篇,則朱《傳》與敘 曾孫 文王 大平而祭, 告大平、奏《象》舞之説。 清》皆以爲祭文王,本與 離合之閒,尤有當辨者。《維天之命》及《維 至於《維天之命》、《維清》、《烈文》、《載見》、 之明證。敘説本不必易,此皆失之顯然者 飲酒,不能詳其何祭,而不思絲衣士服 思祭社稷,豈 芟》、《良耜》徒譏敘誤,不能定其何用,而 爲戒農官, 思《周頌》俱周公所定。 有 以爲祀大王,而 雕》 詩以爲 成 一廟中 ,明是功成治定、歸美祖 命》及《 不應斥 非 武 而不思《頌》篇皆用於祭 執競》以 獨 常祭也。 王祭文王 不 無樂章。 言昌後。 思經文兼 爲 康、昭 至《象》、《箾》之舞 《臣工》、《噫 ,非禘太祖 敘不 夫上 《絲 辨詳《通義》。 頌文王 遠, 而 衣》以 考之詞,此 推 以 後詩 天命 獨 爲 而 《昊天 嘻》以 下 削 繹 不 而不 ^ 因 皮 在 祭 思 其 載 mi 不

頌》篇 之説 敘説豈 意。 是文 注 臨諸 詩, 奈何 與之違,何以 意以一 反目爲首章,方欲借《左》以 義》辨此甚詳。 以《武》爲《大武》之首章,《賚》爲《大武》之 三章、《桓》爲《大武》之六章,則甚非也。 本以篇言之,不言章也。 ,則此 亦與敘合,而 並 夫諸 ,與敘不異矣,然據《左傳》楚子之言, 侯,詩人樂見新王丰采,故述 王之樂, 止一章,無疊章者,傳指末 句爲一章 一可廢乎? 欲棄之? 不 句之後,不得 侯助祭,常事耳 以《武》爲《大武》之首章也。 《左傳》以「耆定 取信於人邪? 見 於《 與? 《烈文》、《載見》皆助祭之 不用其 其《武》、《桓》、《贅》三詩 左 一傳 更有《武 且「耆定 × 惟 初 朱子何弗察也 證 爾功」爲《武》之 敘 即 其三、其六,杜 莅 成 語 》頌 政 阼 以其説 阚 句爲卒章 實 及始 之始 矣,朱 加 功」爲卒 有 爲歌 而 明 見之 見 《周 微 《通 子 **暴**百

清廟之什

清廟

乃爲 亦在 王在 命七年,乃 祀文王 歲,文王 年,不在 文、武受命,惟七年」之語,以 爲一事。 周」,合之召、洛二誥《 詩》傳,皆 七年, 封 五年,而六年朝諸 康 魯 成成 爲一事。 一解 五. 東萊非之,而據《洛誥》「周公誕 據《 而 總 理 以 一,武王騂牛一」,與《清廟》敘 年。 祭, 計計 作 固 書》 洛 又謂《洛誥 非 周 有 傳「 源 爲 公居 之也。 爲 案, 七年事 成 周公攝 書》敘 侯,與《明 洛 攝 孔氏《書》傳、 但《洛 之年, 而 》 王 祭, 則《清 知 爲 政 在 成 又兼 党堂位 五年,營成 誥 所 洛 新 洛 》所 謂 廟 邑之成 邑在 邑 祭文、 『》所言 烝祭 丞 毛 謂 祀 氏 保 文 祭

武 非 專 祭 文王 ,東萊引以爲 據, 恐 與 敘 未

顯」、「承」、「 義爲優。 え義 駿 奔 與 走 ^ 無射」 周 在 廟 書 傳 傳指文王,箋指祭者, 孟 以 成》 駿 〉 傅 爲 長, 合, 箋 可 以 從 駿 也 爲

維 天 之 命

傳

周 將 相 篤之者,所以 之」,又云「曾孫篤之」,收之者,所以承先, 也 ·」傳 成 家 合 欲 王 爲 制 敘 之 引孟 云: 治 作 經 全恃 大 先 文, 仲 事業,故 \sim 傳 祭告文王, 子美 斯 禮 維 後 言 樂 也, 天之命 周 良 降 之禮 周 非 是。 至 公 禮樂 春 後 制 *, ,鄭亦以爲 秋 經 儒 大平 禮 孰 云 莫 日 作 當之哉 從 尋 樂,是輔 我 告 人其説 兵 其 周 文 革 收 ? 公 王

> 備矣。 聚 頒 釐定之,爲一代大法,《明堂位》所 布之天下耳。 王之文,信乎文王之時,制作 文王之典,《書》言文王之謨,孔子亦言 於魯,則文之《南》、《籥》舞 於《文王》正 祖 周 其 猶 於魯,則文之《易》象在焉。 言任人必以文王爲法。 於經傳者 公制 、守府之尊者二三百 文王之徳, 度量」是 ,居位最久,意 聘 問 作,必 今紀載 燕 如如 好, 也。 雅。 禴 惠 有 周公既 以 閣 順 此 祠 所因 禮 ^ Ŧi. 略, 書 文王之意,指 詩 相 十年 烝 年 正 維 無 致 嘗、 文王 康誥》言 作於 由 , 太平, ·, 其 中 靈臺 至 而 考其 晉韓 爲 天王 焉 吴季 規 重 斯 已備 受 更取 辟 模 可 時,所 詳 制 用 又《 亦 起 命 札 制 知 也,特 禮 謂 刑 廱 見 然 賴 觀 度 開 矣 而 詩 作樂, 六 立 云收 皆見 斟 周 周 稍 犁 基 以 **>** 政 未 言 文 著 之 年 樂 褿 然 但 酌 全

於義

爲

允

字異而 疏云: 文》作「誐」,誐 孫。」義本諸此。 慎 慎 音 合之《爾雅 盈 《釋文》,又云「慎,本 則 溢 暇 郭 必 毛、 義 氏 盈 静,義 文 以 同 以 溢 鄭 云溢 溢 》,則 爲義 一之訓,今世 所同 王有嘉美之道 我」, 音 亦 漢字爲 或 見《詩 「娥,云「嘉善也」,與毛、 相 慎」,一 作 王、崔申毛 與「 順 其 通 -假 溢 也。 ¥, Œ 通 正 樂」假字, 字,毛 蓋 一云「溢 用 也。 讀 指 舍人云「行之 作順 其 以 本 此 又「假」《説 訓 訓 戒 不 、慎,静 頌 慎 慎 皆 字 慎 司 矣。 訓 解 我 鄭 則 嘉 見 鄭 然 子 孔 見 訓

維清

記》之《内則》及《儀禮》之《燕禮》,《象》舞見《句》與《象》,皆舞曲也。《勺》舞見《禮

《左傳》之《象節》,歌《維清》以奏之,《勺》爲 《大武》之象異。《大武》之象,象武王之伐 《武》也。 乃合之爲一 樂師》賈疏 武 之,蓋《勺》即《頌》之《酌》,《象》即《頌》之 文,而先儒 於《左傳》襄二十九年,不 以《勺》爲文舞,《象》爲 《維清》 維清》之象,象文王之伐,此雖經典未有 象》爲《象箾 内 禮記》之《文王世子》、《明堂位 則 》敘下 即《大武》,歌《大武》以奏之。 》、《仲尼 其《維 相 合也。 舞,可 引 傳 燕居》諸 劉 如 清》敘云「奏《象》舞」, 雖 乎 氏 此 至《酌 與 當有 語, 鄭 武 篇 異,然猶與《周 以《象》爲文舞, 舞 本 在 鄭 也 疏 六樂之列,與 氏 引熊 × 明 注《 吕《記》於 。夫以 内 祭 氏 禮 獨 語 則 統 即 明 見 證

用 者 維清 因祭天、枝伐之説 篇 惟 鄭 氏 釋 之最 出 於緯 明 書 而 耳。 後 儒 命中 莫 言

非謬矣。

文

姓,且告天,主爲崇也。」既 勢,若崇侯之屬。」《我應》云「伐崇謝 候我應》云: 義不續,故朱子疑 肇裡」屬文王,文順 」,正指文王之典,而 「肇禋」屬之成 雖 緯 書之説,然文王之伐崇 枝伐弱勢。」注云: 王。 經有 以祭天非文王事 面 然「迄用 中 義貫 ·闕文。 隔 「伐紂之枝黨,以 也 「肇禋」 告」, 0 有成 則 注云: 源 何 類 謂 如仍以 維 語,文 祭,見 祭 周 勢必 謝 弱 天 之 百 其 敘也 見即 烈

禎

以

錫諸 美羣 説。 錫 天命,原本 輔 楊用修駮之,當矣。 福 祭 不歸 (*),使 我君 以克興 侯,鄭以 嗣 烈 我 臣 王莅 文辟 感其 功於祖 獲 周 於 祖 福 政 公、錫 翊 祚, 爲天錫文王 德, 義 是 之始, 戴之私,津津道之不置 考, 皆 是 以 諸 通 兹祉 爲立言之端 錫 加 嚴《 侯 諭誥諸 我 以 錫 ^ 爲臣 以 緝 集 福」,毛 歐歐 我」。 》又謂 傳 福 侯, 陽 **>** 下之力 謂 以 夫 以 自 斯 爲文、武 祭 諸 爲 當 辟 尤 乃 徒 文 爲 耶 而 侯 稱 公 受 揚 妄 夾 ? 助 王 何 鰛

惟文王最多,文王

武功,以伐崇爲大,故《文

篇之「是類」,

又正指伐崇之事

,則肇禮

雖

言

祭,實美文王征伐之功。

以經證

經,枝伐之

王

有

聲》篇

言繼伐

,獨舉伐崇爲言、《皇矣》

文王

始祭天,非無稽之談也。

又周世武

功,

此又可信也。

合二者觀之,則

以「肇

禋

一爲

皇矣》詩,此可信也。

類祭之爲祭上帝,見

何

是彼

而

非

此

?

舜典》、《泰誓》及《禮記•王

制

》諸

書,

侯」,詩中亦無此 政意,然《清 朱子《辨説 譏 意,而《集傳》取之。 廟 烈文》敘 敘言 成成 以 洛 爲詩 邑、

朝

諸

中

未

同

Ŧ.

其陋也。

君。 矣。 詩 謂 俘 伐 時 王 中 州 在王 王克 王之 辟」爲卿士,「公」爲諸 元之侯 亦 仍 或 傳 此 解》云「武 加 當論: 約 義 則 也 焉 在 村 出 朝, 毛又以「封 德,次二 烈文》篇皆告諸 以時,諸 矣。 以黨惡 所 助 脅 立之,俾得自 豈與外 《周 其世,知 從 謂 祭之列矣。 孟 箋以 心於紂 王征 不不 無 書》 侯 子》云「滅 語 大 無大累於汝邦者,仍立之爲 靡」爲大累,「崇」爲立,言 皆 諸 告 「崇」爲增其爵土,恐非是。 累 又云「凡服 四 斯 助 紂 方,凡 侯並敕之乎? 以 而 語 誅 新 紂 其 得 侯 武 國 誠 侯,殆不然。 爲虐,大累 黨惡之甚者 洵曠 封 應 然 語 Ŧī. 王 整國 文 概 也。 之德 十」,《周 國 首 者 蕩之恩也,此 從 六百 九 四 也 翦 殷未亡,三 語 + 也 於民, 7滅,但 毛 足 告 Ŧi. 有 書 卿 一十有 義 則 證 1 쫗 以 九 世 武 无 此 其 勝 謂 弔 H 文

> 財 遽 進 字 噟 爵益 此 義雖 賞 地 所 通 口 平 以 但詩旨恐 ? 賞 有 王氏 功也。 不 以 爾。 「封 僅 靡 無 大累 爲專利傷 而 已,

天 作

往 作 IE 字,皆彼萬民也。 王,誤矣。「岐有 也。 目大王、文王言耳。 室以居,「彼徂」言民之後至 天作》詩「彼作矣」、「彼徂矣」、二「 蘇氏 以「彼作」指大王,「 「彼作」言民之先 夷之行」,岐謂 蘇 又謂 岐 岐 彼 岐周 者 周 徂 在岐 望 之君 指 岐 彼 文 mi

又 改「徂」爲岨, 出 徂 之爲 師 彼徂矣,岐有夷之行」,朱子據《 心之創説 岨 是從 又於「岐」字 皆 沈 1與《韓 括 之誤 絶 詩 引 句,持之 》無 岐 涉 字 也。 絶 甚 韓 句 詩 韓

世

載其夷易之道」,亦謬

章句

亦

以

爲仁義之道,故曰「子孫保之」,言

道也

,康成引《易》乾易、坤簡

當

之。

《韓

以

岐

山

立説

,因以

岐

山之道路平易釋「有

夷

二,斯舛

矣。

夫「有夷之行」,謂平易之

孫保守此道路乎? 世世守此道耳。今以爲道路平易,豈欲子

惟「矣」字作「者」不同於毛耳

,其訓

徂

爲

往

昊天有成命

見也 苛刻,安静 爲寬、密爲寧,鄭 歐、朱二公也。 注已辨之,不意先儒吐棄之説,復見采取 篇爲祀成王之詩、《通義》辨之允當。 所言不誣也。 信,至《昊天有成命》爲郊祀天地,《詩》小 新書》引叔向言,以成王爲武王子。 傳》改訓 成王」爲王誦之謚,漢以 鄭 案,宥字《説文》本 氏 **宥爲** 論 所 祭 宏 以 天 朱子據歐陽《時世論 至「宥密」二字,《外傳》訓 地 深 箋申其意云「寬仁所 息 有郊、 近 暴 世 亂 邱 訓 , 楊 來元 一之異, 用 寬 故 甚 修非之,良 爲 有 其 韋 Œ ·昭《國 此 見於 固 當 不 疑 經經 判 以 可 賈 典 有 於 此 敘 止 盡 宥 誼

明知,而必欲從之。 之之義,非釋徂 易行,故岐道 夷,易也。行,道 之正文,誠 往,薛君 有夷之行。」注引薛君章句云: 行爲道,岐字屬 岐道 後漢 岐有易道,可 朱子以《天 阻 險」 自 南 不 有 蠻 識 正 阻 傳》引《 語,改徂爲岨,竟不思 作》爲. 訓 其 義 險 歸 下句 也。 何 也。 而 往 意 信後儒 其云阻 讀,並 人不 矣。 詩》云 彼百姓歸 祭大 且括之誤引 易道 難。」朱子徒 王詩,故首 無 之謬説,疑 險者,反 異 謂 文王者,皆 於 彼徂者 「徂,往 仁義之 毛。 朱 祖之 明 執 古 尾 子 夷 也。 岐, 案, 經 所 行 爲 其 道 俱

四三十

義,一 《周 尤 深、 文 御 而 宥字義,止一寬盡之,更無 南 可 世大德,與《書》「臨 ,以人己 轉爲宏,又因 、《易》云「宥罪」、《書》云「流 静密,取 禮》及《王 華》亦有《 一哂也 二字足 説 義 在 制》皆云「三宥」, 耳。 垂法 不已迁乎? 宏而 宥》篇。 況寛仁、 千古, 下 轉 爲 以 彼《釋文》云 所以 簡,御 他 安 深、全是遷 輔 訓。 (静,乃 廣 盡 宥」、「宥過 爲經 演 衆以寛 取寛義 朱子 「寛 爲四 也。 是 也 就 帝 因 宏 同 Ŧ 經 實 煮 而

之」,又云「終於 則 改之也。 向 廣」、「固」,不應 爾 破 語 雅 廣 毛傳釋《昊天 》,「廣光」、「固 鄭箋亦 爲 然《外傳》又云 光,固 因 『爲故, 其 固 數 解 有成命》,純用《 和 故 處 蓋 獨 同 因《外 無 面 「廣厚其 必 誤。 毛 以 灬, 廣 氏引 音 傳 況 (心,以 学訓 近 以以 之,亦 外 而誤, 純 字皆 傳 古 固 固 作 叔 和 和 故 同

> 《書》多有之,乃字義之常也,亦不必更改。 字本 之、 矣。 語 「終於 鄭之破字, 無 熙廣」用鄭 誤 乎? 固 和, 源 説 殆 若 又 非 固 固 謂 也 和 爲 熈 故 案, 之 則 訓 否 則 韋 廣,《 豈 昭 語 非 注 詩 不 以 ^ 或 固 詞

我將

也。 論。 右字 牛羊之右」,天與牛羊敘尊卑 朱《傳》釋爲 新之過也。 右」,不知「此」字何所指,文義難 於「既 本訓助,其作佑者,徐鉉以爲後人妄加 此 我 詩《釋文》云: 將 右饗之」,云「文王 於「維天其右之」,云「天降 右手之右,云「右 兩 右 皆 「右,本亦 訓 助 諸 乎? 尊 降 作佑 家 通 丽 也 所 在 真 司 此 屬 而 此 也 之 戲 在 好

右手字本作又,象形。

其右字則爲

助

學也? 耳。 右,又轉爲尊義,殊費迂回,胡其不講於小 旁作佑,當是衞包所改,《詩》「右」字偶未改 字皆助 敘有周」、「既 命之」、「維天其右之」、「既右饗之」、「日右 義、《詩》「左右流之」、「保右命爾」、「保右 朱《傳》於《周頌》「右」字皆訓 也,古經 右 右助字俱如此。 烈考,亦右文母」,諸「右」 他典 右 手之 多添

云

「《釋詁》文。彼疊作慴,音義同。」案

享而 得 羊牲,不如孔義之當 谷用《詩故》之説,亦引《羊人》文證祭天有 非祭天,故有羊牲,以見此詩「維羊」乃 牲」、「積」是積柴,然在「釁」下,則是槱燎, 詩, 乃兼 有羊。 設,非享帝所用 祭天 又言《夏官・羊人》「釁積、供羊 用 言牛羊,孔疏 特 牲,而《我 也,辨之亦詳 以爲配者用太牢,故 將》明堂 確 享 矣。 帝 爲 配 之 華

時 邁

「莫不震疊」,傳云:「疊,懼也。」 疏

郭注云:「慴,即懾也。」然《説文》懾、慴各古今異音如此,孔所據乃古音。又《爾雅》之涉反,分爲兩音,《詩》、《雅》釋文亦然。❷字同音,可通用也。徐鉉「疊」徒協反,「慴」《説文》:「慴,懼也。」讀若疊。」是疊、慴二

之者凡四,皆以爲任賢稱職之證,與毛、鄭「明昭有周,式敘在位」、《韓詩外傳》引

字而音同。

●「時」、嘉慶本同、康熙抄本、大全本、《四庫全書》本作

庫全書》本改。

四三九

義 相 爲 符 慶讓 矣。 之典,較 集 傳 >议 切巡狩 在 位 時 爲 諸 侯 以 式

執競

莫得 彊之競矣。 武王持其 無 毫釐千里 競 m 執 競。」則下「競」字, 猶 競 不不 、自彊之心,故其 又天下之競,非 顯」,反 無 競 詞 乃 也 功烈之盛,天下 武 争 競 競 王之競 \wedge 集 義 之 傳 本 競 矣,豈 非 同 巾 É

以《 昭、 康 《思文》爲三夏,先鄭引 成 肆 杜 所 吕 預注 夏》、《昭 見 叔 意在 卓矣。 玉 内外傳,與呂説 與鄭箋立異 周 夏》、《纳夏》當 禮 朱 子取 注 之, 以 吕、韋二 也。 而 小 時 康 異 邁 此 然既遵吕説 成 **>**′≪ 而 注 不從 一詩,不 大同, 語 執 載 競 之 如 皆 韋

> 斥言其 戾矣。 則《執 之謚 定樂章,安得預歌昭 爲 納 樂章,令鐘師 夏 ,而《執 **>**, 競》 非 劉瑾謂《 而《執競》之爲 》乃《昭 圃 、競》是 又 難於彊 時 奏之,乃 夏》, 邁》、《思文》信爲《肆 昭 王 王 周公制 飾 深 昭 詩哉? 以 又謂 ,故作此 後 夏》則否, || 周 詩 成 前 禮 康」 騎 後 夫 牆 周 語 爲 時 蓋 語 夏 公所 自 不 二王 己 敢

思文

之也。 麥也 稷 云: 漢 以 書》 語 貽 始自天降。」皆 證 貽 來 向 劉向引此詩作 民, 之,後儒 我來牟」,鄭引偽《大誓》「赤 又言「武 周所受瑞麥來 非 天 以 以 王君 貽 爲 言天賜之,不 武 妄 釐 臣 説 一舞」,云: 辫 似 以 也,天 而 矣。 和 不 致 用 然 和 所 謂 鳥 而 稷 來也。」 説 釐 獲 以 播 貽 文》 麰 天 是 種 穀

哉? 下,兩 助」, 以 事》其説皆同。 也,是一穀之名、《吕覽》、《説文》及劉向《封 國,則仍是「莫匪爾 民」之意; 民以來牟之種,徧養下民,則仍是「粒 以后稷養民之功,賜武王以嘉祥,使有 殊,則赤烏銜穀之祥,當時容或有之,不得 來 云: 來牟一物,鄭重言之也? 句言后稷粒食斯民,復其常性,下四句言 涉于符 辨,不旁及餘穀,與 分爲大、小二麥,來,小 意相承 況后稷播 「玄秬,黄蘩。」亦以爲一 **一發,大麥也。」見《文選》**注。 與 (鄭同 瑞,而槩斥 謂陳其君臣父子之常道 也。 《韓 種 又此 若如 ,其爲嘉穀多矣, . 詩 極」之意,詞旨 其 他詩泛稱嘉 詩 後儒之説,謂 誣 及《臣 貽 又案,來牟,大 也。 我 麥。 物矣。 I 嘉婺」,薛 又此詩 班固《典引》 牟,大麥。 》篇 種 何 不 皆 后 語 惟《廣 獨 冗 於 我 稷 上 意 特 君 天 取 複 中 烝 天 自 貽 四 舉

《傳》、嚴《緝》從之,非是。

《肆夏》、《納夏》因「時夏」語得名, 歌之大者稱夏」,又云「夏之屬有九」, 競》不言夏,何以名《昭夏》乎? 夏,古有此名也。 國語》注亦云「樂章大者曰 時 邁》、《思文》皆言 《集傳》釋夏爲 「時夏」,箋云「 夏」,是稱 中 然則《執 國 月 月 韋 樂 謂 爲 昭 樂

臣工之什

臣

工

農官,何與於祭祀,而編之於《頌》乎? 保介,勸農之詞,獨詳於保介耳,其戒臣工 合之經文,未見其然也 也。」朱子非之,而 《臣工》敘云: 以 爲 「諸 戒 經先戒臣工,後戒 農 侯 官 助 之詩 祭, 遣 於 夫 況 戒 廟

戒 此 子 高 介者 全不 同誘《吕 , 欲證 其副乎? 副 「農官之副」。 定屬農官乎? ,鄭箋《詩》及注《 及 農 成 戒農官之説 事 注 也 以 又 凡 爲 臣 官 副 且農官之正 特取 工 有 俱 月令》, 者, 長 不云 必 有 高 皆以 有 位 農 誘 安在 貢 之 注 官 爲 通 何 而 也 車 稱 乃 益 由 朱 獨 之 知 保

大 儒 制 建 孟 佪 IE 月,助祭而 及《 用 事 朔 多易之,左矣。 寅之月,不當遲至 春 丁,不 乎? 但 維莫之春 明堂位》,證 爲 用 引《月令》及《農書 一歲首,其朝 遺 本 一應以 , 朝 」, 疏 IE. 至朱子 一朔, 孟 諸 謂 祭猶 春 夏之季春。 則 侯 是周 所 朝 初説,言 援據 用 改 之季 祭同 [》,證 夏 之正 E 其 春 在 詳 耕 將 商、 夫朝 事 夏之孟 引 確 而 施 當 周 夏 王 於 改 後 在 之

赤烏所銜,惟來牟一穀,周以爲受命之

之,下 詩廣 若謂 瑞 故 舉諸穀名,以美大其功矣。 后稷播植之,則當如《生民》、《閟宫》二 又言帝命,言上帝, 獨 著 於《 思文》, IIII 正 ^ 臣 見 工 其 爲 詩 天 又 賜 特 也 稱

徒,不 工》詩 官当 十不 也。」 王耤、《國語》所云「庶人終晦」者是已。 之甲士、步卒,從君 |案,周 甸 爲甸徒」,是指四丘之甸 命我衆 不言 知何指,述朱 師徒三百人」, 獵 世 一甸 ,亦不言耕 人」,朱《傳 徒 有二、禮記 者何 獀 亦名 狩 並 》 曰 ; 精, 朱《傳》所 者 無 甸 也 申 所出 徒, 釋 祭義 衆人, 也? 周 用 長 禮 以 謂 耕 . 甸 ^ 臣 樨 乘 \overline{H} 天 徒 甸

詩之「鎛」也,用 之「錢」也 而 銚、 鎌 音廉。 槈、 管 子》 用用 銍 EI: 以 槈, 器,皆 耕。 以耘。 農 見《 椎,一 槈 或或 有 銍,詩 臣 一 耜, 作 工 銍, 》詩。 鎒, 亦 然 名銍,用 俗 釶 後成 銚 作 即 農 音 姚 以 即 詩

也

而《

説文》以

钁

爲

大组,

此又鎛之同

類

穫。 解也。 阚 雅》 古 今備 鍬 亦 楚治 鍤 作 覈 字。 之,《 鹓 切。」徐曰: 土 剜 爾 雕 雅 説 切。 影廟 文》 睫,《 鳅、 謂 從 之 斗, 説文》云: 鍪、銚、 睫」, 作 鹓 郭 舫 引 云

沈音 鐰皆 **梩諸名、《世本》云:** 詩》 遥。」《方言》又有剧、鏵、鍏、臿、畚、喿 釋 同 文云: 字。」案,鳅,七遥反, 銚, 七 垂 遥 作 反。 銚。」以 何 邢 土遥 疏 上爲 音 反。 秋。 名

定」,李廵云「鉏别名」,郭璞云「鉏屬」、《詩》甚多,實與錢一器矣。《爾雅》「斪劚謂之

疏引《釋名》云:

鎛, 鉏

頭

也。」《

廣雅》云

為医作之。《牧口己》:「投氏為轉器。」然稼」,高誘以爲耘苗之器是也。《世本》亦以「定謂之槈」,《吕氏春秋》云「槈六寸以閒

則 爲 爾 鎛 垂作之。《攷工記》: 也 斪 又云「斫 劚 也,定也,槈 謂 之鐯」,張 「段 也 人畧切。 鉏 氏 也 爲鎛器。」然 郭 器 굸 也。 钁

> 鎛,鎒; 用矣。 爲貨泉字,讀 名》、《 亦言穫也 面 穫禾 稍 别者 短鎌 説 又案,錢 文》解 銍,穫 ,獨此器 與? 如全, 又《小 之, 本 也 銍,《 無名。 田 劉 他 器 銚 爾 釋文》、正 云 書 與 雅》 名, 史皆然,惟此 傳 鎒 穫 即 廣 云: 禾 截 淺 其 鐵 穎 義 切,後 名,穫言 也一, 謂之銍」, 一錢,銚; 皆引《 世借 許云 錢 釋 其

噫嘻

字

,猶存本音本訓

至也。 表,格于上下」釋之,言能成王業,其 昭」義矣。 噫 朱《傳》引《書》「格汝衆庶」, 嘻 》篇 昭假 鄭 引 堯 典 \times 則脱 德 光 著 被 去 H 四

孔 述毛云: 既昭 假 爾一, 王之政教光 爾 字 毛、 明 鄭 至 俱 未 於天下, 有 所

字 既 詞,正 集傳》以 光 句 明 法 祖 踵 孔 較 「爾」指 著 穩。 意 如 此 朱子 嚴 以 緝 1,均 初 如 説 未安 引 此 以 錢 氏 爾」指 굸 字 代 M, H 帝 爾

田

官官

傳云: 數,當是每三十里分 子 見 發 其 \blacksquare 田 即 田 法,無公田,故皆謂之私。」此言殆非 〈詩 以 ,遂及我私」,是民意之先公也。 盛 此 爾 私 有公田 》三十 記詩 農夫 私」,言不及公,是王意之讓 溝 世 H 駿發 無君民之分,豈得 心孔 君 洫 E 民 ,故在民者,以 法 ·里」、「十千 爾 也, 疏 欲 相 論 私 愛之情,傳、 富其 申之,以 此 故引《地 詩 朱《傳》云: 2者,説 民 爲一 耦 而 爲《大田》「雨 私别之耳。 官 讓 名之以 部,設 適 、疏義 本 ·遂人》文證 於下,欲民 合 鄭 箋 優 私 一主田 下也」。][] 溝 矣。 耳 此 哉? 萬 是。 洫 鄉 云『駿 夫之 又朱 我 大 遂 鄭 用 吏, 成 因 此 公 發 井 貢 毛

> 鄭所 遂同 説 八 蓋 其 畿 云: 四 家之衆, 則 與 縣 説 祖鄭而 之田 謂 制 中 公邑采 似 頄 此 有 專 法 都 上 Ш 未 指 亦 故 鄙 有 萬 究 遂 鄉 在 地 遂 夫 路 一厥旨 遂 其 知 共 ___ 貢 + 内 其 人 以 應 爲 法 矣。 共 盡 達 縣 兼 部。 矣。 爲 爲 主 鄉 于 朱子 遂 部 其 畿 七 何 然 也。 地。」 部 者? 都 疏 專 鄭 腦 猶 謂 是都 用 云: 據 **《遂** 餘 言 「萬 溝 此, 鄙 井 洫 夫 縣 乃 爲 \blacksquare 則 與 至

萬 得 千人也」。 所 合,所之而 言各極 不 之。 爲 望,極於 如 傳 康 盈 其 義 成之説,巧合 望 之 三十。 三十 故 不 也 平 王「。」 舉 拘 Œ 十千 則 拘 也。 每 天 肅 以 詩 各 申之: 下 傳云 夫 非 語, 極 徧。」 田 謂 望 然 之數 三十 疏 則 論 「三十里**天** 亦 徧 終 此 里 相 7謂「人 詩 及 \equiv 内有 配 + 天 本 下 里, 旨, 目 最 地

鷺

耳,非 或有 我 有譽 傷,有何可 周 而厭彼」,誤矣。 傳 彼不以我革其 革 則 》從鄭箋解之, 然耳 商 同 河與「有日 東 振 指 命,未嘗 樓 鷺 乃 客 與微子也。 厭 譽」文義不貫矣。 一,句 詩 以 ? 命 無之自多乎? 革 法 此詩 在 厭之非人情, 義本 而惡我,我 本 夏 彼 命 相應,若 無 「我客」兼指二王 勝, 況彼墜 也。 惡 又載 墜 在 不 惡 其命,是爲 在惡 命者 此 以 又 陳 屬 無 無惡 彼 氏 客 「、桀、紂 墜其 薄 斁 説 小 _, 斁 斁 以 一後 屬 命 而 可 爲 朱

至年

敘云:「秋冬報也。」不言報何神,箋

毛詩稽古編卷二十三

中矣。 近之, 傳 祭。 詩 祭,在孟春吉亥,不在秋冬,又是祈祭,非 章已有《我將 歲 嘗,未可 案,宗廟之祭,以展孝思, 各自立 謂 地 社之屬,曹氏 四方、冬祭八蜡 止 》之説,俱未 爲樂章 百 烝 至秋 嘗,據 神 其 一説,王 祭,不容分用秋、冬 無 信 饗 報 所 敘 也。 農 社稷,當歌《良耜》,不 此 不 又謂大享明堂 氏以爲祭上帝 「秋冬」,詩 \forall 皆 必 致 報,諸説 ,朱《傳》以爲 報祭上帝, 何 然也。 失之顯 天 又 地 歌 白 《 豐 蘇氏 然者,王、曹 非 紛 祖 物, 即 兩 報 紛, 四四 蘇蘇 妣 年》? 田 以 時 大 則 田 祖 氏 文 方、八蜡、天 皆 爲 享明堂 總 功,鄭云烝 應又 況 以爲 、先農、方 也。 方蜡, 無 於 田 明 與《 確 八 堂樂 以 祖 秋 後 證 蜡 報 祭 或 集 此 儒

集傳 豐 》,仍用 年》敘,朱子《 敘 説 蓋 細 《辨説 思之, 淡機 知 其 其 誤, 不 及 可 爲

四四五

也 乎 新 何 本 改 也 ? .無 爲 本 悟 m 游乎? 「薦 劉瑾 是。 其 作 薦 朱 薦稌 於宗 非 克 報賽 廟 殊 疑 升《 圃 平 朱子既謂 不 盡 改,克升尚 之事 、廟」, ? H. 疏 \blacksquare 知 ,豈未見初 此 事 義 穀 也,稷、菽、麻 濮 詩 V 二,趙 穀 登 一之、胡 謂 稌、黍並言, 又不 敘誤,猶 mi 執 氏 集 薦 以 爲 傳 應 者 此 是,非善述 桂 説 > 同 用 即 初 爲 輔 薦 麥皆 是。 本 其 將以 廣 月 矣 (説 作 俱 而 宗 有 薦 是後 朱 晦 以 穀 此 〉「嘗 薦 者 黍 説 翁 初 始

也。 孔 稌 亦」者,旁及之詞 訓 疏 鄭 所 以 爲大,義本《釋詁》,但彼 亦 意應爾 爲 藏 同意、《豐年》之「高 服 当皆 音義同, 爾 耕 非旁及之 二、「亦 而疏無發明 ·, 古字容 噫 有高廩 嘻》之「服 事 有 故 廩 惟 然 辨之。 訓 矣。 亦」作「 即 大 耕 亦 八爲 上 源 一字鄭 允 奕」, 與 又 黍」 E 謂

> 有 瞽

官 武》而 公居攝 今以《 則 樂 奏《 則 祭 成《大武》也。」此三頌 敘 (武》是 維 文王 於 云: 告 而 武 清 廟 大司樂》「 成 敘 奏 己 ×, 酌 也,疏 之 疏 之。」 當 六 mi 굸 當 在 奏之,其始成,告之而已。」據 年, 南 云 箋 有 在 居 籥 觀 是 失箋意 大武》 瞽 制禮 成 始 攝 以 之, 所 》箋 之六 作 王 六舞 當 大 奏 作 樂 即 殆 也 亦 合諸 EI: 矣。 不 樂 ° |≪ 年 政 不 而 大 奏 疏 歸 止 · 然。 合 之初 合樂 於 樂, 又《武》頌 以 酌 「合者,大合諸 乎 於 酌 此 政 爲 乃爲 》是 祖 箋 敘 時 成 大 一時 也 云 云 有 注 Ŧ 也 武 此 0 瞽》 謂 又《春 之事 **>** 舞。 ^ 乃 也 武 大 告 徧 及 此 後 周

來

所

有

未

説

平

此未 武》, 周 爾。 敘所 作 云大合諸 合乎祖」,是以《 制 六 合樂 耳 必鄭意。 代 疏 云「始 餘 之 謂 樂 樂」, 者, 經 器 作 也 止 則《 合諸 諸器 樂」,是 ? 説 而 虞 大武》而 此 況 周 樂器 畢 書 箋 之 經 備,特作樂之常 始作《 . 所 亦 樂 非合 言 言 器 商 與 大合諸 大 頌 諸 惟 當 異 武 **>** 樂合奏之 獨 代 已 縣 鼓 奏 有 之 樂 所 ^ 之, 是 大 <u>二</u> 何 則

瞽爲 案,《 從目 联, 漢 联。」許所謂古,其古文乎? 亦 - • 直謹 朦 盧 . 关聲。 靈 但 有 臺》傳 植 則 有 瞽」,《釋 切。」案、《説 傳 瞽 眹 》注 勝、賸皆從朕 以 非 ۰, 有 無 俱 云 文》 眸子 眹 與 「無目的 者 此 文》 爲矇,而《有 矣。 釋 聲,疑 文》 日 《説文》瞽字 朕又作明 「瞽」是 無 联, 異 目 古以 瞽》箋 目 眹 也 靈 精 日 朕 · • 瞽 也 注 釋 後 又 爲

> 也。」 疏 不 可 又 始通! 以 執 瞽 也 稱 爲 耳 矇 ^ 廣 瞍 雅 之 總名, 此 皆 以 矇 意 瞍, 盲 分 别

潛

綸 深 日筍,日眾, 案,古人捕魚之具見於《詩》者, 物,不可爲訓,故改釋潛爲取之深。 取魚器也古矣。 巡、孫炎、郭璞注《爾雅》皆本之, 又音岑。 文》作霖,所今切。 而有多魚,殆幾 網 爾 橬, 槮也。 毛之傳《詩》本之。《小 雅 日 • 日 罶 釋 一竹竿, **今**字 器 併此 王介甫謂積柴取 ,林》山 於竭 積柴水 云 日九罭,日罩 詩之潛 澤,獨 沁 槮 切。 中 音 ·而魚 糁, 謂 不 爾雅 凡 爲 之涔」, 又 日 爲 霜 是 舍 緡 魚 盡 日 甚 名十 夫取 潛 焉 疑 物 廣 反。 汕 日 乎? 。」李 於 之 潛 爠 有 之 盡 爲 同

贵

專爲

周樂設

哉哉

?

同 Ħ 於數罟,不 中如梁之堰 僅 積柴爲 水 7,是 爲 盡 絶 物 流, 矣 細 目

之曰: 魚,先 《大全》者又筆其 載在《月令》,人皆見之, 已,季春薦鮪乃 潛 薦寢廟」及「季春薦鮪」之文,輔 「今《月令》但有季冬至寢 》篇朱《傳》引《月令》「季冬, 敘 語於書, 説 也。」吁 廣 미 嗤 獨 李 不 也 春薦 見邪 原廟 之 天子 鮪 ? 之文 文 廣 辨 嘗 而

《淮 也。 游 此 触 出 疏 魚也。 1,性浮 游 ,故濠梁有魚樂之喻, 無 一音兹。 南子》「鯈 (韻會)云: 申 鰷鱨 食之鰌斂」、《荀 述。 《埤 江 注 鰋 淮 三二即 雅 魚望之可 案, 鯉 之 」,箋云: 閒 「亦作鯈敒。」《 \Rightarrow 白 爾 謂 鰷, 雅 之 見,即之不 解 子》「鯈,浮陽之 (Mean 理 江 或 狹 東 鰷 有 羅 呼爲 而 鮂 然。 願言 莊子》「 白 長, 可 鰷 鮂 音 《本 似 此 得 也 囚 者 儵 _ _ _ 鱨 魚」, 」,皆 魚 草 孔 魚 是 好 mi 黑

> 臧。」 謂 今俗呼鯊鰷 之緊騰同。 詩徒取多魚 典 魚, 注 館 ,故不辨其美惡 云 皆 凡 魚 長 也, 數 寸, 而 與 狀 鰲 如 味 柳 葉。 不

雝

雝

家敘

一神

大祖

」,吕《記》述之良是,

惟

畧武。 母」而 異。 其以 古注 詳 注。 以 不及譽、稷,則非禘 爲最盛 武 皇考」爲 吕謂 然 爲 本 言 王 朱子 通 祭文王 又「烈考」、「文母 ,故《雅》、《頌》推 初 宜爲文王耳。 也 此詩推得禘之由,而頌皇考爲 有天 初 武 則 朱《傳》不 大祖 八下,宜 説 王、「烈考」爲文王,則 同 實 ,若吉禘於文王, 於箋, 不 當之,又「烈考」配 如 用 -, 本 源 敘 此, 惟 子 謂 王 謂 義 1 造 業,恒詳 嚴 武 則 周之功, 並 辨 與 王 緝 敘 稱 説 祭之則 又不協 無)謂 易 云 文 嫌 詩 而 文 文 獨 古

朱子言禘,素不主鄭 之。」既 古注 以 以 皇考爲文 烈考爲武, E 决非 烈 學,初說祭文王,未 **灬考爲** 武 王主祭矣。 武王, 朱 氏 從 審 旧

以

何祭

也

樂在 諱。 已在 梁傳 也。 敖 此 亦 王 於宮曰「舍故 名」」是也。 無 一名鄭 IE. 證 在 》所 與 諱 居 周 如《檀弓》謂 宋 泛雕 二昭、 昭、 也。 人 李 攝之六 衞 而 謂「 以 樗 襄 》 詩 有 昭七 一君子 衞侯 公名 諱 謂 衞 二穆之外,親 祀 穆之外,公 而 年 事 周 侯 年。 文 諱 神, 鄭 ,不奪 惡 穆王名滿 「既卒哭,宰夫執 鄭 與 王 新二 王 與 而 此 生時 不諱昌之義, 魯武公名敖 襄 大 孫 人 是也。 夫 王 名,不 孫 滿 義 無 有 司 當 丽 俱 盡 敖 諱 時,不 齊 定 當 有王 廟 無 也。 若周 奪 悪 王 毁 僖 當 木 此 人親之 事 而 時,穆 不 公時 孫 得 廟 公 有 鐸 同 非 何 滿 有 既 定 得 公 以 · 確 得 諱 毁 禮 武 E 所 穀 孫 狥 有 證 取 襄

> 之事 謂《 之,然則 以 人詩、樂分爲二教也 疏言之矣: 爲 詩 · 故其 證 ×, « 乎? 奏 書》 爲 詞 樂章, 詩 然 不 不 是四 爲 諱 雕 廟 必 故 海歌 詩 諱 更 無 不 有 及採之爲 頌之聲,本 嫌 諱 釐 耳 昌 定矣,益 何 孔 經 也 語 非 典 信 或 廟 古 近 所 中 E

載見

《烈祖》箋「聲和」語釋之,恐未 之不 以爲 止 鳴哉? 鸞,故以 以 同 爲 即《韓 鞗 飾,詩 也 況 鶬 革 車 鶬 何 有 奕》之「金厄」 得 爲 鶬 上設鈴, 人稱 聲耳,轡首之 移 彼 鄭 美,義各有 釋 云 本取 此 8 是 其 鶬 也 金 聲,革末 歸 · 當。 有 金 朱《 宜 幾 飾 彼言 乎 而 貌 傳 垂金 訓 亦 **>** 解 疏 和 八 取

孝以享,以介眉壽」,疏謂「三言

以

者, 也。 謂 謂合萬 指祭言, 享、介、壽通 以一者, 祭畢 牲 此三者,皆賴 魚腊 國 皆以 而義 而受嘏 之歡 爲 四 諸 亦 心 海 侯 微 事 所 也 諸 九 爲 别 謂 州 侯 則 此 之助 小大稽首 之美味 享者 未 孝者, 盡。 良 是 外備 内 巾 案,三者雖 也 杰 ; 使 其 其 又 君 介 物 心 謂 眉 壽 老 壽 所 皆 所

弦 諸 解 煕 侯,意本 祉 侯 本 Ŧ 亦享其 福 於 純嘏」,使繼 綏以多福 鄭 同 相 箞、 同 解 福 後復 未 孔 耳。 」, 安 疏 見其 續 逐變其 廣大其 朱子 丽 諸 勝 侯以 説 緝 初 熙 ,與《 説 純 嘏也。 以 義 福 烈文》篇 爲 較 也。 均 優, 李氏 福 總 於 俥 諸 之 錫 欲 緝

有客

「亦白其馬」,傳以爲「亦周」,箋以爲

美微 不其 朝 亦 自 武 八然。 子, 庚」, 乘 恐 所 尚 傳 非 ,所以尊 得之矣。 客所欲 聞,詩人忠厚之旨, 大之也。 先代之後 若駮 亦 武 得 庚 如 以 王

慈 何 貌, 也, 敘切,音取,《韓 且字音慈庾切, 又音徂 韓奕》「有 説文》訓薦,又七也切,此二音人所習 本 庾 切 且字 士 頌 一、《鄭 應 、》「有 日 讀 既 且 風》 有四音,子 如 且 萋 奕》「籩 聚, 而 則 有 匪 引《 兼 且 我 釋文》云「往也」。 與 頌 菹 思 餘切 毛云「 豆 取」各一音,不 且」、《釋 姜 取 有 者, 且 兩 且」,鄭云「多 當 敬 音 其 之,誤 慎 文》云「存 本 \wedge 貌 正 . 音 又七 , 矣。 韻 聞 也, 知 而

也 琢 嚴《緝》據《棫樸》 治玉之名, 敦 琢 其旅 」,箋謂 本 於 毛 爾 以 傳 治 雅 × 玉 謂 比 非 雕 擇人,蓋 鄭 琢 分 氏 别 臆 金 説 雕

此 毛 玉 詩 姑 誤 雕 即 敦琢」,自當 矣。 本 經文 治 《棫樸》詩「追琢 金之名, 而 分釋之耳,非雕 以《 其 言 爾 雅 治 」與 **>** 玉 爲 金金 是 IE 字 鄭 定訓 玉」連文, 意 案, 非 也。 雕 毛

追

、敦,字異義同

饗燕 氏。 往 發上 而 此待客之禮。 之於已去,往 者,已去而復還之。」夫不留之於未行, 燕飲安樂之,觀《韓 餞,可見古禮 芻牢 之,豈得無方 賓禮掌於行人,郊勞贈 道,王使追逐 薄言追之,左右 -,皆有 返僕僕,重勤 又訓「左右」爲 定 如 平 制 而 此。 :奕》詩,韓侯出 ? 餞送之,左右之 非 綏之」,追,送也。 朱《傳》曰: 可 意 嘉 賄, 爲 無 賓,恐古 厚 方,説 皆有常 薄 宿 「追 臣 也 而 本 人 偂 顯 又 儀 安 蘇 無 追 之 與 甫 已

大。 既 則。」 有 淫 鄭 威 申 降 大 福 則 孔 之 夷」, 義 傳云: 謂 用 殷 Œ 朔 淫

> 骨肉相 成湯以 謬説。 裔 有之矣,不 畧之士 無 載什方張氏語 則 行 也。 放舉 其 而意與 、禮樂,如 告語 亂亡 聖德受命 周 稱 家 (毛、鄭] 揚 聞 並 忠 之禍,以 天子 朝 忠 ,以淫威爲誅武庚事 厚 廷 無 同。 厚 待 也 威 猜防之意, 豈於 勉 之朝, 人,其 <u>۔</u> ٥ 德 其 傷 至吕《記 以以 踐 朱《傳 其 修, 命 施 心 攝 微 哉 此 遠 詞 × 雖 子 嚴《 於 夷 氣 不 丁,此最 其 也 叛 和 象 後 緝 訓 來朝 平, 賊 賢之 世 但 威 則 智 如 述 爲 俱 爲

武

單 之迹 但《雅》、《頌》 舉謚 而受之。 嗣 ,惟《江漢》「文、武受命」、《閟 武受之」,毛 稱先王,皆以 鄭 以 爲 訓 嗣 武 子武 王 爲 王、文義 配 迹 謚 爲 丽 官学二 嗣 言 俱 文 其 通 王

王言, 專目武王 于文、

、

、

、

、

、 īE 亦 非 一,不 而 所 已,彼二 ·同彼例。 施 於既 王並 且 殁之後, 嗣子之稱 舉, 容 或省文, 當 ,雖對文 以 傳 義 此

年,然並 之言也。 此 於樂王師,遵養 乎? 詩,云『耆,昧 耆定爾功」,疏謂「宣十二年《左傳》引 不訓 楚子引「耆定 「耆,昧」,豈誤合二文爲 也」」,誤矣。「耆,昧」者, 時 晦 而釋之耳,乃隨 爾功」,亦在 宣 十一二 武子 引

閔予小子之什

閔予小子

後, 成王廟 以 武 王崩 見 而 作《閔子 周 公 即 小子》、《訪落》、《敬 攝 政, 七 年 歸 政 之

之也。 意 廟」, 方始居攝乎? 自 之,鄭之誤有三焉。 朝 而 又 惑 三歲童子意嚮如此,可謂天姿過 三詩所言,皆敬 作,然必意嚮 也 則作於歸 自言不堪任事 之》、《小毖》四 四 於 一,豈不知君德淺 相 謀 廟,作《閔子 難躬親 (流言 連 詩 又次曰 因 以成王年十三,免武 貢 小 謀 ,疑忌周公,積年 政之後者,此鄭氏之説也。 敘,首 萬幾,周 而 而皆稱 「進戒」,又次曰 果 進 一詩 ,周公始居 小子》、《訪 一戒 誤一也。《 天法 如 者 因 此 深? 嗣 一,此 公大聖 朝 成王免喪,年僅十三, 祖、勤 Ŧ 詩 聞 毛公之意 於廟」, 必待 定是一時之事 人 戒 攝,其《小毖》一詩 落》、《敬之》三詩 木 《頌》雖 人,又其 學 乃 而 王喪,將 「求助」,蓋 悟? 求 好問之事,十 述 其自言不 次 助 而 人矣,何至 非 而 曰「謀 誤二也。 歌之, 親 成王自 四 即 Ŧ 今觀 叔 敘 政 肅 因 *,鄭 父 朝 於 觀 述 而

學,而 説者, 職乎? 耳。 之言。 接下, 分前 誅 舉,非聖人不能 親 時 朝諸侯、然謂僅行冢宰事 廟 人託之以爲 人一而已。 藩, , 出 年, 「小子」,豈 尹之放,公之攝,皆曠 臨 不知公之攝 蓋謂 《閔予小子》三詩,獨從其 營洛 羣 則 但公方居攝,政 誤 及歸 詩 其訓 臣 征 在 一,當在 邑 伐 周公居攝,止行冢宰事 利,儒 也 . 居 政之後 源 於王, ,事事皆出 四 則 臣 攝 謂 行, 方, 子 前 政,縱未 新 成 生諱 王 對 則 故堯、 王 立 人 親 後 義 曰「沖子」,曰 君 非 則 初 時,不應遲 之以爲 理 允 之稱 己出 免 公手,此 制 詩在 庶 ,未必然 必踐阼,負 矣。 舜 古 禮 喪 務 襌 一見之事。 時,非 一, 不 乎? 作 自 歸 誣,其不 宋 讓 免 :樂,以 政 儒 豈 至 當從 必 也。 喪 湯、 「孺 後 尋 戻 有 非 不 七 嗣 朝 好 常 常 祀 武 當是 王 容 咨 知 子 至 南 年 廟 貶 相 姦 聖 延 間 先 征 之 臣 建 鄉 後 見 之 鄭 去

作於此時矣。訪,以盡下情,博采羣言,以裨治道,四詩

正

達於 憂諒 哉? 事。 也。 然 管、蔡,則 迎 居 王 前 在未免喪時矣。 矣,及釋「甹夆」、「桃 知幾閱月矣。 也。 以 東二年,前 武 王見 衮衣、 陰,不 輔 周 王 況成 閔予小子》 年之後得 一崩 周 廣 而 詩而 ,管叔 公居東二年,罪 是成王之疑 述朱,亦 Ŧ 繡 應 王 一疑,王 裳 出 衰 猶 後 居 也,此皆 不悟 方在 郊 絰 僅 喪 罪 嘗考之《書· 四 以《 之 也,公亦 人,而 疑 二十七月,此王肅之説 詩,朱子既謂 中,不 始 殷 公, 蟲。 月耳,豈 而公出,不 訪 也, 理之難 落》篇 有 王 以至悟 應 又以爲 在 風 聞 不 斯 之而 雷 悟 衰 服 能 金縢》,殆 得 通 多 之警, 絰 弁 因 加 知 免 歷 |難||爲 指管、 流言, 迎公, 中 服 喪 此 幾 作 -,
不 也, 多 年 閲 又 時 詩 則 應 故 除 不 以 皆 指 蔡 作 宅 治 月 不

初 言 四 乎? 免 之作 喪, 疑 在七年 公方甚, 歸 政 安得 後, 無 有 疑 懲 也。 前 毖 若 後 成 之 干

可泥。 ○ 召 征 H 未 予小子」、《紀 於十二年,王 公、穆王命君牙,亦自 有 何年,未必 小 詩 《詩 必 此 弗 子 計 非 。」以 稱。 庭之後 果爾, 》傳 孔 》、《洛誥》及《周官》載成王之言,皆 也。 説 疏 同。 引《 證《閔 作 初 案,予小子,古天子之 歷 要 洛在攝 一在位久矣。《君牙》之作,未 年》 V. 除 則 曲禮》云: 非 歷 時 明 即 予小子》三詩是初 可 初 謂 也。 已久,至作《周 政 據者、《曲禮》之言,殆未 伐 即 政之七年,孔氏《書》傳、毛 又久矣。 稱 淮 位 ^ 江 予小子。 夷 事 「漢》詩 「天子在喪,日 在 矣。 宣 又 此 王六年, 亦 官》, **《畢** 康 恒 云 皆 免 Ŧ ·命》作 無 稱 見 喪 命 在 也 於 詳 時 雖 日 畢 四 7

訪落

一一一。 學,而 者 之? 庭,本 其 下也 降庭止」,本用《漢書》注 牆釋之,至《訪落》之「紹庭」二語 以庭爲庭户之庭,「陟 也。 庭 尚 上下於庭,陟降 IŁ 詆 庭,直 」,言文王上事天,下治人,皆 源謂 不牿 屬 況紹庭二字亦不詞矣。 紹庭上下」,言繼文王之直道 其 兩詩俱言庭,意相符合矣。 虚 陋 斯言不然。 也,此《詩》、《書》常訓 於 想,非 反 專經之陋,故 謂 涉 實有其事 於家」。 獵 降庭止」既以 者 經 一説,因 得之乎? 義 宏深, 夫鬼 獨 也, 又朱子 謂 得 《詩 也。 將 神 專 顔 則 一,施 見羹、見 朱《傳 何 陟 精 監 以 》之本 解 굸 以 降 於 精 直 於 陟 是 紹 陟 紹 道 史 於 E 降

須語 當 艾爲盡矣。 訓 之爲徑也。 何 「朕 適從乎? 語 未有艾」, 相 綴, 又云「予不能及」,及與盡異義, 《集傳 方得 又此篇《集傳》本 轉 歷 》謂 文義蟬 而 如 爲 「夜未艾」之艾,則 数,不 連,中 如 閒 順 E 脱去 文釋經, 氏訓 維 歷

敬之

予小子」二語,殊屬

疏忽。

言。」又曰: 耳。 四詩爲成王作矣。 述成王君臣相告語之言,皆旁人代爲之詞 人見之而 《閔予小子》四篇,當是一人手筆,《敬之》篇 朱《傳》曰: 疏謂《周頌》諸篇,皆當時實有 述爲 「乃自爲荅之之詞。」是直以 歌, 「成王受羣臣之戒 則作者主名不可考矣。 ·其事 而 述 詩 此 其

陟降厥士」,士,事也,天之事也。二

「日監在兹」意複出矣。也。朱《傳》曰: 「陟降於吾之所爲。」則與氣之運行,萬物之化育,皆天之升降其事

小毖

遠矣。 《新經》、《字説》,皆此類耳,不意朱、吕大儒 授不能 也。」見《釋文》。 又「辛螫」《韓詩》作「辛赦」、云:「赦、事 言螫耳,然「辛螫」並言,豈辛者蜂之味耶? 乃爲所惑。 筝,訓爲 來古矣。 莫予荓蜂,自求辛螫」, 得其真,徒據今本而 癴 訓爲使蜂者,王氏之謬説 曳。毛、鄭 且安石之爲此説者,徒 可 見經字元多借用,非 之 解與 妄爲傅會,失之 《爾 荓蜂 雅 也,彼之 亦作 見 同,其 有 下 句 粤 師

桃蟲、飛鳥之喻,泛言事理如此,當謹

流言僅 於微 説 蔡,以至 王 扶殷 肅 、蔡,詩 向 述毛,言將來 讀《金 詩名《小毖》 叛 一叛亂 語 矣,以爲 意 **並縢》書** 小 良 ,此誤矣。 罪 然。 ¨, 豈 叛 患 以 〕辨之。 鄭 於 得 難 此 謂 當 居 輒 管、蔡 丰 成 東 慎 加 有 王 後 刑 其 所 乃 悔 者 小 戮 指 成 不 亦 非 也 王 早 鄭 況 悔 一叔父, 誅 之 此 疏 不 臆 時 用

茅秀 説 覻 婦、 飛 雅 謂 肩 苕 及 鴞 桃 義 Ě 折 女匠 、鴞三者爲 爲巢, 至日 鷦巧 蟲之雞化 卵 鸋 也, 桃 鳩 破 襪 然 蟲, 耐 「鷦之所 亦 大如 一之喻 疏 匠 危 此 鷦 而 之 云 鳥 故得 雞 鳥,其以爲 爲 其 名。 事 矣。 爲 即 子 鵬 不 雕 鳥 桃 巧雀、 而《荀 塊」是 知 ^ 所 焦 蟲 小毖》箋合 題 所 須 貢 忧 出 肩 鳴者,即 不過 巧 $\stackrel{\frown}{\sim}$ 子 也 (易林 矣 小於 匠 Ś 0 則 説 先 》亦 巧 黄 蒙 案 證 枝,《 鸋 鷦 儒 女、 雀 成 鳩 言 鳩 陸 與 以 之 爾 桃 璣 拚 題 爲 取 有 巧

> 當 蟲 有 牛 鵬 本 鵬 與 題 肩 皆驚 鳥 意 與 鄭 百 其

> > 説

載

事 配 未 在 而 ,故歷言耕作之勤,收 見 不言中矣。 如後世詩 朱子《 則願 有 祈 其 報 辯 將 人,較 之異」。 説 來 豈 \forall 能 謂 工 旬 \sim 則述 拙於毫芒者哉 夫 櫛 載 春 穫之盛 字 芟 其 祈 ×, 比 已 秋 ^ 往 務 良 報 祈祈 以告神 與 耜 總 題 報 意 意 明 農 自 相

王 記 王 疏 詩 汁 . 引《祭法》 爲 祭法》疏 疏 載 羣 兩 義 芟 》 敘 姓 疏 長 立 皆 引《載 釋之, 矣。 社 云 出 日 孔 ^ 女 》 敘 泰 詩 以 氏 社 春 **>** 此 疏 丁王自 TITI 藉 社 説 則 田 是 耳 以 而 泰 爲 異 此 祈 汁 立 詩 社 祭 較 社 所祈 稷 其 論 法 日 也 禮 E

引《

傳

》語

云「天子親

耕

故自

立社」。●

證

以

社

稷共祭,定是泰

社」,又似王社

不必

有

稷

説

亦

自

相

矛

盾

也。

至崔

氏之説、《

通

義

北

。」據此,則王社

在

藉

 \coprod

亦應有稷、詩

疏

神

有

社

必

有

稷,稷

壇

在

社

壇

西,或

云

在

其

牲

疏

謂

社

爲

五

土

總

神,

稷

是

原

隰

之

社」,俱在春時。

而社爲泰社無疑

矣。

至《郊

特

社

當

各

爲

事、《月令》「孟春躬耕

帝

藉

仲

春

命

民

之役於官者

不不

應

有

此

稱

也。

父子家室藉田終畝

惟

甸

況詩言主、伯、亞、旅、婦

媚、

稷。」《祭法 ,王所自祭,以 徒三百人,乃庶 一於泰社。 祈祭,誠 士依,自説 藉 則 在 藉 \mathbb{H} 如 書 疏 其 而 田 疏 供 傳 稷 與 民 祈 云 言。 X 閒 無 與 祈 社 齍 稷。 未必 其 蓋 依之,同壇 主 后土、田 稷之壝,而 爲 非無本,信矣。 亦本崔氏之説 一然耳。 神農 此 「句 田 正之所依也,詩人謂之 主當 祭尊 龍 共位 樹之田 又案、《周 爲 在 后 也 可 藉 至蘇 主注 土,配社。 以 田 賈氏 及卑, 禮 中, 氏 云 用 以 大 依 故 以 田 樹 司 棄 釋此 使 主 木爲 徒》「 田 爲 后 在 田 主 田 詩 土、 藉

之。

 \blacksquare

田

Œ

正

配

稷』是

也。

源

謂

詩

主

爲

民

盛。

今從其

説

?

詩

.

頌》『春

文,崔氏云『王

社

在藉田

社

共祭,

亦

當

謂

泰

社

社

設

其

社

敘

則

祖

疏

田

神

泰

社

在

庫

門

内

之

右

 \pm

社

所

社

心此

|爲百姓祈祭,當主

緜 其耘 草 則 其 木,當是新墾之田,理 甫 闢 穮 載芟》篇「 其土 既 耕 既 也。 苗 而 而 耘 俶 華谷 耘 也,是去草木根 載 也,是去苗閒草。 謂 以 首言芟、柞, 容有之。 下 方 及 播 株 故「 穀 地 千 不 尚 以 耦 緜 有 上

社」,原作「解」,嘉慶 本及《四 庫全 本同,據康熙抄本、大全本、《四 》本《詩 經 通

 \blacksquare

草、未審何意 耦其耘」,本從箋義,《 簺 一耘之不同,一覽而 作」之文,後言 疏 之解 甚 明 劉瑾宗朱,亦指其 即 其 經 穮 較如也。 文 集傳》改釋爲去苗 前言 承 「傑」、「苗」之文, 二其 朱子初説「千 耘 誤 承「芟」、 閒

千人也。二文有辨。孔疏云。千耦也。「千耦其耘」,謂爲耦者千,當得二「十千維耦」,謂萬人相與爲耦,當得五

聲,不 有 經文嗿字 飲食之聲。」殆合毛、許二義 切。」音義 文》勅感反。《説文》: 飲 食 有 言 聲 ·噴其饁」,傳云: 飲 乎 本 俱 食, ? 指 不 同 饁 不若 足 言,則是 通 李氏 毛氏。 毛、 日 許之異, 「喰,聲也。 方 嗿,衆貌。』《 而爲之説。 饋 韻 增 時 噴者,衆 耳,何 圃 他 經 爲 衆 遽 然 感 釋

《載芟》之婦士,即《七月》之婦子也,皆

亦合。

允矣。 上承 謂 行饁,故彼詩婦子繼以饁 行 嗿饁之語。 饁 之人。 李氏以婦 婦 士爲夫婦,恐非詩旨。 傳云: 女 幼 弱 不 畝之文,此 「士,子弟也。」 任 耕 耘 詩 則 婦 使 義 士

朱子其因此而致疑與?《說文》云:「飶、食之香也。」與《詩》注異,也、未詳何物。」是不欲以酒醴當之也。案,也、未詳何物。」是不欲以酒醴當之也。案,言、玩文義亦當然。《集傳》云:「飶、芬香言、玩文義亦當然。《集傳》云:「飶、芬香

况「極古」語亦未順。如毛之當矣。《集傳》訓振爲極,不知何本,云:「振,亦古也。」鄭義雖本《爾雅》,然不云,振古如兹」,毛云:「振,自也。」鄭

良耜

「其饟伊黍」,箋謂「豐年之時,賤者猶

夫豈 食黍」, 食珍者耶 而 彭 氏 ? 以 爲 彭 無珍味,意 殆 食肉 糜之見也、《大 相 反。 夫 農

其

語

亦謂 雅》: 陸 明 紫色者荼也,青色者蓼 穢 以 不當以苦菜當之耳。 大不苦 著其形。今案,《古今注》云: 郭皆引此 目 ,蓼爲水穢,當矣,但 爲 紫 穢 穢 茶、蓼並見《爾 色者 或謂 詩。 意 者 本作薉 蒤,委葉。」郭注引《詩》而外,亦不 同 爲 蓼者, 薔虞蓼也 紫葉者爲香茶,青色者爲 高夢。」 ,朱子所 爲紫蓼,青色者爲青蓼。 蕪也,田 雅》,茶者,茶委葉也 或作 中襍草也。 謂 也。 未詳茶之性 辣 馬 夢。 茶, ,孔疏云。 其 或 草,而 此 味 即 與 「茶,蓼也。 辛且 王 斯 狀。 茶 王 氏 青茶。 草 苦, 其長 爲 肅 水、 ^ 某 食 旧 爾 陸 皆

則 雞 雖 豚 魚 草,然古人 鼈 皆 實 蓼 飲 腹 食資 中 其 又 切 性 之 味 以 内 和

澤夢, 點 書》有 木 種 大 蓼,蘇恭注云: 四 尹 録》。 羹 水中者曰水蓼 案,顔師 大有用也。《良耜》篇特以 葵、韭、蘇、薑 蓼菜 篇。 夢。 君之録。」又《漢書 膾, 葉 於家夢。」韓 又《北史》蕭大園云: 木 相 青蓼,香蓼,水蓼,馬蓼,紫蓼,赤蓼 長沙定王故宫有蓼園, 成列」、《説文》以 一名虞蓼。」《唐 種 與葱芥 紫、赤二蓼葉小,狹 蓼 似 古 芥、葵、蓼、 亦 而 言 名 薄。 等耳。 蓼 並列於蔬品 0 天 保昇《本草 有 葉圜 「生下濕水旁, 蓼 藝文》目 馬、水 數 漢 韭、 蔓 種 種 而 史游 本 爲辛 生 農家者流 厚 菽 葱 草》謂虞蓼 **※**言: , ~ 蓼 耐 其妨稼故薅之。 尋氾氏之書 諸 葉 ※ 急 生於 菜,而《尹 淮 厚。 鋭 葉 其 篇, 似 南 葉似馬蓼 而 有 就 濶 調 澤中 柘 青、香二 《尹 見 薄 子 篇 大 蓼 葉。 和 劉 都 露 有 爲 者 食 生 都 亦 蓼 尉》十 向 葵徵 黑 於 六 水 味 云 與 尉 别

指 蓼 案 水 重 詩 生。」 此 蓼 華 草。 彡字 ,皮青 其 而 一合此 赤 亦作 即 虞 孔 白 顔 滑 蓼 諸 疏 蓼 之 子 説 澤 引 濹 諸 大 觀 蓼 ^ 蓼 蓼 之, 爾 如 , 乎 皆冬 胡 顔 雅 ? 唐 以 麻 **>** 死 ^ 虞 爲 蜀 良 蓼 惟 惟 耜 之 草 木 香 **>** 本 所 矣。 文 蓼 葜 薅 草 以 宿 華 釋 當 之 又 根 黄

絲衣

74 爲 葢 敘 今 祭 燕 使 之 祭 與 所 服 也 詩 1 而 絲 謂 也。 相 飲 衣 非 則 符 燕 酒 **>** 祭 非 E 合 私 之 載 力 正 祭 詩 弁」,箋云: 祭 有 視 ^ 燕 矣。 湛 明 濯 飲 夫 露 證 視牲 樂 故 祭 者 章 所 爲 而 也 載 謂 繹 則 飲 猶 不 使 酒 朱 在 戴 應 賓 小 也。」 宗」也 户 一, 列 īE 傳 宗 之於 士 ^ **>** 伯 楚 改 此 助

《頌》。

雩,秋 年,高 也 仲 星 帝 可 非 月 宿 天 之。」又《 下 注 龍 非 是。 矣。 秋 未 田 立 釋 行 以 星 ^ 之。 見 星 靈 之月祭 左 絲 玉 祭 八 霜 帝令天 春 雩正 ^ 安安 也 星 海》云 月 後 衣》敘 論 降 靈 角 秋 祠 ^ 得 亦 衡 晨 漢 星 漢 非 靈 祭 與 日 下 常 見 雩, 書 而 • 雩 天 星 在 謂 班 不 東 靈 文 以 郊 祭之? 於 . 之 巳月,祈 書 田 靈 得 今靈 方, ~ 靈 歲 星 祭 祀 國 晏 , 合爲 正 星 _, 周 星 時 則 祀 記 一之東 注 即 則 期 書》作 星 祠 孔 農 祠 記 \forall 同。 ^ 龍 祠 乃 祭 云 以 疏 通 祥 南 祭。 靈 以 星 又雩 秋 則 4 引 典》 也 雒 星 案 后 之 $\stackrel{\cdot}{\sim}$ 殆 秋 又 稷 漢 祭 晨 亦 高 農 襲 Ħ. 之三 雩 謂 當 農 晏 配 書 祭 言 漢 見 星 八 祥 注 祖 充 周 在 **>** 食 月 皆 之 周 月 Ŧī. 此 夏 即 興 而 張 制 **�** 云 誤 皆 與 制 龍 精 語 春 九 房 謂 祭 天 晏

農星。《玉海》據宋本,當不誤矣。 食。」今《周書》云「日月星辰皆與食」,不云

《頌 簡 云: 午, 又求 故《絲衣》敘 尸, 祊於室以祭神, 是日祭禮簡, 接尸禮大, 名 祝於祊 二是 也。 ,接尸禮大。」 其斛,旨酒思柔,是接尸也, 猶繹」,皆言 《郊特 明 神於廟門之内、禮記 祊有二種,一是正祭時,既設祭於 絲衣》 「自堂徂基 廟門外之西有堂有室,繹於堂以 日繹 」及《小雅・楚薺》「祝祭於祊 是 字亦作襗。 性》「祊之於 一辉賓 也 ,自羊徂牛, 繹 尸」,《 繹 而 與祊 祭時,設饌於廟門之 不言祊。 東方,失之矣」 春秋》宣八 . 同 郊特性》「索祭 是祭神也。 時,而 故知 《 特 澤其 事 门是也。 (年「壬 牲 神 》疏 廟 兕 接 大 及 禮

二切而義同。胡化切者,何音也,下快切「不吳不敖」,吳字有胡化、下快、五乎

又。 者,陸 捷 解。 从矢口,然則今《説文》吳字,豈徐氏所定 也。 耳。 其來已久,徐氏謂 乎? 至於口 化切,其謬甚矣。」陸引《説文》作吳,而今本 『不吳不揚』,今寫《詩》者改吳作吳。 反。音樺。 作吴,从口下大。故魚之大口者名吴,胡化 據《説文》,而音形各異,正未 也 徐鍇曰:「大言,故矢口以出聲,《詩》 今《説文》云: ,見《説文韻 吴,大言也。 何説較優也。 从 头阻力切,傾頭也。 口,五 《釋文》云: 又大言何須 音也 此音恐驚俗也,音話。」」下快 俱 下大及胡化 見《釋 譜 「吳,姓也,郡也。 仄口,不如 「吳,舊如 何承天云: 但《史記 今人寫《詩》之謬,殊不 陸、徐 文》。 切,説本 ·武本紀》引《 五. 兩家 字。 口下大取義 乎 知誰合古義 乎切。」音 「吳字誤,當 切者,徐 説吳字, 《説文》作 一日大言 何 又音乎 承天 吾 切 周 音 明 口 俱 日

類,故 案,孔 傳不 文同不妨義異。 音 其 説 兩韻 人口、五 吳得聲,古字 爲誤,皆離於本 略》從何音樺,作吳,亦從陸音話 虞、吳音相近,故舜 頌 《泮水》「吳」字依 人娛樂必讙譁,故以娛爲譁。 史記》合,娱、虞、誤皆諧吳聲,古字多假 **一致**》從 ",於卦 孰 、》作「不虞不驚」,《 是,得 破字,而 收吳字, 馮 以以 疏 平切 揚 韻 徐 沭 闕 爲 音 毛、《絲衣》「吳」字作娱、云: 禡 爲 通 兩 傷 吾,作吳,殆一偏之見也。 疑之道矣。 韻 訓。 一用 詩 調調 毛公得於師授,說必 韻收吳字,而於虞韻 得 王肅作誤,云: 取 「吳」字, 也。 後 多 不過誤、不 何、 然娱、虞同爲樂義,與 趙 封虞亦姓吳。 取 陸 黄 世家》索隱 音 以以 近世 氏《韻會》虞、 二家之説 形 仿 損傷也。」毛 定本作吳。」 「誤與傷爲 爲娱, 一楊慎《古 髴, 陳第《古 亦言 又似 虞本 有 不不 取 一以 又 音 辯 徐 桂 W 以 古

> 關,兩存之可也。 得其義可勿泥其文。從大從矢,非經旨所

勺

之日 晦 爲追 養 「退自 美,恐非詩旨 訓 宣十二年晉隨會引此詩, 率 哉? 取, 晦 此 美文王,言養紂而老其惡。案,《左 師 循 春秋時已爾,毛義有本也。 遵 以 五 養 「耆、昧也 取 年 時 闇 與 須 晦 時 昧 況 暇, 之紂, 俱 以 一。」注云: 毛 晦。」後儒多從之, 姑 此 以 緩 語 指 遵 指 紂 證 武 爲 「致討 攻 武 誅 E 率 Ŧ, 昧之義,而 耳, 於紂。」則 言也 養 永叔 愈不 爲 何 取 嘗 得 語 日 鄭 養 傳 自 雖 之 解 以 謂

意 \bar{z} 《勺》頌 於美武王之師 者 多 異 説 也 ~,率 而 傳 此 師 爲 以 IE. 取 矣。 是闇 傳

敘

云:

大

封於

廟

也。」封於文王之

有威 承嗣,實維 和,龍訓和。 助之,所以然者,因 昧之紂,於是周 介」、「有嗣」參用歐、蘇説述之,餘皆疏義。 武者,武王之所爲,則用之使後世 辨見《商頌》。不以彊力也。 爾之事,信得用 道大光明 我周之受殷,用天 矣,是用 師之道矣。 天 蹫 下 人 有所 蹻 無 一大 然 之 不

廟,

故

述文王之勤

勞,

以勸

敕

諸

侯也

朱

桓

頌美武王、《武成》言賑賜而《賚》頌謂封建也。頌、名雖同、義實別矣。《牧誓》勉將士而《桓》頌。《書·武成》云「大賚」,而《詩》亦有《賚》頌。《書·牧誓》云「桓桓」,而《詩》亦有《桓》

王」,定是傳寫之誤。
《傳》本遵敘,獨首句云「此頌文、武之功」,《傳》本遵敘,獨首句云「此頌文、武之問,不知《大之功,亦如《大武》兼頌文、武之德,不知《大武》無經文殊不相合。劉瑾謂朱《傳》頌文、武與經文殊不相合。劉瑾謂朱《傳》頌文、武與經文殊不相合。劉瑾謂朱《傳》頌文、武以為,

共知,何煩作驚喜之詞以自夸詡耶?而非商之舊」,於義短矣。周之代商,當世由耳。《集傳》於《賚》頌云「凡此皆周之命,則由於懷柔百神,各承上文而明其致王之則由於懷柔百神,各承上文而明其致王之此周之所以受命也,一則由於勤勞天下,一

般

賚

裒」字三見《詩》,《常棣》、《殷武》及

《般》 揚字,博毛切,當是借用。 篇》,誠有之,然掊乃把取義,與《詩》「掊克」 義同,非此三詩之裒。又字或作褒,褒乃褒 爲證。案,古《易》「掊多」見《易》釋文及《玉 相成,鄭不爲易傳矣。《韻會》謂「裒」通作 也。」又云: 「掊」,引《易》「裒多益寡」,古《易》作「掊多」 《般》 頌獨訓衆。案、《爾雅》云: 頌是也。三「裒」字毛皆訓 「裒,衆多也。」聚則必多,二義 聚,鄭 「裒, 聚 則

毛詩稽古編卷二十四

九

歲、當僖公世、行父方在

童龄,安能

任

請

+

命之役乎?

又《禮記

》《檀弓》。

疏引《世

本

襄

Ŧī.

年而卒,卒之年,去僖公之薨,凡五

吴江陳處士啟源英

魯頌駉之什

頌,孔 宋世 直 也 歲 願之詞,疑爲僖公時作。 己德,故知 久,故有「難 此 語,特 敘言「季孫行父請命於周,而 |説《詩》者,以《泮水》、《閟宫》二詩多祝 也,季孫行父文六年始見《春秋》經,至 魯 疏謂「僖公在時不應請 頌 頌美過其實耳,非必生前之 作於文公時」,斯言良是。 四 老」、「眉壽 篇 箋、 疏 以 之稱,至「萬 不知僖公居位 爲 作於文公時 命 於王 史克 自 视 且 有 作 非 最 頌 願 千

及曾孫未必仕於僖公世也。

父是友之孫。

友爲僖公季父且

事僖

無逸生行父」。據《春秋》杜預注、范甯注

則

無逸

行父乃公子友之曾孫,云「友生齊仲,齊仲生

駉

語哉 盡 其詞而已。 外,此所以 言有道,而 務農在其中矣。 而 牧馬 意 無 坰 窮,豈如後世記事之文、講學之 爲善頌也。 有道 夫古人作詩,多微 '野,無妨田作,不必言務農,而 在 飲 酒 其 中 胥樂,情禮優厚,不 朱子 · 矣。 譏敘爲鑿,徒 使 詞 人 渺 得之於言 指,言· 有 以 必

四六五

馬 百 詩 牧、 惟 <u>_</u> 詩 吕《記》首章 牡二字迭 駟 攷 駉 **※**云: 牡 馬 用 作 疏 洄 牧 Z 比 今 馬 本 本 作 注 牧 牧 疏 馬 馬 作 定 牡 口 本 餘 見 作 本 古 牡

皆白 耳。 祺 順 驔 雅 無 尾 驔 之純 亦 釋 傳 贉 騏 無 驪 III 作 云 1稍異 文, 駉 也 黑 騏。 驔 要之,毛 赤 一骹 駠二名, 馬 疏 》篇 馬 黄、説文》云 黄 、深黑, 《説 而 而 以 然 則 脊也。」 所 交切 賴 不 爲 傳 に與《 文》云「青驪,文如 説 亦 先 甚 傳 骭 云 駠之赤 脛 馬 見《爾 於許 爾 相 以 也 一所 毛 名, 遠。 雅》之贈 明, 言 白 驓 赤 凡十 豪 當 雅 身黑鬛 音增。 驪、 物 惟 色。 長 ×, 以 骭 色 黄 黄、騂 有 但 傳 古 釋 ^ 物 與 騏 互. 案 六, 未 爲 與 説 畜 異。 色 雒 博綦」。 切。 赤 **※**云: 則 解 正 文》 其 相 《説 駠 矣。 馬 其 傳 脚 其騂 七《 類
 Z
 黑 云 毛 脛 四 文》 又 伍. 毛 及 倉 也 骹

> 黑色, 此 又《 黑色 之駰 彼 戎》之騏、《東山》之皇、《 傳 傳 馬 四 黄 名 有 云 ൬ 驖 倉 綦, ...傳。 騏 騏 兩 **>** 騏 傳 文 名 駱 馬 皇、 以 青 與 名 駰 驪 ? 駱、駰 而 騏 此 訓 微 駠 傳 又 驖 亦 黑 云 七 案 作 也 傳 者 驖 四 倉 綦文 與 + 别 牡》之駱、《 則 驪 騏 六 見 駠 皆 __ 他 馬 此 傳 黑 同 詩 彼 中 疏 義 義 謂 疏 0 《皇華 亦 惟 其 亦 騏 謂 騏 同 驪 小 同 是 青 則

弓」當 色 有 也也 幸其 騂 惟 作 ,本作驊,从 《駉 尾 觲 當 騂 篇 作鮮。 牡 一、騂 有 馬 騂 黑 觲 當 騂 息 營切。 此 剛 義 皆 當 省 作 騂 騂 馬 又 角 赤

《駉》四章,分配良、戎、田、駑四馬,本

^{■「}與」,原作「云」,據康熙抄本、大全本、《四庫全書》本

繹 故 故 故 毛 云 繹, 言善 云 傳 云 彭彭 之説 袪 伾 伾 袪 言 言 言 走 而 有 有 也 孔 强 力 力 氏 健 也 有 申 駑 也。」 之云 容 馬 也 田 給 義 馬 雜 允 齊足尚 戎 役 馬 良 矣。 貴 齊 馬 其 疾 力 以 後 肥 ,故云 尚 朝 儒 壯 强 祀 説

歸

」,是執鷺

羽

以

歸

家乎

暢。 習其 故 斯 良馬 才。 云 斯 動 惟 以 止 作 臧言其 斯 朝 立之節 作 祀 駑 (德,才 與 馬 故 徂 毛 給 云 則 異 雜 言 斯 足以 耳,毛訓 役,故 臧。 其 用 行 戎 也 而 云 馬 作 已。」於 斯 爲 尚 田 徂 始, 强, 馬 尚 義 作 故云 謂 疾, 者 同 更

詩

罕

用

其

説,

惟

宋

張

文

潛

衍

其

意

云

有 駜

於古始也

也 一,指 鷺 鷺 鳥言 于 下一、「 以 興 鷺 潔白 于 飛 之士 猶 也 云 , , 載 周 飛 頌 載 下 振

> 鼘 鷺 而 于下 醉言舞 取 義 于 亦 一,故 飛 同 爲 作 舞 今以 是 者 解 之容 鷺 耳。 爲 鷺 特 然 羽 見 則 次 下 舞 章 文 者 所 鼓 醉 執 鼘

之舞, 者也 刺。 防 歡 《賓之 其 也 0 過 以 鼓 屢 初 盡 也 鼘 舞 醉 筵 歡 僊 鼘 故 而 **>** 而 一,醉言 僊」、「屢 所 越 次 能 謂 於 章 不 禮,此 即 越 舞 既 禮 舞 繼 醉 之云「 傞傞 , 斯 之舞, 魯 而 出 善 頌 <u>_</u>, 已, 醉 以 以 並受其 小 言 然 醉 爲 雅 歸 詩 美。 而 盡 以 人 福 IF. 己 其 彼 爲

泮 水

淮 因 當之, 人 成事耳 洋水 孔 × 疏 0 申 伐 閟 其 准 宫 意 夷 兩 謂 鄭 詩 淮 譜 夷 述 》以 僖 近 公 + 武 霸 功, 年 者 獨 會 皆

又以 震 祝 作 室 鉊 後 陰之役,皆借晉力也, 子之常 亦伐 帥 史 因 霸 世,季武 魯 頌 有 年 賤 文 舊 願 豈 攘 伐 之 功馬 者 戎 戎 淮 年 會鹹,十 師 脱 史 立徒祝 除 之,應 情 難 脱 難 會淮 少 夸 夷 漏 詞, 四 一,故 が、故 秋秋 耳。 大 之 漏之故。 願 裔 子 或 正 殆 其 哉 諸 爲 心在十 亦 祖 以 四 不 + 實 不 成 證 詞 戎 侯 謂 書。 年 年 史克 所 有 然。 掠掠 也。 二年鞍之戰、襄 戍 難 淮 得 城 齊 七 其 7、故諸 (周, 詎 夷 戎 其 年 八事,會 之故智 於齊之兵, 緣陵、皆爲 伐 人之美, 僖公時 而季文子立武宫 而 病 -之末, 説 北 狄 會 鄫。 是 或 戎 非 侯 鹹 盟 然。 也 膺」,疏 戊戌周。 齊、 膺戎之事乎 魯 之舉 歸 魯實 經 征 功 淮 使 傳 伐, 晉 然 十八 朱 作 ?於君, 從 夷 無 人助之, 相 + 源 亦以 子 林 亦 魯 病 文者 役 謂 以 年 繼 以 六 因 悉 鐘 杞。 爲 平 + 與 爲 示 臣 ? 年 Ŧ 斯 丽 Щ

> 名,近 雩故 僖 矣。 記 西 於學,反以 馘 爲學名,見《王 名 今隸兖州 頖,云本又作泮, 禮器》皆作 水 南 公築官 名雩, 信 「獻 耳 戴垣據《 頖 世 西流至 0 有 楊 泮 囚」等 府 然 水 於 訊 俱 用 洋 因 矣。 類,《 完 修 泮 字 起 通 馘告」之制 制 語,又與《禮 於後 州 水 深 水 典》 詩 而 × < 類、泮 但 魯 上, 異 府 信 一名雩水, 魯 「頌》作 而 水 形 # 之, 城 明堂位 大 郡 得 以 ***** 信 東入 然 殆 名,反 名 泮 泗 合, 王 泮。 實 好 泮 官 水 \sim 制 字矣。 則爲 泗 事 源 非 宫 故 縣 * · « 而《魯 《詩 執 者 水, 出 也 有 名 出 泮 學名無 水 取 曲 明 泮 泮 見《一 征 類官. 宫 釋 名 阜 頌 堂 經 泗 水, 一,受 以 語 以 縣 水 非 \times 文 位 之 作 亂 舞 統 縣 謂 疑 成 獻 以 治 學

^{●「}武」,嘉慶本同,康熙抄本、大全本、《四庫全書》本作

西來, 陋也。 《通典》之泮水,發源曲阜而 《左傳》之泮水,在 又在 二詩 濟自 京君和,成何文義哉 古,定有據而言之。 後人好爲異説,適見其 天子諸侯學名,有圜水、半水之異,漢儒 殭合二水爲一,疏矣。 魯境,安得經流晉、衞間? 矣,北直之邢臺,與山東之曲 夷儀,衞地,今順德府邢臺縣也。 五年《左傳》: 詩 縣 泮 説 「壁」爲 濟泮始至夷儀,則泮水又在 宋胡仁 西 語 何 百二十里,晉都今太原府,平公自 其 君,「 感 證 一仲欲 晉 此 也 雕」爲 詩 晉 侯濟自泮, 解《靈臺》、《文王有 泮水 用修 衞間 和,夫於樂君 總之,壁廳、頖宫爲 ,則益誤。 又引《左傳》「晉侯 用修引此證彼, 入泗,始終不出 阜,相去甚 與 會於夷 魯無 夷儀 夷 襄二十 涉, 和 故城 (儀。」 遠 鎬 近 而 西

旆、夜,疏云古今字,則此詩「夜夜」,即

字誤作筏,辯見《附録》。 正 詩皆訓飛揚 有法度也。J語 旆 出車》之「旆旆」 미 旆, 得市童憐耳,豈詩 旒 垂貌 貌 ,與毛正 殊 而義合。 矣。 泮水》傳云: 相 人所樂 毛公《出 反。 今用 夫旂 觀 李氏 車。 哉 茷 ? 幟 傳 八説,兩 茂,言 飛 又夜 云:

《詩》,全用吳棫《韻補 徐。 从寅戼之戼,蓴菜 朱子弗從,未 説文》云力久 《集傳》叶謨九反,不知何本。 **菲」、《釋文》云:** 審其 切、《玉 故。 也 , 》,此字吴亦力九切, 一篇》云 又毛晃謂 「音戼, 音「 柳」者,音申酉 閶 西 音「戼」者 徐音桺。」 切, 朱子叶 皆 同

以 蓴菜」是已,陸《疏》亦以爲蓴, 鳧葵也。 爲 朝事豆實,毛傳《詩 **菲**,今之蓴菜 釋文》引鄭 也。 《周 小 》、鄭注《周 同云「江 禮 醢 又云 人》供: 南 禮 或謂之 》皆云 、謂之 戼。

之酉,蒲菲也。

此殆臆説。

辯 爲 豬 稚 列 名 水 荐 於下 其 車 蓴 葵 純 以菲、蓴爲二草 **菲**,鳧葵」, 非 蘇蘇 又 葉 者 如 諱 當矣。 品 稍 恭 譌 成 箸 純 從 爲 舒 病 爲 葉 柔 瑰蓴,爲 露 之。 亦 名 如 滑 見《爾 又《後 而 葵 作 絲 荇 可 云 即即 荈 宋 尊, -, 亦 雅翼》。 羹 面 馬 漢 龜 此 買 至 魚 顔 誤 某 菜矣。 . 蓴 秋 葉 /修《明 華、實 氏 但 馬 春 老名葵蓴, 阛 家 顔之推 夏 不 融 似 訓 娅娅 口 陶 傳 育 亦 萬 > 莖 與 氏 謂 本 如 注 未 鱔 以 蔡 引《 草 荇 别 名 或 葉 豬 鼈 朗 録 廣 水 始 作 名 莖 重 父 同

收 如 此 通 屈 手 詩 力。 傳 説 以 治 順 案,《 意 譜 也 彼 則 淈 應 長 釋詁》 疏 同 醜 屈 道 引《 此 二字音 爲 屈 釋 屈 衆, mi 此 詁 疏 收 羣 指 義 醜 皆 不 魯 淈 同 訓 -, 之 國 然 治 聚 傳 引 人 毛 云: 某 民 則 義 箋 氏 義 長 如鄭 注 云 得 矣。 屈 引 相

> 是從 則 純 陳 説 屈 注 服 云 則 收 毛 淮 淈 爾 也 不 夷 醜 , 雅》於「 之事 從 (書))敘 爲 收斂得此衆聚。」義 鄭。 悪 屈 前 指 作 又《 收 四 汩 淮 釋 章 夷 音同 引 未 文》 此 及 此 引《韓 詩 此 詩 m 亦同 意 後 於「淈 不 也 四 詩》云: 引 毛 章 此詩 治 郭 方 景 侈

閟 宫

宇, 宇與 宇。」 竊 以 章「復周公之宇」,正 字」字相應,三章啟宇 宇 意 雖 常常 朱 爲 蓋 愚 悶 取 子之謂 屋 許、 者 宫 經第 宇 亦 保 而 敘 知 魯 此 譏 七章 云 之矣。 文 説 其 連, 者 謬 語 與 蔽 頌 則 與 朱 三章 殆 何 宇 侯 僖 子 因 陃 全 魯文連, 公 73 爲 「大啟 己 視 詩 能 土 以 古 謂 之 宇 復 修 人 敘 義 爾 周 廟 至 詩 而 七 也 宇二 公之 章 爲 此 者 非 作 屋 復

公之字乎? 紋 國宫 别 旨 閟 者之意 , 官》備言僖 遂 泮 謂 與《泮 水 敘 果 美主 源謂《泮水》、《閟宫》 意 同《 水 亦 頌 公能 集 然, 修 敘 傳 泮 興 當 宫 例 復 指 則 祖 矣, 宫 當 故 業, 廟 云 每 何 爲 章 故 變 兩 頌 宇 追 皆 文 詩 僖 耳 本 爲 取 公 所 詩 通 爲 宫 修 篇 因 羣 新 修 公 惟 不 廟 獨 之 廟 祭 爲 祀 廟 廟 而 是 作 9 理

泮。

義

各

周

能

修

夫

使

詩

本

作 先德 新 也 復 錫 遠 ",固 亦亦 廟、 祖 眉 之 業之一 以 壽 事 閟 無 及其身,又歷舉其 疏 宫 由 内 民 矣,又移己之誤 爲 樂 見 端 而 赴 新 室家之睦 也 事 功 廟 之即 至 因 且 斷 寢、 卒章 爲 全 外 廟 承 閟 詩 於 誉 祀 並 面 宫 專 敘 舉,不 建 臣 即 爲 也 之事 戎、拓 而 下 修 之宜 大 閟 朱 ·專言 八譏之, 子 官 則 + 合 而 服 天 廟 興

公廟 家 所 見 毛 鄭以 以 既 閟 殊, 閟 宫爲 官、 後 儒 新 姜 復 廟 (嫄 皆 出 廟 姜 新 而 嫄 説 在 廟 周 大 m 約 新 在 皆 廟 魯 合 爲 閟 関 兩

佪

以

服古人之心乎

復周 咏姜 蒙、 然 語 詩 不 以 相 故 后 也。 之意 認 應者 凡 專 帝 康成之説 鳧繹、常許 / 嫄 公、伯禽之舊 宫爲姜 后稷、周公、皇 以 在 (),俱 在廣述僖公恢 之 修廟 新 何 後 發 廟 與 非 儒 嫄 ,實肇其端 端 爲 矣,不 也 於 也 舍此 諸 作 廟 而 耳 廟 廟 猶 則 特 章 詩 廟 中 故 詩 細 祭 應首 甚 本旨 口 而 舉 所 則 以 祖 事 意 推 而 誤 通 求 敘 闢 述 泛 爲 新 不 詩 亦 章 固 外 諸 用 疆 指 頌 廟 至 在 義、惟 與 加 祭 及 如 獨 末 首 「復周 土 羣 僖 爲 修 謂 閟宫 閟 於 之? 言 章 公 尾 公之 廟 修舉 関 宫宫 廟 新 廟 徒、 廟 ,失之遠矣, 傳 寢 也 公 公之字」一 無 廟 也,特借 得之。 矣,「皇皇 新 廟,詩 誤 制 公 誤 涉 廟 即 廟 夫 三也 度,以 事 車 並 閟 誤 首 以 也 言 宫 意 爲 傳 廟 尾 龜

ĮΨ 七

功。 落 首章追泝后稷,次章敘周之興,皆未及魯。 者,詩章之長,亦未有 以 功」以上言克商之事,「王曰 足之, 斯亦 mi 四章各 嫌其多寡 廣,七章言其福禄之厚,末章言其興作之 四 三章 十八句者,然細案其分章之法,甚有倫次。 命魯公」,承上四 魯之事,意本兩 .章言僖公征伐之威,五、六章言其土境之 下,與上文皆言祭祀,語 所分第 ,欲於「籩 蓋以類分章, 始言魯公受封,因及僖公祭祀 詩 十七 篇之長,未 四 相 「縣,彊 武 章 句 豆 大房」下增 止十六句,則直指爲經文脱 爲率,分二、三兩章爲三章, 斷之甚矣。 截,宜 句,皆言封 欲取 不計 有 如《閟宫》之百二十句 :如《閟宫》第三章之三 分 而均之,遂據首章、 句之多寡 也 「鐘鼓 氣 又經文「克咸 而 叔父」以下言封 魯、「秋 相接,宜合而 反 合之。 喤 也。 喤 而載嘗 之勤 語 朱子 乃乃 厥 以

反分之。章法未能盡均,而章意先受割

裂矣。

則 其 逕 注 出 本作郊,山名,亦水名。 都皆在岐之陽,相 言文王,則岐陽乃 》引《淮南子》及《漢書音義》皆同。 陽 周 石 岐 陽乃周原 故 城 橋 居岐之陽」一 南。 Щ 日 ,東南流,合漆水,又合杜水,《水經 岐 周 陽 原 也。 於山 去 程邑也,《閟 語 太王遷周,文王宅程,兩 白 一爲南 而 里 岐 兩 而 ,於水爲 見《詩》、《皇矣》 水亦名大樂水, 近 逕 矣。 岐 宮》言太 山,而 案,岐 北 皆 又詘 E 居 字

斷 當作前。 也 。」《甘棠》傳 實 始 《説文》云: 翦 商」與《甘棠》「勿翦」,翦字 以 翦爲去、《閟宫》傳以 剪, 羽生也。 前,齊 翦 皆

●「增」,原作「如」,嘉慶本同,據康熙抄本、大全本、《四章全書》本改。

爲齊, 从 俱 説文》又 止 無當。《韻會》揃 在 又案,翦 笺 舟 以 有揃字 Ŀ, 翦 今 W 爲 改 羽 ·, 云 斷, 前前 歬 字注引《閟宫》詩,殆不 俱 城城 爲 从 公當 前 也, 刀 前 皆 而 義 與 又 諧 二詩之「翦 非 加 蕸 刀 爲 義 剪, 矣。 歬

是

之説 卷,與 注 有 注 止 爲致天之誅, 之,與今本《爾雅 不 者 順 犍 存 五經 十餘 郭 爲 八光注 則仲 郭 致天之届」, 笺云: 文學、 氏 注 Œ 家,其 家, 達 俱 六 義》 所 、卷、孫 載《藝文》目。 文 劉 見注 義 故 所引又有 存 歆 届, 雖 届 始 無 、樊光、李 於 炎注六卷,沈 本 不 字 哑。 明 由 唐 今釋 同, 尚 快 證 初者 多, 某 而 其 矣。 然 爲 陸 疏 氏、 異 必 巡 届 至 有 ^ 引《釋 德 同 不 爾 謝氏、顧 極 李 孫 明 會 誤 殛 | 之訓 雅 集注 巡 炎 郭 也。 句 言》 敘録 之外 注 五 注 法 家 氏 今 釋 證 實

> 必 有 據矣。

爲旂 祭, 則此 以常 E! 語, 下文云「六轡耳耳,春 之章」,則又過矣。」嚴 廟 魯郊之不建常 證 諸侯 猶 「承祀」 魯君 「《司常》言 龍 不敢全僭 旂 舊 建之。 祀帝 承 説 即 祀 以 春秋 當 日 此 仍 也。 魯 疏 享祀,明 月 建 爲 雖 無明 華谷 申 秋 爲 ^ 日 郊 明 僭 箋 常, 匪 月之章, 祀 郊 文 堂 意 信 解 者 禮,而 一位》乃 Ŧ 可 是 其 享 謬。 引 一建之。 據 廟 説 也 祭 祀 此 明 以 日 宋 不 然 龍 而 族, 堂 日日 交龍 曹 心 非 此 旂 位 不 氏 定 經 月 郊

加

羽

爲翦,皆隸變之譌

一反。 韻 詩 故 傳》欲與下「宜」、「多」 本同,不必 移、移、移、烙等字皆以 率宗吴棫《 享以 然古「多」字與 **牲犧」,犧** 轉 韻 **養音** 補 字止 以 兩叶 「祇」字通 案,《 就 多 多也 故 有 得聲 韻 許 有虚 補 宜 用 淡 ,多之與犧 《集傳 ()音相 宜、虚 反,《 「多」於 同 集 叶 何

亦不全用 四 支 《何反』,此亦可叶多,朱子不 不不 收 其説 犧 矣。 於 五 又下 歌 文「犠 朱 子 果 尊」、《釋文》 用 於 而 自 創立一 信 蓋

音,斯自信之太過

也

職注 是。 毛 傳 横大木於牛 爲 注 傳、蓋自 ,以爲楅衡其 福 一,鄭 案、《説 《禮 夏 於角, m 司農、杜子春皆以爲設於角,康成 覺前 楅 雖 文》衡 角 破 衡 衡 耳,與 八角。 説 鄭、 設 之短矣。 於鼻。 字 康 杜之義,後箋《詩》仍 孔疏 成 鼻 从 角 無 (周禮 兩存之,不辯 及箋《詩》則 洮 从 也 大,行聲,本 . 封 況《封 人》 其 從 注 從 取 孰 毛 以

爲 謂 白 於 百 井 經 每 爲 者 里之國提封 + 閟宫》詩 也。 成 # 每 出 馬 車 成 融 「公車千乘」,此 出 萬井,適合千乘之數,若百 乘,説各 注 車 | 論 乘。 語 》引《司 不同。 包咸 大國 注《論 宋李 馬 之賦 法》, ·樗以 語 謂 見

> 弓矢、 堪? 而 八十 可 見也。 開 馬十二牛、甲士 井 昧於論世,徒執《孟子》、《王 故其《論語》注言「顓 宫》,與箋、 方百里之制不合,故取 《周禮 王制》一篇,乃漢文時 明堂位》之説,朱子不盡 取《司 過信 方 家耳,使之出 (計之,爲方三百 乘 先王 五兵、 ·職方》爲誣,不知孟子 哉? 朱《 馬》,良有見矣。 必 一之世,不應有 疏意 + 傳》用《司 旌旗 必 萬 步 如 同 井 之屬, 卒等共百 兵 包 mi 亦 臾 車 氏 出 知 包説 馬 十六里有 説 在 博士、諸 千 此 無 魯 法》之説 則 魯地 乘、 以 乘 重 ___ 地 ,然此乃拘方之 人,以 制 爲 賦。 不 輜 + 止 不 + 非 七 具, 生 之語 僅 奇,與 車 井 聞 萬 朱 百里 也 以 及甲 所 之 百 其畧,而 井 民 子 乘、 釋 田 作 里 之 豈 中一, (大國 舍 後 而 <u>~</u> 胄、 了, 止 地 句 能 四 豈 儒 閟 斥

《詩》言「二矛」者二,而康成解之不同。

氏

以爲

用

夷矛

與與

此

自

相戾矣。

要之,此

詩

矛

與

「重

弓」文

連

無

異

弓

當

亦

無

里

又謂

步

卒

無夷矛,前驅非

步

卒,當有

夷

矛。

夫《伯兮》詩爲伐鄭而

作,亦攻國之兵,而

孔

具五

兵,五兵者,戈、殳、戟、酋

矛、夷矛

也

建之異同,六建數夷矛,不數軫。

謂前

驅車上當

戟,六酋矛,不數夷矛。

而

彼疏論六等、

六

IE

合。

六等者,一軫,二戈,三人,四殳,

五

「二矛重弓,備折壞也。」疏 「二矛,酋矛、夷矛 也。」《 申 悶 其 矛,鄭總以 「備折 壞」釋之,最爲

允當

意,以

爲酋矛長有四尺,夷矛三尋,

是

酋

短

宫》笺云:

清人》箋

云

於夷

也

《清

人》禦狄,守國之兵,守國

一兵欲

弓而

重之,亦

一矛

而

有

二,俱備

折壞,二矛

攻國之兵,攻國

兵欲

短,當止用酋矛,故

長,當兼用

夷

矛。

《閟宫》膺戎狄,懲荆舒

當是二首矛。

斯言甚詳辯,然《衞

風

伯伯

兮》箋引《攷工記》兵車六等爲説,與此箋意

時 經? 加 因 也。 方有三軍 公時三卿專權,分三 不書舍? 故知僖公無三軍矣。其説良是。 昭七年復書「舍中 舉大數必就其近者,三軍三萬七千五百人, 嚴《緝》載 碩》則又以爲二軍。 一年《春秋》書「作三軍」,明前 云四萬,頌主誇美,不應減退其數。又襄十 前 書作,是《春秋》乃曲 即 軍,竟三分之可 此 使僖公有三軍,文以 然 且孔 公徒三萬」,鄭以三軍 止二軍,不 也 李氏 也。 疏言魯二軍 東遷之後,諸 語,謂伯 噫,謬矣! 便 耳 軍」,則 孔疏 軍爲己之賦 馬 於三分故也。 丁,原 禽以 筆,非信史,何名 用作乎? 後無之,《春秋》何 取其二軍之説,謂 其作、 侯 不 三家作三軍, 來 釋之,其《荅臨 言 彊 此無 Ė 者 周 耳,非此 有 其 公、伯 弱, 三軍也 舍皆 若 設本 軍 不 弱 事 者 爲 作 有 正 時 書

四七五

十四四 襄十四 軍,見 十八 宜公爵 宣 彊 軍 慮 居 公受王命 而獻公作二軍 軍者 政 弱 一叔言 ,豈獨軍 釋之耳,要 年。 年。 非 將 小, 年。 成十六年杜注。 景 復 及子。 也 補 又作 尟 平 則 以避 公作六軍,成三年。 西 於晉 矣。 豈 ,而《春 邱之會,子産争承以 ,本以一 春 制 京之舊 有 五 秋 非 霸 哉 宋之會,季孫 不得 常常 ,见閔元年。文公作三軍,見僖二 魯之弱已久,事 軍 時 其 國 ·, 三十 秋 哉 除 實 重 止存四 軍爲晉侯也,見莊十六年。 》或書侯,或書伯。 爲 齊、晉、 ? 頌主誇 世 衞 賦,故魯作 次 又當 年。 國。 晉 「、楚 [軍,悼公舍新軍, 1美,故 皆 厲公罷新 襄公舍二軍 願 時 杞,二王之後 侯 霸 鄭 諸 事 視邾、滕。 三軍 爵 國 爲 鄭 非 侯 外 伯 也 多 姑 伯 一,叔 男。 樂 上下 以三 晉武 禽 能 而 文文 之 自 孫 臧 具 昭 襄

「公徒三萬」,朱《傳》曰: 「三軍爲車

芑》疏 百人,共三萬七千五百人。 百乘,其爲步卒則三萬六千人。 戈者耳,可備伍 之爲軍矣。 二萬七千人。」此 = 乘甲士三人,步卒七十二人,三 家子、固守、衣裝、 白 亦以三千車爲十八軍 七十五 夫此二十五人皆老弱,不任 乘,三萬 兩卒旅師之列乎? 以 厮養、樵汲二十五 每 七千 孔 乘百人計之也 疏説三軍之數謂 五 百人, 軍當 併 其爲 甲 此 士 用 人 案,一 一,併 車 悉 步 故 Ŧ ~ 采 五. 荷 數 炊 卒 Ŧi.

盟 係 諸 ,率從爲從中國。 魯也。 淮 夷 來同,莫不率從」,鄭 良爲 有 見, 蓋僖公非 而 後 儒 莫 E 以 用 非 來 霸 同 故 爲 不 同

以 郭 亦 鳧 爲 景 名 在 名。 鳧、繹 鄒 縣 純 謂 東 Ш ^ , ~ 南 此 禹 二山 Ш 禹 五. 「貢》作 純 十里。 貢 一,俱 石 >積構 在 「嶧」,尊其名 嶧 |今究: 繹 陽 連 在 孤 州 縣 屬 桐 府 南 如 即 鄒 也 繹 + 此 縣 絲 魯 然 山 Ŧi. 東 故 頌 也。 里, 南

之嶧 讐 邳。 理記》 地。 作 章 詞 殆 或 以 府 乎 以以 純 誇 爲 海繹 殺 ,鳧、繹二山 邳 (),魯君 其 ? 詞 陽爲 辉 陽 州 是溢美之談 釋《 夏書》 云 蓋 日 上 非 取 禹 葛 ~ 章 魯 臣 其 此 云、嶧 貢 嶧 説 東 欲 擊欜聲 詩 日 大 義 不 8 奄 吞 海 及《 Щ 文》云: 也 在 失 孔 有 邾 陽 下 禹 龜、蒙,下 魯境内、《詩》 於 仲 邳 久 聞 孤 又 貢 曰 考 矣 於邾, 達、 有 縣 桐 居 》之嶧。 矣。 作 西 葛 葛 蔡 道其 有葛 嶧 ·章常、 皆誤 峄 地密 頌 仲 案 山 者 山 默 實 嶧 日 鄒 邇 以《 漢 其 在 在 俱 許 Щ 也 情 保 縣 東 書 今淮 而 1,惟 引 一,古文 禹 本 世 有 本 海 見 . 貢 此 魯 於 相 邾 漢 地 安

爲 以 西 薛 爲 腦 之旁 常 居常與許」, 獨 南 言 邑 腦 南、 許 而 引《 西 西 傳 腦 1,毛必 春 云 秋 傳 》莊 意 有 或 常、許 本 三十 爾 也 矣 0 年「築臺 魯 疏 鄭 申 南 以 之, 鄙 常

之鄭 亦載其 於其 於薛 爲 常 信 魯北 應 奚 未 桓 僖 是 在 矣,常地之歸 桓 元年 仲 公即 公親 奚 邑, 舉 齊 鄭 必 也 境 邪 或 以 所 有 仲 舊 然 及 事,「常」 又以 鄭 ? 頌 諸 侵 或 中 位 封 也 假許 與 田田 桓 僖。 地 旁 ? 侯,反其 也 八傳 公本 經 許 在 田一孔 作 築 文 傳 與 明是 當當 蓋 爲 堂」。 桓 排 南 臺 又 春 本 無 以 魯 許 公 鄙 齊 在 於 薛 秋 侵地 疏 於《管 之 明 易 異 田 <u>-</u> 十 薛 俱 在 莊 此 時 又不 文 薛 祊 號 地 引 魯北 公 薛 桓 ,故歸 左 耳 魯 此 邑 孟 而 時 子 亦 公始 七 傳》 ·,豈僖: 尚 詩 相 地 嘗 何 名 不 **%** 臆 年 存 符 常 蓋 隱 浩 君 也 魯常、 偶 説 齊 八 今案 據 圖 哉 爲 在 魯 此 也。 公 同 年 以 箋 僖 齊 霸 孟 安得 久 爲 鄭 説 復 耳 證 侵,定 潛 公時 時 嘗 説 E 管 以 易 亦 或 至 薛 《國 耳。 之薛 事 許 築臺 稱 不 謂 常 旁 仲 祊 許 也 田 語 是 自 此 常 有 不 勸 \blacksquare

四七七

言。 妻,壽考之母」,則下 其 (母,宜 令、壽、宜 令妻 其 壽 大夫 日 本 宜 庶 大 例,朱《傳》曰「令善之 句 1 夫 文義 也, 庶 皆承「魯 士 難 通 謂 矣, 善 侯 可云大 其 燕 喜 妻

夫庶士,是令妻

高壽

母

宜

之邪?

言 頌 體 旨 事 考父得 一手。 會之,言《閟宫》篇 [奚斯 之同 既 故故 寢 新 雄 即 殊 言 言 朱子 閟 廟 廟 之,非考父作,奚斯 也 晞考父,止謂 吁, 官》與 爲 新 亦 體 中 廟,是 謬矣 一,不當兼言修寢 裁 謬 謂文義 之寢,尤爲 要之,《 也。 亦 ^ 殷 寝 别 1 全做《 武 又《閟宫》 略 , 廟 商 二詩 何嘗 兩 》末 俱 同。胡 頌》 謬妄。 人 修。 殷 除 章, 皆 相 傳 但 武》 末 作 似 自 作 皆言 輔 末 耳。 彼 章 乎? 周 頌 廣 而 桂 廟 章 特 非 而 太 作 ·
先言 誉 從 獨 陳 欲 師 不 嘗 謂 揚 作 箭 櫟 而 如 思 閟 路 作 之 乃 文 雄 出 附 тí 詞

> 寢 此 寢 古 哉哉 詩 比 人 之寢 於 廟 小 制 果 寢,故 , 前 在 廟 廟 天 後 中,是 子 寢 之廟 廟 乃 比 亦 小 於 有 寢 路 小 耳,何云 寢 廟 Ŧī. 後 路 之 若

賢,尚. 其 中 君 是中 立。 諸 文公、鄭武公、秦仲及襄公、齊桓公、魯僖 其餘令德之君,俱不能每 否,天下有 失德之事, 頌》 失 興 也 儒 (英辟, 則。 其説似之,而 材以上之人,過惡誠有之,要不失 皆論 ^ 詞 有誤信流言、 魯 古來人主除二帝、三王 多 頌 列 其故,大約 溢 而 霸主 》領 學者疑之。 國 一美,故 美刺 諸侯 僖公之賢, 則能 並 未 爲詩 任 佩玉 載 自 盡 季 以 於《詩 固 宋趙 然 人所 僖 友 晏 事 也。 而《 無 特 則 鳴之失, 盡 氏、 》、《國 霸主 美者,衞 賢 中 春 善。 數大聖人外, 源 材 黄 秋 任 謂 則 庸 成、 氏、 語 仲 僖 多 不 武公、 主, 宣 康 爲 李 亦 公 能 遂 書 紀 腎 自 自 其 則 氏 而

不書, 然乎? 旁、欲 案,魯 得 公,凡 泮宫,復周公之宇,乃 言足用愛民, 爲 事見《左傳》閔元年。 垂 用,無赫 魯復晏然。 以示貶,齊 春 因《春 君者 戒 治 後 ,轉危爲安, 在國 影前。 無 乘釁襲取 遭 七 世 不不 赫 但 秋 君 由 慶父之亂,禍難 史,又 所行者,不 更録《魯 可 害其 取 桓 意其)所 其 紀 霸業雖 務 衞 ൬ 八見《春 譏,併 之功。 八爲 微 農 筆之於經。 不 綏 撫 或 鄭 賢 重 미 輯 仲 和 頌 勢 侯。 隆 秋》者,衞 一穀,君 疑《 盡 其 定 臣 万岌 過 孫 武 而《 頌 削。 應 民,交好鄰國,易亂 《岌矣。 湫 而 修 實 相 與 頌 僖 美 多術。 言 春秋》之法,常 内多慙 舉 事 臣 尋,齊人睥睨 》語之失實 秦 公亦 之詞 其失德之 夫子 舊 也 有 之 文滅 禽 章, 不不 及 道 猶 兩 父 ^ 既書之以 德。 僖 幾 以 以以 詩 那 君 是 賢 勤 補 公立, 不 爾 彰 乎? 要此 政 而 及 敘 事 祀 事 節 修 能 所 其 安 名 在

之矣。 義 酈 無伯 僖之美 爲不賢之大, 而 爲怠慢,故譏之耳。 僖 秋》之未及, 春秋 也; ,禦侮之勇 書,非謂郊始於此 亦 非 而 》書郊始於僖者,以 從楚,此社稷之故,未 雄 亦 納玉 才,欲保境自 稍 殆 一談矣。 於王 見《春秋 也 不 無 求釋 取 常 微 若 夫 也。 須 》經 旨 郊 安,勢 衞 旬 黄氏 其既 敗 焉 不 傳 侯,親 反 書 邾 不不 可 其 一, 因 須 又 謂 成牲 於 深 君,存亡之 結 偃 僖 魯 親之仁也。 僅《頌》 罪 ト之非 一、後 始僭 敗 援 本 也。 大 羸 莒於 1 郊 國 國 有 禮 日 至

商頌那之

那

我鞉鼓」,傳云「殷置鼓」,改《明尚

置

同。 宜 縢》「植璧」注,故疏引之,以證此二字之異 者,爲楹貫而樹之」。 位》「楹 楹 同 矣。 也 然則此詩 鼓」爲「置鼓」, 《釋文》云: 鄭 通 「置」字,毛、鄭 其意,讀置 蓋植 以 「置,毛如字,鄭作 就經文,明是釋 爲 即古置字,見《金 植 義本同,音 ,云「植鞉 亦 鼓 置

下之分,鄭解較明劃矣。 格,訓升,而皆以爲奏樂。大者,大樂也, 格,訓升,而皆以爲奏樂。大者,大樂也; 格,訓升,而皆以爲奏樂。大者,大樂也; 植

,時職反,又音值。」恐非是。

之,皆云: 來格也。」皆改「心」爲「以」,而於「成之」下 得成之,謂 '一「人」字。朱《傳》又謂: 綏我 思 神明來格也。」吕《記》、朱《傳》 「安我以 成」,箋云: 所 思 而 「安我心所思 成之人,謂 「箋有脱漏, 神 引 明 而

> 知箋不 謂神明來格也。」並不疑箋有脱漏。 者,惟思神耳。 今正之。」 煩增改。 緝》引箋仍用原文,已窺破此意。 誤,特欲 蓋指 疏 申 箋 故知安我心所思而 此二字矣。 裁剪其言以就己説 云 「於 然箋 祭之時,心 語 得成之, 自 朱子亦 耳。 通 所思 ~, 不

時前人所作也,意雖順而戾於古。焉。嚴獨以「有作」爲作樂,謂此樂乃古昔聖王之傳恭,猶不敢專」立解,朱、呂亦遵用聖正之傳去,猶不敢專」立解,朱、呂亦遵用

烈祖

宗也。 宗也 商 頌》之於二宗 ^ ,「古帝命武湯」、「昔有成 大雅》之稱文、武,必追美太王、王季, 推本祖德以爲子孫光,詩人立言之 亦然。 嗟 嗟 湯」, 烈 祖 皆 頌 頌 中

體、後先一轍矣。

況 此 頌 而言 中 鬷 殿 此 詩 經傳引《詩》,與本文互異者多有,安得 假」者,謂總集大衆 」,見《釋文》。 庸》改 「當此 亦 鬷 而 鬷」字兩見《詩》,《陳風》「 作 假」是也,《 從 一般 「鬷」矣, 彼? 而 無言無争,所 爲「奏」,恐不 可見鬷、總古通 又「百禄 何獨 陳》 指 以《中 箋《商》 以 助祭諸侯及羣 是總」,字 然。《 難 ·庸》爲 用 也。 傳 鬷 邁」、《 皆 左傳》引 朱子 正 訓 亦 乎 總。 作 ? 據 商 皆 臣

又 格 義 至,訓登,見《易》「王假有家」釋文。 王 毛則「鬷假」、「以假」皆訓大,「來假」無 轉 同 也。 肅 爲 述之,訓至,是「來 登即升也,格音 烈祖》篇三「假」字,鄭皆音格, 感 假」字有五 通 之義, 殆 音,其 因 iĿ 假」假 至 有 義 此 音格者訓 而 一義 字,毛、鄭皆音 附 益 耳。 之與? 來與 來 訓 傳, 升, 至 訓

> 云: 格,「神之格 又案,假訓至者,字本 人格」,孔傳 格于上下」、「格于皇天」及「有 「至也。 俱訓 思」、「神保 从彳叚聲,古雅切。」 至矣。 作格,亦 是格」 其 徦 作格, 是 字見《説 苗格 也 徦 通 遠 作

玄鳥

鳥》祖 初 章以後,皆未 同 本,元以毛 轍,或用 東萊於《生民》祖鄭 毛傳 春 義 或否,商、周互異,蓋《公劉》次 經 分 解《生民 郊 刊定之書也。 禖 爲 解 箋 巨 履 迹爲 迹、吞 方知吕《記 説,於《玄 卵, 事

海」,謂武 詩 》所以爲善 IE 域 丁也。 彼 四 頌 也 美中興之功,詞 方」,謂 湯也; 同 肇 於開 域 彼 創 四

武丁孫子」,疏云:「作詩所以稱王

名者 履 爲殷王名矣。 (,而號天乙,則可 王 肅 云 案,殷天子皆以號 一般 推矣,疏之言 質, 以名。二 舉 非 蓋 也 以 觀 湯 武 名 T

藍矣。 德 爲人孫子」,此大勝鄭。 無顯王」,況孫子祀其先王,不應自誇其武 記記 湯爲人子孫」之語 》、朱《傳》皆從之也 蓋 「武丁孫子」,王肅述毛,以 嚴《緝》從其説,且辯之云「武丁之後 解 爲 武丁之孫子,本鄭氏説, 而 爲 之説: 雖因《那》詩 然 為「武 實 青 丁之 而 出 毛 吕 傳 於

矣。 未 又成 孫 丁之孫子有武功,有王德」,曾子 作能 必 然謂 然 況如鄭 湯 行先 武丁孫子,武王靡不勝」,鄭以爲 功業,上文述之已詳,此 也。 武 衵 説 王肅 王 武 則 即 、 德 王 述毛云: 成 前美成 湯,則 道 無 湯,後美孫子,如 不 ·勝任 「武丁 語 文 又複述,亦 固 義 譏之,當 爲人子 庶 不 爲 屬。 一武 得

功德,詩本祀高宗,不應反略之也。曾意,則前後俱美成湯,皆無一語稱揚武丁

之祭, 曉。 乘也。 宗止於 矣,何獨言方祭? 服數爲節,又使分助四方之祭」。 大國,蓋獨舉尊者言之,助祭諸 《集傳》不 龍 何祭也。 吕《記》載朱子之説,謂「助 廟 旅 中, + 乘 著斯 安得 如 鄭 如就 指方社之方, 語 有 以 殆 四 爲二王 此詩 亦自! 方之祭? 悟其 而 後及 侯固 言, 祭者 則 不 (非與? 殊 則 祀 八 知 不 祀 不 典 既 四 止 州 高 名 以 可 方

長 發

《天問》語,斷於「方」字絶 外之大國於是畫其疆境。」則解爲 毛、鄭云: 「禹 敷 下土方,外大國 禹 敷廣 下土, 句。 以 正 是疆」, 案,孔 四 四方 方, 朱子 而 疏 京 屬 師 申 引

屡″咠™从「高效乊上「禹可,丰是。 上句,先儒句讀元如此,不始於朱《傳》也。

嚴《緝》以「禹敷下土」爲句,非是。

案,隕于敏切 始於宋儒,或有然 王 讀以就均訓 權 切 幅 (,而音 隕 既 (河) 始 長」,隕字毛訓 圓本訓 相 王問 遠 矣。 圜,全也,後世讀 切,音本相 《説文長箋》以 均, 鄭 近,故 讀 爲 員 鄭 圓。 爲 爲 改

「玄之又玄」語證之,易讖緯以黄老,相去無夫,故稱玄,韋昭注《國語》,亦以水德爲説,子,故稱玄,韋昭注《國語》,亦以水德爲説,子,故稱玄,韋昭注《國語》,亦以水德爲説,是與,各乘五行之王氣,當有其理,豈可概

據 封契於商爲 受小國是達,受大國是達」,鄭 《中候 小國,舜復益 河紀 》、《致河 其土 命 地 爲 説 爲 故宋 大國 以 爲 一, 此 儒 堯

> 之言雖不可盡 不从,釋爲隨其大小,無所不宜。 玄王,當舉其 河紀》、《攷河命》二緯書 玄王前 受小國,後受大國,孔申箋, 實事,未 信,豈遂無 必漫爲 語足 虚 詞 之言,謂 信 也。 然《詩》 乎 據 書 頌

據乎? 《握 賢,故封之,契七十里,稷百 記 當不止百里。」此仲達揣度之詞 百里耳。 稷、契皆公爵,堯封之當百 • 三代年表》褚少孫云: 然則堯封契止七十里,舜益之,始 里。 里。」褚 「堯知稷、契 也。 舜又益之, 或别有 案、《史

毛、 臆説 後,彼自釋其先代之詩,豈 作是解矣。 韓 韓 詩 也。 外傳 異 湯 師 降不遲」,鄭訓 宋公孫固 》七引此 M 見《晉語》。《詩》疏 解 同,尤見非 詩,皆證 引 此 降 詩 無 以 爲尊賢下士, 亦引之。 謙己下人之義, 家之私説。 所本 美晉公子, 乎? 宋爲 又 商 已 非

釋爲降生,義殊短。

之義; 《詩 漽 訓 m 被」,《易》言「顯 人,無所偏 孔 《易》言久道 運 至 Ŧ 遲遲 子 義 義 前 孔 閒 昭 改之也。 難 無 然安和 假 氏 居 遲 通 聞 黨, 車 遲 遲 化 引 縱 焉。 遲 用 者, 亦 成,此,遲 此 王,王 疆爲之説,終 鄭 後儒 非 源謂 詩, 宏遠 是鄭 比」,此「昭 説 取效旦夕,故《書》言 肅 註 皆以 爲 「昭假」者,光 本以「假」爲至,及箋 悠 以 述 遲」之謂 毛 毛, 裕之義 爲湯之明 爲 義 感 未 取 假」之謂 假 格 寬 恢 也 上帝 暇 字 矣。 昭 道 聖 音 之 德 被 及 意, 光 也 於 則 及 格

雅 取 也 譮 反。 假 借之義 0 源 昭 其以 假字音賈者,至、暇二義俱 謂 假」之假 假 爲毛音格, 了則假不必改音,故《釋文》云古 字 訓 鄭鄭 至 訓 者, 鄭 寛 音暇 賈、 暇 格 孔 者,徐邈之説 謂 一音 口 寛 诵 暇 俱 者, 口 則

此詩「假」字,止讀本音,可括鄭、王兩

家

義

矣。

宋董 純 謂 矣,但 以 之? 著; 輔 後 引 韓 儒 綴 厚, 證 爲下國之表 廣 詩 毛傳 嫌 道以《齊詩》作 因 旒 駿 則 文義本通 恐不可 其 章句不 爲 爽以 國 以 解 取 之説 與「綴旒」義不相當,故争立 時 駿 綴 喻 《齊詩 馬 爲 信。 準章 存, 於 旒 也。 俊,言湯爲 言 喻 旌 爲表章,「 而《 案, 能 綴 程,使下國之性 》已亡,董,宋 「駿駹」, 旗, 鄭氏貪用《公羊傳 乘 旒 齊 宋 至 載 以 詩》 葉 諸 英 駿 旂 而《集傳》取 夢 猶 駿 侯。 俊厚德 厖」二字 得 喻 厖」爲大厚, 有 人,何 云: 爲 自 見 諸 行 者。 以 之君。 異 極其 無 侯 爲 由 之。 傳 口 然 見

● 「格」、原作「洛」、據康熙抄本、大全本、《四庫全書》本、

信,後 説》及子貢《古詩編次》者,或云《古詩編次》乃 所疑,正董所據者耳。 唐人謂之既亡,則書之真 人豐坊僞作。 人復信 宋世《齊詩》當即 董 氏之誤,其 近世有偽造申公《詩 譌 未可 此 如 類。 經學之决 知 董既 也 一。」葉 誤 鄞

字訓須有本,可意爲之乎?朱《傳》訓緩,反其義,徒取與「競」對耳。然絲字《爾雅》無文,《説文》亦訓急,義同毛。「不競不絿」,傳云:「絿,急也。」案,

裂何?

傳有 傳訓 鄭 也。 其義,然古人字訓,不盡與後世 之」、《長發》「何天之龍」是也。 云龍 龍 自, 但 毛傳訓 |傳既 爲 正不必 當作寵 寵,則龍字本有寵 訓 「龍」爲 龍 以 ,今皆從之,不知《夢蕭 爲 後 寵 和者二,《勺》頌 ,而於二頌 人文義 訓 彊 孔疏 無 推 同,毛之師 則易其解 其 我 煩 不能 故 改字 龍 耳。 》毛 詳 受

儒從鄭,不如從毛之當。定是《詩》學相傳如此,必非苟爲異也。

後

之邪? 《傳》云天子指湯,則以天子爲稱目之詞,下 之,故予之,文義連貫,皆言天意如此。 子之。」然則「天子」者,猶云昊天其子之爾 則作《傳 于」,觀《傳》釋「降」爲「賜」,而「予」字無 義之明順矣。 文「降予」無所承,更須補出 下予之以卿士,正謂天之下而予之,惟子 「允也天子」,鄭箋云: **>** 時 已誤。 又「降予」朱《傳》誤作「降 偶然邪? 「信也,天命而 「天」字,不如箋 抑有 意改 訓

殷武

述其祖德也。後儒必欲目武丁,則武丁爲《殷武》第四章,皆言湯事,頌武丁而追

建,故 不 實 於 見瓊本傳。 謂 成 申 則 侯 建 心殷者 (),在 之國, 漢 -之日 中 臆 [易「于」爲「以」,文義又乖 鄭箋指 同 区黄 其 興乎? 創 天 章 於慎賞罰 之解 瓊 福 命 以 而 應 而 則 湯言, 也。 亦 異 湯 其 高 稱 以 矣。 此 云 指。 言湯 於 能 宗 下 此 湯 湯 無 非 七十里 命之, 德 嚴 詩首 詩 所 或 朱《傳》云 誤 言成 $\overline{ }$ 以 Ē 敬 所 如 《詩》咏 也。 所 言 獲 此 僭 下 則 之小 以 E 濫 天 前 湯,其來甚古 民 天之眷 **定** 與 言武 FE 勤 福 成湯之不怠 也 二命之 1,俱 武 首 國 以 也。」襄二十 傳 1 政 下下 因 句「命」 T 命 難 V 使 事,不 繼之,安得 一言 耳 引 以 所 通 爲天子 或 嚴 此 U 天 忧 字 敢 敬 下, 隆 非 追。 爲 -六年。 詩 怠 之 康 mi 諸 鑒 源

則 直 日 釋 測 爲 鄘 景 大 風》、《商 ,於《商》 Ш 不云 頌 Ш 則 皆有「景山」之語 名 也。 Ш 名。 朱《傳 源 謂 一》於《 景 先 Ш 鄘 之 儒

注引 得名 有景 Ш 未 也。 亳也 十八 山 亳之外 縣,又北 名府開 宇記》又云 南 爲 名 商 之耳。 , 其 必 八 ,因《鄘 頌 載 外傳 先 ,其 里。 里。 ,是南北 Ш 於 見《 括 也。 丽 州。 有 别 逕 地 北 興記 宋應天,即 7 景霍 風 案《 得名,皆好事者之傅會 緱氏 北 此 景 景 五 有 記 \wedge **>** 又云景 Ш 名 而 景 十里有 寰宇記 者甚多, Ш 》亦謂蒙 Ш 水 二亳之閒 今屬 經》者 耳。 得 Ш 在 經 爲 而 名 也 澶 城 注 引《衞 Щ 河 又《 1,緱 今歸 大蒙 州 \forall ,皆後 在 城 南 合 亦 渭 語 亦有 景 南 氏 應天 Ш 爲 徳府 府 城 而 言 南 影詩 望 山 海 人 則 景 應 偃 觀 縣 濟 鹽 府 即 在 因 經》 此 證之, 之,衞 亳 景 所 師 天 水 販 楚邱 廢 所 Щ 之景 縣 詩 ,作《詩 澶 山 亦 北 之 因 謂 謂 緱 在 州 也。 澤」, 有 則 逕 景 是 南 穀 縣 氏 北 īfii Ш 之 兩 是 元 今 Ш 毫 孰 北 西 縣 傅 郭 時 景 景 實 因 氏 南 毫 而 西

亳即

偃

師。」則又以爲西亳。

謐、

預皆晉人,

得

據之而

指

爲

Ш

名乎?

殷

武

》篇

而

言景

亳

互異,可

見地名變易已

無可考,何

其説。

杜

預注云

鞏

縣

又景亳,皇甫謐以

爲

景爲山名,則當如下文「岐陽」、「塗山」之稱 傳》「景亳」之語,遂謂景山之名,湯世已有 其見《中山經》者,爲「荆山之首」, 連文,定是地名,非 南景山之名,又起於後世,故先 》爲伯益所記,其 衛絶遠,俱非詩人所指。 爲山名者,徒據《左 西 即 有景亳之命」,昭 域,皆非《詩》之景 良有見 南 北 有 亳。 Ш 山名也。 湯 也。 名在 郭注 《括地記 亭,或言 作詩 而 以 》祖 朱 使 爲 四 穆也。 焉祔哉? 之廟,不 之之詩」,則其言又自相違戾。 其能 食於先祖 大乎? 後,其小者耳,詩何舍廟不言,反舉 安」,則成之者,高宗自成之也。 爲路寢。 用古義,以寢爲廟中之寢,恐不 見興盛之氣象,詩人往往如 干》、《緜》、《 修寢 既 在三昭、三穆之數,既 礙於義矣。 在 ,斯謂之祔,故昭祔 鄭箋亦謂「孔安」爲「王居之 廟,復舊制,如《定之方中》、《斯 昭穆之外,而號爲特立之廟,又 閟宫 》諸 又謂「此特爲 詩,皆以宫室之修治 此,故毛傳以 於昭、穆祔 成 夫後 然。

朱《傳》

不

뻾

甚

寢

之耳。

然《左

傳》云「商

湯

之前

,然二山

去商、

而三亳、衞

Щ

Ш

海經

郡界中

,則此

Щ

在

荆

儒

釋

^

詩

》,直以

爲

大山,

傳》獨

以《殷武》之景山

年。

景與亳

乃 遷之廟,尤無 君 高 耳 宗七世孫 除祖 今以殷之世次考之,則以寢爲 甲、庚丁二及外,則爲 是 也。 理 也。 紂之時,高 高宗後 迄殷亡,僅八 宗尚 六世,是紂 在 百 三昭 世不

皆頌武 丁生存之事,末章言

始

袝

而

祭

死者

合

於

百世

不遷

小

以

該

寢

在

廟

説者, 世室。 之孰 宗皆見《 遷於周矣,安得更有祧主人武 昭 中宗廟,昭當入高宗、 宗當穆 數二及爲世矣,不 誰 廟議 見《史記 之文穆武昭,著在經傳,故後人得知之, 立 一宗同立 周周 言之鑿鑿乎? 立之乎? |廟之説,而以 穆 中 甚明 爲 因 制 夫祖甲乃祖庚弟、武丁子,父子同 昭 高宗、祖 果爾 蔡沈解《無 頌》,其一爲大宗,則 非 • 殷本紀》及《漢書》 了,瑾 孰 不遷之廟,其謬尤甚。 親 乃以 劉 乎? 盡 爲 瑾 穆, 周 應 甲 祖 ·亦謬乎 又案,殷 以 桃 制斷之,謂三宗之廟, · 當 武丁之主未及祧, 經 逸》,以祖甲爲帝甲 爲 庚弟祖甲當之, 時 祖 昭 傳 當 也 甲 後 無 立 1 有三宗,中宗、高 廟,如周之文、武 明 於帝 世 白 瑾又推明朱子 湯孫 文,瑾 世 主舜、 T 桃 ,廟乎? 乙時 主,穆當 不遷之 彼之爲 太甲也, 劉歆 一何所 而 .,是 謂 而 廟 毁 商 併 此 據 周 爲 人 中 與 鼎 而

> 瑾乃 至湯 理。 が、 故 太 以意易之,可乎? 孫太甲之爲太宗,則史 然但言祖甲之賢,不 甲 鄭 耳 注 以 夫 爲 $\stackrel{\sim}{\sim}$ 帝 無 甲 逸 **** 而 述 -言祖 蔡 祖 傳 有明文可據也 甲 從之,不 甲之稱宗也。 事 在 一宗之 爲 無

後

非

法,其要不

外二端,一

曰

誦

其

(詩,

可乎?

是以論其

世

- 3

日

斯言信矣。

源

因攷諸

孟

言《詩》,

推其

《所説《詩》義,與今敘意

多

歐 陽

永叔言「孟子去《

詩

世

近

而

毛詩稽古編卷二十五

吴江陳處士啟源著

舍小敘

奚

由入哉?

何

則?

凡

記

載

之文,

何事

前

作詩,然後其

詩

미

讀也。

誠欲

如

此

以

詞紀世,議論之文,以

詞達

意

故故

觀

其

納

詁

E

*, «

清廟》、《生民》數篇外,其世之見於詞

者,寥乎罕聞

矣。

又寓意深遠,多

微

詞

渺

圃

世

與意顯然可知。

獨《詩》則不然,除《文

子所論讀《詩》之 「説《 不知其 同 最 詩 善 故《詩 某公、某人者,是代詩人著其世也,其曰某 者,何自而入乎? 盡 白其意也。 之德、某之化、美何人、刺何 旨,或似美而 (詩》, 詩》, 在詞 》所不載者,則載之於敘,其 而《詩》又不自白其意,使後之學《詩 ൬ 中,尤難臆測 ^ 詩 既知其世, **>** 實刺,或似刺 不 自 古國史之官早慮及此 著 而 又得 其 知。 世,得意 而實美,其意 其意 人者,是代詩 夫論 一、因執 世方 日某 方 可 可 Ē 説 誦 不

小

敘

要

者,不以 詩》者,必先知詩 文 害 詞 人 不 生何 以 詞 诗,事 害 意 ___ 何 君 然 且感 則 學

691

四 八九

者也 矣。 其 (詩) 詩 不不 故 此 有《 如如 孟 猶 不 詩 子 秉 所 》必 讀《詩》之愈 燭 謂 而 不 害意者 求 미 物 以 於 也 也 無 暗 敘 ,不 室 也 中 知 舍敘 人 百 不 不 論 而 失 世 言

端 篇 斯 故 故 若 何 順 至 説,至詆 欲 詩 文 之 亦 事 叙 此 真之篇 便 釋 派所指 敘 其 哉 於 影亦 篇 言之者 未 詩 有 義 讀 明 》敘 毛公上 之 猶 以 治者,乃 惠 首 圃 耳, 平 源 敘 全 敘 於 「,俾 已。 本自 謂 何 此 無 書 弁 獨 後 讀 意 作詩之世與 敘 誣 他 學 之 諸首矣,廣亦將罪之乎 不 未 爲 雖 者 也 非 聖 意 口 敘 讀 誦 而 先 注 經 其文 也 編,毛公分寘 也, 寘 之終 惟 反 觀 比 篇 罪 得 以 全 焉 輔 首 篇 敘 自 無 不 爲 書 其 廣 乎? 茫 則 宜 而 口 罪 庸 之 人 附 於經 始 寘 追。 平 尋 紋 不 及作之之 和 ? 曉 其 經 篇 朱 心 知 朱子 然矣。 吁, 易 義 前 首 子 寘 況 所 也 之 卷 注 何 之 本

性 公、《 奢之 無 託 與謚 不可 求其 初,其 儒傳 某 時 欺 甚 邶 詩》 乎? 之自然,又使讀 人 ,謂 已 後 篇 作 曹》之《 有之, 號 義 信乎? 之者也 敘 諳 後 柏 其 i',皆 不 相 與 驗, 子 朱子 (傅會 舟》之刺 敘 而《陳》之《 爲 源 近 他 師 的 由 辯 或 蜉 竊 美 也。 書 文 安見 書 來 説 至依託 出 説 切 蝣》, 怪 刺 史皆 謂 史, 相 古 後 **>** 别 若 頃 其 時 力 者 他書史可 傳 矣。 儒 防 , 見 言之過 依 宣 敘 秦 君 瓿 疑當 名諡 如 有鵲 增 唐 他 託 非 國 以 以 小 小 此 其 益, 書 名 . 信 爲 前 政 敘 敘 時之人,絶 之語, 指 巢》,敘以 蟋蟀》之刺 史而 也。 非 謚 讓 而 之 刺 信 至 文 某 臆 偂 之名 字, 作 説 昭 首 鑿空 詩 於 小敘傳 説 而《詩》敘 後信 尤屬 公, 敘 爲 不 必 而 也。 或 妄 其 切 使 昭 無 何 爲 漢 則 之, 僖 深 説 風 君 《詩 若 於 所 刺 非 世 自 采 文 猶 則 依 好 猫 則 官 心 風 漢 以 尤

情 情,必醜 善 語 歸 耶? 一、嫉 君、過則歸 不可 邪、 況 Œ 忠君、愛國之心 刺 黨惡,視君親 時 己之意,非温柔敦厚之教。」斯 夫《詩》之有 之詩,大抵 如秦、越,而後爲性 是變風、變雅、傷 而 美 然 刺 瓜耳,此 總 迫 非 於 性 好

亂 怨則安得無刺? 不怨則愈疏」,未嘗以 而 作 也。 處 汙世, 孔子曰「可以怨」,孟子曰 事 怨爲 暗君, 非也。 安得 惟其怨, 不怨?

有是理哉? 史遷有言,「《詩》三百篇,大抵謗、始皇之設誹謗律,足稱盛世之良法矣,獻媚、唯諾取容,斯謂之忠愛,而厲王之監所以爲温柔敦厚也,而朱子大譏之,是貢諛

聖賢 也? 夫淫奔之女,反賢於忠臣 發憤之作」,朱子 既以刺 時爲不 可,而 所 見, 悉 義士 指 何 反 爲淫女之 郭? 出 遷

乎?《春秋》簡而嚴,《詩》微而婉,厥旨渺《詩》之有小敘,猶《春秋》之有《左傳》

矣,俱未可臆求 春秋》不可 讀 丽 無 懸 小 定也。 敘 ,則《詩 無《左 不 傳 可 讀 ×,

則

《左》。 《公》、《穀》也。《公》、《穀》存,故 而 短長易見,偏亡則高下難明 厭常,往往然矣。 毛敘之有 齊、魯、韓 齊、魯、韓,猶《左傳 亡,故 人或 也 疑 毛。 人情 人 俱 》之有 皆 好 存 尊 異 則

宗毛。 《大全》修而《毛》、《左》復詘,後世之經學其 時一人所能定也。其見 後之《春秋》必首《左》。 可問哉? 毛敘後齊、魯、韓 《左傳》後《公》、《穀》、 而 其 7/ 確矣, 舍彼 鄒 而 後之《 夾 其論公矣。 取 此 而 非 詩》 Щ 悉

六經 賢 雅》,蓋周公及子夏之徒爲之也。 作之,復得 訓 經之足重,以其爲古聖賢作 釋, 惟《詩》 古聖 賢 最 古。 釋之,不 其 字 愈 訓 其 也。 足 則 (篇義 重 有 古 乎? 聖 則 爾

《詁訓 前矣。 反欲 非能 字之義 解,反舍而他 後參以 視《易》之王、《書》之孔、三禮之鄭,俱 有大、小敘,又子夏之徒爲之也。 三者爲正宗,而精求其義,三者所未備, 跨 一勝於古人,而人情事勢,度數名物,及 然則學《詩》者,止當以《雅》、敘 傳》,而兩毛公亦六國及先漢時人也 訓 m 後 出 聲形,又不 儒 「其上,亦不自量之甚矣。 之説 |求,斯姓矣! 可 ·如生其世者見聞 耳。 ^ 雅 蓋己之神智 》、敘、傳 繼之則 之確 有 出 「, 既 、傳 伙 其 定 有

四 始

頌 四 詩 应 爲 者,人君能 四始之説,先儒言之各異。 E 道 興 衰 行 之則 所 由 雎》爲《風》之始,《鹿 始 興,不行 此 鄭 則衰,故此 康 二雅、 成之説 風

而

本於大敘者也。

《關

詩》乎 《詩緯汎歷樞》之説也。 《大明》在亥爲水始,《 《清廟》爲《頌》之始,此 宗何《詩》也。 得之矣。子長未見毛敘,其所言四始,不 頌正 鳴》爲《小雅》之始,《文王》爲《大雅》之始, 然則亥、寅、巳、申之爲四始,其 情之要,五際七情亦緯 頌之義,而總斷之曰「是 嘉魚》在巳爲火始,《鴻雁》在申 是始,非更有爲風、雅、 翼 奉治《齊 書《汎 四牡 謂 觀大敘歷言風、雅 司馬子 詩 四 頌之始者,鄭 一个 始 歷樞》之説 而 」,則風 長之説 寅 ·爲 知 出於《齊 爲 金始,此 五 木 際 雅 始 也 也 説 知

六

最詳複,約之止三意焉。 詩 () 有 六 義 其 首 日 云「風天下而正 風 大大 敘 論 之, 夫

風,則 事,形 風之義矣。 又云「以 上」,此風 上,主文而 一, 故 前 風化下」,此 風教實先之。 又云 大敘十七「風」字 後風 四 專 目 方之風」,此風俗之風也。 一國之事繫 刺之風 刺興 譎 風 或 然必 諫」,又云「吟咏情性, 以 風。 風 (,合此 動 有 也。 惟風 教之風 之, 要之,風 風教,而 云「美教化 三者,國 一人之本,言天下之 刺 教 獨 之 也。 以 義 後 俗之風,正 化 以 云下 之」,又云「 風 風 風刺上」、「以 其 移 之義始 俗 風 成, 餘所 以 自下及 風 以 有 當 風 風 俗 備 風 或 言 其 上 刺 興。 者。 風 如《 字 風 •

以

興爲 也 窮 興在 物 是 朱子論 理 義 詩 者 人興體,假象於物, 則 方 或美 有 미 興 與言 全不 獨 入或刺 異 取 (是,謂 興, 皆見 其 學《 義 興 詩 於 寓 但 有 意 興 取 兩 所 中 良 其 意 以 深 有 重 故 多 取 必 凡 字 所 識 研 託

風

其上」,陸氏

讀

爲

諷

焉

上

俗

而

《小星》,取 如《關 亦正 殆指 見 元儒 是六義不在《詩 皆此類也,不近兒 寐求之」兩「之」字相 集 疏義》,爲修《大全 揚之水》取 而 《傳》, 鄭 而《集 綢繆》、《小雅· 有朱 究其所謂 在 斯 夫全不 有 風 雎》之次 類 動 此 謂能 、傳》代 而言 乎 克 揚之水 兩「在」字、 取 又案,蘇子由 其 升者,著 以 興者 義, ,然吾之不 八章,本 意 一談諸 兩「之」字、兩「不」字爲 虚 爲 而 臣 戲 何 非 */ < 詞 補 在《集傳》矣,尤 ,止取「 所 常棣》之類,不 乎? 以 後 助 出 應 鏁 賦 魏 詩 備 兩 語 耳 人 襲 也, 風 使 謂 能 六 可 傳 發 而 甚有經文本 與」字 其 左右流之」、「寤 義之 . 無疑 而 疏 其 没 明 得 興 袁 句 其 釋《 ^ 義 者是 而 詩 集 法 於《 名 有 ₩, 爲 知 召南 傳 》蕴 勝 併 口 桃 相 平 最 興,《 當 集 滅 詘 如 笑 應 ? 克升 推 目 時 傳 無 其 也 書 唐 其 王 歸 所 重 爲 即

鵙 爲 雖 之厲 不 純 階 用 其 乃 語 比 而 而 非 所云 興 全不 0 噫 取義者 1 誤 矣。 實 蘇 朱 子 語

之, 譬喻 説 狹。 凡 反 衣》、《匏有苦葉》諸 卷之類當之,然則 喻 子 欲 # 興 所 由是 但 (義之明白 推 與與 劉舍人論 判 毛公獨 圃 ini 爲 興 比 隱 遠之,使離 比 絶 、興 而 標 者 不 比 者 比 興 相 顯 體 多 體,朱子 體 即 似 EY. 是興 疑 興 篇,本 去 判 也。 以 者 溷 婉 正 爲 金 耳 以彼況此,猶文之 意 而 錫、 比 而 朱之釋《詩》新 兼 興 難 比 圭 明 偂 如《螽斯 也 比 分 直 全 一璋、澣 比 而 興 示 故 興 賦 雖 以 取 釋 廣 *\ \(\lambda 衣、 比 義 興 皆 然 rfri 例 之 體 緑 席 Ħ 託 朱 EK.

旨 至 非 即 比 非 比 者 離 皆 言 喻 正 而 在 體 此 喻 不 意 兩 同 在 相 ō 譬 彼 興 」, 其 況, 者 其 詞 興 詞 微 會 決, 其 所

> 章爲 興體 謂 章 得 旅」之類皆 爾 首 以 其 二、三章爲興,支離穿鑿 詩 先儒 爲 不 音 旨 蛾 發 学中 端端 興,末章爲比 比 争同異於毫芒之閒,如《 中分立 眉 顯 不識 次 顯 如 多 且 然 章爲 在 與 比 跂 毳 比 興、比, 之 賦 斯 衣 首 也, 體 比 興、《 翼」、「 交錯 如 章 取 體 而《 刻 也 何以 《小雅 既 《青蠅 本 而 集 价 溷 同 成 如 服 傳》緊以 風 如 之 人 文, 者 . 其 篇 谷 維 我 於 Ш 而 心 雅 不 凱 以 賦 藩 如 心 風 彊 乎 掃 若 首章爲 風 中 阜、「 匪 求 爲 地 篇 興 》篇 石二、 其 矣。 更 賦 敦 以 語 異 前 以 欲 琢 金 之 不不 比 反 首 於 夫 其 用 玉

之也 可 乙荅子貢之言,又見《荀子• 南》、《雅 據 也。 ,見《周 風、雅、頌之名,其來古矣,不獨 》、《頌》之人樂,載於《儀禮》之《 又三百十 禮 ·大師》之職,又見《樂記 篇,皆古 儒效篇》, 樂 童 大 也 敘 歷 燕 歷 丽

矣。 南, 蘇 戴 年則 之後 禮 故言南 内,兼得之於南國,周、召之名不足以 檀》之詩與《鹿 論 《邶》以 伐 間 風之名,殊不知 或 氏 己 故 檀》 見《小雅·鼓鐘》篇。 釋 國詩皆不人樂,豈非妄説乎? 變風之人樂,又歷 投 、《周禮 龡 詩》有 鄉 生此 下、《左傳 《鼓鐘》篇 壺 至 在 ^ 飲 豳 魯 南 禮 一焉。 禮 説 指 雅 人 . 南、雅、頌 **>** 耳。 稱 *, 籥章》迎 歌 鳴》、《騶虞》、《文王》並 漢 及 其 可 》但 内 祭 周 地 以 末杜夔能 二《南》之詩不 蘇氏之謬,前辯之已 歌 が増 禮 紀國 雅以 外 非 者 程 則 ൬ 則 寒暑則 傳 以 歷 八篇 又謂季札觀樂, 無 南」誤以 龡 而 + 爲 可 列 或 ^ 不言風 記 詩名 據 或 豳 風,自 龡 雅 則 或 也 燕 頌 樂, 盡 也。 繼 爲 猕 享 **%** 魏 故故 得 彼 宋 邶 詩 二雅 所 盡之, 0 則《 列,十 風 於 特 程 知 至 》,祈 歌 《大 南 境 自 悉 伐 之 無 見 獬 大 無

然,程 言取 書 焉。」程以 風」,聞《 且 言 國之詩, 一候人猗兮」,實始爲南音,周公、召公 禹 耶 季 國,言南 省南土,塗山氏女命妾往 風 札聞《 獨 齊》則 皆 不 不言無 南爲詩名,或本 ·見乎? 皆 得 邶》、《鄘 於 굸 據 境 風 實 泱 内 也 又案、《吕 泱 而 》、《衞》 ,況《吕覽》 自 言 乎大風」,風 應 於此。 其 舉 則 候 爲 氏 或 云「是 (),女作 春秋》 風 名 豈傳信之 然《吕 以 之名 槩之。 而 其 取 歌 云 . 覽 較 風 衞 \Box

詩樂

〈詩》篇皆樂章也。然《詩》與《樂》實分

■「頌」,原作「雅」。嘉慶本同,據康熙抄本、大全本、《四

之説。 之教 《詩》者之贅及。 與作 之本意 或以 釋之,或以 可攷矣。 意 之類,亦指作詩之意,而言其奏之爲樂,偶 弗及焉。 敘《詩》者,止言 春 同 鄉之奏二《南 也。 秋 教 歌《詩》之法, 门》。」是教《詩》、教《樂》,其時 爲受釐 詩之意同耳。 教 廣 相 殊 經 《博易 以 Ŧ 《集傳》於正 即《 謀 不 解》云《詩 制 ^ 爲 陳 知 禮 良」, ×, <u>*</u> 馬 燕 鹿 戒, 古 端 *\ \(\lambda 心鳴》燕 作詩之意,其用 響通 兩 自 《樂經》今已不 臨 人 俱 是教《詩》教《樂》,其旨不 君相 ジ之教 文文 敘自言《詩》,不言樂也 載 樂 用詩於樂,不 以 用, 於《樂 獻 樂 雅諸詩,皆欲 羣 *, 詞之相 見之奏《文王》、 通 臣 Ē 或 冬 心 攷 》論 温 ~ 以 立 經 夏 二柔敦 清 爲 四 似 心》,元 之甚 不同 教 ·存, 教 祭畢 廟 爲 億 必 》厚」,《 以 悉。 何 以 與 以 祀文 則 無 也。 度 《詩 樂, 造 而 樂 作 如 亦 煩 丽 、《清 樂 燕 故 射 詩 童 **M** 敘 Ŧ 則 爲

當。 廟 乎古人之《詩》教 相 言《詩》之作本以言意 違 及傳《詩》, 何嘗以 此 不 미 其 解 訶 則 也 哉? 矣。 傅 會樂 朱子嘗 非 況 章 舍 爲 以 樂 詩 荅 立 而 丽 義 作 陳 徵 體 樂 與 斯 語 亦 甚 異

詩

詩 亦 亦見敘。 高》是也。 著之者,如《 國 風》之《清人》、公子 見 人 語 敘。 不 詩 ^ ^ ^ 言, 鴟 抑 時 有見 鴞 邁 他 節 百篇,其作者之主)》、《思 》、《書・ 或 典 南 於他 語》。 不 山》、《巷伯》、《 載 文》 典者,如《載 亦見 金 勝》。 而 皆 敘 敘 或 陽》、 亦 ^ 見 語 得 名,有 桑 敘。 其 烝 柔 馳》、《左傳》。 是 民》、 姓 常 詩 也 氏 棣 人 傳 秘 其 自

素。

滑

秦

康公。

令七

月》, 伯。 其意 也。 明 漢 作 世 旻》,皆凡伯。及《魯頌》四 實之,闕 盡 愐 言下國,或言大子傅,或 或言某大夫某人,或言大夫,或言 初筵》, 質 其 得 得之,但 可 輒 《樸 皆 周 ,或 國史得詩 意 作 蕩 公。 尹 衞 , 非 者之主 於敘 议 方吉 所 皆 武 ^ 甫。 召 若 不 欲 名 惟 召 公。 穆公。 小 康 間 後 知 識 氏 情 ^ 雅》之《何人斯》、 公。 名 ^ 當 則 世 有 作 也 常 動 大雅》之《公劉 ^ 矣。 能 述 附 詩 武 ^ 雲漢 於 如 民 其 益 之意,不 及傳 文之士欲暴其 中,始發爲 是 勞》、 師 意 召 × 耳 然終 篇皆史克。 併不言其 穆公。 儒 播 而 仍 傳授, 召 叔。 爲之敘,固 人 必 朱子《集 不 穆 口 ^ 公。 問問 敢 蘇公。 瞻 × 采 詩 韓 相 其 爾。 妄 ^ 才 歌 微 印 \wedge 奕 泂 風 求 與 何 ^ 板 ×, < 傳 × 臣 蓋 賓 以 人以 講 無 X 者 有 其 酌 之 自 古 餘 始 明 由 作 因 所 或 召 江 × 凡

> 王》、《 以 燕 春 秋 《葛 大明 然 日 覃 非 月 一》、《卷 先 × × 儒 ^ (緜》爲 終 所 耳 取 風 ·》爲 信 爲 周 后妃作、《 鑿 莊 公作,惟《文王 姜作 然 言 之,毫 緑 東 衣 山 》本《吕 × × < 不 置 文 燕 氏

集傳詩證

疑矣。

《秦 降 皆 葦 釋《周頌》「陟 雅 類弁》, 取 鄭 . . 流江 則引 其 楚 晨 • 子 語 漢 薺 則 風 遵 釋《詩 之相 春秋傳 »·« 大路 引 **>** 諸 降庭 漢 則 同 神 詩 ₹, 引 及文勢之 保 美 魏 止, 多 則 百 則 ×, 引 以 引《 王命 里 引 則 ,則引 來 他 奚 宋 博 引 書 樂 諸 妻《 玉 相 古 屈 《楚 以 府 侯 ^ 似 圖 原 證 扊 登 之詞 詗 釋「文 者 × 成 徒 九 扅 器 己 歌 賦 歌 以 大 釋《行 物 説 E \approx ×, \approx 爲 招 取 陟 釋 釋 釋 如

乎? 必盡同 傳》僖 六經之 也。 得謂 瓜」矣,哀十七年。 詷 之交》亦云「不整遺一 老」、「祭祭與媛同。 義 言之,見《左傳》哀十六年及《禮記 媛媛在疾」,不得謂 》哀十七 平 命官言之,見《書 亦 不遠能 「鶉之賁賁」, 五 必 此 年。 也。 如 文, 年。 二詩 相 豎 邇」、《烝民 魚 類 良 而 互 即 竀 圃 《鄘 夫 因 其 相 與 如「柔遠能 周 沿 見 命 口 が頼 用 • 舜典》。 與「奔」同。 襲者 夢 之《鶉 南》之《汝墳》,豈失 余在 謂《大雅》之《緜》爲 官 意 同。 () 詩 於衛 此二詞 老」、《閔予小子》 而 可 亦 尾 多 疚」,魯哀公誄 謂 作 奔》, 云出 侯,云 邇」、「出納 有 而《民 勤 ·檀弓》。 也。「不整 晉童 因 衞 矣。 語 豊 1 悼 納王 以勞》詩 「緜 謡 雖 繇 克 |野 源 而《 同 也, 也 敵 臣 緜 命 朕 間 見 怨鬼 亦 或 之 見《左 + 遺 生 孔 而 意 一,不 亦 命 嘗 之 之 介左 詩 作 自 子 云 云 未 攷

尚 指隙 今因 疊出 之,而 攬其芳華 疆 同之也。 子」、「四牡孔阜」、「所謂伊人」等語,皆 喈喈」之語,采桑女及 又專 三章 之 寡特,亦可以勞士卒。 女子 沈 不 勺,而測江海之洪 一、「介爾 語 湎 ',亦 可用爲正訓,況字句之閒偶 中之末光,而 片詞之偶 學《詩》詞言之,如 爲 于 乎 王者之勞將帥 然而 酒 ? 誓師之文乎? 可 況後 矣 施 以資 胤 景福」、「樂只君子」、「彼 篇 於天子; ,見≪書・ 侯 各 同 世 數 潤 。遽謂 騒 盡 義 色,豈 義,義各有歸 人 流 日 亦 和 胤 墨 經之 用之。 也。 月之全照,據桮 嫁 「之子」之稱 征 之 此類 士 喓喓草蟲」、「 子語 「杕杜」 暇 罪 擷 彼 正 尋 可 云 出《 殆 引 至 取 解 其 謂《抑》之第 旧相蹈 ",不得 一之興, 經文, 桃 不 如 顛 在是,是 本旨 詩 夭 勝 一萬 可可 覆 》斷 》傳。 襲,在 詘 厥 中 其 不 哉 倉 以 槩 重 壽 施 指 猶 调 見 之 無 用 庚 刺 於 陑

彼亦出於無心者乎?

《時邁》、《執 《轡之柔矣》之屬,先儒皆云逸詩,不彊爲之 卓見也。 《祴》、《明明》、《崇禹》、《生開》、《武宿夜》、 矣。 齊》爲《楚薺》,益屬傅會。 不用三頌之説,杜元凱不用《沔水》之説,皆 飛》爲《小宛》、《河水》爲《沔水》。 説也。惟吕叔玉以《肆夏》、《樊遏》、《渠》爲 招》、《采齊》、《肆夏》、《樊遏》、《渠》、《支》、 飛》、《茅鴟》、《河水》、《新宫》、《驪駒》、《祈 、雠》、《振羽》之爲《振鷺》、《勺》之爲《酌》, 篇名之稍見於書史者,如《貍首》、《鳩 古詩三千,孔子删爲三百,其亡逸者多 宋儒又以《新宫》爲《斯干》、《采 ·競》、《思文》三頌,韋昭以《鳩 若夫《徹》之爲 然鄭康成

毛詩稽古編卷二十六

吴江陳處士啟源著

攷 異

爾雅毛傳異同

者也。 訓 子夏,故此二書之釋《詩》,往往相 或《雅》之所釋而毛無傳,或《雅》、《傳》並有 中亦不無小異,或《詩》之所有而《雅》無文, 成之、《詁訓傳》作於大毛公,而淵 釋 而義趣 ^ 爾 雅》與《詁 雅》始於周公,而子夏之徒 迥 不 -相謀。 訓傳》, 竊嘗推其故,二書 皆《 《詩》説 源實 合。 之 然其 最 出 述 於 mi 古

也。

案、《釋言》云:

「芼,搴也。」孔

疏通

兩

義爲一,辯見本詩。

〇「于沼于沚」,沚,渚

傳《爾 也。」箋 説,著之於書,而未嘗規摹於《爾雅》。是其 資於《詩》傳。 皆出子夏, 服」,服,思之也。案,《釋詁》云: 各有不同。 之與《雅》異者才十之一耳,而其異之實又 形,尤爲謬論。 後儒又謂《 則云毛謂《爾雅》未可盡從,此殆未必然也。 其同者則云毛依用《爾雅》爲説,於其 者之殊,而非有意於立異也。 同者由於所出同,而非讓襲,其異者由 不同者。 雅》之學者,雖稍增益其 用以易傳。 今特表出之,以俟攷辨。「寤寐 爾 m 有異 雅 毛公之傳《詩》,亦自述 弟子各述其師説 辯見《魏》、《秦》兩風。 》後出,依倣傳義,改易字 而 不 〇「左右芼之」,芼,擇 ·可同 者,有異 文, 孔疏申毛,於 則不 今案,傳義 而 未 「服,事 而 盡 八異者 於述 其 未 必 同。 師 嘗 取 思

可。

用之,本詩有辯。 易傳,辯詳《七月》詩。 ○「壹發五豵」,一歲 ○「騋牝三千」,馬七尺以上曰騋,此《周禮 地》云: 心也。 案、《釋獸》云: 案、《釋 牝,驪, 如 爲 鳧 小 傳。 坻 釋 鷖 之京,非 馬 渚 驪, 案、《釋言》云: 如 在 地》云: ○「野有 訓 日 與 牡,玄」。 崇云 牡。 沚。 京 渚 郊外謂之牧,牧外謂之野。」 牝 馬 ○「景山與京」,京,高邱 傳 人爲之邱。」邱 此 渚 ○「考槃在 死魔」,郊 也。 同。 郭義也。 「豕生三,豵。」箋用 「禱禍同。 日 抱 ○「惠然肯来」,言時 大 沚 豵,「言私 衾 陵 案,《 案,《釋 也 與 「肯, 《禮 日 外日 襉 阿 阿。 謂之帳。」箋 記 釋 案,《 可也。」 鄭注引此 畜 邱 其 與 野。 禂 孔 曲 学云 豵 釋 京 疏 云 單 陵 異。 案, 水 謂 箋 以 傳 被 E 作 庾 《釋水》云: 《釋畜》云: 同傳。 **黙**三 於是 宜。 邱》云: 蒼天也。 樂易 歲 日 宛

有順

同。

用以

易

也。

云:

也

也。

絶

高

《大雅》「有卷者 邱之上兮」,四方高中央下曰 特。」○「騙驪 也。」箋用其義。 合二説,語詳孔 冬爲上天。」傳取義分、《雅》以時 蒼然,則稱蒼天。 則稱旻天,自上降 之則稱皇天,元氣廣大則稱昊天,仁 ○「悠悠蒼天」 ○「宛 春爲蒼天,夏爲昊天,秋爲旻天 特。 然。 「黑喙,騙。」不言黄馬,《説 在 中, 是驂」,黄馬 小 案,《釋 案,《釋 疏。 प्रा 水中 渚 〇「胡 宛 鑒 案 一,蒼天 一則稱· 邱。]又云: 則 《釋 〇「齊子豈弟」,言文姜 坻」,坻,小 沚 潤 瞻 言》云: 阳 ,小沚 以 上天,遠 有 爾庭有縣特兮」, 天》云: 黑 體言之,尊 曲 宛邱。 喙 者,於 日 日 别,康成 坻。」○「宛 渚 「愷悌, 而 「邱上有 豕生一, 也。 騧。 案、《釋 「穹蒼 視之蒼 .覆 隱 関 而 遯 文》 和 下 君 爲

703

貌。 坎鼓 以其 金屬。 爲 也 增、《説 尺氏切。 邱 箋用《爾 詩》以爲悦人,故言愛。」〇「概之釜鬵」,鬵, 豕 本 叢 一歲 忉 生 地》云: 訓 宛邱 生義 案《釋 我 俱 案 · 詩。 忉。 文》同。 、《釋 案、《釋器》云: 〔是食器。」○「言私其豵,獻豜于公」, 也。」孔 E 云 雅 蹲 豵。」又云: 豵,三歲日 〇「于彼 齊 本 訓》云: 蹲) 豵義 〇「九十其犉」,黄牛黑脣曰 木 》云: 「廣 喜也。」 . 詩 舞 甫 疏 惕 有 我 田 ¥. 易傳,疏 云 惕, 辯。 [》傳 原 〇「如竹苞矣」,苞, 「坎坎、蹲蹲 原,高 굸 坎 隰」,高 豜。案、《釋獸》云: 愛 _ ○「心焉惕惕」, 如 翩 坎 「離謂之驚。 鹿 也 が併用 切 竹箭 非 無 平日 麢 金 忉, 平 傳。 郭 / 摩 絶 日 類。 元義 憂勞也。」 日 有 《爾 陸。」〇 云 苞。」郭 蹲 原。 述箋,辯 力,羼。」 雙舉 雅 鬻,鉹 蹲 》蹲作 惕惕 犉) 坎 注 本 韓

阜日 其 之。 之,則 下。 文》同 與阿别,孔 容 暴雪。」○「止于邱 霰,暴雪也。 **犉。」郭以爲** 日 〇「皇尸載起」,皇,大也。 皇,君 、説文》霓即霰之或體。 爲霄雪。」郭以 釋邱》云: 殺 在 也。 時 王 陵。」《釋邱》云: 孔申 京」,京,大阜也。 河、阿 毛傳。 犉 肅 案、《釋訓》云: 也。」箋用 案,《釋 社」傳 傳云: 以 ,疏云: 爲傳不言祭,辯詳 非二物。」〇「奉璋峩 通 非 案、《釋天》云: 謂 同 「執 人 訓》云: 黑 以 霰 阿」,邱阿,曲 案、《釋文 爲之邱。 暴 脣 易傳。 以下「邱 久必 4, 踖 案,《釋 絶 踖 不主 峩峩,祭也。」箋 高爲之京。」孔 畜》云 暴雪, 〇「先 」,踖踖,爨 案《 踖 大陵 側 本詩。 地》云: 爲 に「印 踖, 雨 釋 阳 黄 我」, 非 爲 日阿 霓 集 計 》 也。 4。 敏 謂 水 一一一一一 維 隅 ○「依 黑 半 雪 也。 霰 霰 굸 竈 《説 案 大 邱 疏 # 類 雜 有 即 案

野。」 厚 異 案 邑外 用《 云: 通 小山 珪 Щ 振 嫌嫌 大大阜 也 形如 其 一,巘 雅 訓 古也 振 大 以 釋 日郊,郊外 孔 義 相涉 古 *\text{\tiny{\text{\ti}\}\\ \text{\te}\text{\text{\text{\text{\text{\text{\text{\text{\text{\text{\te}\text{\tetx{\text{\texi}\text{\text{\texi}\text{\text{\text{\text{\text{\texi}\text{\text{\text{\texi}\text{\text{\text{\text{\text{\texi}\text{\texi}\text{\text{\text{\texi}\text{\text{\text{\text{ 尺二寸謂 作 别大 **>** 絫 地 小小 毛 疏 同。 義 兩 如 爾 謂 一。」箋用 謂 云: 甑。」孔 故故 寶」, 易 兹 山 Ш 釋 邱 傳。 别 爾 」,振 鮮。」 客之。 高 訓 敏 Ė 疏引以 於大 寶、瑞 雅 野 之玠。」則 履 大 * 以 野 ^ 素 爲 郊 拇 爲 帝 韓 又云: 易 自 Ш 也。」箋從之。 武 〇「烝 通 外 野 釋巘。 京 傳。 奕》 也 也。 可 也 外 敏 稱 謂 盡 則 烝 二以 非 之牧 日 案,《 案,《 赚。 從。」 烝 烝 京 又 案,《釋 諸 林, 敏 「在坰之野」, 重 皇皇」, 其 亦 彼 作 侯 釋器 林外 釋言》云 疾 甗 土 牧 牧 介圭」同 也。 瑞 錫 一之高 「陟 山
崇
芸
: 也 與 外 孔 圭。 郭注云: 。」箋以 烝 尝云 日 此 謂 爾 則 申 坰 烝 案, 者 牧 之 箋 介 傳 在

> 異 烝 而 烝 不 爲 미 進 同 進 者 與 也 興 作 義 相 近 右 諸 條

> > 皆

水岸, 暴,疾 箋從《 狃 孽」, 湄 也。」箋從之,孔謂 水 頭 孽 暴。」二一 之狀,故箋以 云 釋山》云: 赚 戴 , 戴也。」郭注云: 也。 湄 物 狃,習 孽孽, 盛 赚 釋詁》,孔 也。 惄 一義雖 怒,思 乃 水隒 是 如 案,《 婦 山岸 案,《 也 調 異 人 也。 思 也。」《釋言》云: 釋 盛 飾 然相 飢 重 義 謂 故故 膩 邱》云: 案,《 也。 釋天》云: ٠, 飾 案,《釋 復 相 惄 ,赚。」孔 貌 怒, 漘 亦 兼 接 本 案,《 「頭 釋 爲 摜 亦 成。 訓思,是飢之意 飢 水》云: 言 習意。 水 可 戴物。」孔 二在 意。 釋 赚 夷 疏 通 ○「終 云: 日 訓 E 通 河 案, *\\ \overline{\times} 之漘 之,言 怒, 〇「在 洒 〇「庶 出 風 「水草 下,漘。」 ^ 將 疏 而 Ħ. 飢 狃 釋 」,漘 漘 水 叔 以 風 暴」, 非飢 姜 也。 詁 之 爲 醛 復 無 是 孽

天》云 月, 不以 也。 詩 陽 反曲,故 之弓,無缘者謂 弭,弓反末也。 廷 堂塗謂 起,義相通。 E 及《杕 月 之異名耳, 淦 湄 亦是 詁 其 方 也。 也 繳束骨飾 爲 至 之 孔 E 重 爲弓反末。 飄 一彫,玉 杜》箋皆 十月,毛正 通之與 案,《 案,《 陳。」孔 П 報之 風」, 侑, 〇一以 風 其實一也。」〇「象弭 釋官》云 兩 釋天》云: 案,《釋器》云: 之弭。」孔用 日 報 義 爲 飄 頭 漘 通之云: 琢。 用 飄。二 也。」孔 爲弭 妥以 風 同 之。 解 暴 案,《釋器》云:)」追 П . , 是 侑」,侑, 勸也。 歲亦 + 孔謂 旋 起 云已飲 **一**十 琢 弭 孫 廟 中 月 之 之 堂 其 陽止」,陽, 乃 唐 炎義釋之, 中 歷 風 風 名 月 「有缘者 一之與 章」,追 弓哨 路 有 食 必 盡 爲 陽 甓」, 謂 案, 魚 而 猝 有 陽。」 之義 驰 陳 之 陽之 服 後 然 ^ 玉玉 唐 唐 此 勸 而 謂 謂 廟 歷 則

倒,枝 場。 之崔 訓 也。 反 諸 熇 皋、琄琄 釋晏晏、旦旦、丁丁、嚶嚶、蓁蓁、 危 者,翳。」郭注引此詩。 爲 孔 謂 雅》義,辯 , 諸 也。 翳 之 ,乃後世傳寫之誤,非作者本意,兹 條 云 地畔 案,《釋言》云: 易 ,皆異 散 雕、金謂之鏤。」又云: 嵬、 義、皆與傳異,孔 雅》言作《詩》之故,故有 葉 則 案、《釋木》云: 文 案,《釋 、憲憲 之徑路也 覆 岨 可 地 詳 地 而 絶,故 以 本詩。 未嘗 而 魏 相 詁 泄 陰翳。」〇「汔可小康」,汔, 風》 通 至此 泄、 謂之殄。 不 孔 〇一徂 之 同 「畛,殄也。」邢 通 懽 疏 岵 者 其義云: 「自獘,神。 申 懽 而 也 其 譏,汔 之, 隰 易之主,故 屺 愮 〇又《釋訓 椔 徂 至 不 以 熎 玉 其 畛」,畛, 雅 於《 同 爲 也。」箋 翳 謂 萋 「生木 謔 音 傳 之 疏 (姜、 周 申。 謔 傳 不 解 畛 謂 自 琢 相 所 爲 用 敝 獘

鄭箋破字異同

字 云: 患, 《詩》者譏之,然其 甫、圃古通用。「古之人無斁」, 斁爲擇, 嚏。」「素衣朱繡」,繡爲綃 河爲何、《釋文》云: 稼穡」、「稼穡維寶」,稼穡皆爲家嗇; 굸 禮》注。 今悉攷之,有自據 願言則疐」,疐爲 音義本相 一尋 康 《釋文》云: 此經數字,本有作擇者。」「串 「東有甫草」,甫爲圃, 成釋《 鄭本二字皆無禾。」疏亦云。 通者,如 詩 申, ×, 「河,本或作何。」是也 閒 嚏 當 多 「其虚其邪」,邪爲徐; 得 本作患。」疏 改 時 失 《釋文》云: 經 讀本未嘗 縣 字 《魯詩》作綃,見《士昏 殊,不 夷 以 「景員 《韓詩》作圃。 亦云。 載 就 路 「疐本又作 改者,如 能 己 維 説 無 《釋文》 好 有古 河, 串 孔疏 辨。 是 説 爲 又

文》云: 云: 棘我圉」,圉爲禦; 統》厲山氏、《魯語 厲爲裂; 父」,抑爲 遜字,借孫爲之。「一不我周行」,示爲真 古邪、徐音 懿爲噫; 人不周」,周爲賙; 碩膚」、「詒厥 視,古示字。「鄂不韡韡」,不爲柎, ·古示、實同讀。」「視民不恌」,視爲示; 腆,古文字作殄。」「其魚魴鰥」,鰥爲鯤; 鰥、鯤古通用。」「烝在栗薪」,栗爲裂; 維其勞矣」,勞爲 「温、蘊通用。」「既匡 籧篨不 「匡,飲器,筥也。」筐乃重文。「垂帶而 同。《魯 「不云自頻」,頻爲濱 噫; 裂假不瑕」,裂假 殄」, 殄爲 孫謀」,孫皆爲遜; 》作裂 頌 飲 遼 邪字協徂、《 賙,通 Щ 幸 酒 氏,可 既敕」,匡爲筐; 禦通用 温克」,温 腆 疏云: 用周。 見古厲、烈、裂 爾雅 辨詳《正字》。 疏引《儀 爲 「字相假借。」「孔 懿厥哲 厲 爲 釋訓 置 「抑此 疏 瘕; 禮 藴 \(\frac{1}{2}\) 鄭自云: 「公孫 》作「其 注云: 属」, 疏云: 疏云: 我鞉 婦 通 **《**祭 《説 古古 用。 皇 疏

|詩稽古編卷二十六

子」,舟 爲 稂 者,新 騏 屬 字 文》云: 立 都 云僧 詒 所 展 鼓 爲涼 爲 瘉 爲 伊 改之字 如 而 王 而 粉 禧 騏 阻 一特設 實 一白 爲 齊子豈 有 既 ; 爲 伊 爲 騏 非 周 補 敬 義雖 茅 此 綦; 「所 「幅 勿 植 字皆 改 《説 ,使 無 於 既 純 隰 辨皆詳 图 文》作骤, 謂 也 一弟」,豈弟爲 + 文 唱 戒」,敬 束 相 小 則 君 疏云: 爲 服 伊 義 熊 既 猶矣」、「 異 有 子, 之。 又有 本詩。 羆 人」、「 者 純 介而 泮 長」,隕爲 云弁飾 此言 《爲做; 一禮 是裘」,裘爲 如「良 爲 勿 不甚 改其 屯 是 泮 伊 諸 無 出 爲 其 也。」「浸 盟 也 侯 騏 可 爲 其 字 末 德 相 常 色弁、《顧 圛 馬 圓 立 畔 懷也」、「伊 闡 服 不 遠 其 祝 而 此 當作 猶」, 彼 是也。 闍 者 我 不 是 之 「舟 「其 荷 改 烝 展 者 命 也 . 綦。」《釋 如 人之 猶皆 弁 闍 稂 其 祝 民 巾 似 有 一自 伊 有 爲 爲 誰 有 義 改 之

載 剔; 爲兆 首」, 朄,是 我乎堂兮」, 有 濆 旬 歸 攘 田 爲 懌女美」,懌爲 其人美且 謂之尹吉」,吉爲 一一一一 肇祀 改 爲 爲 蓮 」,敦爲 手 所 緑 斯 饟 仇 也 實 爲 爲 不必 」、「后稷肇祀」、「肇域 其 『墉實 褖 屯 用 鮮 田 仇 祁 上 有 鬈」,鬈爲 狄 徐 畯 爲 堂 孔 心改,而 改之 壑」, 方繹騷 帝 釋 蠻 至 郸 有 爲 基蹈 説 其 何 喜。 方」、「狄彼 一,祁 棖 而 實爲 姞 于農 政 天之龍 文 權 無 不 Ш 莫. 入義反 爲 喜 是 ·獲」, 妨 郊」,説爲 繹 蹈 有 肯 麎; 他 爲 應 「有 於 」,龍 爲 爲 橋 下 饎 人是 迁者,「 「來 東 文 田 驛 彼 政 悼 松 遺 南 蒲 義 縣 爲 刀 爲 攘 令七 愉, 正 鼓 旬 與 者 襚 海 其 寵 橋 遺 緑 來 狄皆 月》。 鋪 有 萠 左 爲 爲 如 兮衣 愉 宣 肇 右 兔 田 槁 隨 也 《大 俟 淮 爲 爲 以 斯 萠 説 爲

是也 成」, 摧 際 明爲 桎; 偷; 旻》、《小宛 皇」,皇皆爲 畝」、《大田》、《載芟》、《良 刺 式 君子攸芋」,芋爲 爲 幽 心唯; 勿從謂」,式爲 資爲 盟 王, 后稷不克」,克爲 先祖是皇」、《楚薺》、《信南山 小 》四敘同。 人 來, 幽爲 「草不潰茂」,潰爲賣, 所 似 暀 腓 續 厲 及敘「哀窈窕」, 妣祖 _, 腓 祀 憮 慝 爾 高宗」,祀爲祫,《玄鳥》敘 3 雅 《十月之交》、《雨無正》、《小 爲 耜》。 刻 花; 釋 似爲巳; 「維周之氏」,氐 無 文音 俶 自 載 旺。 示 先 瘵 哀 爲 祖 焉 「賚 미 「烝 辰巳之巳。 爲 俶 熾 于 與 我 明」, 摧 菑 載 衷 烝 瘵 ; 思 爲 皇 爲 南

康成他注與箋詩異同

康成箋《詩》,與注他典之引《詩》者多有

爲匹」。 以 爲君子之衣,令君子服之不厭」。 耦 逑作仇 其異 引類 殺,「仁心之至」。 於齊,自乘其車。 膏肓》以爲齊侯嫁女,乘 整,言「整治之無厭倦 覃》「服之無斁」、《緇衣》斁作射,注言 往互見,故後 異 居》棣作逮,注以逮 伽 儀禮》疏謂此乃三家《詩》説。 謂 閑習」。 同 爲喻多得賢,彼 蓋因 同 多斷章 注 和 與毛傳「善匹」小異 頗 好衆妾之怨者 訓 先 〇「先君之思,以 加 則 仇爲匹。 通 裁 儒釋《詩 就文立 《韓詩》 擇 疏云斷 焉。 〇「壹發五 ○「威 逮爲安和貌。 __ 》,後見 彼 義故也。 而 其母王 君子好 或反 章。 儀 ○《何 疏申之,言「以好人 實 同。 勖 棣 辯 毛敘,又 豝」、《射義》注 取 箋以爲不忍盡 寡 棣」、《孔 見本 彼襛矣》、《箴 姬嫁時之車。 箋訓 箋以王姬 逑」、《緇衣 他 其 人」、《坊記 箋從傳「富 箋訓 詩 注。 得 逑爲 失 他 「采葛 ◎《葛 子 今列 服 亦往 典 閒 嫁 怨 所

知是夫 《詩》義。 孝於 勖 筮 咎言」、《坊記》體作 實於下」,以證 注以爲 其相與之禮。 交友,取一善而 根美并取之」,證《記》「不盡利」, 見《毛詩》,改之。」〇「采葑采菲,無以下體 從毛敘「莊姜送歸妾」。 《表記 居有常匹,行則 (坊記》注有二説,一謂「采其葉 能作 ,然後與 畜 兆卦之體。 |》「彊彊」作「姜姜」,「奔奔」作「賁 「爭鬭貌」,云「大鳥姜姜於上,小 婦之詩 注以 彼疏以爲「注《記》時未見毛傳,不 彼《釋文》云: 我 八爲禮 爲 一君命 ○「鵲之彊 也。 已,不可求備於人,此 、定姜詩,言獻公當思先君 相 ,則無咎惡之言」。 〇「心之憂矣,於我歸説」, 履,注 隨。」〇「爾卜爾筮,體 逆,臣有逆命 箋謂無 鄭荅炅 訓 一此 彊」、「鶉之奔 履爲禮,言既 以 是《魯詩 顔色之惡,棄 ൬ 入模云: 可 食, 一謂 箋從 則 箋 奔」, (貴), 謂 别 鳥 無 人 之 後 毛 以 窜 無 賁 解 以

^ 其常。 其服爲 箋以 《檀弓》注以爲「今之門廡,其 列 依 頌》。 稻」、「春酒 禮 中,在魚梁以不濡汙其翼爲才,如君 云 引此詩祋作綴,云: 謂 不濡其翼」、《表記》注以爲「鵜胡善居泥水之 「于耜」、「舉趾」、「饁 春酒」爲《豳 表記》注以爲 • ,當於我舍息。 斷 也。」彼 籥章》注以「流火」、「 章, 爲「設 箋以 有德」。 没, 殳也。」箋不易傳。 喻 以 小人在朝,非 疏 女女 禮 證 以 雅》,「朋 不 「欲歸其所説忠信之人」,彼 心 躋 食大具」。 箋以 爲「魯、齊、韓《詩》」。 以 傷 彼 〇「何戈與役」、《樂記 П 公堂, 悲」爲 爲 彼南 譽 鵜 酒斯 綴、表也。 人。 其常」。 當 畝」爲《 ◎七 觱發 爲 稱 ^ 琳 箋以 濡 饗」爲 彼 形旁廣 風 翼 兕 「維鵜 月》 林 〇「夏 侕 所以 爲君 觥 雅》,「 不濡 幽 篇 子以 豳 穫 而 在 毛 卑」。 表 無 稻 風 頌 《周 非 傳 豳 穫 稱 行 注 疏 所

雖

足以 德教 警然,亦不問 我仇仇,亦不我力」,《緇衣》注以爲「待我仇 以爲異」。 賓有孔昭之明德 矣,亦孔之炤」,《中庸》炤作昭,注以爲「聖人 仇然不堅固,亦不 語》成作誠,注以爲「此行 合編,故存」。○「成不以富,亦祇以 前已亡。 之於周之列位」。 我忠信之道」。 〇「人之好我,示 鄉飲酒禮》注 隱居,其 得富也,亦適以此自異於人道」。 甚明,可 ○「徳音 箋以 箋以爲「女不以禮爲 徳甚 我 以示 以 孔 爲 箋以爲「人有以德善我者,置 明」。 在位 我周 爲其 可 昭 此及「德音」今皆從《記》注,然箋義 力用 「孔子時俱在 則傚。 天下之民」。〇六笙詩, 「一、《鄉 義 行」、《緇衣 之功力」。 我」。 箋 未聞,又以爲孔子之 以 飲酒 誠 箋以 喻 箋以 不 賢者伏 [禮》注 可致富,適 爲「語先王之 室家,成 ,其義與衆篇 ○「潛 爲 注 「待 以 異」、《論 以 、處,炤 ○「執 爲 雖 事不 爲 我 示 警 伏 足 嘉

大蜡。 以爲 幽王。 篇、中候握 之,式穀以女」、《表記》注訓穀爲禄,言敬治 善人必與女。 所爲,用禄與女。 女位之職事,與正直之人爲友,則神聽女之 文、武。○「靖共 旦不寐,思其 自夜達旦,「二人」謂父母,文王繹祭之夜 炤易見,不 作瑕,注以「瑕」爲胡,「謂」爲告,箋以「瑕 有明君謀具女之爵位 人」、《祭義》注以「明 此以正衣解之。」箋謂 時未見《毛詩》,依三家爲説。」箋從敘 「黄衣 〇「心乎愛矣,遐不謂矣」,《表記》遐 ○「彼都人士,狐裘黄黄」,《緇衣》注 ·足以 則 河》 狐 (父母。 吕《記》取 注以 逃。 裘,大蜡之服」。 爾 箋訓 位,正直是 爲 八發 」 爲 箋從 神 《禮》 昭 取 共 二明 注, 明 王 爲 温 毛,以「二人」爲 明 發 時詩 較 則祐聽之,其用 具,穀 裕 優。 日_, 不 與。 而 寐 孔 繹 彼 ○《鼓鐘 已」,不言 爲善,言 神之聽 疏云: 疏云 祭之夜 有 懷二 刺刺 達

學》注 軍。 戾天 篓 末 福 名 記 音 讀 今從之。 誠 以 云: 止 職 爲 之 福 謂 臭 載 爲 遠 不易。」箋音 方 制 爲 箋以爲二千 〇八六 一天 氣者」,以 魚 訓 一讀 敬 緇 「爲 注 裁,「言上天造 〇「上天之載, 懷爲 躍 箋 其 之 易 衣 引 孔 君 于 師 訓 光明之德 道 爲 爲 此 疏 淵」、《 注 干 至,「言述行上 及 懷 去聲、云: 勤 難 亦,云「不 以 以 之,《 喻 九 爲 五 知 笔 爲 思,言 服 中 百 化 爲 -0 庸 明 人爲 之 〈荅臨 民 無 服 誤 生 侯 ○「聿 》注 明 中 之 聲 口 述 萬 于 服 「天之大命,持之 平 師 疏 德 無臭」,《 改 碩 行 一帝之 物 以 周 駿 敬 事 得 人人 家以 懷 易 此 爲 未 服 之。 命 清 天 其 二於 ~德,以 多 道 _ , 備 木 無 聖德 六 静 子 容 福 易 六 中 難 師 思 聞 緝 如 也 11: 周 易 軍 庸 至 即 得 其 至 神 熙 禮 義 》注 天 # 殷 名 於 表 聲 Ę 大 筝 窭 敬

欲,乃 美, 欲,遹 以 王 使之然也。 乃 作 爲 以 違 色」、《中庸》 俟之,不 求 人 則 記 一成之」、《 先 爲 追 聿 其不大聲 福 得 鳶 方 斷 伐 述先祖之業 所。 祖 不 飛 口 追 虚 注 追 回,《 章 紂 之道 繼 述 來 以 爲 廣言語 至 念記 (坊記 以 定 此 王 爲 孝 淵 П 箋訓 爲 注 君 〉注優矣。 季 天 表記》注 當 文 則 邪之行」。 嚴 訓 哉。 》注 勤 下, 王 魚 顧 來 以 來 禮 厲 懷 行 改 躍 上下 以爲武 之 战爲歸 一子 器 外 成 爲 後儒皆從《記 本 居 之孝。 作 作 色, 、勤, 言 **>** 以「君子 詩 龜 此 箋 棘 ?有辨。 文, 懷 容貌 箋 豐 非 ,言「我 兆 以 以 作 王 明 欲 以 必 本 邑 之 威 非 喻 革, 築 德 詩 急 示不 吉 求 》注 著 而 我 惡 急 成 有 欲作 行 行 歸 也 其 不 福 豈 占。 辯。 欲 回 鄗 己之 孝 有 , 修 弟 遠 功 大 從己之 京 匪 道 爲 豊 猶 明 君 去 之 疏 簺 德 棘 道 德 水 盛 五 謂 時 谲 以 不 其 善

記

世

后

世

悔,以 衆民 禮·帝繫篇 嚳妃,稷乃帝嚳子。 箋從毛, 芑爲草, 詒 其子孫以 至於今」。 爲敬,言「傳其順天下之謀,以 有芑、武王 不念天下之事 表記》注 孫」。 》注以爲 一,乃至於今」。 [妃」,稷非帝嚳子。 稷 彼 成得 於郊以 迄于今」、《表記 疏 云「翼,助 其所,無 善謀,以安翼其子也」。 訓芑爲 饗 豈不仕 四己 生民》詩、《 燕非 乎? 言帝 既 天, 箋以 醉 枸 有 也, 專 庶 響有 訓傳,孫 箋以 檵 以 罪 如 詒 爲「后稷 爲酒 無 》肇 〇「后稷 酒 渦 豐水之有芑矣,乃 厥 治 罪 檀 此 刀 姜嫄 也。 孫謀 作 爲 肴, 既 證 悔 一弓》注 妃 訓 兆,注 遺 飽 乎? 「數 亦 祀 子 肇 「爲高辛氏 順 則 安其敬 ,「言武 以 以 翼 以 孫 帝 祀 今皆從此,亦 世 姜 燕翼 引《 德」, 觀 於郊, 以 庶 蒙 福 之 嫄 亦 爲 威 福 大 禄 事 從 子」, 乃 無 王 儀 坊 以 祀 之 之 治 毛 傳 罪 帝 戴 而 豈 愧 屋 興 成 佑 漏

子

通。

居,不 讎爲 芮爲 言不讎」、《表記》注以 即」、《周禮 憲憲乃齊、魯、韓之《詩》。 從毛,止 行」、《緇衣》覺作梏,注云「大也,直也」。 又用天意申敕之」。 天申之」、《中庸》右 「成王官人,羣臣保右而舉之, ○「顯顯 盛 于 助,命之爲天子,又申 德美」。 售。 水内、 貌。 屋 失其 屋 漏 令德」、《 訓 漏 箋以 、容德。 箋從 大。 義稍異 鞫爲 非有 職方氏》注以 中 顯 兼二 毛 而實同。 水 庸 中 人也,況有人乎?」箋以 視女 顯 傳, 外。 庸 義亦勝、朱命 作佑, 《記》注允矣。 注 爲 爲 在 以 顯 以 光。 箋得之。 ○「相 室 讎猶 德 爲 作 重 注 〇「保右命之,自 爲 獨 《傳 ^ 憲 福 以 中 居 施 在 荅也」。 乃後命用之, 》從之。 之。 爲天 水名。 注 庸》 〇「有覺 猶 惠 爾室,尚 君 以 二芮 及 箋 子 疏 乃保安 憲 〇「無 歸 箋以 箋以 以 愧 雖 鞘 云: 憲 俎 隱 箋 爲 德 于 爲

祭諸 ^②孔 《詩》在 侯。 基 謀,言「夙 肅 以 有 刺 順文王之意。 斁,注以)「夙 八之業。 三不 惠 安静之政」。 爲始,言「早 雠 神 助 子 侯、云「四 爲 祭 屬 mi 夜 邁》、《執 類 閒 一後,故 二肅 施 起 者 周 爲文王之德豈 基 不 箋以 居 夜謀 惠 愧 在 公, 雕 命 承 笺 . 宗 心 注 題 宥 夜始 有 競》、《 爲 鄭 爲 顯 海 廟 無 以 以 相 密」、《孔 政 異。二説俱 荅 助 之 敬 相 射 甫 惠 鄉 教 順)「維 炅 室 祭 和 屬 於 爲 爲 思文》三 射禮 天 以 模 者 書 明 怠 不 人 諸 順 仲 此 命 安 公言 傳》 子 光 德 惰 顯明,豈不承 斯」、《大 侯 H 惠 ジ注 不不 民 閒 注《禮》 明 來 不 未 〇「生甫 注 君」,《 甫 盡 詩 敬 居 文王之德 助 敢 引 以 書 善, 箋從 祭 即 吕 解 箋 [傳》 注 肅 不 傳 《肆 當 祭統 在 叔 倦 以 念屋 雏 訓 及 從 注 **>** 行 前 毛 玉 夏》、 成 申 射 箋 爲 基 毛 義 指 義 長 心以 作 甫 注 爲 篓 承 先 助 以 漏

> 者」。 樂於 争」,《 箋以 無言 孔 \equiv 角 之言 和 説 以爲箋言其 樊 天下。 衡 一夏 疏 萬 遏 半, 語 廟 以 爲 箋訓 中庸》鬷 設 而 \approx 争訟」。 二軍 中, 荅 於 楅 東 王制》注 辟 泮之言 渠 假 鼻,箋以 衡」、《周 雝 西 臨 人 ×° 爲 形、《禮》 爲 門 者,築 碩》 皆 作 是。 ^ 〇「爲 升 以 -奏,注 詩 肅 班 以 言 以 南 》笺 辟 敬 禮 爲 土 爲 所 注 通 下 爲 皆 • 封 邕 總 鬷 以 訓 水 解 或 金 明 設 水 升 周 軍 假 班 假 其 聲 綴 八人》注 於角。 北 堂 外 雝 一、箋以 禮 義, 無 政 爲大,「言 旒 玉 而 無 爲 教 景 注 色, 兩 也 和 齊 , ● 時 以 皆 如 爲三軍 郊 相 福設 無 所 不 泮 特性 接 有 奏 寂 靡 孔 用 以 水 成 然 大 於 疏 泮 明 其 有

^{●「}假」,原作「格」,嘉慶本同,據康熙抄本、大全本、《四

義 國諸侯之處 處,造郵舍以處 注引此「綴旒」作「畷郵」,以 毛傳尤當。 心於天子,如旌旗之旒綴著 疏謂此乃三家《詩 得焉。 爲「田 其不置辯者,則以箋義爲正矣。 〇右閒 畯 所 使, 督 田 有 約 》,畷郵者,井道相連畷之 不 畯,言成湯施仁政,爲下 臧否,雖出管見,或不 百 離 姓 散。 於井間 於終。 箋以 證「郵表畷」之 之處」。 爲諸 箋勝注 侯 無 然 彼 緊

釋文正義異同

然諸家之説,固有大勝於鄭者,惜其 者,槩用箋義述之,惟箋義顯與傳殊,始旁取 王 不可攷已。 肅、孫毓 家之説,蓋因 毛傳簡質,述者各有異 諸家之説 今取其音義見於《釋文》,而孔疏 孔 氏 正義 以 述毛 義 同,今止 取 義, 畫 否 毛 則畧焉。 書已亡, 存 康 無 傳 成

所遺者,紀之於左,以俟後之識者擇焉。

也。 訝義長。 容曰 義,同沈。 「言其 毛云「不及 鄭音佐佑。 故駮揚。 反,謂兩矛之閒相負荷。 音何,謂 施」,施,王 云「送、御皆百乘」,則亦當音訝。 〇「二矛重喬」,傳: ○「濟盈不濡軋」,軋,舊龜 〇「百兩御之」,御,王 依傳意,直音犯。 宛。」此揚雄語,與毛傳幽閒義本合。 將 「窈窕淑女」,王肅云: 來 〇「逝不相好」,好,王、崔申毛如字。 〇「左右流之」,左右,王申 〇「舍命不渝」,舍音赦,王云受也 刻矛 我 食」,亦 申 以 孔用鄭申 毛如字,鄭 頭 相 應 好」,孔 爲 如 荷 毛。 字。 葉 肅 「重喬,絫荷 不爲 今用舊音。 相 近解用 若七羊反, 魚據反、云 孔引《候人》傳 七羊反。 肅此音義併易傳,不 重 疏,未 美反,謂 「善 絫 王音, 也。 詳 ○「將其 心 孔 也。」荷舊 當 如 案次章箋云 毛 侍 然 日 用 ,以荷爲揭 車 爲 字 沈 不 也。 如字, 窈,善 鄭申毛 之義 胡 請 轊 如 鄭 來 可 頭 如 毛

鄭云「此羣臣之兵車」。 讀 孔又云「王肅諸本皆作爲言」,如字,豈王 朋 亮。 沈義。 皆作 反。 之小戎,故箋申之。」皆不言駕兩馬。 作「僞」者非。 比 報 徂 沈 爲言」,爲,于 也」,好如字,鄭云善也,或 〇「會且歸矣」,且,七也反,沈子餘反。 吸如字。 反。 往往 ,必履反,謂 」,傳云: 書 洛 音異義同。 者 音,未詳 ○「葛 也,徐子 「聊樂我員」,樂音洛,一音岳。 如 〇一小 反。 字 非 屨 音岳之義。 「朋, 鄭 箋、 僞 ·戎」,王云 于僞乃鄭義,孔申毛作僞,依定本也。 無 訓 餘反。 Ŧi. 反,或如字, 疏)「莫 處, 比 孔云: 兩一,兩,王 義,近 比 例 孔 我 也。」王 也。 「既且」 述 〇 士 肯勞」,勞如字,又 解 駕 毛 「元戎先行,從後行 用之。 近用此解。 用 兩 《呼報 之。 無傳, 一肅、孫 ○「穀旦于差」, 下 馬。 肅 既 皆 義乎? 反。 〇「碩 如 〇「不 鄭 毛云「兵 同 且 毓 字, 亦不 〇「人之 近 加申毛 毛 近 解 大 本或 沈 寁 且 訓 者 未詳 鄭 車 用 往 無 音 力 音 好 謂 毕 或

服 之。 字,宜 徐 也。 申毛,亦爲 之行,正應户 反。 自知其音衡? 行,毛音衡,鄭音銜,王户剛反。行字毛無傳,何 反,一云賣 徐七何反,沈云「毛意不 日 ○「烝在 何可反,又音何。 韓 栩 音 》之作嗟,則或是讀本之異。 土晚 本 差,鄭 ○「鬻子之閔 共, 加 昌用 一從鄭 亦 析 栗 作 寒」,謂 鄭 毛訓 王義。 薪義。 薪 且 初 剛 音育,街 鄭云「行陳銜枚」,則 讀 如 養, 佳 反,不 字, ○「保艾爾後」,艾,五蓋 王七也 栗, 徐音當 晚 據此 反,王音 也。 何義未詳。 - 當獨 斯 節 王 不 毛 則 "、뾇, 而 訓 也。 Ŧ. 如 徐 爲 然罩罩」,烝, 反 氣 治 亦破字,然觀徐之且 嗟 作 字,鄭 音 Ŧ 亦 寒 嗟」。 , 荷 浴銜字 義、《釋文》 由 「何戈與役」,何 〇「勿士 ○《七月》,毛傳 恭 通。 也。 韓 H. 六 非 音 反,徐 詩》作「嗟 也 案,毛 釋行 與鄭 〇「共武之 近 列 解用 行 也。 恐 異 徐 Ŧ 孔 恭 義 枚 居 有 無 子 「衆 音 反, 用 而 音 誤 六 餘 鄭 破 勝 及

藉也。 本詩。 徐 酒温 也。 拾。 作臧。 同。 近用如字之義。 冥,幼也。」長,崔直良反。 〇「侵 一條本詩皆有辯。)「噲 「于焉 4世,孔 〇「抑此皇父」,抑如字,詞也。 毛、鄭皆爲至義,應丁歷反。 王云 克」,温,王 歷 爲 噲其 [鎬及方],鎬,王云京 訓 〇「不弔昊天」,弔如字,又丁歷反,下 近解從王。 臧,善也。 反。 逍 殘賊」,傳: 除,應從捨音。 述毛用之。近解用 病 Œ 遥」,焉,於虔反,又如字。 也。 如字者,箋、 〇「日予不戕」,戕,在良反,王 噦 〇「舍彼有罪」,舍音赦,一音 如 王用《江漢》傳義,亦通。○「飲 噦 孫毓《評》 字,柔也。 一誰 其 ○「淪胥 冥」,傳: 適與 廢, 忕也。」一作「廢, 疏義也。 如字爲義,不及鄭 如字不知誰義,近解用 幼,崔音杳。 師。 謀 》以鄭 以 」,適如字,王 鄭於運反 鄭得之,王非 近用王、徐音。 鋪」,鋪,徧 爲改字。上 「正,長也。 徐音噫。 於虔反 辯詳 優 是。 0

待各反。○「神 毛以叔反,❶鄭音亦,下文及「不易維王」同 記》釋文亦云王如字,辯詳本詩。 〇「駿命不易」,易, 王「那,多也」。 乃期望義,亦通。 作其,音基,王如字。 之」,艾,徐又音刈。 證反,四馬也,鄭如字。 二反,義俱未詳。 當訓畏,未詳其義。 我憚人」,憚,丁佐反,徐又音但,下同。 大也」,此 反,又奴來反。二反義皆未明。 ○「中心藏之」,藏,鄭子郎 耆」,云而至反,徐云又巨之反,下同。 是王肅義。 ○「各奏爾能」,能如字,徐奴代 〇「乘馬在廐」,乘馬,王、徐繩 〇「禮儀卒度」,度如字,沈 毛無傳, 嗜 飲 〇「實 基音乃鄭義。 肅得之,本詩 食」、《釋文》「嗜」作 近從王、徐。〇「福禄 孔 以 反,王才郎反。《表 維 鄭 〇「有那其居」, 何 述 毛,莫 期,期 有辯。 若如字讀 聞 〇「哀 沈、徐 本 Ŧ 則 音但 艾 亦 期

「叔」,大全本、《四庫全書》本作「敍」,毛傳作「豉」。

反。 字同 字。 本詩 之,近解從王義。 思亮反。 字,鄭音遜。 鄭 舊方九反,王同,云「不也」。 見本篇。 毛、鄭意同、未詳沈義。 達」,達,他末反,小羊也,沈云毛如字。 王如字,鄭音賚。 鳳反,王如字,云「音也」。 如字,鄭奴代反。 「煙,病 音 王義未詳。 有 辯見本詩。 「來許」。 辯。 賜。 論 也。」與憂義小别。 〇「覆狂以喜」,狂,王居往反,鄭求 鼓 孔以鄭述毛。 〇三王 鄭云 鐘」、 孔以鄭述毛,近解從王。 〇「胡不相畏」,相,毛如字,鄭 〇「邦國若否」,否音鄙 〇「昭兹來許,繩其祖武」,來, 〇「貽 一赫 「於樂辟 孔以鄭申毛,其申鄭亦不同耐義,說 説見本詩。 「斯,盡 ○「柔遠能邇」,能,徐 斯怒」,斯,毛 〇 三 云 厥 〇「其 孫 也。」孔 鄭以風切爲義,孔述毛用 廱」,於音鳥,鄭 謀」,孫,王申 ○「聿追來孝」,來 如 近從王。 風肆好」,風,福 何 述 迁毛,亦 里,王云: 如 〇「先 字,此 〇「慶 一、惡也 云 生 盡 毛 云毛 孔謂 也 怒 芳 如 如 40

申毛。 云: 訓 詩有辯。 厥哲婦」,懿,於其反,沈又如字。 字,云「厚也」。 王 所完」,燕,於見反。 既 王音鳥。 格,沈云「毛如字」。 大」未知誰義。 介,云「大也」。 孔從慎義。 也。王「善也」。 王業之光大,亦通。 ○「來旬來宣」,來,毛如字,鄭音賚。 至,孔申毛從之,近解如字。 肅 令居」,令,力呈反,使 、孫毓皆鳥賢反,云「此 近解如字。 溢,慎。」慎,王、崔申毛,並作順 〇「不弔不祥」, 弔如字, 又音的 近從王音。 〇「無 一既 〇「鋪敦淮濆」,敦,王 近解爲厚義,而未必同 界字毛 此 近從王義,辯見)「於薦 昭 疆爾 ○「假哉皇考」,假音暇 如沈讀,則假音賈,訓大,當謂 假 徐 無傳、箋、疏皆經界 <u>云</u> 爾」,假,鄭、王 廣牡 界」,界,《釋文》作 〇「假 也。 燕國」。 本詩。 」,於,鄭 又力政反, 以 鄭 近用沈音,本 王。 於 溢我」,傳 〇「燕 本詩 顯 申 如 孔以 反。 並 毛 有辯 字 介 音 懿 師 命 如 鄭 鄭

字,王音烏。同「於薦」。○「狄彼東南」,狄,王 毛,近解從至義 雅反,鄭云「暇也」。 申毛用鄭義,近解亦從箋。 反。 字」,未詳所出。 艾」同。 音指,致也。 他歷反,遠也。 反。與《文王》、《大明》同。 徐古雅 ○「朕未有艾」,艾,五蓋反,徐音刈。 ·惡也」。案,鄭云老,不云惡。「鄭」字誤,不知 王都門反,厚也。毛無傳,王義可以述之。 〇「命不易哉」,易,鄭音亦,王 反。 今從徐音。 鄭 孫同 巨移反,《韓詩》音同 〇「敦商之旅」,敦,鄭都 王訓至,音格。 鄭,作剔。 〇「昭假遲遲」,假,古 ○「耆定爾功」,耆,毛 ○「於繹思」,於,鄭 沈云「毛 孔以鄭述 鄭、云 以 與 誰 「保 如 解。 孔 回 如 豉

之異同,因稍加折衷焉。

非也。孔奉敕爲《正義》,故專主傳、箋,陸實吴人,孔爲冀産,意學有南北之分與?在十八人之列,然其釋《詩》,旨趣多殊。陸又案,陸博士、孔祭酒俱生唐初,又同

當必有取焉爾。今亦紀之如左,以見陸、孔諸家之説,或迥與毛、鄭義別,而著之於編,表出之,至《釋文》所引《韓詩》及《説文》與表出之,至《釋文》所引《韓詩》及《説文》與表出之,至《釋文》得任己意,自應旁引他説矣。諸

之作巢,冬至架之。」陸云: 孔辯之良是。○「不可休息」,「息」作「思」, 傳》杜注「塗方九軌」。案,毛云「九達之 功。」孔云:「冬至加功。」所 陸、孔意異,辯見本詩。○《鵲巢》箋:「鵲 道」,義合《爾雅》,杜爲鄭國言之,故異義 案,鄭云: 〇「迨其吉兮」,引《韓詩》云: 姑且」之説爲順。 **房」,云「秦以市買** 我姑酌彼 「迨,及也。」義各通。〇「 金疊」,引《説文》「姑」作 多得 ○「施于中 爲 「架,俗本作加 **夃」,不如** 見箋本各異。 「迨,願也。」 逵」,引《左 毛 寔命 鄭

引韓 風」。 陸以 鄭「持正」義異,水清近之。 云: 不 ○「中心有違」,引韓 云「號召之貌」。 云「寔,是」順。 常也」,不 ○「胡迭而 渚,小洲也。)渚 云「離 同 招 嫡 引韓二 云 韓説 引韓云: 没提其 招 以 爲夫人,孔疑是大夫以下。 引 約 舟子」,引韓 也」,鄭云 韓「寔」作「實」,云「有 手 (沚」, 提引《説文》「水清 或有本。 東 如 微」、「迭」引《韓詩》作「致」, 日 孔 也」,不 水岐成渚。」毛義合《爾雅》。 溢一否曰 ○《江有汜》敘「嫡能 聲貌 招 訓「更迭」長。 「終風,西 以 〇「死生契闊」、「契闊 二徘 굸 招 如 義稍殊。陸又引王逸 言 毛 招 徊 1渚」。 E 訓 風。」毛云「終日 ○箋「涇水以有 也」,毛義 違,很 召。 聲也」。 勤 也」。 案,毛云: ○「終風 苦 見 意 也 孔得之。 底 悔過」, 案,毛 B。」案, 同 案,毛 明 」,與 長。 當 毛。 云 目.

[《]附 尾。 渭 峻,俱通。○「河水浼浼」,引韓作 韓作「誰」,云「就也」。案,毛云「沮」,鄭 與毛云「容貌大」俱通。 異,辯見《附 孫毓引傳云『慉,興』,非也。」「慉,養」義順 ○「碩人俣俣」,引韓作「扈扈」,云「美貌」, 敦,追」明順。 毖」,引韓作「祕」,《説 洒」作「漼」,云「鮮貌」,與毛 刺譏之言」,當從毛。 敦,迫」。 慉,毛興)「鄘」, 故見渭 云「盛貌」,毛以「浼浼 録》有辯。 「毖,流貌。」韓義未詳,《説文》誤 引鄭云: 濁」,「見渭」 也。」孔云: 案,毛云「厚」,鄭云「投擿 録》。 〇「室人交徧摧我」, 〇「王事敦我」,引《 〇「不我能慉」,陸 紂都以南日鄘 或作「見謂 ○「新 諸本 文》作「恥」。 」爲 ○「毖彼 臺 ·皆作「慉、養」, 平 訓 地 有 」,陸、孔 泥 洒 洒」爲 m。 引 泉水」, 「推 一,不 韓 案,毛 浘 <u>Z</u> 引 詩 王 高 $\frac{-}{\Delta}$ 引 如 本 韓

勝韓。

〇「有匪

貌。

案,毛云「文

詳也」、「詳」引韓作「揚」、揚猶道也、較毛 「騋,馬六尺以上也。」 孔申傳 僻之語。」不以冓 騋,定本云六尺,恐誤。」孔 援,取也。 申之爲允。 也。」《玉海》引此。 君子」,引韓 **講。」鄭** 「草行日 夜, 〇「中 章 日 ○「邦之媛也」,引韓「媛 韓「不由 鄘。」孫 貌, 案,毛云「美 謂 申之云: ○「騋 淫 魯 **講之言」**, 義勝。 爲夜。 解之言。」 詩 跋,水行 毓 皆 蹊 匪 譏 牝三千」,陸 同 遂 以 作 肅 韓。 圃 女曰 爲 ,引《韓 又案,《 語 二僴 「邲」,美 夜、《 涉 宫中 案, 得之。 〇一不 無 涉。」 <u></u> 媛」, 日 詩 驗 漢 跋 博 毛 引 所 各通。 色」。 文》云「廣多」。 韓「體」作「履」,云「幸也」,與毛「兆卦之體 貌」,與毛「盛 也」,與毛 尾 分。」勝韓。 倩兮,美目盼兮」,引韓「倩,蒼白 之處」,與 ○「庶姜孽孽」,引韓「孽」作「巘」,云「 ○「緇衣之蓆兮」,「蓆」引韓云「儲也」,《 ○「考槃在澗」,「澗」引 戍」引韓云「舍也」,不 美貌」,不如毛訓「民」。 韓 發 詩 駟介旁旁」,引 發 案,毛云: 》、《説文》,不 〇「曷其 然」。 〔毛「山 云「會」各 ○「鱣 飾 案,毛云「大也」,合《爾 案,毛云「盛 夾水 有 「倩,好 義各通。 鮪發發」, 韓 佸」,「佸」引《韓詩》「至 通。 如 - 毛 韓作「干」,云「磽 如毛 澗」各通。 〇一不 〇「體 義優,辯 П 引馬 「旁 貌 訓 輔。 與 二,馬 旁, 無咎言」, 氓」引韓 「守」明當 色。 云

作

:「援」。

云

以

媛

助

「七尺日

我

戍

申一,

〇「大夫跋涉」,

引

案,毛云:

雅》亦

云夜

晉

灼

云

미

詳,審」義

爲

顯。

淫

盼,

黑

白

魚

著

兩

較

Ę

「中毒,内

云:

中

講

中

云:

三王

城

以

西

見

本詩

巧巧

笑

确

盼,

黑

爲長

,得之。

彊

也。

雅

云

引

名。 案, 毛以 也。 神也」,義亦通。 不相遇也」。案,毛云「往來相見貌」,義順。 侯」,「侯」 ○「方秉萠兮」,引《韓詩 「聊樂我員」,「員」引《韓詩》作「魂」,「魂 孔 習」當。 引韓 未詳 大也。」 〇二二矛 引 萠 美義 用《北 音酉。 離 韓 爲 草也 其義, 引《韓 作「恂盱,樂 蘭, 嗣 較 較 山》毛傳「不得已」釋「旁旁 重 〇「挑兮達兮」,引《説文》「達, 作 明,近解從之。〇「子寧不 「茶,茅秀。」引劉昌宗「秀」作 勝。 孔 一,言將離 當以 喬」,引 詩》「美也」。 孔云「員,助 申箋,「 治 」,「詒,寄也」,不 毛 〇「洧之外, 貌 贈 别 韓「 爲 "》「萠, 之 贈 也」。 秀」如 正。 喬」作「鷸」 以 此 語。 案,毛云「君 草」。 勺 蓮也」。 案,毛 ○「洵 字,得之。 藥 〇「有女 洵訏 案,毛 直 引 如 且 韓 丰 晶 目 雉

詳,當 貌」。 義長。 似沿 굸: 貌 邂 引《字林》云: 水成文,轉 如鄭云「反,復」。〇「河水清且淪猗」, 兮」,「反」引《韓詩》作「變」,「變,易也」, 文》「行貌」,不如毛 至旦」明順。 夕」,引韓云: 云「香草」,韓義美矣。 口「好」,「偲」云「多才」,較優。 孰食」,鄭云「魚飧」,毛訓 逅, 切。 「偲」引《説文》云「彊」也。 從毛訓 案,毛云: 引韓 順 ○「美且鬈」,「鬈」引《説文》云「髮好 儇 引 流 如輪。」義 而風 「邂覯,不 ○「行人儦儦」,「儦儦」引《説 解説。 「發旦也。」不如毛「自夕 韓 日 飧,水澆 作 還 淪。」案,毛云: 各通。 云「衆貌」。 一,便 「婘」, 〇「生於道 固 之 捷 貌」。 飯 爲 貌。 〇「不素飧兮」, 音 Æ 也。」案,毛云 權 引 案,毛「鬈」 儇,利 〇「四矢 韓 周」, ○「齊子發 不固 皆云 作 「小風 引韓 也 嫙 三 好 不 反 發

坎鼓

狀。」則

章引韓云:

銶,木屬。」孔云: 毛用之,未知 云「衆薪也」。 〇「烝在栗薪」, 銶,今之獨頭斧。」案,毛云:)「俴駟孔羣」,引韓 皆不如毛、鄭。 (我」,引《説文》「坎」作「 ○「蹲蹲」,引《爾 案,毛無傳,鄭云「擊鼓坎 丘」,引《 「右」。 毛、韓之相 有辯。 積 四四 泉薪 案,鄭以「栗薪」爲裂薪,孔申 案,毛 錡,木屬 也。 阚 介 引韓「栗」作「滲」,力菊反, 雅 作 馬 反,難辨 與 穀旦于差」,引諸 〇「予所蓄租」,引 「未見其文,亦不審 何 駟 以 也。」義相 雅 郭 毛 .解。 》,見前則。 周 注 馬 銶,鑿屬。」又云: 云「爲 不 一中 其 ○《破斧》一、二 一爲 著 竷」,云「舞 孰 反,韓 央 甲 · 曲 是。 「錡,鑿屬。 也」各通。 坎然」,俱 隆 與 (毛異 高 **後駟」**。 非 〇「坎 説 各 」,勝 見前 是。 通。 厥 韓 曲 《易》爲釋意,似右徐 《韓詩》云: 矣。 毛。 「方有穀」爲非。孔申毛,有「有」字。〇「山 云「高 作「譌」,「譌,覺 矣。○「下莞上簟」,釋「莞」與箋異義,箋當 義明當。 魚游貌 而 冢崒崩」, 也」,與「傭,均」義各通。 云「領也」,義未詳,當從毛、鄭訓 〇「節南山」,引韓云: 〇「劬勞于野」,引韓云: ○「昊天不傭」,「傭」引韓作「庸」,「庸, 俱 〇「賁然 通。 辯見本詩。 峻」允當。 「崒」字陸、孔音讀各異,見本篇 ○「蔌蔌方有穀」,陸作 ○「烝然 案,毛云「 來 夢夢,惡貌。」不如 思」,云 也」,與毛云「動 ○「或寢或訛 ○「何 汕 樔鉏交切。 而左毛、鄭、然毛、鄭 汕

則。

毛,本詩

「宛

徐音奔、毛、鄭

全

用

優

「劬,數也。」不

如

也,不

可易

引《

説

文

汕

汕

案,毛云:

周

作

굸:

「租,

「節,視

也。」不如

毛

也」各

通

引

韓

訛

用不

監」、「監」引

「監

察

〇「視天夢夢」,

引

「方穀」,以

毛、鄭「亂

也, 詳其 申毛 組 擣 苦也」,與 篇。○「哀我填寡」,「填」引韓作「疹」,「疹, 笺,笺云: 遺 之詞也。」〇「旻天疾威」、《雨無正 ○「民雖靡膴」,引王及《韓詩》義勝孔 施 涵 旻天」爲 翩 有 ,報也」,不如鄭云「秉,持」。 拁 ,善也」。 老」,「憖」引 引韓 義 義。 引 意 翮」,「緝」 此皇父」,「 亦 異,辯 韓 通。 ○「我心易也」,「易」引 作 是,孔 濤 〇「秉畀炎火」,「秉」 毛 「抑之言噫。 案,毛云「説也」,俱 云「盡 減」,「減,少 」作「疗」,以爲義 ○二出 詳《附録》。 引《説文》作「咠」,「咠,聶 韓 抑引 以「昊天」爲 云「誾 也」各 人風 韓 愁者, 議 也 也」。 云 〇「僭 通。 」, 云 一意 引韓作 是 同毛,與孔 心不欲 也 ○「怒焉 韓作 通。 ○「戢其左 風 始 減 一》篇。 義 孔 音 少少 既 俱 義 ○「緝 見本 施施 諷 「<u>卜</u>」, 涵 陸 自 不 不 勝。 未 如 以 疏 彊 秋 如

屬國。 「雷」,雷豈謂屋 義,辯 於左 近解 《説文》作「營營」,云「小聲」。 翼」, 也」亦通 云「閒雅之貌」。案,毛云 貌」,義勝。 首」,「頒」引韓 來貌」,聲貌異 貌」義相成。 者弁」,「頻」引《説文》「舉 觀 〇「如食宜饇」,「宜」本作 筰在 引 也」。 祖 各切。 義長。 戢 見本篇。 韓作 韓。 加 引 與毛「右 也」。 〇「平平左右」,引韓作 覩 「宜」義 〇一以 韓 ○「紼 下雷乎? 云 云「衆貌 義 案,毛 一營 而 星 案,鄭 揵 慰我心」, 掩 較 纙 實 音 在 維 誉 左」義各 順。 虔。 相成。○「有頒 _ 罶, 之,「 則在霤猶云在户, 云「緌 青蠅 「辨治」,謂 云: 「儀」,韓云 頭 也 案,毛云「大 引《韓詩》及王 貌」, 通。 薄言觀者」, 案,毛云「 置 揵 繼 也 觀 誉 其 與 多 〇「有 本 「便 引 儀 辨 囓 毛 俱 · 又 作 也。 韓 治 便」, 音 我 通 其 其 往 引 弁 頍 畫。 云

引韓 案,毛「仡仡, 不如毛「立死」、「自獘」二義合《爾 釋,孔用王義。 矣」,引《説文》,辯見本篇。 也。」或無「飾」字、陸、孔意異。 ○「文王烝哉 也」,引王云「亟 陾」,引《説文》「 引《廣雅》「堇,藿」,辯見本詩。 也」,與毛云「遏,止」兩 衆也」。 衆義」允矣。 黄 詳 「榴,反草也。 其 塘仡 流 義。 「捄」是盛土於器,「登登」方言築, 在 仡, 云「盛 中」,傳: ○「無 引 猶 ○「薨薨」,引《爾雅》云「衆 〇「皋門有伉」,「伉」引韓 疾也」。案、「薨薨」傳、箋無 引 陾 陾,築牆聲」。案,毛云 言 韓 翳,因 貌」,不如毛云「高 韓 遏 言, 爾躬」, 通。 皆 黄 也,因 高 金 烝,美也。」與毛 「仡 ○「其椔其 ○「堇荼如 大 所 引韓「遏,病 高填下 仡, 〇「民 也 以 ○「捄之陾 飾 摇 義 所 雅 也。 也。 翳 流 貌 飴 燎 作 鬯 鄭

未

是掊克」,云: 粤。」陸本作「徒歌 湎。」又引《韓 厲取鍛」,皆引《説文》,辯各見本篇。 文》作「醺」,云「醉也」。 孔得之。○「公尸 郭,良是。 璧,又婢亦反,法也,與 「君」義俱通。○「築城 〇「天不湎 云「君 「荏菽,今胡豆。」案,鄭云「大豆」,孔申箋駮 毛云「大也」,得之。○「皇王維 云「坐不安」,毛義 〇「王公伊濯」,引韓云: 洫 義,與韓俱通。 引韓 也」。〇「在 〇「或歌或粤」,傳: 爾 洫,深池」,不 詩》「閉門 以 「掊,聚斂 酒」,云: 長。 來 曰粤」。 菽旆 「耗斁下土」,引 止熏 不出 案,毛云「和説」,鄭 箋異義 〇「于橐 旆」,引 伊淢」,「淢」又作 如 孔以 也。」辯見本詩。 熏」,「熏」引《説 毛「成溝」之當 「濯,美也。」案 客日 飲 而 徒歌 于囊」, 「徒擊鼓日 酒 湎, 郭 辟」,辟音 俱 齊 璞 通。 爲誤 〇「曾 色日 上即 云 云 「取

引韓 毛云 雅 説爲 雅》合,又於文義 也。」上 引 任 通 競」,云: 云: 云「長也」,不如毛訓「謀」。 維、念也。」義亦通、「維」當作「惟 肅 秏 本作數。《韓詩》云: 韓 魚」,「潛」亦作 》,辯見本詩。 也」,義亦通。 然 非,孔義 惡 〇「王纘之事」,「纘」引韓作「踐 作「疹」,云「重也」,與箋云「瘨 」數億 「有清明之德者之宫。」孔申箋,以賈 清 辯見本篇。 即 也。」此 静之廟。」案,杜注 鄭 「執,持也。」又引韓云: 至 義,勝 勝。 億 義迂。 ○「萬 ○「肇敏戎公」、「肇」引韓 日 爲 ○「維天之命」, 秭」。 :「涔」,音岑。 順 韓。 ○「清廟」, 韓韓 〇「胡 億及秭」,云: 『陳穀 〇「來 説 秭 ○「鋪敦淮 非 乃數 本賈 寧 是。 引杜 滇 麰 日 引 名, 逵。 我 「秭。」」案。 引韓 0 韓云 預 以早」 一,「踐 病」俱 「執,服 與《爾 引《 「潛有 ○「執 鄭箋 芸 굸: 濆 秭, 廣

殷武」、「撻」引韓云「達」也、義亦通 撥」,「撥」引韓作「發」,「發,明 大祭也。」 密」較優。 爲「遠」義。〇「憬彼 鄭云「有力」,義長。 車伾伾」引《字林》「伾」作「駓 「枚」引韓云「閒暇無人之貌」。案、毛云「礱 毛云「遠行貌」,義 作「懬」,音獷,云「闊 東南」、「狄」引韓作「鬄,除也」,不 云「撥,治」。 ○「辛螫」,引韓 涔, 絶也」。 韓詩》及《字林》云「白馬黑髦」。 青驪驎」,物色不同,未知 魚 池。」案,毛 與鄭「黍稷」義各 案,毛云「蘖,餘」,義 〇「大糦是 ○「苞有三蘗」, 作 爲當。 「辛赦」, 云「潛,槮」,合《 〇「有驒 也, 淮夷」,「憬」引《説文》 承」,引 日 〇「實實 孰是。 通 見本詩 廣大 有駱」,「驒」引 韓云: 」,走也。 長。 也」,不 蘖 〇「玄王 也 如王申 案,毛 〇「狄 引 枚枚」, 爾 〇「勿 撞 韓 如 雅 案 彼 以 彼 桓 毛 云 毛 云

也」爲允。予禍適」,「適」引韓云「數也」,不如毛云「過

暢於毛,反足助顯其義者,今亦列之於左。又《釋文》引《韓詩》,有義與毛同,而語

也。」 馬舄。 無傳 《爾雅 漂。」薸即苹。 云: 浪笑敖」,「浪」,毛無傳,韓云「起 金飾,士以梓。]〇「芣苢」,毛云: 굸 曰芣苢。」生於两旁謂之瞿。○「采蘋」 蘋,大萍。」韓云: |韓云: 一韓云: 》注云「意 我姑 韓云「亂 「至心曰厲。」〇「毋發我笱」,「發」,毛 以衣 馬舄,車前。」韓云: 酌彼金罍」,毛云: 涉 萌 「公正也。」公正,故可從迹。 〇「委蛇」,毛云: 「天子以玉飾,諸侯大夫以黄 水 也」。 也」,與起合。 E 「厲,謂 「沈者曰蘋,浮者 ○「實維我特」、「特」, 由 ○「深則厲」,毛 「直日 一帶以 「人君黄 「行 F 也」。 」,毛云: 車前,瞿 可 「芣苢, 也。 從 孔引 二謔 韓 洂 日 金

据」。 傳 兮」,毛云: 璣《疏》本此。 据」,毛云「撠 「告也」,韓云「諫也」。〇「八月在 由。」從韓作由。 從獵之。」韓云: 閒曰闥。」○「衡從其畝」,毛云: 也」,韓云「施羅於車 蓷」,「蓷」,毛云「鵻也」,韓云「茺蔚也」。 鵲則彊 毛云「匹 〇「奔奔」、「彊彊 「居有常匹,行則相隨。」蓋本韓義。 宇」,毛無傳,韓云「屋霤也」。 退」,毛無 韓云「樂之甚也」。 ○「和樂且湛」、《常棣》篇。 彊 然。」韓云「乘匹之貌」。 也」,韓 〇「雉離于罿」,「罿」,毛云「罬 傳, 「闥,門内。」韓云: 挶 〇「訊予不 韓 也, 」,毛云: 「東西 作「直」, 云「罷 上曰 韓 ○「厭 굸 耕 也」。 置。 顧」,「訊」, 日 云 П 〇「大夫夙退」, 鶉 厭夜飲」,「 衡,南北 足爲 〇「中谷有 「湛」,毛 〇「予手拮 則 相 ○「在我 「衡獵之, 鄭申毛云: 「門屏之 奔 當 事 奔然 宇」, 值」。 毛云 耕 曰 拮 厭 闥 無 日 陸

較顯。 吠切。 毛云 也」,韓云「小 箋、疏申毛本此。 邁」,「邁 二字爲一 毛無 曰 嬥」,徒了反。 佻公子」,「佻佻」,毛云「獨行貌」,韓作「嬥 厭 無傳,韓云: 「九折之澤」。 俔」,毛云「磬也」。 臙 見《玉 **、傳,韓** 居居 毛云「安也」,韓 云「意 〇「九皋」,毛云: 明, 義,日 也」,韓 「刑于寡妻」、「刑」、毛云「法也」,韓 邁」毛云「不悦也」,韓 一海》引 日氣也。」「見」韓作「曣」,云: 云亂 云「往 不 出 瓜也」。 韓作 「怙,賴也。 〇「無父何怙,無 故 悦 云「填 「縣縣瓜瓞」,「瓞」,毛云「瓝 見 也。 好也」。 「曣晛」。 日 來 韓作 「氣,義 貌 作 也。 〇「度之薨薨」,「度」 1). 〇「見 愔愔」,云「和 相 日 「磬」,云「譬也」。 恃,負也。」○「**佻** 〇「俔天之妹」, 「皋,澤 居謂居之板中,填義 成。 出 「構 明 作「柿柿」,孚 也。」韓併職、現 母何 〇「視 也。 曰消」,毛 我二人」, 、恃」,毛 我 韓 悦 之 邁 云

> 資馬 未明, 也。 應」,「 也」,韓 云「正也」。 收也,收斂得 屈 王申毛云: 或詳其所畧,後儒述毛者,未 此 緜 毛無 勿以異家而忽之也 云「定也」。 羣 縣」,毛無 醜 傳, ○「貃 • 此衆聚。」〇 韓 「芸者甚衆、縣縣然不息。」蓋 屈 云「苦也 其德音」,「貃」毛云 傳,韓作 〇「予其懲 」,毛云「收也」,)右諸 民 而 民」,云「衆 條, 毖 緜 韓云 必不 或 後 祖 緜 闡 此 患 取 其 其 静

集傳用顏注韓詩異同

鄭同 欲采 之意,專在攻敘,故 陋,又語門人,《文選》注 者 録 朱子自言最喜顔 爲一 ,朱子輒 册。 不從,而 然二家《詩》説,多 獨 取 監 其 别 一説《詩 多 異於毛、鄭者,而 爲 引《韓 文 詩》章句 無 有與毛、 原朱子 專家之

異 語 同 ,及《文選》注 者 則置之也。 (集傳)者, 列諸 所 今采《漢 引《 左 韓 詩 書 顔 與 注説《 毛 鄭 詩 司 类 而

注 嘽 者。 車偈 率之同 傳同,不言「非風 毛傳同 祖 足 見此 其婦子 ,喘息 二城 云 敘 愠 〇「同 兮」,王吉曰: 非 説 也 彼 飄 愠于羣小」,劉向曰 來。 一。」顔注 ,不言是婦 有 朔 同 風 貌。」此 蠢 道 方 疾驅 以食來。」此 我 〇「嘽 之 動 .靈、夏 婦 云 云 則 也。」 顔注 車 與 子, 發、車 嘽 人詩。 也 毛、 顧 地。 與毛傳同, 云: 饁 駱 念哀傷 非 偈 鄭 與 彼 馬」, 偈」,但爲 而 有道之風 鄭 偈 : 同,不言衆盛 南 〇「匪 不遇之詩。」此 箋同, 朔 者。」 蠢 顔注 畝 周 「小人成羣, 方, 阚 道。 不 風 顔 言 鑾 궁: 顔 念 北 不言老者 也, 發兮, 荆 注 注 周 此 動 方。」 發發 道 與 云 而 云 貌 與 嘽 毛 顔 無 而 匪 IE. 誠

顔注 鄭以 降。] 顔注云: 三王。 王 以益密。 就芮陙之閒。」與鄭 與鄭箋同 然畔援」,顏注 조 是 相 以鋪 云 知 莫」爲定。○「迺眷西 詩》作 之詩。」此祖 之 刺 牽 首二章言文王同意 貌。 궁 君 引 「見文王之德,而 顔注 幽 ,偏得罪 「謨之」,與 不是怨天。 二貽 ,不言離 ○「旻 王 「言公劉 見天之威,不 云 降 我 小 Z 來辨 福 也。」此二條皆與毛、鄭 天疾 言天遺 敘 畔 穰 箋 止其 毛傳訓 之説 無罪之人遇 攀援 穰」 〇「聖人莫之」, 威, 同 彊 與之宅居也。」與毛 顧 劉 此 軍 ,不言大王。 不不 恣貌,猶言跋 ,此維與宅」,顏注 思 不言 弗 向 物 顔 旅 念 ○「止旅 謀 慮 也。」 言 注 日 ,欲使安静,乃 也。」 弗 : 祀 云 止 一同意 於亂 圖 與 武 居 之衆 鄭 始 迺 顔 不不 成、 政, 一淪 自 祀 引 密」, 扈。 注 顔 同 康 赤 天 孟 無 以 H 横 引 注

《漢書》注。○右烏以穀來事同意,不言是后稷貽民。○右

義。 分 薛 貌 並 舞六代之樂,舞四夷之樂,大德廣之所及。」 之貌」,與毛傳「安」義同,並 厭夜飲」,「厭厭」《韓詩》作「愔愔」,云「和 鳴。」此與毛、鄭 굸 同,並不言鳥聲。○「貽我來辨」作「嘉 一天 竹,以「簣」爲棧。 也。」此與毛傳同,並 岩 曰: 、大、小二麥。○「不震不 不言二雅、二南。 」,與毛傳「小鳥貌」雖 八將雨 〇「以雅以南」、《韓内傳》曰: 緑竹如 「蕢,積 而 螘 , 大麥也。」此與毛傳同, 也。」 簣」, 出 同,並不云鸛 雍 ○「鸛 薛 ^ 一土,鸛 韓 不以「緑 〇「緜蠻」, 薛君曰 君 詩》作 日 鳴 稍異,然以爲 于垤」,薛 鳥見之,喜 騰」, 無安、久、足三 食螘。 竹」爲緑 緑 緑 萨君 毒盛 叢 如 君 「王者 ○「厭 並不 一拳」, 貌 而 蕢」, 色之 日 如 云 文文 則 悦 長 積

二字訓爲驚動。○右《文選》注。 「騰,乘也。」此與毛傳同,並不合「震」、「騰」

唐李

陽

冰、宋徐

鉉

及弟鍇嘗辯之矣。

字音

之異

則

宋 昊 棫

韻

補

書,紫陽用

以

協

毛詩 稽古編卷二十七

《詩》,而

近世

楊

慎之《古音畧》、陳第之《古

吴江陳處士啟源著

字。 古今之字,音形多異,義訓 讀書須識字,讀古人書,尤 亦殊 須識 古人 執今

字

義

正

字

州華 大小篆猶存於《説文解字》及鐘鼎之銘,而 世字,訓解古人書,譬猶操蠻 語 ,必不合也。 夫字形之異,則古文、 幽 鄉音,譯 中

《釋言》者、《釋詁》之别耳。 《詩》、《雅》疏皆云: 《釋詁》、《釋言》、《釋訓》三篇。《爾雅》之 也。 故爲作釋。 書,固爲 六國時人,去古未遠,且源 其《爾雅》所未備,又賴毛傳釋之。大毛公, 有誤解經意者,故爲此書,以示之標指矣。 言》以下,子夏之徒作。早知古今文義不同,後將 由 解之使人 故毛公《詩》傳,亦以「詁 而 誤,則古人之意趣俱 音考》,又推演 疏語觀之,可見古昔聖賢《釋詁》,周 後儒之釋經,反欲彊古以就今,此大惑 古人字訓其存於今者,僅有《爾雅》之 六藝之指歸、尤屬 知也,亦作故,詰、故皆是古 訓,道也,道物之貌,以示人也 其所未備矣。 失,所繫更重於音形, 詁,故也,古今異言 流 古今方國 四《詩》之準的 訓」爲名。 出 至於義訓一 自子夏,傳 公作。《釋 殊 别,

五二九

之識 哉? 中字 聞,古人字訓,幼未經見,執而語之,反數 白漢 俗合者,録 而 俗目者,亦以己意易之。 各逞臆 爾雅》之文既 ,亦附於後。 弗信,固 () 造唐,悉遵 字? 訓 今取《詩》中字訓出於《爾 見,盡 皆 其宜矣。 如 有 讀 書 師 棄 左,其《爾 展置 此爲繩尺。 授, 儒 而 先 不 與《 高閣,毛氏 夫字義之不知 雅 識字,豈 爾 訓 雅》未 近世學者 易 雅》 宋人 實 以 能 載 傳義 雅 厂厭 俗 相 得 而 故 表 下 見毛 書 而 何 溺 稍 庸 裏

也 訓 覃》「言告師氏」, 「盱」。 服 整也。 左右 迨其謂之」、「謂之何 今槩以 燬 1,助也。 火 爲語 盡 ○言, 《駉》篇 也。 詞矣。 〇流 我也。 「醉言歸」,凡六十七「言」字,皆 〇 公 次 哉」、「 求 〇吁,憂也。 此義 也。 遐 事 不謂矣」,凡三見 也。 惟見 ○ 悠, 《詩 《釋詁 謂 思 起 也 ~ 葛 》作 勤

飫,私

也。

○單,厚

也。

《釋

社話》作「

亶」。

戩

說,念也。

每

Ť,

雖

也。

孺

屬

也。

)始,始也。

《釋詁

》作「胎」。

烝

塵

也。

也

〇于,

E

也

C

極

誅

也。

今《釋

言

》作

福

也

1

予也。

○質,成

也。

黎

<u>]</u>	有			1 信			小 諧	詮。	新,	也。
也。○知,匹也。○屋,具也。《釋言》作「握」。	逝,逮也。噬,逮也。《釋言》作「選」。 〇伊,維	目上爲名。○曰,于也。○猶,可也。○	《釋言》作「儳」。○夷,説也。○鞠,盈也。○	也。○侯,君也。○宜,有也。○踐,淺也。	病也。《釋詁》作「逐」。 〇甲,狎也。 〇洵,均	○槃,樂也。弁,樂也。《釋詁》作「般」。○軸,	也。○鮮,善也。○爰,曰也。○濟,止也。	《釋言》文。○肎,可也。○簡,大也。○懷,至	育,長也。○育,稚也。鬻,稚也。孔疏以爲	○實,是也。○任,大也。《釋詁》作「壬」。○

「殛」。○正,長也。○冥,幼也。「幼」或作「窈」。	止也。○對,遂也。○武,繼也。《下武》。○
○毗,厚也。○仕,祭也。○訩,訟也。○	求,終也。○繩,戒也。○遹,述也。○濯,
懌,服也。○癙,病也。○里,病也。《釋詁》	大也。○烝,君也。○融,長也。○誕,大
作「瘦」。 〇徹,道也。《釋訓》云:「不徹,不道也。」	也。○崇,重也。○密,安也。○話,善言
○駿,長也。○淪,率也。○憮,敖也。○	也。○夸毗,體柔也。○价,善也。○斯,
莫,謀也。《釋詁》作「漠」。○腹,厚也。○來,	離也。○由,於也。《釋詁》作「繇」。○劉,爆爍
勤也。○庚,續也。《釋詁》作「賡」。○曷,逮	而希也。《釋詁》云:「毗劉,暴樂也。」〇烈,餘也。
也。《釋言》作「遏」。 〇廢,大也。王肅述毛引之。	○摧,至也。○里,憂也。《釋詁》作「悝」。○
○頻,光也。○靖,謀也。○將,齊也。○	愛,隱也。《釋詁》作「薆」。〇虔,固也。〇荒,
皇,暀也。○暵,敬也。○林,君也。○純,	虚也。惟某氏本有之。○慎,誠也。○鋪,病
大也。○壬,任也。○康,虚也。《釋詁》作	也。《釋詁》作「痡」。〇肇,謀也。〇繹,陳也。
「糠」。○婁,斂也。《釋詁》作「樓」。○尹,正也。	○假,嘉也。○溢,慎也。○夷,易也。○
○詹,至也。○觀,多也。「薄言觀者」、「適觀厥	亦,大也。《釋詁》作「奕」。○威,則也。○仔
成」、「永觀厥成」、「奄觀銍艾」,四「觀」字皆訓多。	肩,克也。《釋詁》云:「肩,克也。」○荓蜂,摩曳
聿,述也。孔疏以爲《釋詁》文。○路,大也。○	也。《釋訓》云:「粤筝,掣曳也。」〇振,古也。○
省,善也。〇登,成也。「誕先登于岸」。〇按,	鑠,美也。○熙,興也。○屈,收也。○閟,

神也。《釋詁》作「毖」。 〇翦,齊也。 〇届,殛	懷,歸也。○掘閱,容閱也。○媾
也。今《釋詁》作「極」。〇競,逐也。〇苞,豐	○忒,疑也。○苞,本也。○穹,窮
也。○以上皆見《爾雅》而傳、箋引之。	縮也。○徹,剥也。○拮据,撠揭
芼,擇也。○調,朝也。○獄,埆也。	租,爲也。○枚,微也。○烝,真也
○蔽芾,小貌。○誘,道也。○疐,敖也。崔	至也。〇每,雖也。〇懷,和也。
集注本如此。○懷,傷也。○契闊,勤苦也。	也。○衍,美貌。○單,信也。○吟
○説,數也。○洵,音絢。遠。信,極也。○	○腓,辟也。○奏,爲也。○佶,正
褎,盛飾也。○聊,願也。○願,每也。○	軽,摯也。○佽,利也。○央,旦
讀,抽也。〇姝,順貌。〇祝,織也。〇僩,	「且」。也。○艾,久也。○空,大也
寬大也。〇簣,積也。〇邁,寬大貌。〇	澗也。○棘,稜廉也。○革,翼也
軸,進也。○將,願也。○泮,坡也。○桀,	長也。〇騁,極也。〇勝,乘也。
特立也。〇甘,厭也。〇暵,菸貌。脩,且	也。○填、盡也。○擣、心疾。○應
乾也。或作「日乾」。〇觀,弃也。〇嗣,習也。	○盜,逃也。○祇,病也。○襄,反
○伊,因也。○偲,才也。○抑,美色。○	廢,忕也。○矜,危也。○敕,固也
目下爲清。〇選,齊也。〇邂逅,解説之	動也。○哉,載也。○假,固也。
貌。○行,翮也。○防,比也。○值,特也。	也。〇載,識也。〇肆,疾也。〇
○晤,遇也。○卷,好貌。○悼,動也。○	○土,居也。○喙,困也。○瑟,豊

○綴,表也。○旒,章也。○共,法也。○	○虞,誤也。○承,止也。○荒,有也。○	○揚,傷也。○搜,衆意。○憬,遠行貌。	也。○振,自也。○養,取也。○龍,和也。	廣也。○佛,大也。○嗿,衆貌。○達,射	○肆,固。○靖,和也。○艾,數也。○光,	也。○福,富也。○靡,累也。○崇,立也。	撫也。○虜,服也。○截,治也。○寺,近	揉,順也。〇肆,長也。〇贈,增也。〇奄,	○兄,兹也。○黎,齊也。○赫,炙也。○	○茀、小也。○汔、危也。○惛怓、大亂也。	也。〇徹,治也。〇伴奂,廣大有文章也。	知意。○嶷,識也。○祈,報也。○壼,廣	因,親也。○論,思也。○許,進也。○岐,
	鬷,總也。○域,有也。○員,均也。○幅,	,總也。○域,有也。○員,均也。○虞,誤也。○承,止也。○荒,有也。	,總也。○域,有也。○員,均也。○ 虞,誤也。○承,止也。○荒,有也。 楊,傷也。○搜,衆意。○憬,遠行	·總也。○域,有也。○員,均也。○虞,誤也。○承,止也。○荒,有也。 屬,傷也。○搜,衆意。○憬,遠行揚,傷也。○搜,衆意。○憬,遠行	總也。○域,有也。○員,均也。○張,傷也。○撰,衆意。○憬,遠。○憬,遠。○憬,遠。○佛,遠。○佛,太也。○佛,遠。○佛,大也。○瞻,衆貌。○	,總也。○域,有也。○員,均也。 虞,誤也。○承,止也。○荒,有· 揚,傷也。○承,止也。○荒,有· 揚,傷也。○養,取也。○龍,遠 場,傷也。○養,取也。○龍,遠	。○福,富也。○廣,累也。○崇, 樓,固。○靖,和也。○黄,聚也。○ 場,傷也。○養,取也。○龍, 場,傷也。○養,取也。○龍, 建,傷也。○養,取也。○龍, 是,誤也。○産,聚也。○龍,	。○福、富也。○景、與也。○崇、。○福、富也。○豫、聚也。○崇、。○宗、明、明、明、明、明、明、明、明、明、明、明、明、明、明、明、明、明、明、明	,總也。○域,有也。○員,均也。○。○福,富也。○廣,服也。○於,衆稅。○。。○。○。○。○。○。○。○。○。○。○。○。○。○。○。○。○。○。	「總也。○域,有也。○員,均也。 「無,信也。○離,是也。○離,治也。○ 」。○福,富也。○離,累也。○ 。○福,富也。○離,累也。○ 。○振,自也。○離,累也。○ 。○振,自也。○ 。○振,自也。○ 。○ 。○ 。○ 。○ 。○ 。○ 。○ 。○ 。○ 。○ 。○ 。○ 。	,總也。○域,有也。○員,均也。 「總也。○域,有也。○貴,均也。○ 」。○福,富也。○於,累也。○詩, 是,問。○靖,和也。○姓,治也。○ 。○福,富也。○於,累也。○詩, 之。○佛,大也。○於,聚也。○崇, 之。○佛,大也。○於,聚也。○宗, 。○振,自也。○養,取也。○院, 。○振,自也。○養,取也。○院, 。○能, 。○。 。○能, 。 。 ○能, 。○能, 。○能, 。○能, 。○能, 。○能, 。○能, 。○能, 。○能, 。○能, 。 。 ○能, 。 。 ○能, 。 ○能, ○能, ○能, ○能, ○能, ○能, ○能,	。○徹,治也。○伴矣,廣大有文。○徹,治也。○游,歷也。○歸,服也。○離,治也。○歸, 問也。○歸,服也。○離,治也。○問,婚也。○歸,服也。○離,為也。○離,為也。○離,為也。○歸,數也。○歸,數也。○歸,據也。○歸,數也。○問,據也。○時,也。○時,故。○時,也。○時,故。○時,也。○時,故。○時,也。○時,故。○時,以。○時,故。○時,以。○時,於。○一時,以也。○一時,以。○一時,	意。○嶷,識也。○併央,廣大有文。○徹,治也。○茂,危也。○悟恢,大元。○福,富也。○广,在也。○悟恢,大元。○届,富也。○广,在也。○广,相。○广,自也。○广,相。○广,相。○广,相。○广,相。○广,相。○广,相。○广,相。○广,相
廣。○隕,均也。○桓,大也。○絿,急也。		誤也。○承,止也。○荒,有也。	也。○承,止也。○荒,有也。也。○搜,衆意。○憬,遠行	尽,誤也。○承,止也。○荒,有也。○振,自也。○養,取也。○鶻,遠行○振,自也。○養,取也。○龍,和	虞,誤也。○承,止也。○荒,有。。○振,自也。○養,取也。○憬,遠也。○鶻,衆意。○憬,遠也。○龍,	虞,誤也。○承,止也。○荒,有。○振,自也。○養,取也。○憬,遠也。○债,衆愈。○憬,遠也。○振,自也。○養,取也。○龍,建,固。○靖,和也。○艾,數也。	虞,誤也。○承,止也。○荒,有。○、禄,傷也。○捷,和也。○黄,取也。○鶻,遠也。○振,自也。○養,取也。○龍,建,固。○靖,和也。○黄,聚也。○龍,是,以,以,以,以,以,以,以,以,以,以,以,	虞,誤也。○承,止也。○荒,有。○福,富也。○豫,取也。○憬,家意。○憬,家貌。○患,固。○佛,大也。○豫,聚也。○熊,以也。○佛,大也。○豫,聚也。○能,以,以,以,以,以,以,以,以,以,以,以,	虞,誤也。○承,止也。○荒,有。○温,富也。○廣,聚也。○憬,聚也。○憬,聚也。○憬,聚也。○鼎,谓也。○佛,大也。○儹,聚貌。○忠。○振,自也。○唐,聚也。○常,似。○康,以。○康,以。○康,以。○ □ □ □ □ □ □ □ □ □ □ □ □ □ □ □ □ □ □ □	虞,誤也。○承,止也。○荒,有· 。○福,富也。○離,累也。○ 。○福,富也。○靡,累也。○ 。○福,富也。○靡,累也。○ 。○振,自也。○ 。○振,自也。○ 。○ 。○振,自也。○ 。○ 。○ 。○ 。○ 。○ 。○ 。○ 。○ 。○ 。○ 。○ 。○ 。	虞,誤也。○承,止也。○荒,有· 虞,誤也。○海,聚也。○歸,增也。○ 婦,固。○靖,和也。○費,聚也。○ 肆,固。○靖,和也。○費,聚也。○ 肆,固。○靖,和也。○費,數也。○ 肆,固。○靖,和也。○費,數也。○ 時,傷也。○費,聚也。○ 常,。○ 龍,。○ 益,。○ 益,。○ 益,。○ 益,。○ 益,。○ 益,。○ 益,。○ 益,。○ 益,。○ 。○ 。○ 高,。○ 。○ 。○ 。○ 。○ 。○ 。○ 。○ 。○ 。○	虞,誤也。○承,止也。○荒,有· 高、高也。○禄,爱也。○情恢,太元,兹也。○豫,歷也。○广,积也。○禄,聚也。○广,宠也。○广,宠也。○广,宠也。○广,宠也。○广,宠也。○广,报也。○广,报也。○广,相也。○广,相也。○广,相也。○广,相也。○广,相也。○广,相。○广,相。○一一一一一一一一一一一一一一一一一一一一一一一一一一一一一一一一一一一一	意。○嶷,識也。○祈,報也。○荒,有。○徹,治也。○斧,危也。○悟攸,未死,然也。○媾,后也。○幡恢,大见,兹也。○媾,居也。○媾,居也。○媾,居也。○媾,居也。○媾,居也。○媾,居也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○媾,相也。○横,我也。○媾,自也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○横,聚也。○荒,有之。○横,聚也。○横,聚也。○荒,有之。○流,有之。心。心。○流,有之。○流,有之。○流,有之。○流,有之。○流,有之。○流,有之。○流,有之。○流,有之。○流,有之。○流,有之。心。心。心。心。心。心。心。心。心。心。心。心。心。心。心。心。心。心。心
意。○疑,識也。○哲,我也。○新,建也。○ 意。○疑,識也。○任矣,廣大有文。○徹,治也。○於,危也。○惟攸, 所,故也。○魏,齊也。○腊攸,大 是,故也。○韓,長也。○贈,增也。○ 肆,固。○靖,和也。○群,是也。○腊, 康,信也。○群,是也。○贈,增也。○ 時,信也。○産,果也。○营,聚也。○ 是,誤也。○承,止也。○荒,有 震,誤也。○承,止也。○荒,有 。○届,均也。○益,治也。○ 。○振,自也。○養,取也。○荒,有 。○债,均也。○益,治也。○ 。○债,表 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○债,是 。○偿,是 。○е,	意。○嶷,識也。○许,報也。○熊,遠。○微,治也。○伴矣,廣大有文。○徹,治也。○伴矣,廣大有文。○徹,治也。○肆,長也。○婚,常也。○肆,長也。○婚,报也。○肆,長也。○婚,报也。○婚,报也。○婚,报也。○婚,报也。○婚,报也。○婚,报也。○婚,报也。○婚,报也。○婚,报也。○告,报也。○婚,报也。○告,祖也。○告,祖也	。○振,自也。○養,取也。○龍,親也。○続,自也。○養,取也。○許,建也。○時,我也。○時,我也。○時,我也。○歸,好也。○歸,服也。○歸,好也。○歸,服也。○離,治也。○歸,假也。○歸,假也。○歸,假也。○歸,假也。○歸,假也。○歸,假也。○歸,我也。○歸,报也。○歸,我也。○歸,我也。○歸,我也。○時,我也。○時,我也。○時,我也。○時,我也。○時,我也。○時,我也。○時,我也。○時,我也。○前,我	也。○佛,大也。○嗿,衆貌。○也。○佛,富也。○降,爵也。○群,是也。○腊恢,大元,兹也。○肆,是也。○腊恢,大元,兹也。○肆,是也。○腊恢,大元,兹也。○肆,是也。○腊恢,为是,。○福,富也。○靡,聚也。○腊,为之。○福,富也。○靡,聚也。○尉,治也。○尉,粮也。○佛,大也。○降,聚也。○路,和也。○路,	等,固。○靖,和也。○艾,數也。○ 一、故也。○。○ 一、故也。○。○, 一、故也。○。○, 一、故也。○。 一、故也。○。 一。 一。 一。 一。 一。 一。 一。 一。 一。 一	○福,富也。○靡,累也。○崇,明也。○歸,服也。○將,帝,也。○所,報也。○縣,。○歸,增也。○歸,治也。○歸,。○歸,,於,益也。○歸,長也。○歸,。○歸,,長也。○歸,,長也。○歸,,長也。○歸, 長也。○歸,,長也。○歸,,長也。○歸,,長也。○歸,,長也。○歸,,長也。○歸,,長也。○歸,,長也。○歸,,長也。○歸,,長也。○歸,,以之。○為,以之。○為,以。○為,以。○為,以。○為,以。○為,以。○為,以。○為,以,以。○為,以,以。○為,以,以,以。○為,以,以,以,以,以,以,以,以,以,以,以,以,以,以,以,以,以,以,以	型。○虜,服也。○截,治也。○ ○徹,治也。○伴矣,廣大有文 一徹,治也。○伴矣,廣大有文 一、兹也。○隸,齊也。○情怓,大 一、兹也。○隸,齊也。○情怓,大 一、兹也。○韓,長也。○許,報也。○ 親也。○許,報也。○	順也。○肆,長也。○贈,增也。○元,兹也。○肆,悉也。○伴矣,廣大有文章,悉也。○疑,識也。○皆恢,大亂,然也。○歲,識也。○許,報也。○壹,親也。○諱,思也。○許,進也。○章,	元,兹也。○黎,齊也。○赫,炙也。○微,治也。○伴奂,廣大有文章:忌。○嶷,識也。○伴奂,廣大有文章:惡。○嶷,識也。○伴奂,廣大有文章:親也。○論,思也。○許,進也。○忠親也。○論,思也。○許,進也。○忠	P,小也。○汔,危也。○惛怓,大亂○徹,治也。○伴奂,廣大有文章忌。○嶷,識也。○祈,報也。○壼親也。○論,思也。○許,進也。○	○徹,治也。○伴奂,廣大有文章思。○嶷,識也。○祈,報也。○壽,想也。○許,進也。○	○嶷,識也。○祈,報也。○壼也。○論,思也。○許,進也。○	,親也。○論,思也。○	

深,深也。 〇以上皆毛傳文。

又其文具載傳、箋,可展卷而 可近俗也。餘或有 重語、《雅》、傳多隨文取義,兹弗贅及焉。 言,我」、「謂,勤」、「觀,多」三義,以其尤不 訓有一 見者,有數見者,兹獨 辯證,已别見,故弗著。 知也。至經中 著

傳皆訓 賓之初筵》、《大雅 聲,古雅切。」然則大者,嘏之本義也。又 文》云: 大也。』《爾雅·釋詁》云: 之禮,故嘏又爲予福、受福之稱。 儀禮·特牲》、《少牢》、《有司》命祝嘏主人 禮記· 大、《周頌 「嘏,大遠也。从古叚借也。 郊特性》注云:●「嘏,長也 • 卷阿》二詩, 我將》、《載見》、《魯頌 「嘏,大也。」《説 「嘏」字毛 ^ 小 古雅切 雅

嘉慶本同, 據康熙抄本、大全本、《四 庫

阿》詩 福 閟 嘏」訓受福,未嘗徑言福 之通稱,忘其字義所自出 官 於《雅》之二「嘏 訓 詩 「嘏」爲 一概 福 一字毛 而 訓 無 後 子 **冰傳**,意 儒 也 福,於《頌》之三 因 矣。 一之,遂 自 必 蘇 同《 氏 以 雅 釋《卷 嘏 》矣 爲

平 也。 FL 大 龜蒙 肅 有 奄 同 皇矣》「奄有 ? 傳 以 天下」。 」義 」、「覆」二者,孔 訓 同 亦 同 」、《玄鳥》「奄 《臣工》「奄觀銍艾」,鄭云「久也」,王 \sim 詩》中「奄」字,毛、鄭 也。」《書》「奄有 亦相 爾 義 訓 旁 述毛。 雅》 同一, 取 《執 通 「淹」 四方」,毛云「大 文云: 耳。 競》「奄 《閟宫》「奄有下國」、「 然則「同」者,「奄」之本訓 有九有」,鄭皆 義,非「奄」字 案,《 疏 四 有四方」,毛云 奄,蓋 以 爾 海」、「奄甸 爲 雅 訓 義 也」, 釋, 也。」又云 釋 同 三云「覆 本 言》 鄭 多 要之 訓 萬 異 云 姓 云 也 奄 一同 義。 與 其 覆 有

> 有哉? 文迄 可以 也,止 覆也。 有」亦云在忽遂之閒,皆彊 以釋《臣工》之「奄」,觀朱子釋《皇矣》 義訓 義。 大有 (詩》旨: 蒙荒 荒又兼 轉增 忽言之,周之有四方,自 然 餘 武 也,藏也, 殆不 大有 未 也。 奄 多 i,非古· 有 也 乎「大」矣。 爾 訓 餘也,息也。」又增 歷 又欠也。」《 也。 爲「忽」者、《 年 矣。 蓋 取 所,始 也,遽 」與 夫銍 宋王 蒙 玉篇》云: 説文》云 支 也。」經後人借 得 安 荒 在 古 唐 之耳, 石 E 經 皆 一年之内, 韻》云: 「欠」、「息」 始 季 以 用 覆 就今義 미 而 大也 忽 後 覆 義 云 奄 一義 用 也 忽 閲 猶 忽 内 m

外,餘「 「非」 煩 訓 用 釋, 匪」、「 匪 耳 而 輒 其 鄭 非 く能 訓 氏 義 箋《 字乃車 非」者, 同 詩 猶 軫, 匪 除 不 本 非器 淇 與 筐 篚字,借爲 澳》「有 「弗」 似竹篋 耳 匪 者 無

專爲 文辨之也。 也 非 説 文》 義 匡字亦然,故 匪 漢 ,器似竹篋。」今以 世 近 古, 匪猶 既 王 篚 爲 既敕」,鄭解 器名 代 匪 須 而 頒 厞

冒

通,「瞻卬」、「卬 印 盛貌、《詩》「 有 (大雅》「瞻卬昊天」是也。 詩》「高 否」、「印 一音三義。 印 ,从丘从下,音節。 Ш 烘于 仰 顒 止」、《説文》引作「印 五剛反者,我也,《詩》「人涉 顒 止一字與 煁」、「卬 C[] 卬」是 「仰」通 盛于豆」是 望 「顒卬」字與「昂」 一欲有 也 魚 所 兩反 庶及 也 止,又 者, 也, 义

之 借也。 用 篇。 嗟」,皆歎 猗 則 猗,本訓 語 潛》、《那》二頌之「猗」,與《齊》之「猗 儺 《詩》言「猗」凡十有七,而分見於十 詞 詞 爲 也。 也。 柔 犗 緑竹之「猗猗」爲美盛,萇楚 古拜切。 順 《伐檀》三「猗」,與「兮」並 節 犬,字見《詩》者, 南 山》之「有 實 其 俱

> 音者也。 於宜反。 於綺反,兩驂之「猗」於寄、於綺二反,餘皆 惟 爲「依倚」,則皆指事之詞 《淇澳》之「猗 《巷伯》之「猗 之「倚彼女桑」,毛以「猗」爲「角 爲「倚」,則指 猗」,毛以「猗」爲「 「依」; 「猗儺」於可 《車攻》之「兩驂不猗」,正義以 析 於宜乃猗之本音,此借 而觀之,兩「猗」與三「猗嗟」、 于 畎谷,皆貌物之詞 重較 反,重較、女桑、畝邱三「猗 畝 長 邱」,毛以「猗」爲「加 兮」,《 則指 也。 釋文》以「猗」 草木 此諸「猗」者 也 鄭 義 而 東之」。 《七月》 而 以 不 「猗 「猗 爲 改

然《 儺」,其「 漣 猗」及《節 猗猗」,其「禕」亦作欹。 猗」,其「掎」之借乎? 猗」、「直猗」、「淪猗」,其「兮」之借乎? 爾 雅 何」亦作婀、旃、複。 引 南 此 山》之鄭義,其「倚」之借 作 瀾 漪 重較、兩驂、 之借 」,則 之借乎? 此 乎? 三「猗」爲 畝 女桑之 邱之 乎? 猗

無本字可歸,當專於借。「漪」之借矣。惟「猗,長」之義《節南山》毛義。

聲,與諸將異義。 尊,亦言「將將」,門爲嚴正,尊爲盛美,皆非 聲,乃借也。 金,亦當爲金聲。其「將」、「鶬」二字之爲 《説文》無篆,而「臤」字注有「鏗鏘」字,鏘 鐘、磬管之聲言也。 '鎗」爲鐘聲,見《説文》,是本義。 》,字異 將將、鏘鏘、 而音義同,襍指 又《縣》之應門、《閟宫》之犧 瑲 瑲、鎗 五字惟「瑲」爲玉聲、 鎗、 佩 玉、八鸞、鼓 鶬 鶬,皆 「鏘」字 見 从

字形

往曲爲遷就,以便俗書,於古人製字初心,又甚焉。原其變隸之初,務在去煩趨簡,往古籀之文,一亂于斯,再亂于邈,而邈

文。 身。 者、支、发。木、米。干、、、、、、水木。之首。 奔。「走」歪。殊夭趾之形,「冉」、♠。 而爲「億」,改「終」而用「終」,更「圅」而作 難分,茲、从二玄。 析而今連者,莽、茻。垂、垩。尾、尾。並丛。 異垂毛之象,「戎」、成。「早」や。離於甲 父本作以,从八舉杖。八者,手也。 履。 不能復顧,是可慨也。 「函」,舍「卓」而取「厚」,「囐」還作「壽」, 「朋」形異鳳,古朋、鳳同一,字皆作「咠」。 「履」本作 出」本作业。 棄」乃爲「乘」,「庚」本作「煎」。 形正 ·舜」、舜。「鄰」 ^賴。去其炎文。本紆而今直 至於施作偏旁,尤多譌舛,如立心疑 以至孝、本作寺。 義非月,「言」本作「語」。 體斜 而 茲从艸茲省。 顧 季音教。 整、惟諧 姑舉一二言之,如 無 失事音愆。 教、教字皆从此。 易 俗目,莫覩 杖指,「奔」、 溷 而 「衰」祭。 變 反 偏 本 僡 之 原

字。

之目,即

以。

與

厶

音私。

不

殊。

勺 中音。

包、旬、匊等从此。

相

類

弘之乙, 古文版

遷、票之的,無音,説見《卷阿》。

又勺之与,無音。

句词。

之山,与音糾。

與

粟、栗之卤。

音

西者,覃之鹵、鹹省。

覆之而

呼

訝

切。

與

妄作。 此。 弓。 書,而以古籀 **貳爲耆,並移右而居左。誰分市、音弗。市,** 衞包之俗字,而又以漢隸爲古。 隸變之元形。 則今世之經文是也。 包之改定,遂變古經之字,悉從世俗之書, 造字,猥拙甚於江南。」 迄乎唐世之開元,加以 改易字體,邵陵王頗作僞字。北朝喪亂,書迹猥陋 齊、梁喪亂,譌字肆行。《蓺苑雌黄》云: 寫,舛誤尤多。 本作「岜」。 約而舍多。 如月。敷敷。以方而易寸,躬躳。 久、音旨。 支音朴。似文,肉、**月勝、**俞等字从此。 凡此借差,難勝指摘者也。 基作堇, 耒作耒, 故漢以 莫辨口、口。 市上从文。 爲古。 來所謂今文者,乃程邈之隸 迹其譌謬之由,多因後 自南北 唐以 爲布,有爲有,叒爲灰 自作飞, 音韋。 觀其 分崩,同文莫觀 後所謂今文者,乃 體裁之陋 圖、石、倉、啚等字从 **屮作力**,俱 況經後儒傳 斯文墜地 去吕 併 「蕭子雲 人之 而 非 衞 从 更 軭

字。

恆億。

之月,亘亘,須缘切。

之回,桓、宣等字

小。

郭郶。

之鼻,

音郭。

淳澤。

之享,皆爲享

常。

業業。

从巾,此象形,非

佩巾巾字。

而並作

田。

尉

聚。

票、奥。

寮交。

从火,絲、絲。

京、

也。

畀、 卑。

鬼鬼。

从

仚

音弗,鬼頭

也。

而

同爲

賣之囧

,與羅、羈之网,睪、曼之目。

似西

而

皆从亘。俱作日形。

似四面非

四者,鑒之皿

疑已。

思、息。

細經。

从囟,音信。

畏、

马音節。

爲卩,於御、卬則疑邑,於遷、卷則

在擊、愈則溷大,在昇、昇則

溷

丌。

音基。

省

艸頭

亂廿,人汁切。莫、共等字从此。

易鬥爲

廾,

小

,挑手似才,広音忒。育、充等字从此。

首如

云,

聞 差譌 八未徧 甚 於兹 未久者,尚 陳 於於 窮於六蓺 左。 竊謂 口 沿 了●姑先及乎四詩,謹 速 襲 更,不揣 已 深 者 愚蒙 固 難 ~,欲 悉 正 加 疏 所 考 而

圣。 辨字。 逑訓 囟 重 ○葉,中从卉。 旁側」字。 崩 仇 本 音 斂聚。 〇芼,當依《玉 〇谷,从 俗加水、徐鉉 信。 又作展。 本 〇飛,象形。 求,本「衣术」字。 〇差,本作歷。 ○服,左从月。 作 琴瑟」,本作 〇得,本作导、得。 〇采,从爪木,與 水半 鴡。 卉,蘇合切,三十并也 〇「反側」 見 非之。 〇之,本作业。 一篇》作 〇綌,右从谷,谷 出 於口。 一
天
瑟
。 〇「左右」,上从 當 「求 ○「逑,匹」,字當 現。 、釆異。 作 輾 俗作谷,非。 取」當用 ○恖 仄。 ○覃,本作)友,本 本 釆,古 作 側,乃 心,上从 州,从 即 此 展 逑。 臄 4

> 螽,本 同。 同。 文》以 刻石 睪,睪从目从卒。 字 價」,當依《爾· 〇「螽 也,本作里 ○「公私」當 安宣當作)「薨 與 ○害, ○履,从月。○「綏安」,字或云當作 作以,从 觥爲 薨」,當 依鄭義當作肝,凡「肝扶」字][作 斯」,當 室,隸作宜。 谷字 蠡,上从只。 俗字。 ,或作筐。 訓 寍。 作 雅》作 異。 何,當 依 依 Z 40 从 \wedge 〇卷,本作卺。 〇矣,上从目,台、允等字 泥輒切。 廣 爾 人。 池 雅》作 作曷。 私,禾 一 一 俗 雅》作蜤、《七月》 ○爾,今作 〇嗟,本作譽。 穳。 实古 〇「告語」 - 夢,《 觥,本作 也。 〇以,本作目,秦 作 無 寧, 文「終」 齊 爾。 ○筐,隸文 並 澣,本作 一當作 願 . 觵 同。 〇「虺 雞 詞 * 字。 鳴 同 娞。 繩 説 左

^{■「}編」,原作「偏」,據大全本、《四庫全書》本、嘉慶本改。

用

兩

御

用

居。

兩

○棄,从去、它骨切。 城」,當作戰。干,犯也。 ,从彳,从个,从 ,二十四銖也。 ○魚,本作烉。 ○ 態,右从見。 ○捋,本作夏。 題,當作題。 ○秣,本作餘。○肄,本作 華,本 麟,大牝 後,隸从 雒。 凥, , 木 ○矣,俗作侯。 作藝。 大雅 上。 處 〇巢,从 甘、音殷。 (止,从 兩,再 鹿 Œ **元**,居 也。 ○經,或作 ○喬,上从夭。 也。 俗 毛,作「尾」。 . 角,本作弱。 作 抑 p 也 巛,象三 未 椓 廾,音)趾,本 切,隸 ()施 篇 非非 義 今通 又 類。 同 仰 拱 皆 作 切。 退,俗 融。 本作 義當 女從,當 作偈,鉉 伐、翦商,當作剪。 相 降字。《皨螽》「降」,當作夅。 艸,今作草。草,本自保切,俗用 作阜字代草。 〇從,隨 鼠、牙、字各象形。 臤 承 憂,當作息。 被鬄,字當作髲。 ○緎,當依《説文》作黬。 瀕,鉉 服 作 釜俗作釜,非。 隸 作 訝。 也。 作从。 作 退。 行也,去聲。 云别作憩,非。 敢。 云俗作 ○蘇, ○食,从人,音集。 蘋,乃俗字,本 ○阜螽,當依《 〇亦,本作太。 ○素,本作綤。) 搜落, 俗 濱,非。 ○ 麦,當作废。 作蘩。 ○夙夜,本作 从,相 〇下,本作丁。 ○速,訓 〇勿拜 當作 聽 变。 作薲。 条錡,錡 7,拜當 阚 争,下江切 許 用 召,當作 靁,俗作雷 从 爲艸字, 雅 也)降,乃 包。 从 復,古作 ○憩,本 平聲。 標 作 作 1 當作 ○翦 皮及 梅 扒。 誎 皨 中。 别

古文作弃。

○尾,从倒

毛

在尸

糯,篆作

婦。

旗貌。

敷、岐字从

支。

腹,本作腹。

漢,本作漢。

斲。

〇千

繩」,當

依

阚

雅

》作

憴

夭,當作

楪。

作止。

○定,訓

)麟

趾

,當作麐。

鳥

从臼,

象巢

形

在

本作房,篆

作

居

门,蹲

也,亦作踞

字,本 當依 力冒。 作上。 沱。 作せ。 及字。 梅當 襛,左从衣。 从亡,與「朔朢」字異,下从壬。 脱」,當作娧娧。 俗作衾。 ○柏,俗作栢。)發,上从癶)閔 齊,本作脅。 作某。 鉉云别作池,非。 《爾雅》作遾。 當 作 ○寡 塞,乃邊塞 〇死,本 作愍。 游。 温 抱、當 某, 从从)稠,依 一,當作 ○離,隸作 音撥。 酸 ,, 作) 徃,隸 作 ○ 奮,从 愈 吉 聲,隸 〇獲,下 ○敖,本作 頒。 **広**。 果。 島。 一先代切。 ○尨,俗作狵、厐,非。 寝。 鄭當作幆。 《唐》噬 又發乃破體,正當作發。 温,乃 作 〇送,本作选。 〇春,本作曹。 抱乃捋之或體。 变, 〇今,下 〇乃,本作ろ。 雍。 字。 徃。 · 从 又。 育同。 殼。 水名。 塞淵 〇平,本作亏。 音挺。 〇也,秦刻 从)選,俗 1 〇冒,上从 、允塞,當 池 遊,乃俗 省作壹。 〇上,本 本作 作 ○望, 7 〇逝 二脱 選。 石 古

泮,當 彊也。 閹。 北也。 悼,本 異。 隸 作砅 兵,本作妥,从斤奴。 也。 月。 彡,須乃古文。 别《詩 ○慰,本作恳。 院, 作 寒, 陳,俗作 ○暴,依 音冒。 **酒**,右从唇。 層。 亦亦 德行字當作悪、惠。 作 當作 作情。 本 \sim 惟《北山 》字皆當作雁 作 終 判。 作 ○躬,隸作躬。 . 陳。 濿。 晥 風》當作会。 窦,从一, 報, 義當作暴。 〇肯, 《小雅 沫,荒 》偕偕當此義,餘並 从卒、从 須 ○ 突,俗作深,非。 〇 恋, 从哭 播、 瀰,本作 待,當 本作 ○漕,本作潛。 从二 内 語 杕 等字 切 h 二字皆从直 肎。 冰, 作 竆 艸 杜 人。 敖 渝 鼓,右从少。 从 洒 類。 下 當作人。 》、《大東》 並 ~,當作 又。 面 从 陰,水南 同。 同。 也 人,从 又 Ľ,)雁、鴈 當作 濶 須 惟目 傲 属 暫同 德 左 本作 本 同。 肩 仌。 从 冰 升 Ш

穴。

	難, 从 不 俗	飲。○殷,當作慇。○寠,从宀,不从 从豕。	イな	〇 中,也 电 皆 昔 齊,隹 七 寺 导 丰 E。 〇 次, 一 友,當	衞、隸作衞。〇宿、本作宿、下恆、古文 州。 「清揚	乃卷耳。○蜀,俗作西。○毖,當作泌。○ 睦字。	當作樣。○《邶》、《唐》苓字皆當作蘦。苓 本作器	爵,本作癥。○「榛,栗」,當作亲,惟《青蠅》 │ 牆茨、;	前。〇籥,如笛者字當作龠,後並同。〇 〇 〇它,俗	瑣,非。○「流離」,流當作鶹。○肯,隸作 成施,	求。○戎,本作戟。○瑣,右从小貝。俗作 / 作尟。	丘,从北一。一,地也。〇裹,今作裘,本作 泚,訓	壓訓息,當作齂。《假樂》、《泂酌》同。○│○愛,	髮。○肄,依毛當作勩。○念,上从今。○ │ 俟,大	作蹎。○御冬、御竆,當作禦。○冬,本作 / 文,依	鞫訓竆者,當作竅,从宀籁聲。○顛覆,當 从仌爲
稟,隷作栗。○梓漆,當作桼。○升,本作		作鶉。〇彊彊,字或云當作翞。(蒙,乃《唐》蒙草。○與,俗作要。(「作衰。○蒙覆,當作圂,从厅真保切	「清揚」,當作眻。《鄭》、《齊風》同。○展	字。○「副笄」,副當作髻。○「揚且」	本作老。○讀,右賣,音育,上从廚。 廚,古	茨、楚茨,當作薺。○舊作冓,非。○長	俗作他。〇慝,乃俗字,當作怂。(當依《説文》作鱦麗。〇乘,本作藥	鮮,乃魚名。○網,本作网、罔。(鮮明,當作玼。○鮮,依王肅訓少,党	愛,當作尚。○「踟躕」,本作峙踞。(也。「待」義當作竢。○於,本作於	文,依義當作滂。〇灸畟,隸作赤黑。	从仌爲俗。〇雪,本作雪。〇雱乃旁之簽

前。

求。

琴。

作

鞫

作攷。 作斐。 喜同。 非。 攷俱 莧。 俗 竿。 **屮音徹**。 隸 蝃 竹,當作菉筑。 破 蠐 省。 許 作 从犀,或又 櫱、櫱、薛等字 文》作 本 公通。 胡官切。 本作嗇。 :衆,又 〇 卑,上 的 〇 農,隸作農。 ○磨,本作 ○凝,本作冰。 聲 作絕。 螮 壽考、考妣當作考。 邦,从 蝱 璓。 譌 俗去屮从艸, 當當 作稚,皆誤。)較,本 作 下兀。 凡 朝 作 **飛。** 半。 ,俱 弁, 確。 眉 匪,當依《禮記 國 苗 本 諧 作 名、 本 本)孽,本作 作 官 較。 磨字俗。 ○嘉, 説 稺, 作 奥 〇善,本 作 地 魚側 其誤已久。 朝 文》以 - 睂 〇狂,右从 产。 名 右 當 切)考,訓 攷擊、稽攷當 上从壹 同。 屋,先 作 等。 干 聲, 凝 〇琇 作 》、《爾 澳。 寬 盼 爲 〇 照从, 旄 案,孼 譱 官又諧 成 7,當依 稽 作 坐,今 俗 下 當 書 音 字 雅 肹 切。 从 今 緑 注 作

受義。 歧,足 省作 ○曾. 垂,乃 明 同。 杭,乃抗之重文。 固 耽 从 作 義 邱 ○泮,當作 垣 上 以从 人各。 速。 結 一,俗 當依《爾 从 ,當作媅。 併於一復。 夏,行故 Ψ, 原 處。 从 名 邊 作 **惠**,泣 儀 玉 俗 坙字。 垣。 指 八, 一爲非 俗 鉉 容,當 〇遷,隸作遷。 畔。 作 也 雅》作敦 以 作 道 从 下也。 鱼, ○漣 加 也。 带,非。 非 遂,當作家。 復 17 〇旦,當作 作 **河** 誤。 水 舉 帶, 往往 支,當 頌。 爲 从 复,扶又切。 邱。 踵 乃瀾之或 〇 鉾, 廣 从 來 非 日。 0 義 》當 布 也,右 重 0 作 〇沃,本作洪。 甲, 怛。 隸 巾 垂 枝。 作 秋,本作 跂 E 佩 作 諼 就。 帶,當作 體、《氓 子 本 从 从 重 暴,當作 删 筮。 〇容, 从 作 夏。 父。 也 當 當 源 人 ○跂,音 中。 其 秌 作 作 作 音與 連 詩 今三 乃 陸 憲。 私 企。 來。 厵 虣 容 當 德 頓

文》作

膻,

〇昇,从廾

音拱。

踰,

也。

昆

訓

同、

訓

後。

作聦

○滸

又轉

作

潔。

〇吡,从

以

作

濕

爲

後

人之誤。

伐。

日,

俗作

申。

訓

盡

飢

渴,

當

作 0

周

頌

.

載

見》同

謝

本作翳。

作

栖,

非。

摇

依

爾雅》作熎

昆弟,當作公,从弟从眾。 **弄**,上从夭。○麻, 一級級」,當作文文。 右愈,下从 見以。 复,从人,从穴, 又《釋文》作 〇桀,當依《爾雅》作榤。 ,本作汻,毛晃以从許 人負 歇。 陽, 怪。 口,俗 ○燥 貝 濕,本 下从 袒。 ^ 〇 蘑, 从曼。 省。 畏,从窋,从 戈爲戍,戈向 乃 _齊 濕 ○棲,本作 眔 水 作訛。 陽 袒 林。 當 水名,省作 隸 音 北 南 陽 火 裼, 襢 作 沓 作溼,毛 Ш 劣 兀 Ш 当當 爲 當 當 切 嬔 目 〇聰 南 桂 **>** 非。 作 西。 同 俗俗 切。 虎 作 依 之 人爲 相 但。 《説 省 潔 稱。 易。 渴, 作 及 隸 晃 俗 摇 0 作僮。 爤字。 異。 龍。 挑 寒, 舜,本作舜。 見《説文》。 弋代谁,而橛義用杙,誤久矣。 从舁,从同。 會,从人,从少,从口。 作自,〇抑,本 本作

东 袒,本丈莧切, 本作消摇。 而 鬯,當作韔。 ,當作佻。 袒義 當作)童,乃 〇弋, 昌,下 别 ○漂,當 攘。 果名,見《玉篇》。 作 〇鴇 鉉 舜藝,當作蕣。 綻 ○員,依字當作云。 从 童僕字。 橛 又 當當 云《 衣 作妇,从反印。 爛, 〇介,从人,从 也。 日。 作 右 縫 徐 依《 飄。 詩》逍遥 寒 本 鉉 解 繳 爾 本 作 ○魗,本作敬。 也。 以 「狡童」、「 射 雅》作 子 似梨。 作 爤 綻 義當 衿,當 溱, 褰。 後 今以 爲 ○「游 孰 駂。 人。 俗 當 抑, 杙,劉 作 也。 人 見《廣韻》。 袒 字 作漕。 作 狂 惟。 所 又 龍」,當作 丰, 乃俗字。 當 〇道 襟 童 借 員 加。 阜 杙 〇興, 但 今以 與 上 爲 本 也 射, 遥 从 丰 當 燦

亂, 字。 音兹。 埶, 殺核 作 切。 从 門夜閉 提,當依《爾雅 俗 當作傷 顛 口 、俗作 類。 作 日 倒 肩 从坴 从元,从寸。 又

類

圃 常當 在 當 П 也。 ○鰥,右罤省 ○貫, 444 侕 當作 作 作 作 畝。 音六,土也。 見月 音 隸 鄙, 豜。 字字 : 肴。 顚 莽。 Ŧi. 衡 省 依鄭 〇克,本作喜。 》作 亦 ,當作籓楙、《青蠅》同。 煩 兩, 光,是 W 從, 中 ○著, 加 作慎。 〇雙,下从又。 也。 -,俗 厶 媞 夢 殳 當 當作納。 當作 , 0 ァ, 不 媞。 有 ○「猗 作 當依《爾 又加 乃 音 閒 摜 横縱。 明 殺雜 魏 1 戟,持 灮 隟。)樊,下 日 也)編 嗟名兮」,名,當 ○ 阔,从 本 W 字。 雅》作 當作 非。 也。)亂,當 盧 俗 作 火 从外。 〇蓺,本作 魏。 作 中中 閒 畮 在 持種之。 ○蕩 辨。 جدر 日 亦亦 作 从 〇算 人 莫狄 即攀 山 平. 月。 非。 上 提 作

茶。 器。 从土。 机。 皆借。 之。 作 保,右从子、八。 當作囊。 縣挂字,因 鉉以蟀爲俗字。 飱,非。 左悬,右堯 本瀾之或體 盇 ○婁,从母、中、女。 ○廛 ,音合,覆 舎 〇 翔,今作朋。 一,从广、里、八、土,俗作 ○洒、 〇鐘鼓从支,弗鼓从 从)意,隸 俗从手 ○乘,乃 言 〇曳,从 灑 借爲 永號 切,从倒肾。 冈 音 也 俱 作 非。 从从 同。 會 通 糠俗从米旁。 常當作 州縣字,俗又加 億。 〇末,今作 徒 血从大。 八申,从 一鄰,右从公。 俗作婁,非。 〇 篤 帚 今分兩 歌 洒,本作 下 詠。 意 飧, 俗下作 文,餘 本, 馬馬 1. 之或 讀。 从 隸 丰,筆也。 行 墨,非。 象羅隷作糞。 洗 作 俗 蟀,本 夕 蓋 頓 미 字。 體。 心,徐鉉 小, 鉉以 蓋。 〇椒,本作 ○ 栲,本作 食。 · 下 加 遅 意 點, 也。 非。 推。 作 爲 从 康 ^ 俗 詩 非 縣 俗。 漣 盇 除 本 篤 作 非

或作

就, 非。

晨 風

說,非。○晨風,當作鷐風。	今字从韱者皆作韯。○鴥,右	界省聲。○殲,右鎖,音銛。 諧 戏子	■作愿感。《湛露》同。○穆,右	。○伐,當作嚴。○寢,本作寑。	九會敘同。○叴,下从口。○竹	7。 片,从半木。 板字俗。 ○合,	?。○暢,本作暘。○板,本作版。	≧》鑾字並同。○歇驕,當依《爾	≥字同。○臺,亦作耋。○鸞,當	。○「寺人之令」,當依《韓詩》作	爣。○變,隸省作夏。○白顛,	。〇以食、食人,當作飤。〇粲	.雅》同。○苞,當作枹。《晨風》、	。○「肅肅鴇羽」,當依《博雅》作	○、○、褎,作、喪、袖,非。《説文》以	上篙、竺。○「粲者」,當作效。○
作懿。〇萑葦,本作益,上艸下雀,音丸。今	凓冽。○相,今作耜。鉉以爲俗。○懿,本	○觱發,當依《説文》作滭冹。○栗烈,當作	味,本作噣。○忒,當作怂。○年,本作季。	「負何」字,借爲誰何。〇芾,本作市。○	當作概,《泂酌》同。溉,乃水名。〇何,太	切作享。毛晃以爲後人妄加點畫。○溉	許庚二切,同此字形。今普庚切作烹,許兩	宫,篆作亭,隸作亨。本許兩切,轉爲普庚	苑結同。○偈,當作揭。○弔,本作弔。○	樂,當依《説文》作臠。○藴結,藴本作薀	薦。○菡萏,本作菡藺。○檜,當作鄶。○	○梅枬,字與摽梅異。○鷊,當依《説文》作	○棲遲,作屖遅,優。○樂,依鄭當作藥	媻,俗作婆。徐鉉非之。○衡,内从角、大	作戟。〇簋,中从皀。〇市,本作閚。〇	○《晨風》駮、《東山》駁,字異。○ 戲,今省

作鑾。

《詩》鑾字並同。

伶,凡使伶字同。

字當作騏。

爛,當作燦

當作欲,凡會欲同。

版,左从片。

雅》作猲獢。

閉,當作製。

廖,从乡, 常省聲。

厭厭,當作懕懕。

应

牡》

同。

鷫鷛。

《鴻雁》同。

瞏,下从袁。

厚,字當作篙、竺。

袖爲俗字。

當 當 非。 和 恌 籩。 威 育。 从 作 寒 貉 古 省 爾 小小小 作 作 當 謹 本 水。 樗 當當 ... 當 雅 與 **漨**。 就 寒,本作 〇吹 切, 作 》作 作 當當 作 本 作 蠋, 1 ○斷,左蠿,古絶字。 作樓 作響。 咊。 貌。 蚦 L 佻 雅、大 笙 騜 音 稱 本 目 莊 追 舉, 皇皇者 當作籥。 窡。 作 ○ 炭,隸 下犬。 ^ 鄂, 雅,雅當作 湛 駠 蟰, 蓷 傚 字 蜀 》「有 脊令,當 字 字 重 當 ○菽 當作 本 本 華 不穋,本 當 溷 作 作 0 作 吹燻、吹鯱等 」,皇當 作 皇 本 依 规, 葵, . 媒,後 爯 蟰 熏 效。 Ë 作 同 作 作 説 隸 隸 鶪 ○壺,本 鵬鴿 ... 種 文》 作 同 傚 作 作 皇駁 ○賓,作 寒 稑 晕。 ○ 籩, 今作 字 制 葽。 子 注 向 惟 俗 同。 作 壽 作 當 當 湛 當 萼。 原 況 沖 賔 奄。 依 作 本 洒 伊 作 狐

軝

从

氏。

淵

淵

當

作

鼘

鼘

駜

咽

當 涖 彭, 葘 啟 本作左。 東、攴、正。 Щ 當 弔 作 从 何 中 一、莅、 行、 醻 瘁 作 訓 .博。 矧 》、《大明》、《 水 皆當 當依《 本 傷。 啟 乃 本作矤 从 至,當作選。 蒞 明, 俗 作 {{{ 凡 《采 三字。 厚, 鬩 作 字,本 説 吗。 將 皆當: 俗从來、力,非。 奏,本作舉。 騯 音 薇》、《 从 文》 當 率 烝 灾。 騯 ○蹲, 鬥 作

。 同 作 民》、《 作 作 沈, ○恆 启。 悴、 へ 秋 杜 率, 繭 都 涖 當 作 ₹. 顇。 韓韓 乃 和 依 有 切 沉 》同。 本作 本 4篇点, 奕 捕 禴 ^ 萠 輊 魚 爾 作 非。 × 鳥 頒 本 當 服 本 隸 雅 佐 飫 竦 ^ 當 畢 出 駉 作嚴。 作 一,乃俗 **∀** 作 作 作 二彼 本 當 車 今 整 赩 礿。 整 篇 率 鉌 × 説 作 陽 作 通 爾 止 文》 箙 餀 止 从 用 北 斯

蓑

本

作衮。

)兢,本

作競。

)麾,本

畢

从

田

世。

畢

盡

當

作

薦

※ 斯

干》「裼」,當

作

햼。

() ()

作

臭。

)他,上

从

尣

即即

ĴŁ

字。

俗

从

本

作彙。

冥

从

日

六,

隸

破

作

産、本

作。。

〇 優游,字今作

優

當作

厝。

〇爪

牙,當作到。

爪,

乃爪

集于穀」,此二「穀」,从

木,

餘

W

禾

訛

非

〇皋,

隸作

泉

)「其

下

从臼。

音掬。

晨,房

星

也

今借爲早義

星字借

辰。

○沔,

俗作

沔,非。

譌

循

同。

噦

本

作

鉞

鄉

晨,當作

當作

叏。

叏

E

中,

象

《 支 形 。

今作夬。

奕字

皆同

从

廾,乃「博弈」字。

柴,當依《説文》作掌。

○《吉日》率字訓順,毛、鄭同。

當作婆。

咽

同

闐

(関,當:

作

嗔。

○《吉日》麌當 奕,从大。 維穀 象形 ○「汥拾」, 兀 言,作 冥, 瘥 作 取 晨, 前 作噳 凡 詩 非。 摩 粟 錯 義。 當 譌 率 顯 無 房 上 从勺。 所加。 作 當作 犬。 瘐瘐。 蕃。 爲 俗作褒。 Ц ° 艸也,音箭 作 苦,)競,本 電,下从印。 淜 俗 昊,本作界,下从乔。 憯 臶。 ○「徹 ○繁 凡蕃 字。 當 陯。 上从干。 音包。○豔,隸 臶, 〇炤,本作 ○蹐 -作競。 作 温 多 乃俗 ○屢,本作婁,《説文》以尸爲後 ○屆,从由,由, ○ 倉, 亦作 我 重 朁 脊,本 並 依 牆 《詩》字皆借。 也。 字, 同。 後 鄭 屋 再至 同 當) 軷, 里,病,當作 焯。 作 曙 本 沸 作 作艷。 作緐。 當 騰,當作鬻滕。 富 也,音賤。 隸 惟《 愈 蕰 作勶。 日日 古老切。 督。 俗 愈, 作 N 敷 即 作 當依《 又二 食,字當 無 ○褎,本作裹 塊字,从土 螟 愁 瘇。 答, 俗 毗 IE 緐 岭 从 玉 薦, 作 **>** 或 馮 爾 霜 本 篇 是 當作 撤, 來、 潤 借 作 雅》作 河 淪 作 》以 憯 當 所 荅 陷 非 蝕 字。 冢 妣 蠕 从 當 作 昊 食

749

作鴽。 从次。 作滑。 弗 也。 瘣。 岭 酬 當作穫。 百 依 當 漿,本作 當作眷。 八當作 祈 真 作 酢 毛當作底。 隸作面 谷風》頹 /腓, 濬,深 殄。 當 敘連切。) 塡, 〇方奥,當 滌。 作 作 當作 嵂 也 1 1 ○憚 當 雕。 ,俗作面 诵 醋 常當作 沈 岸 从允。 痱][作 又祇、底皆从氏,不从氐。 泉,當作 獄 朝 《夢 ○燔 嫨。 也。 桑) 在染,當作芯。 ",當作 . 穨 當作 作 扈, 當 我 非。 當當 燠。 鶉, 一字互易。 作 * · « 當 唇。 浚, 涵 瘅。 琄。 作 當作 犴 作 四四 萎,當作矮。 本 〇 萋 ○塵 繙 當 隸 雇 1月》同 《小明》 作 作 鷻。)穫 作 鳸 女菲,當) 跂 雝 壞 新 龥 濬 涵 ()當作 酢 芬 當 木 河 同 依 7,本 作 、麋,當 作 浚, 填 醶 當 鄭 睠 邕。 緀。 歧。 祇 盜 寡 也 作 義 抒 作

蟘。 當依《 齍。 觓。 形。 稶。 芬。 當 支。 戈。 作 耒,从木从 禾。 作 今从 〇耘 作 穜 ٠<u>,</u> 葡 佸 旣 ○ 排, 徐鍇以 螣 〇禾易,或云: ○騂牡 耘、耔皆 ○ 廄,从广从段。 ,本作賴 阚 从 敕 種、 乃 〇稽 脈。 雅 作 螣 八 丰,古 ,从束、 从科。 穜 渰萋萋」, 廐 的 當 蟊 首, 作 蛇 互 俗 , ~ , 爲 一,徒登 剡。 亦作 作 从 一易 當 字。 優 拜切。 支。 玉 誤。 日 俗 ... 牸。 作 渥 篇 \wedge 辯 當作 栽。 从 譜 周 「易,當作殤。」() 反。 又耕粮 今省。 見《 當 以 騂 殷,居又切 頌 賊 僃 作 黑、騂 爲 耔,本 童 凄 釋 本作 非。 前 漫。 一段,當 俗 凄。 替 慎 文》。 孟 等字, 字。 一,本 也 犧 作 齊 ·賊,左 本 作 作誉。 觩, 秄,)斂,右 明, 彧, 作 螣 屈 左 騂 僃 當當 覃 來 服 種 从 剛 具, 當 當 本 左 則 也。 作 作 从 作 从 象 當

堇

一,黏土

也。

堇

茶,

當

加

艸

作

蓳

黑

也

兹,

从

艸

弦

省

作

甸 寝

匋

瓦

器

也

加

自

乃

陶

丘

陽,當作郃。

○變,从又。

牧

) 康,右

从隶,音速。

今作肆。

也。」刑,从开,

剄

也。

儀判

當从

〇荆,从刀井,罰

罪也。《易》曰:

不易,依王當作 ○滤,本作 野,當作 左屍, ○「騂 井。 放。 作商。 陶 本 檻 〇 溲 緇 「井,法 字。 艸 復,當 作 从尸 泉, 撮 木 騂 ○治 分,隸 弦, 坶。 傷。 淲 萬。 當 盛 角 當 在 用省。 作檔。 鼖。 也。 閌。 邑, 求 蒼 作 當 也 奴,从丌。 禡,當作 赫怒,當作嫼。 下从犬。 省,从屮。 小當依命 廼 緣。 作 0 當 當當 作 廣 茲,此」,借艸茲 辟 混 〇串,本作串。 瑟彼 **爾** 雅 禷 依石 豐)對,从 **桑** 雕,當 夷, 棫 》作 ○常,从丵,从巾。 加一爲宫宿,)距,鷄 雅 樸,當 當 柔 玉 》作妹。 鼓 韸 作昆。 仡仡,當 口 》同 作璧。 瓚 淢 文 韸。 距也。 漢文) 衝,从 作 作 當 當作 疸。 樸 徐 〇「高門 作 ○省,本 ○「維 童,俗 帝 加水 作 瞍,右从 遹 距 洫 璱。 鉉 廼 屹。 當作 逢逢,當 改 樸, 止 字 以 爲 一當作 从 其 淢 作衝。 有伉 音 爲 -作眉 俗) 賁鼓 士。 減 喙 吹。 变。 小木木 , 序,下 渻 音 菑 借 矣」, 点。當: 歫 依 今通 翳 當當 从 域 玆 削 類 埤 曹 作 作 睂 當 素 作 从 類 疾

作没。

墳首,當作

頒。

○商,本

从彪省。

○「漸

漸之石」,當作磛。

二其

葉

有

幽

幽、當作黝。

鬲,从 目。

月,音冒。

丌、几

徒

魂

切。

膍,从 配。

弓」,當作鮮

觲。

〇猱,本作變。

作濫

殿

隸

文也

本

作

殿。

鎬

作

鄗

幸

尾

當

作

鮮。

大

頭

是「

頒

字本義。

分頒

當

作

作

禄。

綢

直,

當

作

霌。

蠆,

雅》 米。 作 作 从 當 非。 感 本作 作 宫 从 灃 瓞 民 流 彀。 弴。 切。 土。 作 唪 舀 又,从豆。 力 維葉泥泥」,當依《 作 弗 洒 唪 崖 , 災 鮐。 非 叟 俗 如 考 當 序 ~,籀 成 号, 淫, 大 浮 當作菶菶。 蹂 肁 从手,非。 1 作 丰, 了,始開 閒 酪 當 祓。 當作羍。 文 隸 當 本 朗 本 當 洫 作 作爆 當 也。 文 作 作 本 敘 作 作 巾 也。 猱。 攷 辆, 作 點 枓 (廣 烰。 上 豐 本 〇 恆 凡 留 嶷, 朖 肇,擊也。 雅 黍 从 作 左 凡 水 坼 次 害。當作 》作 常當作 下 當 亦本作 W 稽 敘 盟 Ш 釋之叟」, 當 台 豆 甘。 苨 作 長 攷 同 从 背 一登,字 依 壼 同 胧。 苨 蜒。 耳。 塘 隸 裁。 敦 本 當 俗 禹 揄 依 句 弓 作 作 耽, 从 从 貢 檡 又 弓, \sim 洗 香。 月 單 它 左 當 當 从 當 Щ 悶 牛 作

奰,本 懽。 作 呭。 管管 豶 格 作 唸呎。 爲 城。 詭 宥 韓詩》作誘。 下 問 潒, 隨 登 至 宓 密 督 升, 當 義, 同 ○辭 ○耄,本 ·作

。 額 當 當作寫 亦 从 軍 ○屋 泂 作恑 从 上 作 肉 可 茂 又誤讀 語 酌 宓,安也。 人が 答。 E 作 當當 當 頁 漏 从 从首 作 恴 从与。 惕。 〇出 薹 作 凡 0 作 當 豹 顛 宓 音撥。 ○泄 恑 詞 迥 省 作 沛 音末。 从 虹 爲 王 聲。 詐 山 當 屚 么。 當 炰 伏。 當 殿 泄 如 同 密 烋 作 作 从 當依 作 灌 堂者 屎 顒 今作 惟 牢 當 〇芮 訌 戌。 櫇 坐。 當當 當當 印 當 ·, 隸 刻 隨 戚 作 伂 貌 作 漏 依《 《説 依《 當 揚 本 鞫 宓 密 文 从水。 咆 作 作 古作兒。 貌,) 蕩 文》作 牖 説 阚 也 當 當 哮。 遁。 今用 昂 玷 蕩 文》 雅 周 本 作 作 本 當 頌 敡 本 依 作 汭 密 作 Ш

戰。

作蚅。

痛。

○燼,本作表,上从隶音津。省。○疑,从子、	田。○「鐘鼓喤喤」,當作鍠鍠。《有瞽》同。
止、矣。 〇 榎,右 夏,从 丙、 攴,隸 作 更。 〇	喤是小兒聲。○磬筦,當作管。《有瞽》同。
圉,本作圄。○麨,上从埶。○溺,當作休。	○立,依鄭當作粒。○來牟,當作粦。○西
溺音若,水名。○寶,諧缶聲。○貪,上从	雠,當作廱。○柷圄,當作敔。○潛,當依
今。○悖,本作詩。○陰女,當作蔭。○	《小爾雅》作橬。〇「和鈴央央」,當依《文
隆,本作隆。〇蟲蟲,當作爞。〇秏,左从	選》註作鉠。○佛、依鄭當作弻。弻,本作
禾。○斁,本作嬕。○滌滌,當依《説文》作	强。○肩,本作肩,象形。《説文》以从户爲
敬敬。○散,本作散,當作椒。○里,當作	俗。〇荓蜂,當作甹夆。〇拚,當作翻。
悝。○假至,當作徦。○「四國于蕃」,當作	○「有略其相」當作絜。○圅,隸作函。○
藩。○彝,作彝,非。○「愛莫助之」,依毛	麃,訓黙,當作穮。○「有捄其角」,捄當作
當作薆。○韓,隸作韓。○榦,俗作幹。○	觓。○酌,依《禮記》作勺,近。○「以車祛
鍚,本作鐊。○幭,本作幦。○厄,依毛當	祛」,左从示,與衣袪字别。或云借衣袪字。
作蚅。〇貊,本作貉。〇來鋪,依毛當作	○有魚,當依《爾雅》作瞧。○邪,乃琅邪
痛。○卣,本作鹵。○徵,俗作截。○「懿	字。無邪,當作衺。○屈信,當作詘。又屈
厥哲婦」,懿當作噫。○昏椓,依鄭當作閽	本作屋。○搜,本作接。○逆,迎也。順
戰。○眄,右从丏。○潰潰,當作憒憒。○	逆,當作屰。○琛,本作琛。○「六轡耳
三頌,當作誦。○疊,从三日,新莽改日爲	耳」,當作綨綨。○特剛,當作特犅。○虧,

被被。

藩。

音厥。 岱音同 作游。 字異 標其誤,具 仄。 當作 左 此諸字,非 欁、櫱。○罙,本作粟,从网从米。 輔以《蒼》、《雅》,參以鐘鼎、碑刻之文,崇典也。 而莫知。 或以音之同,久假而不返。 冕旒字本作瑬。 古文也,本作容、溶。 雇 鯢。 一荒鳥 ○恪,本作窓。 ○圍,當作口。 綴旒,依毛二字皆通,依鄭當作游。 胄子 ○曷,依《漢書》作遏,近。 也 或改易其偏旁,或減增其點畫 〇尋,本作尋,今省。 (列如 出 切。 大譌 从 經生之妄造,即 肉。 前 ○鉞,本作戉,从戈—聲。 爲太、又譌 貝 ○虔、依鄭當作榩。 〇泰山,本作大山。 其所 〇旒,乃冕旒字,旌旗 〇和 壽,當作 、胄,下从月,與 俗作濬,非。 取 或以形之似,相 正 爲 由俚俗之沿譌 ,主於《説 ○庸鼓,當作 泰。 ○蘖,本作 〇凡,从反 盉。 ○達,从 〇兒 一胄 八凡 文》, 大、 子 丛 又 當 殺

> 載焉。 從簡 後世之傳譌,止取稍僻者著其梗槩,餘弗 類,尚不勝詘 娶爲取,婚爲昏,悌爲弟,僻、避、擗皆爲辟之 用 或 也。 體則不復游原文,合篆隸則不更追古 至於經字假借,如 指,斯或屬古人之通用,未必 懈 爲 解, 追爲皇 籀 盡

爲兩 與 栝濟濟」凡 云: 辛木,云: 云 小棗,皆果實,二榛其業乎? 亲,果實如小栗,从木,辛聲。」《鳲鳩 詩 其子在榛」、《小雅》「止於榛」、《大雅》「榛 栗 . 並言、《曹》之榛,上 植,今經 地》一山 「木叢生日 説文》云: 榛,木叢生也。 五見。以 一似 有榛」、《鄘 傳 榛。 梓, 槩 「榛,木也。 作 實如 文義觀之、《鄘》之榛 亲,栗也。」皆以榛、亲 榛, 《字林》榛木之字从 有 》「樹之榛栗」、《 小 梅 無 栗。」《 復 从木,秦 止于榛」,前 辨 有棘,棘者 矣。 廣 》釋 曹 雅 案, 文

餘二榛 非小棗 元恪 小」,則《邶》與《大雅》之榛,先儒皆以 栗,《周語》引《旱麓》詩 章 謂 榛皆爲 爲 其 ,則榛亦非 樊與棘,毛云 Щ 爲叢木,爲小栗,經 有榛」與「樹之榛 藩之物」,故此 小栗也,其叢生之榛 棘 韋昭 所 以 棘 注云「榛 栗」子 爲 是 無 藩 茦音册。 明據 也, 皆 似 爲 味 乎? 孔云 栗 然 果 如 陸 而

也,字當作亲矣。

《鹿鳴》、《常棣》、《鼓鐘》四篇「鼓」字是 鐘」、《靈臺》之「鼓鐘」,箋云「鼓 薺》、《白華》之「鼓 案、《詩》惟《山 从豆,音駐。 **壴支**,象手擊之也。 木》之「鼓我」,箋云「爲 ,當从支,餘皆樂器之鼓,當从 説文》云: **宣亦聲。」二字義** 有 樞》之「弗鼓」及《車 「鼓,郭也,春分之音。 鐘」,箋、疏皆云 鼓,擊鼓 我擊鼓」, 殊,形亦殊矣。 也。 與鐘」、《伐 文也。 則 从支音朴。 皆 奥器 鳴 鼓 鄰 从 擊 鼓 楚

非 並 作鼓,从发,未知 可 非 文》云「象手擊」,是取 隸作鼓,亦从发作鼓,发音弢。 説文》、《説文》所載皆 無隸 ·攷擊義 不 也 · 辨。 體,「鼓」正是隸耳,豈篆乎? 又支本章 又鼓 矣。 支、支形 字 何體。 移 籀 切,从手持半竹 作鼓,右从支。 其形,與支字義 相 小篆,而兼 毛晃謂鼓是篆文 近 一,近本 源 謂 及 多 \wedge 鼓字見 無 (古籀 但《説 玉 溷 預 語

急也。 且 字,惟虣字猶見《周禮》耳。 同。 暴」爲暴甚,是暴義。 於暴矣」爲酷暴,是虣 暴虎」、《何人斯》之「暴公」, 韻會》以「暴,晞」當之,理或 暴」,毛云「暴,疾」,則宜爲暴 今文典从隸,槩作 此三字《説文》皆薄 ^ 義。 叔 「暴」,而三義 于 《巧言》「亂是用 **《詩** 報 田 然 切, 》及《小旻》之 無當於三義 也。 氓》篇「至 圃 併於 義各不 爾

暴,晞也。

暴,疾

有

所趣也。

虣, 虐

也

虣三字 在 通 云 ,殊爲 云 H 一義之外 惟《説 「暴 # 訓 疾 疏 ПП 釋,而 文》作瀑,云「疾 風 矣。 亦 司 獨 暴」, $\hat{\hat{\mathbb{E}}}$ 指 用 疾 韻 一「暴」當之,又别 義 雨 》暴字注兼 取 則 Н 雨 瀑 出 也 義 則 爲 、收暴、 引 果、 長 此 出 此 詩 虣 又 俱

祭,經傳未聞

荒, 禦通 禦」,莽傳注引《 也 見《詩》者,《漢 予 「禦、圉 ŦĹ ·日有禦侮」、《釋文》「禦」作「御」,云「本 故 用 ,皆 圉 經 幸 我 圉、禦二字 之證 爲 作 傳 禁也」 幸 本 禦義 御。 以 作 也。 吾 書・王 图,《説 、《釋文》云下御字本 是 爲 亦 《詩》「曾是彊禦」,禦皆作 己。 通 以 韓 会 御冬」、「以 用,皆音語 詩 圄 字, | 莽傳》引《詩》「不畏 禦、 文》云: 外傳》引 幸 幸 當 别 又 作 我 誦 用 禦。」此 我 御 作 幸 再 爾 或 字 居 窮」,一 御 雅 作 南 爲 守 量 幸 交 彊 其 Z 之 守

> 字《説文》云: 或作禦」, 此 幸 「从示 禦 與 御 御聲, 通 用 之 祭也。」禦之爲 證 也 又 禦

鶴,共 之或 字者,其 體 雤 鶵 今用之,此皆見《詩 鴡之爲 雇之籀 有 文爲鴟 詩》,皆 一字,惟 爲 Щ 鳥、隹二旁俱 鳴 誰。 體 雛之籀文, 鷂恩含切, 鶉屬。 羽族字旁或从 五 音 爲 雎, 誰之爲 文爲鳥、爾 ,雁之籀 爲鷽之或 鸛字不見《説文》,或疑爲 字 在 紅 二旁俱 難 外 | 詩 鳥 ,鶬之或 肥 又有 》,有籀 通者 大 文 미 體 調雅 八爲 从 雅 **%** 鯡 鳥,或从隹 爲 也 體 》作 , 駕音如 者, 鷹 外 即 文 堆 爲 ,鶪之 鳸 消 之爲 如 《詩 鷹 又有鳥、隹 如 維。 之 切 雞 牟 鵬 或 桃 及鷕 》作 <u>i</u> 或 之 鴉 其 其 爲 爲 蟲 體 雖 體 扈 籀 좚 雑 雕 也 爲錐之或 常 俗字 之籍、 之爲 爲 文 之籀文 此 鵻 聚 俗字而 雕之籀 離音歡 也 難,鷬 爲 未 於 文, 鷄 見 然

者,如 與 有辯,見《東 雁 雄 雉 與鴈、鵜 Ш 鳴。 「》詩。 鳴與 又 與餅、 有从 唯、 雌 古文雉。 鳥、从 與鴜、 隹分爲 鴝 即 夷切, 鱵鶯。 音 劬 兩 鴝 鵒 字

雒音洛,雒鵙也。《爾雅》作「鴇」。《釋文》音格。 與傷、

音洛。烏騙。《爾雅》同。 鷚力救切,天籥。 與、雞、力

鳽 救切,鳥大雛。 音堅,駁鯖。 爾雅 輪音翰, 》作 鷄。 爲也。 雅苦堅 與 鵫 音 切 翰 難樂。 雉 肥 與 轤

音。 雄音方,鳥名。 與 魴,音訪,澤虞。《爾雅》作

二字今反通用。「幫」。而俗字之鴉,亦與雅音義別,惟雁、鴈

故陸所見本猶存古體。「屢空」字,此字後人所加。」唐初經字未改,案,《説文》屢字注云:「今之婁字,本是案,《詩》中「屢」字,《釋文》多云本又作婁。

遇日、曰字皆有音反。案,「日月」日字象戒」、《釋文》皆先音越,又反切爲馹音,又凡「曰爲改歲」、「曰殺羔羊」、「豈不日

體之殺久矣。 別之,竟似一字而兩讀,可見隸變以來,字白。截然兩字,陸不辨其字形,而僅以音切形,古作〇,「云曰」之曰,从 凵从乙,本作

字音

《韻補》諸書之音反是已。至俗音,不 武 副、富之列遇韻,見黄氏《韻會》。又如《洪 人字書,如不之逋骨切,見温 自 音,則九經、《釋文》、《玉篇》、《廣韻》、 虎通》諸書之解字,猶 之協韻,及《説文》之讀若諧聲,《釋名》、《白 然《易》、《詩》、古歌謡、楚騷、漢詩賦、樂府 正韻》,一代同文之書也,乃大取舊 而始,率皆沿譌襲陋 有古音,有正音,有俗音。 ,莫知所 可考驗 公《指掌圖 返。 而 古音邈矣 知 既 也。 韻 乃稍 知 徐 何 氏 Œ

ŝ 更之, 尤多 統字 虞。 依 仴 之俗音 出 立 免移雅以 通,不可以人力彊 人之喉、舌、脣、 蠲, 베 變,其 遮 此 之音亦異,故古今異 經文次之,具 一韻》 一,俱 散人 其所 韻。 編 虞本韻 專 反 、修短、厚薄 ,甚諧俗吻, 書 就 至 真、寒、删、先韻 統字,亦多改 以 以 説 俗。 爲同文而 東、冬、江、陽、真、 爲 首 〈列於左 Œ 詩》,故止及三百篇 收收 今當悉取俗音,正之以 音 齊也。 而於雅音則 八洪 因 在 設 而 地 魚 (易,删 (,惟) 纖、 八音,猶 IE 氣 韻 源恐數 中。 音 鋭 而 求人 而 復 殊, 鈍 去 文等韻 又分 胡 立 乖矣。 爲 之易遵,不 元 不 百年後,今 越之不 模 亦隨 古 司 韻 麻 中字,仍 韻 音音 併 韻 則 竊 而 以 天 雅。 矣。 意 代 相 時 所 省 創 所

讀不誤。〇不,本甫鳩、方九二切,今敷勿、切,精母。〇淑,本音孰,《正韻》誤音叔,俗鴠,本七余切,音近趣,清母。今子余

都了 音小 本王 聲,音質。 砠 之,今仍其誤。 莫後切,有韻 疑 遺,喻母。 今於周切,音呦,影 逋 切,灰韻。 遮韻收 反得之。 母 没 ,誤同雎。 異。 矩 元韻。 切,端母。 切 切。 之。 後凡土 E 今無非切,音微 後不言 ○縈,於營切 ○綏,本息遺 正 今音延,匣母,先韻。 〇只,本平、 一韻》誤 語皆指吳中。 《正韻》 悠, 觵, 今泥 〇嗟,本 何母 古横 母。 本 了切 者 偶 以 》莫補切,改立姥 同 許 、俗讀 麻韻 ○維 切,俗 周 此 切,支韻。 L 切 ○言, 泥 微 切 兩聲,今增 音 ₩ 正 本 母。 俗 母 如 讀 音 讀 本 語 容。 以 由 不 如 吴中 語 一韻》分 追切 〇母 今蘇 公。 母 軒 鳥 喻 讀 同 韻 土 本 音 羽 切 母 V. 收 本 語 口 而

^{●「}本」、原作「大」、據康熙抄本、大全本、《四庫全書》本

母

^

語

韻

TE.

韻

>

疏

五

切

姥

韻

土

如

府

敷

母

〇 所

本

疏

舉

切,

音

近

黍

里

切

喻

母

釜

本

扶

古

切,

奉

母。

0

語

得

錡

本魚

結

切

疑

母

 \sim

IF.

韻

江

韻,今陽

韻

一手

以盛之」,

誤同

成

韻

,今分立

蔗

韻

收

之。

土語

合古。

切。

○宫,

居

戎

切

俗

讀

如

公。

夜,

○訝,《

詩》作

御

吾

駕

切

俗

讀

于

切

,改立姥

韻收之。

魚

語居

切,

俗

讀

土

一語得之。

○楚,本

創舉

切

麇

韻。

罝

小本

麻

韻,今分立

遮

韻

收

之。

韻

》誤

延

之

切

音

也

喻

母。

俗

讀

得之。

讀

如

程

澄

母

○宜

本

魚

羈

切

疑

母。

首

雙切

音杠

今

陽

韻

居

良

切,

母。

憴

憴,《詩》作

繩

神神

陵

切

日

母。

成,是

征

切

日

母

俗

讀

如

程

澄

母

0

詵

所

巾

切

審

母

俗

讀

如

新

〇江,本 今創 音姜。 降, 俗 語 本 土 ^ 審 養 土 本 韻 E 俗 讀 禡 駕 祖 語 合 心 如 正 ^念正 月, 於非 韻》 邪, 古。 儀 今許容切 麻 方切,俗 韻 江 魚欲 馬 韻 》誤 》誤 本 韻,今陽 韻, 韻 遠于將之」,遠本 分立 韻 喻 本 切, 切, 韻 芳未 》誤 母 魚 偶 》音實, 今人 魚)牙, 羈 微 讀 疑 許 今 爲 乎 厥 東 切 韻 土 如 切 母 韻 切 本 韻 分 者 罪 切, 韻 語 黄。 質 首。 \overline{H} 人 韻 切 音 敷 疑 〇吠 今烏 俗 得 韻。 加 遮 俗 母。 語。 母 之。 歙人土語 匣 讀 土 韻 切 雲 讀 韻。 魁 語 如 兄 本 悔 俗 今 俗 阮 如 疑 切 育, 不 與, 符 讀 延之 本許 俗 讀 定,本 切 本 越。 · 誤。 母 者, 廢 喻 音 不 本余 不 讀 不 o 呼 喻 切, 切 隈 誤 誤。 母 誤。 不 ^ 本 罪 榮 土 音 母 TE. 誤。 奉 吕 馬 灰 切 車 切 喻 殖 語 韻 母。 〇 威 ·, 本 切, ^ 韻 母 韻 得 尨, 正 王 曉 也 **>** 庚 0 職 讀 之。 本 \wedge 韻 魚 玉 Œ Œ Œ 本 本 如 চা

759

母。 士 本 切 俗 切 時 切 律 今分人 誤 行 俗 + 正 語 市 音 者 澄 照照 寫 户户 語 讀 讀 攝 切 韻 本 俗 得之。 合古。 緣 韻 不 切 如 阮 集 日 日 庚 澄 、者韻 設 讀 誤 切, 預 馬 切 疑 日 母 從 虞 如 語 韻 11: 母。 日 怨 母 旦 韻 音 〇城 隰 土 ,今者 躬 母。 切 述 土 衡 雨 語 端 俗 今音 願 似 誤 語 俗 音 得 本 母。 今重 誤 韻 讀 「遠 同 讀 得 俗 愿。 之。 魚 食 同 不 之。 雨 切 官。 攝 如 讀 父 律 怨 成。 誤 景 祖 加 俗 母 本 切 審 邪 赭 切 Ē. 切, 形 讀 王 母。 誕, 精 本 母。 土 御 如 日 俗 遠 誤 不 母 音 遇 語 野 母 雨 徒 讀 .誤 馬 本 司 俗 本 傳 切 俗 不 韻, 早 阳 干 于 4 誤 本 讀 讀 誤。 俗 切 疑 澄 怨 願 倨 涉 同 馬 今分 秦 吉 側 讀 母 湍 母 切 切 切 羽 韻 定 攝 本 吕 首

母。 與。 母。 房 于 似 切 語 私 切 Œ TE. 九 虐 切 降 眷 不 顔 良 副 切 韻 歌 日 韻 、俗讀 本 本 切 俗 俗 切 誤 切, 五 邪 韻 母 本 旋 ? 平 讀 讀 依 絳 有 魚 姦 母 0 敷 邪 霏 如 IE. 據 不 韻 屠 約 似 俗 韻 切 俗 母。 救 切 邦 戎 韻 誤。 切 今 迓 宣 切 今才資 讀 讀 切 本 **>** 疑 切。 今防 切 》虞 匣 日 湯 俗讀 如 影 漾 疑 母。 母 宥 母。 江 怨 華 程 母 韻 邪 母 賄 土 韻 切 父 韻 切 切 慈 母 0 俗 澄 語 俗 切 音 \wedge 今陽 良 得之。 音 讀 母 本 麻 讀 大, 今芳 正) 崇, 乘 慈 俗 切 音 愿 如 韻 虎 不 韻 舟 讀 本 附 韻 誤 本 閑 從 猥 音 * 故 如 〇子 徒 他 俗 乘 鈤 母 切 牆 切 泉 匣 灼 蓋 恭 讀 茨 本 母。 本 曉 源 切 媛 從 從 誤 不 暮 婦 切 唐 本 湯 神 母 母 誤 母 韻 佐 床 本 + 徐 同 何 陵

容

切

邪

H

母

韻

一个一个

弓,誤

同

母。

○射

厥切。

俗

乘

馬

溪母

誤。

審母

音尤

其

椎

澄

母

一,本

是

西

之或

虞

袁

切,

土音得之。 季切,羣 性,本 $\hat{\hat{\mathbb{E}}}$,乘,本食證 俗讀 體, 母。 韻。 ,灰韻 宫, 爲 除 今于 本碼 讀 日 韻 切, 母。 〇 牛 音 土 留 不 土 本 今 土 胡 》實 犀, 切, 誤。 日 權 語 韻 息 語 王 覽 語 俗 執 母 切 土 不 中 音 合古。 心 伐 切, 本 不 讀 今蔗 切,日母。 切 語 ,支韻。 誤。 母。 切,《 切 稠 語 音 誤 如)巷,本 如 匣 日 爰。 求 季 韻。 時 母。 澄 心 母。 俗 Œ 切 母 母。 見 今直 舍 頗合古。 魗 絳 濕, ,今誤于 讀 韻 土 土 俗讀 俗 母。 俗 命,舍,本 韻 **>** 如 語 語 本 與 讀 本 讀 追切, 合古。 得 瞿 松 र्क 如鄭 今漾 、 土 音 月 品 失 之。)棲,本 由 覽 求 清 同 人 本 本 切 切, 悸 韻 切 切 母 九 詳 禡 浴 魚 示 如 母。 淵 同 切 切 今吁 母。 如 語 讀 本 俗 遇 ○漣,本 草,奉 羽。 影 不 垂 徒 舍 有 讀 切 敷 見 ^念正 驕切 誤。 切 今又增 本切 韻 不 拔,舍, 母。 母。 母。 見 俗 , , 誤。 支韻。 母 韻 母。 正 讀 今卑 今邱 俗 **>** 敕 本 不 讀 ^

○盾,本乳允切 瀾之或 了,音囂 ?,音沌 〇缶,方九切,音 乎乖 一韻》莫 列 誤。 雙, 馬 今灰 民 IE 體 鴞,本于 蓋 如 切, 曉 定 切,音懷, 日 切, 韻, ,音蘭 韻 蠲, 切 本 補 母。 母。 母。 **>** 音啜 韻 切 江 音賓, 幇母 今者 溪 忌 見 徹,本 韻 母。 俗 母 驕 遇 姥 土 悄 ,今陽 瑰 今靈 穿 否,敷 誤 切 切 匣 韻 韻 語 本 本 止 母 0 母 同 如 音 音 直 年 鳥 网 愾 趙 土 俗 姑 韻 蚩,合古。 遥 母。 具 切 列 俗 宣 語 讀 元 П 本府 本 吹, 切, 切 宇 匣 讀、 子 合 俗 切 音 羣 不 古 名 古。 母 連。 誤。 畮 母 澄 讀 見 巾

母。 母。 母 俗 誤 切 户 韻 今芳故 既 韻 激 語 同 譮 譽。 質 依 伯 讀 嚴 衍 寡 40 疑母。 疑 今牀 俗 據 切 土 切 11-〇楰,本 母。 土 本 本 伯 語 切 俗 讀 施 切 語 干 音吉,見母 匣 照 語 合古。 一一一音付 讀 本 祚 如 音 本 母。 線 母。 不 杴 如 不 切 思 誤。 餀 譽 以 蒲 切 切 字、《正 誤 暮 以智切,音異,喻 主切, 心 蓋 暮 土 本 影 喻 韻 疑 母 切 語 師 0 韻 瓦 羊 母 盘 母。)信,其 得 韻 富,本芳 ○祉,音侈 茹 喻 並 俗 本 五 () 誤 之。 ○蛇 ^ 此 切 母 13 寡 讀 今移 疏 助 正 乙切, 切 音 如 移 喻 韻 本 ○議, 字 今偶 本牀 俗 祚。 馮 廉 切, 副 1 **>** 疑 俗 譮 母。 倪 穿 麻 切, 切 母 羣 音 據 讀 許 韻 如 甸 ^ 本 母。 母。 詩 古古 切 喻 宥 豫 īE. 切 俗 不 配 切 今 宜 俗 讀 韻 母。 誤 寄 瀌 誤 H 審 俗 滂 讀 御 疑 韻 以 馬 讀 母 當 爾 駿 俗 疑 木 緝 +

音含。 愈,本 母。 私 讀 薿 韻 如 切 奔 母 切,音足, 語 喻 蘇 〇鷽, 閨 俗 補 土 不 今者 母 本 穿母 駿 以主切 母。 俗 語 讀 侯 俗 切 誤 魚 發 上聲,心 合古。 讀 如 切 讀 誤 韻 俗 紀 當 心 介,尤 精母。 走, 如 不 7,喻母 項 讀 切 今 同 母 此 · 誤。 鹽。 不 韻 譽。 濈 池 精 不 音 ○營,余 母。 疑)禹, 誤。 爾 母 俗讀 講 阻 母 詩 非 俗讀 切,音雉, \wedge 數 韻 立 誤 土 也。 褎 趣 īĒ 験 介,所 ,今養 ^ 本 語 千 切 可 不誤。)駿,《 馬,趣,此 韻 社 傾 īE. 字 俗 木 羽 反 》偶 主 · , 切, 韻 皆 博 從 近。 誤 切, 切 澄 韻 釋文》音 同 毛 許 母 俗 馬 審 讀 養 俗 母 切 清 切 韻 讀 〇哆 他 荷 讀 里 如 或 母。 俗 母 如 切 不 本 俊 切 豪 蹙 今者 云 讀 融 誤 峻 韻 涵 俗 敕 精 惟 如 切

必

遠。

讀

切。

殠

切

土

俗

母。

側

 $\tilde{}$

本王 切,精母。 畔援,援,誤同 音 語 陾 邪 詵 如 讀 腐氣 青 切,音璧,幇母。 合古。 遇 俗讀臭爲齅。 俗讀 憲 切 ○ 樅,本 如 戒, 彪, 幇母 本 蠅 如 切 撚 照 曉 也,音同 乘 麻 見母 不 之 母。 切 母 喻 疑母。 韻 ○滤,蒲休切 誤。 榛 圻 ·七恭 母。 0 日 今遮 媛。 副 鉏 臭。 俗讀 母。 ○輦,力 有 ^念正 繩 臻 切 副 ○俔,牽徧切,溪母。 臭,氣之總名,尺 韻。 鮮、《 〇阮 齅,以 切 謝, 如 俗 誤 韻 清 本芳逼 懈 獬 讀 》依據切,音 同 並 詩 牀 母。 土語合古。 本 展反,音 虞 憴。 如 鼻就臭也,許 》作莘,誤 母 匣 詩 母 遠 懲 母 切 韻,今 Œ 切 澄 土語 今 作 1璉,來 俗讀補 敷母 韻 解 與 俗 母。 救 不 蔗 飫 輯 亲 同 讀 將 誤。 切 影 裕 母 韻 詵 同 俗 隘 今 容 救 尤 如 $\hat{\mathbb{E}}$ 聲。 字 囂 本 卦 韻 讀 如 懟 匣 Ė 韻 母

集,從 審母。 下快切 本徒協切 音吉,見母。 楚居切, 音差 ※ 慈 溪 憝。 不誤。 ,本墜、憝二 韻 間 〇梟,本 庾 母。 母 今讀 與 殊 切 今讀如 俗 〇姞,本巨乙切, 切,從 魚韻。 卦 ?,定母 問 月 讀 〇有且,且本七序切, 此 或 韻。 俗 同 如 古 音 韻 古 ○鞏, 讀 以 音,《 蘇, 樺,馮韻。 母 亦 迥 魚 堯 今楚 今讀 如 母 見 切, 今王 切 厥 緝 心 正 字 或 Œ 〇不吴,吴,本 切。 居竦切,俗 母。 書。 徂 如 音 一韻 音 清 以 韻》 權 切 樺 潁 Ť 徼 母 羣母。 韻 切 ○隕, 俗 ○越,本王 無憝 音 7,先 禡 見 協切 讀 疏, 見 或 得之。 芻 韻。 母 母 母 音 讀 韻 泂 本 讀 清母。 7,端母 今激質切 模 爲 ·胡界 所 韻 如公,上 户 俗 韻。 俗 圓 〇右 兼之。 伐 菹 初, 話 頂 讀 專 疊 切 切 切 Œ 員 俗 讀 如 本 本

Ħ. 野 名 者 其 調 文切 於字 或合雅音。 語、皆據吳地 如 古 八者録 河,洵 鄙 溷 誤 (某者,未見字 日 韻 瑣 稱 _ 今 īF. 靡 母 名 不 獨 無足置辯 之,其餘信 某 以以 稍詳 韻 通 誣 在《正 而 小切者 》易 用 敷切 也。 村 至王與黄、弓與公,士大 言 以 夫里 故 然 己 若 韻》 也 書 他 丕之類,皆今人舌吻所不 勿以 異 如 夫 字,宜也,兹亦不贅及焉 1者也。 見 婦婦 者 也。 以 妄 俗讀之誤,止 吴於古 字書者也。 弗 武 反得其正,禮失 汚斯編 (呼, 譌 其 悉 切 其日《 (皮,以孚 (所云 著 「爲 謬尤 Ē 蠻 著 俗讀 E 方, 其 其 據 難 韻 尤 切 大夫常 E 流 而 悉 鏣 者 云 傳已 ൬ 某 俗 + 數 求 土 讀 能 語 語 切 以 而

銀 切。 一皆側 論 詩 音 新五 近岑。 之於字形矣。 洗 切 「榛」,當作 《唐韻》「亲」、「榛」異音 , , [玉篇》[亲]側 「亲」者 又案、《説文》「亲」、 詵 四 切,「榛」仕 其 5,亦如 仍 爲

> 《韻 樼; ^ 其故,今當以《詩》釋文 音,惟《説文》、《韻 人切,正合「榛」字形,當叢 《唐韻》,而亲、榛合爲一音, 主 玉 篇 會》榛果之 字形,當果實義 榛木之榛 **%** ^ 詩 **>** 釋 鋤 榛,緇 文 《補》否 臻 兀 切,或 爲 詵 惟《 榛 耳。 īF. 切, 木 青 作藤 皆 則與之異,不 徐鉉 義,俱 蠅》之「榛」,仕 或 側 作。皆分 作样,又作 巾 音 相符 反 切 皆 爲 E 也。 解 祖 兩

斯則 聲。 乎? 路二 此 有二 反。」 (柏舟》「逢彼之怒」、《釋文》云: E 音,《 協則 聲 今山 去聲獨盛於北矣。 切,分人麇、 怒,本上 案,顔師古《 非 東、 毛詩》『君子 逢 本音矣。 河 |聲,《玉 彼之怒」、『畏 北 遇 糾 人但 兩 繆 《 唐 篇》止 如 韻 Ē 知去音,失其真 顧、陸皆吴人,或未 贵 怒』、『逢 俗》云 韻 此 》始 唐 有 譴 以 奴 有 「自 怒』, 前 天 古 奴 「協乃 僤 無 古、 I古讀 也。」 此 怒』, 去音 切 去 路 乃

習其 止 有 音,故以上聲爲 乃 路一切 ,信乎鄉音之古今不 正耶? 然而近世吴語 同 也

則當 章四 曾訓 月》、《板》、《蕩》無傳, 則 者合從本音, 則增、層皆可讀 今案、《説文》: 師」、「曾是不意」 「才登切」,經也。 詩 詩》「曾不容刀」、「 層實本 語》、《孟子》、《檀弓》注及《禮部韻 讀 則, 河 曾」字 爲 詞 廣 亦訓 有 層,不 音矣。 之舒 ***** 增、 亦 乃, 無 Œ 無 層 也。 必 音 月》、《板》皆 音,《 「曾,詞之舒也,昨稜 應讀 ^ 兩 拘 mj 玉篇》「子登切」, 廣韻》 語 者 曾不崇朝」、「曾莫惠我 黄直 讀。 乃 則、 玩箋意 宜 足 河 如 義 該 乃 從 廣》 翁 勝, 孫奕《示 增,不應讀 兩 之。 兩 層 《韻會》。 音、 皆 無 音皆宜 無音、《蕩》次 訓 音, 其 傳、箋、《正 兩 訓 也 (曾祖 兒 得 經 訓 謂有音 則 之矣。 編 要之, 爲近, 爲 互通 如 切。 》,謂 也 增 據

> 孫、《爾雅》注以爲重,則亦當讀 如層

Z: 韻 才容 毓乃 未嘗不言韻。 易之易,故轉 非創言之也。又不僅此也,「牖民孔易」,箋 駿厖」,厖,徐武 流束蒲」, 之《釋文》,非 南」乃林反以協句,沈重乃梁人。又言「不 同 乎? 獨 詳 反; 晉人。 三子俱在陸前已言協句, 以 魏、晉以 「易,易也。」疏 「曰父母且」,徐七余反協韻,「爲下 者,則有 韻言《詩》,其來古矣,或謂 然漢 孫毓謂 寧不 又言「何以 世 爲難易之易, 也。 來漸有差殊,然不合者才 自漢已然,其來甚古,豈始 故矣。 一雖言. 講反協共、寵 我 蒲草之聲不與戍許協,孫 陸言「遠 韻 申其意 顧」,徐音顧 漢 速我 侕 去《詩 協 是康 ,以爲韻當 訟」 送于 韻之法至後 韻 陸但 世 小成箋《 爲 南 徐 始 徐 述其 近,字音 古以 取 於 詩 爲 亦 韻 沈 陸 説 世 於 改 晉 讀 或 協 讀 氏

本

而

陸

旲獨 後世 文》所 必 百篇始得爲《詩 用 無 字 知之也。 協 宋南 ~ 菴用之於《詩》,所 協 庸 音之不 以 不 名 通之,其 渡後 過 協 三、四 徐蔵 古矣。 後 而 》,豈不 世 吴棫《 法 敘 十字 音 不 其 非 讀 · 得 , 是 一謬哉 書,言有《 協 先 領 日 不 儒 乃 補 調 唐 . 詳 皆 居 影始 初 過 不 巾 不 字 以 半 韻 知 與 音 協 觀 古 補 古 口 韻 猶 **>** ^ 合_, 韻 見 釋 而 成 近

於四 守其 改字 不 於元 補 協「居」之類,是 ·莫」,「議」音「宜」以協「爲」,「譽」音「餘」以 可 一支十 説, ', 律 魏 古 轉聲通 古 有 僧 如 篤 古 神 灰 讀 論 珙 音音 也 之韻 用 己。 「來」爲「梨」以 之説 拘 亦 唐 陸 於 但《釋文》協 禮部 也 有 德 平仄之聲 ,亦知禮部 古 明 韻 韻 謂 居 始始 古 與 四 於梁 音「 人 也 一思 句 聲、 韻 韻 ",仍不 難 據 協 旲 緩 沈 反 協古 不不 約 棫 是 切 以 能 《韻 始 協 拘 煩 此 自

矣,而仍分爲四聲,則猶未盡。

芼,一 氏《韻 燕以 以 遺 協 其畧,凡得十九條,如 不 俱欠畫 藐、虐、耄六字同 人藥韻,而 藥、鑿、襮、炤、虐諸 亦 莫如 秦》、《 樂 協樂 無 外,其昭、慘、藐、虐,吴皆 匪 不字,疏 小異。 紫陽 樂」,二「樂」字《釋文》皆五教反,一協 協罩 韓 補 克樂」,兩 至《 雅 樂 協 嘯 甚矣。 諸 也。 較 復遺之。 協 へ南 至《 韻 《詩》雖 「樂」乎? 有 論 力 不 抑》 洵 云「何 嘉 教 在 收 之, \Rightarrow 魚》仍 《集 字自 反 樂字 詩 訏 祖 要各 又《抑》詩,昭、樂、慘、 傳》 章 吴氏 且 不 鐘 又 靡 樂」, 然芼、 協 諧,不煩協矣。 樂」,與 與 用 鼓樂之」,「 於於 豈 有 樂」 韻 收 陸 陸 爲《 韻 得 「憂心 關 則 同 反 罩等字應收 除耄字 失 補 鄭》、《唐 沃、駮、 雎 讀 嘯 韻 其 焉 爲 韻 而 靡 嘉 轉 偂 洛, 韓 異 不 樂」, 芼 其 竊 而 奕 旲 而 獨 必 式 舉 中

字而

定本文之音

,迂矣。

況
羕
本

以

永

取

字音羕。泳字以永得聲,亦音羕,執别

作之

家《詩》也。

《韻

補》徒據羕字引《詩

謂

永

矣」,「永」字引《詩》「江之永矣」,所

引

非

美。

○又如《説文》「羕」字引《詩》「江之羕

尤不

可協

古

I詩,則

兩詩「母」字,仍宜讀

如

至婦之音阜,紀於後

世

否字古無缶音也。

而

協止、艾,一協史、恥,則當讀

鄙

可見

案,否字有

缶

鄙、痞三音,然《小旻》之「聖

否」協、《思

齊》「母」字與

「婦」協,可作牡

集傳

>

兩

詩

俱

無 協

始欲

如

今讀

也

母一字,皆應

讀

如

美,惟《葛覃》「母」字

與

否」、《賓之初筵》之「醉否」,字義應爲缶音,

近

一儒《

古音考》樂音澇,此北人土語,亦即

昭、

慘、耄以協之,與吴韻異,未詳

何

據。

反

也

不不

如五

教

反之典矣。

〇又如《

詩

中

朱

乎? 《采薇》四章皆以華、 之」協。 《集傳》「白 義一 讀如好」,今《説文》云「旭,讀 音、《詩》「旭日始旦」、《釋文》引《説文》「旭 都四字協,則 協、《鄭》之「荷 協《詩》也。 之呼瓜 爲居,華爲敷,古音也,故《何彼襛矣》首章 協良爲有證、《韻補》失載 之」、《無衣》「同袍」協「矛仇 民》「實苞」協「實褎」,《瓠葉》「炮之」協 南》無協、《采薇》兩協,蓋兼 方華」與 聲合而 尤難 切、車之尺奢切,古未之有,非 案,苞、炮、袍皆以 載 通 茅包之」,包,補 觀《北風》之「同車」與「匪 可知矣。○又如旭、勖與 塗」協、《有女同車》車、華、琚 也、朱《傳》偏襲其誤。 爲之,何得 華」與蘇、都、且協 車爲 羕 此 包得聲 韻。 字 用 荷 字。 」,則《集傳》此 如 今音,不 獨上下皆 反, 《集傳》《召 勖 · , 一、《詩 與下 出車》之 又如 〇又 好同 所 知 勖字 生 如 華 車 酬 以 聲

得聲,不應永亦爲聲。 古諧 聲字 *,

五六五

蒙日 章, 反。 侮 非 本 霧 以 逢 好好 本 且 勖、好三字 此。 切,以 之哲 篠 無 協「務」、《傳》得之矣。 以 亦音蒙,且 雅 」,其庶徵「蒙」字《漢 補 霧、霧、務皆以 領。 證 務」與「戎」異音。 驛」及「蒙恆風若」、《史記》「蒙」皆作 (常武)篇「我 邢 》哲字音。 但戎字古訓 ,又《春 也。 得 協 釋 疏 《韻補》不收, 聲 戎 古音相同,信矣。 引《 訓 云霧 集 亦 詩》 秋 旭 見 傳》 辯詳本篇。 》内 《集傳 戎 《説 與蒙通 敄得聲,音必 旭 騎 汝,義同 文》。 與 外 憍 人 《韻 殊疏 :>讀 傳 「皇父」協,侮、父兩 書》作「霧」。 也」,郭 案《書 哲,征 好好」證 音 ,才老協 〇又如 引 百音必 補》讀「務」爲謨 脱。 「戎」爲 亦 此 旭、勖二字宜 例 同 氏 相 洪範 詩 同 〇又 之, 《常 同。 好 反。」誤 讀 此 皆 朱反 而 詩, 也 旭 作 如 是 棣 主 顔莫 . | | | | | | 索 加 切 旭 禦 揚 既 黑 四 用 爲 又 F

若 補》收 反,祇 就之。 猗、破 莘 此 韻 喤」與璋、皇、《執競》「喤喤」與將、穰,本 徐邈音皇,《説 之信而有徵者也,與「駝」自協,不必改音 何反,皆非 韻 字必不 之末章,「多」章移切,「歌」居之切,此 至《古音考》欲 欲 不不 分 無 每 本 他 徒臥 贅耳。 兩 是妄説。 必 人陽韻,讀師莊 非 〇又如 可 證 旬 字爲 協 ,轉作蒙音,不 韻 故 用 才老意 反、《卷阿》之「駝」、《集傳》協 也。 脚, 韻 韻足矣,不必 朱子不從,當矣。 惶字、《詩》釋 文》 改二詩 則 又 而《 朱《傳 ○又如《車攻》之「駝 如 也。案、《車攻》之六章 集傳 亦乎光 「有 切, 纘 》音華 如 「戎」字爲「武」 命自天」、「保 》協之,亦 女維莘」,莘字《韻 轉 以 復協駝。 反。 文華彭反,又 戎爲汝之當 協王、商二字, 彭 《斯干》「 反 至「于京 協 不 可 卷 右 乎 旲 以 团 也 光 同 喤 引 以 説 集 就

協

「既

備

」,「以祀」不

必

用

《詩》之

常

體

忧

又《

早

麓

其音,以與下「景福」協

從之矣,至《旱麓》之四

章

者、一、楚齊》、「以享以祀」、「茲芬孝 ,才老引《儀禮》云「牢」鄭讀 、阜二音,斯 殊爲穿鑿。 、恐非 音喜, 》收祀字 各二也。 章,曹、 韻。 乎? 字 紙 如 以 詩 皆 是。 正 享 韻 六 每 母 不 言允矣。 《古音攷 ",此有 牢、匏 當 章 當當 以 於 旬 《集 如 「景福 知 一姥 祀」亦 集 用 爲 質 祀」。《大 樓, 協 别 每 《傳》皆 傳》不 此 罪 此 韻 韻 章 有 證 \equiv 因 音 音。 讀。 》辨 自自 切, 字 但 何 非 用 轉 者 四 《集傳 反,祖 傳》 無他 傳 通,亦吴氏 字皆隊韻,本 僾」、「荓 韻,《 《抑》之十 者 句皆 也、《集傳》亦疆協之、然不足爲證。 音莫,皆 反,速音徒 而從吴,良得之。 祇 》不用 甚多 漠 字字 韻 證 帰 》皆協 《泮 九 除除 補》皆 句 通 協 云 無 切 水》釋 然古 游,不 用 帝反 説 四 不逮」,愛、逮《集 他 良是。 人聲 章, 恐 同 韻 也 協 證。 無 閟 無 何 ,俱 也。 外,悉 文徐音, 應 去聲嘯 以 藥 人 宫 本。 此 ○又如《桑 樂、慘、 ^ 必改音 人寘韻。 韻, 聲,虐 板》 吴棫從古韻 **>** 章 降 如 又 則慘字七各反,耄 韻 獨 今讀 詩之「言耄」, 與 如 又 福 轉爲 惟 貌、 異。 以 酒 茆 如 既 《古音攷》舍 然古 傳 柔》詩「亦 就 可 虐、 虐字宜 多 古「多」 醜 祀 去,當 之 耳 無 韻 , 愛音 耄 字 本協、《 乎 韻 與 補》力

逸

職

切,云《毛詩

四

用

此

韻

四

.韻

田

》「來方禋祀」、「以享以祀」。

用,良

是。

〇又

如《

韻

補

匏爲

浦

侯

切

以

協之,

本協

據。

○又如◎

公劉

类

四

婦

房

詭

切

聲

如

尾,

而

陳

此

二字,謂古

無

牡

集

傳》

無協

贵

欲從

今讀

也

思

齊

首

章

母、

婦

爾一,

何

獨

無

協

乎

?

又

見《詩

五

字

爲

又

如

協

也

非

韻

字

照

反

婦

一房

詭

切,《

韻

補

>

收

人

字

與

騂

集

久

孔

協

以

許

既

?

集

隊

與

寘

犧 得焉。二公千慮之失,不禁後學縷指,九原 《韻補》客克各切,昔息約切,夕詳龠切,斁、 斁、奕、客、懌、昔、作、夕、恪八字皆同韻也, 祖》自「黄耉無疆」以下,亦句句韻。 僅十之一耳。《那》自「庸鼓有斁」以下,《烈 鳥》、《長發》、《殷武》三篇皆句句韻,出韻者 獨勤於用韻,作者意各不同也。 俱詳見本篇。 可作,其或有取於鄙言。 未詳厥旨。〇右諸條雖出管見,竊謂有 奕、懌俱弋灼切,與作、恪二字協,殆不謬 反,與宜、多兩協,不如《韻補》之當。 與上條 」、「是宜」本協、《集傳》犧字虚何、虚宜二 朱子協《詩》喜每句韻,而此詩獨不然, 〇又如《周頌》大半無韻、《商 《商 《那》之 · 頌· 頌 玄

毛詩稽古編卷二十八

吴江陳處士啟 源

己。 别 止有《 合於《詩》, 疏》、揚雄《方言》,以及諸家《本草》注 詩》家所以 後儒多據己目驗之物與土俗稱名以 鳥 爾雅 同 潤 物 草木之名, •釋草》等七篇,次之則 圃 此 樂 異 大 爲考覈也 名、 謬 也。 同 可資學者多識,此 名 古今既 而 然堪爲 異 物 殊 者多矣, 陸 證 鄉 據者 . 璣 土 釋 又 求 詩 説 可 而

遷,而物之生,其形色性 間 勝詰乎? 爲官名, 今并罕識其貌狀。 至菫、荼、荁、薇之類,古爲 以藿、烹鷄豚 不聞以爲穀。 其皮爲布,而 麻、《詩》亦言禾麻、言麻麥、言叔苴、今惟 始食其皮。 則》養父母,枌、榆列於珍味,今惟荒歲 甘美可食,今此四草無一堪供匕箸。 親采之,見周、召二《南》,《草木疏》亦言 荇、藻、薲、蘩古以奉祭祀,后夫人及大夫 執今以律古也。 文,必不合矣。又匪 ,亦往往隨世更易,蓋天 又以名祭, 乃欲 《月令》五時之穀,不數 麻勃、華。 則實夢,今此三草不登於俎 古以葵爲 執近今之土語,釋先古之經 姑舉一、二端而言之,如 又稷 黍 直此也,物産之在 必 麻費子。 乃 與 五菜之主, 芼羹則 味亦從 時地 饌食 稷 Ŧi. 穀 並 氣 之 所 列於藥品 而 稱,古最重 久則 長、故 必需, 異,斷 稻 飢 有 天 而 ^ 其 地 以 内 緝 數 妻 難 戀 而 民

總

辨

辨

物

五六九

稷米人 稷、粟、秶 此 饋 古 蘇 稷米不宜人,發宿疾, 膳。 者 有 之變 其 蠐 較 列之盤案,今人有對之欲嘔耳, 一,先儒疑之,而 食 八爲 「,贏 晶 以 頌 . 曹 可 穀, 之 爲 亦言稷米不甚珍 薦 與 陸 醢 也 近 也 不識 太 元恪,孫吴 及 豆 五 豬 今矣,陸言 後 牙 蹄 蜩 有 穀 一物 乃 世 蜩 作羹, 乎 長 蚔 欲 獹 又 或 者, ? 八正相 而 醢 取 誤 不 三名 孔 今借 《禮記》人君 蟬 Ŧ 乳母 蓋 人 以 能 蜉 ,仲達亦不能決。又陶 白 也。 也 范。 不 反。 辨 蝣 黍 ,以 ~ 爲 年 · 獨 陶陶 其 不能辨之。二蟲者 苗 本 可 八穀中之最下者, 獹 蚔 前 備他穀之不孰 習俗之 又《周 品品 昭 草》又分稷、 爲 隱 者, 者, 之草木 美於 似 類 居 蠭 螘 燕食之庶羞 蘆 而古以 禮 ~殊, 蕭 陶 0 也。 子 鳥 蟬 梁 . 弘 郭 也。 亦物 醢 獣 人 景 爲 粟 璞 以 陶 而 也, 言 言 爲 性 珍 此 蝸 謂

> 列之。 於先儒 異 同 諸 固 一者,亦 家 以 説《詩 近 古者 百 有 \forall 所 爲 一、二,未 釋 正 矣。 草 木 可 然 鳥 、 緊置 後 潤 之 儒 名, 之解 也,今備 時 勝 多

三説 黄。 狀不 説 極苦。 有苓」,毛云 談》辨之曰 阚 「蘦似 兩 雅》注 莖赤, 類 藥 當當 周 ~。」案 甘 形 地 南 以 草枝 黄 以爲「今甘 狀 : • 郭 有 郭 皆與沈合, 關 亦 爲 節,節有 葉如 以 鴡 疑 「 苓, 勝 注 》,楊、 而 注 亦 槐 未定 大苦 草。 詳 所 同 枝 見 當以 高 云, 孫 許、 本 也。 五 相當」。 也。」 蔓 篇。 乃 而 郭、 六 沈 生 黄 云 尺,與孫 又案、《本草 爲 孔 陸 藥 今甘 IE 簡 疏 四 沈括《 似 也 兮 引 家 荷, 草, × 其 孫 分 説 筆 隰 爲 碩 形 味 炎 又

H

驗

而

知之,豈不迂哉

^{●「}詳」,原作「許」,據康熙抄本、大全本、《四庫全書》本

似

則

草極 草,與 騅也。 得之。 草》鱣 <u>Z</u> 云 薍」,五患切,聲近 郭璞 毛異、孫、郭得之。 一名馬夢,高丈餘。」陶隱居《本草》注言 其 與 毛云: 長 馬 似 分館、 鱣 馬。」孔 「龍、紅草 毛 亦名黄魚,鮪亦名鱘魚,與 雅 駁馬,梓榆 大者,陶説得之。〇《晨風》「隰 馬 ○《大車》「毳衣如 蓼别草矣。 蘆之初生 鮪 同,孫炎、 發發」,毛云: 鯉爲 亦 而 疏 駁如 以 甚 玩。 也。」疏 稱 鱣 長大,即《詩》之游龍 樹 其 也。」《爾雅》「葭、蘆、菼、 李巡、樊光以蘆、薍爲一 案,鄭 郭璞 馬,倨 魚, 也。 鯉 有 引 《鄭》二 爲 謂 理,此勝 以 皮青白 牙,食虎豹。」陸 以游龍爲 陸 菼」,毛云 毛 蘆 鱣, 隰 魚 薍 爲 璣 蓋 云: 有 誤。 鯉也。」舍人 毛。 爲 較拳 鯉 游 祖 放縱 二草, 、 「 菼 , 迥别,郭 案,《本 龍」,毛 〇 下 遥 一游 毛 有 」,然 傳。 當 葒 視 璣 六 龍 與

注

蟲。 鴟類 轄。 婦, 宵行」,毛云: 泉》「苞稂」,毛云「童粱」,鄭「 陸言是也。案,崔豹《古今注》數螢火異名 孔疏非之,以 曹得之。○鴟鴞,陸璣以 鵙」,張華、許慎 也。」皆祖毛説。 爲「燐者,火之微名,久血、螢火皆 云 葽」,鄭以葽爲王萯 厶 云「一名燐」、《廣 涼草」,較勝。 揚雄以 鶮 許説爲允。 郭 音夏。 蠋, 苹, 蓱也。」鄭 勝 桑 爲盍旦,郭注《爾 陸。 圃 爲 蟲 大,郭 詳 也。」《 以鶪爲 螢 熠燿 本篇。 雅》云: ○《鹿 上三條俱詳見本篇。 火不 東 房九反。 以 説 燐 世。 説 似 Ш 爲 鳴 \bigcirc 可 當 文》作 鸜 爲巧婦,郭璞 》「食野之苹」,毛 藾 名燐。 豳 矣。 鵒, 曹氏以爲小草 雅》以 蕭 景 稂」作「涼」,云 風 燐, 螢 孔 蜎 蜀,云「葵 天,螢火,燐 王 者 宋陸 七 可 逸以 爲似 疏是鄭 月 名 灭 二,毛 月秀 熠 以以爲 也。」 》『鳴 燐 佃 爲 鶷 以 中 巧 音

餘 十有三條,惟鱣、六駮、鴟鴞、苹今通用之。 是《内則》之堇荁,嚴説當矣。 今用 堇,菜也。」孔 則源特有所取 疏 緜 馬爾。 **>** 以爲是烏 篇 堇 茶 頭、《詩緝》以爲 如 詳見本篇。 飴 _, 毛 右凡 云

茶者; 也。 Ш 榛、二茨、三魚、二桑雇,皆同 《大雅 二柞櫟、二棘、二竹、二蒲、二鬱、二苕、二 《緝》之説,《困學紀聞》同。《杕杜》、《北 雅 一芑者,一菜,見《小 山木,《困學紀聞》云: 有臺》、 三杞者,一 《詩》有三杞、三芑、三荼、二梅、二桐、 四 文王有聲》; 牡》、《杕 茅秀,見《鄭。 一苦菜,見《邶 《湛 露》,一 杞柳,見《鄭 杜》、《北 雅•采芑》; 「梓,杞也。」見《雅•南 出其 ・谷風》、《唐・采 穀,見《生民》。 山》、《 枸 機,古 東門》、《豳 將仲子》。 名而異物者 Щ 四 》傳無明 月》。 詣 草,見 切。 此嚴 文。 見

《唐》、《陳》二風及二《雅》諸篇。 《秦·晨 耜》。 苕之華》。二榛者,一果實,見《邶·簡兮》、 苻離,見《陳·澤陂》、《雅·魚藻》、《韓奕》。 柳,見《王·揚之水》, 策刺,見《雅·楚薺》、《青蠅 者,一白桐,見《鄘·定之方中》; 覻 鬯草,見《大雅 見《衞・竹竿》、《雅・斯干》。二蒲者, 見《大雅·卷阿》。 見《陳·防有鵲巢》, 二鬱者,一車下李,見《豳 酸棗,見《邶 二竹者,一萹竹,見《衞·淇澳》, 一枏,見《秦・終南》、《陳・墓門》。 鴞 \forall 二梅 風》, 者,一 委 ・凱風》、《魏 葉, 江漢》。 此嚴《緝》之説。 酸果,見《 見《 二柞櫟者, 嫲 此鄭説,與王異。 陵苕,見《小雅 二苕者,一苕饒 風 . 召 七 袁 七月》; **%** 月 • 有 × 摽 一苞櫟, 二棘者, 嚴《緝》之説 桃》; 栩 有 頌 杼, 竹箭 梧 梅 二桐 一浦 桐, 莞 見 見 良

者,0 雇》。 肉,見《雅 白,見《魯頌·駉》篇。 爲弓鞬矢箙 屋蓋 蒺藜,見《鄘 鄘 . 一水蟲,見諸詩; 凡爲物三十有四,而共十五名焉。 見《雅 定之方中》、《曹 木名,見《雅 . 小宛》; 見《雅• • 甫 牆有薺》、《雅·楚薺》; 田》、《瞻彼洛矣》。 一桑雇者,一青質食 采薇》; 青 素質有文,見《桑 海 蠅 鳲 潤 × 鳩 × ,似豬皮, 二茨者 ^ 馬二 雅 三魚 . 目 可 早

草木辨

禮・疾醫》注,黍、稷、菽、麥、稻,九州之矣。言五穀也,見《月令》五時之文及《周世又有三穀、六米、八穀之目,穀之爲説長世又有三穀、六衆、九穀、百穀之名,而後古有五穀、六穀、九穀、百穀之名,而後

之屬。」皆不能歷舉其名也。 非一,故言百。」《國語》「周棄播殖百穀」,注 穀者,古無定名。 大小豆,又與二鄭異説,總出於臆見耳。 麥、《炙轂子》以爲黍、稷、麻、麥、稻、粱、苽 崔豹《古今注》以爲黍、稷、稻、粱、三豆、一 云: 秫、大麥而增粱、苽,皆見《周禮 之文及《膳夫》、《饌人》兩注,亦名六齍 稷、麥、粱、苽,亦名六食,見《周禮 五. 黍、稷、稻、秫、麻、大小豆、大小麥,後 及《孟子》 率,誤。見《小宗伯》文。九穀者,先鄭 穀也,亦名五種,見《周禮·職方氏》之文 「黍、稷、稻、粱、麻、麥、荏、菽、雕、胡 五 穀注。 《韓 六穀 詩》薛 者,稌 君 梁楊泉《物 大宰》注。 即即 食醫 稻。 鄭去 ,俗作 穀 以爲 白 類

■ 「三」,原作「二」,據康熙抄本、大全本、《四庫全書》本

論

注。 也。 粱者 也。 成百 是穀 子柱能 陶 無米,故獨 即雕 黍、大小 始 念玉 《物 數 舍人》注及疏 節 ,黍稷之總名。 禾是粟苗 六米者,黍、稷、稻、粱、苽、大豆,見《周 圖 稻、粱、麻、麥、有大、小。菽、即豆,有 稷、稻、 以 胡 海》云。 居云: ,楊説殆非 蔬 殖 種 理 百穀、百蔬」、《易》言「百果甲 果 ,當百穀之數。 秫九者足該之矣。其在於《詩》, 流論 麥、大小豆、粟、麻,見《大象 粱、 各以 `麻是胡麻。」案,胡 數此六者矣。 總 粱、禾、麻、菽、麥, **>** 「八穀之中,胡 菽 굸: 諸 是。 百名,不得 ,後鄭九穀麻、小豆、小麥 ____ 説 者 菽者, 衆豆之總名。」是 m 稻者,槩 = 各 斷之,黍、 然《外 一穀者, 麻最 八穀亦有二 麻,今之脂 + 併 良。」又引 種 傳》言 蔬 種 即 見《 稷 果於穀 蔬 之總 稻、粱、菽 麻 果 本 即築,又 也。 大、小。 董 坼 烈 助 名。 仲 草 一説 賦 方 Ш 穀 舒 等。 秫稷 復相 麥、日 有以 其 也。 也。 也。 日

注

日

皆

禮

苽

家注釋,參諸 黍者矣 以粟爲 者矣,皆陶弘景。 又以粟爲穀名,陶 芑者,皆梁 者,皆菽 黍、稷、粱、秫 黍 有以稷米爲人不識者矣,有以粢爲白 稷、築、粟爲 者矣,氾勝之。 今惟 疑溷,解者紛 曰重穋、曰稙穉者,種之早晚 日 來 日 似 稻、 蘇頌。 牟者,皆 也。 秬 稷 稻、麥、菽、麻、苽 也 日 圃 稌 日 目驗,惟近世李氏《綱目》其言 皆難 其 黏者 有 者 秠 四者 日 日 麥 一穀者矣、孫炎、郭璞、賈公彦 以 有以 紛,各有異 隱居載之於《本 皆 麻、 者, 據信。 禾、 也 矣,顔師古。 黍爲黏稻 難 稻 日 皆 秋 日 於别 苴 日 也 黍 穀、 爲黏稷 源當 [菽、 臼 五者 者,皆麻 也 識 同 者矣 日 \Box 合《本 有 粱 粟 明 荏 者 以 有以 而 草》,名 而 崔 白 者 稷 矣, 菽 E 秫 漢 非 也 草》諸 豹。 糜、 者 易 總 爲 粱 以 穀 日 許 粱 慎 黏 爲 名 藿 有 稱 來 名 稷 日 日

穀

名

蜀

黍

又

名

蜀

秫

必

自

蜀

來

三代

時

蜀

李

但

目

爲

黍

稷

别

種

未

審

何

據

也

竊意

此

者

可

作

餻

煮

鬻,南北

皆

植

之,

而

北

方

最多

俗

穤

粱,乃 粱、秫 種 稷 栗,本 似 穄 以 炎《爾 近之。 合之所見,始不 聚 之小米,大 爲 蘆 ,俗稱蜀 《食物 黍, 後 而 雅 始 粒 唐 者 高 苗 李 分其粒 蘇 景 注 丈 葉 可 黏 恭 及 謂 本 稷 秫 餘 相 者 和 蘇 黍、稷之 丽 宋 ·草》 正 之 黍 恭 粒 似 蘇頌 稬 毛 爲 亦 别 細 《唐 稷 長 稷 相 稱 而 毛 之説。 大 種 德 本 作 即 者 遠 間 結 蘆 短 如 》注之説。 穗 今北 粱、秫 即 爲 汪 粟。 實 者 也。 椒 粟之 ^ 疏 穎 秫 粱, 爲 不 著。 米, 廣 散 釀 方 同 案,高粱莖 粟 李 雅 黏 細 與 之 性 成 酒 粟 謂之蜀 耳 一》之藋 又 粟 而 粟 者 作 堅 枝 即 黍 门謂 即 毛 穗 爲 實 黍、稷 粱 子 餌 而 今之高 今 秫 短 叢 有 梁、 粒 也 不 葉 簇 本 者 北 黏 長 黏 蘆 木 皆 攢 與 漢 爲 者 方 孫

> 斯 黍,種 之類,皆 爲 名,未必 遠 又其别 裔 出 有 西 後 此 種 土 此 世 種 也 葉 種 定 始 矣。 未 得 似 人 高 而 又有 中 粱 栽 或 之, 而 玉 肥 高 如 則 短 胡 粱 經 高三 麻 亦 傳 所 名 安 四 言 玉 石 蜀 穀 榴

也 性 爲 我 衣 服皆 其實之供於食者也。 人 生,其皮可 服、玄端服、深衣、皆 金。 衣 朱 以 之變也。 如雪」,不染者也。 僅 孔陽」,染之者 用之。 蕡實朝 《月令》秋 又有苘 古人以 施 緝 於 麻, 事 麻 布、 又 五 喪服 食之, 爲穀, 之籩,《豳 有 冕 名璜 紵 東門 耳,不 皆 也。 「麻衣 麻 仲 又 《七月》之「載玄載黄, 麻 績 麻 之池》「可 用 秋 風》叔 宿 後 冕 其 止 ,葉大如 也。 又 以 根 俗 世 也。 皮 爲衣 嘗之,《 土 尚 不 \wedge 爲 苴 蜉蝣》之「麻 中, 以 皮 之 食 布,則吉 於 以 桐 弁 漚紵」 異 麻 周 九 不 五 華 服 月,此 禮 種 亦 其 行 黄 》遵 是 自 物 以 X 朝 屬

殻爲 之殺人。」 案、《本草》麻人本經 夏 青葛,本經云: 七日采之,良。」子名麻蕡,又名麻藍,又名 華名麻勃,本經云: **枲屬。」 檾、褧、苘、**璜 衣」、《説文》云: 開 麻仁,惟葉不用,吴普云: 北 土 最 多 「九月采。」人土者損人,去 9 其 褧, 檾同 「麻華 皮 上品, 字同,正 口 績 去類 上勃勃者 華、 此 切。 ^ 實皆人 碩 麻也。 有 也。 人 毒 一、七月 **>** 食食 藥。 又 褧

也。 易以西 之於回紇。 月》與《縣》之瓜,則未有以定之。 書》云「供果者爲 「有敦 《信 南 果瓜,古食甘 瓜之爲類甚多,約之止有二,王禎 瓜苦」、瓜 山》之瓜、剥 「瓜之名耳。 然二瓜 有苦瓣,亦 華葉性 、果瓜 瓜,五代始 之以 菜 瓜 供供 有 爲 味 公菜者 胡 菹 但 非 瓜、越 宁,其 有 果 相 爲 小瓜矣。 類,後 西瓜,胡 菜 菜 瓜諸 瓜 瓜 乎? 世 令七 (《農 嬌 種 僅 是 得

苦瓠 爲一 是也。 物性變易,不可執一論矣。 種 陶 通 其形狀雖殊,而性 非 璣 然苦匏不材,義本於《詩》,《詩》之苦葉,陸 雅》「甘瓠」、《左傳》「苦匏」之語 上曰 者一 也。 「幡幡 隱 甘 以 稱 性 物、陸佃《埤雅》辨其不同,以爲長 本苦 一瓠,短 居以 甘 。毛傳、《説文》、《草木疏》皆以 爲 凡六詩,言葉者二,言實者三,言棲 ^ ,後世因 者大,苦者小。 詩 瓠葉」是也。 三言 少 復 爲甘者忽苦,韓 也, 時 兩 頸 有 可 言 瓠,「齒 其形 大腹 且葉苦 長 爲羹,八月中 匏 短之殊。 異 味 日 匏 如 則 而 非 匏, | 言壺,「八月斷壺」是 要各 有 瓠犀」、 分名之。 實苦也。 苦 保昇 似匏而 陸 葉 大抵匏、瓠古本 得 ·堅彊 此 之目驗,古今 「甘瓠纍之」、 以 言 而分之乎? 圜 其有苦者 酌 不可 爲 \wedge 本草》言 殆 之用 日 甘 因 壶 匏、 食 而 匏 則 小 匏 痼 瓠 瓣

芹,不可食。惟子香美,可調飲食。」案《爾 《本草》作「蓟」,陶隱居以芹爲俗字,然芹字 亦可食」,與黄異 雅》「茭、牛」」即 故采之。 取根,赤芹取莖葉。 下品,即《爾雅》之楚葵矣。厥種有二,青芹 以 語誤也。《本草》名水蓟,又名水英,入本經 見《説文》,云「从草斤聲」,則芹字古矣,陶 「水則采取其芹,宫則采取其化。」也。 東服,此毛義。 采芹」兩見《詩》,皆興也、《雅·采菽 《韻會》云: 此,郭注云「葉細碎似芹, 《頌 《周禮》以芹菹爲豆實。 • 「又有馬芹、俗謂胡 泮水》以 興德化 案,「芹」

爲物 · 葦也。」《夏小正》傳云: 者三焉。 葭菼、蒹葭、萑葦皆見《詩》,覈言之,凡 即 葭 今蘆也。」又云: 爲 章。」《 毛傳云: 阚 雅》 「葭,蘆也。」又 葦未 「葭、蘆。」注: 「 葭, 秀爲蘆。」 華。」

傳云: 此。 注 者爲言矣。 《説文》云: 菼。』《説文》云: 也。」又云: 《説文》云: 也、葭也、萑也、三物而十一名。大者葭 「萑、葦之類,其初 小,實中。」《夏小正》傳云: 萑。」《爾雅》云: 蘆,其别名也。 而又小於萑也,薕其别名也。 葦,大葭也。」然則葭、葦共 草,而小於葦也,薍與雕,其 曰鵻。」又云: 《爾雅》又云: 似 「蒹,薕也。」《爾雅》云: 在 嚴《緝》彙諸説 加 「薕,蒹也。」然則蒹 「菼,鵻也。」又云: 「葭, 葦之未秀者。」又云: 細、高數尺、江 毛傳云: 「菼, 萑之初生。一曰薍 「薍,菼也。」然則 生者皆名 「其萌,蕹。」音綣。 菼,薍。」注: 而斷之曰: 「菼,薍 蘿。」此 一草也,華與 三者之辨如 東 别名也。 「萑未秀 獨 呼 「兼,薕。 爲 在、菼共 爲 似 則 借 草, 薍 總三 注: 藤。 葦 音 玩 毛 爲 爲 而

舉中 馳, 大爲 小 皮薄而 蒹、葭爲一草, 説雖出 又毛傳以 風》之『葭菼』、《 則名爲萑。 蘆 本草》别三者貌狀,言大者長 「秦風》之『蒹葭』,舉小與大者言之也。 者 蘆 短 與大者言之也。」其 物 色白 小 又名 成 而 菼、蘆爲一草、《九家易》以 m 四 則 小者蒹、薕、荻,一 中 華 名。 名 實 中者 豳 可可 華。 物 風》及《小雅》之『在 初 作 中空,皮厚 而 生 先儒,而 中者菼、薍、 簾。 四名。 爲菼,長 言 此 明 未可 物而 嚴 初生爲 丈餘,中空, 且悉矣。 丽 大爲 語 色青蒼; '盡信 在,又 所 三名也 在、葦 未及 薍, 葭, 「葦」, 《衞 又 成 名 長

案,巨 云 (大雅》凡三見,《樛木》箋、 藟 瓜, 詩 物 》言 陶 m 藟 隱居以爲 名巨 相 N 似,信矣。 與 瓜 葛 即千歲萬 俱 似 **~** 北 孔 周 疏、釋文皆 薁 南 引《草木 亦 》、 《 王 延 蔓 《别録》 生。 以 風 疏

> 葛藟」 藟 乎? 藥爲 藟及 鬼桃 爲木、《説文》以爲 凋 云 欇,音涉。 文 》云: 上品 爾雅 爲 葉。 「葛之藟 陸《疏》 '。]陳藏 藤, 「藟,本或作藥。」又《左傳》杜 藤 以 . 又名藟 大者 釋草 生之物,草、木 證 似葛 「藟 虎 藟 藥」。 器 盤 蔓滋 Ě ,草也。 藥,木名。」 而 則 蕪,云: ൬ 無 薄,故 云 瓜證 粗 蓝,《 以《詩》之藟 蕃」、恐非 Ш 大。」然 草 藥 之,是藟 名千 釋木》有 蔓似葛,葉下白,冬只 · 矣。 兩 注云 藤 口 歲 則葛 生 是 通 一個大 藟。」引《詩 乃 ,宜《爾 爲 「諸慮 如 「今江 藟, 木 草 蒲 類。 引「莫莫 類 萄, 釋 其 注 雅 Ш 文 東 Ш 解 葉 》葛 葛 亦 藥 呼 説 以 似

「今人呼青蒿,香中炙啗者爲菣。」 會》皆備著之,今取 ,列之於左。 蒿之種類 至多,《 其名見《爾 蒿, 詩詁》、《詩 鼓 雅 去 刃 緝 與《 即《鹿鳴 切 毛 及《 注: 韻

得火,曰

埤雅》、《詩

緝

莖直上,白色,葉四 者,又削冰令圜 菁菁者莪》「蓼蓼者莪」是也,亦名蘿蒿,或 采艾兮」是也。 其字从义,草之可以乂病 子,而内子微細不可見,故云無 齊頭蒿,三、四月生苗,秋華黄,結實如車前 繁。」此二蒿之辨矣。 蒿。」即《召南》「于以采蘩」、《豳風》、《小雅 兩「采蘩祁祁」是也。春生,秋香美可食,又 艾,冰臺」,注: 無子者。」即《蓼莪》「匪莪伊蔚」是也,亦名 食野之蒿」是也。 冰臺,其 「今莪蒿,一名蘆蒿。」即《小雅 菣。」一「蘩,皤 **₩** 以 一,舉以 以 爲又 「今艾蒿。」即《王風》「彼 此乎? 布 《草木疏》云: 向日 名角 ,面青背白,七、八月 「蒿青 一「蔚,牡鼓」,注 ,以艾承其 蒿 二月宿根生苗 一蒿」, 圃 者 也。 高, 非 繁白 是。 「汝南 一「莪, 影 一白 則 而 兮》。 蒿也。 風 以 《召南》。 《周南》「言刈其蔞」是也。 是也。 已上八種,皆見《詩》、《雅》。 牛尾蒿。 黍蓬」,郭注不言是蒿,而《説文》及《埤 爲香,亦名香蒿。」一「購,商蔞」,注: 脂」是也。《草木疏》云: 蒿也。」 初生亦可 有華實。一「苹, 賴音賴。 蓼彼蕭斯」、「采蕭穫菽」、《大雅》「取蕭 一「蕭,萩」,音秋。注: 彼采蕭兮」、《曹風》「浸彼苞蕭 爲 下泉》詩有之。 蒿 又蓍草 《草木疏》云: 《草木疏 生下田,初出可昭,江南用羹魚 屬,見《召 可作燭,有香氣,故祭祀以脂 亦蒿 **※**云: 食,即《鹿 南 類,不見《爾

可

《埤

雅

「蒿也。」即《王

風

二、《小

雅

祭

莖似箸,香可食。」

鳴》「食野

之苹

蕭」,注:

「今頼

汝陰人皆云

五七九

又《爾雅》云:

騊

虞》、《

衞

風

伯

雅

而《

曹

「葉似艾,高丈餘。」

又「齧彫

蘩、苹、蔞三蒿辨别

見

即即

「今謂萩蒿,或云

蒸蒸之

蒿 細 醜 始列《本 莪之類」。 之醜,其即 丽 蘩之類,自皤 名,至秋 繁,由 後世 名。 葉 秋 紋 爲 胡二二種 皆 · 草 亦 老 蒿 蒿之醜與? 。」注 邪, 成,皆 ***** 名 又《本草》「茵 T 蒿。 蒿 同 此 注,注: 以 蒿氣味 通 不 又有 外, 呼 載《 醜 又有「蘩,菟葵」、音兮。 爲 「皆未 同 故邢 詩 類 陳 與 蒿 蒿、 也 × 一蒿 似 。」春 疏 ^ 同 詳。」要之,蘩 邪蒿,宋 今案,《 蓬 雅 以 邪蒿 蒿 時 爲「蘩, **>** 而 各有 而 《釋草 俱 嘉 似 葉 得 緊 蕭 蒿 祐 種

茨 卷 猗猗」、「終朝采緑」 者薺」是 喻 5、本作 施 言抽,亦以爲惡草矣。 小人也 《詩》「采采 離 也。 . 薺 騒 崇云 即 此三 菉, 即 蒺藜、詩 **薋菉葹以** 卷 草皆見《詩 耳」是: 是 王 也。 一 芻,《詩》作緑,「緑 也。 〉「牆 盈室」,蓋以惡 卷耳、王芻, 葹,即 有薺」、 一薺一言埽 卷耳 資,《 詩 -,又名 雖 楚 采 作 草 竹 楚

> 可 尤爲 意實 之而 可染,皆有用 律論乎? 嘉 不盈 不 在 植,非惡草 此。 ,意亦非嘉卉乎? 於人,而 又卷 也。 耳 堪茹,蒺 靈均 E 芻 之寓 以 然兩 興 藜 武 興於物,豈 入藥,王 詩 公之德 取 興 恕 之

《易》,祭祀則以 茅」、「白茅束兮」是也; 禮則以爲鼎 白 之貴者,則别 白,故古人重之。 白茅短小,華於春夏之閒。 華菅兮」是也。 自牧歸荑」、「手如柔荑」是 詩》,或質言之日 「茅、菅茅、 茶,「有女如茶」、「予所捋茶」是 茅,賤 卉 鼏 黄 也 而言之日 茅、 考之《本草》,厥 縮 所 而 菁茅見於《書》,白 茅,「白茅包之」、「晝 酒 謂 香茅、 用 物 於 封諸侯則以苴土, 一营,一可 薄 人 芭音 或本其初生日 愐 甚 菅茅生山 也 用 一溥, 巴。 以 3 重 心温音 種 又 也 或咏 也 茅 不 [茅見 以 之 二、「白 E 一,有 其 其 其 其 一,似 夷 屬。 類 華 於 于 在 食 潔

荑 名菁 開 白 茅秀之别名 然郭注 見《詩》而見《爾雅》,云「莣,音芒。 可 毛 風》之茅,黄茅也。 叢生,葉 白 月》之「于茅」,容或取之矣。 詩 藗,牡茅。」注云: 陳風》之菅、《小雅》之白華,菅茅也 茅,而 、,徒取柔爲比,則泛指諸茅可也。 以供祭祀 傳謂「取其有始有終」,始爲荑,終爲茅, 華 葉 》,則《召 又云: 茅,一 華 根 謂 於 長華於初秋。 大如蒲,長六七尺。 「惹草皮 深秋, 名璚 ,則此荑,其香茅乎? 可 「蔈、荂、茶、猋、藨、芀。」六者皆 南 鄭 人 》、《小雅》之茅, 瓊同。 》、《豳》之茶當之矣。 藥,而· 可索綯。 可爲 二荑不知何茅、静 「白茅屬。」則《詩》 茅,荆 黄茅似菅茅,而 白 繩索、履屬」,則《七 茅 三者葉 州 爲 以五者 爾雅》又云: 貢 勝。 杜榮」是也。 白 之。 《碩人》之 相 芭茅不 . 茅 香 似, 合之 芭茅 茅 所未 也; 莖 **网** 女》 皆 +

> 也。 後 之梅,截 日: 切。」是兩木元各一字,古本經文字必各異, 从某作棋。 文》云: 梅,是和羹之梅,◎《秦》、《陳》之梅, 各有疏,於摽梅曰: 傳皆云: 盛極則隋 秦》、《陳》之梅,毛皆有 世 从木甘 梅之名四 溷 「梅,樹皮葉似豫章。」然則《召南》 爲 「梅,枏也,可食。 然兩木、毛、陸意正同矣。 音惰。 「梅,枏也。」 爾。 闕, 徐莫桮切。」又 見 落者 古文从 況 於《國 梅 「梅,杏類也。」於條 梅 陸元恪摽梅、條梅 性畏寒,不 也。」●《秦》、《 風》,二 傳、召南 口 <u>云</u>: 作 从木,每聲。 槑。 而 ^ 「某,酸 召 産北 徐 是梅 傳云 又《説 南 (陳》二 莫 士, 後 或 果 枏 梅 亦 與

^{● 「}盛」,原缺,據康熙抄本、大全本、《四庫全書》本、嘉慶本補。

陸氏 章言 子有 言豫 《陳》所 似杏 召 同 南 異 條 赤 與? 章 實 梅 子 陳》之梅,非《 江 宜 ·白二種,《説文》以 疏忽甚矣 酢。」蓋 青 木 疏證之,合於 沱 **示**可 爾 也,其爲 已 入梁 雅 食 誤 認認 ,枏之木 境 召 釋 枏 兩 經 南》之梅, 樹 自 木》「梅, 枏 梅 而 應 無 爲 爲 違於注,又 理 疑。 植之,非《 口 細 也 食 緻 陸《疏 郭 於 邢 注 殆 豫 明 不 疏 料 云 章 辨 引 是 豫 V

矣。 雅》 梅 「槄 有二條,而《詩》終南之條,是《爾雅 非 當 Ш 詩 摽 以毛 榎」, 梅 禎 也, 傳及《草木 兩 非 梅, 柚 郭 條 注 而《爾 也,《 以 疏》爲 爲 雅 埤 似杏,誤矣。 》之「梅,枏」 雅 Ē 以 爲 柚 是 学之 誤 爾 條

餘 加 (橡,子 ,子作胡桃 味 疏》言榛 亦 味 似 栗。 遼 有 東 兩 種,一種枝葉 種 上 黨皆饒 枝 葉 如 木 案,味 蓼 如 一,高 (栗,子 加 女

> 榛皆栗 爲 四 相 胡 似 詳 亞 桃 栗,曹在 非 者 見《正字》。 耳 栗類 今亦 兖、豫閒,未必産遼 用 也。 ^ 邶 爲 *\ \!\ 《詩》 果,俗 鄘 <u>Fi.</u> 》、《大雅 呼 言榛, 榛 子 果,大 》先 爲 밂 果 與 儒 抵 實 松 皆 者 四 以

桐 《定之方中》之桐 爲 月,桐始華」,陶 郭 Ŧī. 也,即《爾雅》之「櫬,梧」, 内 華 桐木」,亦名華桐,名椅 埤 即即 有子 璞合上二 如 梧 雅 牽 桐 桐 梧 月結子,可食, 片 牛 謂 有 桐之無實者。 陶 其 輕輕 華 四 説 桐 不實者誤。 而 種 虚 近之矣。 爲 白 貞白以 如 白白 色,心 詩 榆 木者誤。 古 桐 莢 與《 也 爲 稱 又有岡 葵 微 桐 ^ 白桐 鳳 四 爾 卷 赤 名 實 即《 桐之外, 月 凰 雅 實 阿》 至《 材 泡 梧 宋寇宗 開 非 阚 **>** 之 堪 長 桐 得 媆 此 雅》之「榮 月令》「三 早 三月 其二 黄 作 桐 寸 不 又 春 琴 餘 棲 小 開 有 奭 瑟 矣 華 焉 淡 青 以 桐 開

中 桐 宋 無 紅 - 》皆桐 何 明 羅 華 實 據 願 子 嘗 謂 桐 椅 大 不 如 垂 ൬ 湛 並 以 圜 實乎? 露》 荏 稱 其 南 桐 詩 所指自 實 人用之作 「其 名 離 又《湛 虎 離 桐 應 子 其 證 一種 露》 桐, 椅 油 之, 與《定之 乃 名 ,榮桐實長 亦 則 紫 此 名 朝 華 桐 油 陽 桐 桐 方 恐 之

寸

餘,足當

離

離

之目

矣。

斗,儉 之所 所 子名芋, 理邪,故有不 丈,小則聳枝,大則 栩、《車舝》之柞薪、《 栩 旱麓》、《皇矣》之枚,皆 謂 7, 杼」 賦 非 唐》、《陳 仲 果 是也。 미 直 非 吕 治之所拾 以禦飢。 穀 切。 材 而最 案,此 之稱 又 兩 名橡, 風 益 偃 皆 服食家亦 及《 蹇,葉如 采菽》之柞 木 四、 者也。 是 柞 又 四 口 物 <u>Fi.</u> 名杼,樹 櫟 染 牡 矣。 月著 也, 用之,孫 儲 口》、《黄 皂。 狙親 葉,木 枝,《 即《爾 車 華黄 法切 亦 高 牽 鳥 名 堅 緜》、 思 》之 色, 雅 篇 公 皂 貌 而

> 之「苞櫟」,華谷以爲别木。 生, 興, 以 云 見其葉之蕃 蓬蓬 四 瑟」,瑟訓 其 清兮」爲 故乃落。」 豈 牡 二爲 葉湑兮」、《 有 篇 定 美。 衆,則又叢生之木 日 乎 譏。 茂。 一苞 則又耐霜之木 ? (采菽 木也, 《采菽 但《車 _, 鄭 苞 箋云 》篇 訓 而 牽 **>** 喻 美 稹, 云「其 喻 才 刺 也。 也。 賢 妬 柞 不 早 同 相 女 之葉 ^ 至《秦風 麓 繼,故 敝 詩 鴇 蓬」 篇 羽 新 人 × 將 取 E 以 故 可

於《唐 惟嚴 禹 櫟之名,説《詩》者 草 栩,杼 櫟,其實林」、《秦風》之「苞 **| 锡修《嘉祐本草》指** 木 風》不 氏《 疏》二 唐》之「苞 」、《唐風》之「苞栩」 詩 引栩 緝》云《詩》有二· 風之柞、櫟各 ,杼」而 栩」、《秦》之「 不 引「櫟,實 明言其 爲 有釋、《 木,亦莫辨 柞 機」是 林」, 是 爲 苞櫟 櫟, 也 ,誤甚。 兩 藝文類 ; 也。 謂 木。 当。 爾 其 今案 《大全 爾 宋 有 雅 雅 非 柞

及《車舝》、《采菽》、《旱麓 亦 疏 雅 則嚴 説 爲二木, 非 ·實林」及《 無 據 於柞 矣 《秦風 引《 起》、《緜 爾 \searrow 丫苞 雅 》諸 » [櫟」之陸 詩 栩 於櫟 杼

音茂 榆」是 如榆 閒 皮及 其 風》山 「今之刺 浸彼 榆,白枌。」此 内嘗 炭 可 ₩. 收 似 木 考之《詩》 見 **返 欆 薪** 草木疏 也 也 |陳藏 有 至 榆 理 榆 《 説 一冬釀 異 錢, 樞」,《 ^ 也 文》及 本 器《本 , ^ 耳。 陳 》言榆之類 三月 草 爾 酒 及《 白 風 陸《 爾爾 崔 × 雅 今十 榆 》「東門之枌 草 謂 寔 曜 取 雅 疏 爾 (月 - 》謂「 也,郭注云「枌榆 之零榆 乾 其 *** 》**云: 雅 種 令》。 仁 口 有 \leq 榆 | 穫,落。」陸《 江 作 作 十種,葉皆 有 藲 不 ^ 東 醬, :糜羹, 小 其 針 ,茎。」注 可 無 ~, ~ 雅 本 謂 七 得 刺 大 之 經 見 阚 焉 榆 如 而 教哲 疏 大 《别 上 雅 有 柘 數 相 皮 云: × Z 東 録 矣 醽 似 伍 唐 刺 葉

拳, 监 香 生 馬。 所言 理 似 甑 六駁」,陸《疏》云 白者名粉 斫 其 無 隰有榆」, 檴 帶, 以 Ш 堅 槲 遥 灌 姑 檀 殺淵 中。 則 此 + 韌 今梛 嫩 周 其 材 視 不 其 駮 四 種 而 而 禮 栵 可 似 葉圜 諦 榆 神 實 赤 雖 者,《詩 庫 此 惟 則 爲 馬。」 - 者即 也 夷。」 得 名 英榆 小。」陸《 壺 可 此 取 杯 爾 而 榆 **檕**音 爲 涿 其 葉 器 葉 厚 郭 然 雅 》、《雅 此 也,莢 車 氏 赤 ,剥取 似 而 如 注 計 陸《疏》 轅。」例本 是 流 亦 榆 栵 《釋 云: 駮 榆 也。 迷, * 7 似 乎 馬 榆 \forall 之「牡 文》云: 葉 皮合漬之,其 皮 栵 俱 ? 檀 有 檕 梓 如 堅 又 ^ 載 也 無 赤、白二種 大 《秦 栭 榆 ·栗類 榆 迷 之。 韌 引 橭」,午 姑 雅 葉 當 尚 橭 \sim 里 皮 風 注 口 () 然元 :音枯, 如 姑 爾 一》「隰 可 語 青 亦 爲 唐 榆 榆 雅 貫 得 味 白 云 榆 絙 亦 , 風 也 駮 象 辛 駮 有 恪 木 木 索 音 愐 類

母估 矣。 其七 歲 合前 姑。 人 又案,《 蓋 樠木之下」, 皮味甘寒。 同 有榆糜 構、 無 甚 饑 亦 則 食 又《廣雅》云: 否 凡 也 榆 朗 内 七矣。 也。」此 也? 窮 榆 、榆醬、皆用其莢、是榆 同 則》甘旨之供,粉、榆與 民 莢 柘 音、《釋文》: 《左傳》莊四年「 孔 食之。 者 榆 外 疏 1,惟采 元恪 者,二見《詩 此 梗 以 則《本草》有榔 榆 爲木 所 可見物之性味,古今不 「杜仲, 其根、 也。」 云 「構,郎蕩反。」正 似榆、俗 + 皮以 凡 . 種 曼 楚子伐隨,卒於 **>**, 此 人榆 乃佳 未 皆 和 呼 見《 焉 也 知 音郎。 得 爲 香 後世 味。 此 爾 劑, 榆 山 朗 此 得 雅 榆 榆 名 榆 而 今 當 亦 木

楊 名亦 垂 即即 礦木。」此二木之辨也。 互 楊 阚 通 揚 雅 起 《王風》之蒲 柳 所 謂 下 杨 垂 玉、《玉 蒲 篇 柳也 《秦》、《 然其 <u></u> 爲 ,亦名蒲楊 陳 類 楊 》二風之 枝 不 直 不 垂, 其

麻疹 四 氣能 弱 《大雅·皇矣》之檉,即《爾 作軟。 柳同。 多。」案,近 柳」也,郭注云: 於榆柳,即 條」也,注云: 柳、《菀柳》之柳,即《爾 者大楊,青者小楊,皆 赤檉,又名雨師,又名垂絲柳,又名三春柳 又名水楊,又名青楊 「折柳」、《小雅· 董澤之蒲」 尺, 枝、細葉如絲。 即即 應 其華名柳 紅 雨 陸《疏》云: 此木矣。 色 負雪 世呼爲 此,陶貞 如 者 蓼。 即 絮, <u>Sp</u> 不 采薇》之「楊柳 此 凋。 「今河 《鄭 西 名 入水 那 ^ 白以 葉 「有 河柳,醫家用之治小 、《左傳 衍 赤楊,又名朱楊,又名 垂 可爲箭幹。」《 風》之「樹杞」, 雅》所 一條矣。」 義 . 旁 廣 爲 皮青、皮白二 爲即 歲三華,華穗 萍。 長 **>** 赤莖小楊。」小 雅 云: 所 水楊 謂 條 葉長枝 所 古人 稱 「桑、 短 謂 齊 者 小弁》之 勁 萑 汴 春取 即 檉 非 柳 風》之 種 蒲 輭 京 長 華 河河 白白 俗 兒 其 幹 火 與 及 有之。 楊, 柳, 白 寇宗 枊 굸 柜 謂 赤 雅 唐 唐 爾 楊 爲 柳 又 棣 棣 陶 雅》之旄 所 可 柳 奭 即《 不見《詩 ,俗稱之誤 名移 移 隱 」、《秦風》之「苞棣」,即《 桮 爲 謂 「似白 云 居 云 爾 車 棬 旄 也 굸: 「柜 轂 雅》「援,音袁。 易 柳, 一者 與 了,其 ***** 澤 謂 即 柳 人援 也 又 景 「皮似 柳 江東 此 細 檀 雅 似 分 名 葉 自 柳是 非 條 ×, 也 捎 弱 高 是 檀 呼 一木 可 而 槐、 岐 帶,微 飛 亦 夫移。」案,今通 調調 爲 以 柜 名杞 也。 文 類 檀 乎? 箱篋,《 又 柳 爲 柳 選》十 而 風 名 葉 《本 柜 非 小 柳 爾 大 如 音 柳 ^ 獨 柳 别 召 草》作 《孟子 雅 昂。 摇 櫟 矣。 九 摇 木 爾 南》之 首 然 所 名 槲 郭 理 V 其 核 謂 呼 郭 則 櫸 讀 所 微

Ŧ \approx ^ 漌 鄭 廣 **** 兩《揚之水》, × ^ 綢 繆 × ^ 皆言「楚」。 葛 生 × 黄 楚 鳥 荆

> 濟」, 以 爲 以 獨 非 薪」、 綱 牡 枝 名黄 生,其 也 荆, 同 荆 荆 勁 方,故卜龜用之。 樵之餘,則 目》云: 契」爲「楚焞」是 陸《 子 作 荆 類 爲 荆 牡 赤者爲楛 束楚」,皆 小 科 釵 有 疏 荆 ^ 故 唐 故 與 即 謂 未樵者也。 年 本 ? 又名 牡 稱 此 ",媆 ※注 楛 荆、 樵 久 牡 《神 木 似 不 小 用 條 已 云: 《縣》詩 以 蔓 農經 荆 荆 樵 也 皆 也 荆 别 而 미 有 則 亦 於 凡木心 葛 **>** 赤莖」, 爲 青、赤二 箠 名小 「爰契 宜 蔓 楚 樹 大 蒙焉 筥箱。 杖 乃 於薪。」《本 大 雅 用 荆 蔓 買 如 叢 <u>*</u> 我 鳥 亦以二木 此。 荊 種 盌 荆 木 榛 古 龜」,疏 子 圖 止 楛 貧 青 木 牡 非 焉 經 濟 女 者 1 錯 草 蔓 荆

鶏, 雕 齇 魚鷹,《 鵙」是 制。 鷦鳩孝,故爲司徒,主教 杜 扇 鳩, 而 今鴉鳩 《本草 鴡 , 辩 鵑 魚令出 鳩 即《關 備 如 爾 嚴 氏 見 也 ×, 梨 淮 氏《詩緝》、黄氏《韻會》,皆謂 雅 。」案,此 於《 分 南 華 也。 司 似 注 鵙》之「 别 <u>二</u> 二 馬」, 點 子》謂之沸波,以其 鷹 <u>Z</u> 〈詩》。 祝鳩氏, 其 者 鄭 而 隹 鳥 鴡 杜云: 名, 樵 不 江 土黄色, 其, 民。」即《四 亦 今復合之《 鳩 善 以 以 名辨 」、《爾雅 鳴 爲 東 鴂 司 「鷲而 爲 鳧 鴀 人呼之 徒」,杜云: 深目, 惟 鳩 説《 類 有別,故爲司馬,主法 1 牡》、《 小小 項 是 , | \<u>\</u>\<u>\</u> 詩 下 爾 也, 詩 翶 好 爲 而 辩 雅 之 嘉 詁 翔 灰 時,又名 鴡 翳。」案, 「鷦 注 如 郯 魚》 》以 水上, 色、大 鳩 云 參之 真 鳩 子五 王 王 助。 珠 之 也 爲

굿: 是也,注云: 是也,注云: 即《大明》之鷹、《爾 歐 同氣禪化,故亦稱鳩 之似也、《方言》以 春分復 又名鴶 注 氏以 者善鳴。 也,注云: 風》之鳲鳩 平均,故爲司空,主平水土。」即《鵲 爽 氓》詩食桑葚之鳩 陽 謂之搏穀、搏布,音 鳩 「春來冬去,故爲 爲 氏説, 氏, 爲 鵴,又名穫 鵓 可寇」,杜云: 辩 掌 鳩 謂《 「今布 鳩 禹 者 爾雅》云「鳴鳩 。」黄 誤。 錫 鶆 似 誰 當爲 日 司 穀。 Щ 穀,又名郭公, 巢》之鳩 爲 褐 矣。 : 事。 「鳲鳩 雅 鵲 戴 爾 相近矣。 侯 《月令》「鷹 》云「鷹 「驚,故爲司 勝者誤。 雅》 而 即 者 鷞字之誤。」 「鶻鳩 秋 小, 青鶴 氏 分化爲黄 非 小 鴶 云「鵬鳩 司 多聲。」案, 巢》之鳩、《 宛》之 鳲 氏,司事」,杜 鶆 似 鵴」音菊。 寇,主 空, 鳩, 皆因 嚴 音 鷂 同 化 長尾 鷹 來。 鳴 亦 鶻 緝 爲 褐 也 盗賊。」 杜 其 與 》用 鵤 鳩 鳩 鳩 侯, 此 鳩 曹

鳥,自 亦不 氏 啁 鳩 爾 莊 먜 春 以 雅》 子 ·見《詩 嘲 來 鳴 呼 Š 謂之 其 秋 又有 鳩 江 去, 非 尾 東 鷽 鶻 屈 好 鷑 名爲 鳩。 鵃, 促 食 鳩 其 桑葚,易 亦 烏 鄭 鵧 誤。 羽 鶪。」此 樵 鷑 如 以 _, 繿 此 醉 爲 注 縷, 在 所 鵬 而 云: 謂 五 鵒 善 飛 鳩 Ŧi. 者 淫 翔 「小黑 之外, 丁,其 鳩 誤 不 也。 黄 遠 音

淮 雉、八卓雉、九伊 秩 盧 當 見《爾雅》 卓 喬 湽 秋 諸 丽 二作 作 作 + 南 海 雉 雉 雉 類甚多、《説文》數其名有十 飾 鷮」, 鵫 北 而 摇 色黑 喬 方 微 雉 + 日 在 翟 不 「稀」作 摇 洛 \equiv 稀 同 海 南 中山 作 + 作 , ~ 鳥 而 方 南 雉 阚 :「鵜」, 上。 鸐」, 四 鷂 E 黄 雅 西 马, 量 六 色。 方 翟 「蹲」作 五采備。 弓 翰 盧 十二東 F 四 Ш 作 蹲 作 作 雉 鷩 四 雉 高。 + 方 鷷。 雗 鸕 此 七 皆 E 江 翰 Ŧi.

> 《詩》,曰「右手秉翟」,曰「其之翟」,曰「翟 攻木, 也; 以 但 惟南 江 又 文》十四雉 雉名鵽鳩,又名泆泆,注 三者,其餘言雉,皆其統名。 逵 本草拾遺 左傳》「五 朝 崇 景 東 與 知逵又. 方 此 鶅 純 呼 樊 曰「有集 雉摶埴 則日翟,不 合雜雉、鵫雉 白 光之説, 翟 雗 弗與焉。 》名突厥雀。 雉」、杜注 何本。 雉 翟 維鶴 亦 也 雉 名白 攻 杜 日号。 金 況以 ۰, 爲 以 鵜 曰「如暈 何 此 雉 置 雉攻 弗 斯非 五雉 云「出 鷮 二,則 鳥,云「今白 彼 雉 從 雉 皮 及 疏 **爾** 中 斯飛 也 骨 配 也 爲 謂 四 或 北 ? 雉 五 + 雅》又 説 方 方 别名 設 鳥 一, 工正 三種 雉 本 其 五. 沙漠」, ,故《説 色。 當之, 賈 鵫 見 有 止 量 矣。 逵, 也, 寇 菲 於 此 雉 亦 雉

后 是 禕 也 衣 + 暈 四 爲六服之首, 雉 雉 素質,五 ,其三見《詩》, 刻繪 色備 其形 生伊 量 雉 ,其雉類之貴 洛 翟 之 雉 鷮 雉

乃此 山鷄。 者乎 鷄小於鷩雉,文 是也,皆有彩毛,鷩雉 女。 長於翟 衣,又用爲車蔽,皆取其文采也。 長尾者 ? 鳥矣,郭引《周 鷮、翟二雉,俗 顯 然山 也 能 」,故萬 が斯 走 鷄 干》取其 翟 且 有 雉 舞 尤 鳴,性耿介,故詩 四 , 則 燦 書》「文韓」證之。 種 通 右手秉之,后 阚 飛以比宫室,鄭以 爛 鷮 在 呼爲翟矣,翟雉 雅 ? 首, 》謂 、翟外,鷩雉、錦 爾 雅 錦 之山 》「韓 鷄 鷸雉 在 人以 夫人 雉 腹。 天 以 亦 興 尾 注 爲 鶏 錦 鷄 名 碩 又 飾 云 形

黄袍, 諸 黄栗留, 曰黄鸎, 鶯同。 黄」也,爲名凡六焉。 雅 庚 黄 ·商庚」,三「鵹黄,楚雀」, 見《夏小正 鳥 其 四見《爾雅》: 咏 於《 名 詩 黄 *<u>`</u> 鳥 毛詩》傳、 其名又曰 者皆興,名倉 止 日 黄 長股, 一「皇,黄鳥」,二 鳥 陸 四一倉 倉 日 黄 璣《 庚 博 鸝 庚者皆 兩 詩 黍, 庚,黧 留 名。 疏 日 日

> 鳥」,殆指《詩》求 鶯,其來古矣。 撰之書,其言不足據信,惟出 賦 賦。」此特鄭説 可通,良不謬也。 出,此正出谷遷喬之事。 又言鶯是蟄鳥,冬以 羅願以鶯當之,引《禽經》「鶯鳴嚶嚶」爲 木》之「鳥鳴」,先儒説《詩》,莫著爲何鳥,宋 也。 至鶯 字 耳、《東山》之倉庚、毛 雖 友語 見《詩》 又案、《玉篇》云「鶯, 泥 則 自 案,《 而 以《伐木》之鳥 裹,至 非 谷之解, 禽經》後 鳥 名。 春 破 不以 其《伐 於 土 有 人 譌 友 理 而 爲

鴡。 合鸇 似鷂 晨 詩 引 風 **%** ^ 鷹、鸇、鶚、鵰、 鷂爲 青黄 ,鸇。」注以 秦風》之晨風, 詩 《周南》之鵙鳩 義 問 色」。 一,《藝文 云 爲「鷂 是 隼, 晨風,今之鷂。」又引《詩 鸇 類 ,鶏也 鸇也、《爾 皆驚 聚》 屬」,陸《疏》亦言「鸇 鷂 别 又合鸇 鳥也, 鳥 即 也 雅》亦云: 爾 而皆 隼 雅 原 一之王 見於 鷂爲

乎? 鷹 以 世 射 又名 與鸚 並 子》亦言其 頭 爲 궆 黄色,其 不 阚 説 總 侯 鷂 U 有 善搏 雅 鳥 之正 屬。 喻 喻 爾 雀 同 毛 要非其倫 醜。」《早 鷹 説 尚 角 雅 后 類 鷂 撃、 皂者 文》又 父, [妃,以 亦亦 又名 取取 m 也 銜 謂 性捷 貪於攫 鷹 作 别 惟 之 腐 名角 即 俱 斯 撃 鳥 麓 以寫爲 鵊 鵬 鼠 鸇 隼 點,以 鷲 、鷻」,云「 非 鳥 征 》箋 鷹。 爲 鳩 醜 而 喻 也。 似 是。 肉」 名矣。《大明》之鷹 ,又名題肩、廣雅 貪 嚇 賢 ,其飛也暈。」陸《疏》以 鷹 云 與鳩 中之爲俊,故《猗 一者 鷙 一殘之 鵷 五者皆鷙 者, 《采芑》之隼 ^ 而 鵬 ~; 鳥 四 鵴 大,長 同氣 而隼 四 喻 此 ,然《爾 也 月》之鶉 寫 月》 鸡鴟 从 Œ 取 以 尾 鳥 故 詩 鳥 茂 興 類。」《 喻 雅 也 亦 短 登 -, 隼 雖 先 敦聲 鵬 》作鶙鵳 Ž 將 翅,土 名 與 所 有定 鷹 詩 士 也, 鳩 嗟 也 鶉 謂 莊

> 皆喙色,非 黄點,其淺黄、淺白、淺青、淺黑 珍非之,誤矣。 爲 此 色之竊 阚 埤 竊 解 雅 雅 ^ 與 取 类 小 **>** 脂 郭 脂言, 謂 雅 注合, 對 肉 啄 毛色也,當必 V 「剖葦」 有 粟 Œ 即 李又 之 兩 指《 於義允矣。 $\stackrel{\cdot}{\sim}$ 爾雅》之對「竊 桑 桑 一者是 小 謂 雇 雇 宛》 桑雇 有 ^ 以 爾 據。 桑 性 鶯 雅 陸《 毛 雇 之 羽 蒼 **>** 言 疏》 竊 亦 之 淺玄、淺 丹 褐 也 脂 桑 兩 色 解 者 言 釋 雇 而 李 竊 是。 丹 有 時 脂 以 即

鳥」是 鳥 音匹 西 白 哺 不反 至 方,《 項 ,小而純黑,又謂之孝烏。 一居,毛傳作卑 哺,巨喙,腹 烏有 圃 也 云「烏、 阚 羣 四 一飛,又 雅 Ш 種,而 鳥 居。 鵲 鸀 似 名 醜 下白、《 是 雅 其 三見於《爾 **鵝**葛,《 山 也。 鳥 烏 掌 而 爾雅》 燕 縮 小 是 阚 鳥 也 赤觜 雅俗 雅 似 雅 一點 則 》「燕,白 雅 四 惟 作鴉 穴 斯 鳥 鳥 不 慈 鵐。 乳, 而 鵯 兼 著 鳥 大, 之 然 烏 脰 出 反

有以定之。矣。《詩・小弁》之譽斯,雅烏也,餘烏則未

亦然。 茅 非 俗 鴟 怪 呼爲鷂, 鳥 鴟 怪 也。 一鴟、梟 然怪 — 曰 文》云「 鴟 鳥 寫 皆 多 也。 鶴是爲切。 是, 取 一是鴟 名焉 郭 注 , 乃貪殘之鳥 也」,徐 爾雅 鳩 鴟、 鴟 鴟 鵂

螗蜩、 鳴 蜩 呼 蜋。 者、匽。」郭亦引之、引唐作輔、匽作蝘。 别其 周 夏小 で、」其 皆 爲 蜩 以 胡 類 蟬 正》傳釋之,《夏小正》云「五月 兼 夏小正》五 有七 有 五 蟬,江南 時 」,傳云「良 指 多 月 訓 兩 種 鳴,《 而 解 蜩 總 蟬 ** 謂 與 月令》仲 稱 與 之螗 月 ? 蜩 之日 蜩 唐 者,五采具」是也。 ,其大 **堀姨**」是 蜩 方言》以 夏 蜩 "鳴」,傳: 夏 至 之月 名 又五 也。 也。 蜋 蜋 蟬 案,此 H 又云「俗 蜩 蜩 介,注引 「唐 良 始 爾 爲 蜩 當作 鳴 雅 始 蜩 兩

蝭 蜩 五 「鳴 五月采 節。 鳴蚻 蜩」,注云: 青 《方言》曰: 誤。 本經中品。《别 曰 : 故先鳴 蜩 月令》曰 蜩 蟧 ,謂蜺」是 色 而二名。《 月不 蜩 中最大者爲 茅蜩」,注云「江東 也,一名蟪蛄 三「盐 」,傳 嘒 是 『鳴蚻、虎縣。』」案、《夏小正》云 而後 烝。 」 嗤 鳴,嬰兒 也。 : 云「強者,寧縣 一,蜻 者,形 也 盤」是已,又名麥蚻 漢 隱 「寒螿 『有文者謂之螓。』《夏 五 書》師 寒 居 馬 録 蜻 七「蜓 云一此 蟬 蝒 蟬。」《 ,齊人呼 多災』是 大 鳴。」 也 而黑,五 古注以 注 呼爲 音 外妹 云 本草》謂之蚱蟬,入 緜。 似 云 也。 鄭 蚱 螇 柳 茅蠽,似 螇 蟬 注 螗 也。 馬 螰 月 蟬 螰 而 上,乃《 鳴 蜩 云 蜩 便鳴。 生楊 如 是 小,青色。」 而 爲 六「蜺 寒蟬 四 也 注 蟬 後 蟬 虭 注 詩 云 柳上, 小 知之, 而 蟧 而 俗云 四月 日 * Œ 小。 寒 寒 .

盐也; 信矣。 見《逍 寒螿 蚞, 也者 所稱 啾。」此秋蟬,見《招 螿 蛁 非 今合之於《詩》,《 七月之候,郭注既引《 (莊》、《騷》之文《莊 秋 夏 聲 寒蟬 ,形色小 蟟 小 月 F 遥 1, 蝭 常聞同 同 凄急,於九、十月 螇 鳴 ·正》、《月令》、 7游》。 日 虭 之二 其 《蕩》之「如螗」、《爾雅》之螗 蟧。 蝉 螰 寒 丽 郭 一 日 異耳。 也。」 《騷》云: 蜩, 爲 青紫色者 又音刀聊。 蟲者,其 注 蛥 隱士》。 所 物。 蝭 碩 蛱。 寒 云 蝉 ~ 至 人》之「螓首」,《 蟬 、皆鳴 蟪 時 歲 應 然《 日 以 蟪 音舌玦。 色青,以七八 月令》以 莫兮不 訓 鳴。 蛄 蟪 即 「蟪蛄不知 爲 日 蛄之名、《埤 於秋 小正》傳云: 解 蛄 蜺。」是二 蝭蟧,是 口 則 影皆 李時 兼 自 小 專 日 證 與? W, 夏、 而 以 春秋。」此 Ħ 虭 蜺 珍注 蟪蛄 色青 寒 、月鳴 螇 秋 爾 秋 蟧, 蜩 蜩 隱 則 醒 雅 雅 蟬 之 螰 鳴 也 同 赤 日 居 鳴 夏 兮啾 ***** 蟬 也 蟬 引 蜓 寒 謂 蟬 書 日 爲 而

> 隱居《 有蠣 也 蕩》之「如蜩」, 豳 ; **>** 音甯。 之 别録 《小弁》之「鳴 鳴 母,二、三月鳴,小於寒螿 》,而《詩》、《雅》俱 蜩 乃《 ^ 爾 蜩 爾 雅 雅 **>** 則 》總 之 獨 蜋 名之 弗載 指 馬 螗 蜩 蜩 馬 爾。 也 見 陶 其 又 蜩

謂 蝗 名, 《名物疏》之説。 亦 耳,元非二蟲也。 物 五 邕以螽爲蝗,凡經傳 栩 名 類 螽 ,其三見於《詩 殊不知名螽 特 風》 五行記》,於春秋則名螽,於漢則 了; 五 春黍 蜤是阜螽, 蝗 爾 月 斯 雅 類 亦 以 螽 \forall 而 者,襲麟 謂 如《春 名蜙嵷,亦 ~ 股 至《爾 己。 「龜 相 而 爾 《 詩 非 切 經之舊文,名 秋 醜,奮」, 雅》所 雅 案,許 蜤 作 專言螽者 經 聲 螽, 謬矣。 名 書麵 蜤 周 列 者 春箕 慎 螽 南 五 前 也。 名蝗,證 蝗 者是。 蜙 以 螽 列 者 蝗 皆 即 從 嚴《 蠡之 螽 蝑 陸 《詩》「草 螽、 爲 蝗 漢世 斯」,即 幾以 别 緝 是 或 螽 蝗 也 以 類 據 资 也 俗 非 爲 他 凡 蔡 漢 取

陸 蟲 ~ 璣 以 爾雅 爲 大 小長 草 ·蟲,負 短 如 蝗,好 **整** 是 在 也, 草茅 又名常 中 者 羊, 也

子 羅 龜自 願 陳藏 螽,螇虾」,郭注 謂 同。 即 器以 螽,蠜」是也,李巡、陸璣皆以 蚯 蚓者誤。 爲 狀 如 以 《蝗,有 爲 《詩》「阜螽」,《 似 異 、蚣蝑 辩。 而 又有一 細 長。 阚 爲 盤音 雅 又 蝗

鱮

修股,善跳,有 目》云: 不見《詩 有 一土螽, 蠰谿」,郭注 數種 亦大 青、黑辮數色,亦能害稼。 皆 類 似 而 蝗,而 小 以 别 八爲 者乎 大 似 小 蝗 ? 不 而 一,長 《本草 小。 一条軸 角, 性 綱

土穴 不妒忌,一母百子。 (中,芒部夷人食之。」要之,《爾 五月 動股作聲,至冬入 雅》云

之性狀矣。五螽惟阜螽先儒異説,李、陸 螽醜,奮」,注云「好奮迅作聲」,此足見 爲 ,藏器以 爲 似 雅》以 爲 螽 今

賤

鱣也

今鱘魚味甚美,

較黄魚實勝云

家直 古注 嵷 《漢書》,以 指 蝗 色, 飛 螽爲 不 能 阜 遠, 螽 一,祖 蝗, 未 知 李、陸之説 埤 孰 是。 顔 師

> **深**緝 釋螽蜤 又 因 圃 加 誤

鱅 嚴 似 鱮 鱮 好 而 旅 頭 行 大 於 鱒 鱮, 好 獨 鯇 行 似 鱒 而 魚 形 命 大 名

於

鱒

以

此

板魚。 背 無 亦 甲,爲不 鱣 名鰱,鯇 無鮪 鮪又名鱘 同 亦名輝 類 同 耳。 魚,又名魱鰽。 而 鱣 皆常魚 鱣 大鮪 又名黄 小 也 鱣 魚、 莫贈切。 背 蠟 有 甲 魚 《吴都 玉 鮪

小者 賦》「筌魱鱒」。 鮛 音 叔。 鮪又有大、小二種 鮪, 亦 名鮥子, 見《爾 ,大者王 雅 淡及 郭

注。 鮪」、《夏小正》言「祭鮪」,俱不及鱣。 案,《 周 禮》言「獻 鮪」,《 月令》言「薦 詩

薦,鱣 潛》敘亦言「季冬薦 僅 與 諸 魚 並 列 魚, 而 已,可 春 獻 見 鮪」, 古人 是 八貴鮪 鮪 必 特 偂

五九三

:稽古編卷二十九

陳 處士啟源著

吴江

於南郊,祭感生帝,配以后稷,又爲 天上帝」、《祭法》「禘譽」是也 天,歲有九 至圜丘,祭天皇大帝,配以帝嚳,爲一祭, 六天者,天皇大帝及五精帝也。 (大司樂》「地上之圜 鄭玄、王肅 祭。 論 王謂 郊祀各不同,鄭謂天有六 丘」、《大宗伯》「禋祀昊 天 惟 天,歲止二祭。 夏正月祈穀 九祭者,冬

天。 是也。 武配 五精帝 有變易。 春止祭一天,其迎 合之凡九矣。 法》,成王反位後行,故文言祖。」 文王何佟之曰: 「宗祀文王於明堂,以配上帝」、《祭法》「祖 帝及文、武、又爲 伯》:兆 傳》「龍 又爲一祭、《春秋》經及《月令》「大雩」、《左 夏祈穀於南 左傳 郊 特 後儒 五帝曰宗,《月令》「大饗帝」、《孝 》「啟 性》「迎 季秋大饗明堂,祭五精帝,配以五人 五帝於四郊」、《月令》「迎氣於四方」 見而雩」是也。 ,亦配以 宋儒主王,惟 各宗其師 盤 郊 王 長日之至」、《春秋 而 「《孝經》,周公攝政時,故文言宗。 五人帝,又共爲五祭、小宗 **编祭五精帝**,配 一祭,以 郊」、《祭法》「郊 則 氣與 説,故 謂 景 明堂之祭,仍以爲上 明 四時及季夏迎氣,祭 丘 堂皆祭人帝,非 文配 歷 而宗武 即郊,日至 代 郊祀之制, 五 帝 以 王」是 稷 書「郊」、 E 五 是也。 一人帝, 祖 一與孟 以以 也 互

祀

典

數

曲

歌也。 有成 歌《噫嘻》, 帝 以先禖、《生民》「克禋克祀」是也,此在 又玄鳥至之日郊禖祈祭,亦祭感生帝 Z 命》, 至迎 以鄭學言之,其樂章則園 明堂 而《商頌 氣之樂章,則《周 歌《我將》,春祈 • 長發》大禘,亦圜 穀 頌》無文焉。 丘歌《昊天 夏大雩皆 九祭 丘 圃 西己 所

逵、馬 稷配之,此鄭玄之説, 土總 案、王、鄭論社稷 祭后稷,是人鬼,非地神者,此孔安 令》「大割 報社稷」,此秋祭也。又一祭在 芟》「祈社稷」,此春祭也,《月令》「仲春 二指 神, 社 此。 融之説,而 稷 而 炭 《甫田》以 祀 句 凡三祭,其二祭見《詩》。 於 龍 公社」是也、《詩 配之, 稷爲 王 亦多異議, 肅 圃 祖之者也。 社以方」、《良耜》「 其徒馬昭等述之者 原隰 謂 社祭句龍 之神 》未 孟冬, 謂 社 或 及 而 是 「命民 厂、賈 《月 焉。 稷 載 后 五 秋

> 能定其是非焉。 也。肅與昭等往復辨難,不啻聚訟,後儒莫

至 之言,其來已久,鄭何弗之信乎? 書》,故有此謬。然王氏之説,實祖《禮器》、 可斷之矣。 二説之是非,止據《商 謂 四代及大祖,合文、武二世室而 七 制》、《荀卿書》、《穀梁傳》及劉 廟爲天子常禮,二世室 七廟之説,王、鄭 鄭信韋玄成議 亦不同。 書》「七世 而 在 不見《古文尚 鄭謂 爲 之 七廟之外。 七廟。 歆、 廟」一語 周 馬 止 王 祭

圜 專 禮 大而 見論之,賈、劉、 而給小,賈逵、劉歆、杜 丘祭天而配以嚳,一 據 而二名。古經缺略,無 鄭 禘小,王肅、張 先儒言禘祫,其説有三。鄭玄以 箋 爲 説, 杜之説 丽 鄭之言禘, 融、孔 一禘也 長 預之徒以爲 由斷 也。 晁之徒 3 其 孔 則 南 疏 孰是,以鄙 有 以 郊 禘、祫 釋 四 爲 爲 感生 焉 詩 褅 大 祫

也。 篇,五年之禘也。 帝 祭天,二祭廟,皆得禘名矣。 主當桃,因大祭以審昭穆,四 王 即即 丽 宋儒則從王 配以稷,二禘也; 五年再般祭。 三締 義。 《商 也 頌·長發》,南郊之禘 大宗伯以饋食享先 致新主於廟 [禘也。 《周 頌 四 雝 者二 遠

樂舞

吹之,故云管《象》。《武》樂則干戚以舞之,然》,文王之象也。《武》詩則簫管以武》,象武王之象也。《禮器》、《文王世子》、《象》,文王之象也。《禮器》、《文王世子》、武》,象武王之事。《左傳》季札所見舞武》,象武王之事。《左傳》季札所見舞武》,象武王之事。《左傳》季札所見舞武以爲《大武》。蓋《周頌》有二象、《維鄭注以爲《大武》。蓋《周頌》有二象、《維鄭注以爲《大武》。

故曰舞《象》。

及」,必有本矣。 樂以總四夷,毛、韓二家皆云「示德廣之所 微、庸、濮、皆南蠻 先致南方,武王伐紂誓師,獨舉八國,而 蠻之樂,然有舞 旄人以教國子,胥鼓其節,而《鼓鐘》詩舉 美大王者之德,無所不被耳。 耕師、 鞮屨氏二職 制夷禮? 禮者,身當履而行之,夷狄不能行禮也。」特設 二《南》。 「先王推行道德,和調陰陽,覆被夷狄,故制夷狄樂。 先王不制 夷禮 而 宋儒不信古義、遂妄 미 以 無聲,與雅樂不同,止以 而 掌之。 見也,故南樂尤 制 夷 樂,《白 魯大廟 又周之王化, 虎 亦 通 重 納 解 何不 日 爲 南 夷

禮制

王伯厚應麟。言「康成釋禮,其經傳無

之日觱發」,皆非吾所敢信

土 田

抱

《遂人》「夫閒有遂,遂上有徑」,至「萬 十二頭,此邱乘法也。 「五師爲軍」,又「凡起徒,毋過家 川,川上有路」,此溝洫 之法,溝洫以授田 井田 賦。 乘,甲 家出一夫,一鄉出一 司 馬 法也, 至調兵,則《小司徒》「五 法》甸 士三人,步卒七十二人,馬 田 而以 以授田 方八 之制 九一 一,貢 里,實六十四 鄉 以制 助法 井」,至「四 助 軍,此比伍 溝洫以十 法 遂、 以 也 賦 都 制 前 制 比 鄙 賦 賦 人 以 不 起數, 井 伍 什 縣 邱 法也。 一人」,是 爲 同 四 以 至調兵, 乘 伍」,至 出 匹,牛 調 兵 都」, 以 夫 井 貢 田 有 車 調 法 遂

鄙之法,井田 制 成 周 土

則《 此 兵,《小司徒》「九夫爲

遠,即

漢制已不可考,

何況三代,乃

欲

執

近

言之,僅日

某若今之某

云

爾。

後

世

去

古

彌

之尺寸,則漢之禮器

猶

存

也。

然猶

不

敢質

則大予樂可據也。挈壺之刻

也。

戈,今之句孑戟也。

以至《有瞽》樂器

漏,玉瓚、大斗

酒

也

簫

一賣餳

者

所

吹

也。

春

酒

中中

Щ

冬釀

制。

汕

,撩罟也。

邪幅,行縢

也。

醻,今之勸

所以

縣

毛

羽

也

疏云「猶今之鵝毛槊」,

則又證以

唐

F

飾

也

卿

士之館,《緇

衣》。

諸

廬

也。

重喬

禂

漢

抱

帳

也。

副,漢步摇

也。六珈,步摇

得其

彷

彿

耳。

今以見於《詩》者言之。

遠

一,其

制

度

猶

有

三代之遺,

用

此

證

彼,或

口

明

文者,

輒

引

漢

禮

證之」。

蓋

漢

世去

古

未

事以

測古經,

如據韓

愈《畫記》以釋

載

獫

歇

焚蝗之令以

秉畀炎

火」,據

漉

魚

叉

網

以

月

離于畢」,據俗

諺

離

頭

吹

篳

| 篥 | 以

釋

驕」,據《大

隄

曲》以釋「漢

有

游

女」,

據

姚

崇

五九七

遂乎? 之「三十里」,箋以 也。 比 以 邑、采地共 成方十里,其田萬畝 「百室」,箋以爲 力 伍 陳潛室《木鐘集》論之甚詳。 起 家出 數, 成之中,《甫田》之「十千」,箋以 《信南 八爲 比 部 伍 人,邱乘七家出 山》之一 共 詳見本詩。 以 爲萬夫之地,疏 洫 家 ,其都鄙乎? 起 馬 丽 兵, 耕,共族 甸」,箋以 其 今案,《良耜》之 邱 兼乎 乘 加 人,此其 以 爲 以 鄉遂、 居 田 《噫嘻 甸 爲與公 起 其 方 都 型 爲 鄉 1

梁名

鴦在 無 堰 逝我梁」、「在 ,而 「梁」、「有 梁之名, 符承 其空、《天官 樢 所 在 彼 施 梁」,皆 淇 其 梁」、「維 多, 1漁梁 耐 ^ 鵜 詩 也。 在 有 梁」、 石 其 絶 四。 怨 лk

> 與焉。 輈, 而 得乘之。「五楘梁 梁」,浮梁也,雖用 之梁」, 語》「十月成梁」指此。 橋梁也,以木爲之,《 朝,上句衡」,謂 王 下 制》 亦 句之,則 名 郭氏 虞人 轅。 解之,兼上二梁矣。「造 人 衡 以 澤 横 輈 上 以渡水 朝」,車上之梁也。 梁 一爲 稍 於 月令》「謹 《爾雅 梁 輈 曲而上至衡,從衡上 指 下, 此 者 而異於橋,惟 四,而 如 • 釋宮》「隄 如 屋 闘 茨 之梁也 梁 棟梁 如 毛云 舟 天 梁 子 爲 周

門室

寢,在路門 外朝在皋門内,治朝在 門,又内曰 天子 有 雉門,又 内,所謂 五 一門,最 内 \equiv 外 應門内 朝 應 日 也 門,最 皋 門, 燕 路門 内 次 朝 亦名畢 亦名路 内 路門 庫

門,亦 周 之内 止 王 E : 路寢之内,有小寢五,是爲王之六寢。 公故 同 門 O (名虎門,亦名寢門,以 則 諸侯 婦 而已 庫 爲后之六寢, 人),無 雉 稱 有 二門 庫、路、 寢曰宫,正 五. 菛也 得 兼 雉 亦 天子皋、應之制 而 寢 謂 無 其 一,燕寢 之六宫。 皋、應,惟 内 有路 五。 寢 六寢 魯以 康 也 與 然 成

循 屋 名 漏 而 牖 當白 覈實 下, 之處 通 平 明之 ? 也 ,朱子以暗室稱之,始未 地 也,朱子以 奥當之;

器用

日 輣 . 人 車 人輓 「夏后 而 辇 又 車 周 日 氏謂 日 辇 十五 輦 「夏 ^ 日 人 周 余車 后氏 而 禮 辇 **>** <u>一</u>十 殷 注 ~ 引 曰 宋 胡 ^ 書》 司 而 奴 及《 馬 辇 車 法 殷 周 通

爲

步辇,

恐不

可信

世 疾,或老, 以 輦 使「二婦人輦 典》皆 車 者」,爲用 謝 是 誉 車。 司 輦」者,爲 以 乘。 也 徒、鄉 一,師 而 》掌王后 皆供徒役之用。 爲 歸 0 然輦之爲用,行 旅、 《何草 譏 然王 師 夏之末代 矣。 皆 衞 田 兵不息 田 縣 五 后 非 公叔文子「輦 役 路 木 獵 而 黄 止 師、稍 其 用 ,有辇 黄》篇「有棧之車」,箋云「 也。 如 公紹紹 乘 常 之, 也,皆 公公 《詩·車 於宫中,三子或遇變, 所造,井 也 《黍苗》篇 人、均人、遂 不 車。 則 謂 齊 以 王 以 載 桀 子 ^ 而 乘 無 載任器。 任 左傳》晉范宣子 攻》傳以「徒」爲 丹 朝 如 尾 也。 器 故 步 我 亦 「疾於公宫 公」,此 而 人所 自 止 云 輦」,爲 駕 周 周 則 桀 之, 惟 掌 禮 俱 爲 駕 ^ 辇 巾 步 則 或 用 城 小 蕃 人

然 用 簠 禮 則 , 簠方 簋 從, 而 用 簋 簋 買 或不 簠 盛 設簠 稻 粱 簋 簋 亦 盛 以 黍稷 盛 稻

《易》曰 粱, 月 禮待之隆也。 諸侯朔月食之,而養賢者以爲平常燕食,則 常食矣。 八簋,下大夫六簋,此則禮食所用,不同 也。又有十二簋,王者以待諸侯,而上大夫 麥、苽、是爲八簋、《伐木》篇「陳設八簋」是 食之。 粱也,諸侯日 應有 書言簋,多不言簠。 若盛 時 六簋者,加以麥、苽,天子朔 一舉,則稱、粱各二,合黍、稷、 也。 食以之,若用 四 簋 者, 凡言二 享則 加以 薄 黍、稷 一簋者 矣,故 於

小 帛 杰 桑 蘋》之筐,以受蘋藻、《采菽》之筐,以 水欲其 筐 前 列則 筐大。 五 (楚薺》之筐,以 景 用其 并, 多容,故取其深。 日 筥,方曰筐。筐五斛,筥五升,筥 然筐之爲制又不 淺 深者爲懿筐,淺者爲頃筐。 而 己。 受 《鹿 黍 稷 卷耳易盈,摽梅 鳴》之筐,以 牢 同,大筐 - 肉,鄭 、義。 五 受豆 受 釆 采 幣 將

> 蘿,《 良耜》之筐,以 馬 其 小筐乎? 受 若大筐,則 6 6 飹 之 黍 滋盛米 而 與 以 饋 偕

聘賓用之。

質 大射射皮侯,的以鵠製皮爲之。 嗟》「不出正」,此賓射也。 侯,●的 禮》分爲三射之侯,獨得之。 爲 正 正大於質,共在一侯,皆誤。 有的」,傳云「的,質」,此 舉鵠而棲之於侯」,此大射也。 畫 燕射矣。 有鵠,采侯 射 熊、麋、虎、豹、 有 以 鵠,有正,有質,而的 正 鄭衆、馬 采 人有鵠 畫 爲 無 之。 鹿、豕之形 融、 IE 一、獸侯 燕射 王 燕 《賓之初筵》箋云 肅 射 陸佃言皮侯 射 惟 有 謂 也 爲之。 其總名 爠 質 康 鵠 經云「發 賓 毛以 侯, 成 大 無 射 鵠 據 於 射 首 的 也。 《周 Œ, 猗 彼 以 采 無 無

^{● 「}賓」,原作「實」,據康熙抄本、大全本、《四庫全書》本、

鴊 質 蓺 中之爲俊,故的取名焉 獸之形爲 正 一,是也 (也。)疏 、《行葦》傳 鴻 鵠、擊鴊 以 異, 質 質 亦 云一己 則 皆鳥 爲 采畫 質 正 亦 也, 均 鵠 可 但 中 鵠 之總名。 謂 Œ 蓺」,箋云 高 Œ 畫 遠, 五 色,質 案,質 鴊捷點, 又正 亦 亦作 「蓺 畫 以 名 各

旗幟

作旃。 之旂 燎》、《采菽》、《載見》之旂以朝於王,《玄鳥》 屢及之。《出 者亦見《詩》。 常、旂、旟、旐、旌,五者皆見《詩》。 干旄」,毛 以 物 司 助祭、《 也,旗 常 》九 以 車》、《采芑》之旂以 爲旃 閟宫》之旂以 ^ 也, 旗 詩》得九旗之七,而 旟 、《鄭》以 日 也 旐 常 也 也 爲 承祭、韓奕》之 旞 旂 旃 也 與 出 也 物, 《鄘》之 旜 師。 於族尤 旌 也 則 也。 亦亦 庭

> 雅 旂 用 此或王之旂制乎? 之,則同 至於綦組之飾,與諸旗等耳,而朱縷以維持 縣鈴於竿首,故《載見》又言「和鈴 見》、《閟宫》、《玄鳥》三詩皆 茷」,皆旒縿之貌狀也。 九、《詩》所云「央央」、「 下以纁帛爲終,音衫。 奕》之「綏章」,毛云「大綏」,指竿首之旄 注旌,九旗所 可 而 得 天子所賜 縷維矣。 旂 . 釋天》亦 即 假,故《詩》 次焉,天子建常,諸 於大常。 ,皆諸侯 同, 詳 旂 m 咏 案,王之金 制 旂 旂 事也。 諸侯旒 竿則 大 而 "淠淠」、「陽陽」、「夜 專 畫素龍於緣,故《載 約 衆 目諸 綢 竿 不 侯 九 旒 言 路 首 曳 建 以 旗 著 設 侯 地,當不必 亦 素 旂 中 焉。 龍 央央」也 矣。 非 錦 旄 建大族 旂 常 旒 旄 他 最 ^ 也 也 韓 首 有 阚 尊

虎之旆、證《六月》詩「白旆」是軍前大旗、當馮氏《名物疏》引《左傳》楚子元、魯陽

王不 旆 亦 旐 矣。 云 戎」,注以「大白」爲「殷旗」,鄭荅趙 常》「九旗」不列旆名、《爾雅》「長尋曰旐 《左傳》「不旆」、「旆之」同義,其「白 央」、「悠悠旆 實指旗幟之名也。 云 虚 則 而 不施」即 1,旆 謂 学耳。 不 不 此 施是旗之尾,意無燕尾 旆」,注云: 然。 親將,故建先王之正色。 旆 至以 其 「綏,舒垂之也。結,收斂之也。」傳 白 八異乎? 旆 《曲禮》「武車綏旌,德車 收斂之謂 凡經 壬申,復旆之」,爲大將 昭十三年晉「治 一般旌 繼旐者, 旆之形也。 旌」,方是旗 傳用字有虚 命巾 「帛續旐 也 《小雅》「胡 「旆之」即舒垂之謂 一,帛繼旐 車》「革路,建 兵 幟 爲燕尾。」孔 實,此 爲 邾 之名。 者 於,有 南 不旆 也 《詩》之「白 又《釋 所 「結旌」 **一。」然則白** 大 傳 建大 辛未 案,《 旆」, 商 Ħ 之 燕 旆 仲 旆 尾 以 以 一,注 名》 非 旗 爲 即 達 與 爲 繼 司 央 14 建

建,則旆即大白無疑。旆」、《左傳》之「大旆」及諸旆,皆戰伐時

所

佩玉

爲 見《鄭 毛以 風》「 佩 琚」、「瓊瑶」、「瓊玖」,經雖 風》「瓊瑰玉佩」、《大雅》「何以舟之,維玉 瑩」、《小雅》「充耳琇實」,皆充 瑶」,毛云: 者,如《鄘風》 玉之瑱 天子純用玉,下此皆雜 佩名, 也 爲 佩 古之君子必 風 《宁》詩之「瓊華」、「瓊英」、「瓊瑩」、 佩, 玉 則 》,玖 瓊 此三者亦 「舟,帶也。」鄭云: 而 琚」、《王 見《王風 鄭 以 佩 爲充耳。 佩 玉 風》「貽我 也」、《衞 也。 用 亦 瑶 「玉瑶,容刀之飾。」 石。 用 見《大雅 不言所用,然 今考之毛傳, 《木瓜》之「 以 耳 其 風》「充 充 佩玖二、《 也。 見 耳。 》,皆 於《詩 如《 耳 然 惟 以 琚 瓊 皆 及 秦 鄭 琇 惟

黄欲釋玉, 而 先誤 釋草木 焉欺乎 ?

瓊云「玉之美者」,琚

云「佩

玉名」,

瓊玖

云

衣 裘

瑶」、《齊》之「瓊華」,皆云「美石」、《王》之

佩玖」、《齊》之「瓊瑩」、《秦》之「瓊瑰」,皆

玉名」,其「琇瑩」、「琇實」及《衞》之「瓊

服六者,大裘而冕也,衮冕也,鷩冕也,毳 皮弁服素衣素積,緇 皆玄衣纁裳,爵弁服純衣纁裳,緇帶韎 大夫,自玄冕而 下如侯、伯。 弁也,冠弁也。公之服,自衮 也,絲冕也,玄冕也。 玄冠,亦謂之委貌,其服謂之朝服,緇 侯、伯,自鷩冕而下如公。子、男,自毳 王之吉服九,其六冕服,其三弁服 孤,自絺 下如 帶 孤。 弁服三者,爵弁也,皮 冕而下如子、男。 素 鞸。 士則爵弁。 冕而下 冠 弁 亦 冕服 如 謂之 冕 衣 卿 冕 素 而 冕

非,而

自爲之解,以玉之生

成

比之草木,謂

其説必有本矣。黄公紹《韻

會》譏

毛

)傳爲

合瓊爲文,則玉、石兼用可知,蓋古制如此,

耳,餘皆石也。

但英、瑶、玖、瑰、瑩諸名,俱

非全玉。然則《詩》言瑱佩,止瓊琚是全玉

以《王》之「佩玖」例《衞》之「佩玖」,謂玖

而鄭以爲「猶瓊華」,則亦美石也。

孔疏又

亦

云「石似玉」。●至《齊》之「瓊英」,毛無傳,

0 似」,原作「次」,嘉 全書》本改 本同,據康熙抄本、 大全本、《四

六〇三

英」,是三者之在草木,元不得有生成之别

雅》「木謂之華,草

謂之榮,榮

而

不實謂之

美,華爲玉之方成,實爲

玉之既成,亦猶

草

瑩猶草木之榮,玉之始生

也

,英爲玉之最

木之英華與實也」,斯

穿鑿

之見已。

況《爾

玄端 弁服 有服 冕服 裳。 亦 服 服」、「我 之「羔裘」、《鄭》之「緇 裘」,皮弁服 之「靺韐」、《周 南》之「黻 之「七衣」,驚冕服也。 衣」、《采 見《詩 也。 爲 士在 天子 ", 戏服 異。 也。 服, 弁服,凶服也, 九 《淇澳》之「會弁」、《終南》之「錦 服 服」、《采芑》之「命服」皆是。 亦玄冠玄衣,與朝 》、《東山》之「裳衣」、《六月》之「常 菽》之「玄衮」,衮 視 私 上士玄,中士黄,下士雜色,天子、諸 《采菽》之「黼」, 衣繡裳」,玄冕服 也 惟 朝 朝 也。 ; 大 以 以 頌》之「絲 裘 玄端 皮弁,諸 《 召 在 不 九 見《 南》、《鄭》、《唐》、《 服 弁経服 衣」,冠 冕 《大車》之「毳 之外 詩 服。 侯 衣」、「載弁」,爵弁 冕 也。 服 絺 視 矣。 弁服 服 弔 冕服 爵 ^ 朝 同 《瞻 也 九 弁服,絲 以 服 罭 侕 而 也。 朝 也 彼 也 裳 韋弁 》之「 衣」,毳 洛 唐 服,大 一侯皆 又有 外又 不 衣 鄶》 ^ 矣》 風 衣 服 終 衮 用 韋 狐 U

> 者也。 衣也。 褻服 爲祥冠 則息 黼 之「素衣朱襮」,諸侯冕服之中衣也,謂之繡 用 也 士》之「緇 衣,不得用 騏」爲「璂」,理 顧命》特設 布 丹朱,惟 中 也 民之祭服也。 即十五升布。 衣 《鄶風》之「素冠」,毛以 也。 用 \sim 撮」,則大古之冠,而 無 朱 素 君 《鳲鳩》之「騏 此 襮 羊》之蓑、笠, 得 矣。 服,非禮之常 皮 或然也。《秦 服之,大夫、士中衣 所謂 弁 《曹風》之「麻 若夫《鄶風》之「狐 服 帛 不裹 朝 弁」,雜色之 服 野 布 服 風》之袍、澤 服 爲 麻 也。 也,故 也。 練冠,鄭 衣 用 衣」,則 也 爲 得 \wedge 唐 弁也 都 始 裘 用 中 風 加 以 深 素 衣

青 丹 王 縠,見毛 ,闕翟黑,鞠衣黄,展衣赤,緣衣黑。 后之六 禕 衣、 服 褕 傳耳。 也。 翟 其 闕 色, 孫 翟 毓 經 鞠 以 傳 衣 爲 無 展 禕 文,惟 衣、 衣 赤 褖 展 衣 鄭 褕 衣 玄 翟 用 此

據矣。 色。 爲褕翟、闕 之「緑衣」,鄭以 至緯衣之爲赤爲玄,闕翟之爲 婦人亦 展之色,當以 之,三翟本 同,餘三服 采蘩》之「被」,展、褖二衣之首飾也。 其之展」,展衣 **髾笄」,**禕 爲「副韓 爲 而以丹穀爲展衣,毛説必 禕 裘有狐裘,●有羔裘,有 衣黑。 其見於《詩》,則《葛覃》之「澣衣」,毛 鞠 宜然。 衣玄, 输翟 似 象雉 衣 翟 盛 則 孫説 麯 输翟、鞠衣、 緣衣 也。 服」, 褕 異,要皆臆 兩家 塵,又 也。 前 爲祿衣也。《君 翟之首 青, 「其之翟」,亦 爲 鄭 鷂 惟鞠衣 説 IE. 象 输同。 以 闕 同,亦 桑葉 爲 翟 飾 男子褖 説難 赤 禕 弗及焉 雉 也 麂 至禄皆是也。 有徵信者 始生,宜 青質 兩 亦作麛。 有 赤爲黑,無 鞠 信。 子偕老》之 此 象 本。 衣 衣 家 服 色黑 黄 則 約 所 小鄭以 翟 裘,有 則 郷》 爲 而 説 鄭 展 也。 也。 則 鞠 口 黄 説 論 色 衣 0 0 朝亦衣狐

白,惟

裼

用

素

衣

爲

異。

二黄衣

狐

以

貈,有貍 羔裘。 天子、諸侯燕居,玄端服,亦 羔裘也。 圃 五冕之服,爵 羔 、裘之 用 最 弁服、 多。 冠 大 裘 弁 黑羔裘 服 而 皆 冕 黑 黑

以

《詩》之羔裘,皆冠弁服 侯朝天子亦同,皆裼 有三,一狐白裘,●天子視朝皮弁服用之,諸 褎飾,故有豹袪、豹褎、豹飾之稱焉 以 也,君 錦 衣。 用 卿 純 大夫在 ,臣異 狐 裘 其 \pm

者,狐白裘也。 見《鄶·羔裘》及《小雅·都 子、諸侯服 綃衣以裼之」是 三狐青裘,大夫、士玄衣之裘也,《玉藻》「玄 裘,蜡祭後息民之祭,及兵事 派同,而 也。 裘 異 矣。 玄衣即 見《秦風 玄端 章弁服用之。 服,與 終 天

狐」,原 按,大全本此處爲缺頁 作 「孤」,據康熙抄本、《四庫全書》本、嘉慶本

狐」,原作「孤」,據康熙抄本、 按,大全本此處爲缺頁。 四 庫 全 》本、 嘉 慶 本

君之車 賤 是 戎、《左傳》定九年。 享亦然。 正矣,見《論 侯 狐 《論 者也 也。 青 視 士》者, 語 一类也。 朝 一,庶 外又 君臣 右 狐 楙 裼 及 黄 人服之。 貈 風 毛云「狐蒼」,青、 有虎 語 左 衣 衣 皆皮 之厚 一服之。 或 狐 取 裘、 絞蒼黄之色。 裘 貍 玉藻》、《聘禮》注,而 弁 東 以 也 服 貈 狼 郭 居 又有犬羊之裘,裘之 裘, 爲 則 書 是 蒼色同。 見《 裘, 服之,其受外 哲 裘之武 也 邶 貈 或 幘 * . 裘 素, 靡裘者 而 貍 旄 以 猛 衣 裘 邱 뻬 者 貍 燕 以 素 國 不 一,諸 也 製 從 見 爲 贈

稽疑

他注引傳疑誤

毛傳之來最古,後儒相傳讀本各别。

《後漢 維 傳文,則 將刑 掌王 二字。 非傳。 則直」,傳云: 裳」,傳云: 速死 也, 他 鱧,鯉。」〇「胡 驅禽於王之左右。」見《東京賦 鱣 賦》注。 垣 一以下,傳、箋俱無之。 注 一,似 特録之如左。 大邦維 ,寺人 后之命於宫中,故謂 所引,與 也。」見《文選》李注。 孔融傳》注。 以 〇《巷伯》,傅云: 〇「悉 鮎。」見《文選 今無 被讒爲巷伯,決非毛意,章懷注誤引。 (孟子 「之宜」二字。 率 今本 屏」,傳云 不過 幢容。」見《周禮 左 , 今「謂之巷伯」以上是箋 不失其 右, 不 而 案,敘下例 死 無 作 西 以 鱣 異 詩 京 繩 今無之。 傳 燕 同,亦 二介人 賦 鮪 巷伯 之巷 直之宜也。」 云 以 無 當 天 李 》李注。 傳 發 刺 ф 子, 善 用 況 發」, 伯。 内内 考 車》疏。 維 幺 注。 公卿 玩 證之一 何 非傳,「伯 今無 E 藩 小臣 次章、末 傳云: 今傳 伯 傳 漸 顔 也 諸 「於王 今是箋 一見《東 云 其 被 大 車 而 一見 也。 云: 師 助 侯 讒 繩 帷 不

牙樹 謬,而今逸其文。 《魯語》韋注。 口 李注,今無之。 也。」見《東京賦》李注。 爲 (山海經》,云: ·勝詰哉? 右諸條多是引者之誤,惟韋注最古,必不 鬣服,虎皮也。 「致天之屆」,傳云: 屏也。」見《後漢・光武紀》注。今無之。 羽」,傳云: 今無之,亦不知何篇之傳。 「后稷葬焉。」注云: 「其城方三百里。」 〇稷勤百穀,死於黑水之山。見 見《東京賦》李注。 以此推之,傳文之譌闕, 置 今止云「置羽也」,少 羽於栒上,以爲 「屆,極也。」見《文選》 不知何篇之傳。 案,黑水 〇 「 崇 六 Ш 字。 飾 見

正義引爾雅疑誤

也。」疏以爲《釋詁》文,今《釋詁》無此語。不合者,如「聿修厥德」,毛傳云:「聿,述不詩》疏引《爾雅》及郭注,每有與今本

璞云: 詁》文,説者以爲生之始。 今《釋詁》乃「胎 公子同 不云 也。」疏皆以爲《釋言》文,今《釋言》云: 也。」《魯頌》「致天之屆」,鄭箋云: 哀」而已,豈今《爾雅》郭注非全書邪? 亦無此文,但引《尚書・康誥》「不念鞠 疏所據,豈孫、李輩讀 極」,則云有所限極,二字義並不 如《小雅》「後予極 云「幼、鞠,稚也」,無育、鬻字。 孔疏又引郭 又如「昔育恐育鞠」, 殛,誅」,引《書》「鯀則 殛,誅也。」不云極; 鬻,稚也。」疏皆以爲《釋言》文,今《釋言 昔育,育稚 殛。 歸」,毛傳云: 「 鞠, 意極、殛二字通用乎? 也。」「鬻子之閔 作毓,故鬻爲稚 焉」,鄭箋云: 本異 又云: 「殆,始也。」疏云《釋 鞠本 殛死」; 那? 作 斯」,毛 寂。 「屆,極也。」 也。」今郭注 又如「殆及 - 相通。 鄭 然 注 「屆, 傳 箋 云: 極,誅 「屆, 郭注 굸: 孔 娍 又

六〇八

義也。 始 物之始 胎 及一也。 非 不 殆 則 然,或《詩》之「殆 姑記 必 始 非 以俟博識 「殆」字, 郭 注 云 孔 所 及」,古本元 胚 引 胎 據 未 定 成 非 作 郭 亦

監本經注疑誤

誤者; 云。 考 推 他 不 經 學不淺。 改者 誦 學 較 本 併 〇「我 習 者 今世 而 可 使 丁,其 知 對 有 後 監 且其誤非一 ~據此 書 誤 姑 或 有 然 ## 本 寫 原 疑 諸 題 酌 鐫 注 偶誤, 爲 信者 本 然 彼 是 本 疏 Ī, 不 口 俱 金 書 是 誤,昧 型響 相 誤 見。 端, 者 失於較 然 萬 半 又有 有沿 譌 用 曆 矣。 至傳、箋之誤,有 箋 者 舛 + 爲 正 妄 孔 譌 甚 七 響 較 今録 者。 改之,反 已久, 疏 多 年 讎 燕之禮),貽 申 鐫 之 經 出 釋 以 因 文 誤 考 助 致 備 循 辨 口 人 後

春水 棫《韻 俗人 嚴 藘」, 爲 疏 正。 悔」, 好, 經傳 石 石」,「石」誤 記 饗 詁」字誤作 揚 經 溷 也」,「爲」誤作 緝》 》、嚴《緝》引此,亦 盛 、據朱《 揚 誤 經 同 ○《王風 改 「姣」誤 譜 悔 及元 「藘」 也」,今脱 光也」,玩 作 〇「暵 爲 誤 》引此作「日乾」。 一撥 響 誤 (傳》 一語。 本注 作 作「玉」,當依 作 終 其 、譜》「至於夷、厲」 作 0 :「誨」。 撥」。 然允臧」,「 脩矣」,傳「脩, 而 俊」。 疏補 蘆 :「僞」。 「春水」二字,當依吕《記 疏語,傳 妄 〇《齊譜》「禹貢青州」上 揚 \bigcirc 改。 ○《木瓜》傳 人。〇「齊 無 且 ○《溱洧》傳 氓 鱣 下「揚」字。 ○「火烈具揚 衍 孔 然」誤 _, ○《兔爰》傳 ***** 疏 鮪 揚 碩 上 且乾 及吕《記 發發」,當 章 揚」字。 少一 作「焉 誤 人》箋 討諸 瓊 傳 作 訓 **海**海 也 卷 「能 瑶 一造 」,吴 楊 茹 吕 傳 與 改 美 自 依 姣 此

惻

此」,「於」誤作「作」。 作「祈祈」。〇「朋酒」傳,「饗」字誤作「響」。 〇《東山》次章箋「家無人則然」,「則」誤 如荍」,箋「男女交會」,「女」誤 風」,「秦」誤作「翳」。 武公」、「美」誤作「刺」。 下「箋云」俱誤作「傳云」。 「是」。○《豳譜》「后稷之曾孫曰公劉者」, 「襗」,當依吕《記》、嚴《緝》改正。 曰」誤作「也」。 駅」皆誤) 正 圈。 ○「兄弟既 誤作「早」。 是四 ○《常棣》敘下箋「召穆公」,脱 ○《無衣》箋「澤,褻衣」,「澤」誤 〇「蟲飛」,箋「東方旦明之時」, 作「躭」,傳「駛疾」,「駛」誤 國」,傳「正,長也」,「長」誤 翕」,傳「翕,合也」,「合」誤 ○《七月》次章箋「又本於 〇《宁》、《東方未 ○「采蘩祁祁」傳,誤 ○「鴥彼晨 ○《秦譜》「秦之變 ○《無衣》「美晉 風」,經傳 作 ○「視 明》兩 子 穆 作 爾 作 作 作 敘 戏」。 同。 誤作「素」。 作「汝」。 「末」誤作

之三卿」,「同」誤作「司」。 改爲「若疇」。 舄,達屨也」,兩「舄」字中間疑脱一「金」字。 傳「新美天下之士」,「下」誤作「子」。 作「如」。○「女心傷止」,首章經文「女」誤 有漸」,玩文義及疏 ○《祈父》箋引《書》「若壽圻父」,當依孔疏 好」,傳「大艾草以爲防」,「艾」誤作「芟」,疏 彼飛隼」,經「鴥」誤作「 「意」誤作「處」,當依孔 「黑」。○「爾牲則具」,箋「索則有之」,「索-〇「三十維物」,傳「異毛色」,「異」誤 ○「赤芾金舄」,傳「諸侯赤芾金舄。 〇「載弄之璋」,箋「正以璋者,以成之 :「未」。 ○≪曲 〇「勿罔君子」,箋「勿當作末」, ○傳、箋「羌戎」疑當作「姜 儀》 ○「擇三有事」,傳「有同國 敘 語,「正」當作 下 疏 躭。 改正。 箋「篇第之意」, ○「亦孔之痗」**,** ○「新田 止 ○「鴥 車 作 既

可知。 苦。 威, 爲殘賊」,傳「廢,忕也」,「忕」當依王肅及定 而 字,箋内衍四字,詳《附録》。 傳 勇」,箋「言無力勇者」,「言」下脱「無」字。 箋「傷病之木」,「木」誤作「本」。 離于裏」、「離」誤作「罹」。 本作「毋」,元 征」,箋「月視 爾所生」,經「無」字誤作「毋」,此見《釋文》 ○「契契」,箋「契,憂苦」,疑當作「契契,憂 云「毋音無」,故妄改之也。 不知《釋文》經 我視之,以爲非莪」,「我」誤作 經經 析之」,「穫」誤作「穫」,「析」誤作 有 當依孔 「尰」誤作「尰」。 衍文,詳《附録 〇「載翕」傳,「合」誤作 ○「穫薪」,箋「穫,落木 朔 疏改爲「昊天」。 與今本異,見吕《記》。 」,「朔」誤作「朝」。 ◎爾 ○《巷伯》敘 ○「譬彼壞木」, 無 〇「匪 : 如 名也。 ○「而 正》「旻天 「貌」,玩 ○「無拳無 末 莪」,箋 折 既 脱 月 無 伐 疏 四 斯 疾

> 録》。 瑟擊鼓」,箋「擊土鼓」,「擊」誤作 適南畝」,箋「互辭」,「互」誤作「元」。 同。 年」,箋「豐年之法」,「豐」誤作「農」。 誤作「天」。○「塵雝 本改爲「大」。 ○「興雨祁祁」,誤作「祈祈」,經、注、 ○「炎火」,箋「盛陽氣贏」,「贏」 ○「受天之祜」,「祜」誤作「祐」。 來。 ○「兄弟具 「乎」字誤在「天」字下。 一斂税曰穑」,吕《記》引箋「税」作「穫 ○「式穀以女」,箋「是 ○「以祈爾爵」,箋「爵女」,當作「女 ○「大侯既抗」,箋有 來」,箋「具,猶皆也」,「皆」誤 ○《四月》傳 雠」誤作「雍」, ○「曾孫 「溥,大」,●「大」 使 缺 聽 誤作「嬴」。 〇「自古有 文,詳《 乎天 之穑」, 疏 「繋」。 命 經注 同。 附 作 箋

^{● 「}四月」、康熙抄本、大全本、《四庫全書》本、嘉慶本同

兩 同。 矣」,箋「皇,正也」,「正」誤作「王」,疏亦誤。 賓主」,「主」誤作「注」。 食」,「飢」誤作「食」。 今「如」誤作「知」。 也。 ○《角弓》傳「調和」,元本作「調利」,疏 「蘗」。○「有棧之車」,據《韻會》,傳、箋皆 「役久病於外」,「於」誤作「在」。○「不皇朝)「何草不玄」,箋「草牙孽者」,「孽」誤)「月離于畢」,傳「畢,噣」,「噣」誤作)「赤芾在股」,箋「蔽前」,) 福禄 不顯 〇「民胥然矣」,箋「天下之人皆如之」, 〇《采菽 車」,與 ○「捄之陾陾」,箋「捄,捊。 俱 亦世」,傳「仕者世 . 膍之」,「膍」誤作「膍」,經、傳同 誤作「桴」。 經異,今經、 箋「牛俎」,「 ○《縣蠻》箋「飢則予之 ○「酌言嘗之」,箋「立 ○「迺立皐門」,箋有 ○《漸漸之石》敘 前 一禄 一, 注 牛」誤 同 一誤作 仕 作「 捊,聚」, 作 「膝」。 「躅」。 誤 棧 生。 申傳 作 作

正。 作 酒」,「既」誤作「即」。〇「或肆之筵」,傳「或 陳之筵者」,「之」誤作「言」。 下脱「菽」字。 「及」。○「荏菽」,傳「荏菽,戎菽也」,「戎」 豐伊匹」,箋「大小適與成相偶」,「成」誤 之」,傳「耆,惡也」,「惡」誤作「耆」。 宗公」一章,經、注、疏 本」,「枝」誤作「枚」。 宫」,傳「雝雝」誤作「廱 十六之第十七葉 缺文,詳 城」。 禄臨天下」,「臨」誤作「福」,當依元本 韭菹」,「韭」誤作「非」。 渒」,經、注、疏 雅」。 〇《公劉》敘下箋「周公居攝」,「公」 〇「燕翼」,傳「燕,安」,「安」誤作 ^②附 ○「載燔 録》。 〇「實種」,傳「雍種 同。 第 載烈」,箋「既爲 「淠彼涇舟」,「淠」 四 ○「條枚」,箋「木之枝 皆缺,約 ○《思齊》篇脱 行後。 廱」。 〇「天被 〇「醯 有 〇 上 兩 爾 」,「雍」誤 雕 葉,在 郊祀之 禄」, 〇「作 醢 「惠 帝 雝 誤 改 在 于

矛」。 且。 不 宫室之功止」,「止」誤作「也」,當依 心」,箋「二者意不 猶辰告」,箋有缺文,詳《附 作「按」。 焉」,「焉」誤作「爲」。 吕《記》改爲「撫擾」。 正。〇「媚于庶人」,箋「無擾」,當依孔 居之野」,「野」誤作 山 敗」誤作)「庶無大悔」,箋「悔,恨 · 肎惠 二 誤 命」,箋「對 屆 〇「顛沛之揭」, 〇「京師之野」,傳「是京乃大衆所 作「由」。 施, 靡 箋「大木」,「木」誤 〇「干戈」,箋「句孑戟」,「孑」誤 属。 究」,箋「日祝詛 以 調 面 贍衆民」,「惠」誤 〇「玉女」,箋「君子 〇 正 也」。 語之」,「語 同」,「意」誤作「寬」。 ○「曾莫惠我師 ○傳「 傳「沛、拔」、「拔」誤 敗」,箋「敗, 録》。 也」誤作「 〇「止基」,箋「作 作「本」。 Щ 」,「日」誤 東 誤 〇「民各有 日 作「施」。 元本 朝 侮,慢 :「與」。 一、笺 壞」, 比 陽 疏 「遠 作 德 及 改 宜

之精誠 箋「我 耕, ○「駿 誤 各少一圈。 「當」。 〇「昭 也」、「女」誤作「與」。 作「止」。 也 士」誤作「公卿」,當依孔疏及 ○《周頌譜》「降於 時歸」。)「人觀于王」,箋「以 作 於 發 三十」至「其 「和」。 是 假 其 發 何 〇「顯父餞之」,箋「周之卿士」,「 」,「誠」誤作「神」。 無贏」,箋「贏,緩」,「緩 民 私 爾 由當 國 〇「予豈不 ○「噫嘻 大 田。竟三十里者,一部 私,終三十里」,箋: 箋「能 .步斯頻」,箋「頻,比也」,「比」 〇「亦又何求」箋,「女歸」誤 事 遭此早」,「當」誤作「常」。 私 耕 成 祖 成王」,傳「嘻,勑」,「勑 田」,凡二十字,皆 其 周王」,「王」 · 知 而 廟」上、「 私 常職來」,「常」誤 「寧莫我聽」,箋「我 \mathbb{H} 作」,箋「而,猶 〇「宜無悔怒」, 萬 功 嚴《緝》改 耦 」誤作 一誤作 大如 「使 同 一吏主 此上 脱去 民 作 作 卿 女

皆 誤 録》。 誤 也, 作「邁」。 又 「二」誤作「三」。 本 「女」誤 皢 屢」爲「婁」。 箋「一 補 雙行寫。 云 作 幔」。 三誤 疏 「升」誤作「大」。 有 〇「從公于邁」,箋「于,往」,「往」誤 謂 曉」誤作「 鰷 改 作 〇又六亡詩《 ○「將予就之」,箋「女扶 作「艾」。 耜 之毛公續敘 其 吾。 〇「有 正 ○《烈祖》「 義 爲 ○「龍 耦, 而 〇「有 亡 震 克 膮 鰷 其 且 旂 二天 _ 昌 「屢 以 辭 華 驔」,傳有缺 鱨, 業 幅隕既長」,經 十乘」,箋「二 當 ○「古帝命武 厥 一,此 黍 假以享」,箋「假 誤 命 下「告曉」又誤 」,箋「畏 豐」,當 依 × 後 笺 作「三」 多 傳、 乃毛公 解」, , , 白白 由 箋例 儀 依 誤 鰷 君之震 後 箋「告 將 王後」, 石 語 當 細 湯」,箋 詳 隕 我 誤 敘 經 字 依 單 儀 誤 升 附 改 作 下 作 曉 元

箋,其 旁作 誤始 以圈 然。 鄭《 行, 文 誤 蟲 注 者 所 比 以 似 又 經 塗 同 指 宜 細字,然 魚 譜》置卷首,與 或 今俱 别之, 誤 低 璣 摘 今本 改 Z 何 疏 徧 疏 有 者 時 正。 作 差彊 未 取 撿 則 文 其 也。 格, 細 能 皆 頗 大字 他 浩 於 亦 因 名 字 本 因 有 單 别 鄙 以 人 文 汗 惟 雙行 又傳 行 簡 皆 凡 言 立 失圈 意 便 譌 孔 近 與 條 然 陸 例 經 連 謬, 焉 疏 世 以 敘 陳 異 璣 未 箋 與 及 分 毛 雖 致 異 無 尤 處,自 以 善 輒 之。 其 正 注 (於釋 附 譜 姑 子 元 辨 難 上 也 作 義 闕 餘 其 晉 本 縷 止 疏 後 陸 經 誤 至 文 下 勿 家 亦 應 文 指 及 後 有 無 字,止 所 機 相 文 論 正 刻 作大字 不 庶 經 世 辨。 鐫 引《 免,不 閒 本 或 覽 通 文 鐫 義 故 是 與 雜 從 草 者 可 本 傳 是 須 書 如 木 書 玉 知 俱 前 止 瞭 或 别 者 至

六

四

釋文疑誤

言》、《草木蟲 文,甚有但 字反異,俗儒 與今本經文異,則剝作之字與今本同,而 作 字 兩字相同者。 久,脱誤愈滋。 某、本亦作某者,讀 良 寓 者已非全書。 釋文》多 足惋 目 某、字亦作某者,古字之通用 ·畫亦異,略載於《釋文》,其 馬 陸 也。 氏《釋文》有 襲 引《 改 案古人經由 姑 魚 元字, 爾 傳 至近 非 仍 疏 又《釋文》元本所 雅 寫 譌 有 》、《廣雅》等書及《韓詩 × 不 本之不同 而 世尤不爲俗學所 他據 功經學,然載在 不魚 知 别作之字不改,遂致 説 師授,讀 其故,往 文》、 ,何由正之? 連 幅, 也。 《字林》、 也 + 載經文,或 1某本 本各分, 往 其日 -倍傳 耳 注 相沿既 尚,罕 易 字 文 疏 《方 箋, 又 文 其 作 元 而 中

> 《説文》作頹。」今《説 《説文》同。」孔疏引《説文》亦云「草器」,今 《釋文》云: 本二字互易,是俗儒妄改。 疑《釋文》經本作頹,而云《説文》作隤。 言云俱係《釋文》。 未 之語 行寫,與箋溷。 (説 ○《關 誤。 一,其 口 文》云「蒲 臆 司 · 鵙》叙「后妃之德也」下,《釋文》 亦 斷 〇「頃 疑者,仍兩存之,以 時 也。 與彼文不 器」。 「畚,何 筐」,傳「畚屬」,云: 厭,本亦作厭。」二「厭」必 ○「服之無斁」,傳「斁,厭」, 兹據管窺 〇「虺 同 文》無 休云 兩 所 隤 ○「我姑酌彼金 後博 異必 頹 及 (字,有 一草 稍辨其 識 有 一誤, 者 器 以下凡 " 隤字。 擇 也。 獨 有 單 里

[●] 一九八四年上海古籍出版社影印北京圖書館藏宋刻

竹帛反。」「音」字疑當作「虴」。○《兔罝》, 甡。」〇又云: 字注引此詩,疑詵、鋅亦互易。案,鋅字見 蚣。」下「蚣」當作 《七月》、《吉日》、《絲衣》釋文「兕」作「咒」, 觥。」今「觵」誤作「鱑」。○「陟彼 當亦近本互易其字。又云: 兇、兕互易,當依吕《記》改正。 又推此,則 玉篇》多部,云: 詵、《説文》作辞。」今《説文》無辞字,而詵 「盈」。○「兕觥」,云: 斯」字。 **螽音終。《爾雅》作蜤。」「終」下當脱一** 皆當依吕《記》改正。 「確,本亦作砠。」今兩字皆作砠。「葛 傳「蚣蝑」,云: 「秦以市買多得爲夃。」「夃」誤作 「螽斯,江 「帶,本又作縈。」今帶、縈互 ・「蚣」。 「姓也。 東呼爲虴 ○「詵 詵」, 云: 或作騂、辨、兟 ○《螽斯》,云: 「蚣,《字林》作 「觵,字又作 祖矣」, 蜢。音

『迨,顧也。』」當依《玉海》改「顧」爲「願」。 《韓詩》「藻」字當作「薸」,詳《附録》。〇「勿 文。〇「迨其吉兮」,云: 今誤作「穿」。 「露」。○「穿我屋」,云「穿,本又作穿。」穿, 夜」,云: 翦」,云:「翦、《韓詩》作剗。」今「剗」誤作 反。鄭音髮。」下三字可疑。 詳《附録》。 字作餘。〇「惄如調飢」,忽、溺當作恩、愵 《記》改正。〇「言秣其馬」,云: 「箋」,當依《玉 云「定,《爾雅》題 趾。」今止、趾互易,當依吕《記》改正。 文》云: ○「被之僮僮」,箋「髲髢」,云: 「菟、又作兔。」今菟、兔互易、當依吕 『食馬穀也。』」今《説文》無秣字, 「夜,本又作莫。」今「夜」誤作 ○≪麟 案, 穿音川, 亦見《禮記》釋 海》改正。○《行露》箋「早 趾 也。」「題」誤作「顔」。 », 云: ○《采賞》引 「止,本 韓 「髲,皮奇 「秣、《説 詩》云: 亦 〇又

誤。 遘、 云 誤。○「覯閔」,云:「遘,本或作覯。」今 皮冰反。」今脱「同」字。○《雄雉》敘「刺 鼓》箋「公子馮」,云: 選也」,云: ○「死鏖」,云: ○「有鷕」,云「鷕,雉皎反。」元本「雉」作 「完字又作皃。」今「皃」誤作「見」。 「《説文》旭讀若好。」今《説文》「好」作「勖」。 「軓,車軾前也。 , 机, 「凡」誤 耀」。 〇 「濡 豵,字又作豵。」●二「豵」有一誤。○「不可 當依吕《記》改正。 覯互易,當依元 〇《燕燕》箋「戴嬀生子名完」,云: 「檀衣,毛氏云融皆云色赤。」●句 「選,雪兖反,選也。」下「選」字 「刺,俗作郟。」今兩字皆作 朝」, 云: 作「九」。 從車,凡聲。」一今「軓」誤作 「磨,本亦作麕。」今二字互 本改正。 「馮,本亦作憑。同 〇「旭日」,云: ○「五豵」,云: 「《説文》云: ○《緑 ○≪撃 衣 刺。 有 衞

> 《説文》云「玉色鮮」。 皆誤作「堥」,當依元本改正。○「流離 作整,山部又有嵍字,亦曰嵍丘。」今兩「嵍」 作垂。 垂乃古邱字。」又云: 引《釋文》云: 〇「兩髦」,云: 新色鮮也。」《君子偕老》篇引《説文》同。 ○「新臺有泚」,云:「泚,《説文》作玼,云 水」,引《説文》有誤字衍文,詳《附 云: 今「嵩」誤作「蒿」。 〇「采葑」,云: ·駛」字俱誤作「駅」、《秦·晨風》誤 「鶹鶇。」「鷅」誤作 「髦,《韓詩》作髳。」今《説 「髦,《説文》作髳。」吕《記 「葑,今菘菜。 ○《旄邱》,云: 〇《二子乘舟》,兩 :「鷅」。 「旄、《字林》 ○「泌 菘,音嵩 「邱,或 彼 録 同 泉

宋本《釋文》後「縱」字作「從」。

宋本《釋文》「云色」作「馬色」。

[『]帆|字同。 『帆|,原作「軌」,據《四庫全書》本、嘉慶本改。下兩

云

蒨。」「蒨」今誤

濊,大魚

俱作「琇」。○「倩盻」,云: 引「凝流」與《説文》異,詳本篇。 作駈」、《齊》「載驅」、《秦》「脇驅」之類。 推此則《釋文》「驅」字本皆作「駈」,其言「驅 今駈、驅互易,當依吕《記》及元本改「丘」。 累」,依《韓詩》爲是。 ○《緑竹》,云:「藩,萹筑也。」又云: 刀、《説文》作 ○《載馳》,云: 兩目豁豁也。」今脱 遥」誤作「遇」,當依元本 「揄,音遥,字又作褕。」今「揄 體,本 作 扁。」今兩「萹」 「琇、《説文》作璓。」今兩字 「梓實桐皮曰 「脩」。 鹏。」正義云: 作「鬏」,引此 ○「象服」, 「駈,字亦作驅。」 「倩,本亦作 「施罛」, 一「豁」字。 椅。」「椅」誤 皆誤 俱後人互 ○《河廣》, 「《説文》 詩 從竹。 箋 改 則 굸 正。 誤 又 褕 作 《爾雅》「夷上洒 可疑。 作且,七也反。」有誤。○「在河之漘」,引 把也。」〇「其樂只且」,云「且,子餘反。 云: 굸 作棚。」今《説 今《説文》無「稱」字,其 文》無「稱」字,「稱」字見《玉篇》,云: 云美石。」今《説文》云「玉之美者」,引此詩。 ○「丘中」,傳「墝埆」,云: ○《黍離》,云:「離,《説文》作稿。」今《説 「酋矛」,云: 苦」誤作「若」。 ○「如璊」,云: 锅」、「稱」皆誤作「璊」,「禾」誤作「木」。 「禾之赤苗謂之稱,玉色如之。」」今 「軫,本亦作榦。」今「榦」誤作「輔」。又 音彫、舟也。」○《伯兮》,箋「軫 〇「報之以瓊瑶」,云: 文》無 「酋,在由反。 「璊、《説文》作璊。 下不 〇「樹檀」,傳「彊韌之木」, 鹏、 漘」,「不」誤作「水」。 艢 字,字 赤苗字作「虋」。 「埆,苦角反。」 發聲。」末二字

易。

篇竹,本亦作

「琇瑩」,云:

作「褕」,

○「椅桐」, 云:

「瑶、《説文》

作「梓」。

翟」,云:

髳」乃或

見《

玉

也,

又

不

解

此

磁

又

本作 字, 早,本亦作早。」「弋鳧」,箋「弋,繳射」,云: 云: 作「答」。 作「鴇」。 云 墠》,云: 굸: 巾反」,誤作「巨中」。 云 繁,本亦作繳。」今蚤、早、早三字,繁、繳 鈐」,彼注云: 彊」誤作「疆」。○箋「矛矜」引《方 墠」,當依吕《記》改正。 『明星」,箋「早於别色時」,云: 乘鴇 各互易,當依元 ●「其柄謂之矜。」今《方言》「矜」作 消。」今兩字俱作「逍」。 「抽、《説文》作搯。」「搯」誤 「勺藥、《韓詩》云離草也、言將離 韌 一, 云: ○「釋掤」,云: ○《清人》,云: 「壇,依字當作墠。」今兩字 本 亦 「今字作槿。」又引郭注 作 「鴇,依字作駂。」今兩字俱 刃 ?。」元 本 ○「逍遥」,云: 改正。 ○「贈之以勺 「箭筩。」「筩」誤 本 「旁旁, 彊也。」 韌」作 ○《東 〇「右抽」, 作「陌」。 「蚤,音 忍 門 「逍, 藥 皆 别 言》 巨 之 兩 贈

> 作「夢」。 此草也。」今脱此十六字,當依吕《記》補 綃 餐。」上「餐」字誤。 閑,本亦作閑。」今誤作「閑閑音閒」,當依 遠,恐誤。○「桑者閑閑」,云: 今兩字並作 本改正。 云 「鱗」。 ○「魴鱮」,云: 茀」,當依吕《記》改正。○「言采其 〇「簟第」。云:)「蟲飛 굸: · 蕢,音續。」《説文》音其或反,此 〇「其魚 薨薨」,云: 〇「總角」,云: ○「素餐」,云: 「總」,當依《玉 繡 鄭 「鱮,象吕反。」「鱮」誤作 「第, 唯唯」釋文 改爲宵。 ○「朱繡」,箋「繡,當 「薨,呼弘反。」「薨」誤 音弗。」今經 海》及元本 「總,本又作摠 餐,《説 宵音消,本 誤 編 閒 文》 疏 改 誤 費 閒 反 作 太 作 爲 作 音 元

^{● 「}言」,原作「書」,據康熙抄本、大全本、《四庫全書》本

《記》改正。 《内則》「斂枕篋」,云: 云: 反。 作「族」。〇《葛生》,傳「齊則角枕」,又引 ○「游環」,傳「靷環也」,云: 口牒反。」今「齋」誤作「齊」,「口」誤作「曰」。 吕《記》改正。○《有杕之杜》敘「兼其宗 本又作褎。」今兩字皆作「褎」,上二條當依 逅。」今覯、逅互易。 作「利」。〇「見此邂逅」,云:「觏,本又作 綃。」今兩「宵」皆誤作「綃」,當依元 丹。 荆 「白石粼粼」,云: 州日 「叴,音求。」「叴」誤作「厹」,當依吕 1枏,揚 本又作朝。」今靳、朝互易。○「叴矛」, 韓詩》作 梅,揚州曰 州日 「宗族,本亦作宗矣。」今「矣」誤 〇「有條 沰。 梅。」觀沈語及孔疏,則當 枏」。 沰 有 ○「豹褎」,云: 「鄰,刊薪反。」「刊」當 「齊本亦作齋。 撻各反。」「撻」左誤 梅」,云: ○「渥丹」,云:● 「靳環,居覲 沈沈 本 改 <u>二</u> 正 荆

蒲與荷」,箋「芙蕖之莖曰荷」云: 後人改之』。」今脱此十五字,當依吕《記》補 從木。 人。吕又云「《皇皇者華》篇 駒」,云: 也」、「移」誤作「侈」。○《月出》,云: 音叔」。○「斧以斯之」引《爾雅》「斯、誃, 本又作皎。 姬」,云: 今《説文》同元本。○「同袍」,云:「袍,抱 吕《記》引此 「旦,本亦作且。」今「且」誤作「旦」。 毛反。」「抱」誤作「袍」。○「穀旦」,云: 劉」「懰」各互易,當依吕《記》改正 ○《晨風》,云: 「叔音淑,本亦作淑。」今誤作「淑 「驕,舊音駒,沈云『或作駒字,是 劉,本又作懰。」今「皦」「皎」、 同。 元本「鴆、《説文》作鴥」。 「鴥、《説文》作為。 内 同し。 。 〇 「淑 「夫,本 離

● 「云」,原缺,嘉慶本同,據康熙抄本、大全本、《四庫

子同 詩。 當作烈。 誤作「悦」。○「三百赤芾」,云:「芾音味 作「子南」。〇《曹》第十四,云「曹者」,誤作 也。」今「迨」誤作「殆」,又脱「始也」二字,當 颲。」今《説文》: 發」,云:「《説文》作畢發。」今《説文》作 文》云『大息也』。」今《説文》無愾字。 吕《記》改正。○「愾我寤歎」,云: 反服謂之芾。」●此有誤。○「浸彼苞稂 亦作芙。 滭 「曹昔」。〇「歸説」,云:「説,音税。」「稅」 薬」各互易。 饟,式亮反。」「式」誤作「武」。 拔」。○「栗烈」,云: 「《説文》作 ○「饁彼 . 掃」、《釋文》「殆」作「迨」,云: 「寖,本又作浸。」今寝、浸互易,當依 風也。」與毛傳「氣 渠,本亦 南畝」,箋「俱以 ○《鄶》第十三,云「子男」,誤 「颲,風雨暴疾也。 《作蕖。」今「夫」「芙」、「渠 寒」異義,不引此 饟來」,云: ○「殆及公 颲,列 | 説 風利

> 云: 罭。」❷二「罭」有一誤。○《狼跋》,云:「狼 誤作「王」。○《九罭》,云: 于驕反。」「于」誤作 依吕《記》改正補 本改正。○《伐柯》,云「饌,士戀反」。「士」 銎斧」,「銎」誤作「鉞」。○「四國 ○又:「難,乃旦反。」「乃」誤作「及」。○ 蟰」今誤作「蠨」。○「我斨」,引《説文》「方 消消」。 租,子胡反。又作租,如字。二一一租」有誤。 "「訛,又作吪。」今訛、吪 「翛,素彫反。」「偹」字誤,陸本經 〇「蠨蛸」,云: 人。 吁一 鴟 「《説、 ○「蓄租」,云: · 鳴」,云: 「罭,本 互易,當 文》作 是吡」, ·亦作 依元 蟰。」 作

[○] 宋本《釋文》前「嚴」字作「嚴」。○ 宋本《釋文》作「芾"音弗,釋也。祭服謂之芾。沈

也。 跋省 云「舞 云 栘者亦。」「亦」字疑當作「非」。● ○「鬩牆」, 驕。」〇「常棣」,傳「常棣,棣」,云: 引《詩》「我 據吕《記》,則《釋文》直作「驕」。又《説文》 本無「恭侯反」三字,「本」下有「亦」字。 駒」、云: 鳩」。今陸《疏》「浮」作「鶏」。○「我馬 疾葉切,疾也。 〇《鹿鳴》引《説文》「芩,蒿 疐」,云: ○「鵻」,傳「夫不」,引《草木疏》「一名浮 拏」。〇「坎蹲」,云: 「遲、《韓詩》作倭夷。」「遲」上疑脱「倭」字。 「妻帑」,云: 郎 今《説文》云「草也」。○「倭遲」,云: 「牆,本或作墻。」元本 曲 獸 也。 也。」「省」 「駒,音俱,恭侯反。本作驕。」元 「疐,本又作 馬 蹲,本或作壿,《説文》云『士 維 「今讀音孥也。」「孥」誤作 驕 」, 云: 疑當作「音」。● 走。」「走」恐誤。 走, 「坎、《説文》作發, 「馬高 「墻」作 六尺 棣 〇「載 廧 又 作 爲 維

> 也。 當依吕《記》改正。○「有瑲葱珩」,云: 鎎。」「鎎」今誤作「餼」。○「孔熾」,云: 麛」,云: 弭」,箋「末彆」,云: 云: 止,云: 蒲貝反。」「貝」誤作「具」。○《魚麗》,傳「不 今《説文》無「彆」字。 舞也』。」今《説文》「竷」注 「熾,尺意反。」「尺」誤作「反」。 〇「方叔涖 ○《彤弓》,箋「敵愾」,云: 「蹲,七旬反。」「七」誤作「毛」。○「吉蠲」, 樂有章。」「壿」注曰: 「蠲,舊音圭。」「圭」誤作「堅」。 「莅,本又作涖。」今莅、涖互易, 「麛,或作麑。」「麑」今誤作 ○「旆旆」,云: 「彆,《説文》方血 「愾、《説文》作 EI: 舞 也。」又云: 繇 也,舞 「旆 反。

[●] 宋本《釋文》「省」確作「音」。則當標點作「狼跋"音

宋本《釋文》確作「非」。

《緝》補人。〇「爲錯」,云:「錯,《説文》作 改正 从木, 散聲。」「 散」誤作「穀」。 當作蹟。蹟,足跡也。」今脱此八字,當依嚴 云 蓫」,箋「牛蘈」,云: 文》與今異,詳本篇。○「不蹟」,云: 作決。」今夬、決互易。○「夜未央」,引《説 傳「艾,草」,云:「艾,魚廢反。」「艾」誤作 器之總名。 「遁,字又作遯」,當依 ○「遁思」,云: 創 補」誤作「浦」。 《字林》同。」〇「其下維穀」,云: 本又作瑲。」今創、瑲互易,當依吕《 「繁,徐丁立反。」「丁」 ○箋「甫田」,云: 無所 ○《車攻》敘「修器 盛 一日 H 「遯,字又作逯。」今誤 ○「決拾」,云: 有盛日 械。」今《説文》云: 吕《記》改正。 「藬,本又作蘈。」今 械,無盛曰器。](「甫田 械 誤作「下」。 〇「繁之」, 「夬,本又 ,舊音補。」 引《 〇「釆 「迹, 説 記記 文 械

苑 滴。 訅、 藬、 云: 怭 作手旁至者,誤。」「有」誤作「又」。〇「鞠 굸: 文》與今本異,詳本篇。○「憯莫懲嗟 云 革」,云: 元本改正。 「素」。 記 勤」,當依吕《記》改 「訉之占夢」,云: 」, 云 訊互易,當依元 蘈 | 誤作「菀」,當依吕《記》改正。 兩「補」俱誤作「褅」,當依《説文》及 「噆,本或作憯。」今噆、憯 改正。 「裼、《韓詩》作補。 ○「憂心如惔」,釋文、正義引《 互 蜴, 「有 易,當依元本 「鞠,九六反。」「九」誤作「兀 星 菀 「革、《韓詩》作 ○箋「桎,轄」,云: ○「爾 歷 其 反。 特」,云: 本改 牲 又作 「訅,本 E 改 則 齊人呼小兒 朝。」今「朝」誤 蜥。」 正。 具」,「索」誤 E ○「載衣之裼 「苑 又作訊。」今 〇一虺 蜴、 互易,當依 音鬱。」今 「桎,本有 一如 〇「又有 蜥 蜴」, 被 當 鳥 吕 倒 説 作 爲 斯 誤作「憯

沓。」今噌、沓互易,當依吕《記》改正。 警。」今「警」誤作「嗸」,當依吕《記》及《 『願也,强也,且也』。」今《爾雅》無此文,惟 「蹶」,當依吕《記》改正。○「艷妻煽 遠行也。」今脱此四字,當依 魇,俱衞反。」今肴、殺互易,「 ○「不憖遺」,云: 憖, 肎从心也。」 〇「噂沓」,云: 「煽、《説文》作傓。」今兩 」,當依吕《記》改正。 「肴,本又作殽。」「 囂囂」,云: 「痗,又音悔。」今「悔 爾雅 ○「如彼 「慘,子 **%** 「《韓詩》作 亦與今《説文》 又正 愁,《爾 「嗒,本 行 蹶維 嚴《緝》 邁 感反。」今 一義引《 ○「孔棘 二,云 字俱 趣 雅》 蹙 又作 誤 馬 亦 聱 説 作 玉 云 補 作 方 誤 《説文》引《詩》,本作「咠咠 又作 緝 池。 彼鳴 下章,未詳 也。」「鬲」字誤,當依《説文》爲「聶 又作摍。」所反六。 詳本篇。 且殆 云: 音或。」「或」誤作「彧」。 Z: 连。」

今答、

迮互易,

當依元本 宛」,當依吕《記》改正。 凶」誤作「斤」。 句, 翩 唇。」「厬」今 翩」,云: 鳩」,云:「菀,於阮反。」「菀」誤 」,箋「甚急迮且危」,云: ,則語 「姑,面醜也。」疏引《説文》作「面 「且,觀 〇「維王之邛」,云:「邛,其凶 〇《巷伯》,傳「縮屋」,云: 熟是。 屬 L 箋意,宜七也反。」「也」 章 「緝、《説文》作母,云鬲 「摍」今誤作「樎」。 〇「爲鬼爲蜮」,云: 誤作「晷」。 ,與「幡 〇「氿泉」,云: 幡 幡 〇「有 幡」,與 爲 改正。 「笮, 〇「無 句, 父母

異。○「讒

口

文》云:

也

强

也

見《

小

處」,云:

煽

云:

嘉殺

_; 云

本

文

二宛

海》改正。

孔之海」,云:

語。

又

○「緝

縮

侮」,當依元本改正

邁

〇「憯憯日瘁」,云:

「氿,字

則

翩

翩

靦

面

誤

且

反。

蜮

于祖 繁,云門内祭。」「云」誤作「示」。○「工祝」, 月方燠」下。 慘劬勞」,云: 薪 箋「受嘏」,云: 音《爾雅》盧叔反,又音迪。」今《爾雅》郭 疑當作「懆」。●○「畏此譴怒」釋文誤 今誤作「嗜」,當依吕《記》改正。 丈夫也」,「言」誤 「亨」誤作「享」。○《甫田》述箋語「甫之言 一嘏 「寖」誤作 説文》作歧。」今「歧」誤作「岐」。 一考」,箋「納亨」,云: 「霢,亡革反。」「亡」誤作「士」。 굸 「介,音畍,王『大 〇「神嗜」,云: ○「祝祭于祊」,云: 「寢」。○「跂彼織女」,云: 寖,子鴆 〇「憂心且妯」,云: 「慘,字又作操。」「操」字誤, 作「田」。 「嘏,古雅反。」「雅」誤 反。 「耆,而至反。」「耆」 也」。」「王」誤 字又 ○「攸 「祊、《説文》作 「亨,普庚反。」 ○「霢霂」, 作 介攸 ○「或慘 一妯, 浸。」今 〇「享 入「日 止, 「跂 作 作 注 郭

> 《説文》無此文。 之采,生而 反。」今脱「嘏」字,當依 音的。本亦作的。」今誤作「的,音勺」,當依 又云「鵠者、覺也、直也、射者直己意」。」今 於左。」「揵」誤作「捷」,當依 其左翼」,云:「戢、《韓詩》云捷也,捷其噣 火」,箋「贏」誤作「嬴」、《釋文》亦誤。 字皆誤作「節」,「采」字誤 「稂、《説文》作 反反」,云: 元本改正。 〇「大侯既抗」,箋「舉皮侯 · 鵠,鴿也。《説文》云『即鵲 止 當 依 ○「錫 不成者,謂之童 元 「反,《韓 蓈,云: 本 ○「發彼 爾 改 純嘏」,云: Ē 『稂,或字也。 詩》作販。 元 有的 本 〇一不 作「莠」。 蓈。 」 今兩 也,小 補 而 ^ 三, 云: 玉 棲 「嘏,古 稂一, 海 鵠 而難中」。 眅,蒲 二, 云: 〇「戢 改正 〇「炎 「威儀 勺, 煎 禾粟 云 板

● 宋本《釋文》確作「懆」。

田」、云: 當依吕《記》改正。○「言綸之繩」,箋「綸, 聚也」,「裒」誤作「衰」。 海》改正。 **晛」,引《韓詩》「曣晛」誤作「曣見」,當依《玉** 以《生民》推之,上「菽」字當作「叔」。 菽」,云:「菽,本亦作菽。」二「菽」有一譌, 反,善貌。」今「眅」誤作「昄」,當依《玉海》改 〇「苑結」,云:「苑,於粉反。」「粉」誤作 繁」誤作「繳」,「繳」誤作「故」。 蔕,音帶。 勿」,當依 雅》云衺。」今「衺」誤作「哀」。 〇「側弁之俄」,云: 也, **爾** 又以《下泉》、《大東》推之,浸、寖二 雅》作薹。」今《爾 굸: ○「婁驕」,引《爾雅》「裒、鳩、樓, 「浸,本又作寖。」「寖」今誤作 本亦作帶。」今誤作「帶,音蔕」, 元本改正。 「繁,音灼。 〇「垂帶」, 〇「臺笠」,云: 「俄,五何反。 雅》作「臺」。 亦作 ○「浸彼 繳。」今 〇「見 〇「釆 云 稻 又 晝。 嘯。 云 舟」,云:

《廣

Ĕ

《記》補人。○「捄捊」誤作「桴」。又引《説 《説文》『譬諭也』。」「諭」誤作「譽」。○「造 《記》改正。 **籟。」「穦」今誤作「覆」。** 作「反」。〇「陶 由大王也」,云:「一本無「由」字。」「本」誤 造字』。」二「艁」皆誤作「船」。 霤。」「又」誤作「文」。○「俔天」,云: 作「獨」。〇「三星在罶」,云: 漸,亦作嶃嶃。」今「嶃」誤 反。」「遐」誤作「叚」。○「漸漸」,云: 其左翼」,箋「禮 字必經俗儒 本又作濁。」今「晝」誤作「畫」,「濁」誤 本亦作嘯。」今誤作「嘯,音歗」。 「卑,本又作俾。」今脱此五字,當依吕 「造、《廣雅》作艁、《説文》『艁,古 ○傳「畢,噣」,云: 互易。 復一、云: 義相下」,云: ○「嘯歌」,云: 〇「俾立室家」, 作 「復、《説文》作 ○《緜》敘「本 「漸」,當依 「罶,本又作 下, 「噣,又音 歗,音 〇「戢 遐 吕 漸 嫁

《説 菽。」今叔、菽 云: Ę 作「雜」。〇「釋之」,傳「淅米」,云: 當依元本改正。○□荏菽」,云:「叔,或作 仡仡」,云:「《説文》作圪。」今「圪」誤作 〇「取羝」,云: 反。」「音」字誤。● 文》「引取」誤作「引聖」。 * 想」誤作「哲」。 篾」,當依陸《疏》改正。 「栝似荆,上黨人織以爲筥箱」,「織」誤作 一栖,字亦作槱。」今梄、槱互易,當依元本改)「實種」,脱字,詳《附録》。 文》云「汰米也」。」「汰」下脱「米」字。 〇傳「樸,枹木也」,云: 「挈,本又作契。」今挈、契互易。二條 「柴祭天。」「柴」誤作「此」。○「崇墉 〇「哲王」,云: 互易,當依 ○「維龜正之」,箋「契灼」, 「抵,字亦作羝。」今抵、羝 ○「榛楛」,引《草木疏 「哲,本又作悊。」今 〇「民 ○「槱之」,云: 吕《 又「雍種」亦誤 「枹,音茅 記》改 所燎矣」 「淅, 正。

> 作「科」。〇「台背」,箋「鮐,文」,云:「鮐, 牆」,云: 厭 **6**從人在目上,小阱也,從肉爲䐃,食肉無 梨也」,云: 偏羣臣」,云: 湯來反。」「湯」誤作「易」。○《既醉》,箋「下 次肉也』。」今《説文》「函」作「圅」,象舌形, 互易,當依元本改正。 〇「大斗」,云:「斗,字又作枓。」今「枓」誤 方」字誤。● 且君且王,一本且並作宜字。」今三「且」字 ·音」,當依元本改正。〇「宜君宜王」,云: 函,本又作涵。《説文》云『舌也』,又云『口 也 非舌義。 「堵,丁古反。」「丁」誤作「寸」。 「梨,利 〇「脾臄」,傳「臄, 「徧,音遍。」今「遍」誤作 ○「敘賓」,傳「觀 知 〇「行葦」箋「耉,凍 反。 又利方反。」 函」,云: 者 如 堵

宋本《釋文》「音」作「必」。

宋本《釋文》「方」字作「兮」。

爾同僚」,云: 易、「但」又誤作「宣」、當依元本改正 云: 互易。 字,應依《説 《匪風》、《蓼莪》釋文「飄」作「票」,亦是近本 案,「昬」當作「怋」,「釋文」當作「説文」,下 票,飄互易,當依吕《記》改正。 録》。 〇「辭之懌矣」,云: 云「怓也」。《釋文》: 正。〇「取鍜」,引《説文》與今異,詳《附 引《説文》與今異,詳本篇。 皆誤作「宜」,當依吕《記》改正。○「囊橐」, 繹」今誤作「懌」,當依 惛」字當作「惛」,「僚」當作「憭」,共誤 「甗,本又作巘。」今甗、巘互易,當依元本改 〇、飄 「僤,本又作癉,當但反。」今僤、癉 ○「惽怓」,云: 風」,云: 文》 「寮,字又作僚。」元本經與 改正。 「票,本亦作飄。」今 元本改 「惛,亦不僚也。」」 繹,本 〇「下民 惽、《説文》作昬, 〇「在巘」,云: 又推此,則 Ē 亦 卒 作 〇万及 懌。」 癉 互 四

正。 今偏、翩互易。 詁。」今「詁 互易。○「告之話言」,云: 正。〇「覆,芳服反」,「芳」誤作「苦」。 奰」,箋「時人忕於惡」,云: 誤作「沈」。上三條當依元本改正。○「内 《釋文》僚、寮字俱相反。 今《説文》無「忕」字。○「靡哲 箋「沈湎」、云: 反。」「易」誤作「異」。○「俾晝作夜」,云: 『習也』。」又《四月》正義引《説文》與此同 「卑,使也。 民孔易」,箋「易,易也」,云: 一喆,本又作哲。」今喆、哲互易,當依元本改 屎、《説文》作

作。」「

「別」

誤作「

「明」。 「洒埽庭内」,云: 〇「旟旐有翩」,云: 」誤作「話」。 本亦作俾。」今卑、俾互易。 〇「具禍以燼」,云: 「耽,本或作 「廷,音庭。」今廷、庭 上三條當依元 「偏, 「話、《説文》作 ○「殿屎」,云: 「忕、《説文》云 「易也,以 湛。」今「耽 本亦作 不愚」,云: 〇「牖 .翩。 本 豉

字上 誤作 敘 作 垢」,云: 云: 連反。」「于」誤作「如」。 元 同。」今兩「家」字皆誤作「稼」。 云: 云 굸 恫。」今同、恫互易。 亦 本 :「赫」。 「蟲蟲」,云: 一銷 「來赫」,云: 一當有缺 改正。 ,作燼。」今盡、燼互易。 「家,王申毛音駕,下句『家 去」,云: 本作 「恢,《説文》云「炎燎也」。」今《説文》 愠 恢, 上四條當依元本改正。 , 紆運反。」「紆」誤作「舒」。 「垢, 音談。」今「談」誤 文。 国雨 〇「哀 ○箋「雷 雷之聲當 古口反。」「古」誤作「舌」。 「赫,本亦作嚇。」今「嚇」誤 蟲。《 銷, 〇「炎炎」,云: 恫」,云: ○「荼毒」,箋「愠怒」, 聲 爾雅》作爞。」今「爞 音翦。」「翦」字誤。● 尚 殷 〇 如 殷 殷 然」。」上「然 作 殷然」,云: 「好是稼 同, 上三條 恢 ○《雲漢 檣 淡 如焚 本 「炎,于 維 〇「中 又作 當 穑 寶一 又 依

> 豆豆。 文》 誤作「角」。 救反。」「救」疑當作「敘」。 傳「趣馬不秣,師氏 或作明神。」今祀、神互易。 〇一祁 云: 元本改正。 굸: 云: 「儀 「抺」,施、弛皆 云「憂也」。 作 」,當依呂《記》改正。 「我義,毛如字,鄭作儀。」今「義」誤作 祁」,云: 餘。 〇「訏訏」,云: 肴,本亦作殽。」今肴、殽 將,本亦作鏘。」今兩字皆 施, 〇「其追其貊」,云: 〇「籩豆有且」,云: 〇「敬共明神」,云: 作「弛」。 本 祁, 又作弛。」今「餘」誤 他其兵」,云: 巨 「訏,況 移 ○「八鸞鏘 ○「我儀 〇「趣 反。」「 二其 甫 互易, 殺維 反。」「 「且,又七 馬師氏」, 「秣,《 作 貊 巨 明祀 圖 之, 鏘 誤 鏘 當 何 《説 本本 甫 説 作 作 依

宋本《釋文》「翦」作「消」。

宋本《釋文》無上「然」字。

選》注引《薛君章句》作「惟」,當改從之。 文》、《字林》柴作柴。」今「祡」誤作 誤作「巡」。 箋「坤以簡能」,云: 詩》「維、念」、「維」訓「念」、當從心旁。 又「亦」字誤作「音」。○《維天之命》,引《韓 方豸種也」。 文》作貉,云「北 云 兩「如」字皆作「而」。」今「兩」誤作「爾」。 〇「皋皋訿 〇《執競》敘下釋文誤單行寫,上又誤題箋 寙」,●上從一,不從穴、《説 麻偷生」見《史記》。 ○「威儀反反」,云: 「窳,汙窬也。」案,訓嬾者字應作 「窳、《説文》云「嬾也」。」今《説文》 「雒,本亦作洛。」今雒、洛互易, ○《時邁》叙「柴望」,云: 訿」,傳 ○「如震如怒」,云: 方人也」。」今《説文》云「北 「巛,亦作坤。」今「巛」 一訛 訿 ○《清廟》敘「洛 窳 「反反,如字。」今 文》無此 不 · 供 「一本此 事 :「柴」。 也, |《説 《文 字。

> 黜殷 易。 亦作俾。」今卑、俾互易。 爾雅》作橬。」今脱「爾」字。 굸: 誤。❷ 今《方言》云: 當依元本改正。 誤作「一又如字」。「駿發爾 本亦作駿。」今後、駿互易。 「哲,本亦作哲。」以《抑》、《瞻卬》推之,上 哲」當作「喆」。 · 餳、《方言》云張皇反,即乾餹也。」「反」字 ·瞽,本或作鼓。」今「鼓」誤作「瞽」。 上三條 二條當依元本改正。○「耆定爾功」, 命」,云: 「即乾餹也。」〇《潛》,云: 「絀,又作黜。」今絀、黜 ○「簫管」,箋「賣餳」,云: 〇「俾緝熙」,云:「卑,本 「錫謂之餦餭。」郭注 ○《有客》敘箋「既 私 〇「宣哲」,云: ○《有瞽》,云: 」,云: 「潛,《 互

0

嘉慶本改。 「窳」,原作「窳」,據康熙抄本、大全本、《四庫全書》本、

宋本《釋文》「反」作「也」。

也。 《説文》作絿。」今《説文》「俅」字引《詩》「弁 誤。○《絲衣》敘箋「商謂之肜」,云: 競不絿」,云「急也」。 服俅俅」,云「冠飾貌」。 當依元本改正。○「載弁俅俅」,云: 文》與今異,詳本詩。 而以「鎡」爲俗字。 餘戎反。 牡」,云: 今誤作「椒」,當依元 作穮,云「耨鉏田 有誤。● 息反。」經、傳、箋並無「浸」字,音又不合,必 云「惡」。句有誤。 云 「蕭、《説文》作鎡。」今《説文》「鼒」字引此詩 〇「有椒」,云: 耆,鄭 ○「緜緜其麃 《尚書》作形。」今「融」誤作 「犉、本亦作犉。」●二「犉」有 云「惡 也」。」今《説文》云「耕禾閒 ○《敬之》,云: 也」。」案,箋云「老」,不 ○「不吴不敖」,引《説 本改正。 〇「鼐鼎及鼒」,云: 「椒,沈作俶。」「俶」 一, 云: ○「蹻蹻王之造」,● 「絿」字引《詩》「不 「麃、《説文》 ○「殺 「浸,子 :「戎」, 、時犉 「融, 「俅,

> 咽」,云: 聲。」徐古堯切。 皆古熒切。 駫」,云: 文》「駉」字引《詩》「在駉之野」,云: 《詩》有之。」今脱「有」字。 何聲,牧馬苑也。」「駫」字引《詩》「四 조 굸 駉」乃此詩 駉,古熒反。《説文》作驍,又作駫。」今《説 「鼘」字誤分爲兩字。● 「於繹思、《毛詩》無此句,齊、魯、韓 造、詣也。」「詣」誤作「諸」。 「從馬光聲,馬盛肥也。」二字徐 「咽,本又作淵鼓。」「鼓」字衍,或 「坰」字、「驍」乃别字。 驍字云: 然則「駫」乃此 〇「治孫子」,云: 良 〇《駉》敘下云 馬 也, 詩 「駉」字 ○「鼓咽 從 ○《般 從 馬 牡 堯 駫 馬

宋本《釋文》作「浸也、子鴆反」。

宋本《釋文》前「犉」字作「犉」。

[●] 宋本《釋文》作「鼝」。● 宋本《釋文》作「鼝」。

也。」今「同」誤作「周」,當依元本改正 注」爲「韓 字,下注作荒,云『至也』。」應依元本改「下 元 云 今《説文》「憬」字引此詩,云「覺悟也」。又 文》作愿,音獷,云『闊也』,一云『廣大也』。」 疏》改正。 夜,當依元本改正。○「薄采其 「茆,或名水葵。」「葵」誤作「戾」,當依《草木 稺」,當依《玉海》改正。 愿」字不引此詩。 矍」字注云: 治,本或作治。」二「治」必有誤。 「鳧繹」,云: 本改正。○「遂荒大東」,云: 「卑,本又作俾。」今卑、俾互易,當依 「稺、《韓詩》云「幼稼也」。」「稼」誤作 詩」,

又兩 ○「憬彼 「伐,本又作茷。」今兩字 「讀若《詩》『穬彼淮夷』。」其 「繹,字又作嶧,同,山 獷、礦俱古猛切。 淮夷」,云: 「荒」字必 〇「俾民稼 ○「植稺」, , , , 云: 有 「憬,《説 「荒,如 〇「其 一誤。 穑」, 俱 名 旂

> 疑當作「僻」。● 也。」「者」字當依元本改作「音」,下「辟」字 又女币反。」「币」誤作「印」,當依元本改正。 Ē ○「天命多辟」,云:「辟,音璧。 王者辟邪 海》改正。 敷。」今誤「本亦作孚」。 云: 又作薛。」●二「薛」有 「鬷」今誤作「駿」。○「三蘗」,引《韓 「悊」。○「敷奏」,云: 「悊,音哲,字或作哲。」今誤作「哲」爲音 〇「居常許」,箋「築臺於薛」,云: 〇「百禄是總」,云: 「蘖,絶也。」「絶」誤作「色」,當依《玉 〇「且業」箋「橈敗」,云: 〇「松桷有梴」,云: 一誤。 「傅,音孚,本亦作 二條當依元本 「總,本又作鬷。 〇「濬 哲」,云: 「薛,字 詩 改

宋本《釋文》「下注」確作「韓詩」。

宋本《釋文》前「薛」字作「薛」。

宋本《釋文》確作「音」、「僻」。

引《 誤。 其義 相 丑 者得覽焉 與元朗所見必有差殊,宜其書 文》,乃徐鉉《韻譜》,非許氏始一終亥之舊, 後衞包改用今文字畫 決者,則云疑當作某。 信者,則云某字誤當作某。 某,或繼之云當依某書改正。 字當改 《釋文》成於唐初,所載經注猶存漢隷舊 符 連 爾雅》,今止存郭氏 其引 也 反。 異 Ē 而 故於譌字之外,亦備列之,俾好古 柔 各 他 顯 梴 典 通 有 文雖 同 超者,則 他 物 據 耳 異 者 0 一,盡 兩存之,不置 其可 而 注本。 一句有 義 則云某 失其 其欲 疑者,則云 同 誤。 中引述,不 者 (舊矣。 雖 又今世《説 信 字 0 無 弗贅 今 辯。 而 據 至 誤 必 右 未 耐 及。 案 所 有 敢 作 可 凡

集傳疑誤

列 誤作「牛羊下括」。 較之,又得十二,譌字、脱者、倒者各 本較之,得譌字及文倒者,共十有二。 日」。 ○「家伯維宰」,「維」誤作「冢」。○《小旻》 辰」誤作「晨」。 如彼泉流」,誤作「流泉」。 爾」誤作「我」。 於左。 集傳》所載經文,近儒 今監本注疏亦誤。 一胡 然 鄘》「終 厲 ○「朔月辛卯」,「月」 ○《小雅》「求 矣」,「然」誤 ○《齊》「不能 然 ○《王》「羊牛下 允臧」,「然」誤 ○「爰其適歸」, 馮 嗣宗以 爾 作「爲」。 辰 新 -括」, 誤 夜」, 特」, 注 余 作 作 續 今 疏

[■] 宋本《釋文》作「丑連反,又力鱣反,長貌,柔梴物同

○《商

頌

來假

祁

祁

」,誤作「祈祈」。

已上

續

2

魯

頌

、》「其

旂

茷

夜」,誤

作「花花」。

周

頌》「既右響之」,「響」誤作「享」。

0

〇「以篤于周祜」,脱「于」字。

注疏

亦誤。

〇《大雅》「淠彼涇舟」,「淠」誤作「渒」。

監本

疏本亦誤。 于」。已上馮氏較得。 作「流泉」。 ○「不皇朝矣」,「皇」誤作「遑」。下二章同。 饗」。 泰」。 斯」誤 「尨」誤作「厖」。○「何彼襛矣」,「襛」誤作 遠父母兄弟」。〇《小雅》「言歸斯 穠」。○《衞·竹竿》「遠兄弟父母」,誤 滔」誤作「慆」。○《抑》篇「如彼泉流」,誤 爰」誤作「奚」。〇《大雅》「天降滔德」, ○《楚薺》「以享以祀」,「享」誤作 作「思」。〇「昊天大憮」,「大」誤作 ○「福禄膍之」,「膍」誤作「膍」。 「畏不能趨」,「趨」誤作「趍」。 ○《商頌》「降予卿士」,誤作 〇《召南》「無使尨也吠」, 復 監注 降 作

《詩》已亡,所據止毛傳本耳,不應有 字,❷皆當急改之。其餘雖於義無損,然不 較所得。 士」,此六詩確是朱子自改,觀注語 憮」、「 奚 其 至如「不能晨夜」、「家伯冢宰」、「昊天泰 此定是傳寫之誤。 可妄易經文也。又馮氏謂朱子作傳時三家 者,「趨」之爲「趍」,音馳。而「笩笩」則 者,「羊牛」之爲「牛羊」,「辰」之爲「晨」, 爾」之爲「我」,「予」之爲「于」; 〇右共二十六條。其中有妨文義 適 歸」、「天降 余謂 傳寫之誤固有之, 滔德」、「降于卿 , 其 可見 河異, 失 不 也。 成 韻

少。有朱子欲改而未及者,有後儒知而辨《集傳》經文多誤,而傳中譌字亦復不

本、《四庫全書》本作「花花」。 「笩笩」,原作「筏筏」,據嘉慶本改。康熙抄本、大全

作「茷筏」。

注 誤,當作「成」。 《大全》。 腓」,注引程子語,朱子自云欲删而未及。 誤,當作「牝」。 之 也」,朱子自云「作比爲是」。 元 義》辨之,而《大全》不 衣 漢 卿」字誤,當作 ·亞」當作「亞」「己」當作「III」。)「壹發 繡 本作「 「壝其 築城伊減」,注: 書》「苗生葉」,脱 裳」,注: 亦 〇「南 三篇 土」。 賦 五豝」,注: 呼青 有 而 相 同。 比」,輔 有 ◎《頻 觜。」「觜」字誤 《大全》載潛室陳氏語辨之。○「載 習 〇「池之竭 「鱗」,「肌」字 黻 載。 嘉 而 〇《小宛》「交交桑雇」, 魚 之狀 弁》「賦 「生」字。「隤其 廣、 莫 ○「或耘 「豝, 牡豕 淢,城溝 注: 覺 劉瑾 亞, 者, 見《大全》。 矣」章, m 衍。 增 兩 常作 或秄」,注 興 也。」「城」字 也。」「牡」字 今 〇「小人 入「興 鱒 叉 列 朱克 鯽 相 比 注 土」,誤 ○《閔 :「雀」。 於 也 升 背。 肌 「賦 又 左 《疏 引 見 所

孽」, 蠲 意在 唪」,唪, 且 兮」,湯,他郎、他浪二反,俗本音蕩。 俗本音疽。 俗本音韶。 反 反,俗本音潔。 之功。」「文武」當作「文王」。 予 讓」當作 此言僖公牧馬之盛。」輔廣言 魯侯」。 閑 治 爲饎」,蠲,古元反,俗本音娟。 小子》,引《大 」,信,其 誤 孽, 便童蒙之誦 俗本《集傳》,將元本反切 初學矣。 《大全》載其語。 穆 布 魚 孔 列 穆」。 ○「揚且之皙也」,且,子 後「且」 乙反,俗 反,俗 反, ○「招招 招 習也。 ○「頡 俗 》「三公揖 〇《齊》注: 本 皆 本 本 〇右共十二條 音 誤音。 音 舟子」,招,照 之頏之」,頡,户 音吉。 然 蚌。 桀。 其 讓 閒 皆轉爲 ○《駉》 「僖公」當 〇「子之湯 舛 〇「下民 劉 此 二瓜 〇「既 謬 瑾 頌 餘 遥 直 頗 言 瓞 注 文 反 反 唪 之 佶 作 武 揖

奉誤

同

唪。

○「聽

我

貌

藐」,藐,美角

宗廟。」方知下文「淑女」,不得

指后妃也。

孔疏

不然,「流之」與「求之」文義不倫矣。

申首章傳意,謂后妃既有

是德,又不妬忌,

毛詩稽古編卷三十

吴江陳處士啟

善匹

,此善會傳意者也。

嚴《緝》既言后

妃

思得淑女以配君子,故此淑女宜爲君子之

(源著

似目后妃爲善女矣,及觀次章傳云: 貞專之善女,宜爲君子之好匹。」初視之,竟 雎》首章傳云: 毛傳古雅簡 [雎之德,乃能供荇菜,備庶物,以 質,讀者不 「后妃有關 雎之德,是幽 ·可率易。 如《關 閑 手委 云:

妃有

關

注 《字略》云: 字亦作「頻」,《玉篇》云: 本作「擩」、《周禮》有「擩祭」、《玉篇》云: 云 「挼」,非是。 撋, 推物 へ聲。 薄污我私」,傳云: 「手挼莎 「煩,煩撋之。」《釋文》云: 獻,讀爲莎 也。」矮、《説文》云: 莎、《玉 日 「煩撋,猶捼莎也。」」案,「煩 也。」又《周 兩手相 以醪 篇》作「抄」,《廣 酒 切 禮》「鬱 摩莎沸之。」 「嫉,捼也。」「撋 摩 污污, 也。」今俗作 阮 齊獻 煩 推也。从 也。 孝緒 窭

周

南

或

風

附

録

者也。

供荇菜,又以「求之」爲求后妃,此誤認

傳意

求,則 以 選》李善注。 祖 句 防有 事, 云 屈 宋湘 「言漢 漢 慕説益至,敘意或爾爾。 鵲 遂 廣》之「游女」、《 巢》二詩, 有 夫説之必求之,然惟 神 交 巫之説 時 甫 見,不 請 乎? 韓 佩 敘 之 可 亦 説 韓詩》以爲漢神,其 敘 得 以爲 矣。 云「説人也」, 而 求之」。 可見 又從 説 又《雞 人,未詳 而 丽 實之 鳴 見 不 미 文 章

吕《記 也。 譌 當爲「愵」,「 怒同。」《玉篇》云: 文》引《韓詩》「愵如 敜 愁」乃「怒」之俗書,亦誤 也 或作愵。」二字音義皆與「怒」同,「 惄 詩》作 又案、《説文》云: 引《釋 如 調 **怠」當爲「懇」,皆傳寫之譌** 飢。 溺,音同。」今案,《玉海 文》云: 調 釋 思, 飢」,則「溺」乃「愵」之 文》云: 奴歷 怒, 愵, 憂 本又作愁。」 一切,思 怒,本又 貌 》載《 也, 讀 耳。 溺 愁 與 釋 作

> 慨然而歎。 旨,然後漢周磐居 迫饑寒之憂,爲 E 室政教 汝 墳》末章、《韓 如烈 「《詩》可以興」,信夫。 此 火, 貧養母 禄 猶 仕。」 往 .. 詩 加 ,儉薄不 韓義雖 》薛 仕 者 君 章 未 以 充 必 父 句 誦 得 母 日 此 詩 其

召 南

爲鶚。 能,故以象婦 也,后夫人 鴡 然則一 鳩 鶚 取 德與? 也 興 鳩 同 焉。 鳲 種 鳩, 或 前 有 别 鷹 日 鴡 所 與 鳲 爲 均 化 鳩 貴 矣。 也 生三子, 皆 非 鷙 鷙 不 鳥

帛。 組是綬也, 别,詳《内 云: 紃 采賞》箋引《 紅也,組也,紃 條也。 則 但薄闊爲組 **%** 組,亦像 疏 굸 内 組、 則 也 如 之類。」案,組、 》「織 紃 ,皆織之。 繩 俱 者爲 爲 紝 絛 組 紃 紝 紃 皇 耳。 , 氏 紃 謂 之 又 云 繒 疏

未然。 《禮》疏 案,《 文章,豈 説 綫 應本此 文》云: 縷 一縷之謂 也、《簡 爲 説。 組 乎? 兮》「 《釋 綬 屬 文》 執 一轡如 议 紃 組 組 贾 爲 <u>ب</u> 采 縫 取 也 其 恐

漂浮 氏《韻 浮,頗 萍 根 E 海》引《韓詩》皆作薸。 則有根,不 薸。』 薸音瓢 生水底 浮者 也。 薸而 會》引《韓 怪 采 其 賞》釋文引《韓詩 E 故《韓 葉敷 相 藻。」今目 藻,則 浮游 反。 水 即 詩 詩 事。」 小萍也。 **学**云: 上,不若小浮萍之無 影亦 案,藻字《 此字之誤,其來久矣。 驗 作藻,《 羅 ^ 爾雅 此 語 一沈 **》**云: 二草, 薲亦 良是。 爾 翼》云: 者 玉 雅 海 日 不沈,但 一沈 翼 藻 萱, **>** 又案,黄 兩引 沈 浮 者 根 而 比 者 此 营 TH

> 後世 庸,他 巓 蘭,古未有氏其祖之名者,況鄭之七穆 傳 蘭 欽皆是。 案,後世 杜注以季蘭爲少女之佩 弋之爲姒,若非《穀梁傳》,則亦 故後 氏, 之稱 蘭 顔説 典 姓,非 亦 亦 世 與季姜、 師 未 有 不 無聞,古或有之也。 古注《急就 必 載 蘭 季 然 女父族之苗 姓 以 季 也。 如如 姬 與姜弋並 漢 詳《左傳》之言, 例 篇 蘭 蘭者,殆 矣。 廣 V 裔 謂 舉 乎? 晉 出 丁,故 《桑中》之孟 蘭 莫 闡 自 姓 是 可 維 知 鄭 不 考 臆 是 並 穆 安 梁 載 矣。 説 姓 知 無 公 蘭 經

以 樂象靁之聲,皆言其盛。 訓 語 作樂 殷殷象雷聲尤有致耳 證《詩 近世《説文長箋》引《易》豫 之盛 · 殷其靁》「殷」當如字讀 ^ 易》 以 靁 象樂之聲、《 此 亦 可 通, 桂 謂殷 但不若 詩 殷 薦 以 本

反。」《説文》「抛」字注云:「棄也。从手、《摽有梅》釋文:「摽,婢小反,又符表

一十八年。

意

召南大夫妻是蘭姓女乎?

季

潦之薲藻

,寘諸宗室,季蘭

尸之,敬

也

左傳》説《采賞》詩云:

「濟

澤之

阳

然「摽」字别見去聲,云「擊也,符少切」,音義亦同。匹交切。」是「摽」乃「抛」之重文。尤、力,或从手票聲。《詩》「摽有梅」,落也,

義皆與《詩》異

具哉! 齊、魯 命,因 被殺,魯即 傷之而作,斯 謂 前辨之詳矣。近世有僞爲《申公詩説》者, 齊襄殺魯桓 未嘗 使莊公主 何彼襛矣》詩,後儒 請 相 以 亦巧於傅會矣。 ,莊王將平之,使榮叔錫 讎, 婚 彭 生除恥,而 以 焉 用 桓王妹 天 誤 子 以春秋事實之, 女爲 嫁 齊亦從之矣, 不知桓公初 襄公,國人 釋 憾之 桓公

邶

管叔於東,建蔡叔、霍叔於殷,俾監殷臣。」 《周書·作雒》篇云:「武王克殷,建

> 遷或 予中旄 以存疑。 宇于東。」晁注云: 孔晃注云: 竊意分字二子,當在初點 管叔。」據此則康叔 周 公降辟二 廢,則併以衞界,康 非 康 一叔,俾 叔 東 或 謂 乃 與 衞 「康 康 封 諸經傳異,未詳 叔宇于 殷 於邶 叔代 叔容有之也,姑記 殷 謂 時, 邶 殷 霍叔,中 鄘 厥後 鄘 俾 而 中 中 衞 又 其故 旄 地以 旄 旄 云: 或 代 父

十二年也,當厲王十六年厚賂 家》語爲非,云: 知當夷王時。」案,劉恕《通 世家》頃公厚 時,衞國 康成《詩 政 衰,變風 賂周 譜 云 夷王,夷王命爲衞侯,故 頃 始作。」 公元 0 衞 年, 孔 鑑 頃 外 周 疏 魯獻 公當 周 云: 紀》 公之三 命爲衛 周 辯《 夷 世 衞 王

■「譜」,原作「讚」,據康熙抄本、大全本、《四庫全書》本

《世家》乃言其賂夷、《三代世表》亦以 年 侯, 在厲十六年,又不 之,良有 夷世,其書自相矛 年,應以厲十三年 合《周本紀》、《衞 (世家))爲據,殆未 短 在厲二十五 奔彘,衛釐侯之十三年也,逆計釐之立 時 信,俱 理 不可 人 不 則其事 考耳 遇 一年,釐乃頃之子,頃 世家》觀之,厲王以三十七 小 盾 立,不得與夷王 知何 考其真 亦 人 0 不 在 至賂 據。 足信。 側 也。 周 共 變 得 和 至 風 譜、 没候,索 以前 劉 在 同 始 謂 疏 位 時。 作 紀 賂 皆 頃 十二二 ___ 隱 公當 年 周 以 駮 今 而

衡《贈 君 暴,使己思益 顧 終風》、《韓詩》章 彦 先》詩云「 隆。二 語 隆 頗 句 思 似五言古詩, _ _ _ : 亂 心 曲 時 」, 正 風 用 陸 又 薛 1 H.

鷕 求 雉 雌 鳴 稱 雌 雊 是也。 日 鷕 雄 故潘 日 雊。 岳 射雉 詩 ジ求 人人人人 牡 稱

> 雉 雕 鷕 以 朝 雊 0 而 徐 爰 引 顔 延 年 語 以 譏

見渭 爲 如此 意,言以有渭 作「謂」爲是。 作「謂 濁 涇 本 以 渭 渭濁」,箋云: 釋 ",故人見謂己濁。」 作謂,後 文》云: 疏 申 笺云: 人改耳。」今玩文義, 故 「涇水以 見渭 先述涇水之 則孔 濁一 有渭 氏 亦 舊 故 以 本

「湜湜其沚」,箋云:「湜湜,持正貌。」

唐皇甫湜字持正

,本此。

大史蘇 説者以爲即神足弟子, 兮》詩「西 蕩蕩乎民無能名焉。」此 前,大法雖未被 焉,不治而 夫子謂 由 方美 扈 不亂,不言 商 多 大 人」所 東 觀 字日 土,然 光 氣 指 而 : 中 而 將 觀 似 自信,不令而 天臺之建,實佛刹 知 周 毋 指 西 祥 司 昭 釋尊言也、簡 方之人有 西 穆 蓋 極化人, 三王 漢明 自行 聖 時 以

宰,抑 語》亦 之濫 方 非素有流傳,豈 合之夫子之言,似乎 之雖斷章,要皆微妙宗指,略見 至此,所謂惟聖知聖乎? 有佛名,傅毅承 及秦火之後,已遭 不能精進,大事 未比户 懷與安,實疚大事。」懷則不 7,非 觴 :神孚冥契在語言文字之表,不 引《西方之書》,如姜氏 三王,卑 誦 習 可 見 耳 故 此 五 能知之乎? 又夫子之荅大 明 所 時 「邶國 帝,藐三皇,獨歸聖於 帝 煨 謂 大法 閒, 燼,然劉 東 一大事因 詩 稍 土之有 便對以天竺之教, 人 有 聞 流 能 向 風 所引書 緣 傳 大 於周 敘 解 思 也。 法 脱 列 慕。 能 世者。 久 仙 姜引 安則 推 日 矣。 ^ 著 尊. 西 : 晉 但

文》引《詩》乃作「泌」,非作「铋」也。《玉海》「直視也,讀如《詩》『泌彼泉水』。」然則《説作鮅,直視也。」案,今《説文》「鮅」字注云:「毖彼泉水」、《釋文》云:「毖、《説文》

云: 又讓入直視之訓 亦云《説文》作 毖,《説 泌矣, 文》作泌。」是宋 也 不 觀 知 吕《 何 人 記 改 本注 引 巡 《釋 爲 疏 郰 文》 0 原

無誤

所引 《記》引此「坭」作「泥」,今考《玉 云: 禰」、《釋文》云: 詩》異同,此字亦从土旁作 字,今本得之。 釋文》别作之字譌 得 坭,地名。」當指詩飲餞之處,則獨 正 其 禰,《 惟《 舛 韓 泉 最 坭。 詩》 多 水 作 又《 海 賴 **>** 坭。 」 飲 吕 廣 録 餞 記 韻 吕 韓 此 于

以前,此詩元作「説釋」,康 説文》「懌」字注 「説懌女美」, 云 鄭 讀 經 懌」爲「 成 典 非 通 破 用 釋」。 釋。 字 也。 是漢 然

■「泌」,原作「必」,據康熙抄本、大全本、《四庫全書》本、

同,鄭 俟 簺 人考。 云 非 説 特 元 懌 據 作 當 釋 :「説 作 釋」矣。 以 説 釋」, 改 懌 則 意 明 當 乎? 是 時 改 經 姑 本 懌 記 · 各 以 不 爲

鄘

南彰 疏。 亦 璣《 陰 贵 有 彼 相 此 鳥 如 鑿 陽」之類,皆訓 流 心德 鼠 又牽合 矣。 鼠 游 孫 矣」、「 》「河 詩》多用 爲 所 魏漢河北縣 《詩》本 詩 相 云 相彼 韓 東 哉 州 以 大鼠 愈 ? 之鼠 鼠 投 相」字, 結 爲 以鼠之貪惡 《,今山 相 有禮 兔」、「 能 視。 一禮 謂 州 人立之説 西平 與 相 鼠 體 如 孫 相 河 州 拱 ·陽府解州 來《示 喻 彼 相 與 東 立」之句, 喻 人 泉 鼠 河 即 之不 水小、「 ~ 魏 有體 兒 無禮之人, 東 平 魏 相 編 陸 相 州 如 鄰 欲 據 相 碩 今河 斯斯 鼠 中 當 陸 相 解 其

> 時,衞 語 帰 目 晉 爲 其 地, 藻 已 地 飾 徙 不 產 贵 河 可 以 南 謂 足 爲 矣, 鄰 興 爲 端端 相 據 ? 在 禮 何 河 鼠 得及之哉 況 北 之 此 稱 非 詩 復 作 文 衞 於 人 有 文 借 公 詩 經

傳 存。 是三 告以善道」,意略 藍、朱變也。」此 染之朱則赤。」丹 后 矣,然丹朱 予之」,其傳曰: 乎 氏、孫氏傳、《韓詩》有 ? 家《詩》説。 充所謂傳,其齊之后 論 充 衡》云 所 慠 解 而 維 與 商 朱、商均已染於唐、虞之化 0 然《魯詩 相符矣。 小 均 譬彼練絲,染之藍則青 憂用老」,爲 敘 虐 詩 一臣 者, 内 》。彼 氏、 毛 子 無 至 外 孫氏 氏 好 傳 惡 姝者子, 傳 伯 之質, 無 善,賢者 及 前 奇放 齊 此文,必 韓之内 外 詩 不 傳 何 流 有 樂 受 今 以

^{●「}衡」,原作「衞」,據康熙抄本、大全本、《四庫全書》本、

其言「鶴鳴九皋、聲聞于天」及「周餘黎民、地、天地祚之、子孫衆多、皆與今《詩》異。首髮早白、解「子孫千億」、爲宣王德順天

 \pm

靡有孑遺」,則與毛、鄭之説同。

衞

矣。 淇之南也。兩人本各天一涯,氓 又誰咎乎? 子,與婦 關隄,即古黄河北岸,氓居在焉, 之,是婦 東南也。 丘 城北,又詘 婦以 水經注 數語 居淇 婦涉淇而送氓至此,又涉淇 輕信被紿,失身匪人,後之見棄, 三,逕頓 西 目成,挈之歸 北 矣。 「淇 丘 城西。」則頓 水東 淇水 家, 東南 詘 而 雖 則河之北 西 流入河,復 以 蚩 丘 轉 異 而實點 在 (鄉客 淇 而 逕 嫁 水 頓

> 乎? 如「且」義長。 發毛義。 名》云: 自濕而乾之物,宜取且乾爲 下章言暵濕,而修在其閒,故毛以將乾爲 疏無解。 又修之本義,謂脯之加薑桂 暵其修矣」,傳云: 案,且者,將然之詞,上章言暵乾 吴棫《韻補》引傳作「日乾」,恐不 「修、縮也。」乾燥 修, 圃 義矣。 縮 且乾也。」孔 也,亦堪助 者。 劉 熙《釋 脯乃 訓

「蓚,苗也」,「苗,蓚也」,《玉篇》「蓧,苗也」,則蓚是草名,非此詩蓚字。又《説文》云蓚」者,彼《釋文》他凋切,郭注皆「未詳」。《釋文》音陽,云「苗,下从由,他六、徒歷二切。《釋文》云:「修,如字。本或作蓚,音《釋文》云:「修,如字。本或作蓚,音

六四三

· 藤。 「 古 · 藤也 」 ,皆祖《 爾雅》 。

也 是草、「菼、鵻 Ŧ 風 傳 兩 也 言 是色。 鵻 而 義 不 同 蓷 鵻

其 者 意 草名,故箋 騅, 釋 菼, 薍」言草名也 赤 亦 如 从鳥旁, 以馬 畜》云 各舉 青」,蓋毳冕服 鵻 語 毳 注云 衣如 色比 即《 鄭 引《釋 爾 苔張逸 从馬旁,物異 色也 「蒼白 菼」,傳「菼,離」言其 草 雅 也 菼 • 草》文以定之,是已。 具 色 釋言》文,但《釋言》字作 雜色,騅。」是《 又謂 是 疏 毛 如縣, 五色, 菼言其青 傳 謂 傳 傳 意 字作 鵻 加 以 但言菼色,未 在青白 鳥 義 鳥 同 鵻 色比 爾 色也 非草 箋 之間。」 雅》之 言 草 也 詳 窭

> 亦僅 然 期 墠 德 也。 篇 不止於三,若不數《邶》、 + 有 桑中》,乃《鄘 |刺 而 加 女同 衞》 會。《 七 刺 好 不待禮 鄭 而 篇,安 忽, 色、《丰 《》之刺 車 説 則三,《 溱 *\ \!\ 婦 洧 得 関 而 人者九 風 · 》刺 有 淫 **>** 相 九 亂 》也 刺 樂記 者, 女 奔 乎? 不 男 淫 如雲》二詩 ·, 惟 篇 行 光 言 風 野 令女 而 《鄘 大行, 至《衞 淫 疏 有蔓草》男女思 女不 今案之, 亦 也 ×, 鷄 言 隨 凡 則賈 詩 鳴 即 雖 五. 鄭 刺 併 説 篇。 殆 東門 疏 刺 淫 數 婦 風 不 所 不 則 其 之 説 然 舉 不

門, 門,六見。 É 四 日 ^ 見。 倉 左 渠 門, 傳 門, 日 日 閨 南 紀 門, 見。 門 墓 鄭 門, 事 \Box 所 見。 見。 皇 日 言 舊 門 E \Box 城 北 時 北 門 門。 門 門, 見 凡 以 爲 日 見 見 上 師 名 皆 之 + \Box 日 見。 有 鄟 東 梁

鄭

《周禮》賈公彦疏謂「《鄭》説婦人者九

》所爲閔

與?

墠、行 門當國要衝 又有 也。 門焉,子産對 宋、衞、陳、蔡四 後,室家 無 北門之外焉。 悼公以諸侯 於《左傳》,亦惟東門 又伐之,則觀 三三 遠郊門, 由是,其爲鄭之孔道可知,宜乎《詩》之 昭十年, 上之 純 賦 相 皆 八爲市 栗,特假 弃 伐鄭,則 二見。 鄭火,子産辭 兵焉。 晉使,所 日 舉 蓋師旅之屯聚,賓客之往來, 出 或 桔 以 此 廛鱗萃之墟 以 惟 柣之門。 爲端 門者,但 二十四年,楚伐鄭,亦 以 師 東門 齊、宋之師 謂井 則數及之。 重 寓 也 焉。 兩 興 晉 堙木刊,指 見於《 三見。 耳。 見 雖 襄十 公子、公孫 與,故諸 亂 然,除地之 門 至 詩 又 隱 離之象, 焉 五 有 》,意 是年 四 年, 争之 斯 門 外 年 於 晉 此 郭 地 載

> 祖其語 爲 朝 説其顔色美盛,若東方之日。 毛、鄭爲正 也,故李善注《文選》,皆引薛 日」、《秋胡詩》「明豔 詞家佐筆之資,洵美矣,若釋經,自 初出 「東方之日兮」、《韓 以 照屋梁」、《日出 人 詩 詞, 如《神 侔 東南 詩 女賦 朝 日, 薛 隅 語 * 後 君 證之。 行 世 IE. 》「淑 耀 章 襲 乎 文 句 當以 若 然以 此 貌 人 以 白 率 意 耀 爲

日

及今太史所候,晝 之刻相等。 多於夜五刻。 「日出」、「日人」語,遂以 一刻半, 「不能辰夜」,孔疏言《 故論 蓋 惟 日見之前,日 香 馬 夜以 明, 融、王肅 則 香 見 晝多五 明爲 乾象 日 注《 人 、之後 爲限, 限 堯: 刻 故 **>** 以 典 夜 故 來 距 書 書 諸 因 香 漏 Ŧi. 夜 明 有 率 曆

法,又 减 禮 解 夜 不 曆 曆 義 刻 矣。 晝 漏 知 H 目 曆》,鄭 》,所言太史所 Ŧi. 始 法 案, 録》 四 據 自 干, 刻 於何 止 日 正 舉 違 據 獨 以 已 其 出 義 .[曆 其 寒 爲 增之,誠]減 (全數, 成 暑 也。 日 注 畫 爲 候 於 釋, 則 人 以 疏 修 ,其《甲寅 太 Ξ 謂 畫 乃 爲妄説。 裨夜,鄭 又 短 宗 夜 H 商之義,斯 於《尚 言 時, 均 人 無 馬 也。 復 孔 元 注《堯 書 商 王 $\overline{\mathcal{H}}$ 案, 曆 未 一个不 鄭 爲 書 刻 『》乎? 見 劉 作 漏 之 香 誠 典》, 用 洪《 贏 不 麟 其 即 + +, 縮 乾 又 近 可 H 德 昏 此

水又 有 下二句言文 公當人魯境。 公與文姜所 魯道 へ南 載 、《詩》所 逕鉅 驅 簺 會。 姜 平 以 蓋 巾 縣 謂 爲 詩 孔 「魯道 故 汶 案 四 疏 城 水之上,蓋 ? 章 謂 東 皆 有 水 汶 而 北 上二 蕩」也。 經 西 注 尚 南 一句言 是 有 流 魯 都 汶 [襄公, 地 焉 上 城 汶 夾 東 襄

> 都 滔 水 乎 有 滔 ? 文姜臺。 矣。」 然 汶水 則 文 又 姜 西南 臺 者, 流 即 詩 康 》云「 成 所 汶 謂 水

魏

分焉。 也 南 一数 采桑、采 猶籍田之親 后 以 妃 共 而 祀,《 賮 采 荇 耕,公桑之親 雖 魏 夫 風》儉 日 躬 人 親 而 而 非 采 非 繅 蘇, 禮 必 云 身 或 故 爾 執 君 美、 但 其 圃 刺 役 采

秦

韋 觀《釋文》云: 小 戎 * 虎 韔 韔 敕 交 報 亮反。 報 下 同 字 皆 則 从

字从韋作報,不 今本 無誤矣。《 韻 會》謂 據。 上字从革作 載,0 下

知

何

華。 者,小天蓼也。三者雖異,功用相仿彿云。 藤天蓼也。 其芽可食。」是也。 果食。」近世李氏《綱目》云: 出信陽、木高一二丈、三月、 謂木蓼爲櫟,椒 本蓼、《本草》謂木天蓼。 五 草木 《唐本》注謂 月采子,子作毬形,似檾麻子,可 疏 食 》釋《秦 療》謂 檄之屬也,其子房生」。 作 又有藤天蓼,小天蓼,共 風》「苞櫟」,言「河 藤 樹 蔓,華白 宋《圖 如 梔子,冬月 四 「其子可爲燭, 月開 經影云 ,子如棗者, 華, 不 内 似柘 藏 今 案, 凋 作 人

獬

定中 古人 水 E 順 時 木 布 見 之 類 必 援 皆 星 是 象 0 而 示 言 期 火 尤 如

> 寒燠發斂之大界。 言「火伏 案,魯梓慎 衞 陳 以 馬,房、心也。 中 雩 祭 名 土 0 星言,心獨 功 復 陳、 建。 武 則 必 季 王伐殷,出 火 春 俟 鄭 而 有 見 火 龍 將 蟄者畢」,是火之伏見,乃一歲 言「火出,於夏 而 見 星 灾。 見 爲 以次言,❸房、心皆大火, 致 則 孛 火也。又火出 蒼 出 用 于 用 師之日,月 龍 用 又房四 火,季秋 大 以 三次, 冰 占 辰 則 , 即 驗, 爲三月」,夫子 星,心三星 火 火 大 在 大 尤不 出 伏 而火陳 火。 火 辰 則 而 實 馬 爽 知 畢 内 當 宋、 火。 賦 其 知 辰

⁰ 據康 **然熙抄** 本、大全本、《四 庫 全

木」,原作「本」, 四庫全書》本改 本 同 據 康 熙 抄 本、 大 全本、

以」,原作「吕」, 全 本 慶 本 同 據 康 熙 抄 本、 大 全本

皆 年 微 觀 忧 大 致 典 Ŧ 月 火 漸 用 爲夏之中 「季夏 小正》傳云: 火 矣 Ó 時 昏 以 明 世 典》 小 秦 而 八之次 \°\ |≪ 孔 0 正 大 歲 布 了,昏 火之昏中 則 正》之大 五月初 疏 差 非 前 丽 晉 豳 舉 谏 此 星 暑 法 據 火 張 也 統 風》詠 目 矣 一,惟 退, 鄭荅 始 中一, 月 舉 趯 則星 昏,大火中」,見《夏 共 「大火者,心也。」後此 ^ 於晉虞 令》 火 暑既 可 仲與 云 要之, 嫲 見 未有 夏、 孫皓語 見 是 知 獨 風 , 火, 易 不韋《月令 商 心, 季 退 指 喜 在 自 夏 以 以 木 火 時 而 流 康 心 夏後者。 而 謂 曉 唐 近 中, 同 IE. 事 火 火」, 星 以 堯 迄 ,趯語 民 成 仲 西 \wedge 9 斯 寒 秦 堯 9 世 五 故 夏 流 未 、》,皆 著 宜 乃 暑乃 月 典 異 及 小正 古 幾 所 將 歲 當 今 在 >中 見《 知 人 爲七 歲 差 殆 統 差 以 周 寒 退 , 耳 Ż Ŧ 鑍 堯 景 名 差 出 則 非 所 水 則

> 見乎? 耳。 大人 蓉 風 怪 較 中 彌 ·, 及 人 焉 同 秦 甚 人星,以 北 ? 時 句, 然農 西 目 渚,芙蓉 又差二十 余 大人者,大辰之 驗 流 合 舊 見夜之淺深,非 人暑 心 於 則 「有 『即 宿 古 己 夜田 夕露 而 四 仲 直 乖 度 席 月 至 作 火 ,火 於 詩 七 矣 西 譌 猶 今, **》**云 月 中 流。 也 以 指 中 遲 考 時 其 房、 冬 氣 至 未 流 明 至 初 諳 大 火 蘭 方 秋 日 與 芷 得 尾 星 而 芙 易 爲 象 秋 香 何

Ŧ 道 ,與毛同, 成 公孫 Ŧ 大美,聲稱 碩膚,德音不瑕」,《 以「瑕」爲遠,與毛異 遠 也。」以「 小 公孫 爾 雅 尝云 爲 成

^{●「}星」。原作「見」。據康熙抄本、大全本、《四庫全章

氏以爲變文協韻,殆不然。

蓋文體

冗長,

莫

歲

歐

陽

王

叔之言,乃《詩》學之最古者,不誤矣。

諏

、謀、度、詢、字各有義,内、外

傳

所載

魯

穆

古人文字簡貴,語

無

虚設,況《皇華》詩

小 雅

鹿 鳴 之 什

阸也。

乎? 據以 劉 之爲義疏者,有全緩、何允、舒瑗、劉軌 語,先儒以爲 而 華白 爲本。 義、然唐世必有存者、文宗或偶 唐文宗述《毛 孔所 劉焯、 ,叢生野中,恐 據,獨 然則文宗所見,其孔 劉 疑。 炫 諸家,而焯、炫 源 詩·鹿鳴》 劉耳,餘家義 案,孔 非 藾 蕭。 氏詩敘言: 〉疏,謂 今孔 爲殊 氏 疏 見之。 【所删 雖 苹 疏 絶 不采 葉 無 今 思、 者 昔 買 此

> 甚 先儒之説爲迂、盡掃 中精義 於宋, 奥旨, 故其 (釋《詩 俱 順 П 》,亦徒取文 而棄之,斯亦經學之一 讀 過,不復尋究,反詆 義 疏 達, 其

大王之世,與商二王不遠,風俗宜 天子位,尚 甲,武丁子也,皆遯 之,則有理也。武丁,商王小乙子也, 所以勸率下民。 國小,地又隘險,而多樹木,或當親自伐木, 長大,是諸侯世子之子耳。 當有興者,其在昌乎?」則 其説,謂《史記 與友生於山巖伐木,爲勤苦之事。 伐木於山,不可 鄭箋以《伐木》爲文王未居位,在農時 亦 且躬 本紀》周 爲 案,鄭説似 謂必 居荒野,溷 小人, 況侯 無 其事矣。 大王 大 遷岐之初,民 無 王 、稽,而 迹民 國 時文王 日 之 相 閒,父居 孔氏 孫 孔 類 一年已 氏 平 我 # 文 ? 申 申 祖

陽止 多 「十月爲 陽 坤 用

六四九

《大戴禮 事。」《 也,一云柔也。《集韻》云: 文亦云: 作「巛」,云: 《天作》箋引《易》「 象坤畫六斷 不見《説文》,而 巛字即卦形,偃之則Ⅲ,立之則 釋文》云: 保傅》篇「坤」字亦作「巛」。 「坤,本又 「巛,本亦作坤。」《易》坤 兩見張 「坤,本亦作 坤 以簡 作 揖《廣 **/**((能 「坤,古作巛, 巛,今字 一巛,困 雅 《平。 釋文》 》,一云順 魂 此字 也。」 · 卦釋 反。 坤

茑、娣,一字四形,見《改併五 《説文》無 (釋文)云: (埤蒼)云: 象弭」,箋云: 「彆」字、《玉篇》作「乴」,卑結、卑 「彆,《説文》方血反,又邊之人 切,義同。 「弓末反 「弭,弓末反彆者。」 戾 一音集 又案,粥、彆、 《廣韻》亦作 也。」案,今 韻

> 之書,非先儒所取信,姑記 在受命之四年矣,皆與毛、鄭 之屬矣。一年而平二寇,在即位之五年,不 語頗近之。但據此,則南仲乃王臣,非文王 所,謂我來矣」,又云「王命南仲, 所書王人會伐之事 昆夷,北備 位五年矣。而《逸周書》敘言文王立,西 之,云: 方」,又云「天子命我,城彼 相合,意南仲以 年》,文王以文丁十二年立,至帝乙三年, 朔方。」此正《出 「帝乙三年,王命 獫狁,則亦爲初年事。 王臣 「車》詩 與? 會西伯出 所 詠 玩詩 以 朔 南 事 備考。 相 方」,則《紀年 仲距 征 也。 左。 云「自天子 ,如《春秋 二書語 又據《紀 昆 《紀年 往城 夷 干 距 在 城 E

緩者,正車敝之狀與?《廣雅》: 「緣緣,「緣,偏緩也。尺善切」,二字音同,然則偏作緣。」案,《説文》「幝,車敝貌。昌善切」,「檀車幝嘽」、《釋文》云: 「幝、《韓詩》

南

一种之名,不見他典,惟《汲冢紀年》有

『檀車張張』,音同。」恐誤。 異。又《玉海》載《釋文》云:「《韓詩》作 《義也。」注「緣」字囚淺、治羨二切,義同而音

書多脱「卜」字,溷作「繇」。
「卜筮偕止,會言近止」,箋云「或卜之,
所立,俱占之,合言於繇爲近。」繇音宙,
或筮之,俱占之,合言於繇爲近。」繇音宙,

然之説。《魚麗》傳「鱧,鯛」,疏云:「徧撿諸《魚麗》郭注合。惟作「鱧,鯇」者,乃孫叔與『靈文峰、鯛各同音,是一魚而異名也,皆豐、鱸、鱸、鯛各同音,是一魚而異名也,皆一曰鱸也。直隴切。」「餜,鱧也。胡瓦切。」 一曰鱸也。直隴切。」「餜,鱧也。胡瓦切。」 一戶鱸也。直隴切。」「餜,鱧也。胡瓦切。」 《魚麗》傳「鱧,鯛」,疏云:「徧撿諸然之説。

南有嘉魚之什

《說文》作「鑑」,云「罩魚者也。竹角切」,重《說文》作「鑑」,云「罩魚者也。竹角切」,重了,豈疑傳誤乎? 然《爾雅》「籗謂之罩」,二音,皆與《説文》異。 且言沈重説籗形非二時傳合,不可易也。捕魚之器,皆與《茂文》作「鑑」,云「罩魚者也。竹魚切」,重來制矣。

不改正此二字,又不載克升語,可異也 曰: 辯其誤。《詩經大全》讓襲《疏義》成書,竟 義,其傳寫之譌乎? 甚美,食乳泉,出於丙穴。」《集傳》用其 鱗」爲「鯽」,又割 《埤雅》云: 「鯉質,鱒鯽肌,出於沔南之丙穴。」改 「嘉魚,鯉質, 取下句「肌」字,不成文 元末朱克升《疏義》已 鱒 鱗, 肌 語 肉

交反。 其誤,故 汕 古止有「樔」字,其「罺」字,則後 切,又初教切」。 文》,云「澤中守草樓」,則非 **罺爲一字,且** 領 罺」字。「罺」見《玉篇》,云「罟也。壯 (會))止載「罺」字,注云「通作 案,樔、罺二字,本爲 或作『翼』,同。」疏引《爾雅》「樔謂 「樔」字不 汕 反以「罺」爲 汕 其「樔」字注 收 樔 韻 也。」《 中。 正矣。 兩 釋 捕魚器矣,而 文》: 義,「樔」見《説 同《説文》, 人所 樔」,合樔、 《正韻》承 益 樔 與? 交 意 之 無 側

篇 文同 風 文》「薄,音博」。 反,徐音扶各反。」與《詩》不同。 相 リリ 薄」、《釋文》「薄」音旁各反,與《書》釋 廣 蓼蕭》箋引《虞 雹 韻》止有 、博二音,俱 蒲各 《虞書》釋文: 書》「外薄 切。 可訓 迫矣。案、《玉 四 又《易》「雷 「薄,蒲 海」,

鞗乃革轡,轡首謂之革,亦謂之靶,革

非是。 末飾 鞗,徒彫 **宧光謂《詩》本作「鋚革」,石經並改爲「鞗」,** 轡首銅 以 金,謂之金厄,亦謂之鉴,凡三 切。 以 周 **鉴,《説文》云:** 切。」 | 鞗、鋚 異物、 「鐵 亦 異 也。 字。 一物矣。 日 趙

音淫。 亦云「冗」不成字,作「沉」者非是 載 其作「沉」者、《 沈載浮」,沈、《説文》从 廣 《韻》以 爲 俗 水 字 冘 ', 徐 聲, 鉉 冘

戎之制 義,然鉤 直有正也。」鞶、《釋文》作「股」,云: 復釋其名義,其於鉤 代陷軍車名,夏 於革路 疏引《巾 今作鞶。」余謂《釋文》作「鉤股」,良 「元戎十乘」,傳引《司馬法》文,備舉 党 膺 車 車縵輪,馬被甲,衡軶之上,盡有 反 》「金路,鉤,樊纓」,以 **鞶帶**,乃車 爲 鉤 衝突之用 車,殷寅 車則云: 制之盡 乎? 車 飾者,不 ,周元戎。 鉤 韓 證鉤 「股, 得 鞶之 以 劍 施 曲 元

戟。 굸 乎? 銄 故 鉤 術 周 爲馬飾。」此説 車之行似之,則 般。 乎? 云曲 直 般,尤爲 有 被 鉤車先 夏后 長 鉤 或 直 甲 況 爲股,其 股 謂 之 有 明 Ē, 忠 與 之名,見《周 車 Œ 馬 確 先 質 寅車先疾,元戎先良。上案、《九章 行 較 巾 之世 一曲一直,皆 正之意,亦 安 鉤 優 孔 形磬 用 曲 於 疏 一,豈 般 金 鉤 又云: 折, 禮 旋,曲 縷之 陷 鞶 即 保氏》注。 ,然不如取 軍 不 工 鉤 方 之 相合也。 直 人 鞶,定 車, 正 有 采 之矩 一而不 正,不 横 反 罽 象 本 闊 文于 之 毛傳 亂 也 必 帶 於 算 作 爲

子》語 盛 以 服 爲名 Ŧ 稱 之美也。 除 其 采芑》次章傳云: 「國家昏亂有忠臣,六親 殭 兇 生於不足,宣王 美。 靖 亂 言 源謂 其 惟 彊美,斯劣矣。」疏引《老 以 此 德 語 承 競 雖勝,然未必毛意。 不 不 亂 「言周室 和 劣弱 有孝子」。 及兵 矣,故詩人 威。 之 申之, 彊 周之 車

> 於路 所恃 侈 體 軍 盛 有諷 事業,而區 伐獫狁及西戎、《大明》末二章言伐紂 在武力斯劣者 矣》詩言伐密、伐崇,《采薇》、《出車》二詩言 因 英如 以 可 稱 壘而克崇,武 臨其 切之思 耳 車 不 車 制 在 命 甲 文、 國,雖 服 此 之多,軍容之盛,豈力不 勝之本,當 區以 乎? 武。 也。 炫 在文德 克有成功, 此 横 王以三 文王 荆 故 見其 於道,元 蠻 毛 不 閉 小醜 爾 以 、彊美, 白 在 門 彊 此。 然威 乘 耳 修 臣 美爲 而 專 德 矜詡之餘,其 詩 宣 已 闢 劣,謂彊 而 紂 王 殫 人述中 服 起 矣。 足哉? 以 故《皇 皆 昆 十八 壯 夷 至 美 或 不 圃

頗 皆作「艾」、《穀梁傳》昭八年。 艾草」,得之。 而字作「芟」,誤矣。 與 此傳同,首句云「艾蘭 車攻》傳「大芟草以 《釋文》魚 吕《記》及《玉 廢 爲防」,元本作「大 以爲 切, 説 田 正合「艾」音 防」,則字當 獵之制,文 海》引此

作「艾」無疑。

奉舉二,而《詩》指其 北與東。 卯主 蓋 六,各以 也。申、子主北方,其情好,行貪狼, 其《齊詩》之説與? 巳、酉主之。 寅、午主之。 午」云: 本於此。 六情者,好、惡、喜、怒、哀、樂 E與西。 東方,其情怒,行 其情樂,行奸邪。併南、西二方而 翼 其 奉自言學《齊詩 行時 其 南方之情,惡也 是以王者吉午、酉也。」然則此 西方之情,喜也; 情哀,行公正, 與方,占風之來,以觀休咎 後世風占有六情之説 一焉。 陰賊 》,其説「吉日 辰、未上方, 戌、丑 惡 喜行寬大, 行亷 主下 貞 庚

鴻雁之什

《鴻雁》鄭箋云。「《書》曰。『天將有

此紀武 孔疏 緯書之説耳。 誑 也。 前歌後舞,格于上天下地,咸曰茷孜無怠。 誓》也,所引二語,與古文「亶聰 孔言「今《泰誓》」,即 民之父母爲務,意同 武 元后作民父母」意相 者爲天下父母,民之得有善政,有 立父母,民之有政有居。」宣王之爲是 大明》七章孔 語。 王將伐紂,民喜其將有安居,是安居爲 宣王之爲是務,言所爲安集萬民,是以 云 : 惟《思文》箋、疏所引赤烏之事 王人商事,深得六 「今《泰誓》文。 疏引其文曰: 仿佛 武 河 Ŧ, 内 師 言天將 非 女子所獻 所 欣戴之情,定非 無 以 「師 義 明作元 爲 趣矣。 安 有 乃 美。」案 居。 立聖 爲《泰 丁,則屬 鼓譟 務 V 重 彼 德

書》直留反,馬、鄭音受。 疏云:「彼注云云:「髩,此古疇字,本或作壽。」孔注《尚《祈父》箋引《書》「若壽圻父」、《釋文》

異矣。 敲、魗。 弱翿。 而 又聲。弓,古文曍也。今曍作疇,貳本从冟, 當改正。 應从鄭作「壽」,疏語得之。 義不合,誤 順 疇反从壽,隸變之譌 壽 復从敬。易,直由切,誆也,从口弓, 萬民之圻父』。 幆、幬。 又案、《説文》醑、醻。 蔔、壽。 也。」案,此文是箋引《尚書》, 玛、璹。 褐、檮。 定本作『若 也,宜疇、壽之互 今監本作「疇 字皆从易省,而 疇。 掲、 與 擣。 自 鄭

傳、箋元作「姜」,後譌爲「羌」與?傳、箋,直云姜戎爲敗,姜、羌字形相似,豈戎戰,實指姜戎也,而字皆作「羌」。 孔疏申羌戎爲敗。」箋引千畝之戰實之,亦言與羌

瓦當之,皆疑而未決,是其制已不存矣。孔室女手執物當之,黄氏以湖州婦人覆黎一《斯干》傳以瓦爲紡甎,朱子以畫中漆

所習見,然則唐世猶有此物。 疏云: 「婦人所用瓦,惟紡甎而已。」殆

其

節南山之什

乎? 疏漏 又明 也。」今《説文》云: 《釋文》云:「桎,之實反。 康成破字,多取音同,則丁履反當是古音, 切。」並無 世之桎鎋。」又引《説文》曰: 也。」疏引《孝經鉤 載陸氏《釋文》,而字書不收,亦屬 「維周之氐」,鄭破「氐」爲桎鎋之「桎」。 又字書「桎」字,止有之實一切。 車鎋之訓, 命決》曰 豈徐 「桎,足械也。之日 氏《韻譜》遺之 又丁履反,礙 「孝道 「桎,車 者,萬

以,鄭音紀。」案,篆文已CD、己DT二字形各不「式夷式己」,《釋文》云:「己,毛音

之。 醉得 引《 同 何 覺 説文》云: 徐 憂 至 鉉《 心 兩 m 韻 以 如 可 平 譜 洒 酲 ? 爲 「病 因 病,故 傳 甚 酒也。 醉 굸: 哉 加 云 隸 覺 病 變之誤 醉 病 語 酒。 酒 mi 疑 覺 日 經 元。」言 此説 酲 學 醒 一。」疏 巾 既 即 得

不出 多無禄之民 屋?」民之望 有 代 ,烏始不擇屋 德,《 桀、紂之世,有 詩 也 湯、文急矣。 誰謂 耐 湯、 天道古今不變哉? 止 焉。 瞻 文, 鳥 而厲、幽之末, 三代而後,所 迄暴秦 爰 止 而 于 湯、 誰 之 文 图 以

」,殆未必

然。

我居今之世,亦甚 也,爲此 人改也。」孔 里,居也。」《釋文》云: 一憂也。 悠悠我 而病 里, 疏云: 小亦 里,亦孔 居 甚 困 也。 用 病爲異。」吕《記》云 「病矣。 毛 之痗」,毛云: 痗, 以 「里,本或 病 爲 鄭 悠 也。」鄭 以 悠乎 爲悠悠乎 作 瘦,後 云 可 「悠 憂

義同 字當作「瘦」,此未必然。 則 訓 詩 不應 義與 也。」 作傳 病 者妄增耳。 云 董 里」字訓 里,居」與毛異,合之呂《記》、邢 里」也,「 同 鏁 止訓「里」字。 因 氏 傳 邢 集 箋文「居也」以實之耳。 複 時 増増 雖 日 里,病 注 總 同者,例 疏引「悠悠我里」爲證, 出矣。孔述 字 元 人「痗」字以當之,見「里」字 里 觀 亦甚 本亦 爲「瘦」也。 病 同 9 《伯兮》「心 諸 之。 顧 也。」 不 説,方 困 誤。 野 不 訓居,明甚。 俗儒怪 病」,指 ·重訓, 今毛 王 中 作 又吕《記 閒 知 毛云「爲此 海」,傳 ,毛果云「里,居」, 以 瘇 傳 \sim 孔 居 爾 里 毛義 病 文有 也 義 ^ 雅 海 注、 海」三 爾 已有 由 非 源 而 爲 × 誤 毛作 雅 也, 病 疏 師授,不專 云里、瘦 謂 而 疏諸 也 里」字常 釋 病」, 字 傳 以 則 又 蓋 .傳時 瘦, 無 言 本誤 乃 文 凡 故 當 毛 瘇 當 此 昧 傳 指 鄭 篓 病 毛 鄭 爲

據《爾雅》改爲「痩」,容有之、《釋文》所云良據經文,且古字多通用,當借「里」耳。後儒

是也。

私服也。 案,暬,从執 必非善本,反執其誤字以爲 之,以爲《楚語》作「褻」,意瑾所見《國 暬御之箴」。 曾我暬御」,朱《傳》引《國語》「居寢有 「暬御」正取狎習之義。 日 《國語》止此「暬」字耳 7, 狎習 相 慢也。褻,从衣執, Ē, 可嗤 劉瑾 語》, 己。 辨

文作「笮」爲長。文》:「迮,迮迮,起也。」「笮,迫也。」則箋文》云:「迮,迮迮,起也。」「笮,迫也。」則箋文》云:「迮,本又作笮,側格反。」案,《説了孔棘且殆」,箋:「甚急迮且危。」《釋

寢也。 繹」,不知何篇文。 奕奕」,《周禮·隸僕》注 巧言》云「奕奕寢廟」、《閟宫》云「新 天子之廟, 惟 又云: 祧 無 引《詩》「寢 寢。 <u>万</u> 寝,五 繹繹,相 廟 廟 連 之 繹 廟

貌。前曰廟,後曰寢。」

椎也。 疏姑據「擣」字本訓 無「擣」字,而「疛」 「擣」字特借耳,疏 燽、疛皆从疒,毛、韓直以爲心疾之名,則 申之,言如有物之擣心,又引《説文》「擣,手 擣,或作濤。 怒焉如擣」,毛云: 一日築也」語證之。 《韓詩》作疛,除又反,義同。」 訓 語恐非毛旨。 釋之,亦非無見。 小 腹痛,與心疾 「擣,心疾也。」孔 案,《釋文》云: 但《説文》 不合。

《巷伯》詩敘云:「《巷伯》,刺幽王也。

衍文矣。 伯 不 奄官。 中爲近」,是箋文「内小臣」解 人也,不應云「寺人,内小臣」,下文云奄官, 士四人,内小臣而謂之巷伯者,以此官於 此四字矣。又申箋,謂「巷伯内官,用 伯,奄官」,言奄人爲此官也」,則知敘 脱「巷伯奄官」四字,箋「巷伯」下、「内小臣」 及巷伯,故以名篇。」案,敘「故作是詩 人之官相近。 寺人傷於讒 上衍「奄官寺人」四字。 王后之命,於宫中爲近,故謂之巷伯 「巷伯」字,而篇名《巷伯》,故敘解之曰 |奄官||移入箋,而箋内「巷伯」不應複出 ,内小臣也」,而 應上文先出 寺人,内小 此其誤,殆 故 讒人譖寺人,寺人又傷其 奄官,則知箋文直當云「巷 作 中間 臣 是 因傳寫者誤將敘內「巷 詩 也。 「奄官寺人」四字 也 疏申敘,謂「經 奄官上士 窭 巷伯,非解寺 云: 四四 也下 [人,掌 與與 巷伯 奄 末 『巷 宫 脱 F. 無 將

> 語,皆 非孔 遂 至箋之解巷伯者,移以 本將此注爲敘文」,而吕《記》、嚴《緝》載敘 伯奄官」四字,於理爲 改爲「寺人」也。 疏無由 無此四字,則近本之敘,不爲 正其失矣。 疏 是」。 又謂 解 寺人,其誤最 定定 《釋文》亦 本 敘 内 誤 言「官 無 甚, 也。 巷

也。 義,「摍」字爲正矣。 文》云「縮,又作摍」, 一曰蹴也。」「摍,蹴引也。」皆所六切。 巷伯》傳: 「蒸盡,縮 案、《説文》: 疏 云「摍 屋而繼之。』《 謂 抽 也」,論文 縮 亂 釋

谷風之什

水清。《説文》無「冽」字,止有「洌」字,訓貌。」今《説文》無「冽」字,止有「洌」字,訓

《大東》箋「闓置官司」、《釋文》云:

《玉篇》、《廣 音義 闓 圆, 圛 音開,字亦作開。《齊風 同 矣。 」、《釋文》「闓」亦音 韻》同。 案、《説文》: 又曰「亦音開」,其義則 開 「闦,苦亥 則 ・載 闓 開 驅 〈切。」 》箋 字

甫田之什

同《釋文》。

也。」以 字,玩文義,定是《詩》疏之誤。 耐。 不同。 引《漢 葉以上,稍 傳 》皆引此文,誤亦與疏同,惟 風與旱」。 |字作「壝」,「盛」字作「成」,又脱 附 或耘 書·食貨記》,以釋雝本之義,而文 案、《漢書》言后稷畎田之法、「苗生 苗 槈壠草,因隤 根。 或籽」,傳云: 疏引此,「苗生葉」脱「生」字, 比 盛 暑,壠 其 土 「秄,雠本 盡 ,師古曰: 而 王伯厚《玉 吕《記》、朱 根 深,能音 也 多 疏

海》引此與《漢書》合。

龍見 又耘 之盛也。 也。 所言樂器十有九焉,《詩》止及其三,不得謂 在,何獨舉其一也? 矣,然大雩之祭,徧及 得總社、方於雩也。 也。 云: 大雩之祭,以上帝爲尊、《詩》不應 大雩帝,用盛樂。」以《詩》合之,絕不相符。 帝,神農以配 仲夏大雩當之,謂祭五精帝,必配 氏《名物疏》、何氏《古義》二書 耔 而 《甫 且社、方與零各一祭,祭亦不同時,不 Щ 一仲 雩,當以建巳之月,不以 正 川百源,將雩 田》次章、社、方、 一仲夏 彼徒見《詩》言祈 夏,命 赤熛怒 時, 有 因 司 田祖是神農,固 而 爲此説耳。 爲 也,此謬 大雩用盛樂,《月令》 五 先 民祈 精帝 田 祈也,非社 雨與 祖 祀 則 矣。 欲以《月令》 仲夏。《月 大雩相合, 山 不知古人 五 《月令》 川 人帝 爲炎帝 反略之 以五人 近 一、非方 百源 世 咸 馮

妄。 耨之勤 令》不 祈穀 乎? 以 也 言,則引《月令》注「元辰,吉亥始耕之祭」 章「千倉納庾,萬箱載稼」,亦與耘 指 若身遇而 祈穀之祭,祭上帝,而配以后稷,不祭神 證矣,始耕之祭在祈穀祭後,非 之矣,不言祈穀也。 失,何足用 仲夏。 起 ,此與經「田祖」之文顯 言 雨 下稷黍之文耳,非專言祈雨也 而 雨 以 韋 馮 」皆是。 ,如《信南 譏之,不已過乎? 御 又以 之 此言祈報之至,義各有取 如執 目觀者, 田 爲 書 祈 祖 此詩述春祈之祭,因 據乎? 「耘耔」二字以槩全詩, 未 」,鄭引《周 穀 心 山》之「霡霂」、《大田》之 非 專咏一時事 合 孔申鄭「郊後始耕」之 祈 ^ 古 雨, 詩》本傷今思古, 禮 不 ^ 禮 譏古注 相合,馮 詩 康 • 》咏 也。 成 一事也。 籥 注 章》文 一,豈可 及甘 農 疏 上言 招籽同 誤誤指 不 己 事 必 規 則 則 往 ায় 農 且 爲 因 譜 時 皆 耕 非 爲 尤 末 其

> 槩之哉? 此 故特辯之。 考據頗確,然亦 語 遂合 近 書 方、社、 有 多妄説,不足置 此 田 無稽之語、恐誤後學、 祖 爲 祭 辯 而 惟 以 馮 祈 疏 ায়

从邑。 誤。」今監 詩 車》、《大田》、《韓 祁。 傳 異。 》皆誤作「祈」。 《詩》中 今監本注疏《大田》誤作「祈」,與五 嚴《緝》云: 其《玄鳥》 本已誤 六「祁祁 矣, 奕》、《玄鳥》是也,右旁 詩「祁 「監 惟 《采蘇 本 朱 祁 作祁,俗本作 傳 ×, < 則 \approx 吕《記 七月》、《出 嚴 緝 》、朱 》作 祈 皆

珕 珌 諸 琫 而 鞞琫 侯 珕 璗 珌。 ·有珌」, 琫 而 案,定本、《集 璆 傳云: 一班,大 夫 「天子 鐐 傳》 琫 而 玉 如 鏐珌 此 琫 而 , 釋 士 珧

^{■「}執」、原作「報」、據康熙抄本、大全本、《四庫全書》本

珕。 物而七名焉。 之美者。與鐐白金。 然玉、璆皆玉也,璗、金之美者,與玉同色。 遺之乎? 又案,傳言琫珌之物,爲名凡七, 據所聞也。又疏引《說文》云: 珧珌」,則士亦異物,餘與今本毛傳同,蓋各 本,則琫珌同物者,惟士耳。又案,《説文》 異物、大夫、士則同、尊卑之差也」。 而不及於蜃。」故天子用蜃,珧,屬甲也。 士用 亦載此文,惟不言大夫耳,其云「士珕 文》同,而孔疏稍異,諸侯「璆珌」作「鏐珌」, 大夫「鏐珌」作「鐐 今《説文》無「不及於蜃」句,豈《韻譜 皆金也,珧、珕皆蜃也,三 珌」,云「天子、諸侯 「珕,蜃屬, 鏐黄金 如今 琫 琫 而 珌

「大侯張,而弓矢亦張」之上。本箋文必有脱落,在「君侯謂之大侯」以下,賓射名正之義,而孔疏申箋,論之甚詳。今賓射名正之義,而孔疏申箋,論之甚詳。今

用箋語,亦作「爵女」。 矣,不知二字之倒,始於何時也。 飲」釋之,其引《鄉射》文,又當較 達爲疏時箋文已作「爵女」,則不應以「求不 求不飲也。」又引《射義》辭爵語證之。 女養病之爵。」又云: 「我以此求女爵,謂 者,傳寫之譌耳。孔申鄭云: 鄭箋本不是解,「爵女」當作「女爵」,文倒 以辭爵之優,所見良是。 谷辯之,謂求勝以爵不勝,不如《射義》求中 矢之時,各心競云: 求勝以爵不勝者,意本鄭箋。箋云: 「發彼有的,以祈爾爵」,蘇氏釋此,謂 我以此求爵女。」嚴華 然嘗求之孔疏, 「以求不飲 論 朱《傳》全 其同異 使仲 知

魚藻之什

赤芾在股」,箋云:「芾,大古蔽前之

正之。 作 亦 蔽前謂之襜」,注云「今蔽鄰」,《采緑》毛 不忘古,則當爲 知 何云象哉? 敝 象。」今本 敝 云 「膝」, 前 鄭「蔽前」之稱,當本此。 後知 惟 作 吕《記》引箋作 敝 孔 蔽 後,重 疏 「蔽前」明矣。 黎, 申箋,以爲大古衣皮,先 世用之,何 膝 一其先蔽者,故存之,示 俗。 「蔽前」,得 殆 俗 又《爾雅》「衣 今諸本 儒 云大古, 妄 改 據 ·俱 耳 傳 以 誤

以 淇澳旁生如草,其草澀礪 不 語 陸《疏》以釋《采緑》,則尤誤,又其 「草也 緑 緑竹爲 相 、《爾 與今本《草 同,故 采 其莖葉似竹,青緑 緑》之「緑」, 一草,孔 雅》所謂 録 之以 木疏》及《衞 疏已辯其誤,嚴《緝》復 王芻,與 備考。 即《 色, 高數尺。 (竹各 衞 可以洗攪笏及盤 風》 嚴 風 引《 Æ . 義 草。 所引。疏 淇 疏 所 澳》之 引 陸 日 各 璣

> 年而 紀》謂 之年,童妾感漦妖 其初生,當在宣王三十六年也。 詩 枕 葉寸寸有節。」此所言物色,與陸《疏》迥異。 嚴殆誤也。 所無,況既云「草也」,又云「如草」,義有礙 竹。」自「如 本草》,●云: 疏 利 宣王立,立三十六年 引《帝 幽 國語》記 於 王三年嬖褒姒,時 刀 錯 草」至「木賊」二十三字,皆今本 王世 案,木賊草始見於宋嘉祐《補注 俗俗 龍漦之妖,固 「苗長尺許,每根一幹,無 紀》合之,尤 呼爲 時 方七歲,歷 木 賊,彼 前 褒姒 己 妖子生, 爲 異矣,《白 土人謂 足異。 年 共 厲 十四, 則 和 王 流 之 褒 + 《世 緑 姒 是既 推 四

之在母腹,凡五十年,其母生子時,

五

+

^{■ 「}色」,原作「巳」,據康熙抄本、大全本、《四庫全書》

^{■ 「}始」,原作「殆」,據康熙抄本、大全本、《四庫全書》本

既笄 不同者。 十餘年,與之相似。 老子之稱。妖子夜啼,猶然嬰童耳,斯又其 妖物之生,固 六歲矣。又童妾十五歲而笄,爲共和九年, 而孕 即即 雖然,使褒姒生而白首,豈能 自孕 異於人乎? 後計之,亦四十二年 但老聃生而白首,故 老聃在母腹 亦七 致 矣, 騆

禮講 行者。 想見古人之田家樂矣。 德行道 黨之官,歲時 瓠葉》首章箋云: 道 古之學者且 其農 藝。」豈 藝,故畎畝之夫,皆通經術,習禮儀。 功 月吉,必屬 漢 畢,乃爲 |耕且養,三年而通一藝,族 世猶 「此君子,指庶人有賢 有 酒漿, 民讀 此 風 乎? 法飲 以合朋 酒 觀此可 友,習 一考其

如 「勞」字,鄭訓 漸 朝」字,鄭、王、孫皆釋爲 漸之石》首章、《 遼闊 與與 釋 毛不 文》 最 朝 同 1;則音 多 見,則 遺 脱 亦

「勞如字」而已。讀爲潮,兩字俱應有音反,今《釋文》止云

作「遑」,定是傳寫之譌 暇,而後儒宗之,文最明順。 云: 今諸本俱誤。又案,王 則見《釋詁》,況以訓 也。」並無「皇,王」之文。若「皇、王,君也」, 爲「正」字無疑。又《釋言》云: 舒,使朝於王。」下兩章又云「不能正之」,則 字,今皆誤作「王」。箋又云:「不能正 「不皇 「皇,正也,《釋言》文。」箋、疏 朝 矣」,箋云: 此「皇」字,文義 肅述毛,訓「皇」爲 皇,正 今《集傳》經文 「皇、匡,正 兩正 也。」疏 乖矣, 荆

Ш

之禍

改耳。 《韻會》云:「輚,更是昧者據經字而字本注疏「棧」字皆从木,不从車,黄所見是字法从車。」然則經與注,字各别也。 《韻會》云:「輚,通作棧。《詩》『有棧

大雅

文王之什

法也。 《雲漢》之七、八章、《烝民》之首、二章、《江 漢》之五、六章、《瞻卬》之三、四章,皆此章 章、《假樂》之三、四章、《桑柔》之二、三章, 武》、《既醉》二詩亦然。《下武》惟三、四章 詩》祖此。 如貫 不接,而餘章皆相連矣。 二章、《皇矣》之七、八章、《生民》之五、六 珠,近世王元美謂 《文王》篇自次 源謂《大雅》多有此章法,《下 章 以下,章法 曹子建《贈 他若《棫樸》之首、 首 白 尾 相 馬 Ŧ 承

八句,四章六句,五章八句。吕《記》、朱《大明》詩八章,毛、鄭次章六句,三章

間也,不知改自何時。 八句,五章六句,取其與首尾兩章六、八相《傳》、嚴《緝》皆次章八句,三章六句,四章

槩耳,在當時行之,必更有變通。 生女者多 源 以 姜爲王后 不獨摯任爲仲女而已,見於《春秋》者,紀季 出,更有餘,或以備他國之媵,皆未可知也。 者或嫡夫人所出,俱嫁爲嫡,而娣姪取 寡不齊,不足者或取同姓國女爲娣姪,有餘 源謂漢儒之言亦不謬,但所言者,特禮之大 前皆然,與此詩不合,《通義》疑之,良是矣。 女,漢儒謂禮惟嫁長女,餘俱爲媵,自殷 人,皆非長也。 三姊妹,嫁衞、邢、譚三國,皆爲夫人,亦不 又因 女弟隨 《詩》言「摯仲氏任」,是大任,乃摯國 此竊數古人風俗,有不若今人之美 嫁 ,魯叔姬 也 ,則當時之有變通,可知 見於《衞·碩人》詩者,齊女 爲 齊夫人,季姬 爲 鄫 諸 夫 庶 以 次

見於世 所顧 夫世 耶? 大叔 之文誦習既久,漸深入乎人心,各生其愧 恬不知怪,何今人之反勝古耶 無賴 之子 國夫人往往淫泆 以爲辱。 女,故姑、姊、娣、姪 有 有素乎? 忌 越 後世天下定於一統,無常貴常富之家, 其家,皆有土有民,怙侈縱欲 子所不忍爲,而當 ,齊人之於衞公子頑者。 而烝其母,如魯人之於施 男女之 又不 家右 禮之事,人即 也 待之既卑,亦不甚繩 僅 族 況 别 此 ,甚有奪 愧 最 也,古者諸侯 不制, 恥 其 内 一人爲妻,餘皆爲 以 大者, 生,所 Ŧ 日名邦 人之妻 而 法 通室易内之事, 議 古 得於聖人之教 世 以節 ? 卿 以 其後,宜其有 氏,孔圉之於 此今日市井 人 其 大夫爲之, 予人, 彊 尊 豈非洙泗 或 ,有自來 行 男 一,卿 ",故列 妾, 而 不 大 恥 人 時 卑

俔天之妹」,毛訓「俔」爲**譬、**《韓詩》

疏 **臂爲磬**,豈 俔」作「磬」,孔 ,則唐世方言猶然矣。 可以 疏 今人文義求 言俗 語 譬 喻爲 之乎? 磬作 觀 孔 以

乘。 並 耳,不以傳爲破字也。《釋文》所述箋語,今 之縮」,誤「繩」爲「乘」耳,此訓 繩直也,與經文「繩」字何 後人遂誤改經文。」今案,傳引《釋器》「繩 乘,聲之誤,當爲 無之,此 「其繩則直」、《釋文》云: 案,經作繩,傳作乘,箋云 不 口 解 繩。」是言後 涉 ? 傳破之乘字 人傳寫之譌 縮版」,不訓 「繩,本 又 鄭 箋 云 ·或作

見矣。 以 疏云: 内有寢 内有寢門,一曰路門」,中 路 寢 迺立 門也。」疏又云: 「《文王世子》曰 在 路 皋門」章,箋云「内有 門之内,故係 : 寢門, 閒 而 _ 至 脱 名之。」 於寢門。」是 去 路門」,當作 四字。 日 路 則 觀

从水 也。 形、《棫樸》爲 之稱、《小弁》爲萑葦之衆、《采菽》爲 「淠」本 水畀聲,匹制 淠 淠 彼涇 第 觀《 字 作 聲, 亦 韻 舟」,諸 水 引《 簿 會》「淠」字注引此三詩、《正 名。 兀 切。」《詩》三借其字,皆 角行 一、《説 (棫樸 》詩, 掛 本 切。」《玉篇 説 · 俱 之貌, 文》 文》云: 作「渒 云: 則誤 同 此 ***** 則傳 「水 尚未久。 出 簿」字又作 淠」字。 汝 在 寫之譌 旂 爲 南 一丹陽。 動 貌 韻 至 之 狀 从

且黄 字於義 流鬯也」,是後人所加。」正 也。』《釋文》云: (集注)皆云『黄 一君意 金以爲勺,不僅 黄 易 IF. 流 、曉,則 相 在 反。 中 俗本 金 余 傳云: 所 謂 飾 無 以 本作『 無 也 『飾』字者誤。」陸、孔 飾 飾 流 義 黄 黄 鬯 云 一字簡 也」,有「飾」 金 金 所 所 「定本及 而 以 以 當矣, 爲 流 飾 幽

> 惟 多矣,賴 之爲「夏」者,未 五 年, 即 皇 此 一矣》首 有古注 須夏之子 以 推 章 可可 疏得知其萬一 審 ·, 孔 見 何 孫」, 本皆作「暇」,莫知 疏 後 時 引《 世 所 注 書 五. 改, 云 經文字竄易 耳。 豈 多 唐 方》 夏 明之 日 之 原 # 文 天

言。 與 不達 雖有 與? 四 之既亡也,叛周者有四 暇。」今世《尚書》諸 而知之。 其 論 國 君,天下 是或一見也 天命,亦是民之先覺 須 馬 聖人受命,不能 家國 # 疑 ,吾讀《皇矣》詩 矣。 見傳。 周 興亡之際, 忠臣 -明君 將 文王 周之將興也,不忘殷者,亦 叛殷,故 所以 也 之 一,伐 伐 禁人故 有啟 .國焉,吾讀《破斧》詩 距。 M 密 之 知之。 者 商之役 不 也 義 密、 主之 也」。 義。」 土 管 所 須之君, 見箋。 與 叔 疏 思 吁! 痛 引皇 諫 心 疏 日 甫 也 雖 有 殷 可 云 謐

集傳》經文多譌 脱 ,其六字爲 晦 翁 自

改,既論之於《稽疑》中矣。至《皇矣》篇「以改,既論之於《稽疑》中矣。至《皇矣》篇「以改經字,安知此詩「于」字,非京,然觀「假樂」之讀爲「為」、皆彊詩義以后。然觀「假樂」之爲「何以恤我」,皆彊詩義以同假以溢我」之爲「何以恤我」,皆彊詩義以以為子),改「降」為「海」,所表「一次人為」之爲「與人之讀別人。 以為子」,以為於《稽疑》中矣。至《皇矣》篇「以改,既論之於《稽疑》中矣。至《皇矣》篇「以改。

「鼓鐘」,又喻何物乎? 見於樂,箋有明解,若託鼓爲喻,則「虡業」、其似何樂,以爲靈異也。況此二章言靈德也,此謬矣。麀鹿、白鳥,但言其得所,不言也,此謬矣。麀鹿、白鳥,但言其得所,不言應更,故詩人託言,以爲靈德之應,非實鼓

生民之什

《程民》第五章二「種」字,以文義論之、《程民》第五章二「種」字,以文義論之、《程文》止有支勇一反、●推其故、定是「種」字上脱一「實」字。案、《釋文》、云。「種,支字上脱一「實」字。案、《釋文》、云。「種,支字上脱一「實」字。案、《釋文》、一種,支字、則傳寫之漏也。然其誤已久、嚴質。」字,則傳寫之漏也。然其誤已久、嚴質。」字,則傳寫之漏也。然其誤已久、嚴學、後上聲、一種」字與云上聲,此承其誤而不覺。是《記》音反皆遵《釋文》,獨此二「種」字缺,則疑之也。惟朱《傳》二「種」字前去學、後上聲,卻與古暗合。

· 「有」,原作「支」,據康熙抄本、大全本、《四庫全書》本

0

宋本《釋文》確有「實」字。

玉 正當 擠。」《廣韻》云: 也。」《釋文》云: 泲」,借也。「泲」本水名,今借用「濟」。 一篇》 「湑」義。箋及《周 洒 「霽,子禮切。 既 湑 「手搦酒 「沸,字 箋 云 禮》、《禮記》注皆作 又作霽, 手出其汁,亦作 也。」然則 湑 酒 同。」案, 之 「霽」字 沸 者

用 Щ 謂 國之所處 之 度 疏 一西,吕《記》、朱《傳》皆从之,嚴《緝 IlI 義 度其夕陽」,孔 西之地,以 ,●考其地,當在梁 廣 豳人之居,不知又是 申鄭,以爲 Ш 之 總 西。 言豳 蘇氏 人 何

从石 又作 公孫 唤反。」案,破,今《説文》作「碬 一般」字。 破。 碬字子石。 二徐鉉 段古雅切,借也。 取鍛」、《釋文》云: 《説文》: 破从段徒玩切,从殳端省聲。 聲。 『碫,厲石。』《字林》大 《春秋 音乎加切,外 「鍛,丁亂反。 傳》曰: 「属 音鍛 石 並 也。 「鄭 無 本

> 唐 徐反 同,《 唐以 器》云: 切 載,云: 似 从 玩反。」顧,梁人,曹,隨人,礪 如此,當必有一誤矣。 破」, , 確恰、轄、軋 ,書者易殺,須視音 段音遐,音形 初已然。 (,則當: 釋文》當 前《説文》元作 而「碬」字注,則《玉篇》别有義,可 砚, 「礱、碫,礪 時必有遐音, 不 三音。 都 誤 俱 亂 異 也。 碬 反。 也。」曹憲注 高 切 又案、《玉篇 但 但《釋文》别 可 下 礪 爲 一段、段 故 見段、段 也 辨。 石 二書音 石皆是)° |≪ 也 陸、 廣 字 碬 溷寫,在 雅 徐 徒 筆 切 兩 破 碫 下 亂 與 字 不 書 爲 陸 見 非 都 釋 加 並 同 相

也。 以其 ^ 卷阿》敘 人能 堅 孔 正 疏 引《 然後可 説 文》云 以爲人臣,故字 賢 堅

^{● 「}一」,原作「二」,據康熙抄本、大全本、《四庫全書》本

臤聲。」與疏所引異。 从臣。」今《説文》云:「賢,多才也。从貝,

祈、機二音俱可讀。 又音機。案,訓微者,當讀機音, 訓近者,「幾,音祈。」《易》井卦注,《釋文》「幾」音祈,《民勞》箋: 「汔,幾也。」《釋文》:

蕩 之 什

文,以 疏中箋 象。』《小宰》: 時未告也。 本箋文缺「即正 和,布政 而以歲時告施之,即正歲縣之象魏也」。 訏 疏 3謂「既 於邦國都鄙 謨定命,遠 合之,當云「大謀定 ^ 周 云謀定,而 正 禮 歲 縣之象魏 大宰》: 歲,觀治象。」正月,周之 猶辰告」,鄭箋 也,爲天下遠 别云時告,則 也」八 命,謂 「正月、縣治 字。 圖 當 正 庶 有 謀定 月 案, 事, 始 闕

也」。今缺「正歲」一證,則文義不全矣。月始布政教,以『辰告』即正歲縣之象魏不同,與謀定、時告相合,故以『定命』爲正正月,正歲,夏之正月,是再縣之也。二時正月,正歲,夏之正月,是再縣之也。二時

之乎? 謂承順之也。」則康成讀本「靡」當作是。」案,鄭箋云。 「天下之民有不承順「萬民靡不承」、《釋文》云。「靡,一本

「痱」。 也。 隱之處。」《釋文》云: 意矣。又厞字从厂,不从广。厂,呼旱切 沈云『許慎凡非反』。」今《説文》: 魚儉切,音各異。 从厂非聲。扶沸切。」徐氏此切,非 屋漏」,箋云: 「設饌於西北隅 今本注疏誤从广作 「厞,扶味 反, 隱 而 也 許 厞

儒譏之。然《釋文》言所見鄭本,此章「稼「好是稼穡」,鄭解爲居家吝嗇之人,後

時,齊、魯、韓《詩》具存,彼或别有據矣。 穡」皆作「家嗇」,則元非改字也。鄭箋《詩》

明扶 異。 順 不陷 以 爲人君不用賢,無知妄行之意,與箋、疏 ,往以中垢。」闇行也。」斯義亦勝矣。 井 闇 外傳云: 征以中垢」、《韓詩》「征」作「往」,外 7奔,則 『,則歸 其 其 「以 幸 人。 也。 明 兩 扶 《詩》云: 瞽相 明, 扶,不傷牆木, 則昇於天。 「惟彼 不 以 傳

井牧優矣。 爲二 傳》「牧隰 者、《周禮·小司徒》「井牧其田野」注引《左 當作「收」。 文,乃破字,不當用音反。 釋文》: 一牧而當 徹申 皋、井衍沃」襄二十五年文。 伯 「牧,手又反。 井收見《易》井卦,●然牧、收 一井,是也。 土田 □,箋云: 又如字。」案,井牧 若手又反,則「牧」 且論箋文義,則 「正其井牧。」 釋之,以 異

「顯父餞之」,呂《記》引鄭箋云:「顯

臣餞送 卿」; 「公卿」,嚴後於吕,其所見本應誤 本之誤,信矣。 父,周之卿士也。」今本 孔 ,惟卿士,故知 疏 則 作 「卿士」,云: 又嚴《緝》引箋及總注皆作 顯父周之卿 鄭 箞 諸 卿 侯反 士」作「公 士。」則 國 一, 王 今

儒尚 見收,幸有某氏 本定有之,不知何時逸「荒」字,而諸家俱不 禮》『野荒』,必是 || 周 云: (詩》,本據《爾 ·荒」字耳,其諸家《爾 禮》: 得知之耳。 「荒, 我居圉卒荒」,箋云: 野荒民 虚」,《釋 雅 解 :》爲 獨怪邢 虚 散則削之。」惟某氏 僅存 説 之義 雅》 討 》 則 景作《爾 於孔氏《詩 元荒 也。」 則 文。 無之。 荒 ,虚」之文,古 案, 虚 某 雅 康成 氏 Œ 》疏,後 也 要《 。」疏 義 本 日 周 有 篓

^{●「}收」,原作「牧」,嘉慶本同,據康熙抄本、大全本、《四

人經學,遠不逮漢、唐也。竟不載孔疏某氏語,以補經文之缺,方信宋

文》切 譌乎? 切,亦起於近本耳。 麻之有子者、、豳風》「叔苴」當從其音,非此 苴音茶,獨得其正。至朱《傳》七如反,則是 旻》詩「如 士加切,因引《詩》「棲苴」證之,蓋用此《釋 士加反,意監本誤「加」爲「如」,●呂《記》誤 録》載其説。 「楂」同鋤加反,其見六魚韻子余切者,又云 「苴」也。其「七」字,豈又《釋文》「士」字之 加」爲「始」,皆因字形之相近也。 直、士如反」,吕氏《詩記》士始反,槎音當 苴字有十四音,義各不同。 也。 案、《韻會》六麻韻「苴」字與 訓爲 彼 可知宋本《釋文》不誤,吕、朱誤 (棲 苴) 水中浮艸者、當讀 是也。 今監本《釋文》 楊用修《丹鉛 如 嚴《緝 槎、《召 「茶」、

頌

2

頌

周

子和之者也,駮難之文,備於《通義》矣。 康、昭以後尚有頌者,此歐陽之臆説,而 武》及《酒誥》之「成王」、《何彼襛矣》之「平 中往往有此,皆非舉諡爲言。《昊天有成 憲」,謂申伯也,「文武維翰」,謂 王」也。 命》及《噫嘻》兩頌,皆言「成王」,正猶《下 「不顯成康」,「自彼成康 《思文》疏引《説文》云: 「文武吉甫」,謂吉 以三《頌》所稱 爲兩王之諡,因謂 」,謂武 甫也; 「麰,周所受 王也。 文王 「文武是 《詩》 也, 朱

● 宋本《釋文》作「苴、七加反」。

之形。 其「 曰 : 來牟 也。」案, 「來,周 麰 也 所受瑞麥來 詒 天 字 今《説 所 我 注 麥二 來 來 云: 辨。』」 也,故爲 文》 争, 辨。 此 象 來 與 乃 芒 麰,麥也。 疏 一來二缝,象芒束 行來之來。 「來」字, 刺之形。 所引文亦 或从草 注 天 《詩》 小 云 所 異。 來

以 或謂 器,殘害水族,是可 具 恬 縣治有石,鐫曾文清公名幾,字吉甫,南宋人。漁 爲題,有十五。又宋陸游《入蜀記》言「吴江 潛》頌矣,今觀唐皮、日休。 八詩 殺。 不 知 图 ,比《松陵倡和 詩》言捕 罟 怪 吁,罔罟之制,始於包犧之世耳,豈 俗敝 非 作於包犧羲皇,聖人未嘗不教 大覺緣果 民 魚之器,凡十 調 機 集》所 慨 也。 巧 之文,豈 日 載,即 一滋,肆 夫此廣殺物 陸龜 有二,既詳 皮、陸詩。 能 蒙。 爲不仁之 救之哉? 漁 又增 具 之於 命 詩

殺乎?

《繫辭》之意,本贊易 擊鮮 有攸 真 言之耳 要之,洪荒 由 則 始於羲皇時矣。 有火化,民 罔罟,獨見《易·繫辭》 天下事物,總不 則 包 興 以 弧 (歸,故) ()則以 爲 而 犧作之耶 矢 在 食,漁獵之具,此 能 何 既 殺 爲在未鑽火之前。 食鳥獸之肉」,是燧 時 兩書皆夫子之言,而先後不同。 可 畫 人, 事 偏 ? 卦之後; 無無 出 執其 《繋辭》明《易》象之悉備 而 如謂 其 書 殺 範 理 史可稽 人 羲皇作罔罟以 耳, 圍 廣大,八 語,遂謂 時即 亦 《禮運》推禮 者 聖 《禮運 也。 一夫子 應 皇以 立言之旨,各 卦既 有之,併 之教 羲皇之教 》言「古 又包犧 前、民 止 畫 教 制 約 耶 殺 作 所 己 未 則 ? 略 非

頌

《緝》 可曉 來? 增。 音敲。 榦。 當有一「白」字,否則,「曰」當作「白」,必有 脱誤,然諸 毛在骭而白長也。」如疏言,則傳「豪骭」下, 白字,則孔疏 日 無豪骭白之名。 也。 引 況「豪骭日 也。』《釋畜》云: 驔。」孔疏云: 駉 傳皆同, 》篇「有驔有 本注 驔」,亦不成文義,此甚 「豪毛白 疏及吕《記》、朱《傳》、嚴 不 應 傳言『豪骭白者』,謂豪 魚」,毛傳 「《説文》曰: 諸 「四骹皆白,贈。」音 本俱 長」之解,又從 日 譌。 傳既 「骭,骹 豪骭 不 何 無

从竹从代,作「花」。「花」不成字,字書所無 本皆同,不知誤始何時。 其旂茷茂」,茂,从艸从伐,朱《傳》獨 今讀者 ·俱莫

毛詩稽古編卷三十

覺,近世俗下書有《字算》俗作彙。 者, 遂妄造

「花」字收入竹部,可哂已。

其以此與? 案,宋庠《國語補音》云: 云: 「鴨」字。又案,鳧、鴨一類,茆亦名鳧葵,❶ 「今之鄥 薄采其茆」、《釋文》云: 蹗草,堪爲菹,江東有之。」」 「鄥,鳥甲反。」即 「茆,干寶

矣。 亥重修此書爲功不淺,惜未竟其緒耳。 皆詳載鄭《譜》之文,三《頌》則闕焉,始信己 後,皆未經刊定之書也。 依用鄭箋,以萬爲干舞,蓋《公劉》次章以 至《魯頌》之《閟宫》、《商頌》之《那》,仍 東萊於《邶 風》辨萬 又《國風》、二《雅 舞 兼 干 羽,其 見韙

0 「鬼」,原作「鳥」, 嘉慶本改 據康熙抄本、大全本、《四庫全書》本、

商頌

作 義 饌, 甸切。」薦之本訓 本 夢,本又 ·俱同也,●其借爲奉進之義 「農」。 -亦作麋。」案,《 則又敬也。」《釋文》「薦」作 ^ 那》頌「 作 ^ 鄉 薦 執 飲 心。』《襍 事有 酒 爲 廣韻》云: 》「祭薦」,《釋 記》「薦 恪 響 , 所 食 箋 馬」、《 草,是薦、 亦同 Z: 「夢,畜食。作 「蘪」,云: 文》云: 釋文》亦 執 慶音 事 薦

天常」一句 歌,若依《左傳》,則六句皆韻,「陶唐」下多 楚 體,然虞廷《賡歌》三 用韻,惟「天命玄鳥」、「四海來假」、「維 碩 數 人》、《宁》、《猗嗟》、 語 玄鳥》、《長發》、《殷武》三詩, ,又「厥道 不協耳。 二作 今號 「其行」。 一句皆 句 \wedge ^ 句 九 或 間韻 協 罭 風 、《五子》 韻者爲 *\ \!\ 皇皇者 皆 雅 第 句 柏 to 「率彼 如 荆 梁 旬

七言則始於柏梁耳。者,及《商頌》三篇亦然,此體之來古矣,惟華》、《斯干》、《鳧鷖》等篇中,多有連句用韻

問切。 也。 以 圓 人《韻 文作 其誤,而監本經文反用之,不可不急爲改 生譌 讀 爲 又康成讀「隕」爲「圓」,本以音之近,今 順」,誤 故讀圓 府羣 隕 圜 ,學者莫覺。 左从 ,遂併《詩 玉 也。 》有之。 圃 自,本隕墜字,以 訓 均,●諸本皆然,獨監 考字書俱 影「幅 乃字 隕」字亦讀爲園 書 無「幀」字, 示 收 音 ·, 近圓 蓋 本 已 惟 本 正 覺 元 經 Ė

庫全書》本、嘉慶本改。

0

庫全書》本改。

□ 「均」,原作「切」,嘉慶本同,據康熙抄本、大全本、《

四

③ 「乃」,嘉慶本同,康熙抄本、大全本、《四庫全書》本

禹

又云: 後,況當日之民,躬被 之迹」,劉子言 之灾,民 念禹功也。 續禹 之深,併愛其子孫 雅》云: 禹, 也 目 食 除此而 言,惟后稷、公劉、大王、王季、文武 商所言,惟玄王、相土、成湯、中宗、武 之緒。」《 小 一,仲 奕奕 輒 穀,萬世之天下,皆禹 「設都 其 則言之至再至三者,何與? 雅 見之,遂著之於《詩》耳。 . 虺言 尝云 魚 詩人稱述往聖,主於頌 外,雖二帝之聖,不一及焉。 梁 矣,禹 于 商 Щ 禹 續 豐 維 禹之績。」 頌 明 水 復 禹 **》云**: 信 德之遠」,皆在 禹 雖 東 取 其澤者乎? 舊 彼 甸 注 有僻王,猶 服」,周 而置 南 之。」《魯頌》云: 維 皆指 「禹 山 所 之 禹 敷下土方。」 維 公言 再造 平 所 之績。」又 禹 湯祖 目 土 奉爲君 宜 百 甸 1覩,追 不 一,俾 其 千 陟 洪 之。 德。 水 而 德 載 僅 得 禹 後 始 故 孫 泰運也。 不忍 夏之臣 奡 得 不 而 聖相 甚求 叛

耕

田

人舉

獨於

J

王

周

所

云:

大

素所責望其 豫滅德, 者,非聖人不可矣,竟不知此乃萬古一逢之 至桀,暴又加 亦習以爲常也,獨 年,父子祖 歎人心之囿於習俗,不可 義士、洛邑頑民,桀既 即桀之惡,亦非 事,而賢聖之君,又不過絫 恕之也 乘釁 繼、民 民,盡 民乃 又堯、舜皆傳賢,則易姓之事 備 篡 乃 孫 於君,且 君 再 竊 得 甚焉,遂舍而歸湯,不復顧,彼 翻 習見其 不忠不 傳至 至商 者 聖人而爲君者,已百五六十 然 微 甚於紂 刻 禹 思去之矣。 少 大 之 H 一知革 傳子及孫 康 如 義 末 放 康 深, 此 哉? 也 中 造 命之爲大變也 即 而 變也。 ·興 固 ,紂之亡,有西 , 則 帖 黎 彼 不 世 嘗 又十 禹 ,而大康 然 民 傳 以 肎 mj 思其 共 幾 咸 堯、舜、禹 子 以 爲 一見,民 戴 不 貮, 已習 聖人 餘 爲 故 祀矣 商 吾君 傳 又逸 爲 子 彼 羿 而 Ш m 而

各睠念其故主矣。民之歸周,不如戴商之俗,断三代以前之治亂得失,豈知論世心之不同乃爾。後之儒者,乃欲以近今習述,時使之然也。夏與商,僅兩代閒,而人

工部都水司郎中臨川李秉綬刊

學,幼 原也。 改正 所 長 其 有是 脱 倍於前矣,欲求就正之人,不能起 始 好《詩》,吟誦不去口。 粗粗 以 稟 葩 成 ~編 訓 者 此 時 起 詞 通 嫥習之,而 編 世 以以 甲 輟斤息弦之歎,烏能已已。 數十條。 也, 韻 文 寅 《詩》獨 〈義,則 語 質於朱子長 豈 雖然,未敢自 迄 便 偶 丁 於 後以 然哉 疑 今復再易稟,所 連 卯,閱十 之甚。 喉 章累 餘力及它經。 吻, 時童小無知 孺 幅俱淫媟之談 余家 故好 賴 以 調盡善 有 爲 其 四 本世 之 五 指 載, 耳。 改正 長孺 也。 經皆聖 噫 識,徒 摘 爲《易》 顧 ,余之 及 於九 又數 心 得 憶 易 此 稍 以 Y 獨 以 初 稾

説 後儒 釋。 荅, 豈可 真足訓世,不 夏敘,毛公傳,鄭 注疏》者,卷帙頗多,竊闚之,方知《詩》有子 車》、《野 也 誦之,則益喜,恍若披霧見天,始信 人之《詩 適暑月先君子命源暴書,見笥中有《十三經 牀第之言不踰 義本不 人《詩》説 詩》義不如是,告余者決非妄言,但未知 始 如《 深入 之訓 更旁覽 後 爲 如是。」余因 或 風 訓 有 》説乎?」遂 識 釋者 載 告 ? 雨》、《褰裳》、《蘀兮》、《有 蔓草》諸篇皆與 田 餘 在 余 時 不不 媿爲聖作矣,而 ,每持以折衷經義,不 何 經, 閾, 日 時 書 : 氏箋,大喜曰: 僅《詩》 愈歎 必爲 也。 爲 思春秋卿 請 同學 此 此 嘉賓 古 逮又長,將成人矣, 解 也。 書於先君 經 焉 者道之,莫余盒 者 真 所譏。 若從 大夫賦詩 自 從此,先儒 向 面 誤 日 目 一此 子, 耳,《 今解 之疑 爲 詩 汩 可 伏 教 其 女 相贈 没 見 詩 之 於 盡 之 古 古 而 同 則

六七七

後

敘

之共事 就 首 白童 效其 所惑。 義宏深, 管闚 又何怪乎。 焉,然以 右漢 左日抄》等書,並 ımi (詩))敘訟 周易廣義》、《尚 正之無人,故述其顛 前 :與余游處最密,持論又多 一年好《詩》,繼乃 一得, 而左宋者,至如馬貴 其信益堅, 方方 後 語 冤, 又於它書史見 有是編 而《詩》則亦自成一 惟朱子長孺 蠡 語 **輙笑而弗信,學者沈於所** 測,敢 俱明確, 又輔 書埤傳》、《毛詩通義》、《 以示余,共爲 也, 歷 自 贵 以 末,書於卷後 疑 慨 謂 偶 前 前 (與、楊用 甚 而 然 盡 畫 與 然以窮經自任, 畫 本其 得信,以 之同 善善手 哉。 論 余同,故所著 書云。 論定。 經 、先得 修 學, -雖 極 至白 我 因 知 蓋 余 多 口 聞 讀 感 怒 己 余 頗 爲 有

卷,即 書人鈔 副 經 其 出 復携 意於六 氏 請 禾中曹 本, 有 義 乎宋、元以上, ,朝夕披 先 功 此 藏 生所著之《毛詩 憶 得 己醉 書以 經講 謄 之於塾。 於 司農 甲 流 四 子歲,拜 一本,先生 傳於 心,歎爲未 玩,不忍釋 至禾, 始六 義,既得 溶,好古博 浙水,後 義者 稷 且 先生 相 使 念 晤 宋、元 即 稽古 此 漢 手。 不 有,不徒卓識宏旨 於城 於采 聞,搜訪 因 有 書 淺 儒 而 遂 數十 編 識 未 是年 師 Ш 東之存耕堂, 校 付 **%** 者,當不 授洗剔一新 堂 留 正 劂 秋, 種 E 遺書,尤致 此 假 一其誤。 氏 以 書 稷訪 館 繙 請 負 世 與 於 閲 政 先 諸 超 數 無 適 善 葉 遂

稟時, 之,非 先生 爲 不 無傷 者。 而請 則又念讀之者必將驚詫,甚 氏古本,不 其手筆藏於家,子孫 派别,洵 三十,皆先生手自繕寫,字體一遵許、徐、毛 辛巳家居 而 生苦心也。 非 純 一,雖 ",獨 自言校字之難 於義,有 用古字, 計其字體之不 焉,果不惜秘 敢擅 亦皆從俗 欲 非 未 理 丽 ,無以娱 易元· 得 雜 舊 齊、 其後 朝 想先 如 以 「編,且 便於經 魯, 昔 本 タ 俗 書,即甲子所鈔之底本,亦 奔走 生若 日 以 下 本 朝夕、念先生殁 數 溷,古體之可不遵,與 /所成。 不 必世守之,因謁 就 即 變體,點 自便也。 者, + 於 出以 可 在 如 Œ 年 衣 槩以 得,己 此 見 愐 食, 間 相 稷欲悉遵其 本,自著之,自 一有不終卷 親 示, 此,當未必 畫 時 由 猶記 無 校其誤。 卯冬抵家 不苟,音注 歙 下習書 則卷一 不 又數年, 而 先 鹿 諸 燕京 生 而 鹿 弟 故 至 脱 録 夫 輟 記 昆

六七九

趙

敘

手筆 乎? 詞 義,侍先生日 業,爲記其前後所借鈔之帙凡有二: 作書顛末,已見朱長孺序,及先生跋文。先 云崑山得之已; 留禾中,司農殁後,子彦栻登第,書未散,或 生殁於己巳之冬,距今十有三年。 鈔之,自校之,至五六過, ,況今既 爾。 也,藏存耕堂,合四本。 先生父諱志中,志 易手,點勘 少,未得親承指 一即此。其原本二,先生 雖 皆作意,或作 畢 而謬者尚有十之 示,不能 至 其 能 一於詩 稷既 無 其 費 解 疏 記。 藴 卒 漏

康

:熙辛巳夏日,門人趙嘉稷百拜謹識。

又微。 《詩》在漢,有齊、魯、韓、毛四家,後惟《毛 晰? 難, 殘之陋,非 家,王氏伯 必 詩》盛傳,自朱子廢序言《詩》,而毛氏之學 中,其作書旨趣,提要言之詳矣。 伯、毛公同受《詩》於荀 請序於余。 卷,未刊行。 毛盡得,魯盡 綜之不得其當, 則又業經者必不可闕之書也。 吴江陳氏 竊以 過譽 厚謂其閎意眇旨,洗末 龎 爲齊、韓之淵源無攷矣,浮 余按是書采録 長發著《毛詩稽古編》三十 生 也。 失歟? |佑清得其手定稟刊之,而 則莫若專明一 雖然,去古遠則綜 ?卿,而 朱子説《詩》不主 于《 詩旨各殊, 四 其條辯 師 家之不失 庫 余嘗 專己守 全 羣 書》 説 贵 邱 謂 明

> 真也。 敷? 能異 初旨。 且作 氏書也,是爲序。 稟,皆從小篆體,龎生仍之,悉爲讎校焉,懼 特於《毛詩》宜然哉? 能絶去陋與罔之失者歟? 不能專其學,其治經也,非陋則罔。 氏,其專爲毛氏之學者歟? 盡 其同而存其異,博學詳 器、典章、鳥、獸 三家之傳,其佚間見於他書,亦多合焉。 屏其異,此所 也。 詩之時 余喜陳氏書之得傳,又嘉龎生之能傳陳 龎生之於陳氏,洵能志其志,學其學者 漢儒 訓詁别於形聲,衍於假借 世 重 師 謂 可異説 法, 蟲、魚、草、木,毛氏詳 專 明 無 陳氏精六書,是書手定 説之功也。究其 敢 也, 家之學者也 出 嗚 而詩 呼! 不能博與詳,又 入,亦此 之訓 治經者 ,散於服 陳氏,其 就,不 意 矣。 也。 豈 陳 同 究 失

嘉慶十八年夏六月,江蘇督學使者文

寧撰。

序

六八一

六八二

序

乃 義》, 肆 小 臆 君 不達斯旨,曲護《集傳》,元時 不行於世。 台 舊説 一,承 譏 見 爲 鹿 》,始難 時 乃盡 故 漢平帝世、《 評 分用至 亦 因 廢序 洞 之意見,非 者。 與與 訓 不 賦 棄 作 一今,不但 鄭 東 口 譚 朱子作《集傳》,參用 毛、鄭, 箋, 至 經, 箋,而《詩》序、《詩 萊 廢。」蓋朱子作《 仍從古義,又荅 宋 論 毛 周 先 盡 歐 《詩 一廢 詩》始 孚 而 儒 出 陽 序, 駁之不 鄭 本旨· 無 祖 文 漁仲之徒,遂 異 争 而 V 忠公作《 也。 傳 ,改 説。 一於學。 又以《集 集 遺 門 箋 傳 從 餘 輔 人 其 魏 》時 亦 問問 力, 小未 渔 説 廣、 毛 王 高 《傳》取 廢 仲 然作 其 逞 詩 图 本 肅 日 有 密 矣。 瑾 此 用 書 其 本 妄 注 鄭

> 手稿藏 焉 世學者 者崇尚 義 是 書,掊擊尤甚,豈 詩 蕪 或 通 爾雅 0 海 義, ·卷,篇義宗小序,釋經宗毛、鄭,故訓本 初 與陳 義》 同 内 慨 昊 所 ×, 實學,二君 古義 好學 龎 時 雖 不 江 氏 以 字 生 知 元 廣 見 不 於《 體 黼 之士 此 和 搜 桃 云亡, 巵言雜 謀 Œ 惠 書 廷家,今照依 博 陳 詩 自 以 君 氏 采,不及是 始 非 實啟 · 合。 童 惟 ^ 研 説 知 實 子 惠 與 谿著《詩 轉 文》, 事 之。 蓋 定 間 其 求 抄 我 宇徴 * × 出,著《稽 友 是 藏 志 是之學 原 朝 朱 書之 詩 稽 弆 在 本 書 君 長 説 傳 復 悉 惜 占 哌 孺 謹 咸 哉 古 通 古編 心 無 右 稱 同 發 嚴 謂 文,儒 釋 校 之, 刊 治 力 明 精 長 響 本 古 於 近 排 之 核 孺 毛

嘉 慶十 八年 夏 五 月 揚 州 阮 元 序。 古

敏

求之士哉

意

逆志

者

讀

之,

必

廢

然自

反

矣。

龎

生

誠

好

付

之

剞

劂

嘉

惠

藝林

· ; 俾

自

謂

涵

泳

本

文、

以

毛詩稽古編跋

十年。 得見 作 大也。 書遂名顯於天下,天下始知吾邑有通儒 褒之,俾大江 殁于廿八年冬。 載 顯 王司寇蘭泉先生進呈御覽,採 司農見賞 堪 者 而 見 傳 成 凡 《毛詩 正其所晦 ,成後 千 其後門人趙書翁借抄畢 物 則 莫 ·古焉。 雖 而 不 南 必 稽 顯 兩 書 有 之時 猶 北 1 稍顯。 傳之作,晦 載 古編》三十卷,長 然世 顯 晦 略 即 晦 也 識 殁, 書于康熙廿六年 久,則所 之理 無 其 時又元 刊 清童 名, 本, 而 而 顯 而 莫 车 人四庫,而 和 得 宜 書 之 隨先 由 聞 惠 爲 翁 時 顯 漸 顯 徵 閱 聞 顯 浙 必 而 定,長 祖 者 君 水 丽 0 + 遠 不 著 一諱端 其 屢 未 迨 曹 幾 四 而 遽 翁

> 所鈔 壬申 僅以謹成祖 後定本,當悉照此稟,不易一字,夏五郭公, 對 張 清凛祖 祖 敢居其功也 餘年,迄今而始 任其自然,猶行古之道也。 後定本,余欲 太史 ,其中字句,與彼 母之曾祖父手 肄 本, 春 業時,嘗以是 (諱尚 万, 訓 趙 已十餘 求善書人依樣繕 瑗 書 哉 志云爾。 ()康熙 刻 「翁借 無 顯,乃物理之數適 筆 戊辰進士。 年,而 力,後 鈔 也。 編 三本閒 本,及 至是 示 當謹 世 清, 抵 書之鬱積 終 稟 親 費 閲週 有 寫 曰: 謹 未有 異 鈔 祇有二, 君 ,併訪得 寶藏以 本, 同,然既 雲倬。 歲 然,余 一此 刻之者。 而 百 細 雕 此 四十 甲子 爲 家 竢。」 阚 成 係 校 藏 係 曾

學 龎 佑 嘉 清 慶 謹 + 八年 識 歲 次癸酉 季 夏月, 吴江 後

六八三

毛

詩

説

〔清〕 莊存與

校 撰點

装装者華 ************************************	北門····································
毛詩説卷二	
(本)	

泮水	魯頌	載見 二二	鑑	豐年 一	噫嘻····································	烈文 二〇	清廟 一九	周頌 一九	召旻 : 一九	瞻卬 一八	鳧鷖 一七	大雅 一七	何草不黄 一七	漸漸之石 一七	隰桑 一七	采緑 一六	車拳 :	頍弁 一四
大叔于田 二八	叔于田 二七	將仲子 二七	鄭 二七	黍離二七	王	相鼠 二六	鄘二六			- 邶二六	漢廣 二五	兔置 二五	桃夭二五	螽斯 二四	樛木 二四	卷耳 二四	國風周南 二四	毛詩説補卷三 二四

目録	采菽 三一	甫田 三一	巧言 三一	小弁 三一	小菀 三一	小旻 三〇	雨無正 三〇	正月 三〇					小雅 二九		檜二九	權輿 二九	秦	溱洧 二八	丰 二八
111	武 三七	載見 三七	雝 三七	天作 三六	頌 三六	召旻 三六	江漢 三六	桑柔 二 五	抑 三五	板三四	生民 三四	靈臺	皇矣 三四	早麓	大明 三'三	文王 三二	大雅	都人士	角弓 三一

	小毖
五四四三三三三三三三六一一九九八八七七一	三三七七

校點説明

著作。

《毛詩説》四卷,清莊存與撰。

值上書房。《清史稿》有傳。翰林院編修。四十九年(一七八四)擢禮部左侍郎,恬,江蘇武進人。乾隆十年(一七四五)中榜眼,授恬,江蘇武進人。乾隆十年(一七八八),字方耕,號養莊存與(一七一九—一七八八),字方耕,號養

學。 言》等。 文經傳 羊家所謂「微言大義」,不斷斷於文字訓詁。 立清代常州學派。 治學以《公羊春秋》爲本,推崇「研經以求世用」,創 擇,持論平允,有《尚書概見》三卷、《尚書説》一卷。 號爲清代今文經學啟蒙大師,爲學並不排斥古文經 所撰《周官記》、《周官説》、《毛詩説》等,仍主古 存與幼傳閻若璩之學,尤長於《書》,而善於别 之說。 後 人 輯 又有《 其 著 著有《春秋正醉》十二卷,揭橥公 樂説》、《四 述 爲《 味經 書説》、《演算 齋遺書》,皆 存與雖 經學 法約

長短,略下己意。《春秋》及《大學》、《中庸》、《論部》、《孟子》、《孝經》、《爾雅》等經傳之文,評騭諸家比毛傳、鄭箋、孔氏正義、朱氏集傳,次綜引《易》、比毛傳、鄭箋、孔氏正義、朱氏集傳,次綜引《易》、

説附》,録文二篇,一爲《楚茨篇集釋》,一爲《朱子柏

體例與上二卷同,而不避篇什重複。

卷四爲《毛

詩

主要有乾隆五十八年刻六種本、道光間陽湖莊綬甲是書《味經齋遺書》收録。《味經齋遺書》版本

寶研堂刻

十五

種本(其中《毛詩説》刻於道光七年)、

詳細目録,以便閱讀。 光緒市二年)等。《毛詩説》均係同一版刷印。此次光緒十二年)等。《毛詩説》均係同一版刷印。此次於點,以光緒年間重刊《味經齋遺書》本《毛詩説》爲底本。參校一九九七年上海古籍出版社影印原世界底本。參校一九九七年上海古籍出版社影印原世界底本。參校一九九七年上海古籍出版社影印原世界底本。

校點者 陳錦春 徐美珍

£ 詩 説卷

级 賜 樂 進 部 士 大 及 第授 臣 南 書房上 光 禄 大夫禮部 書房 行 走莊 左侍 存 郎 與 譔

或 風 周 南

關

雕

以 美也 守之 不 天 淫 章 也 密 ,深宏其 其 婦 君 也。 后妃敬事君子,惠及 色, 絶未萌之欲 順 子之德,天德 無不 莊 中 敬 和諧。 也 和 樂 美在 也。 小無間 傳謂 也。 其 説 中, 慎守之嚴也,固 此也。 嬪 可 而 人也。 婦 樂 黄裳之德也 之, 以聽 淫,過 順 幽含其 内 以 也。 承

加 非 可 相治外,多士升朝。 以示 得 ൬ 〈易》曰: 恩也 見 者,若關 ,以求 貫 雎 助 之有 也。 别

也

失之也。 惟其賢。 職 哉」,不知其長也。「輾 之」,心志專而神 女」,本之於后 差荇菜,左右 也。 士不惟 「寤寐思服」,無時自釋也。 所 以 妃,言 其能 流之」,内 修 明生 潔百 魚,以宫人寵,无 惟 取 賢妃 也。 轉 物 人 其 反側」,不知其勞也 職 以 協 德。 非 「求之不 治 修 身也。 和 以 内,微 也。 女 啟 神 不 人 寵 得」,如將 不 「寤寐 「悠哉 妾 也。 惟 也,以共 窈 利。」賢 進 其 窕 多 御。 悠 求 淑

曹

禮義之始,在於正容體 始者,男子之教 其德盛則 其 也。 、辭備 婦 、齊顔 德 其義莊 婦 色、 言、 則 順 婦容、 文 辭 而 令。 有 婦 功

文而有體也。 之和,美其言。長言之,備其辭也。言不質,四教者,女子之義也。葛之覃,美其容。鳴

業。 也。 之以立教,是使聖化不如陋俗也。「服之無 言儉之不中禮也。 斁」,言婦 世,而不由禮,其孰從 也,未若合禮之爲愈也。 彼其之子,美無 怒而出其妻。 昔公儀子相 君子善之。 在父母家親葛,正 功 也。 親葛 度。 魯、蓋 以 魏人刺之以徵過,周 爲 美無度,殊異乎公路。」 ,得無譏乎? 而法之? 食禄之家,不與 卿 也。后妃親 將以 也。 之其 教天下、示萬 《魏詩》曰 家,見織 葛,非正 儉,美德 人美 民 争

官 以 於 禮 師 也 用用 ,不違物也。 傅。污之、澣之,儉也,又自潔也。 已習矣,復教之,慎之也。 心一,又有節 歸 寧父母 也。 有 盡 所 雖有美質,成 婦道 澣 有 以 所 以燕 安父 否

> 也。 不忘道 義 母 人内夫家、外父母家,道之極也。 "雖爲天王后, 也 父者,子之天。 婦道 ,義也。 成, 一心 則 猶 父母安矣。 而二善至焉。《春秋》之 夫者,妻之天。 EI : 「吾季姜。」孝之 不忘孝,仁也。 故 則 婦

召 南

羔羊

與行 覆 其學也。 美,有工之巧,得其制度,以宜服之。 何言乎以宜服之? 材之美? 而 察之? 互證之矣,以 見大夫之裘,因 何言乎得 言其 言自 化性 、情與 表 也。 其 言適於事也。何言乎反 至裏 反 制 ,貌核寔之矣,以公與 何言乎工之巧? 覆 度? 無一不美也 耐 察之。 言中乎禮 何言乎 有 以 材 之

私 反 覆 易 焉 地 而 而 未 觀之矣。 嘗異其 解。 「退食自公,委蛇 蓋反覆焉 IIII 委蛇 未 嘗見

邶

其

也

柏舟

覺之而 道之衰,詩人以 君 如 衛 也 何 不 國 臣賢聖相望。 暇憂其身乎? ? 能 家 誦 知,隱 郷 猶 不能以告人,如有隱憂也。然則其 憂當世之無聖人也。 是 · 詩 也 憂 加 爲己憂。 周道尚 也。 奚 論 耿 其 獨 耿 世,宗周天下 先覺焉,有隱 親,命哲不逮也。 而 憂君若民,尚未足 不 寐 商道 乎? 尊賢 猶 憂 憂 是 了,其 也。 也。 也 王 憂

周公之誥曰:「民無或胥譸張爲幻。」小

見無禮於其君,夫安得不愬? 之不幸焉。 父也。兄弟固不足以盡之,仁人往何愬 諸父昆弟,君臣之義厚矣。 人情狀,自古如此,鑒可 日 之子,不臣 不忍見也。 非 也。 言不遇其時而「逢彼之怒」,以爲身 諸父而臣昆弟; 始封之君,不臣諸父昆弟,封君 以茹之。仁人之心, 臣 封君之孫, 彼造怒也,而 事君,猶子 哉 盡 1 事 臣

間 寤 無 呕 矣。仁人不知 世主之所操持 焉,不忍恝也 爲 覯 而 辟, 也。 而受之。 文、武、周公没矣,後聖未 何也? 非禮 一無行 行有不得,反求諸 幾乎? | | | | | 危身保身,未 謬 而 也。 失 率 其 思深乎? 歸 統 于 也, 知 寬 作,悄悄焉 所 以 己。 降 和,是以 適,還自 思 志 非仁, 而 辱 身 憂

景也? 德之不蠲,心之憂也。又以其身之不見其形,願察其景。陰盛陽微,此何

焉。 季子曰:「美哉 思深乎? 受物之汶汶乎? 係 而 淵乎 不飛,有所 1 存 憂而不困者也。」 其 心焉,人 疑 也。 八自遠 延 陵

緑衣

並 持之於未 持之乎? 愛者能持之乎? 天所以禍人國 言 亂 天假其人,其人則安能無已? 曷,何, 之本也。 亂,則猶可及爾。 曷以持之? 持之於未僭上也。 維,持,已,止也。嬖孽之僭, 也。 報以 憂之矣,而亦未嘗不憂其 今亂本成矣,憂豈爲 庶尤,爲世大戒。 古也 有志,内 其已也, 能 寵

之,内官之職,雖賢不進等。夫人命於天子,曰:「至于己斯亡。」人性陵上者也。古人知母 嬖孽之僭,未有不亡者也。《角弓》之詩

情乎? 乎? 降,不過不 以 見於宗廟。 絶嫌疑。 不俾之無說,則俾之說,古人獨 止也。 八妾命於夫人。 夫卑人不可爲主,寵 俾之者,不在 諸 侯 不下漁色, 長國家 人不 示 能自 . 近 者

豈復夭傷萬物之感乎? 以愛,其聲和以柔,得天地之温厚氣焉。夫則自知之矣。夫婦之道,受之以久,其心慈則自知之矣。夫婦之道,受之以久,其心慈

燕燕

然,死者無知則已矣。若其有知,此不才之惟旦暮從先君于地下,尚何勗之與有? 雖矣。豈獨先君之過? 家國之事,一旦至此,

子有大 子 爲之内 ',獨 非 主,罪 願 親 矣。 奉 人蚤 話 二三大夫 言, 伏其辜,庶幾不忝先君之 而 屬 輸 諸 力于公室,君 君 母 者 乎 ? 夫 則 人 之

日 月

命

于濯

溉

也。

愛憎 敗。 胡 忍,爲人父母 善處之。 全之,何其難! 所私於下土 居月諸,照臨 家之不祥,可 能 明 莊 有定? 衛 姜以 諸 人既殺州 昔當比 心 君母 而 也 寧 謂 下土。乃如之人兮,逝不古處 ', 豈不負 不 不我 困 在堂、大義 , 吁于濮, 于是先君之兩子皆 見其際。 序己志 傷 自念骨 矣。 敗之, 顧。」父母之於子,賢愚 (哉? 且情 肉, 陳古以 何 如 一斷,其道 乃作 其易 誠 非 日 所 有 月 剴今,乃不 幾 之照 生,遂若 詩 人? 日 惟古 臨 既 無 窮 日 安 可

> 禍 其 幸 如 敗 心 見矣。後嗣能 之人, 之所安,反古自 如之人,不 于 我 隆 有 禮 夫 有 不不 婦 用 定 之 乎? 而 由 己。 誼 禮。 矣。 而不我 竊 至 自好 於今日 不 聽 顧 者 也 「,則 禮 語 0

也。 定,能有 往 而 定 乖 乎? 其 所 之,不 不 報 我 相 以 好 禮, 也 則 禮 所 達 報 則 分 安

在乎?

復不 之。 終時 平行實俾不可念之,而猶可忘之也 迎善氣乎禍亂之生,則尚可 如之人,將念之,誠不若忘之。 也。 能可之。至於今日,能有定乎? 日居月諸,出 爲人父母,儻猶有 自 東 方」,光輝 止也。 功德 在 乃追 潔 欲 白 忘之, 其生 而念 而 無 漬 有

母 我其二子也。父之親子也,親賢 也,謂莊公也。 之親子也、賢則親之,無 日之盛常 然,月 月, 母 則 也, 彌 莊 闕 能 姜 而 則 自 盡 憐之。 謂 矣。 而 下 也 日,父 無

師 生,不 端,而所以 亦 公子爲 日 者 《何至賢愚胥亡其身,愛憎 傅,父之罪也。 言一 乎? 免乎水火,母之罪也 其 體也。 母 報我 能 數 有定乎? 月之喪, ,曾不一 爲人父母,豈不負哉? 爲人父母,蚤 循其 而 日 以 我 同 道 其 羈 往 致 爲 貫 重 之敗 訊,千條 先 其子之所 成 服 童,不就 王制禮 服 如如 乎 君 萬 今

擊鼓

境之内 境。]又曰: \Box 土 封畛 前 國 土 築城 土 一略,自 封 略 略之内,誰 于漕矣。 也。 1我父 略 以 之 非 内 東 君土?」既 0 爲 國。 及圃 \wedge 田 左 之北 悉四 傳

北門

「出自北門,憂心殷殷」,憂其危且亂也。

則去。 爲 天 艱 惟 國 也。 」,言不得已 士 矣。 無 或 曰「已焉哉」,不人、不居之義 \blacksquare 有 則 斯臣, 亦 而 不 後仕也。 而使不得志以 祭。 終 道合則 窶 冝 去,君 貧, 服 從,不 也。 莫 知 誰 可 我 與

六

則其 污行 罪 謪 適 下 勸 施 我 我 戾而 位 以 惠 不不 獨 卿大夫務困 如如 義,曰:「何 召南大夫布政於外,其家人閔其君子 政 憂 貽 拯 不 不 事 國 患于子孫耳。 慙於妻子乎 而 及 危亂 埤益 也。 隨之,雖竭心力 不 斯違斯? 以 衛之政 我。 事 計 而 ? 家之有 我 忠臣良 必窮之。 事,方命 人 故其詩 莫敢或遑。」布 自外, 以 無 七直道 事 也 將欲 虐 君 日 室 民 適 觀 人交编 而行 足增 王 口 固 可 事 面 在 德 而

^{■ 「}我」。「東」。阮刻本《春秋左傳正義》定公四年作「武」。

以 司寇之禄於孔子,爲粟六萬, 知 「原思爲之宰,與之粟九百。」衛 衛,定、哀之世 一,詔禄 猶 周 典 ൬ 也 況王澤未 《論 靈公致 語

子 乘 舟

竭乎?

仰視。 不 死不可讓,勿能復自愛。一去不復還,終已 留之安可得哉! 中 憐太息 而 故爲歌曰:「二子乘舟,汎汎其景。」瞻望焉, 也。 顧 不可即矣。「願言思子,中心養養」,其愍 , 恬死亡而不聊。 ,俄然至今日矣。 壽既先往,仮復繼之。先後各乘其舟以 二子於此,舍不可舍也,忍不可忍也。 ,氣於邑而 又爲歌曰: 「願言思子,不遐有害」,知 不能止 「二子乘舟,汎 送之者垂淚涕泣 傳曰「言二子之不遠 者,今日 · 猶在 汎其逝。」 ,莫能 吾目

> 之,今人哀。不思之,忽不知思之何自來,在 此三十二言矣。 害」,謂其初 不忍死 ,而終則視 死 如 也。

思

衛

考

實多,而過之已甚也? 謂 于先公以終吾身焉。 不常厥居 其身于在澗、在阿、在陸,亦云寤宿焉爾矣, 也,可歌也。寤則言之、歌之矣。 告人以潔身去位之故也。 ·勿過」,不過先公所好之禮也。「勿告」,不 也 「永矢勿諼」,不忘睿聖武公之德也。 衛自莊公以降,苛暴之政作,至《北 也。 其居 甚 彼爲人子孫,何乃忘之 暫,其誓甚長,求無愧 日寬、 日 邁、 日 高、 日 先公之德禮,可言 賢者獨善 軸 何

寬服 莊 可 醜 或 軸 軸 以 于籧 也。 行。 蓋 濟 mі 邁,不能納之規矩繩 風 1,進也 均。 以爲微,二以爲 禮自 ②刺 公。 持 爲 H 處 必 也 **陰、戚** 一嚴以 其 長 用 中 莊公棄禮 民,是終不可諼之盛 「碩人之寬」,非救 虐 ', 而 末 太 事,文武之士置之樂官,而 今乃 武 即 防,先公好學自 取取 m 八息矣。 流 治己,恕以 公之詩 世之後 輪 施 極 乎? 退 諸車之軸之進 乃 焉。 而 而 不 克運焉。 後 軸今猶在 窮處, ·自愛,實爲 E 顧 己。 僅 久,三以爲 于 墨 匪 不 及 政 得 也。 修 忠臣 旦 散民流之俗, 没 醜 衛之藥石 人,然後 用 如 類惡 身。 ,亦安能 爲 涕 德 碩人之軸」, 也。 有文章 此 不得 諸 教 也。 泗 利。 故 心物,非 子 覆 子 滂 聖 軸 平? 作不 志 衛之將亡, 故曰 曰 孫 一,聽 沱 化 久于斯世 有 故 用 少少 勿 吾 三義 碩 可 實 爲 E ·典,卒 規 渦 不 禍 美 人之 勿 可 能 得 無 虐 諫 也 當 在 É 秉 諼 知 以 mi

> 先公之 也。 告 也 , 碩 亦末 獨 人非 德 如之何 寤 巾 寐 碩 果 宿 無 乎? 矣。 , 愧 於 然則 是 故 先 謂 公, 日 考 無 成 槃 是 爲 也 何 則 樂乎? 所 永 成之 矢 樂 勿

竹

泉 源 非 禮則 之器 不 源。 禮。 : 可 流 紊 遠。 識 短 夫婦 籊 也。 淇 所 相 不見答也,可; 籊 得 男先於女, 相 人,則泉源 竹 水 須 而 竿 女子 流 操持 長。 必 以 有 男下 釣 者乎? 既 在 行 則爲 于淇 遠 左,洪 人 不 女, 以 禮 则 元 所 禮 以 ; 水 惟 弟父母 斯 謂 禮 也, 女先於男, 在 見 豈 禮 則 淇 右 不可 浮 也 近,不 水, 躁 秩 苟 然 不 淺 作 非 其 見 泉 則 以 露

●「寤寐」,阮刻本《毛詩正義》作「寐寤」。

遊 答于 出 源 自 舟 佩 此 右 君 流 有 遊 行 楫 絶 子 玉 ,若夫婦之胖合也。 則何不 得 矣。 ·受我 以 既 與 君 之儺。」爲悦己者容,情之所不能 水,不因乎淇 忘憂乎 爲 子 成 楫 憂 淇 而 則 器 以 可致 厚之, 水, 而 不 行。 矣。 ? 不 成。 乎? 上 出 謂 則不 楫不徒行,得水而行。 松檜,材之美者也。 也; 木 遊, 君子令人憂,淇 得禮以 去 作詩 無 泉 達。 根 其 寧遊 源 而 忘憂 日 · • 女子守禮,不 體 不 以 長, 「巧笑之瑳, 相 也 也 寫 與 水 我 水 以 憂。 相 背 已也。 舟不 禮 爲 源 人 見 泉 謂 如 左 而

芄 蘭

知 童 子 日習 爾 佩 觹 其所 能 佩 不 韘 未 以 習 成 師 平 其爲君也 ? 保 奉之,俾 不 我 知 雖 日 則 則 知 必 云然, 其 知 其 所 未 所 實

> 之盛節 此,專 陳 悸兮。」柔順 不 古 當 以 知 久如 也。 終 芄 不 此, 如 温 蘭 我 習 惠 恭 良, 之義。 公不然何 遜 則 可 又 必 謂 如 日 習 有 此 其 禮 所 容兮遂兮, 者乎? 敬 不 學 - 當習。 親 師 聽 受如 垂 詩

鄭

有女同車

不 絶 正 失國矣 也 忽 能 定,國 於鄭、故於其 忽之過 或 諸侯,名則 人以 人 未 又望. 加 爲 於民 絶矣。 忽也。 何 復 事 歸 圃 而 而 爲 不 稱 春 權 香於 世子。 秋》因 臣 所 齊 逐,其 人情之不 也 世子,名 身之 忽既

山有扶蘇

褧衣。」貴者之服,豈庶人乎?禮》:「姆加景,乃驅,御者代。」故曰:「衣錦辭。若曰女不隨之,故恨予不送焉爾。《昏辭。若曰女不隨之,故恨予不送焉爾。《昏

丰

「悔」,原作「姆」,據阮刻本《毛詩正義》改。

0

毛詩説卷一

小 雅

伐 木

而已。 也。 衆賓皆有籩豆。 也。 簋 有不腆之酒。」」燕以酒爲主也。《大宗伯》: 以飲食之禮,親宗族兄弟。」釃酒,飲也。 ,食也。 兄弟,尚睦也。 肥牡,盛其儀也。 \sim 燕禮 無酒 * 同 酤 「與四、 姓數,異 我」,得時之暇也。 同姓,尚恩也。 諸父、諸舅速兄弟,戒之 方之賓燕,辭 (姓疏。 「陳饋八簋」,上客也。 肥羜,致其味 異姓,尚敬 曰:『寡君 難酤以足 八

白

上也。

徧者。

重言我

者,情

文之盡,不

在下

mi

在

之,湑爲主也。《燕禮》有

膳、有散、旅

酬

無

不

諸侯之士,不貢於王,不見徵於天子, 駒

見白駒在空谷矣,且見其生芻一束矣。不爲 則長守此不仕之志矣。既而遵跡以求焉,則 則 嘉客,爲逍遥也。賢哉,此大夫。 其人不見 也,若之何爲其陪隸臣 侯客,亦未可知也。若將往仕於諸侯之國 不仕,未可知也,「于焉嘉客」,其去而爲諸 未之前聞也。 侯,不可以仕於諸侯。於周不可,則去之魯 不可以仕於王室。天子之大夫,可以適諸 無寧來仕於天子之朝矣。 「于焉讀於虔反。 乎? 誠欲優游 逍遥」,其去而 爾公也、爾侯 事外, 則

其 今朝今夕,信不爲暫 m へ德 滴 遠 如 馬 玉 然後知場苗、場藿何幸爲白 不見其人,樂聞 而 爲永也。 其音。 毋更舍此 駒

正月

家之鎮 得 間 似 所以治 之人,未有不墜命亡氏者。 不可委。苟無其 危,天無明 則視天若闇; 以 哉 是 不貮其 圖 ? 而 中 柄臣。 也。 萬世 林賞 非。 上相 闇 有柔 不因 八命,實 而 蕩 上將 也。 謂之山也,其陵遲,蓋甚卑矣。 民安, 不 爲 M 亂 嘉 人"孰戡之乎? 藪 賢 殃慶以類至,天因 無必 也。 建 幽 峻茂之材焉,乃今瞻之, 則視 立之,而暴蔑之,賤人 人宅之,民之望也,國 ,維是薪蒸矣。 焉。 夫豈有所愛憎 天益 廢興存亡,上帝 慶 不 明。 自古主亂 可 侍 人 民 民殆, 0 有安 於其 圃 殃 定

> 位 民望、鎮國家,此何可得而冒之乎? 分不能及一,徒恃一人之寵靈尊任 險劣嵬瑣之人,流 一,其岡 乎? 其陵乎? 俗 所 甚 度 輕 其 藉 畢 大 生 一、欲以 權 行業 假 塞 萬 高

小弁

己也。如之何而有親其父母之道?「何辜於天」,求之天也。「我罪伊何」,責之天者,人之始也。父母者,人之本也。

大東

退。」曾幾何 匡以生,東夏委輸不至,「牂羊墳首,三星在 ^ 春秋傳》曰 時,禍 -亂 譬如 興,饑 火 饉 焉 降 ,火中, ,西人不能 寒暑乃

■「侍」,疑當作「待」或「恃」。

者。 周 道 之尊者。 以 咸 喉舌也,於人爲百揆納言之任。 舌,好言、莠言出焉。 長 坤 是 困 罶」之章作矣。 之隕 也。 有 加 其 俪 庚,太白也,大司馬之位 ,爲地紀天之章也。 畢爲 グ漿? 其 潸 不懷也。 成王、周公實深念之,其若末孫 名而 也。 焉出 河鼓謂之牽牛,天將軍也。 邊兵,爲天 來者日以厚,往者日以亡,諸 無 涕 琄琄 其 然則困東人,乃西人所 質。 上章告東國之病,下章憂宗 刺刺 八子奮 北斗自乾攜巽,爲天 詩人日 織女,貴女也,爲六宫 素食也。 也,主六師 武 周將 衛者。 雲漢自 官非其人, 亡矣,顧 箕 之在 啟明、 ,何不 爲 艮 以 侯 自 綱 周 内 П 抵 由

瞻彼洛矣

一章曰「君子至止,福禄如茨」,言賞善

仁,足 鞸 未嘗 其所 也。 甚博 黜 也行罰甚簡,而君子固有所不忍。 行賞也。以天下之大,而比户皆可 世世子孫慈孝相承,而 安人以自安,不危人以求安,故能保 君子至止,福禄 鞐 殷 封建五等,以惠及臣庶,而 有行陳銜枚之事。 ,伐管、蔡,踐奄,滅 儲大矣。 有 以與之。 圃 珌」,言其再至,則有武備 天下後世莫見其. 又曰「靺韐 爲天下若一 既同」,至是,則 禍亂不 二章日 淮 僭。 有奭,以作六師」, 夷, 家,慮萬年若 明,足以 作 四 蕃育其子孫, 也。 盡 君子 征 而 終也行賞 封 去罰 不 不 其家室, 矣。 \equiv 用 庭,而 見之。 至 章 而 也。 止 始 車

裳裳者華

日

也。

昔吕望釣渭陽之濱,文王載與俱歸,立

會朝 既遠 臣 禄 亦 其 爲 文采、禮節 子 及 得 大 大 事 ,隆替不常,然猶 孫恩澤之數 其 進見從容,有以自效,是以 臣 師 不棄絶 一、將 子 遂 孫也 有餘 相 王 皆有 天 也。 雖 下。 ~,亦續 守文之君,上下之際,緣 握 無以大慰天下之心,而 故 手之歡。 得 舊 創 衣食租税,具约 而 業之君 不廢。 下 功 成 至 開 洎乎 士庶 行 1 文 見 駟 苗 前 誠 功 以 裔 飾

鴛鴦

中 動 以 自 口 ', 不 飾 於 Ш 極 喜怒、 此 Ш 滋 E 見 一者享海内之奉,目 味, 至 其 而 於草木昆 (形,不 致哀樂,有禮有樂,有兵有刑 人 四支極安佚。 物物 群 聞 蟲 生之存亡繫焉。 其聲, ,莫不一 視備色, 自 而意 公侯 制其命。 喻 至於 色授,奔 耳 聽 深宫 庶 備 凡 走 之 幾 所

> 費者 年,福禄宜之。」蓋信乎其宜之也。 故其詩曰:「鴛鴦 函覆萬 之時,用之節,如天道之信。 人,不敢私 王者之富貴, 及,而矜全既其實,鬼神猶將 之,位加 亂於淵,含生之類,莫盡其氣。 震 於百物,以養 上失其道也。夫以匹 力逋,而 動 至多,一人之身,所以自養者 恒 萬億億,不能 尊,取 弗能勝也。 及 意 四 生送 巍巍 損 荒 加多,苟能 益 萬 于飛,畢之羅之。 死 以以 里 如 鳥亂於上,獸 盡 前 此 之外。 一夫編户之民,皆得專 覬悦于上。 其 數: 不謂之過。 圃 心惻 小小 共 降之以 圃 而 福 於勢 察其所以 御 公卿 物必 禄 者 亂於野, 天下 則 福,而 如之矣。 分分之 至 以其仁 等而 君子萬 逮于庶 一察,取 尠 所 取 況 由 魚 殫 勞

類 弁

諸公之仰君子,若服之有弁矣。弁伊何

之治 兄弟 選擇 贵 若 人情親 身,王 乎? 至 既 此 明知之 體親 異本而相 也,吾兄弟也。若以爲異姓,不後于群臣 生、枝同榮者乎? 也。 封象 能回 異人乎? 非 卑賤 王室 寒 至 焉,不已隘 ,則君子之爲也。 爲 亦云 心 親 矣、欲常常 爾,不可必得。 日 君子若舜,尚 骨肉之心。 元 附, 者之所能主也。 近,近以 既卑,而 降施,遂賜顔色,實在君子。昔舜 首,居尊覆下 期乎? 而 均吾兄弟也。 甥 則 舅 有 乎 彌親。 ? 次 而 同 同 「實維在首」也。 侵冤之傷,抱增積之痛。 是故宗 其菀枯者焉。 何悲思愁恨之不釋乎 焉,扶之者衆也 見之,其 黨 姓失序,必至之勢也。 奕奕然, 憂無已時 豊 異 ,則弁之爲 無 疏日遠,遠以 縱有願 不善,三族 族 均吾兄弟,而又 人乎? 斯 先落 以爲 見之 矧其 也 則 人 匪 同 、輔之。 心,神 愈 倫 刻 公從 根 姓 他 位 疏 矣, 也。 轢 ? 之 同 尊

> 之集 非 不 卒以哀君子之昏而 忘欲見,能説懌乎? 而 臣,義無 미 又以酒樂乎? 雨雪乎? 誰爲爲之? 得見也。 也。 可 周之將亡,無 每共生者,抑社 今夕尚可,若異 不若也。 臧乎? 愚 必自小人矣,則 智皆知之,血 稷宗 見固 維 廟 宴 無 日 或 益 加 何? 不 已矣, Щ 矧又 脉之 食, 不

車牽

悟,國 易亡,亦庶乎安且 不望若先后之德,君可以 不 成。 牽 可興矣,天下豈復 急禮誼 不設,則 如 車 食飲矣。 喜 不 焉。 行。 有如 生易 賢 日 女 褒姒 夕 死, 不 來 者乎? 至 會 國可 則 則 君 以 君 縱 口

而求焉,寧遂無其人乎? 好德不厭,固忠臣賢女之産名族,若文雉之集茂林也。往

之上 一願也

速。」 藥以亡其身乎? 幸 史伯 m 有 舍是,雖 言 曰:「毒之酋腊者,其 無令德,不猶愈于甘 殺 也滋 盡

何足備言? 我心寫兮」,要在一二人而已,萬事之是非, 湑兮」,國有其民,民懷其德矣。 陟彼高岡,析其柞薪。 析其 「鮮我 作薪 ,其葉 覯 爾

爾新 六轡均,則 侯,吾臣也,心易服。 如 (琴」,文、武之德法易遵,道法易守也。 昏,以慰 高山仰止,景行行止。 若不哀,乃哀也。 四牡 我心」,能如是乎? 臧。 六官正 暴民 ,吾畜也,俗易化。 一則萬 四牡 或 騑騑,六轡 和。 奚 暇 强 思 覯

采 緑

舊?

緑,王芻,柔且麗者。 露未晞而采之,自

> 不盈 日 沐」,非無爲之主者也 而循之,不飾則不敢見其所尊貴。「薄言 至 食時, 一匊,殆將棄之矣。 匊之矣。 匊 「予髪曲 之盈, 無 局」, 所 可 孰 用 歸 視

良妾? 往釣乎? 子不 當夕也。 日不詹」,則不詹矣。夫六日,非妾御之所敢 「五日爲期」,自諸侯以下,御者皆如是。 往 藍 狩 可 襜以收之,「不盈 乎? 不獲進御于之子矣,誠 以染,青固勝之。 綸之繩」,不害也 「報 其弓」,無 襜 信有 傷 也。 絶望矣。 未 貴 忍棄 妻, 之子不 豈 六六 也 之 無

作歌, 然,觀 之? 美者,鲂也。 及之爲言貫之也。 聖人所録,妾之不得進御于君子者也 者見 其 釣 其然 維 薄者, 鱮 何? 能 無 維 怨。 也。 魴 及鱮」,志在 釣者 于今之不然 **魴必攜之,**鱮豈 不知 其 ", 怨 曠 得 然 魚。 舍 而

「既見君子」,諫行言聽,膏澤下于民。

湯,咸有一德」之爲孔膠也,此則樂之實也。未若傅説相武丁「啟乃心,沃朕心」、「尹躬暨公之于管仲,子皮之于子産,可謂有德音,猶曰:「云胡不樂!」誠不憚乎反覆之也。桓曰、「云胡不樂!」誠不憚乎反覆之也。桓有不可,至于十反而後從宜。若有不樂,言傳會誠不易得,長言之曰:「其樂如何!」事際會誠不易得,長言之曰:「其樂如何!」事

漸漸之石

出矣」,死者過半矣,殆不見敵而盡乎?「不朝乎? 死亡相枕藉,何暇及旦矣?「不遑欺。蔿敖爲宰,尚克修之。將不知所備,則數。蔿敖爲宰,尚克修之。將不知所備,則

毛詩說卷二

之數,「不已于行」,曾不均之「息偃在牀」遑他矣」,奔命之書狎至矣。他事日生,厪存

者乎?

何草不黄

耶 ? 無人不行,而 見棧車之行周道,邈然望而 徒步之師,非人之路也。 狐乎? 此 征夫彌苦焉。 不可 出 ,即矣。 兕 或 耶? 未遠,猶 固 虎 知

大 雅

鳧

志。嘗思之,姑陳吾所思乎詩之謂,其謂大「鳧鷖在涇」,何謂也? 曰:遠哉,詩之

一七

八

福也。 公尸 不正 也。 不離 忘之,不幾于敗者 鄙 平 也,聚散焉 m 也 心 君 來 易 子之 狎之,不幾 德 其 夫民之繫於君子,非 以 所 也,在之爲言生且 溺 且 燕 其 懷之,民莫不懷; 民 主,德也。 來 爾 而 性不溺,是故 也 不知 ,浮沉焉 寧。」言民 於溢 民 所 乎? 志 议 浮 者乎? 爾。 靡 自 沉 歸之志, 詩日 定, 濟 長焉 先 而 涇也,沙與 也。 教 一世矣。若家之 不 王 不 若包之有魚 :「鳧鷖在涇, 以 失 ,匪有囿之者 畜 常常 鳧鷖之爲 正之,民莫 其 ൬ 民 所 所性,教 依 神降之 聚 八渚也 散 其 而 禽 丽 有

瞻 卬

常 也 教 日 也 相 誨 與 世 畔 ,先聖王之大訓 前 反之,而 無 所 還 忌 以 曲 爲 「顧之 子 孫

> 變甚 亦不 乎? 誨 崇、 婦言是用,則 亂階厲, 心 是 而不 惟 速也 得齊于人數矣。 抑 嬖 長,陰傅之羽翼 忍 猶 果 佞 于逆婦寺之請謁,亂果生 在 傾 刑 「惟婦言是 其 其 餘 國寧 城 人 也。 之 復 詩言其 辟 陽 夫 有公卿 用」者 違 擅 忍 之威 漸 于棄先 是 乎? 有 大 尊 福 因 夫 是 乎 王之 是以 而 人 自 奉、 哉 主 婦 其 流 人 教 降 而 是

尾,而 端 通 婦寺則知迫窮之,惟意 人也,殺越之,●于貨 而 于天, 豈 膠加 人之戴 誣 罔 ,始之者在此,竟之者在彼,陰相 日 之實,固千夫所 其 不 (上,亦 極乎? 惟 而 所擬 日 然其羃繫甚完,蠱 已矣。 八共見 ,則降之災, 君 也。 **忮害善變** 實 生我。」 罪 Ë 其 上 媚 首 多 鞫 耐

● 「之」,阮刻本《尚書正義》作「人」。「殺越人于貨」作

氣讀。

不及。 地 刺 徒 殺 多煽 伊 、民 者,名 ,旁午交馳 胡胡 物之事 揣 噫嘻 爲 則 位 慝 稱 且 固 多 爲 也。 乎? 寡 之 君 而 婦 子 耳 解 日 亂 也。 也 丽 進 不 獄 小人 休其蠶 不 可 滋 豈誠 亂有 衰。 豐 解 猶 有社 財 掩 將 織 汲 象 乎? 不 貨 耻 汲 也 稷、宗 之,而 口 E 顧 流 掩 景 膠 廟、天 惟 戾 爲 官 而 恐 之 乖 人 日

召旻

權非 天子之朝,公卿凡 至,僅得斯 爲衆小人之所食。 二人,落然猶 一二數。 見 禍 亂? 陵 雖 則 天 人,猶望其 小 尚 在 時 人能空人之國 將 或 也。 幾位 姑 家 縱天意未 存之。 向 亦 或持 世世 奚 所 設 獨 一禄凡 危而 乃 之 多 口 復 要 慮 而 幾 口 定 有 族,誠 ? 地 地 ¥ 傾 而 非 陋 當 幸 也 顛 見 未 嵬 覆 見 不 偪 瑣 易 既 夫 遽

> 者,竟 之人,容 之所能塞乎 粺] 之空人國 椓」之召災, 休,突決 無 棟 頭 人而 焚 過 而 也。 而 身 不 7,交相 後 不 能 夫 止 · 悟。 不 所 歎 詩 妨 慮 天 占,鐘 息 人 者 禍 既 痛 方酷 豈 傷 恨 復依 鳴 于 必必 蟊 漏 賊 彼 使 棋 盡 救之 疏 流 而 彘 斯 不

周頌

清廟

公攝 相 皇 王某,成王名。孝 始 祖 0 以 主鬯 周公率 次 文王。」不 顯 相 嗣 何 王 稱 諸 爲 顯 稱 乎 侯 主祭也 顯 相 孝子,不 ? 祀文王 相 某,周 日 其 周 祝 於洛邑,歌 敢禰 《大宗伯 公 公名。 辭 也 蓋 先 日 用 君 成 此爲《 薦 攝 也 Ŧ 孝 某 位 在 則不 事 孫 稱 豐, 頌 干 嗣 顯

惟以 宗廟 助 競 百世 何 子,乃所謂 于升歌《清 若 其 周 所 稱 敢 公作洛邑,立文王爲王者祖 以 以以 祭 人 ? 云 用 存 體 祀武 ",始祖 不遷。 易諸 ',則 世世以 明 秬 「顯 者 此 昭 守 . 鬯二卣,「禋于文王、武 等 辭 所 雖 巡相 二不 王之時,雖日 周 王也。 衰 文之 得 E 及親廟皆不更立 公固若存矣。 廟》。 **企** 固 此祀文王 而 相 武王立之豐,不再立之于鎬 雎 清廟,文王 ·改也,常若周公之存。 著服 乎? 聰 君 ,必所祭者之子若孫 一禮》有 以爲祀武王、成王、康王 明聖知達天德者」也,其 惟文王 躋 事其上之義,況天子乎? 諸受命 ^ 王道微缺,不如是大壞 一,禴、祠、烝、嘗皆歌之, 士禮》且 顯 一廟也。 相 爲君父,周公爲 德音之謂樂,莫盛 與子,皆 于洛 王之列, 廟, 王」是也 爲王者大祖 不 武王爲王者 邑。 並 稱 矣,豈凡 稱 若 《洛誥 事文王 衆子, 哀 是 一,安 《執 班 周 V 臣 皆

> 及將毁 不然矣 焉。 甚 也 然則 丽 A. 周 議 後 必不然矣! 公固 不遷,又不 周 之祖宗 不若李斯 廟, 過 ----初 文世 申 在 屠 遞 室 遷 嘉 六武 之昭 乎? 世 室

烈文

侯莫不 之,「前 周公也。告于神明,不直 辟公,周公也。 法則 王不忘」,周公成之,而 周 公。 成王 成王 即 而 初服,當此 政 矯 於諸 後不 乎? - 忘矣。 侯 天 頌 助 下 者 諸 惟

噫 嘻

之爲言親之也 王 帝命之,嗟歎之而 事者,皆以 思后稷播 農 百穀,至于文、武 事 作, 率 也 時 曰「噫 農夫 Ŧ 德 二,躬 既 嘻 昭 成 爲 耕 王。 假 天下 帝 于 主,上 籍 天 成 先 此 爾

平而 也。 比法 如此者 天下農也。 駿發爾 此 治 天成,乃可祈 盛德之形容乎? ,是謂 人,其 私 ,終三十里」,甸 地平。 (鄉遂 播 厥 也。 有 百穀」,因時 「亦服 如 此 民 和 者,是謂民 爾 法治 而 耕,十千維 年豐,乃 地 地之宜 其 和 溥 미 耦 原 也 祈 地 有

豐年

乎? 矣。 祀而 天子之元祀,等而下之,以至大夫、士。 命,而後人爲之曰:「惟此元祀,郊祀禘 且所以爲酒醴也。 廪,萬億及秭」,三千里之内,穀數陳 黍稌之數寡于稷,多至如 穀若此,豈天 害于耒耜 车, 上帝之賜也。 者,扞 所許哉 獨言酒醴,何也? 而 多 盡去之,后稷之教 ? 黍多 言之,得 此,此豐年矣, 稌,亦 於 天降 祀。」 苟非 帝 無 有 庭 訒 高

> 皆。 至也。 也。 故 羞 凶 日 耆 、賓、嘉焉。 秋冬報也,季秋大享帝之登歌也 頌聖人,而告成功,必讓善於天,曰降 「烝界祖 惟 此之謂 君 庶 福。 民 妣」,庶 以 酒 則 無一夫不獲焉,此之謂孔 孝 醴 養 士百君子,克羞 治之,小大由之,和之 厥 父母 百 禮 一饋食, 有 古

噩

王發 之列 前 子牲事也。 贊玉幣爵之事,玉 享肆祀,以 相維辟公」,叔旦也。「天子穆穆」,孝子 知之曰:「其在昌乎?」 周人以 了,序事 也。 武王禘文王爲 「於薦 安武 以辨賢,則 假 廣 哉 王 八牡,相 几、玉 也。 皇 太祖,周公之德不 一考,綏 王之相 文王 予肆 爵皆贊之。 予孝子」,文王 爲 也。 祀, 周大祖,大王 諱 贊 叔 事神名, 王 其 日 在 牲 一
費 詩 群叔 事 來 嗣 天 日

儒 非 祖 德並歌于《大雅》、《頌》乃惟歌文母焉,斯 之心,文王其享之乎? 者矣。夫尊文王爲大祖,必告于南郊,告 七廟,而後成之者也。 王、王季實臨之名以命之,而文王有不得辭 其義乎? 王季之志,載 微 考之心也。 不 頌 察,遂以 歌,禘大祖 災以 祀 其 文 徹名《雍》,失之矣。 詩 周 烈考、皇考,皆謂文王。 王 也。 日 而 「克昌 始之,尊爲王者祖 不 「三家者以《雍》徹 諱 苟不合于神祇、祖 大姜、大任、大姒 厥後」,文王如大王、 而 且 稱 言之,亦 山廟,大 」,後 嘗 雝 亦 1 老 于 老 泮

載見

且大矣。召公不與也,千七百七十三諸侯何戡多難。昭考之神靈安以多福,天人之助多辟公,周公也。周公之志行,辟王乃克

興。」《頌》顧如此乎? 子曰:「名不正,言 後稱公。《詩》則 足 而以臣子尊其 以 當之? 純 嘏 爾常矣。」此所謂王功 禮 君之稱,歌諸天子宗廟 曰我客,曾侯、伯、子、男也 ₩: 示 天子三公稱公,二王之 不然 順 事 也。 不成, 日 《卷阿》之詩 勳 禮 樂不 乎?

魯頌

水

成均。 宫也。 也。 官》謂之學士自庠 瞽宗,夏曰東序 其六章曰:「濟濟多士,克廣 攷《泮水》之頌,而 《文王世子記》惟不見辟廱,四學具在 天子大學,實 、虞曰 序 而 有 進 E 五. 知 於 名 庠,五帝之學則 魯 少學。 之 周 養 E 德 士 辟 少學,泮 有 廱 常 周 有 殷 法

干戈

而

節

度從容者,諸夏非吴、越比也。

若

刊

則

斥而怨之矣。

左丘氏《傳》所記

猶有

動

春

1秋諸

侯擅相

征伐,不以仁義,然而

井

堙

木

行之於少學,不敢不以仁義行師有如

此

也。

于訩

,在泮獻功。」《王制》:「有發,則

命

大

司

征,逖彼東南。

烝烝皇皇,不吳不揚。

不告

日

耕乎哉。

《泮水》之六章又曰:

「桓

桓

于

爲仁義者也。

謂之君子,必不可以

謀

食

而

顧

H

徒教士以

車

甲。」必且受成於學。

諸侯

帥

而

改。夫入孝出弟,守先王之道,待後之學者 學,必使之無事而食。 藝」,非周公之典、孔子之訓矣。夫任官,然 後爵位定,然後禄,必有政事焉。 藝文志》云「古之學者耕且養,三年 皆疑而問之。 子曰:「君子謀道不謀食。 學 也,禄 雖在戰國,東方諸侯未之或 在 其 孟子言之,彭更、公孫 中矣。」 則 耕也,餒 미 而養士於 知 而 通 班 在 古 服。」齊桓 而 公之時

其中

矣。

也。

諸侯來伐吾國,吾國士皆可以致死於行 無邪」也,其孰承之乎? 必不然矣。 者莫甚於魯,尤莫甚於魯之《頌》,而 以夫子曰:「魯一變,至於道。」不然,喜夸詐 如有子,且在三百人之數,而國士多焉, 不謂之徒死焉。 可知已,故曰:「既作泮宫,淮夷 南伐,實以魯爲主,固非誇 是以微 虎屬 徒三踊 又曰「思 也。 則 陳, 攸 是 僖 賢

毛詩説補卷三

國風周南

卷耳

文以 作。 之,禮備且成,非一酌也。六詩重章,滿而 不可省。 一 计韻,無怪乎原伯魯之不説學也 復而不厭,有序而不紊。 使臣之勞,非一人,亦非一地。 自康成有申殷勤之言,永叔則 少不可益 歸 日 而 多 後 變 勞

樛木

始則纍之,繼則荒之,終且縈之,葛藟幾

樂, 心。 幾嫉 不足以言之也。成之者,誰乎? 成,因始基而終言之,謂之王者之風。不成, 縱或愚幼不肖怨汝、詈汝,絕無含怒畜怨之 盛德,斯莫得而踰焉。 不 知 而福禄安之也。 六宫之人歸美以報其上,君子是以能 降 妬,終爲 也, 樛木 怨 幾 讎,事有必至矣。 不 安之而後大,大之而後 ·能遂. 同心戴之,如事父母 也。 始 而 惟后妃之 下 逮,未

螽斯

者。 者,明章婦順女教無或不修,陰禮教 斯,王者之風,言爲世則,學博依者安之。 己之天也。 揖揖,以禮 薨薨者,其聲之多也。言言語語 妾御乃衆多矣,以螽斯況之,自卑而 事上則喻以葛藟, 會 聚 也。 先後 相 次 處 第 則 無不 親 無 喻以 面 亂 不 行 和 尊

桃夭

而後家,之子之所居也,故先言之。男有室,女有家,言二人之宜也。先室

故先言家也。 始宜之,終必宜之。以其實知之。一或一一之方。事居其室,不知其家,不可以爲宜也,所有也。之子有其家,然後安其室。古者謂所有也。之子有其家,然後安其室。古者謂不終,非二人之宜也。先家而後室,之子之

鄭? 箋云:「家人,猶室家也。」此詩而申之,可以教國人,若之何舍毛而從此詩而申之,可以教國人,若之何舍毛而從焉,有賢不肖焉。 盡以爲宜,亶其難哉! 引一家之人,有親疏焉,有長幼焉,有貴賤

兔 買

置,以言得禽也。兔,以言不易得也。

毛

詩説補卷

矣。 城, 也。 歌其 見其 夫非一節之士,必大度之主,然後能尊顯之 其好色也。 城」、終不曰「腹心」者有之,以公侯好德不如 不可 志 人,則民不安。 于中產,時 不 而 天下賢才,有不歸之如流水者乎? ·必得, 即 極之,言其用也。 兔 謂非輔佐君子求賢審官以致此化哉。 有意乎其人若此,其人之肅肅,可 制其 也。 則 腹心。 遂 置則得之。 不用也。 要其中曰「好仇」,則信遇其 則曷言乎武夫? 長言之, 嗚呼! 得斯人,則 于中林,時不用而 反 歌其施之,言其釋也 初見其 噫嘻 覆 嗟 貴其能 民 歎 加 安 初雖 圃 肅然,既 詠 不得斯 爲 百千 歌之。 望而 待用 兀 民 武 干 而

漢 廣

士昏禮》:親迎,墨車二乘,必自秣其

云: 馬 也 「謙不敢斥其適己。 嘻, 東漢世衰, 鄭君亦鄙 且 薄矣。 窭

亦不易一辭,故曰:「政散民流 心如此,是之謂王化之基。其變爲《桑中》, 禮之不可犯,再三歌之,不易一辭。 而不可止。」

邶

舟

柏

黜? 卷也 可 '以去乎?」曰:「直道而事人,焉往而 9 我心 枉道而事人,何必去父母之邦?」 柳 匪 下 石,不 惠 爲 土 可轉 一師,三 也。 黜,人曰:「子未 我心匪席,不 不三 可

而榮也。

儀也。」 「言君臣上下、父子兄弟、内外大小,皆有威 威儀棣 棣,不可 選也」,北宫文子曰 :

雄

雉

戈省厥躬,而百姓被其毒也 「不忮不求,何 用不臧」,刺諸 侯不以干

鄘

相 鼠

《白虎通論》曰: 妻諫夫之辭也。」

夫婦之道,榮耻共之。 生而辱,不如死

0 此篇原置於《鄘風》,今據阮刻本《毛詩正義》移入《邶

黍離

乎亂。 粱。 麻、 非 赤苗; 可; 于粟,非也。 粟 或見稷爲五 黍,不黏者不穄。 米,黍之異者。 쭇 也可 日麥、日 不謂之稷耶,不可。 穜之皆曰穀,穫之皆曰禾,廪之皆曰粟。 也。 古之名穀也,曰稷、曰 芑, 白 今正 謂之穀也可,繁粟于稷,是也。 稌,稻黏者, . 一菽。 名之,日 穀長也,專是三名,則形實于是 苗 衆秣,稷之粘者,謂之粟邪, 其爲盛也, 粱之異者。 其他 穄非築也,黍非稷也,虋, 稷、粢。 假稷名 皆謂 秬,黑黍。 黍、曰稻、曰 簋 稷不粘者 之黍。 日日秋。 粱 稷、黍, 非 黍 秠,一稃 黏者不 不黏者 也,蒙 [粱、曰 簠 别稷 謂 稻 之

實隋。

黍

穗散

穂

專。

粱

似稷

圃

穗大,稷實員,粱

之日

穑。

詩

E :

彼

黍

離

離

,彼稷之穗。」

種後

孰

種

後種

先

孰

E

穋。

穜之曰稼,斂

日

植

一,後種

穉。

孰穫

日

稰,生穫日

穛。

先

日

秔

大麥,牟。

小麥,來。

牡

麻,枲;

黂。苴,大豆。菽,小豆。荅葉曰藿。先種

鄭

Ì

將

仲

子

仲之謀而 刺 莊 公不 陽 不聽。 愛其弟, 故斥仲子 ൬ 以 母 以風其君 爲 辭 陰 用祭 也

叔于田

莊公也。叔處于京,繕甲治兵,以出

刺

二七

毛詩説補卷三

叔似君矣,人復有似叔者乎?于田,國人以爲若二君然。

大叔于田

道,國人皆知公有害弟之心焉。 刺莊公也。段不義于君兄,狃必敗之

丰

禮聞送女,不聞女送也。予不送兮」,姆辭也,如以爲女,將誰送哉?「子之丰兮,俟我乎巷兮」,女辭也。「悔

「婦乘以几,姆加景」,御者驅則待姆而行焉非一士,是曰禮俗焉。「駕予與歸」,陳古也。與例,不殊裳也。叔、伯,猶言庶士。歸妻者也。貴者如此,是以刺之。先裳後衣,不爲也。貴者如此,是以刺之。先裳後衣,不爲

日歸。 爾。 義,歸、送殊指也。 矣乎? 箋云:「來迎己者從之,志又易也。」婦人謂 起信險膚,予弗知 其旨 歸者,女也。 遠, 其 辭 乃所 文, 與歸者,姆也。將、行同 何 訟」,其鄭 康 成 有 逸言 氏之膏 乎? 嫁 肓

溱 洧

求,不能使漢 謔,行夫婦之事。」鄭之士女, 爲「人之無良」矣。 爲是,且無從斥其 既成,非聖人不能易也。 哉,子曰 下愚皆知其不可。 談,牢不可破 鄘》之《桑中》,皆不易一辭,所謂 何其?」貞淫奢儉,雖 無遊 也。 不也。 女也。 文王在 若鄭 《魏》之詩 笺云云,笺云: 則何至 果斥以否, 何 則以出遊爲不可 位,能使遊女不可 以 然 日 日 乎? 如 殊 是? 科, 彼 衆皆以 「相 自 風 人 并 與 是 爲 雖 以 俗

邦,誠有罪也。

若乃大夫以諫不聽爲己

古者大夫有罪,待放三年,而後可以之

者,無乃以小人之腹度君子之心乎? 若《桑 罪,則謂之以道去其君,去不待放,導之出 疆,先于所往焉。《羔裘》之詩曰:「豈不爾

中》之詩,殆乎既其實矣。

秦

輿

于嗟乎! 不承權輿」, 郭景純《爾雅》

注作「胡不承權輿」。

檜

小 雅

無補于其君,自悼之,莫可解也。

思? 中心是悼。」言君禮于其臣

有加,而臣

采 芦

方叔莅止,其車三千,師干之試」,先會

荆焉。

諸侯。「

陳師鞠旅」,後陳師旅,不戰而服蠻

鴻

羔

裘

鴈

維此哲人,謂我劬勞」,不惟逸豫,惟以

亂民,固哲人所以訓侯伯也。

二九

祈

父

事 穉、子幼之家,轉 了,孰爲死哉? 料民大原,以補六軍之士。而夫死、妻 故及幽 而 不 知所底止矣。 王 丽 廢 滅 也 後若有 其 在

位僅十一年爾,此詩之所以作也。

斯 Ŧ

召而去之。王室愈卑, 萇、劉不没之,故實由 世以《常棣》爲家法。及惠、襄之族,乃偪周、 「兄及弟矣,式相好矣,無相猶矣」,周室

正 月 於此,富辰之諫可思也。

終其永懷,又窘陰雨」,此以下刺平王

兩 無 正

人,而循其覆轍

也。

章言幽王之喪宗周,下章言平王之復用小

舍彼有罪,既伏其辜」,褒姒、伯服既已

虢公翰立之,晉文侯殺之,立二十一年,其不 王子余臣,子朝所謂 「攜 王奸 命」者也

伏辜矣。

能嗣王業,則詩人所云「覆出爲惡」之故也

宋宗忠簡之請還汴京而不從也。 凡失全全亡之世,其獘莫不如詩人所刺矣。 謂爾遷於王都」,平王即安於東都,若

小 旲

無忝爾所生」,于王有兄弟之戚矣。

=

也。

唐之肅宗、宋之高宗,其

獘

正如

此。上

小 菀❶

先人乎? 先人,謂文、武也。辭,其即此詩之旨乎? 如果能穀,其必念昔

握粟出卜,自何能穀」,屈原《卜居》之

小弁

一憂不足以盡言,故重言憂也。

「心之憂矣」。「心之憂矣」。「不是以言其痛,故不曰以不相見,而失其所,慕父而痛母也。「天之又不相見,而失其所,慕父而痛母也。「天之以不相見,而失其所,慕父而痛母也。」,父則不得見,母

届」矣。

巧

言

「職爲亂階」,所夷滅者,幾何人矣。

甫田

興能,進諸學,材諸位。不能爲士,皆謂「烝我髦士」,能爲士,于是使民,興賢,

采 菽

物」,而況天王乎? 不以是戾,亦「不知所之而畢來。「齊侯修禮于諸侯,諸侯官受方了機哉游哉,亦是戾矣」,代之而愈畔,釋

角弓

「如食宜饇,如酌孔取」,古之所謂饕餮

■「菀」,阮刻本《毛詩正義》作「宛」。

獲,無覩之而不酌。 也。無時而飽焉,無孔不取焉。寧取之而不

以 而 立,不分不恤 安其危,利其菑 爲積雪。 雨 雪瀌瀌,見 「莫肯下遺,式 一,奢泰肆情,焉知傾陁,此 「,樂其所以亡」者,亡可翹足 晛 日 消」,彼 八居婁 以 《驕」, 爲 積 掃 實 所 地 謂 赤 我

「我是用憂」,憂宗周之隕也。

都人士

矣。 而 有 之,其勢然也 也,女則見其髮也。 及君子女焉。 :君子之行,詩人猶及見之矣。 彼都人士」,有君子之容,有君子之言, 近 而 面之,則謂之尹吉,不可 由 信不可忘矣。士 冠 衡視而上之,自 而 旁視 之,則 遂因士君子 廁 見 見 加 其 遠 其冠 充 而 辭 耳 Ħ

> 去也。 謂禮。 于此 歸于周」, 之不見,惟言前日之不忘,善哉言 寫其哀也。 之謂情。思之,又重思之。 髮如蠆」,面未久而背也。 方其見之,時而不見,已如此矣。不言今日 有旟。」其卒從之乎哉。 曰:「匪伊垂之,帶則有餘。 矣。 「言從之邁」,不知足之前于途矣,斯 詩之好德如此 「垂帶而厲」,視由帶以 忠信爲周。 「從之邁」、「云何盱」,形于外也。 言士者,民所望 ,始曰不説,既 佇立而望之,而未能 視上不及下,斯之 言之,又長言之。 匪伊卷之,髮則 上也。 乎! 日 也 菀 「行

大雅

文

王

「亹亹文王,令聞不已」、《易大傳》曰:

也。《左氏傳》曰:「文王之功,天下誦 故曰:乾,元亨利 以和義,貞 舞之。文王之行,至今爲法。」 君子體仁足以長人,嘉會足以合禮,利物足 固足以 、幹事。 貞。」君 子孰 君子行此 謂 ? 四德者 謂 文王 뻾 歌

王也。「卜世三十,卜年七百」,天所以命文底止。「卜世三十,卜年七百」,天祚明德,有所「文王孫子,本支百世」,天祚明德,有所

其德誠厚,其功誠遠也 世不墮,久 常,祭于大烝 日 日 力,戰功日 勳 凡周之士,不顯 國功日 者 多。 與 ,司勳韶之。」其後子孫有國,歷 功,民功曰庸,事功曰勞,治功 周 凡有功者,銘書于王之大 祚並 亦世」,周典曰:「王 傳。 天非有私于周, 功

故曰「作孚」。 儀而可象也。文王之典,皆有法而可遵也。 「儀刑文王,萬邦作孚」,文王之德,皆有

大明

心,以天之事爲事矣。「小心翼翼,昭事上帝」,其以天之心爲

早麓

能知 任,必有其人,而後降之,不可索也。 之飛也。 來 能爲? 察魚之躍,不必爲己敺。 正諸侯而安之也。察鳶之飛,己不毁其居。 王季修德行仁,能治其國家,小諸侯耳,未克 君子」,上察天之心,不 界不明之人,下察民 而無人,焉以待之? 時也。 高飛戾天,魚躍于淵」,此言大王、王 人所助者信,豚 民失其所者,衆魚 商德· 小破,諸侯 此不可不作。 魚不欺 天所助 多不 之 躍 也。 循道 者 也 順,鳶奚 時會 民物之 「豈弟 者,鳶 大王 適 季

《關雎》、《鵲巢》造端乎夫婦、《麟趾》、《騶虞》作,而多士生此王國。所謂受祖者,此也。之心,不吉不才之子。作人以俟之。及文王

皇矣

功成

加

嘉祥,至察乎天

地。

維予宅」。《漢書・韋玄成傳》作「此

化也。 則作好作惡、多忌多克,其違帝之則也易。 則」,夫凡民「不識不知」也。 者,教易從,政易行也。 文王之政謹好惡以示民,曾不大其聲色而 帝懷之也。「不大聲以色,不長夏以革」,言 上之明德如文王 「帝謂文王,予懷明德」,文王有明德,上 長之言上也。 一,則無作好、無作惡,不忌不 夏教刑革,官刑 「不識不知,順 上之人無明德, 不 帝之 上之 民

王之德,而異端之學于是乎不可辨矣。帝之則」爲文王之民,遂以「不識不知」爲文克,其「順帝之則」也易。不知詩,因不知「順

靈

子所性也。「於論鼓鐘,於樂辟雍」,君子所樂,則君

生民

哉? 司馬遷記之,刑及其身,可畏哉!帝」,則其後世之帝也。彼以爲無父者,何人「以弗無子,履帝武敏」,傳曰「高辛氏之

板

大小二《雅》,其正者,惟文、武。其變

幽

厲

質用

之,

清

議

曷

口

小

哉

夫

清

議

, 所

?

爲

清

議,不

以

作

刑

罰

苟

作

荆

罰

則

秋

茶

也

匪

用

爲

教

覆

用

爲虐」,古人之善

教以

大 憲 詩戒 者,惟三代有焉。 之君,賢者皆然。 卿 以 雅》,無《小 殊 者 成王之政,率 憲 子 壞之實也。 存《小雅》, 惟 、泄泄 之以無 日 其 幽 「其 一、厲 他 於下。 雅 辭 皆 然也 由文、武之政,不自 思 何待四 有 不 所 成 思 録 二《雅》録 以 文、武之仁政蕩然,此王道 所謂禮義科指 憲憲、泄 Ŧ 其 之矣。 厲 究 夷交侵,中國倍叛哉 王 王道 因 、聲有 板 幽 板 泄 之 厲 宣 Ŧ 哀」,不獨 于 廢 王 制 而 王 上,榮公之儔 之惡, 興, 陳 ,著東周 造 可世 法 也。 則 古 著善惡 世 也 有《大 此 守文 通 也。 , 所 荀 則 行 之

决矣。 府,其 已,夫子不以 此 路 而 不在 以 之法,而清 主持之,是以人不見容而見拒,畏之若申、 非清議 國之士,又焉得 必深許其言之有中 養 其位 不 彼賢智者過之, 事未 而豊 中 不不 不 所及,乃執法 議 成,且未遂。 鄭 才之人, 謀 爲 廢。 人游於鄉 其 出 政。 以 若其人既 位

不

論

不

議

爲

君子

耻

乎

?

之任

也。

魯

人

爲

長

閔子有言:

事

乃

得

君子

焉

得

引

爲

己責

?

在

誅

絶之列,

則

則

未

可謂

之昭

昭

也

而

使

勸

勉

愧

耻

以

共

遵

王

桑

柔

抑

之禁,忠言未卒于口 化之士也。 民 有 肅 然所 心,荓 以 不 云 而 敢 不 身爲 虚 逮」,世 忠 戮没 拂 過者,多忌 非 矣 無 深 慮 知

也

苟

無

及

於事,不言

校

比

哉?

既

以

不

言

表

其

平生,

降 此蟊賊」,貪人之謂 也。

夷公。 之于王安石也。上章言王之説榮夷公,下章 言榮公之牽引諸小人以虐民也。 進退維谷」,進不得于王,退不 此下八章反覆以悟榮公,若司馬君實 容于榮

江 漢

「王命召虎」,命召虎行仁德焉。

召

旻

周 無 邇 封, 以 四 一海爲 居圉。 豐、 鎬 岐

Ц, 周邦也。

身也。 天子一。位,周之位也。 幽王卒隕于犬戎。 我躬,幽王之

也, 聲色也 職況斯引」,引之示 ,田獵也,凡所以娱心意、悦耳目 戒。 飲食也,宫室

辭

也。

厭者一,而不厭者又有其一焉。 者,亦不必苦禁之。 吾知其不能,以終不 其端 無 窮, 厭

不可得而絶也。 其務修德哉

起也。 云自中」,言國之無人。治之所爲,乃亂之所 池之竭矣,不云自頻? 泉之竭矣,不

而召公所職,幾盡亡之矣。 「今也日蹙國百里」,周尚有東遷之祚,

頌

天 作

矣」,天下之父歸之,其子焉往? 聖人興謂之作。 天下歸之心, 曰「彼 不 謀 同 徂

辟王,成王也。

昭考,武王也。

武嗣文,成嗣武,故曰載。

辟公,周公也。天子,武王也。 皇考,文王也。 子, 武王

之辭。 「宣哲維人,文武維后」,如七十子之服

非后不食。」此始受命王之盛德也。 孔子也。《説命》曰:「惟后非賢不乂,惟賢

「燕及皇天」,從容中道,聖人也。及天,

然後能「基命定命」。

王爲太祖焉,故稱名矣。 「克昌厥後」,原大王、王季之命,而尊文

綏我眉壽」,武王年已八十矣。

文王之後,故曰「亦右文母」,所謂袝也。 烈考、文母,文王及大姒也。 太姒没在

載

見

載

芟

酌

且」,讀爲「徂」,往昔也。

武

嗣武,若《下武》「祖武」矣。

武,迹也。

閔予小子

皇考,武王。皇祖,文王。

小

毖

肇允彼桃蟲,拚飛維鳥」,喻武庚也。

三七

毛 詩

駉

魯頌》不皆一人作也。 此篇則史克

所作。

「駉駉牧馬。」」于文爲長。 駉 駉 牡 「馬」、《文選》注: 「《毛詩》曰:

泮 水

君父之道以 事閔公,有年所矣,未嘗敢

有布衣昆弟之心。 不然,則僖公其篡矣,故

恳

日

「靡有不孝」。

宫

克咸厥功」,文、武之功,周公不自以爲

功也。

不聞賜以天子之禮樂也。

土田

「附庸」,昭周公之明德,如是止矣,

周公之孫,莊公之子」,實惟僖公,始僭

禮樂焉。

「是享是宜」,魯以是享,莫知其不宜也。

莫之知,亦莫之罪,福不既多矣乎?

子曰:「魯之郊禘,非禮也,周公其衰矣! 周公皇祖,亦既福女」,未可知也。 孔

得祖后稷,詩見之矣。非頌也,其風也。 后稷,天子之祖也,皆稱皇祖 魯祖周公,不 君

子讀之,以爲魯僭郊禘之實録焉。 公車千乘,朱英緑縢,二矛重弓。 公徒

是懲,則莫我敢承。」夫子讀詩至此,儻亦有 三萬,貝胄朱綅,烝徒增增。戎狄是膺,荆舒

傷今思古之心乎?

廟,閔公廟也。 新 廟奕奕,奚斯所作」,毛傳云:「新 有大夫公子奚斯者作是廟

三八

宫之 曼且 魯,見《文選》。 以 孔 也。 以 也 公頌之。 在 新)。」齊、魯、韓三家以爲「作此頌」,宜屬卒章 碩 訓 魯 碩」,美作頌 廟爲新姜嫄之廟,毛公則兼述孟仲子禖 上文曰「孔 其言非。 也 「穆如清風」,不以爲自伐善焉。 ,且不質言姜嫄。 毛傳或傳寫于俗師、訛一 鄭君之箋,何 其説是。 碩一, 也。 不可不分别也 美新 ^ 大雅》表之矣。 正考父睎 其遼 且先 廟 也。 妣之 哉 「頌」爲 尹 下文曰「孔 吉甫 廟 奚 「其詩 斯 在 鄭 「廟」 見 頌 周 銮

烈祖

間 君 易,莫知以可否 臣朋 如 味人不精, 惡 友,雷同 藥 石 而 相 相 氣 保 從 濟。 志越軼 疾 疢 濟 也。 有持異議 其不 八視聽 弗 及,以洩 之味 話 言 者 也 震 出 其 不不 于其 眩 過 轉

> 也。 味者乎? 和莫甚焉。 《詩》曰 天下鮮 物情 亦亦 由 有 是 和 去, 羹 既 而 神明 戒 既 平。」其 所 不 歆 知 饗

序

之人相 言以 則多 不妬 妃 無所同異、輕重、遲速,若螽斯之羽 燕寢者, 不 矣。 妬忌者,不知詩也。 知物,螽斯以喻衆妾也。 忌,則子孫衆多也。」誰若螽 \sim 螽斯 與 女御掌之,族非 如 周官》九 此,則后妃之化也。 》,后妃子孫 嬪 以下 衆多 姓 也。 性性 無數 妾則微 彼 斯 非 以 御。 言若螽 焉 不 此 矣,衆 ·妬忌, 人, 1.爲后 宫中 敘 斯

「《桃夭》,后妃之所致也。不妬忌,則男

「之」,疑當作「知」。

三九

解民也哉。 解民也哉。 解民也哉。 解民也哉。 解民也哉。 是者或早婚少聘,不愛者無嫁娶之端, 則閨門之内不和。男不得其分,女不得所 則閨門之内不和。男不得其分,女不得所 以父母之服服之。民有妬忌之心, 以此内和家理之所致也。公卿、大

武公知假天子之命,而實不敬也。「《無衣》,美晉武公也」,「美」當作「刺」,

毛詩説附卷四

楚茨篇集釋

荒,饑饉降喪,民卒流亡,祭祀不饗,故君子《楚茨》,刺幽王也。政煩賦重,田萊多

古馬

侑, 勸 也。 以農爲 侑 我 蓺 翼翼,蕃 黍稷。 以以 庾 維 露 介景 楚楚者茨,言抽其棘。 也。」箋: 本。 積 億。 廡 我黍與與,我 日庾。 貌。 福。」傳: 茨言楚楚,棘言抽 以 爲 茨, 陰陽 酒 萬 食,以 蒺 萬 和, 「楚楚,茨棘貌。 一稷翼 藜 . 日 風 也。 億。 饗以 雨 (翼。 自昔何爲? 時, 互辭。 言先王 妥,安 祀。 我 則 萬 倉既 以 坐 抽,除 物成 一之政, 與與、 妥 也 盈 以 我

爲尸。 矣。 注云:『尸舉奠斝若奠角,將祭之,祝則詔 「朝事,延尸于户西,南面。」又云:「至薦熟 諸侯之祭,延尸于户 享、祀,總辭也。 以 所用皆所親爲。《信南 北 享,獻也,獻之以 主北焉。』《郊特牲》曰: 乃更延主于室之奥,尸 于奥,行灌禮至朝踐。 物者,親耕示孝敬之心,且勸民耳,未必祭祀 飯告飽,祝侑之曰: 人拜安尸,使之坐。」《集傳》: 「《祭義》:「君親耕 而 爲酒食,昇我尸賓。」皆得用税物之明文。 妥、侑,當饋食之節。 食之。 既奠,迎之,使坐,而拜以安之也。 祝 以 主 在妥、侑 祀先祖,既又迎尸,于神坐 以供粢盛。」而 皇尸未 人之辭勸之。」《正義 ,外。J《郊特牲》注云: 來 《祭統》注 「舉斝 山》云:「曾孫之穡 前, 升 初,尸人,祝延之 實 席,自 則爲灌 也。」案:朱子 「筮族人之子 角,韶妥尸。」 云:「天子、 此 北 及朝踐 文用税 方坐于 * 主

爲 公 卿 有 田 禄者奉 其宗 廟之祭 則不

以

此

詩

固 心 諸 皆 卣」之文,則 灌 侯 及 之 禮 朝 踐 矣。 如 天 召 周 子 之公 穆 之禮 公 有 卿 「釐 然 灌 爾 既 禮 圭 日 焉 瓚 公 卿 少 秬

牢、 始 特牲,諸侯之大 即 欲 如《 集傳 》,亦 人夫、士 僅 也 以 一,故 彼 況 禮 此 自 不不 饋 得 食

鬯

有

據 烝 嘗 彼 之 爲 文 Œ 皆 説 當 顧 此 詩 之 苟 儀 求 詩 下 故 章 享, 4 羊 享 ·之文、 人 鬼

焉。 及 其 饋 食 皆 有妥、 侑 之 禮 <u></u> 大 宗

也

祀

心,祀

天

神

也

舉

享

祀

則

地

祇

該

m

存

也。 伯 以 幽 王 古 不 禮 能 事 明 鬼 德 神 恤 祇一, 祀 故 王 思 所 古 以 焉 建 保 邦 以 或 往

孔 明」,散 文 則 通 烝嘗

乃

詳

言

享

禮

而

祀

從

可

知

矣。

祀

事

或亨 或 濟 肆 濟 或 蹌 蹌 將 絜 祝 爾 祭于祊, 牛 一羊,以 祀 往 事 烝 孔 嘗。 明 或 先 剥

> 也。 義 嘗。 故 肉。 内之旁待賓客之處。 進之者。 有 之也 壽 祖 有 × ,精氣歸往之。 煮熟之者,有 無 是 容,言威 祭祀之禮,各 「將,齊」,《釋言》文。 皇 祊, 疆 地 肆 曲禮》「大夫 官 神 門 孝子 陳, 傳: . 保 内 儀 牛 是饗 不 也。 敬 將 濟 人》: 肆 知神 其神、 慎也。 齊 濟 其 有 孝 皇,大; 蹌 濟濟,士 骨 其 凡 皇,暀 也。 之所 孫 蹌 安 體 事 有 言 冬祭日 祭祀, 丽 于 郭 在 或 慶。 保, 也 享 有 俎 一使祝 璞 陳 有 蹌 其 解 者 日 于 容 報 共 蹌」,是 安 先 「烝,秋 祭祀。」《 剥 互 也 以 也。 其 有 祖 博 「謂 其 ,或齊 介 4 奉 以 求 皮者 烹 福 牲 有 孝子 之門 箋 分 持 祭日 之 齊 ĪE. 容 而 干 飪 萬

也。一 殺,乃陳 云:「分齊其 互。」注云: 之于互 一若 肉 所當用。」則 今屠 上 也 家 縣 「齊 肉 是既 其 格 肉 陳于 則 者 肆 互 王 謂 就 肅 既

外

纏

也

大

司

徒

祀

陳

其

鼎

俎

實之

性

體

則

割亨

之事

則

解

剥

其

肉

「掌

共

鼎

鑊

一,以

給

水

祊

謂

廟

門

饔之爨 亨煮。]

則

煮

掌

外

祭

祀

之

割

奉

持

而

進之。

此説

司

于《

周

禮

.

内

饔

也。」是肆其 熟之者,是亨人也。 天子之祭, 每云「佐食奉 亨,共 凡凡 礿 五 火 肆 日 其 肉 云: 帝 者 是 熟, 之齊。 宗 其 也 俎 其 内 廟 一謂 奉 骨 骨體 孰 脯 群 謂 王 然 饔 之 牛 體 體 肅 體 修 臣 後 俎 分 其 職 也 祭 牲 于 于 解 云: 肉」, 各 别 退 解 殺 汽差 外、 刑 祀 俎 俎 爓 有 《外 骨 而 m ^ 是 之, 膴 也。 其 内 亨 掌 所 是 體 合 爓 注 舉 熟爲 名。」孫 章祭時 之,非 主 廟 次 肆 不 不 陳 臣 體 不 豆。」則奉持進之,是司 釋宮》云: 門 ·待 第 施 宜 享 其 助 。」又《小子》: 注 也 既 正 出 骨 也 于 祭,各有所掌,故 獨 先 一。」彼 之又曰 亨熟 炎 廟 體 之事,始于 既亨之後,非 云 此 王 門 日 既 于 閉 直 直言 乃分 亦 也 解 俎 職 如 剥,當亨煮之于 謂 而 門, 掌 正 而《 詩》云: 之。」注云: 然 索 之門。」 齊 絜牛羊,成於神保 己。 也。 郊 後 知門内者,以正祭之禮 所 祭祀 祭 文次 稱 特 當 奉 易傳 祝 徒、小子之 一奔 謂 李巡 「祝祭于 牲》云: 用 持 于 也 薦 羞 也 者 走 而 祊 羊 媒 E 在 進之 鑊。 以 肆 孫 肆、 時 箋 廟』,奉持 「直祭祝 注 祭 毓 祊。」 進 閉 也 義 類 爲 羊殺 既 享, 云 雖 云 所 爲 也 烈熟,當 尸 有

之貴

(賤,以

爲衆俎

特性》、《少牢》之禮

之。」豚

解

腥

之,

是

解

剥

其

云:

「腥

謂

豚

解

而

腥

之。

互

Ė

而

齊之也。

不言

祠

解

骨

肉

言

也

禮

運

>

日

腥

:

是煮熟

之

也

禮

運

>

又

體

其

犬、豕、牛、羊。」注

祭

以

于

廟

羞

各

以

此

互

群

進

長。」

門

西

四

四

神。 神, 焉。 乎外 大率繫之門内,爲待賓客之處耳。● 内之西。 祊,在廟門外之西。 事于廟,其待之迎于大門之内,則天子之禮 日之名。 《敬,鬼神著矣。」《禮》曰:「聖人爲能享帝 以 待 廟門謂之祊,知内外皆有祊 īĒ .西方與繹俱在門外,故《禮器》曰:『爲 字 外 一也。本其生存謂之祖,言其精 、皇爲 -° 1 % 其迎諸侯之臣,或于廟門内也。 一,是以 『是皇」、『是享」,異事變其 一。」與 賓客之處者、《聘禮》、《公食大夫》皆 日 祊 祭統》曰:『而 天子迎賓 之又 又彼《記》文稱祊之于東 此 明日之繹皆在門外,與 不 注:「祊 同 者, 在門東,此祭當 此正祭之祊,或 出于祊。』對設祭于堂 之禮 以 彼 写宜 祊 稱也。 經》稱: 對 文 于 正 方爲失,明 廟門 耳 八此不 在門 其 祭 先 在 氣 繹 「宗 計 祭 之 箋易 謂 祖 . 廟門 内 是 外 同。 西 之 行 得 祊 與 明 Ż 制 所謂 官 稱

有

以

爲

在

《祭義》:「古者天子諸 及國子職之,内、外饔掌器數 子》:「大祭祀,正六牲之體。」則 孔皆以天子禮言之詩 月、月半,君巡牲,所以致 毛而卜之吉,然後養之。君皮弁、素積 是取之,敬之至也。 歲時,齊 長。』』《集傳》: 孝子爲能享親 祭、 司士》: 「神保是格」, 靈保,亦以 割牲,君皆親之,卿大夫從焉。 戒沐 浴 帥 。」故此 「神保 皆取 巫降神之稱也。」案: 而 其 躬 屬 迎 君召牛,納而視之,擇 朝 ,蓋尸之嘉 章云「神 而 故 往 侯 之,犠、牷、祭牲必 割 力,孝之至也。」《 安 也。 必 性、羞 來 有 而 爲 保是享」, 牛、羊,大牲 養獸之官,及 己。 、牲事 號。 義。 俎 蓋 豆。」《諸 皆學士 毛、鄭、 箋説 加 牽 楚辭 Ŧī. 下 性 官 周 其 爲 於 朔 章

原作「侍」,據阮刻本《毛詩正義》改

與」, 原作「于」,據阮刻 本《毛詩正 義》改。

⁹³⁸

將 卿 之事 各 奉 其 明 (性, 羞 矣。 其 毛公以 肆 不不 門 得 内 以 訓 饔 祊 人 專 不 若 派 據 亨

大、小戴《記

》以

祊

爲門外

也

之俎 莫,言 莫莫 度, 繹 爨 儀 徧 妻 也。 壽 人,主人又自飲 主 稱 竈 攸 水 而 法 -度,笑 箋 酢。」 卒 共 君 也 賓 有 清 爲 執 度 婦婦 籩 容 尸 爨 静 盡 豆 也。 ,事舅姑之稱 豆。 其爲之于爨。 也。 傳: 及 燔 語 一錯 孔 而 也 卒獲。 賓 踖 庶。 敬 燔 獲, 始主· 燔, 酌賓 客。 爲 至 古 肉 爲賓 得 取 也 者 也 俎孔 饔 人 神保是格 東 膟 于 時 酌 醻 也 爲 膋 炙, 西 碩,或 豆 旅 君 也。 宵 廩 客 爲 婦 也 祭祀 謂 爲 肝 至 炙, 爨 交, 格, 語 獻 内 獻 謂 報報 燔 旅 炙 也。 羞 炙 酬 之禮,后、 也。 或 后 而 邪 來; 以 ^ 賓 肉 交錯 炙。 也 爵交錯 踖 行 庶 Œ 介 既 皆 也 酢 義 爲 羞 踖 福 從 凡 酌 君 **>**: 錯。 也。 以 夫 莫 言 獻 報 萬 禮 主 嫡 婦

> 膋」, 既 遠之,故 者 制 肝 兄 牲 獻 燔 廩 在 火 竈 明燔 其從 少 E 火 弟 ***** 以 也 爲 有 爨 門 燔。』 燒 爲 膟 王 容』者, 在 東 牢 》云: 以 主 從 獻 鄭 肅 燔 膋 雍 南 用 肝 炙 人 獻之 以 云 爨 北 脯 從。」故 瓠 肉 者 故 炙 獻 此 謂 上 之 燔之數量。」是從獻之文也。 矣。 葉 遠 以 而 「取 维 尸 俎 非 執 北 炙 火。 肉 傳 9 爨 廩 人 尸 《夏官 云: 膟 明 賓 爲 燔 賓常 摡 E 之有 人 故 膋 燔 炙 以 長 也 『炙, 摡 鼎 知 燔 炙 肉 難 以 . 甑 L 容 俎 有 加 燎 \sim 是 熟 肝 量 甗 俎 肝 儀 生 火 者近 報報 從 故 從; 則 人》: L 于 炙 也。 焉 日 民 獻 是 爲 與 雍 燔 也 陽 火, 主 之 從 薦 傳 敦 。」炙 吧。」對 凡 爨 也。 婦 物。 踖 獻 燔 俎 于 0 日 易 祭祀 之 獻 踖 廩 遥 既 熟 既 非 取 雅 爨 《特 俎 尸 炙 傅 者 燔 用 從 以 膟 爨

■「于」,原作「也」,據阮刻本《毛詩正義》改。

羞 徹 牢 注云: 左 則 順 肝 燎 有 燎報陽, 人》注 者 云 君 、從獻 心之於 ÷ Œ 一之。」注 右 非 先 容, 爲 獻 \sim 之。 近 有 祭云 主 簜 口 則 云 室 「燔 0 豆 爐 火 婦 則 司 所 序 祭初之事,君 夫 굸: 司 故 夫 微》大 , 炙肉。」 薦 三主 用,故易之也。 此 糗 然 助 其 羞 燔 + 傳 韭 後 餌、 燔 祭 實 從 房 蕉 羞 婦 以 獻 葅 炙爲之於爨。 之人,非 亦 中 夫賓尸禮 干 庶 粉餈 羞 豆 薦 爲 一是燔 之 炙 獻 羞 韭 内 是 謂 繹 全羞於 所 於 酒 親 葅 祭 非 羞、 繹 以 其 亦 P 以 之 君 爲 炮 則 日 『爲豆孔 炙也 鄭 豆 『主人獻尸』,乃始 醓 侑 尸 肉 杰 之。 庶 親 燒 也。 先 注 則 侑, 醢 主 歡 之也 炙 羞 獻 禮 之 酏 」,主人 心 此 也 祭 人、主 也 主 豆 有 巾 後 易傳 食 文言 庶」, 0 一人、主 義 言 薦 燔 房 且 **糁食**。 ^ 学云 孔 肉、 者 特 故 乃獻 婦婦 有 中 īĖ. 膟 執 \sim 庶 牲 ^ 之 皆 婦 司 祭 少 炙 誉 爨 燔 量

> 于《周 子之正 賓客 世 官 繹 明 「古者于 所 有 也。 庶 俎, 婦婦 主 内 • 又 羞 \wedge 九嬪 用 筮 所 薦 籩 羞 羞 内 出 禮 羊 一祭有 之事 之。 豆 之,故云『繹 而 以 亦 羞 書 旅 臐 多矣。 一,惟 職 加 戒之,使助 在 大傳》 載 也 獻 籩, V 也。 二羞矣。 右 豕 牲 日 有 語 膮 酬 體 則 朝 陰 Ē 彼大 毛又 皆 『贊 内宗 也 事 也 ^ 據 有 而 鄉 「宮室 祭者。 饋 后 其 天子 夫賓尸 以 胾 賓 薦 射 碩 食之 庶 薦 初。 $\overline{\nabla}$ P 醢 之。 記 羞 徹 庶 非 大 及 中 獲,得 **>** 籩 文。」《 豆 羞 尚 在 但 房 〈賓客』 也 度 交錯,言 内 豆 籩。」后 左 正 白 有 中 羞、 后 衣 祭 有二十 之羞 庶 其 陽 集 服 薦 也 羞 庶 所 宜 也 其 、夫人 中 多 傳 之耳 明明 羞 用 也。 内 也。 制 末 天 至 是

文,爨 案: 乎其猶模繡 犧 牲 中 竈 辟 者 殺 有 也。」毛公所謂踖 者 容 中 椓 死 代 者 割 有 者 數 中 踖 理 者 大 非 廟 振 之 拚 中 者 至 爲

兄

弟

弟

子

舉

觶

於

長

兄

弟

賓

乃

舉

所

禮

徧

獻

賓

而

後

酬

賓

長

賓

長

奠之。

及

嗣

舉

以

獻大夫。

尸

飲

九

散

爵

獻

士

及

群

有

司

'。」注云:「大夫、士祭,三

獻

而

獻

賓。」特

牲

謂

公之

孤

以

下。

《大行人》:

諸公之臣

相

爲

或

客。」

則

祭統

》 : 「 尸

飲

五

君

洗

玉

爵

大客之儀

而《司

儀

統

也

不

戒

不

筮

。」天子之禮

牲

饋

食

「賓

戒

而

不

薦。

而

非

毛

公庶

羞、

羞

一,則

主

婦

不

親

薦

也。

爲

共

籩

豆

則

爲

朝

事

饋

食

殽

香,各

有

等

焉

皆甚

碩

以

有

此

爲

俎

?

自

阼

此

在

Œ

祭

則

先薦

後

獻。

賓則二王後及諸侯來 職》云: 筮。」《少牢饋食》: 内羞之云。 一,賓長 大也。 之籩 知賓 豆者,皆 于賓尸 俎 「掌 宜 獻 助祭者也。 「諸 以 豆矣。 大 有 卿 鄭 下 大賓之禮 mi 戒矣, 公相 1内官。 君 如 則 體 客 尸 云 以 先 孔 解 小 飲 爲 未 爲 獻 氏 后 節 「賓 \sim 矣。 賓 七 及 必 特 後 以 主 折 繹而 之。 矣。 不 獻卿、大夫、士及 尸,然後交錯其酬 旅 禮今不可 之文。毛公解于詩義當否,未 子 以 奠 尸 煩 酬 及賓客」釋「爲 禮 辯 觶 ()故曰 賓尸 若正祭、繹祭並 以 必 之 酬 大夫 有 儀 長 有 , 乃及賓客, 正祭 考,以 之, 司 也。 兄 當當 弟 禮 徹 否 未 ^ 推之,賓尸 乃 未 中 士禮推之, 聞 而 有司 賓 賓 終正 口 庸 行 其 爲 户, 有旅 知 旅 節 之文,未 客」, E 也 酬 爾 祭 而 栅 旅 不及賓客,于禮爲 後 爾 則 則 不承「爲 個 行 毛公以 則 行 未 IE 必 可 下 旅 禮之失煩矣 《祭統 旅 不以 徹 祭 知 爲 酬 栖 宜 也。 上 以 而 豆

前

不

有

旅

酬

繹

而

賓

孔

庶

天子

有

交

則

時 幾 孝 孫 萬 如 式。 時 我孔熯 苾芬孝祀,神 億 既 齊 傳 矣、式 既 稷 熯 禮莫愆。 嗜 既 敬 飲 王 也 食。 既 敕 工 善 1 祝 其 爾 永 致 事 錫 百 告 爾 福 徂 如 齊

雖

不

繹

祭言

四八

齊,子 稼于 以 執 取 期矣,多少如有法矣。」《正義》: 也。」箋:「卜,予也。 稽首 興受黍。 疆 以 挂 指,卒角拜。 黍,主人嘗之,納諸内。!是大夫受嘏之禮也 釋詁》文。 〈特牲禮》:『佐食搏黍授 一概 以 黍 一誠 于季指 葅 Ħ 命祝,卒命祝。 於 IĘ, 于 于主人,曰:「皇尸命工祝,承致多福 ,受,復位。 豆, 也 一,眉 汝孝孫、來汝孝孫、使汝受禄于天、官 已固 敦。 執 坐 王肅 幾 壽萬年,勿替引之。」主人坐奠爵 以 一振祭, 嚌之。 執 尸答拜。主人出,寫嗇于房,祝 親 慎也。」《少牢禮 上佐 期 所 嘏 云:「執事已整齊,已亟疾, ; 詩懷之,實于 以 主 式 食兼受搏之,以授尸。 祝受以東,北面于户西, 興,出。 今予汝百福 人。 法 詩懷之,實於左袂 也 祝 主 祝 人 宰夫以 稷, (左執 左袂,挂 授尸,中尸 二佐 「熯,敬」, 其 疾 角,再 **籩受嗇** 來 敕 食 如 尸 受 各 有 固 無 拜

《集 以籩 使主人 孝孫 之,此「永錫 焉。 之? 可爲 得徧取牛、羊、豕、魚而授之尸 于是讀「 則 宰夫受以 祝徧取黍、稷、牢肉、魚, 筐」,「勅」爲「敕」,既失其辭理矣,且 釋 傳 受。」 儀 嘏 前 不聞 筐 人未聽 也。 辭以 就尸受之。 而 齊」爲「資」,「稷」爲「即」,「 極, 是 有 筐 受嘏 次第一 士 資以 爾 嘏 勅之。」將 也。 極 受嘏之禮 至也。」案: 而 一,時 爲 得無不敬 而授受之,是以有筐 委之筐與? 宰夫不爲儀 天子使宰夫受之以 嘏之體 萬 時 以 億1,是其辭 是爲天子之禮 天子 乎? 擩 鄭 而 于 不 君 與? 將畢聽 嘏 醢, 則 説 制 割 辭 焉 也 牲 嘏之禮 以 之略。 用 兼 嘏 無 有 王 授 笙 以 之 禮 筐 焉 舉 而 制 尸。 一,祝 也。 爲 後 將 安 委 祭

0 授 原 作「受」 據 阮刻本《毛詩正義》、 注 疏

改。

皆 之贊 古? 者乎 備。」箕子之訓 也。 地 能 聞 不能 斂者,必 極 或 受之乎 書》之訓 己。 得 則 相 究 言致福 非天 也。「永錫 作 終始,然後可 杰 附 丽 舍《特牲》、《少牢》,其禮 而 其 以 私 散之。 m 摭 多告, 子 理,非 也。 私 著之 之。 之 其 之本。 有之。 無 者 即 足 散 蓋 爾極 首 也 以慈告,日 以 自 乎 致 以 之, 此 以役 ? 日 出 也。 「一人有 幽 君 受 一,時 焉 詩 極 庶 王 則 能 古 此 爲 不建, 使天 庸 天子所 物 諸 以 萬 人 建 嘏 本 萬 改讀 致。 侯 下 . 時億 無 其 者 乎 慶 下。 、大夫、士、 實然, 是 則 或 嚴 ? 有 與辭不 兆 謂 不如 爲 」、《詩》之持 咸 禮 福 極 不居其極 福 粲 祝 詩 不 寧」、《易》 民 也 必必 是, 之 日 而 嘏 斂 則 賴 可 辭 之 之, 王 庶 五 與天 則 得 有 理 道 不 錫 常 人 福 不 m 所

禮儀既備,鐘鼓既戒。孝孫徂位,工祝

廢

牲》、《 尊之也 送尸 也。 也。 也。 西 上 肉 歸 君 備 保 致 此「徂位」,明遠于大夫,故知至堂下也。 [主人出,立于阵階上西 人出,立于户外西 告。 也。」《正義》: 賓客俎,同 婦 言 聿 階下告 告利 ^ 籩 皇 燕 而 歸 燕 少牢》皆 少 神歸。 君 豆 而 神 私 牢 成。」此 。」傳: 諸 具 廢,去也。 利 而 盡 ¥ 也 己。 其 宰 醉 成 姓則與之燕 主 尸 止 私 君 也。 西 P 孝 「《特牲》告利 出 「致 不 婦 恩。」箋: 鲌 ,節神者也。 孫 面。』《少牢 皇 人 遲,以 尸出 人,奏《肆 故 故 文 尸 特 在 廢 告,告利 于阼 堂 徹 載 牲 知 面 所 加 下 疾 不 起 天子 位 **>** 。」是尊者出 徹,諸宰徹 告 階 西 遲 爲 以 》告利成之位 夏》。 利 视 堂下 成 成之位。「主 敬 鼓 尊 神醉 面 ·之位 也。 成, 賓客 鐘 諸 也。 文 則 父兄 送尸 尸 而 西 亦 即 祝 于 皇,大 |稍遠 祭 諸 稱 尸 面位 云 西 西 《特 親 ⁄,神 謖 畢 饌 階 面

膳皆 攢 牲 燕 注 夫 俎 則 徹 婦 徹之,故 養 人以 云 F 其 也 也 最 徹 之 后 籩 也。」言皆醉者 云 牪 謖 一祝 尊 俎 食官之名。 Ŧ 巾 薦 豆 利成。 少 祝 之胙 是祭末而 言 而 也 徹 以 胙 入尸 此 牢 前 諸 豆 已」者 出。」是祭 祝 俎 -禮》尸 繁于尸 周 遵。 言利 宰者 其餘 俎。 主 命 謖 ,主人之俎。 禮 徹 人降 小《周 別其 一知君 燕私之事 ^ 注 主 成者、《 出之後 「, 祭 胙 起 特 膳 以 人 - -**1** ° **1** ≪ 俎 祀 也 牲 禮 膳 群 婦婦 屬徹之。」則 降。」 豆 畢 *\<u>\</u> 夫 「膳夫 廟,非 少 小 籩 籩 乃 知「諸 是宰 設 九嬪 アキ》注 0 牢 凡 豆 此 ~, 0 設 賓客 饗 少 于 歸之俎 而 Š 牢》皆 祝 東 之 親 王 宰徹 乃 己, 者 于 歸 告 神 云: 序 徹 徹 祭 屬 陽 凡 皆 東 餘饌 之 所 也。 下 胙 祀 利 饌 厭 官 諸 序 「利 祝 俎 祭祀 者 俎 成 : 饌 亦 以 下。 賓 諸 尋 告 ^ 一祝 一、君 也。 宰、 尊 將 膳 客 特 胙 室 亦 猶 即 主

> 亨以 獻 其祝 之也。 定 事 神之盛也。 謂合莫。」 殽,與其 大節 踐。 賓 云者,膟 べ禮 鬼神 皆 、薦其 丽 客 **>** 前 祝 號 天子 IF. 也。 日 無形 : 畫 事 。 皆 諸 留 膋 燔 (越席 玄酒 一致愛 乎? 時 周 凡 逮 之 幸, 小言其 炙 用 燔 孰 祭,慎 也 閣 人 燕 幣,未 燎 以 家 君 其 致 疏 尚 而 既 祭, 云 是以《 所 與 祭謂 宰, 慤 殺云者 布 醉 臭,始于裸,次 乎? 云納 諸 以 夫人交獻 神 迎 薦 以 mi 此,是故 非 親 尸 幂, 之朝 其 亨、又 歸 禮 存 骨 詔于 9 也 血 者 運》日 衣其 豆 以 人之 肉 毛, 事 實云 著 誠 云祭之日 室, 其 也 以 禮 (澣帛 腥 謂 敬 稱 在 嘉 納 運 乎? 詔 嘉 其 之 之至 ^ 然後 也。」 魂 牲, 周 于 肆 而 俎 集 醴 魄 合之, 官 庭 獻 傳 次 退 謂 燔 醛 案 孰 如 作 炙 朝 而 納 每 是 其 見

❶ 「籩」,原作「邊」,據阮刻本《儀禮注疏》改。

神

未

庭

始

也

之所 器》 以《郊特牲 合亨 納納 小求 象 迎 E 故故 ? 孝告。」 训 牲 依 也 P 事 尸 牲 體 有 無 于 面 曰 也 也。 所 時 皆 祝 至 祭 未之得 此 . 其 設 斝 故 謂 而 乎? 也。 **>** 奠斝 犬 辭 于 非 迎 天子 祭于堂,爲祊 Ĕ 直 《 禮 不 尸 祝 豕 祊 室 焉 户 , 以 祭 升首 詔 4 所 之禮 事。 器 亦 也 乃 、諸 當 祝 然後 主 羊 奠 坐 祝于室」, 「舉斝 餕 **>** 此 于 日 -,實 于 特性、 侯 尸 于是 也 焉 鬼 之時 主, 迎尸 所謂 室,朝 于 以 神 其 乎 堂 天子、 索 羹 祝 祝 而 ,所謂 角 之 簠 少 而 饋 外。 既 P 謂 祭 定 酌 奠 簋 餘 踐 牢 詔 坐 食者 舉之,餕 裸 斝 祝 而 詔 簿 諸 時 也 酌 于 不 妥尸」, 不 故 也 奠之云 于 于 豆 也 奠 堂 侯 皆 以 可 知 E 堂。」《 祊 鉶 用 而 謂 也 事 以 是 神 如 羹 以 牲 時 肆 事 P 同 爲 之所 于 此 爾 爲 是 則 于 獻 無 平 禮 P 神 彼 郊 祝 是 他 及 與義 是 九 飲 利 也。 妥尸 則上 ൬ 王 飲 飲 也 嘏 已。 嗣 蓋 親 群 獻 0 八 以 以 舉 皆 酌 而 有 自 嗣 而 爵 P 爵 助 ∭

此

未

乎

特

在

于

,成于受 奠斝 慈告 諸 奠 有 焉 是 司 獻 侑 舉 飲之。 養 改 止 止 之。 侯 Щ 司 而 以依 祝 饌 也。 王則 卒 酌 長 獻 書 是 惠 E 獻 佐 嘏 之已。 食 祭之儀 亦 傳 大 行 謂 神 卿 食 故 長兄 室 日 獻 如之。 夫也 而 而 于 重 大祥。」此 也 尚之。 大 舉 前 祝 下 己 酳 之, , 人夫、元 斝 弟 未 主 ·, 乃 備 王 矣。 尸, 于是衆賓長爲 祖 以 義 夕 爲 丽 内 則 將 考 于是 則 獻 王 酢 也 加 著 妥 則 是 來 獻 + 命 禮 獻 祝 與后 爵 加 矣。 H 三公及 以《禮 也。 格 諸 也 之大 告 公 焉 0 進 夕 爵 侯 利 卿 虞 mi 更獻 聽 不 及 佐 蓋 成 止 也 也 成 觀 賓 禈 視 加 孤 嘏 其 惠 三王 食 祭之 ൬ m 也 在 **>** 濯 爵 卿 然 既 謂 P 獻 賓 七 五 日 大 位 徧 謖 其 後 爵 志 明 爵 之 節 與 +

 π

其餘 祭歌 然後奏之。 記 奏鼓 祭祀 也。 灌 象,季札所 競》,祀武 H 離 省 禮 周 既 丽 于 而 (牟賈))篇 》,禘太祖 一詩 心之,猶 者往 祭之末 獻 交 昇 備 文公所作 帥 P 煇 巾 瞽 殺 登 往述之。 于《頌》存焉,二 王也。 祭享 、胞、翟 見象 文王之歌《清 登歌,令奏擊拊。 丽 惠 一莫重于登歌,歌 獻 述 于 繹 也 牢 在 祀 酬交錯 其 是 前 也 祭之儀 具 一酸,正 \wedge 之樂 一、闡 略 冕 ^ 南 天作》,祀先王、 而《執 周 他 ^ 矣 而 爲,其 清 籥 官 則 備 博 總干, 祭 至 是 廟》,祀文王 廟 深燖之, 競 矣, 舞在樂則 則 也。 于 也。 》也 大師 (興物 *\ \!\ 祭,大 歌 莫 下管 無 其 0 以舞《大 ^ 繹 重 (天作)各 算 賓 則 武 于是 在《 備 職 八歌《維 一于《清 播 祭 P 事 爵 亡矣。 矣。 **>** 先公 周 樂器 也 而 E. 忧 然 則 mi 而 頌 大大 後 武 後 是之 清 由 廟 佐 尸 下 一大 《執 也。 之 奉 管 所 以 惠 有 食

乎? 之樂 樂羞 《左傳》「豆籩」 或以《 也。 奏《 姜嫄· 尸,則 則 下 作。」則 後、《九韶》之舞,于宗廟之中奏之先,降 諸 賓 人,奏《王 王 就也。 長 此 後 長兄弟 昭夏》。 所謂 齍 也。 矣。 獻 助 納 歌《 韎 振 祭, 雖 P 則 師 于 羽 一夏》。 《大武》,享先祖后稷也。 ,, 在 爲 族人 絲 其《大司樂職》:「《大濩》,享先 贊。」 周 太 歌《振 也 夏籥序興」者,此乎? **%** 加 衣 夫人祭,奏《齊夏》。 人,未嘗 廟門 九獻 是也 * 旄 一始房 爵與,皆《九夏》之篇 侍,奏《族夏》,亦 ^ 尸出人,奏《肆夏》。 内 鷺 人 宗 外作 也,故 宗 * 也 中 廟之詩 不 \wedge 職 之樂,而二《南》之 外宗職》云: 諸侯 之矣。 鞮 - 尚聲 * Z 有《頌 屨 正 正 助祭,歌《烈文 氏 焉。 () 焉 鐘 也 在《 以 一,皆掌 謂 鼓 不 徹 樂 他 在下 頌 也者 三王 侍 言 牲出 則 徹 有 m 繹 祭 后 歌 · 管之 后 四 王 金 而 神 也 徹 所 夷 出 以 則 妣 賓 表 m

利

成

舉

則

位

也

西

面

位

人

西

面

西

面

謂《九 夏》乎 奏之樂明 降。」 者 被 口 少 之。 直 ,皆目之矣 不 徒言位 入奏,則《周官》所 者 據 ? 屢 樂 師 夏》,「以 爲 即 師 也 無 焉 二,皆目之于祝 所 」之文, 其 位 矣。 位 以 以 鐘 掌 愧 則阼 以 也。 不 戒 ^ 爲 利 師 辭 登歌、下管, 《特牲禮 小 戒 金奏, 贊陽出 目 廟 成 畢 則 m 階 笙 牢 廟 亦 户 中 矣 者 信 械 日 中 内 師 下 不 禮 者 阼 樂 則 詩樂 養 已 此 以 西 謂 篇 阼 》「主人出,立 階 一官 先 著 何 成 阼 之 面 殊 階 章 告何 下 告利 皆 也 未 獨 謂 階 燕 則 滯 故 文而 衆 L 西 非 有二 聞 樂」、「 不 爲 成 F 鄭 西 矣。 居 面 者也 成 位 在 西 畢 而《 君 樂,以 異 面 也 ? 言「人 而云:「 械 面 也。 「縵樂」 科, 特 之 笙 一,鐘 何 見 于 ^ 阼 樂 爲 説 牲 獨 少 師 户 不 定 户 平 鎛 階 較 則 牢 》告 》有 復 外 外 徂 主 是 ? 陔 矯 人 之 位 東 太 爵, 合食焉 矣, 膳夫 尸 朝 也。 爲 于 孔 以 毁 昭 有 周 0 一,又 家 次 佐 廟 熯 知 旅 無

師

른

燕而

師

職

,合于 賓尸 獻堂上饋 上 胙 宰 矣, 酳 太祖 食。 穆 安 非 쪰 旅 而 俎 前告利 士 有 式 小 得 昭 六尸 太祖 而 以 酬 之上, 之尸 裸 其于饋 徹 牢具 宰、 禮 後 穆皆合祭,有六尸 有 爲 惟 胙 ____ 食 繹 莫 天 非 公 成 太祖 宰夫 既 俎 之 禘 子 祭 俎 惟 愆 太 卿 食 食 事 祫 養固未 簋 酢 尸 而 以 之 祖 人 也 有 也 而 籩 俎。 則 謂 而 行 之 詩 蓋 下 室中 酳 唯 毁 豆 受 饋 昭 旅 褅 不 稱? 用 也 之饌 廟 太 畢 尸 食 嘏 穆 乃 酬。 太 得 五 之饌 也 無 祖 之 迎六 之饌 矣。 俎 也 祖 使 家 牢。 尸 宰, 不 序 則 卿 宰 朱子 則 毁 禮 祧 上 F 畢 尸各 佐 與 膳 大 則 E 群 群 烝嘗 廟 器 之祖 其 章 以 陳 食徹之。 夫 夫 祭 以 有 祖 廟 **>** 有 次 日 徹之 之 諸 人 有 辯 不 日 主 之 食 祝 屬 我 迎 及 主 而 宰 無 有 加 ____

午,乃 致齊 决矣。 FL. 祭于后 者 而文王繼之,各致齊三日,散齊七日則因之。 以《明堂位》之文世室、武 在 遷之祖自措之廟立之主而素定矣。 殺,然後可 賓尸 祭法》所謂宗也,他書 遞 子 也 為始祖 下之,太祖之尸,舉酬 無 「烝祭歲,文王騂牛一,武王騂牛一」,則文 Ė: 不 遷 也,其 社 调 祖宗之廟,天子皆 得 稷 迭 在 于 「三日齊, 之廟,亦决矣。 毁 洛 相 ,文王爲太祖。文王廟在豐,初 新邑」者,非天子親 以 裸 敬 邑,周 之 因 治 其 而 列,决然無 也。 獻 百 能 l 禮 公尊之日 之備 以 一日用 然 禮 而《 而 雖 皆 歆 而 然 之,猶 其祭之序,先后稷 歲 世 疑 無 召 在 群 之於下儀。 後 獻 室名祖宗之廟 者。 清 可 誥 祀也。 太 神 爲 見,然必不可 廟,皆不可 恐不 也。 祖 孝 日 文、武不合 武王之廟 六尸 「翼 也 《洛誥 敬。」故 周 古 已 日 者 有等 以 戊 以 立 后 等 不 於

之。 鎬京更作之明堂,則 也。 堂一 日「武王成之」也。 天子之宫室自處。 而 其居。」可以 公伊濯,維豐之垣」,皆 武、成王來自商,亦至于豐,宗廟 者, 必在是也。 則禋于文王、武王。」此周人祖宗之廟在 二卣,曰 王 詩》又曰:「鎬 (書)記大事 後 武 而不見后 備矣。 而已矣。 「作邑于豐」,行郊 文王受命,先郊而後伐、《棫樸》之詩 王 [明禋。 合 祭 靈臺、辟雍,文王有之。 豐、鎬相去二十五里 常常 知王居之嚴,三雍之盛,宅鎬京 可 四 稷 京辟 拜手 矣。 郊文王立之明堂,蓋 曰「王朝步 廟, 武 稽首 雍。」《魚藻》 ^ 豐一鎬相述作,皆聖人 蓋 朝 洛 \pm 以 祀審矣。《詩》曰「王 尊 $\overline{\pi}$ · 所立 誥 休享。 王 門,武 以 自周 V 者之制 又 也。 配 日 王所 天 至于豐」, 予不 則 曰:「有 在是也,社 : 文王不以 則 惟 作之也 四郊 鎬 以 立,故 極矣。 辟雍 敢 洛邑 京 秬 那 是 有 明 幽

不 所 可 不 得已焉。 以 莫之考 孔 也 氏 所 祭 謂 祭 日 群 徹 廟 而 者,其宜 不 燕 繹 與 賓 稱

然後

徹

而燕諸父兄弟焉

親 故 之福 願 順 嗜 是 也。 加 君 具 則 皆 子 也 君 其 樂 壽 慶 司 之飲 皆 人 樂,云『皆 孫 歡 禄 引之。」傳: 考。 將,行 公室 樂具人奏,以綏後禄。 也。 甚 安。 既 勿 也 入奏,以 食,使 順于 廢 孔 醉 傾 也。 後 長幼 而 同姓之臣 惠 既 危, 禮 日 人」者,歌 長行之。」《正 孔 飽 安後 君 替, 甚 皆再 ,從今以 「綏,安也。 故 時, 壽 骨 廢; 得其 日 且 維 大稽首。 肉 拜 無 之福禄。 考。」 其盡 咏 引, 歡 (時, 有怨者, 稽 後之日 雖 首 而 此 之。 義 長 惟 爾殺 安然後受福 異 君之福 其 神 》:「燕、祭不 君 也。」箋:「 曰:「神乃 樂 骨肉歡 也。 子子 慶 丽 嗜 既 德 器 解。 飲 將 能 皆慶君 宗 禄安。」 則 盡 孫 食, 莫怨 族不 而 同 惠, 孫 歆 燕 君 禄 使

矣。 置以 得 君 不 以 所 謂 服 臣 案 冠。 加 曰三吏。 之貴者,皆謂之天子之大夫。 首,非尊家臣,以 集傳》: 臣諸 其所 用 君 謂 出 傳》: 明矣。 ^ 馭其 不然 臣禮 禮 封 等。」由是觀之,寰内諸侯不得 祭于 网 禮 屬。 事 父昆 者 卿 始 • 凡 ,衆多如 ^ 吏。」大小 也。 周 ,何也? 也 廟 周 郊 公也 太宰職 封 雖 弟 而 廟 官 特 臣,不 周 哉? 寰 之 燕 制 牲 . 君 公 内 辟 于 前 天子 雨 典命》曰:「及其 都鄙 他 記 ĕ E 不以 不不 君 寢 不得云始 稽首 周公以 不 故 廟 也。」《春秋》之法,王 》曰:「大夫之臣 而 臣諸 之同 之吏,統 純 以 臣 非 也,辟天子也。 樂皆入奏于 灋 禮 用 奉神,後 所 蔡仲 父昆 姓 則 臣 使 封 以 禮 蔡 三公稱公, 以 也,不得有 爲 于朝廷而 則其子孫烏 爲己 馭其 蔡 弟。」始 仲,蔡仲 IE 純 寢 出 仲 也 寝 以 以 〕卿士 官, 封, 不 則 臣 藏 也 封 喪 E 廢 絶 禮 尋 不 亦 臣 稽 衣

「小大稽首」之義,則知非公卿有田禄之詩。

朱子柏舟詩序辨説正誤

幽、厲 几 亦 執 尚 列 不匡,其刑墨。」故 誨之旨未嘗 耆艾之齒朝夕諷 書》曰:「若藥不瞑眩,厥 愿 惟 (藝事者, 所 婦、惸獨 士 若夫準人牧夫、左右暬 執其昏愚,肆其慆慢,虐我烝黎,俾 獻詩。」《招》之詩曰:「畜君 院惟失此道,速戾厥躬,而顛覆大命。 周 而糾 面 語》有之曰:「天子 折君過,以 恭責難於君,下至於芻蕘、商 老幼靡所告愬,以 絶 以 也。 又厥 議,繩愆糾繆箴諫之篇、規 人臣有 先王之訓 直 辟 諫 加 伏死之争,無從令 進 疾不瘳。」微文刺 助成王 聽政,使公卿 有之日 一御、貴戚之臣、 藥石,鍼膏肓。 自 何尤?」國 恣適 一德 1:「臣 顯 己 元 旅 也。 夫 而 夫 至

> 豆盡 之憂,非所聞也 斥爲懟上等諸不道 將明大義,垂臣戒,而 先王有不諫之刑矣,未聞 王之訓,下竭忠愛之誼,以 焉。」棄君于惡,謂之不臣。 者 譏 盡言,而不以訕上之罪正於司寇也? 深痛,暴王不得以爲忤。 無 以 一諫之志,啟萬 風 罪,聞之者足 諫 引 微 針 世言語之禍 以戒。 治 開 痼 猥舉 人君縱 疾 有歸過之罰也。 不然,幽、厲豈 或 夫惟詩人上奉先 幽、厲之所 劘切其君。 于天 序》 ,速國家危亡 念之心,傷忠 地 日 :「言之 有與立 不罪 言 能 聞 受 雖

